


Daga New Testament



The New Testament in the Daga Language of Papua New Guinea

Daga New Testament
The New Testament in the Daga Language of Papua New Guinea
Nupela Testamen long tokples Daga long Niugini

copyright © 1974, 2004 Wycliffe Bible Translators, Inc.

Language: Daga

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023
086528d0-e040-5a5a-9a7a-41c08d0c645e

Contents

FRT	1
MATIU	2
MAK	52
LUK	83
DION	139
Gutut	177
ROM	227
1 KORIN	250
2 KORIN	273
GALESIA	287
EPESAS	296
PILIPAI	304
KOLOSI	310
1 TESALONAEKA	316
2 TESALONAEKA	321
1 TIMOTI	324
2 TIMOTI	331
TAITAS	335
PAELIMON	338
IBURU	340
DIEMIS	357
1 PITA	363
2 PITA	370
1 DION	374
2 DION	380
3 DION	381
DIUT	382
AROGAMENI	384

NOP EWAKEWA

Iesu Keriso Nop Oit Mega Kakaewa

The New Testament in the Daga language of Papua New Guinea

Nupela Testamen long tokples Daga long Niugini

Nop Ewakewa

Iesu Keriso Nop Oit Mega Kakaewa

The New Testament in the Daga language
of Papua New Guinea
[dgz]

Translation by Wycliffe Bible Translators

© 1974, 2004 Wycliffe Bible Translators,
Inc.

Print publisher: 2004 Wycliffe Bible
Translators

Web version
2013, Wycliffe
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0/>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators, Inc.* (but not in any way that suggests that they endorse you or your use of the work).

- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na nara-pela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

Ok Paula Muga Muga Uruga

Matiu Iesu Keriso oisewa sen

Iesu isimure waiwa

1 Iesu Keriso ani sibabasi mega anenonin e taueniwa, ap gapan Eibaraam naewa mega yan ge yan onamuin ene Devit yanen. Devit naewa mega yan ge yan onamuin ene Iesu yanen.

2 Eibaraam orup Aisik baraan,
Aisik orup Diekap baraan,
Diekap orup Diuda tase gwani den semon.

3 Diuda orup Peres ge Sara semon inamu Teima,

Peres orup Esiron baraan,
Esiron orup Ram baraan,

4 Ram orup Aminadap baraan,
Aminadap orup Nason baraan,
Nason orup Salomon baraan,

5 Salomon orup Boas baraan inewa Reap.
Boas orup Obet baraan inewa Rut,

Obet orup Diesi baraan,

6 Diesi Ayop Devit baraan,
Devit Yuraya kwapuraewa naise,
gapan Solomon baraan,

7 Solomon orup Reaboam baraan,
Reaboam orup Abaidia baraan,

Abaidia orup Esa baraan,

8 Esa orup Diosapat baraan,
Diosapat orup Dioram baraan,
Dioram orup Usaya baraan,

9 Usaya orup Diotam baraan,
Diotam orup Eas baraan,

Eas orup Esekaya baraan,

10 Esekaya orup Manasa baraan,
Manasa orup Emon baraan,

Emon orup Diosaya baraan,

11 amba Diosaya orup Diekonaya,
gwani wai den semon.

Wam ame gapan at Babilon nagirewa tauan at Isurero nagirewa up tamon at muga ewagai sia entan amon.

12 At Babilon nagirewa up tamon amone, at muga gan wanumune amba sia entan ewagai

onamone, gapan Diekonaya orup Siatiero
baraen,
Siatiero orup Serababero baraan,

13 Serababero orup Abiut baraan,
Abiut orup Elayakim baraan,
Elayakim orup Eso baraan,

14 Eso orup Sedok baraan,
Sedok orup Akim baraan,

Akim orup Eliut baraan,

15 Eliut orup Eliesa baraan,
Eliesa orup Matan baraan,

Matan orup Diekap baraan,

16 Diekap orup Diosep baraan.

Diosep Meri memewa amba Meri Iesu inewa. Amba Iesu Meri potap yanen, me God wa watu eneni Keriso, God om enuni apanewa.

17 Ap gapan, Eibaraam ani sibabasi mega yan ge yan onamuin ene amba Devit yaneni ameme iragi aonagaet pusi nawan degede (14) amba Devit ani sibabasi mega yan ge yan onamuin ene amba at Babilon nagirewa tauan at Isurero nagirewa up tamon amone ameme iragi aonagaet pusinawan degede (14) amba at Babilon up tamon amone nagirewa ame ani sibabasi mega yan ge yan onamuin ene amba Keriso yaneni ameme iragi aonagaet pusinawan degede (14).

Iesu Keriso yaneni guturewa

18 Iesu Keriso anenen yaneni guturewa mam, Me inewa Meri apan Diosep gan-ganasen dere naine mutapen, go namu tobob ya tane gapan, Meri mek anuni Guewa Posewa Woup Seni amun mega gapan bagup tan.

19 Diosep me apan kakae tamanawa menan Meri umam ya anupen menan karaua ae veat anun, menan me imup ununke uon ae veat anu taiwandin.

20 Go mame anuiwandini, Diosep enok ineni gapan God anea mega da taue anega dien, "Diosep apan Devit ani sibabaseawa, Meri wara naitapen menan pa gega ak, tap ya anu, iwa dim da me potap digumin taniwa ame Guewa Woup Seni amun mega gapan tan.

21 Me orup apan baraepi, amba ge yaua Iesu diai, iwa waenapan mega koewa muga anu ae vepen menan taueta."

22 Ayop God nop mega namu wani mame iragi tan tavewa venasen ame

God no oise waiwandini apanewa gamup anega wan,

²³ Waenorini denawa bagup tapi, amba orup apan baraepi, me yaua Imanuero diain, (Imanuero gueguewa ame God den inanup wandia).

²⁴ Menan, wam ame Diosep enok ine kandae yon wardeni gapan Ayop anea mega anen dieni di tan. Ap menan me waen Meri naisen.

²⁵ Go mu dere wainan da ya inane go mondi iniwanumune aiwandin eni orup apan yanen. Amba Diosep orup ame yaua Iesu dien.

2

Buanae batnagine nagirewa Iesu yawapen tauan

¹ Apan Erot ayop tani wamewa Iesu at Diudia pa sewa Betiriem gapan yanen. Iesu yaneni ewap, buanae batnagine nagirewa upi, wam dotouini arige gapan Ierusalem tauan amba singui waenapan inamup anega wayawamon,

² “Diu nagire ayop egawa da mapa yaneni amba? Nu buanae, me paua mega da, wam dotouini gapan yawatoni menan wa taragaset wa onanton.”

³ Ayop Erot, amba Ierusalem pa nagirewa den, oit ame anune gapan mu seke tane amba gop anune.

⁴ Ap menan, Ayop Erot pirisi bawarewa ge waenapan iup wadidiamuine nagirewa munan wan tauane. Me singui anega wayawamon, “Mesaya yanat mega at ambe gapan yanapen wane?”

⁵ Mu gare anega wadiane, “At Diuda pa Betiriem gapan yaneta. Iwa God nop mega watagaet waiwandini apanewa ok ap anega sen,

⁶ Go e, Betiriem nagirewa, at Diuda gapan, sewa sewa iragi gapan pa sewa ega epara da uon, go amun ega wandia, iwa e yaumakayap Ayop da taueta, me ne waenapan nega, Isurero nagirewa, kwayup tamota.”
Mu ayop Erot ap anega wadiane.

⁷ Boge ayop Erot buanae batnagine nagirewa karaua venamu wan tauane,

iwa wam ansena buanae erekwa muga da yawane anupen menan, singui wayawamon.

⁸ Ap anuni amba, ayop Erot buanae batnagine nagirewa Betiriem watu enamoni gapan anega diamon, “Aisen, amba orup ame yoa yambuni tan. Yop tan en me yawanewa menawaet onaen oit wadiagen, amba ne den ange tauap me wa taragasep.”

⁹⁻¹⁰ Erot nop ame wan anune ewap mu di amon, amba buanae wam dotouini gapan sia yawane. Ap menan mu daranmuwan aton aigap da anune. Buanae ame namumup di aiwandin yao nau amuiwanumune amba Iesu ambagan wardeni arewa taueni aigap yonen.

¹¹ Pa gwanap unum amon, mu orup inewa Meri dere yawamon amba omanimup enun wa taragase. Boge mu momorap muga watapan amba yan garaet muga muga Iesu wanane. Yan ame agim gwayayame den yananagaetawa amba dagin irinewa amba oma ose tutu denawa. Puraput ame garewa muga baware.

¹² Entane, ayop Erot ine ya amopen menan tagigirewa God enoga wadiamon menan negin ugape gapan ewagai at muga sia amon.

Iesu ine mame den karaua at Idip amon

¹³ Mu amone ewap, Ayop God anea mega da Diosep inap enoga taue anega wadien, “Ge ao yona, orup ine dere tambumo, tap aisen, aipa at Idip gapan waniene, ne wadiaepen amba sia onaen iwa ayop Erot orup togurep boepen menan yoa tapen taiwan.”

¹⁴ Menan Diosep ao yon wande, orup ine dere tambumo mum oap at Idip di amon.

¹⁵ Mu ap mepe di wanumuin ene Erot bop tan amba sia ewagai onamone. Ma venaseni menan God noa watagaet waiwandini apanewa wani tavewa tauen. Me gamup God anega wan, Otuna at Idip gapan wa oitapen tau aeta.

Orup otua apanaet gurane

¹⁶ Wam ame Ayop Erot buanae batnagine nagirewa amatamu taiwandin mu negin ugup amone oisewa anuni ugu gangan naen. Menan ita nagire megawa

wa oimon orup apan otu kamontua en muga derewa amba gauarapewa den, pa Betiriem amba mainepe den iragi guritamen. Buanae batnagine nagirewa wataget buanae ere venaseni gapan anune menan mu Iesu yaneni wamewa wadiane ayop Erot anuni gapan me orup guritamepen menan en muga om tan.

¹⁷ Ap gapan, watageta apanewa Dierimaya, God no oise waiwandini tavewa tauen. Me anega wan,

¹⁸ Pa sewa Rama gapan unuk da anuivin, irip turup waiwanum.

Watageta waen Reisero dugup mega naewa, munan irip waiwan, amba imua to aramepen menan umap uon, iwa naewa mega gase borit wane.

Ewagai at Nasaret onamon

¹⁹ Ayop Erot boeni ewap, at Idip gapan, Ayop God anea mega da Diosep enoga die anega wan,

²⁰ “Ge ao yona, orup ine dere tambumo amba at Isurero ak, orup togurapen tane nagirewa gaseget borit wane,” ap anega wan.

²¹ Menan Diosep yon wande, orup ine dere tambumo, at Isurero di amon.

²² Wam ame Erot otua, yaua Akelaus, mamewa uewa ware at Diudia gapan ayop tan. Ap oisewa Diosep anuni menan me at ame aepen tani tap anun. God enoga tagigit manega wadien anun, ‘Mapa ya wainge.’ Ap menan totnage at Galili arige aen.

²³ Ap mepe tauane, pa sewa bawarewa Nasaret gapan wanumone. Menan God no oise watagaet waiwanumune nagire nop muga tavewa tauapen menan ap mepe om inen. Nop muga ame Iesu menan anega wan,

Waenapan pa Nasaret apanewa diain.

3

Dup iamuiwandini apanewa, Dion, opata waiwandin

¹ En arugataet uon tani ewap, Dion, dup iamui apanewa, at Diudia pua at kaimewa gapan tauue opata anega waiwandin,

² “E inak koewa taiana ae vean, imuya entanen iwa God toemu mega amunewa inayap tauapen taiwan,” ap anega wan.

³ Mame gapan, watageta apanewa Aisaya, God nop oit mega waiwandini tavewa manega fauen, ame anega wan, Apan da pua, at kaimewa gapan, opata anega waiwandin.

Ayop nuga negin mega wa tarasen, wat tamanamene amba tauep. Ap anega wan.

⁴ Dion wanup mega man kameru etua gume den eniwandin, amba berip mega, man etua paniwandin. Me taba paki ge onaro naiwandin.

⁵ Pa Ierusalem nagirewa amba at Diudia iragi ge kaum Diodan asepa gan mapa gan nagire den Dion ine tauan.

⁶ Mu da da koewa muga vesianumune nagirewa kaum Diodan gapan dup iamuiwandin.

⁷ Wam ameme anu tumat dugupewa yaua Parisi ge Sadusi nagirewa aruga Dion dup iamopen menan ine tauane go Dion anega diguguramon, “Guegue ega mokare seram naewa umap! E darinaya da enuni gapan tap anu, dup iaet wa, amba God wae wae nemoro mega tawa aisepen taiwanin?

⁸ Koewa ega yamu entanet wane, garewa inak tamanawa gapan yambuni ta aisiwanian.

⁹ Ek mondi anega ya wane, ‘Nu omayan baewa Eibaraam menan God atonunu anuiwan,’ ap ya wane. Wapena anun, e Eibaraam naewa megenat wane ya umap, iwa God Eibaraam naewa mega upi gwat ma wapi di venat mutain.

¹⁰ Wapena anun, endi mame di oma visiwa, gurini apanewa nugusepen nauase wandia. Oma da da tavewa kakaewa ya iamopi gure ireta.

¹¹ E koewa ega anu ae veana menan kaum gapan dup iaivin. Go apan da ne evinap oniwan, me God Guewa Woup Seniwa ge oma yamewa merao gapan dup iaiwadata. Me baware, ne uon, me pusí okomewa tambupen menan ne umanap uon.

¹² Me iman tauue oma makewa bongameta, makewa kakaewa ai bongame mek mini siwadata amba pokewa mek mini

siwandata. Makewa kakaewa tambu ae dugupa eneta go pokewa yaibobot oma meraovewa gapan uatamep yagimota.”

Dion Iesu dup ieniwa

¹³ Amba Iesu at Galili ae ve, Dion dup iapen menan kaum Diodan onen.

¹⁴ Go Dion anu yave Iesu dup ya iat anuni menan, anega dien, “Ge dimen inanap tauaan? Ne piup apanewa, ge gare dup ianegepo umap.”

¹⁵ Go Iesu gare wadien, “Wam endiwa menan dup ianegewa umap. Nu ap tata God ayamat mega di tait.” Iesu ap wani, Dion umap wan.

¹⁶ Menan Dion Iesu dup ien. Dup ieni boge Iesu kaum ae ve kwatata ao dotoueni. Amba kiman ase watapen, boge God Guewa Woup Seniwa nenip bairantan mini kimani visiwandin Iesu wapip wanden.

¹⁷ Amba nop da kimani anega tauen, “Ma ne otun iragenawa, ne menan anu gurinawa, me gamup ne imuna ae meare tau aen,” nop ap anega kimani tauen.

4

Seitan pusi warup Iesu inap taiwandin

¹ Boge God Guewa Woup Seni Iesu nau pua aen, Seitan pusi warup tayawapen menan.

² Taba uon sinunu in doreni wam ge mum apane dere uon tani ewap me enup aren.

³ Seitan, pusi warup taini apanewa, me inap tau anega wan, “Ge God Otua wanigewa, gwat ma diamo taba buredi venat musep na.”

⁴ Go Iesu gare anega wan, “God nop mega ok anega seane, Waenapan inak muga ibariwa taba naine megenat uon, go God nop waini gapan inak warwanum,” ap anega wan.

⁵ Boge Seitan sia nau pa sewa Ierusalem dot ae ware God Paewa aigarip aigap iragenawa gapan baraen ap mepe yaoyao yonen.

⁶ Seitan anega dieni, “Ge God Otua wanigewa, map mepe bup ta wa kugunak

aipa piupa wanik, iwa God nop mega ok anega seane, God wap anea mega upi tau, genan kwayupaga yaentuk ta naugep vitai, Anea nanimup di warak nauge vise pia bat gimagain, pusiga agima ya en manamai.”

⁷ Seitan ame wani Iesu gare wadien, “Ne ap ya tain, iwa God nop mega ok anega seane,

Ayop gega God irewa yawapen menan ya nanamasewa.”

⁸ Sia Seitan Iesu wat naue tunup ideve aigapewa dot ae, boge piup at at iragi toemu kakae guragut muga muga ewasen.

⁹ Ewase Iesu anega dien, “Ge iak poe inanap ta wa taragat nimanegewa, toemu mame iravi genain,” ap anega wan.

¹⁰ Go Iesu gare anega dien, “Seitan, ae venek, asira ak! God nop mega ok anega seane,

Nu Ayop nuga God megenat wa taragaset, ayamat mega taivinait.”

¹¹ Boge Seitan Iesu ae ve aen, amba anea tauan Iesu wat agoasen.

Iesu nao mega erekwa at Galili gapan watapen

¹² Wam ame ewap, Ayop Erot ita mega nagirewa Dion, waenapan dup iamuini apanewa, waran gwat nokap baraene. Iesu oit ame anuni gapan, me ewagai at Galili sia aen.

¹³ Me at Galili taueni, me pa sewa mega Nasaret gapan ya wanden go ae ve aen pa sewa da, kaum awan etope, yaua Kaponiam gapan iniwandin. At ame dugup Sebulon ge Naptali arik muga aen.

¹⁴ Ap venaseni gapan God nop mega watagaet waiwandini apane Aisaya wani tavewa tauen. Aisaya ok anega sen,

¹⁵ At Sebulon ge at Naptali, negin aen awan bawarewa tauiniwa, kaum Diodan asepa gan, at Galili ian ugape aruga wanumuine arewa.

¹⁶ Waenapan ameme imu pose mum tauen iniwanumune, ganat baware yawain.

Bop guewa inamup wandini nagirewa, ganat inamup taueta.

Aisaya ok anega sen.

¹⁷ Wam ame use aeniwa, Iesu opata mega erewa wan, “Koewa ega gapan imuya entan tan, toemu kimaniwa onen mananiwan.”

Wa ewamot venamu erewa waiwandin

¹⁸ Iesu kaum awan Galili etop ap aiwandini, me apan tase gwani dere yawamon, Saimon, yaua dawa Pita, amba me gwaniwa Anduru. Mu ia muga kauma uariwanum, mu meo dawane taine nagirewa.

¹⁹ Iesu anega wan, “Ewanap onaen, ta ewaepen gapan e waenapan dawane tan.”

²⁰ No utap, mu ia muga ae vean amba me ewap amon.

²¹ Ap mepe use amonewa, me tase gwani derewa sia yawamon, yaumua Diemis ge Dion, ame apan Sebedi otu waiwa. Mu kabum muga gwanap ia muga nadi waran tata kakayat taiwanunum. Amba Iesu venamu wan.

²² Ap gine tutup kabum muga ge mama-mua ae vemon amba Iesu ewap amon.

Iesu vek nagirewa wat inakam mumi-wandini

²³ Iesu at Galili iravi tau ge tau aen. Diu nagirewa iup anuine paewa gwanap wadidiam wandin. God toemu mega Oise Kakaewa opata gapan waiwandin. Amba waen apan enkana ankana nagirewa amba vek gine ugup ugup iragi wat inakam mumiwandin.

²⁴ Me ap taiwandini oisewa, at Siria iragi senare tau aen. Menan waenapan vek muga ugup ugup iragi tambumon me inap tauane. Ame ugu vegaek baware anuine nagirewa, airampu wa guguramoniwa, wam wam gapan vek daram daram taine nagirewa, amba pusi nani itani waniwa, me iragi wat inakam mumen.

²⁵ Waenapan arugataet at ugup ugup gapan tauane ewap amuiwanumun. At ugup ugup ame yaumua, at Galili ge at Diudia amba pa sewa yaua Pa Aonagaet, amba pa sewa Ierusalem, amba kaum Diodan asepa gan wanumuinewa.

5

Atonu den wat aipakam warapen

¹ Wam da, Iesu waenapan to iamene yawamo, menan me dot ae tunup nawanep ae warden. Me wadiamot megawa inewa tauan iamene.

² Amba me opata mega manega wan,

³ “Guewa gapan dai momeni nagirewa, God wat aipakam mumiwan, toemu kimaniwa amun megawa iravi mugawa di.

⁴ God wat aipakam megawa, irip turup waine nagirewa mugawa, iwa mu wabibigam mumeta.

⁵ Imua ae bigaren taine nagirewa, God wat aipakam megawa wariwanum, iwa mu piup ma yon borain.

⁶ Waenapan tamana tapen menan, imu pose kanda mutane taine nagirewa, God wat aipakam mega munep umamup tamota.

⁷ Waenapan munan bagu sisi anuine nagirewa, God wat aipakam mumeta, God gare munan bagu sisi anuta.

⁸ Potamu nenengawa nagirewa, God wat aipakam mega wariwanum, evi amba mu God yawain.

⁹ God menan nonup baigan barine nagirewa, God wat aipakam mega mu inamup, iwa God otu waiwa diamota.

¹⁰ God menan inak tamana taine nagirewa, wa koeragam mumiwanumune menan, God wat aipakam mumiwan, toemu kimaniwa amun megawa iravi mugawa di.

¹¹ Waenapan nenan nipec diae wa koeragam imaepi nop koewa ugup ugup inayap aopan wapi ame gapan aton anun amba God wat aipakam imaeta.

¹² Menan daramuya wap, aton tan, iwa kiman gapan garewa ega arita. Ap mini, e umayap, wataget God no oise waiwanumune nagirewa wa koeragam mumane.”

Siuran ge ganat maibewa

¹³ Iesu sia anega wan, “Taba siuran den natawa dansewa da di, ap mini sia e piup ma siuran megawa, go siuran dansewa mega ni nen sepiwa, e anenen tane amba dansewa sia wata? Ame umap uon, siuran

ame denanu mini ae damagep, waenapan tau gagap amuin.

¹⁴ E piup ma ganat megawa. Sewa baware da awana tune gungunu ya wanumoin go pa iravi aroga yaviwanumain.

¹⁵ Apan dun mega ire ware karaua unup ninokap ya baraeta. Go dun aroga baraepi ame gapan waenapan pa gwanape iravi ganat muneta.

¹⁶ Ap umap, ganat ega waenapan inamup ganase wap, ame gapan mu kakaewa ega taianawa yavepi mamaya kimani wandini mu wa taragatain."

Iup namua tavewa tauen

¹⁷ Iesu sia wan, "Iup namua amba God noa waiwanumune nagire nop muga den, ise wat mutapen menan ya tauan, ap ya anu nimanegene. Go nop muga tavewa mega tauapen menan tauan.

¹⁸ Ne tave di wadiaivin, wam da piup ge kiman aiwandan uon tata go namu God iup mega iravi, semu otu koentu den, aiwandan tavewa mega iragi taitamep amba uon tata.

¹⁹ Ap menan orup ansena iup namua semu otu koentu to paise yone ae evene wai iup namua to paitapen wadiamopi, mu toemu kimaniwa gwanap nutu uoni nagirewa diamoin, go mu da da iup namua ayamase ta amba waenapan iup mame wadiamopi mu toemu kimaniwa gwanap mu bawarewa nagirewa diamoin.

²⁰ Ne ma kaimakaet wadiaivin. E God menan inak tamana taiana ame Parisi nagirewa ge iup wadidiae nagirewa tat muga garawasepiwa e toemu kimaniwa tauai go e ya tanewa e ya tauai."

Gari gangan ge baigan nopewa

²¹ Iesu sia wadiammon, "Waenapan watageta nagirewa wane guturewa e anuyan. Ame mam, Apan da ya togura boep. Go waenapan da togurep boepiwa, me ware wanene paewa gapan tauain. Watagaet ap anega wane.

²² Go ne sia aigap wadiaivin, e da da evenae wai inamup gari gangan anunewa, ap gapan wanene tae itan enapen tain. Sia, evenae da kaimakaet nipep anega dianewa, 'Ge dantaga uon di!' Ap gapan

kansoro nagirewa namup wanene taepen menan yonai. Amba waenapan da bumbawam nagirewa diamonewa, ap gapan oma merao arewa aisepen taiwanin.

²³ Ap menan, God Paewa gwanap, puraput sine watarewa gapan, puraput gega yan tapen anua go evenaga da inap ta koeragamean ap me anua,

²⁴ menan puraput gega God ya wana, ap mepe ae ve, go evenaga baigane ta amba sia onak, yan garaet gegawa God wan.

²⁵ Evenaga da koewa gega menan wanene tagepen anupi, menawaet ni gwane ae amupen, wat nauge wanene paewa tauapi tawa. Negina wa nengamene uon tap. O uon wandepiwa, wanene i apanewa nanip bat gimageta amba wanene i apane punip nagirewa nanimup bat gimagain, mu waregep gvat nokap bat gimagain.

²⁶ Tave di waivin, ge ya tau agai, wanene garewa mega iragi taitamewa amba tau agai," ap anega wan.

Togane tapatap

²⁷ Iesu sia wadiammon, "Waenapan watageta nagirewa wane guturewa e anuyan. Ame, Togane tapatap ya tane. Wataget ap anega wan.

²⁸ Go ne nop ewakewa wadiaivin, orup da waen yave, imua gapan wainan gogo den tat anupiwa ame gaset wainan gogo waen ame den tan.

²⁹ Menan yamaga nutup nauge aep koewa tawa, ae ma warup aipa uat ena aep. Etuga semua da wakaumawa ame kakae di, iwa ap ya tawa ge tawaga uruga oma meravewa gapan uat enagain.

³⁰ Amba naniga nutup wat nauge ae koewa tapiwa, to ketnak aipa uat! Naniga ame wakaumeawa ame kakae iwa ap ya tawa ge tawaga uruga oma meravewa gapan uat enagain."

Waenewa tandayase ae vepi nopewa

³¹ Iesu sia wadiammon, "Watageta nagirewa anega wane, Apan ansena da waen mega ae veat anupi, waenewa ae vea vea ogewa waenewa se wanep. Ap anega wan.

³² Go ne endi aigap sia wadiaivin, apan ansena da waenewa union ae ya veta, go waenewa apan dawa den aeni menan ae vepiwa, ame umap. Go waenewa union ae vepiwa memewa ta pariseni gapan waen ame apan dawa naiseni togane tapatap di tata, amba naiseni apanewa ap anega den sia di.” Ap anega wan.

Wa agi taine nopewa

³³ Iesu sia wadidiamon, “Watageta nagirewa anega wane, e den anuyan, Agi ega ya to paitane, go Ayop inap agi wayana, wat natan om gapan taiwanian. Watageta mu ap wane.

³⁴ Go ne ewake wadidiaivin, evenae wai munat wa agiat momane nop ega tavewa mu anupen menan tanop ya tone. Kiman amun mega gapan den tanop ya tone iwa kiman God wandini arewa.

³⁵ Amba piup amun mega gapan den tanop ya tone iwa piup mame, God pusiwa amuini arewa. Pa sewa Ierusalem, God wandini arewa, amun mega gapan den ya tone iwa pa sewa ame Ayop bawarewa God pa megawa.

³⁶ Amba iaya gapan tanop ya tone iwa ap tane iaya gumewa daiton da pomponu go pumpuni ya entan tata, ap menan iwa dimen iaya gapan tanop toi.

³⁷ Menan agi tavewa wandepiwa, tave di wapen, amba agi tave uon wandepiwa ame uon di wapen. Ame use aigapewa da sia wawa, ame Seitan arok wana taueta.”

Koewa garewa ya tapen tantanewa

³⁸ Iesu sia wadiammon, “Watageta nagirewa anega wane, e anuyan.

Apan da evene yame make warupepi, gare yone evenewa yame make warupep. Evene no done to bunaepi, gare yone evenewa no done to bunaep. Mu ap anega wan.

³⁹ Go ne sia aigap wadiaivin, waenapan da inagap koewa tapi garewa ya tane. Orup da nawanegap togepi gare ya ta go nawanega yamu entane sia togep.

⁴⁰ Amba apan da enu yawage wa wanup gega aigape warupe, wanup gauarape menan den wapiwa, goandage ya anu den sia wan.

⁴¹ Apan da wandap aepen anuni, ge ik mega yongotu ago ta aget wapi go ge wandap wat ak.

⁴² Apan ansena inagap mup wapi di wan amba puraput gega mondi wariwandan evi sia genat wapi goandage ya wa.” Ap anega wan.

Anavi munan anu gurinampen

⁴³ Iesu sia wadidiamon, “Watageta nagirewa anega wane anuyan, Pa maineyape nagire munan anu guran, amba anavi ega tandayat muman. Watageta nagirewa ap anega wan.

⁴⁴ Go ne sia aigap wadiaivin anavi ega munan anu guran. Amba ta koeragam imaine nagirewa munan God inap mup wan.

⁴⁵ Ame tanewa, e Mamaya kimaniwa otu waiwa. Iwa me wapi wam mega kakaewa koewa nagirewa dere aigamup ganase waiwadata, amba ugin watu enep tamanawa taine ge gegerawa taine nagirewa aigamup visiwadata.

⁴⁶ Waenapan imumu potamu inayap warepi ame e gare mugenat munan anu guranewa, ap gapan God wat aipakam mega ya warai. Iwa koewa taine nagirewa mu den ap anega di, mu evene wai den muk gare gare baigan taiwanum.

⁴⁷ Amba evenak waigawa mugenat gau-namu tawa, piup gueguewa taine om daiton di taiana, aigapewa da uon. Iwa ya anu tumasine nagirewa mu ap anega di, evene wai den muk gare gare taiwanum.

⁴⁸ Ap menan kakaevet tan, e Mamaya kimaniwa kakaevet taini mini.”

6

Kayakayawan nagirewa munan anupen

¹ Iesu sia wadidiamon, “E God menan kakaewa tanewa waenapan yawaepen menan ya tane, iwa waenapan yawaepen menan tanewa, Mamaya kimaniwa garewa da ya eneta.

² Guegue ame mam. Kayakayawan taine nagirewa puraput munapen tanewa, pum upunan opata gapan upine ya wadi-amone, ame da wa da ta taine nagirewa ap mini ya tane. Mu yaumu ao warapen menan iup anuine paewa ge negin gagap

ap anega taiwanum. Ne tave di wadiaivin, mu garewa mugawa uruga piupa gase warane.

³ Go wam ame kayakayawan nagirewa wan dim dim da munanewa, evenae wai oit ame den ya anupen menan tan.

⁴ Ap menan taiana oisewa karaua wandep amba Mamaya kimaniwa imuya yaviniwa garewa ega aroga eneta.”

God inap mup wapen noa

⁵ Iesu sia wadidiamon, “Amber wam ame God inap mup tapen tanewa, da wa da ta taine nagirewa mini ya tane! Mu atonu den iup anuine paewa gwanap, pa pa nambaya den, waenapan yawamopen menan apan apane den aopan aopan mup taiwanum. Ne tave di waivin, mu garewa muga uruga di warane.

⁶ Go wam ame mup tapen tanewa, pa ega ega gwanap unuk aisen tonan boran, amba Mamaya ya yavianawa inap mup wan. Me mup ega karaua imuya potaya gapan waiana ame yavini gapan garewa eneta.

⁷ Amba wam ame e God inap mup tapen tanewa, ya anu tumasine nagirewa mini mup memo mawagamen ya waiwanian. Mu aopan anega anune, ‘Nu nononga wata God nuga anuta.’

⁸ E ap umap ya tane, iwa Mamaya imuya asigip tan ap menan mup ega me imua namu anun amba evi waiwanin.

⁹ Ap menan mup manega wan, Mamanua kimani, yauga ao warat genan ayamat taivinain.

¹⁰ Toemu gega amunewa inanup tauiwan-dan.

Kimani anuan taiana mini piup gapan ta nuningan.

¹¹ Taba nuga wam wam nuningawa endi den nun.

¹² Koewa inanup taine anuton ae vivin menan, koewa nuga anu ae ve.

¹³ Dim dim da pusinup ya warup naune age.

Koewa Taini Apanewa ya mananepen menan ise wataningan.

¹⁴ Wam ame waenapan da koewa inagap tapi, ge koewa mega anu ae veawa, ge Mamaga kimaniwa koewa gega anu ae veta.

¹⁵ Go waenapan da koewa muga anu ae ya veawa, ge Mamaga kimaniwa koewa gega anu ae ya veta.”

Sinunu ina ina

¹⁶ Iesu sia wadiamon, “Wam ame God menan, sinunu in dorawa, da wa da ta taine nagirewa mini ya ta ameme yawaget gegawa nawanega gaip ya top, ginak namuk ya tam davep, da wa da ta taine nagirewa mini ya ta. Nop nega mondi uon anun di waivin. Da wa da ta taine nagirewa garewa mugawa uruga piup gapan gase waran.

¹⁷ Go wam ame sinunu in dorawa, ginak namuk bigi wat amba onaro iagap den wat.

¹⁸ Ame menan waenapan iragi ge sinunu in doringianawa ya yavep, go Mamaga da ya yavinewa megenat yawagep, dim da karaua taingianawa garewa gega me di geneta.”

Garewa nuga nuga kimaniwa

¹⁹ Iesu sia wadiamon, “Piupa ek ingane enan kwan puraput diri gagap ya se dorane, ap mepe wan dim dim puakaeta amba denip eneta, koe tata, amba ap mepe den up nagirewa benak unum amo up tain.

²⁰ Go God menan anuiwaniampina garewa ega aupa kimani diri gagap se dorane. Ao mepe wan dim dim ya puakaeta amba denip ya eneta, koe ya tata, amba ap mepe up nagirewa benak unum amo up ya tain.

²¹ Kwan puraput ega wandini arewa, imuya ap mepe wandeta.”

Wapinu ganase waini noa

²² Iesu sia wadiamon, “Yamaya ame etuya dun megawa. E yamaya kakae wandepiwa, e etuya uruga ganat bararaeta.

²³ Go e yamaya koerage tapiwa, e etuya uruga sisip tau aeta. Boge e ganat inayapewa ame sisip tau aeta. Ap menan ganat ega sisip wandepiwa, sisip ame sisip aigap iragenawa, uni gware den.”

God ge piup kaikoro mega nopewa

²⁴ Iesu sia wadiamon, “Amber nao apane da aritawa mega dere wanumopiwa, ame gauaramup nao ya taiwandata iwa aritawa mega dawa imua waren amba dawa

imua ya wat kakayesen. Da noa wareta, amba da tandayaset. God ge moni dere dere om daiton tambu tapen umap uon, daiton warai dawa wakaumai.”

²⁵ Menan Iesu wadiamot mega anega wadiamon, “Ap menan ne wadiaepena anun, inak ega menan gop ya yagiae wandan. Inak ega warapen menan taba ge kaum ambagan tam na na amba etuya okomewa ambagan tam ena ena ap menan gopewa ya anune. Iwa inak wariana ame ibariwa, go taba ame gauarap. Amba sia etuya ame ibariwa go etuya okomewa ame gauarap.

²⁶ Nenip guegue muga yao anun. Taba naewa ya veriwanum, den daupam tane dugupa ya eniwanum go God kimaniwa taba muga muniwan. Amba God anu gurat mega inanup ame aigap amba den me anu gurat mega nenip inamup ame gauarap, ap menan gop ya yagiep taiwanian.

²⁷ E da da inak ega ya wakaumepen menan gop anuiwaniampina ame kakae uon. Gop ap anunewa, pia nonongantuk sia ya waniai.

²⁸ Amba dim menan gan gorogot gope anuiwanin? Rarema yanine ame ase anun. Mu nao ya taiwanum amba wapimu menan ya anuiwanum.

²⁹ Go wapena anun. Ayop Solomon kakae guragut mega arugataet go me en wanup kakaewa rarema ame enini umap da ya eniwandin. Rarema mega ame aigap iragen.

³⁰ Ap den sia, God unawat ame kwayupe tainiwa go wam konintu da i apane dayup taue to baraepl kurat wapi amba ireta. Menan God unawat kwayup taini apanewa enan den taiwan. Ap menan sisi kwayup aigap di ta eneta. Kaiwan, e God inap otu da anu tumasiana nagirewa.

³¹ Menan e gop anu anega ya wane, ‘Nu taba dim da nait?’ o ‘kaum amba nait?’ o ‘gan gorogot dim da panait?’

³² God tandayasine nagirewa wan dim dim mame iragi nanamu amuiwanum, amba wan dim dim ame munan anuiana, e Mamaya kimaniwa me asik tan.

³³ Go namu, God toemu mega ge inak tamanawa megawa, yoa tan, amba wan

dim dim mame iragi amba den sia eneta.

³⁴ Ap menan imanawa gope endi ya anune. Tauepi amba itan mega anun. Endiwa mega endi anun amba imana megawa mek mini imana amba anun.” Iesu ap anega wan.

7

Waenapan wanene ya tamo tamo noa

¹ Iesu sia wadiamon, “Waenapan wanene uniunion ya tamone, ap tane, God iman gare wanene taeta.

² Menan wanene upine tamo, God gare ap umap wanene taeta, amba om enua, om ame sia enueta.

³ Iwa dimen evenae wai koewa muga otu kamontu, kaiko umap, yamamupe toborini yawayan waiwanin? Go koewa ega ek mini den, kaiko baware oma ni koni mini, yamayap toborini ek ingane ya yawayan waiwanin?

⁴ Amba ge kaiko evenaga yamap wondini warupapen menan anega diai, ‘Enda, kaiko yamagap warupapen taian.’ Go baware yamagap toborini ya yavingi? Ame iwa dimen ap anega taingi?

⁵ Ge da wa da ta taiana apanewa. Koewa gega baware oma nikoni mini yamagape namu warup, yangut ta kakayase, amba evenaga kaiko yamape amba warup.

⁶ God nop mega kakaewa da waenapan koeragewa ya munane, iwa mu okoi mini entan ewagai sia arayain. Ap umap sia God nop oit mega kakaewa da waenapan koeragewa ya munane iwa mu tuan mini pusip am kukutnage sia entane age getao semu semu se aeta.”

God yoa ta anun

⁷ Iesu sia wadiamon, “Mup gapan God wayawane me gare eneta. Amba imutuan anune gare me ewaeta. Amba sia tonan mega ken ken tone gare enan watapeta.

⁸ Iwa waenapan da da God inap pot pot mup waiwanumampina ame garewa di warain. Dim da yoa taiwanumampina ame tautanain. Amba tonan mega ken ken toowanumampina ame munan watapeta.

⁹ Ap mini sia, e ansena da otu waia taba buredi menan mup wapi e gare agim munai go? Ae, ap anega uon.

¹⁰ Amba mu meo menan mup wapi e gare mokare munai? Ae, ap anega uon.

¹¹ Ap menan e koevet iragen go otu waiawa kakaewa garaet munapen asi-giap di, go e taiana otu kamontu. Iwa Mamanu God kimaniwa garaet kakaewa aigap tainiwa, ap menan da da God inap mup wainewa me kakae guragut yan aiman ta muniwan.

¹² Menan waenapan e inayap dim dim da tat anuianawa, e mu inamup, ap umap sia tan. Iwa apan Mosis iup namua seni amba God noa waiwanumune nagire wane guegue muga ameme di.”

Tonan noa pepetawa ge kampon kamponawa

¹³ Iesu sia wadiamon, “God tuni tonanewa kampon kamponawa ame unuk aisen. Iwa negin pepetawa amba sense-nawa, negin ame aeniwa, merao arewa tauen, amba waenapan arugataet negin ap amuiwanum.

¹⁴ Go inak neginewa ame kaimake den amba tonan otu koentu gapan tauiniwa, ame tau aeni inak arewa tauen, amba waenapan agiap mugenat negin ame tani-wanum.”

Waenapan tat muga gapan nu yavivin

¹⁵ Iesu sia wadiiamon, “God oit mega tave uoni waine nagirewa munan agun anun. Mu baigan mane sip umap inayap tauain, go mu potamup anan okoie wasipen mini.

¹⁶ Ganongae tavewa mokot ya ieta. Amba ipuni tavewa baip ya ieta. Menan oma tavewa iamuni ame ire yao anuiana mini, e waenapan iramu muga mu tat muga gapan yao anuianawa.

¹⁷ Ame umap, oma kakaewa iragi tave iamuni kakaevet, go oma koewa tave iamuni koevet.

¹⁸ Ap umap oma kakaewa, tavewa koevet ya iamota, amba oma koeragewa tavewa kakae ya iamota.

¹⁹ Oma da da tavewa kakaewa ya iamopi i apane gure ireta.

²⁰ Menan God oit mega tave uoni waine nagirewa tat muga muga gapan iramu yao kakayatait.”

God waenapan upi watanamota

²¹ Iesu sia wadiamon, “Orup da da, ‘Ayop nega, Ayop nega’ ap anega dia-negepi, mu uruga toemu kimaniwa ya unum amoin, go da da Mamana kimaniwa ayamase tainewa, mugenat at ap me tauain.

²² Wanene uiwa wamewa gapan, waenapan arugataet inanap anega wain, ‘Ayop nega, Ayop nega, amun gega gapan God oisewa wadidiamuinton amba airampu wa oimoton tau amon amba kiman paua baware ge kiman yo paua mega ugup ugup tainton.’

²³ Go ne aroga di diamoin, ‘E ne asig-nap uon. E asira aisen, e koewa taiana nagirewa! ”

I guine denawa ge i guine uoniwa pa tumone noa

²⁴ Iesu sia wadiamon, “Ap menan da da nop nega ma iragi anu waren tayao wareyao gapan barainiwa, ame gapan i guine dena pa mega bonawan aigap tuni umap.

²⁵ Ugin visen, ningoe tauen amba taik tawak taue pa ame naseni go ya beuren, iwa sewa mega bonawan gapan di ene kakayasen.

²⁶ Go da da nop nega anu waren go tayao wareyao gapan ya barainiwa, ame i guine uoni apanewa pa mega upun gapan tuni umap.

²⁷ Ugin visen, ningoe tauen amba taik tawak taue pa ame naseni amba unuke den beure geare orare enun.” Iesu ap anega wan.

²⁸ Wam ame wan dim dim mame iragi Iesu waitameni, to iam baware ame anui-wanumune imumu yon wanden wa taragasene.

²⁹ Iwa me wadidiamoni oisewa ame iup wadidiamuine apanewa mini da uon, go aroe amunu den wadidiamuini apane da mini.

8

Iesu vek bo'o apanewa wat inakamen

¹ Wam ame, Iesu tunup arigewa gapan aoma vise taueni, waenapan to iam baware da me ewap amon.

² Apan daiton da vek bo'o wareni taue me namup omanip enu amba anega wan,

“Ayop, gek anua gapan, tanege ne kakae tap.”

³ Iesu naniwa endimase amba apanwareni, anega dien, “Ne anuivin, kakae ta!” No utap vek bo’o gamupewa siran taran amone me inakaen.

⁴ Boge Iesu apan anega dien, “Endi inak mame inagap tana oisewa waenapan da ya wadiamo noga botakamian. Amba tamana age pirisi ine taua vek gega uon tani yavep. Yavepi watageta apane Mosis vek mame inak warepi gaunewa garaet God inap wanapen diagepi, ge wan. Garaet ame wanawa, ap gapan waenapan yawage anuin, ame vek gega uon tan.”

Ita yamewa ago megawa wat inakamen

⁵ Wam da, Iesu pa Kaponiam aen. Pa Kaponiam unugeniwa, ita yame apanewa da, mainap taué ago wanapen menan singui anega tayaven,

⁶ “Ayop, ne nao nega apanewa pa gapan etua in warden amba koevet wat yapiwan.”

⁷ Iesu gare wadien, “Ne ongep amba wat inakamain.”

⁸ Wani go ita yame apanewa gare anega wan, “Ayop negawa, ne wan menan pa nega tauapan taingi, go ya taua iwa ne kogerage. Go nop gega amunu den megenat wawa nao nega taini apanewa inakaeta.”

⁹ Iwa ne, ayop nega den, apan upinewa epara muga gauarap waingina apanewa amba den ita nagire upi gauaranapewa nona wariwanum. Da ak diapena di aeta. Da onak diapena di oneta. Da nao ma ta diapena di tata. Ap menan ge wawa, ne nao nega tainiwa di inakaeta.”

¹⁰ Wam ame Iesu nop ap anuni, me no kap wan, to entaneni boge waenapan aruga evip onamone nagirewa anega diamoni, “Ne wapena anun, anu tumat ni manegeni apane ma miniwa da at Isurero gapan ya yawan!”

¹¹ Sia wapena anun, Diu uon ian ugape nagirewa aruga at at iragi wam dotoueni amba wam geareni taué toemu kimaniwa gapan wanumoin. Omayan baewa Eibaraam ge Aisik ge Diekap taba tanam nain.

¹² Toemu kimaniwa dugup megawa ame e Diu nagirewa di, go upi ya anu tumasiwaniana menan God sisipu aipa uat imaeta. At ame gapan irip wa asi kitonak wanumain.”

¹³ Iesu nop ame wani ita yame apanewa inap sia wadien, “Ge ak. Anu tumat nimaneggeana menan ap umap nao gega taini apanewa inakaeta,” ap anega wan. Wam airase ame Iesu wani omewa gapan nao mega apanewa inakaen.

Iesu waenapan aruga wat inakam munen

¹⁴ Wam ame Iesu Pita paewa unuk aeni, ap mepe, Saimon Pita tapunewa vek ato itanigaet tan, parata eragi gagap iniwandin yaven.

¹⁵ Iesu naniwa wareni gapan boge vek amun ame torot wan. Menan Pita tapunewa ao yone Iesu taba mega tunu wânen.

¹⁶ Amba wam augariwandiniwa, airampu waramoni nagirewa aruga tambumon me inap tauane. Iesu nop mega amunugaet waiwandini gapan airampu up oimon tau amon amba vek ugup ugup nagirewa iravi wat inakam mumen.

¹⁷ Mame tani gapan God noa wataget waiwandini apane Aisaya nop anenen wani tavewa tauen. Aisaya anega wani, Me megenat vek ato enkana angkana nugawa me wa pakisen.

Iesu wa ewamot mega tata gueguewa

¹⁸ Amba Iesu waenapan arugataet enpanane yawamoni menan me wadiamot megawa kaum awan asepa gan amopen diamon.

¹⁹ Boge ap mepe iup wadidiamuini apane da Iesu ine taué anega wadien, “Wadianiana apanewa, ne ge ewagap ongep ap at at agingawa den yona ivingat anuivin.”

²⁰ Iesu gare anega wan, “Ewatap piup nokap wande wande arewa den amba nenip dugup muga oma onep den wandia, go Kimani Vitana Apanewa wagat wanige iana bare bare arewa da uon, menan ne evinap ongepen menan kaimake den.”

²¹ Wadiamot mega da me inap anega dien, “Ayop negawa, namu angep mama boepi tup amba ongain.”

²² Go Iesu gare wadien, “Mamaga etua ae ve evinap onak. Ya anu tumat taine nagirewa vemone mu bonigawa di tumop.”

Iesu wan taik ge puiman ketaewa bigaren

²³ Boge Iesu kabum gwanap dotouen wadiamot mega den amon.

²⁴ Amba taik aritavet da aroe den awan gagap tauen, kaum namara ao yon warden kabum gwanewa no dotoueopen tan. Go Iesu aup iniwandin.

²⁵ Ap menan, watu enamot nagirewa amon Iesu wa kandasen anega wan, “Ayop, nu nonan napen taiwan!”

²⁶ Wane me gare wadiamon, “E anu tumat ega ne inanap otu kamontu. Iwa dimen tawa taiwanin?” Boge Iesu kaimakaet ase diamo wani gapan taik ge kaum doak ame tom wa ae bigaren.

²⁷ Mu ap yawane tarage singui anega wane, “Akae, apan ma dime dena da? Me wani taik ge kaum nop mega anune wariwanum,” ap anega wan.

Apan dere airampu waramoni wat inakam mumen

²⁸ Wam ame asepa gan kaum eto yamunewa at yaua Gadara tauane. Apan dere ameme waenapan borit waine kaimewa sine arewa gapan me inap tauane. Mu anan taiwanumune menan, waenapan da negin ame ya amuiwanumun.

²⁹ Iesu ine tauane nop baware anega wan, “Iesu, God otua, nu inanup dim dat anu tauaan? Evi amba ta koeragam nimanewa oisewa anutoni go endi namu ta koeragam nimanai?” Ap anega wane.

³⁰ Mu mainamup tuan arugataet, taba naiwanumune yawamon.

³¹ Airampu Iesu inap kayawantuk anega wane, “Ge up oine tau anetawa, watu enane tuan potamup unuget.”

³² Iesu gare anega wan, “A, umap, tau aisen!” Iesu anega wani gapan, airampu apan ae vean tau amon tuan potap unumon. Unumone tuan togana serarat vitan kauma geamon none namon.

³³ Tuan kwayup taine nagire yawamone tap serarat amon, pa sewa bawarewa

tauau, oit mame iragi wadidiamone, apan dere airampu waramone oitamu den wan.

³⁴ Boge pa sewa bawarewa uruga Iesu yawapen tauane. Amba wam ame Iesu yawane, mu kaimakaet anega diane, “Enda, ge at nuga ae ve ak.”

9

Iesu pusi nani itani wani apanewa wat inakamen

¹ Iesu kabum gagap dotoue, kaum gamu to ketnage ase pa mega tauen.

² Amba apan upi, pusi nani itani wani apanewa da eragia baraen waran tauan. Amba Iesu mu anu tumat muga me inap aritavet tane yaveni menan Iesu vek apanewa inap anega wan, “Apan negawa, ne koewa gega anun ae viangin.”

³ Mame gapan, iup wadidiamuine nagirewa upi muk ingane anega wane, “Apan ambe da tauen, nop God mini ta wat wan taiwan?”

⁴ Singui muga, Iesu imua anuni menan gare wayawamon, “Iwa dimen imuya potaya gapan anu koeam nimanek wanin?

⁵ Ne nop daitonawa wana vek apanewa koewa mega anu ae viangin, o nop derewa ame manega wapena, ao yone aep, kaimake dena ansenawa?

⁶ Go e asigip taepen menan, Kimani Vitana Apanewa piupa waenapan koewa muga anu ae vepen menan aro amun warana ame endi to ewayain.” Amba Iesu vek apanewa sia anega dien, “Ne endi diagiangin, ao yon eragi gega wat pa ak!”

⁷ Wani boge no utap, ao yon wande eragi mega ware, boge pa mega aen.

⁸ Ame gapan to iamene nagirewa mame yawane, potamu tap bararaen, amba God wa atonasen, iwa aro amun ma miniwa, God waenapan muneni menan.

Iesu Matiu wa upen

⁹ Ap mepe Iesu ap use aiwandini, me apan da yaua Matiu yaven, me moni bogamine paewa gwanap ae wanden. Iesu me anega wadien, “Evinap onak.” Boge Matiu ao yon wande me ewap aen.

¹⁰ Amba Iesu wa ewamot mega den Matiu pa mega gapan taba naiwanumune.

Ap mepe moni bongamine ge koewa taine nagirewa tauan den tanam wanumone.

¹¹ Parisi nagirewa upi mame yawane menan, Iesu wa ewamot mega singui tayawamon, “Iwa dimen wadiaet egawa moni bongamine amba koewa taine nagirewa den tanamon taba naiwan?”

¹² Iesu nop muga anuni gare anega wan, “Vek nagirewa nuat apanewa menan anu guriwanum go kakaewa nagirewa nuat apanewa menan ya anuiwanumun.

¹³ Go aisen anuan sese tan, God wani tavewa anu kakayesen. God anega wan, Man toyan nenan iriana menan ne ya anuivin go

Imuya potaya waenapan inamup warapen menan anuivin.”

Iesu God nop mega semu ame wani sia wadiamon, “Menan ne muk ingane kakaewa anune nagirewa munan ya tauan, go koewa taine nagirewa imu posewa ge inak muga entan tapen menan tauan.”

Sinunu ina ina noa

¹⁴ Wam da apan Dion, waenapan dup iamuini apanewa, wa ewamot megawa Iesu ine tauan singui wayawan, “Iwa dimen nu amba Parisi nagirewa den, God menan pot pot sinunu in dorivin amba God inap mup waivin. Go wadiamot gegawa God menan sinunu in ya dorowanum?”

¹⁵ Iesu gare anega wan, “Naine mutat i apanewa barip mega gapan wandepiwa me evene waiwa sinunu in ya dorain, iwa aton anuiwanum. Go wam evi da tauepiwa, naine mutat i apanewa waseam wat nau amopiwa, wam ame gapan sinunu in dorain, bagu sisi anupi menan.” Ame wani tavewa naine mutat i apanewa Iesu me di.

¹⁶ Amba iup namua ge iup ewakewa guegue mega wadiamopen menan Iesu maibe gapan manega wan, “Waenapan wanup namua bebeb wapi nadi warapen men semu ewakewa ya wabenagep. Wabenagepi ewakewa den koe tata amba wanup gine daiton uon, da vevera da kaimake den menan bebeb baware wata.

¹⁷ Guegue da sia mam. Apan da kaum wain ewakewa man etu namua kaum menan taginamene gwanap ya wa damagep. Damagepi kaum mek tutut wapi

etua tuk wata amba kaum wa damagep etua den koe tata! Menan kaum wain ewakewa man etua ewakewa gapan damagep, ap tata dere dere kakaevet di wanumoin.” Iesu ap anega wadiamon.

Iesu waen dere wat inakam mumen

¹⁸ Me nop mame waiwandini newap, Diu nagire ayop muga da ine taue amba namup omanip enu anega wan, “Ne orana gaset boen. Go age naniga aigap barae, me inakaep.”

¹⁹ Wani boge Iesu yone apan evip aen, wadiamot megawa den amon.

²⁰ Waen da en aonagaet pusinawan dere vek ewatop taiwandin. Iesu ap aiwandini gapan waen ame garivi taue wanup mega ginewa inasen.

²¹ Waen mek ingane anega anuni, ‘Ne wanup mega gine otu da megenat inatapenawa, ne inak warain,’ ap anega anun.

²² Inaseni Iesu to entane waen yave anega wadien, “Orana, gop ya anu. Anu tumat nimanegheana menan inak wariagi.” Amba wam koni otu ame gapan waen ame inakaen.

²³ Ap ewap Iesu Diu nagire ayop muga ame pa mega unugen viriko upuniwanumun, amba to iam baware ame nop gede gede waiwanumune yawamon.

²⁴ Me anega diamon, “Ae vean tau aisen. Orup waen ma bop ya tan go aup iniwan.” Ap wani menan waenapan verea kaura tan top wane.

²⁵ To iam baware ame wa oimon nambae vitane ewap, Iesu orup waen ine ae nanip waren, boge ao yon wanden.

²⁶ Mame tani oisewa wasenamene at gine ame senare tau aen.

Apan dere yame borat mutane wat inakam mumen

²⁷ Iesu at ame ae ve, ap use aiwandini, apan dere yame borat mutanewa me ewap amon, ven anega kaimakaet waiwanumun, “Apan Devit naewa, nunan baguk sisi anu.”

²⁸ Iesu ae pa gwanap unuk aeni gapan, mu inap tauan, amba Iesu singui anega tayawamon, “Ne amun nega gapan wat inakam imaepen men anu tumat nimanek

wanin go?" Mu gare wane, "E, Ayop nugawa nu ap menan di anuivin."

²⁹ Boge me yamamu inase amba anega wan, "Yamaya yangut tat anu tumat tayana menan e inak itai."

³⁰ Me ap wani gapan mu yamamu kakae sia tan yawan. Amba Iesu tagigit kaimakaet anega diamon, "Orup da mame asik tapi tawa agun yao anun."

³¹ Go mu tau amonewa, me oisewa at ame iragi wa sesenamene.

Apan no boraseni wat inakamen

³² Mu tau amuiwanumune newap, apan da nop ya waini iwa airampu potap wardeni menan waran Iesu ine tauan.

³³ Iesu airampu ame wa oisen tau aeni, boge apan ame nop wan. Menan to iam baware ame tarage anega wane, "Manegawa anenen? Nu ma miniwa namu at Isurero gapan da ya yawaton."

³⁴ Go Parisi nagirewa nipec anega wane, "Airampu bawarewa mugawa Seitan amun mega Iesu waneni gapan Iesu airampu upi wa oimuiwandin tauane amuiwanum."

Iesu waenapan munan bagu sisi anun

³⁵ Iesu pa sewa bawarewa amba otu koentua iragi tau ge tau aen, iup anuine paewa gwanap kiman toemu mega Oise Kakaewa wadidiam wandin amba vek ato engkana angkana nagirewa gine ugup ugup wat inakam mumiwandin.

³⁶ Me waenapan arugataet yawamoni imu pose munan anu guren. Gop anune iwa mu ago muga uon, ame man sip kwayup taini mini kwayup tamuini apane da uon, nutumu uon amba itan bagu sisi wariwanumun.

³⁷ Boge me wadiamot mega anega wadiamon, "Yawan. Maup inin geraget taiwan go daupam taine nagirewa otu agiap da.

³⁸ Ap menan maup Ayopewa inap mup wan amba me daupam tata nagirewa watu enamop, bongamepen amop." Iesu ap anega wan.

10

Iesu wa ewamot mega dere dere watu enamon

¹ Iesu wadiamot mega aonagaet pusinawan dere munan wan tauane, amba aro amun mega vek nagirewa wat inakam mumapen amba airampu wa oimopen menan munen.

² Watu enamot mega nagirewa yaumua mam.

Namu iragen Saimon (yaua dawa Pita), amba gwaniwa Anduru amba Diemis ge gwaniwa Dion, mu dere apan Sebedi otu waiwa.

³ Pilip amba Batolomio amba Tomas ge Matiu (me moni bongamini apanewa) amba Diemis, apan Alopias otua, amba Tadias.

⁴ Upine den ame, Saimon (at daitonawa nagirewa munan anu waini apanewa) amba Diudes Iskeriot (Iesu omine evi wapi apanewa).

Watu enamot mega nagirewa yaumua ameme.

Watu enamot mega nagirewa nao tata noa

⁵ Apan aonagaet pusinawan dere mame, Iesu nop den pusiga pan pan tamo amba watu enamo, anega wadiamon, "Diu uoni ian ugape nagirewa yaumakamup ya tau aisene o ian Sameria pa sewa mugawa da ya unugene.

⁶ Mu ae vemon go pa Isurero nagirewa inamu aisene iwa mu man sip mini pua amone.

⁷ Aisen oit ma opata gapan wan, 'Kiman toemu mega di mananiwan,' anega wadiam wadiam aisen.

⁸ Vek nagirewa wat inakam munan, borit wanewa sia inak muse yon wanumot wane mu da da etu sitat kakae tap, airampu waramoniwa wa oimone tau amop. E garaet warayana menan e gare garaet wat agoat munan.

⁹ Ap aisene, moni agim make tutup gine ugup ugup ya tambune,

¹⁰ ap ega menan ik enagun da ya enane, en wanup daiton daiton megenat tambun. O pusia okomewa o kaipat den ae sean mondigataet di aisen. Iwa dim da da menan bambam tanewa waenapan enepi e waran.

¹¹ Pa sewa ansena da e unugenewa, baigan apane ap mepe yoa tayawan tanane amba pa mega gapan wanien ene amba sia aisen.

¹² Pa ame unugenewa, gaun munan iramu yawamon.

¹³ Pa ame baigan amba ago nagirewa wanumopiwa, nonup ega pa ame gapan wandep. Go mu ya waup imaepiwa, God inap mup wa, God wat aipakam mega mu inamup ya wandep.

¹⁴ Waenapan ansena da ya waup imaepi o nop ega ya anupi pa muga ame ae vean aisen, koewa muga ae bat munapen menan pusia atabobo toninigamen aisen, ame tane yam tatak munapen.

¹⁵ Ne tavewa di wadiaivin. Nop nega mondi uon anun di waivin. God wanene mega wamewa gapan, pa sewa da da e ya waup imaene, koewa tane pa sewa Sodom ge Gomora nagirewa God wanene mega arita warane omewa mini ya yawain go pa ameme baware iragen yawain.” Iesu ap anega wan.

Waenapan ta koeragam imaepi noa

¹⁶ Iesu sia wadidiamon, “Wapena anun, e man sip otua ame baigan mane umap watu enaivin go waenapan anan eyaoe wasipen umap nimakamup waniai. Ap menan mokare Dimat asik mega mini tan amba nenip bairantan ugu wat museni mini wanien.

¹⁷ Waenapan tamu gop agun anun, iwa mu tambue amo wanene paewa taue amba iup anuine paewa gwanap gaut gapan gurayain.

¹⁸ E ne dugup nega nagirewa menan, wanene taepen menan ayop bawarewa nagire ugup ugup namup tam nauyae amooin. Mame gapan, oitana wadidiamone Diu uon ian ugape nagirewa den anupen menan.

¹⁹ Go wam ame e tambuepiwa, dim da o anenen wawa menan gop ya anune. Iwa wam ame nop wapen tanewa God nop dim da enep di wai.

²⁰ Menan ame e nop ega da uon, go e Maimaya Guewa nop e gamuyap waiwadata.

²¹ Ap wamewa gapan, tase gwani gare gare omine wap borit wain, amba ine mame wai muk orup mugawa omine wain, amba otu waiwa ugu gangan ine mame inamup tain, ap tapi gapan upi taue ine mame guramo boniga semoin.

²² Waenapan iragi nenan tandayat imayain, go e da tumban amun ae yonanewa, wam verisiwa gapan e inak warai.

²³ Wam ame at daiton gapan wa kokeraragam imaepi, ae vean, tap serarat at da ugup aisen. Ne tavewa di wadiaivin, God No Oise Kakaewa wadiamopen menan e at Isurero sewa muga iragi ya tauitamai, go namu Kimani Vitana Apanewa tauain.

²⁴ Wadiamot nagirewa wadiamouine mugawa paina ya yamasep, amba nao nagirewa ayop mugawa paina ya yamasep.

²⁵ Menan anut yoa taine nagirewa wadiat mugawa mini tap, amba nao nagirewa bawarewa mugawa mini tap. Ne dugup da ayopewa Bieseboro, yaua dawa Seitan, koerage eboewa dianegene menan dugup nega nagirewa, wagup koerage aigap sia diamoin.”

God tawa tainampen

²⁶ Iesu sia wadidiamon, “Ta koeragam imaine nagirewa tamu ya tane. Endi dim dim iravi ukum umane evi amba God aroga watapeta. Amba endi dim dim iravi gungunu tainewa evi amba yao anuin.

²⁷ Dim da ne sisip gapan karaua wadi-aena, e aroga wam ganāsewa gapan waenapan wadiammon. Amba dim da simura darinayap wadiaena, e namboya aroga wadiammon.

²⁸ Mu da etuya togurep boepi menan tamu ya anune iwa guaya den ya togurain. Go God tawa taiwanian iwa etuya ge guaya dere dere oma meravewa gapan wa koeragam mumeta.

²⁹ Muguap dere garewa ame agim make dendeniwa daiton gapan une taiwanum. Go ame daiton da Mamanua God ya anuini gapan pia ya geare boeta.

³⁰ Amba ap mini sia, me enan aigap anuini menan iae gumewa daiton daiton iae bonewa gapan me iragi batnak itamen.

³¹ Ap menan dim dim menan tap ya anune. Iwa God yamap muguap aruga ame bawarewa da uon go e God yamap bawarewa di.”

Iesu oisewa wadiamoit

³² Iesu sia wadiammon, “E da da oit negawa waenapan wadiamonewa, gare ne

Mamana kimaniwa e ne wa ewamot nagirewa diain.

³³ Go e da da waenapan namup tandayat nimanegenewa, Mamana kimaniwa namup waboborayain.”

Iesu nonup menan piup ya tauen

³⁴ Iesu sia wadidiamon, “Ne nonup piupu wat onge tauat ya anun, go ne nonup ya waran ongen go ita anan wat tauan.

³⁵ Ne nop nega anu tumasepen o ya anu tumasepen menan mame otu dere notatae wain amba ine ore dere notatae wain, amba e wagini dere anu tumasepen o ya anu tumasepen men den notatae wain.

³⁶ Menan e anavi ega aigap iragenawa ame e dugup ega daitona nagirewa di.

³⁷ Orup da me ine mame o otu wai go ore wai munan bumaga tantan anun amba nenan otu koentu anuiwandapinawa, ame ne wadiamot nega da uon.

³⁸ Menan orup da ne wadiamot nega tat anupiwa, namu me mek dim da anuini tandayase, ae di vep, amba ne yauna menan, pot poraet ugu vegaek bagu sisi anu, evinap oniwandan.

³⁹ Amba orup da da muk inak mugawa menan anu gurane tainewa, ame inak muga wakaumain, go orup da da mu inak muga nenan anu gure wakaumepiwa, mu inak kakaewa tautanain.”

God garewa nuneta

⁴⁰ Iesu sia wadiammon, “Waenapan da da waup imaeipiwa ne den waupanegain. Amba da da waupanegeipiwa, ame Mamana watu enanegeni den waupain.

⁴¹ Apan da yone evenewa God nop mega waini menan waupepiwa, me God nop mega waini apanewa, ame garewa mega om daiton God inap wareta. Amba sia apan da yone evenewa God menan kakaewa taini menan waupepiwa me God menan kakae taini apanewa, ame garewa mega om daiton God inap wareta.

⁴² Amba waenapan da da kaum kasi-gawa use wa ewamot nega nutu uoni da wanepiwa, ne tave di wadiaivin, ne inap anu bambamat da uon, orup ame garewa mega kimani wareta.” Iesu ap anega wan.

11

Dion sep nagirewa watu enamon

¹ Iesu wa ewamot mega aonagaet pusi-nawan dere nop pusi pan pan tamon uon tani ewap, me ap mepe use sia ae, sewa arugataet, at Galili gapan, tau ge tau ae opata wadidiam wandin.

² Wam ame, Dion, waenapan dup ia-muni apanewa, gwat nokap wandeni gapan, Keriso anenen taiwandini oisewa anun. Menan wadiamot megawa upi watu enamon Iesu ine tauan.

³ Amba Iesu inap singui anega wayawan, “Nu amase taintoni Keriso ge me di go gare apan da ugup tauapen amase tait?”

⁴ Iesu gare wadiammon, “Ewagai sia aisen, anenen yao anuiwaniana Dion wadiam.

⁵ Yame borat mutane nagirewa sia yangut taiwanum, pusiwa wabeberugaseni nagirewa ap sia amuiwanum. Vek bo'o nagirewa sia inak musiwanum, darine borat mutane sia anuiwanum. Bop tane nagirewa sia inak mutane yon wanumuiwanum. God No Oise Kakaewa kayakayawan taine nagirewa wadidiamuin.

⁶ Waenapan ne dim dim wa taingina menan ya tandayat nimanegepiwa aton anuiwanumain,” Iesu ap anega wadiam.

⁷ Boge, Dion wadiamot megawa sia entan amone. Ap gapan, Iesu Dion oisewa ap mepe wanumune nagirewa anega wadiammon, “Dion yawapen menan at kaimewa aiseana, dim da yawat anuyan? Taik unawat payagameni tawagewa yawapen aisean go?

⁸ Ame uon wandepi e dim da yawapen menan aisean? Apan da wanup gan-ganataet eneni yawapen menan aisean go? Anun, wanup kakaewa enine nagirewa ame ayop yau taneni pa muga gapan ininewa, go at kaimewa gapan da uon.

⁹ Go endi e dim da yawapen men pua aisean? God nop mega waini apanewa da yawapen aisean go? E, ap me di. Wapena anun. Tave di Dion apan ap me di go me aigap iragenawa.

¹⁰ Ap menan wataget God Dion oisewa wani ok anega seane,
Wapena anun.

Ne oit nega wapi apanewa namu watu enapen,
negin genan wa taraseta.
Ok ap anega sean."

¹¹ Iesu sia anega wan, "Menan ne wadiaepena anun, waenapan iragi yanane yaumakamup Dion megenat aigap. Go kiman gueguewa iup ewakewa gapanawa ame, evi amba God toemu mega gapan orup da God navewa otu kamontu iragena tapi, watat aigapewa wareta, go Dion me gauarap wandeta iwa Dion iup namua gapan taueni apanewa.

¹² Wataget Dion dup iam wandini wamewa gapan onin eni endi mame tauen, piup nagirewa upi God toemu mega amunua kaimakaet nanamasep yon borapen menan anun.

¹³ God nop mega wataget waiwanumune nagirewa, apan Mosis den, God dim evi tapi noa waiwanumun ene amba Dion tauen.

¹⁴ Menan watageta nagirewa Elaidia sia tauat wane, apan ame Dion, ma me di. Nop mame anu tumat tai go?

¹⁵ Menan darinaya den wandepi, ae anun."

¹⁶ "E Diu nagirewa inat waniet ega gueguewa dim da umap? E orup otu iamene kae taine umap. Mu toga uaren gare gare ise ma anega waiwanum,

¹⁷ 'Nu sinao enan toivin go e tarep ya taiwanin. Nu urae angingin enan waivin go irip turup ya waiwanin!'

¹⁸ Tavewa ame mam, Dion waenapan dup iamuini apane yoneni God men taba virip viwandin kaum wain da ya nan. Ap tani menan e noyam anega wayan, 'Airampu da potap wandia.'

¹⁹ Ap anega wayan, go ne Kimani Vitana Apanewa tauana taba kaum wain den naingin menan anega noyam wayan, 'Apan ase yawan! Me taba paututuma naiwan amba kaum wain pot pot naini menan bumbawam taiwan. Amba den moni bongamine ge inak koewa taine nagirewa evenan tamon.' E ap anega wayan, go God nop mega tavewa di wandia. God

dim da da me waenapan gamumup ta oniwandini ame God anuini taine nagirewa mu wa ewamoin."

God wae wae nemoro mega yawain

²⁰ Amba Iesu pa ugup ugup nop kaimakaet diamon. Iwa namu inamup ae kiman paua baware ugup ugup wa taiwandin yawane go koewa muga ae ya veane.

²¹ Iesu itan baware inamup tauepi oisewa namu manega wadiamon, "Kaiwan, pa Korasin Diu nagirewa, kaiwan, pa Besaida Diu nagirewa, itan baware yawai. Iwa yaumakayap yo baware taingina go ame Diu uoni nagirewa pa Taya ge pa Saidon ya yawan. Yawapo koewa muga ae ve yamu entanepo bagu sisi magunewa wara wanumopo. Go e yo baware taingina yawayan go imuya potaya ya entanean.

²² Menan God wanene mega wamewa gapan, pa Taya ge pa Saidon nagirewa itan yawain go e itan baware iragen yawai.

²³ Den ian Diu nagirewa pa Kaponiam gapan. Ek anuyan taiana gapan kiman dot aitai go? Ae, ya dot aitai go God merao arewa gapan uatam imaeta. Iwa yo paua ame e inayap taingina watageta pa Sodom nagirewa ya yawan. Yawapo God pa muga ya wat momagepo.

²⁴ Wapena anun. God wanene mega wamewa gapan, pa Sodom nagirewa itan yawain go e itan baware iragen yawai."

Iesu tawarit nimaneta

²⁵ Wam ame gapan Iesu Mamewa inap mup anega wan, "Maman, ge piup kiman ayopewa. Ne gaun inagap waiangin, iwa anut bawarewa nagirewa nop maibe tavewa anuine nagirewa den nop gega ya anu awapen men karaua baraean, go ok ya tane nutu uoni nagirewa nop gega wa ewamoan.

²⁶ Tave di, Maman, ap venasepen menan atonu den anu taan."

²⁷ Iesu sia anega wan, "Ne Mamana dim dim iragi nanin gwanap sen. Amba ne God otua ame waenapan da asigimup ya tanegene go Mamana megenat ne me Otua asigip tanegen. Amba sia waenapan da Mamana ya asigimup tane go ne, me Otua, ne negenat asigip tan. Ap menan ne

Mamana guegue megawa waenapan da da ta ewamot anupena di ta ewamoin."

²⁸ Iesu sia anega wan, "Ne inanap onaen, iragi itan ega ega baware tambu panop to onai wanian garia yaveni, menan iragi wagat enain.

²⁹ Ne panop nega waran amba inanap anu awan, iwa ne ayamat bibiga taina apanewa, ap gapan e guaya wagat tau-taneta.

³⁰ Ne panop nega itani den uon go be-mta."

12

Pura bawarewa ame Ayop wamewa

¹ Diu pura muga bawarewa wamewa gapan da, Iesu nao egak da, maup taue wandeni, ame berip aiwandin. Wadiamot mega den amon, enup aramoni menan mu taba uit verane maup taue wandeni makewa kukunagen tavewa nane.

² Ame gapan, Parisi nagire upi yawamo anega wan, "E iwa dimen pura bawarewa iup nuga paina yamat wanin?"

³ Iesu gare anega wadiamon, "Wataget da apan Devit evene wai den enup aguguramoni tane oisewa ok gapan e iravi batnak anuyan.

⁴ Devit evene wai den, enup aguguramoni menan God Paewa unuk amon amba God men taba buredi tugu seane, ian pirisi mugenat nainewa, ame iup mega den go mu tambu nane.

⁵ Den apan Mosis iup namua seni batnagean go uon? Nop ame anega waiwan, wagat wamewa gapan pirisi God Paewa gwanap nao tainewa menan mu wagat wamewa iup mega to paisiwanum. Go mame gapan God yampu koewa da ya tane.

⁶ Go wapena anun. God Paewa baware, go aigap iragenawa mame endi tauen.

⁷ God watagaet ok seni tavewa e anu kakayasean go uon? God anega wan, Man nenan iriana menan ne ya anuivin go Imuya potaya waenapan inamup wara-pen menan anuivin, ap anega wan. Nop ma tavewa da e asik tapo, wadiamot negawa koerage ya di-amopo amba uniunion ya diguguramopo.

⁸ Iwa ne Kimani Vitana Apanewa pura bawarewa ayopewa menan ne dim da umap wapena, ameme di." Iesu ap anega wan.

Pura bawarewa gapan Iesu orup da wat inakamen

⁹ Iesu at ame ae ve, amba iup anuine paewa gwanap unuk aen.

¹⁰ Apan da, naniwa nutup parakaeni, ap mepe den wanden. Iup wadidiamuine ge Parisi nagirewa den Iesu enu yave wapen anune menan singui wayawan, "Iup nuga anenen waiwan? Apan da wagat wamewa gapan vek apane da wat inakamepi ame iup to paiseta go uon?"

¹¹ Me gare wadiamon, "E ansena da man sip ega, wagat wamewa gapan, urata gearepiwa, pan warup barai go uon?

¹² Man menan anuiana otu koentu go waenapan munan anuiana ame aigap iragen. Ap menan apan da wagat wamewa gapan inak kakaewa da tapi ame iup paina ya yamasiwan."

¹³ Boge me apan die anega wan, "Naniga endimat." Menan me endimat anuni boge naniwa dawa mini kakae tan anun.

¹⁴ Go Parisi nagirewa pa ae ve amone amba Iesu to boniga baraet wan nopewa paniwanumun.

God nao mega apanewa Iesu

¹⁵ Iesu togurapen oisewa waiwanumune anuni menan, totnage at ame ae ve aen. Waenapan aruga me ewap amon. Me vek nagirewa mugawa iravi wat inakam mumen.

¹⁶ Ap tani oisewa tagigire diamon me oisewa da ya wapen.

¹⁷ Menan watageta God no oise waiwadini apanewa Aisaya wani tavewa tauen. God Aisaya gamup anega wan,

¹⁸ Mame ne nao nega apanewa, ma ne om enunawa, me menan anu gurinawa, amba imuna ae bigarin aton anuinawa.

Ne Guana me aigap barain amba me amun nega gapán,

ian ugape nagirewa wat inakam mumapena nopewa wadidiamota.

¹⁹ Me notatae ya wata o kaimakaet negin gagap ve ya wata.

²⁰ Gaian gua kwekwerawa ya to imokameta, amba dun otu koentu yagiriniwa me ya wa gureta, ap mini nutu boeni nagirewa, ya wa koeragam mumeta o diguguramota. Go tayaviwandan amba nop tamanawa gapan, koewa garao mumeta.

²¹ At at iravi, piup mame gapanawa, anu dao muga me inap tain.

Seitan yaua da Bieseboro

²² Waenapan upi naumon Iesu inap tauan, apan da yame borasen nop ya wainiwa, iwa me airampu potap. Iesu apan ame wat inakameni, me yangut ta nop wan.

²³ Waenapan iravi ap yawane gapan seke tan tarak anega wan, "Iesu me Devit naewa Keriso go?"

²⁴ Go Parisi nagirewa, ap anune gapan, nipep anega dian, "Airampu bawarewa mugawa, yaua Bieseboro, amun waneni gapan me airampu up oimuiwandin tau amuiwanum."

²⁵ Go Iesu mu imumu gapan dim da anune mek anuni menan anega wadiamon, "Toemu da da engirit wangirit ta waiwanumampina dumari amooin. Amba sia dugup da todum wadum taiwanumampina mu iragi ora amooin.

²⁶ Menan ne Seitan ago megawa wan-depo ap gapan airampu mega wa oisepe-nawa ame Seitan toemu mega endumeta, ap gapan toemu mega uon di tata.

²⁷ Ne airampu Bieseboro aroewa gapan wa oitapo dugup ega nagirewa airampu wa oimop tau amopi amun da muneni gapan taiwanum? Bieseboro munen go? Ek wadiamot ega ap anega diguguramopo mu gare ebo diaepo.

²⁸ Uon, ne God Guewa amun neneni gapan airampu wa oimuivin. Ap taina menan God toemu mega amunewa inayap tauen.

²⁹ Seitan me aro apane mini da. Menan up apane anenen amba aro apane paewa unuge amba kwan puraput mega tambuta? Up tat anupiwa, me namu aro apane ware damiga pane barae amba

kwan puraput tambuta. Ap mini ne Seitan aroewa yamasen."

³⁰ Iesu sia wan, "Waenapan da da me imua inanap ya wandiniwa, orup ame tandayat nimanegen taiwan. Amba sia orup da ya tananegen nao ya tainiwa, ame ne nao nega wa koeragamiwan.

³¹ Nop nega mondi uon anun di waivin. God waenapan koewa muga ge wawa koko muga taine iragi anu ae veta.

³² Amba orup da da Kimani Vitana Apanewa inanap nop koevet wapiwa, God koewa mega ameme anu ae veta. Go orup da da God Guewa inap notatae koevet ta wapiwa, God koewa mega ame anu ae ya veta, ame wam endiwa amba wam eviwa den anu ae ya viwadata."

Oma tavewa iamini noa

³³ Ap me menan Iesu Parisi nagirewa inamup sia anega wan, "Oma kakaewa, tavewa kakaewa iamota, amba oma koeragewa, tavewa koeragewa iamota. Ap gapan oma daiton daiton tavewa iepi irewa mega gapan gapan yavinewa.

³⁴ E iae guine itap atap mokare mini taianawa, anenen amba nop kakaewa gamuyap venaseta? Ame uon di. Iwa koewa kakaewa imu pose no dotouen arasiniwa gamup nomu gapan nop wai-wanum.

³⁵ Menan, apan kakaewa, wan dim dim kakaewa mega imu pose gapan enen waboren wandini tambun taiwan, amba apan koerage, wan dim dim koerage imu pose enen waboren wandini tambun taiwan.

³⁶ Go ne wadiaivin, wam uiwa gapan da da nop koevet wane garewa wanene warain.

³⁷ Iwa wam uiwa gapan e nop ega kakaewa koewa diaepi omewa gapan wanene taeta."

Iesu kiman yo mega da tap waenapan yawat anun

³⁸ Boge Parisi upi ge iup wadiamuiine nagirewa den me inap anega wane, "Wadianet nugawa, kiman yo mega da ta nu yawat anuivin."

³⁹ Wane go Iesu gare wadiamon, "E yo ugup ugup paua mega yawat anuyan wai-wanin iwa inak ega koevet iragen, ya anu

tumat nimanegiwanin! Go kiman paua mega da ya enain go Diona yo paua mega megenat yawai.

⁴⁰ Iwa Diona wam yampo ge mum yampo meo bawarewa da bagup wande en, ap umap Kimani Vitana Apanewa piup nokap wam yampo ge mum yampo wani-gain.

⁴¹ Menan Nineva nagire e endi ini-ananagirewa den yone digugurayain iwa apan Diona opata wadidiamoni gapan pa Nineva nagirewa koewa muga ae vean imumu wat entanen. Diona apan bawarewa di, go apan da Diona aigap wandini mapa wandia!

⁴² Watageta ayope Solomon nop dima mega baware anupen men ayop waen da yaua Siba at wandap onen. Solomon anut mega baware go apan anut baware iragenawa da endi taueni wandia go nop mega ya anuiwanin. Ap menan God wanene taepi wamewa gapan ayop waen Siba ame e endi iniana nagire den yone diguguraeta.”

Airampu apan ae ve ae sia tauen

⁴³ Iesu nop da sia wan, “Airampu apan potap tauen aen, at darakawa arewa none enu wande wande arewa yop taiwandin go da ya yaven. Ya yaveni menan

⁴⁴ anega anun, ‘Ne pa nega namu wani-gena ap menan sia entan angain.’ Ae taueni apan ame posewa kakae, pa tarase dim dim sese kakayat taine mini yaven.

⁴⁵ Menan sia ae airampu koerage iragenawa nani yamunaet yamu dere tanam tauen boge apan potap unum wanumon. Namu airampu daiton wardeni gapan anan otu da taiwandin go evi aruga potap unumone gapan airampu anan aigap iragen taiwanumun. Ap umap, wam uiwa gapan, e Diu nagirewa, inak koewa gapan iniana menan itan baware ame yawai.”

Iesu inewa gwani wai iragenta newopa

⁴⁶ Iesu iam baware ame inamup nop waiwandini newap, me inewa ge gwani waiwa pa garip yoniwanumun, Iesu inap nop wapen amase taiwanumune.

⁴⁷ Orup da Iesu anega wadien, “Inaga ge gwanik waiga yawagepen menan tauane, itapa pa garip yoniwanum.”

⁴⁸ Go Iesu gare wadien, “Inana ge gwanin wainawa da?”

⁴⁹ Boge Iesu wa ewamot mega inamup nani piru enumo amba anega wan, “Ne inana ge gwanin waina mame di!”

⁵⁰ Waenapan da da ne Mamana ki-maniwa nop mega anune amba gueguewa tainewa ame ne inanawa amba gwanin wainawa.”

13

Oma makewa uaseni noa

¹ Wam ame daiton gapan Iesu pa ae ve ae kaum awan etop wanden.

² Waenapan arugataet nop mega anu-pen menan tauan enpanane. Ap menan Iesu kabum gwanap dotou ae wanden, amba waenapan gerata yonan.

³ Nop aruga maibe gapan anega wadi-diamon, “Apan da oma makewa mega verapen menān aen.

⁴ Nao mega gapan uasiwandin, upi negina geamon, waenapan aigap amu tau amon amba boge nenip tauan enun nan.

⁵ Amba makewa upi agim gagap geomone ap mepe piup baware uon. Oma makewa tuk tak wan serarat yanan,

⁶ kai warane go wam dotouini gapan, serarat kurat wan, iwa visimu bobou.

⁷ Makewa upi ganongae berip geomone amba kai waran go gaian yan doran umam-on boge borit wane.

⁸ Amba makewa upi piup kakaewa gapan geamon. Ame yanan dorane tavewa iamoni arugataet mek arugataet da iam ge iam tan. Tavewa apane nani yamunaet (100) o apane yampo (60), o apane daiton aonagaeta mini aigap iamom.

⁹ Darinaya den wandepi nop nega anun!”

Iesu maibe gapan waini iwa mega mame

¹⁰ Iesu wadiamot mega ine tauan singui anega wayawan, “Iwa dimen waenapan inamup maibe gapan diamuingi?”

¹¹ Me gare anega wan, “God toemu mega karaua wandini tavewa watap enen gase

di yawayan anuiwanin go waenapan upinewa inamup uon.

¹² Iwa nop nega anune taine nagirewa God tavewa aigap aruga muneta. Go ya anune taine nagirewa nop otu da anune taine den sia waseamota.

¹³ Waenapan upinewa menan maibe gapan megenat wadiamuivin. Ap wadiamuvingina iwa mega ame mu yangut tain go ya yao awain. Amba mu anuin go ya anu awain.

¹⁴ Mu inamup iravi taitamene menan watageta apane Aisaya wani tavewa tauen. Aisaya anega wan,

Mu aigap aigap di anuin go da ya di anu awain.

Mu aigap aigap di yawain go da ya di yao awain.

¹⁵ Iwa waenapan mam potamu gware den, menan imumu borat musiwanum.

Amba darinamu gware den menan ya di anuiwanum, amba yamamu borasen.

Menan mu da anu ave ave umap uon.

Iwa mu yamamu gapan yavepi amba darinamu gapan anupi, amba imumua gapan anu kakayasepi, menan inanap onamop wat inakam mumapena tawa taiwanum.

¹⁶⁻¹⁷ Wataget, God noa waiwanumune nagine amba kakaewa taine nagirewa den endi e dim dim yavisiana yawapen menan taiwanumun go mu da ya yawane. Amba endi dim dim da anuisiana anupen menan taiwanumun go mu da ya di anune. Go God wat aipakam imaeni menan e yao aviwanin amba anu aviwarin!"

Oma makewa maibewa tavewa mame

¹⁸ Iesu sia anega wan, "Oma makewa uaseni maibewa tavewa wadiaepena anun.

¹⁹ Makewa negina geomone guegue ame, waenapan God toemu mega oisewa anuiwanumun go mu ya anu aviwanumun menan Seitan tauen nop oit ame potamupe up taiwan.

²⁰ Amba makewa piup baware uon gwat aigap geomone gueguewa ame, waenapan nop ere anune atonu den anun.

²¹ Go koni ame gapan mu visimu ae ae umap uon koni bobou otu da megenat

aen menan potamup ya waren. Go evi amba pusi warup inamup taueni gapan mu aro muga uon tan menawaet inak wakaumane.

²² Amba sia makewa ganongae berip geomone gueguewa ame, waenapan nop anun go piup itan megawa o aton megawa o moni puraput imumu waren menan God inap imu pose ya waren amba kiman inak mega kakaewa da inamup ya venasen menan tavewa da ya iane.

²³ Amba makewa piup kakaewa gapan geomone gueguewa ame, waenapan nop anu kakayasene. Bumagamu totanen anu warane ayamase yaentuk mantuk taiwanumune ae ya vene, menan inak muga tavewa mega kakaevet apane nani yama-naet (100) o apane yampa (60) o apane daiton aonagaetawa (30) tavewa dim da vereni aigap ien aewan."

Gaiān maibewa

²⁴ Iesu maibe da sia wadiamon, "Toemu kimaniwa guegue ame manega, apan da makewa kakaewa nao mega gapan veren.

²⁵ Mum tauen amba waenapan iravi aup iniwanumune newap, anavi mega da tau gaian berip vere aer.

²⁶ Tavewa iam wanumune wamewa gapan, nao nagirewa gaian den yanane ire yawane.

²⁷ Menan piup i apanewa ine tauan anega wan, 'Bawarewa nugawa, ge naewa kakaewa aia nao gega gapan veraana go anenen amba gaian den yanane?'

²⁸ Me gare wadiamon, 'Anavi nega da tan.' Wani mu singui sia wayawan, 'Ge wa, nu anet gaian ame ae ma bunait?'

²⁹ Me gare anega wan, 'Ae, uon, iwa gaian koewa bunaepen tane newap kakaewa den bunawai.

³⁰ Ae veane biroto yane aiwandan, e maup matagamepen wamewa tauep. Wam ame gapan maup matagamepi naginewa ne anega diamoin, namu omaya irapen gaianewa bunaen itapu panan amba omaya iran. Boge kakaewa tambun tobob tan onaen dugup nega gwanap sean.'

Oma baip maibewa

³¹ Iesu maibe noa da sia anega wadiamon, "Toemu kimaniwa guegue manega,

apan da oma baip makewa ware ae nao mega gapan veren.

³² Oma baip makewa ame otu koentu iragenawa go kai ware entanen oma baware iragen tan. Menan nenip tauan dugup muga oma ame naniwa gapan iragi waramone.”

³³ Maibe da sia anega wadiamon, “Toemu kimaniwa amun mega buredi tutut waini mini, ame waen da, buredi tutut wapen menan atagin mini potap wa damage kwaviro tan amba iravi tutut wan. God toemu mega amunewa ap anega.”

Iesu maibe gapan wadiamuini iwa megawa mam

³⁴ Iesu nop ugup ugup iravi maibe gapan waenapan wadidiamon. Gutut o nop da aroga da ya wadiamon go maibe gapan megenat waiwandin.

³⁵ Ap menan God noa wataget waiwandini apanewa, dim da anenen wani tavewa tauen. Me Iesu oisewa anega wan, Ne nona maibe gapan watapain, Ap gapan anut dim dim iravi piup ta venaseni wamewa gapan, gungunu wande oniwandini, ne wat matagamain. Ap anega wan.

Gaiyan maibewa ame tavewa wadiamon

³⁶ Iesu waenapan ae vemo pa gwanap aeni gapan. Wadiamot megawa ine tauan anega wane, “Gaiyan egagawa maibewa anenen waan wadiane anut.”

³⁷ Iesu gare anega wan, “Apan oma makewa kakaewa vereni ame Kimani Vitana Apanewa.

³⁸ Egak ame piup mam amba makewa kakaewa ame God toemu mega nagirewa. Amba gaiyan yaninewa ame Seitan otu waiwa.

³⁹ Anavi gaiyan tauvereni ame Seitan. Maup ame wam verisiwa, amba daupam taine nagirewa ame God anea megawa.

⁴⁰ Menan wam verisiwa gapan gaiyan bunave omaya irain.

⁴¹ Gueguewa ame, Kimani Vitana Apanewa anea nega watu enamoin. Tauvereni toemu nega gwanap koewa ta parisine nagirewa bongam mumain.

⁴² Bongam mumepi oma meraovewa gapan uatam mumain, ap mepe irip turup wa amba asi kitonak wanumain.

⁴³ Go inak tamanawa taine nagirewa Mamanua toemu mega gapan, ganat muga wam mini wa ganatamain. Dari-naya den wandepi nop ma anun.”

Kwan puraput maibewa

⁴⁴ Iesu sia wadidiamon, “Toemu kimaniwa guegue ame kwan puraput karaua egaga tu umine umap. Wam da, apan kwan puraput ame yao matagameni, me menawaet karaua uap sia umen. Boge me atonu den aen amba kwan puraput megawa iragi ase une ta, amba agim make ame gapan egak ame une tan. Iwa kwan puraput karaua wandiniwa ame kakaewa mega aigap iragen. Menan kwan puraput karaua umeni den megawa.”

Yan kakaewa maibewa

⁴⁵ Iesu sia wadidiamon, “Toemu kimaniwa dim yan kakaewa une tata anune yoa taine umap.

⁴⁶ Wam ame daiton kakaewa da tautanen go garewa arita iragen. Menan me ae kwan puraput mega iragi une taitamen amba agim make ware yan kakaewa ame une tan.”

Ia maibewa

⁴⁷ “Toemu kimaniwa ame ia umap, awana ae antap ene amba meo gine ugup ugup upain.

⁴⁸ Meo upane no dotoueni, meo upine nagirewa ia warupane gerata aen. Boge mu ae wanumon amba bongamen meo kakaewa kaepot gapan enan, go meo koewa aipa uatamen.

⁴⁹ Wam uiwa tauvereni ma mini da venaseta. Anea tauvereni koewa kakaewa yan semota.

⁵⁰ Amba koewa taine nagirewa oma meraovewa gapan uaseta, ap mepe irip turup wa amba asi kitonak wanumain.”

Ewakewa ge namua

⁵¹ Iesu ameme wadidiamoni singui wayawamon, “Ne iravi wana anu avianin go?” Mu gare wane, “E, nu gase anuton.”

⁵² Menan Iesu sia wadiamon, “Nop nega guegue ame da da Diu nagirewa iup namua anu kakayase evi amba nop nega anu kakayasepi ame kakae guragut namua ge kakae guragut ewakewa dere den tambuine mini.”

Pa Nasaret nagirewa Iesu tandayasen

⁵³ Iesu maibe noa wan uon tani at ame ae ye aen.

⁵⁴ Me pa sewa mega, Nasaret, taueni gapan, iup anuine paewa gwanap wadidiamon. Menan waenapan no i kap wane amba nipep anega wan, “Apan ma dima ge yo paua mame aroewa iragi ambagan waren?”

⁵⁵ Go me pa tuini apante otua mo. Inewa yaua Meri. Amba gwani wai apan Diemis, Diosep, Saimon ge Diudes.

⁵⁶ Amba domare wai iravi nu den inivin. Me mondi pa otua megenat, go dima arita ge yo paua ugup ugup iragi ma amba waren taiwan?”

⁵⁷ Menan mu anu koeam Iesu inap anune. Go Iesu gare wadiamon, “God no oise waini apante viripe ya taine ame pa sewa megawa amba mek pa mega gwanap wanumuine nagirewa mugenat.”

⁵⁸ Ame menan ap mepe yo paua arugataet ya tan iwa mu anu tumat muga da uon.

14

Dion waenapan dup iamuini apanewa boen

¹ Wam ame gapan, ayop Erot, at Galili ayopewa, Iesu oisewa anuni,

² amba me gauarape megawa anega dia mon, “Iesu yo paua ugup ugup taiwandini iwa me dup iamuini apanewa Dion di, bop gapan sia yon wanden taiwan!”

³⁻⁴ Erot ap anega wani iwa wataget Erot gwaniwa Pilip waenewa yaua Erodias up ta naisen. Erot up ta naiseni menan Dion anega diguren, “Narawagawa waraana iup paina yamasean.” Ap anega wani menan, Erot ita nagirewa diamon, ‘Dion waran gwat nokap baraene.’

⁵ Erot Dion to boniga baraet anun go waenapan tamu anuni iwa mu Dion God no oise waini apanewa da anune.

⁶ Erot yaneni wamewa baripe gapan, me wainewa Erodias orewa yone, Erot evene wai den tarep munan waren. Erot tarep ame yaveni me aton aritavet anun.

⁷ Menan waenoro ame inap kaimakaet wa agiasen, dim da menan anu wapi di ta wanat wan.

⁸ Menan inewa, Erodias, me orewa wadieni gapan, orewa anega wan, “Dion waenapan dup iamuini apanewa iwa to nugut sera gapan barao ma nen, endi ma me di!”

⁹ Erot waenoro ame mup mega wan anuni bagu sisi anun. Go evene wai barip men tauane yamamup waenoro wanat wa agiaseni menan Dion iwa to nugusepen wan.

¹⁰ Boge ita nagirewa watu enamon gwat noke tauan, Dion mege gamu to ketnagene.

¹¹ Dion i bonewa sera gapan barae wat onamon, waenoro ame wanane, waenoro wat ae inewa ine taue wanen.

¹² Dion wadiamot mega tauan etua wat amon urata tun. Tune amon Iesu oit wadian.

Iesu waenapan 5000 watumon

¹³ Dion boeni oisewa anuni gapan Iesu totnage kabum ware awan Galili to nuguse, waenapan uoni are aen. Go waenapan oisewa anune menan pa sewa gapan pusimup ewap amone.

¹⁴ Iesu kabum gapan asepagan taue, gerata enaseni gapan waenapan arugataet to iamene yawamon. Iesu munan bagu sisi anuni menan vek muga muga wat inakam mumen.

¹⁵ Mum gine di taiwandini gapan, wadiamot megawa ine tauan anega wan, “At ma waenapan uoni arewa, amba wam gaset gearen mum di tauapen taiwan menan waenapan to iam baware mame watu enamot amo, taba upi pa gwanap muk muk une ta nap.”

¹⁶ Go Iesu gare wadiamon, “Mu ya amop. E taba da munane nap.”

¹⁷ “Ae, nu anenen munait? Nu taba nuga inanupe buredi magamene nani yamunaet amba meo dere mugenat.”

¹⁸ Ap anega wane Iesu sia wan, “Tambu onaen, mapa nenan.”

¹⁹ Amba Iesu waenapan iragi unawat gagap wanumopen diamon. Amba Iesu taba buredi magamene nani yamunaet amba meo dere den ame tambu kiman ao yave, God inap gaun wan, amba paise paise ta waenapan taba munapen men, wa ewamot megawa munen.

²⁰ Waenapan iravi taba tavewa nane bagumu bim wan. Nane ewap, wadiamot megawa semua bongamen kaenat aona-gaet pusinawan dere enane no dotouen.

²¹ Apan ap mepe taba tavewa nane arugataet 5000 umap, waen orup den bat-nagetawa aigap den sia.

Iesu kaum awan gagap pusip aen

²² Amba Iesu wadiamot megawa kabum gagap kaum etop asepagan namu amop amba me evi aet wan. Amone, Iesu waenapan to iam baware ame watu enamon amone.

²³ Amba God inap mup wapen menan tunup arigewa dot aen. Mum gine me megenat ap mepe wanden.

²⁴ Go kabum gaset awan bumagewa gapan aen, keta yon wanden iwa taik tauk kabum nasiwandin gapan.

²⁵ Mum igoe dena gapan Iesu munan kaum awan gagap pusip ap oniwandin.

²⁶ Wam ame wadiamot megawa awan gagap ap oniwandin yawane, mu tap baware anun anega wane, “Ma guagup da tauia.” Amba ta den senao vebobop wane.

²⁷ Menan gine tutup Iesu menawaet anega wan, “Ma ne, tap ae vean gop ya anune.”

²⁸ Wani Pita gare anega wan, “Ayop negawa, ge tavewa wanigewa wa, ne awan gagap ongep.”

²⁹ “Umap di, onak.” Iesu ap wani menan Pita kabum ae ve, awana geare, ap pusip awan gagap Iesu tanapen onen.

³⁰ Go Pita taik eparaewa yaveni menan tap ta kauma aipa di unuk aiwandin, menan wawa sisi tan, “Ayop inak nen!”

³¹ Boge menawaet, Iesu Pita ma warupeni anega dien, “Ge anu tumat gega ne inanap kaimake den uon, iwa dimen anu bambam taingi?”

³² Amba mu kabum dotouane gapan taik tom wan.

³³ Kabum gwanap wanumone nagirewa iravi Iesu wa taragasen anega wane, “Tavewa di, ge God otua.”

Iesu pa Genesaret vek nagirewa wat inakam mumen

³⁴ Mu awan ame gamu to nugusene boge at Generaset gerata enasene.

³⁵ Pa nagirewa Iesu ire yawane sep at at watu enamon vek nagirewa iravi tam onamot wan.

³⁶ Mu Iesu wanup mega gine siwa inasepen menan mup wane, orup da da wanup mega ginewa inatanewa iragi inak mutane.

15

Bigi denawa amba bigi uoniwa

¹ Wam ame gapan Parisi nagirewa amba iup wadidiamuine nagirewa den pa Ierusalem gapan tauan amba Iesu singui wayawane,

² “Iwa dimen wadiamot gegawa omayan baewa guturewa iup mega to paisiwanum? Mu God menan namu nanimu bigi ya warane amba taba naiwanum.”

³ Iesu gare wadiamon, “E iwa dimen gutut ega ayamase tapen men God iup mega paina yamasiwanin?

⁴ God anega diaen, ‘Inae mamae virimu tan amba da da mamewa o inewa ta koer-agamepi ame togurep di boep di.’

⁵ Go e ugup anega waiwanin, Apan da da ine mame anega wadiamopi, ‘Nu enat wa agiat imae toni ya enait nu God wanait.’ Ap anega wapi ine mame virimu ya taiwanum, go e umap waiwanin.

⁶ Menan e gutut ega ayamase tapen menan God nop mega ayamase ya taiwanin.

⁷ E da wa da ta taiana nagirewa. Watageta apanewa Aisaya tave di wan. Me God no oise gapan enan manega wan,

⁸ Waenapan iravi nomu gapan viripana den taiwanum,
go imumu potamu ne inanap ya warianum.

⁹ E wa taragat nimanegepen menan umap uon,
iwa gutut ega ek anuiana gapan wadiamiana menan.
Aisaya enan ap anega wan.”

Guegue nuga ansena gapan koewa di-aneta?

¹⁰ Iesu waenapan munan wan tauane anega wadiamon, “Wapena anun. Di anu kakayesen.

¹¹ Waenapan taba ugup ugup naine gapan imumu God yamap bigip ya taiwan. Go dim da no utap aoma tauiniwa, ame gapan imumu bigip taiwan.”

¹² Iesu ame wani menan wadiamot mega ine tauan anega wane, “Parisi nagirewa nop mame waana gunat wane ge asik taan?”

¹³ Iesu gare wan, “Waenapan iragi da da oma naewa Maman kimaniwa ya vereniwa me visiwa den ae ma bunaeta.

¹⁴ Parisi nagirewa ae vemon! Mu yamamu borat mutane nagirewa mini. Yame boraseni apanewa evene yame boraseniwa wat nau aepi dere dere urata geamoin.”

¹⁵ Pita singui wayaven, “Maibe waana ame wan dim dim imunu wat bigiminiwa ame tavewa wa ewan.”

¹⁶ Iesu sia wan, “E da ya anu kakayat wanin?”

¹⁷ Iwa dimen asik ya tayan? E asi-giap, waenapan taba ugup ugup naine ni etavewa gapan wande amba tau aeta.

¹⁸ Go wan dim dim ame noa gapan aoma tauini ame imu pose gapan tauowan ap me gapan imuya God yamap wabigimiwan.

¹⁹ Imuya potaya gapan koewa ega anuyan taiwanin. Koewa ega guegue ame koewa tapen, togurep boopen, wainan gogo tapen, up tapen, evenae wae oise aopan ugup wapen, amba nuaroro wapen.

²⁰ Menan iravi mame gapan wabigim imainiwa, go nania bigi ya warayan amba taba tambuyan naianawa, ap gapan God yamap ya bigim imaeta.”

At ugupe waen da Iesu inap anu tu-masen

²¹ Iesu at ame ae ve pa Taya ge pa Saidon arigewa aen.

²² Aeni at Keinan waen da ap mepe ininiwa Iesu ine taue ve uma anega wan, “Ayop nega, apan Devit naewa, bagu sisi nenan anu! Ne orana airampu potap wandini gapan vek baware taiwan.”

²³ Iesu nop da gare ya wan. Menan wa ewamot mega tauan Iesu inap anega wan, “Waen ma wa oise aep, iwa pot pot ewanup yonen mup waiwan.”

²⁴ Go Iesu gare anega wadiamon, “God ne Isurero nagirewa munan watu enangen, iwa Isurero nagirewa mu man sip pua amone umap. Go waen mame at ugupe waene da.”

²⁵ Iesu ap anega wani go waen ame taue me namup omanip enu anega wan, “Ayop, ago nen!”

²⁶ Iesu waen ame gare maibe gapan anega wadien, “Orup otu taba muga eyao ya munait, ame kakae uon.”

²⁷ Wani waen ame gare wan, “E, ayop negawa, ge tave di waingi. Go pa i apane taba watara naini semua geamuine eyao den naiwanum.”

²⁸ Boge Iesu gare anega wan, “Ge kaimakaet anu tumat nimanegoeana menan, oraga menan anuana genan di tain.” Amba me orewa wam airase ame gapan inakaen.

Iesu waenapan aruga wat inakam mu-men

²⁹ Iesu sia ae, kaum Galili etop tau ai-wandin eni amba togan dore ae warden.

³⁰ Waenapan arugataet ine tauan. Engirit wangirit nagirewa, pusi nani tom tam wane nagirewa, yame borat mutane nagirewa, no borat mutane nagirewa, aruga upi den aian tauan Iesu namup daum enun. Me iragi wat inakam mumen.

³¹ Wat inakam mumeni menan waenapan tarak wan. No borat mutane nop waiwanumune, pusi nani tom tam wane nagirewa sia kakae tane, yame borat mutane nagirewa sia yangut taiwanumun. Ap yawane menan waenapan mu Isurero God mugawa wa taragasene.

Iesu apan 4000 watumon

³² Amba Iesu wadiamot mega munan wan tauane anega wadiamon, “Ne wae-napan ma munan bagu sisi anuivin. Mutanamo wanigen wam yampo gaset uon tan amba endi taba da ya nane. Wapimu negina torot wapi tawa menan, mondi enup agut ya watu enamot anuivin.”

³³ Wadiamot mega singui anega wayawan, “Nu taba amba tambut umanup tap amba to iam baware ma watumoit, at ma kaimewa arewa mini, taba da uon?”

³⁴ Ap wane Iesu singui wayawamon, “Taba buredi animpo inayap wanumam?” Mu gare wane, “Nu buredi nani yamu dere amba meo otu kamontu upi den.”

³⁵ Iesu to iam baware ame diamon piupa ae wanumon.

³⁶ Boge me taba buredi meo den tambu amba God inap gaun wani, paise paise ta wadiamot mega munen amba mu waenapan munane.

³⁷ Mu iragi nane umap tamon amba Iesu wadiamot megawa semua bongamen kaenat nani yamu dere enane no dotothane.

³⁸ Apan ap mepe taba nane arugataet 4000 umap go waen ge orup ya batnagene.

³⁹ Iesu to iam baware ame watu emonni ewap, me kabum dotoue amba at Magadan aen.

16

Parisi nagirewa kiman paua da tap yawat anun

¹ Parisi ge Sadusi nagirewa upi Iesu ine tauan pusip warup yawapen menan mup anega wan, “Ge aro kimaniwa paua da ta nu yawat anuivin.”

² Me gare wadiamont, “Mum gine tauepi, e anega wai, ‘Imana at tarasep umap di wandeta, iwa endi kiman gwane popo sirot wan dendeni tan.’”

³ Amba mumaget, e anega wai, ‘Endi ame ugin taueta, iwa kiman gwane irok kambu ene wa guguren.’ E piup ge kiman gwanewa guegue mega anenen venasini yawa wat mega, ame asigip tayan. Go God endi dim dim da tainiwa ya anu aviwanin.

⁴ Koewa tane God tandayasine nagirewa aro kimaniwa paua da yawat anuwanum. Go God noa wataget waiwandini apane Diona paua mega megenat wa ewain.” Iesu ap wani ae vemo tau aen.

Parisi ge Sadusi nagirewa guegue muga koerage

⁵ Wam da mu awan gamu to nugusen amone ame Iesu wadiamot megawa taba

buredi napen menan imumu borat mutane menan ya tambun.

⁶ Ame gapan, Iesu anega wadiamon, “Agun anun, Parisi ge Sadusi nagirewa koewa muga anu kakayesen. Guegue muga ame buredi tutut wapen menan atagin potap enine mini.”

⁷ Mu nop ame waran amba yau-makamup baraeen wawa mutan amba anega wan, “Mame wani iwa nu taba buredi da ya tam onantoni menan waiwan.”

⁸ Mu imumua dim da anune ame Iesu anuni menan anega wan, “E anu tumat ega otu koentu, iwa dimen taba buredi ya warat waiwanin?

⁹ E ya di anu aviaisi. Ne namu buredi magamene nani yamunaet gapan apan aruga 5000 munan nane amba semua bongameana kaenat animpo enayan? Asigip tayan go uon?

¹⁰ Amba evi buredi magamene nani yamu dere gapan apan 4000 munan nane amba semua bongameana kaenat animpo enayan?

¹¹ Menan iwa dimen nop nega ya anu kakayat wanin? Ne taba buredi menan ya waivin. Buredi tutut wapen menan atagin mini enine ap umap Parisi ge Sadusi nagirewa guegue muga agun anupen menan waivin!”

¹² Me ap wani gapan, wadiamot mega di anu awan. Me buredi tutup wapen menan atagin mini enine menan ya wan go Parisi ge Sadusi nagirewa nop muga wadidiamuine menan agun anupen diamon.

Pita Iesu yaua da Keriso dien

¹³ Wam da Iesu pa sewa yaua Sisaria Pilipai arigewa gapan taueni, wadiamot mega singui ta wayawamon, “Waenapan ne Kimani Vitana Apanewa ne da dianek wanum?”

¹⁴ Mu gare anega wane, “A, ge Dion wae-napan dup iamoni apane diagiwanum. Waenapan upi ge watagenta God noa wai-wandini apane da, ame Elaidia o Diere-maya o apan dawa diagiwanum.”

¹⁵ Menan Iesu mu inamup singui anega wayawamon, “Umap, go e ne da dianegi-wanin?”

¹⁶ Saimon Pita gare anega wan, “Ge God mega wa watu enageni Keriso. Ge God yaibobot wandini Otua.”

¹⁷ Pita ap wani Iesu gare wadien, “Saimon, apan Dion otua, God wat aipakam mega ge inagap iwa ma aroga waingiana ame apan da ya wadiagen, go ne Mamana kimaniwa wadiagen.

¹⁸ Wapena anu. Ge yauga Pita (gueguewa ame gwat bonawan), amba gwat ma gagap ne dugup nega tuin. Amba bop aroewa dugup negawa ame ya toboreta.

¹⁹ Toemu kimaniwa tonane tumtumewa ne genian. Ge dim da piupa panawa, kiman gapan den paneta amba dim da ge piupa vetawa kiman gapan den veseta.”

²⁰ Iesu ame ap anega wani wadiamot mega kaimakaet sia diamon, “Ne God mega wa watu enanegeni Keriso waenapan ya wadiamone.”

Iesu bagu sisi bop mega oisewa wadiamone

²¹ Iesu wam ame use aeni nop ere watape wa ewamot mega aroga anega wadiamuiwandin, “Ne Ierusalem angep. Ap mepe waenapan dimae waine nagire amba pirisi bawarewa ge iup wadiamuine nagire den nanimup ugu vegaek bagu sisi baware anu tanain. Amba toguranegep bonigatain. Toguranegep bonigasepena amba wam yampa God amun mega gapan inak nigat yon wanigain.”

²² Ap anega wani menan Pita Iesu nau asira ae amba digure anega wan, “Ayop, ap ya di venasep! Mu ap anega toguragepen tapi God watanamota. Ge nop ap mini ya wa.”

²³ Iesu entane Pita anega diguren, “Ge Seitan mini, tau garinap ak. Ge oma ibariwa mini namuna boringi go God wan dim dim mega iagap ya baraingi, go apan iak guine gapan waingi.”

²⁴ Amba Iesu wadiamot mega anega wadiamone, “Orup da inanap onat anupiwa, namu memek dim da anuini tandayase, ae di vep, amba ne yauna menan, pot po-raet ugu vegaek bagu sisi anu, bop mega ware evinap oniwandan.

²⁵ Amba orup da da muk inak mugawa menan anu gurane tainewa, ame inak

muga wakaumain, go orup da da mu inak muga nenan anu gure wakaumepiwa, mu inak kakaewa tautanain.

²⁶ Amba sia, orup da piup puraput mega iravi tambu inak yaibobot mek wa koeamepi o wakaumepi, ame tavewa uon! Me garewa om dim da gapan inak yai-bobot sia une ta wat naseta?

²⁷ Wam uiwa gapan, ne, Kimani Vitana Apanewa, Mamana kakae guragut mega ganasewa warap amba anea mega den tauapena amba waenapan kakaewa koewa taiwanumune garewa muga muga munain.

²⁸ Ne tave di wa agiat imaiivin. E da da mapa yoniana ya borit wai Kimani Vitana Apanewa toemu nega den tauapena yawanegene amba borit wai.”

17

Iesu etua ge wanupewa entanen ganase wan

¹ Wam nani yamu daiton uon tani Iesu God inap mup wapen menan apan Pita, Diemis ge gwaniwa Dion tambumo mugenat tunup bawarewa da dot amon.

² Ap mepe namumup yawane Iesu etua ugup entanen. Me gine namua wam mini ganase wan amba wanup mega pomponu ganase wa tau aen.

³ Yawane boge watageta apane Mosis ge Elaidia venat mutan Iesu den nop waiwanumun.

⁴ Pita Iesu inap anega wan, “Ayop nugawa, nu ge den mapa wanin antoni menan ame kakae di. Menan ge anua pa namdat otu da yampo tumoit. Daiton gegawa da Mosis megawa da Elaidia megawa.”

⁵ Pita nop mame waiwandini irikup pomponu aigamup tau, waboboram on amba mu irikup potap wanumon. Nop da irikup potap anega tauen, “Ma ne Otun iragenawa, da ne menan anu gurinawa, me inap atonua anuivin. Nop mega anun!”

⁶ Iesu wadiamot mega nop ame anune gapan tap aritavet anun ap menan gine namu piupa to kukutnagene.

⁷ Iesu tauve inatamo anega wan, “Ao yonan tap ae vean.”

⁸ Wam ame mu yangut ao tane, mu yawane apan upi uon Iesu megenat.

⁹ Tunup gapan mu vit onam wanumune, Iesu no botakam mume anega wan, “Dim da venasen yawayana oisewa waenapan da ya wadiamone. Ne Kimani Vitana Apanewa bonigasep sia inak nigasepena amba wadiamon.”

¹⁰ Wadiamot mega singui anega wayawane, “Iwa dim men iup wadidianine nagirewa apan Elaidia namu tauep amba Mesaya evi tauat waiwanum?”

¹¹ Iesu gare anega wadiamon, “Tave di, Elaidia namu di taue negin wat tamanameta.

¹² Go wapena anun. Elaidia gaseget namu tauen. Waenapan ire ya yawane menan koewa inap tat anune gapan di tane. Negin ame gine daiton gapan Kimani Vitana Apanewa den ta koeragam nimanegep ugu vegaek bagu sisi anu tanain.”

¹³ Ap wani gapan, wadiamot mega anu awane ame inamup Dion dup iamuini apanewa menan waiwandalan unu.

Orup apan airampu denawa wat inakanmen

¹⁴ Tunupa vit onamone gapan, iam iam da potap tauane, ap mepe apan da Iesu ine tauet amba namup omanip enu anega wan,

¹⁵ “Ayop, otuna menan bagu sisi anu! Airampu da potap wandia seke take taiwan vek baware anuiwan. Wam wam omaya geariwan o kaum geariwan.

¹⁶ Ne wa ewamot gega inamup waran tauan go mu ya wat inakamene.”

¹⁷ Ap wani Iesu gare wadiamon, “Akae, koewa taiana nagirewa, ya anu tumat nimanek wanin. Ne wam animpo mini tanae wanigepen amba anu tumat tai? Orup ame wat onaen.”

¹⁸ Wat tauane gapan Iesu airampu kaimakaet diguren, amba airampu orup ae ve tau aen, orup boge inakaen.

¹⁹ Amba wadiamot mega karaua Iesu ine tauan singui wayawan, “Iwa dim men airampu wa oitatoni go ya tau aen?”

²⁰⁻²¹ Iesu gare wadiamon, “Iwa anu tumat ega otu kamontu. Ne tave di wadiaivin. E anu tumat ega baip makewa

otu kamontua mini wandepiwa e tunup ma, mapa ao yone asepa aet wane, ame di aeta. Menan anu tumat nimanegene gapan dim da men wanewa di venaseta.” Iesu ap anega wan.

Iesu boepi oisewa sia wan

²² Wam da, Iesu wadiamot mega den at Galili tau ge tau amuiwanumune gapan me anega wadiamon, “Kimani Vitana Apanewa anavi waranege apan upi nanimu gwanap bat nimanegain.

²³ Mu ne toguranegep bonigasepena amba wam yampa God aro mega gapan inak nigat sia yon waingain.” Amba wadiamot mega bagu sisi baware anu tanane.

Pita moni bongamini nopewa

²⁴ Iesu ge wadiamot mega pa Kaponiam tauane ewap, God Paewa menan moni bongamine nagirewa Pita inap tauan singui anega wayawan, “Wadiaget gegawa God Paewa menan moni siwan go uon?”

²⁵ Pita gare anega wan, “E, me den di siwan.” Pita ap anega wani amba pa unuk aen, boge Iesu namu iragen Pita inap singui anega wayaven, “Saimon, ge dim da anuingi? Piup at at ayopewa ansena moni muga sinewa? At i nagirewa siwanum o ian ugape at ame wanumuine nagirewa mugenat siwanum?”

²⁶ Pita gare wan, “Ugape nagirewa mugenat siwanum.” Iesu gare wan, “E, tave di. Menan at i nagirewa ya siwanum. Menan nu ya seapen iwa nu God toemu mega nagirewa.

²⁷ Go God Paewa moni bongamine nagirewa gunat inanup ya anupen menan ge age kaum awan gapan kimai gega uat. Meo erewa warupawa noa watapa ap mepe gwat make da yawai. Wat age moni bongamine nagirewa mun, ap gapan garewa nuga ta.” Pita Iesu anenen wani gapan di tan.

18

Iesu dugup mega gwanap da baware iragenawa?

¹ Wam ame gapan Iesu wa ewamot mega ine tauan anega wayawan, “Toemu

kimaniwa potap nu orup ansena da baware iragenawa?"

² Menan Iesu orup otu da menan vene wan taue yaumakamup yonen.

³ Amba anega wan, "Ne tave di wadiain, e orup otu menawaet anu tumasine mini imuya ya wat entanenewa, toemu kimaniwa ya tauai.

⁴ Ap menan waenapan da da orup otu mini muk inga ingane wat otutamepi, toemu kimaniwa gwanap mu baware iragenia di tain.

⁵ Amba mu da da orup otu ma miniwa ne yauna gapan waupepi ne den waupanek wanum."

Ta pariset apanewa

⁶ Iesu sia anega wan, "Go orup otu ma umap anu tumat nimanegene go ta pariset apane koewa ta ewamopen menan naumo amopi, ap gapan ta pariset apane ame itan baware yaveta. Menan namu me waenapan upi wa parit mumepi tawa menan gwat itani dena megap pansine puimani pakit uasep borit wapi ame umap di.

⁷ Kaiwan, piup nagirewa pot pot koewa ugup ugup pusimup wariwan. Menan waenapan koewa tapen menan pusia di warup yawain, go kaiwan ta pariset apanewa."

⁸ "Ge nanigawa o pusigawa wat nauge ae koewa tapiwa, to ketnak aipa uat! Ap tom wapi gomunaet inak arewa ageawa ame kakae, iwa ge koewa ya veawa ge tawaga uruga yaibobot omae meravewa gapan uat enagain.

⁹ Amba ge yamaga wat nauge ae koewa tapiwa, aoma wa totnak aipa uat! Ameme yamaga yamunaet inak arewa ageawa ame kakae, iwa ge koewa ya veawa ge tawaga uruga omae meravewa gapan uat enagain."

Man sip wakaumeni maibewa

¹⁰ Iesu sia anega wan, "Agun anun orup da anu koeam anu tumasini otua ma mini ya tamop. Ame wadiaena iwa kiman gapan orup ame anea mugawa pot pot Mamanu kimaniwa namup yoniwanum.

¹¹ Kimani Vitana Apanewa God negin mega wakaumene nagirewa imumu wat inakam mumapen men tauan.

¹² Orup da ge, inagap man sip gega apane nani yamunaet (100) wanumopiwa, wam da man sip daiton wakaumewa, ge man sip upinewa 99 pua ae vemo, daitona ame yoa agai.

¹³ Wapena anun. Man mega daiton ame yavepi aton baware anuta go upinewa ya kaumeni, munan aton otu koentu anuta.

¹⁴ Ame gine daiton, e Mamaya kimaniwa anut megawa ame anu tumasini otua ma miniwa da ya wakaumat anuiwan."

Evenaga da koewa inagap tapiwa?

¹⁵ Iesu sia wadidiamon, "Tatae gwani koewa da tapiwa, me koewa mega vetavet tapen menan, karaua age koewa mega yamap wa ewat, ap mepe dere yamakayap egenat. Me nop gega anupi ame gapan ge evenaga koewa gapan gaset wat entanaan.

¹⁶ Go ya anupi, evenaga daiton o dere upi mugenat tambu sia aisene koewa mega mu den anup. Iwa God nop mega gapan inak kakaewa ge koewa om warapen menan orup daiton megenat ya wata go orup dere yampo den yao anu wap.

¹⁷ Go e inayap tanda ta ya anut anupiwa, Iesu dugup mega nagirewa me koewa mega wadiamone anup. Go orup ame nop muga den tanda ta ya anupiwa, e me inap ya anu tumasini otua mini taiwanian."

¹⁸ "Ne tave di wadiaivin, e dim da piupa pananewa, kiman gapan den paneta amba dim da e piupa vetanewa kiman gapan den veseta.

¹⁹ Sia wapena anun. E dere piup ma gapan dimen da anune umap tap menan mup wanewa ame ne Mamana kimaniwa me ta eneta.

²⁰ Menan dere o yampo nenan tobob ta yauna gapan mup wapiwa ne ap mepe mu den inamup wanigain." Iesu ap anega wan.

Waenapan koewa muga anu ae veapen noa

²¹ Pita Iesu ine taue singui wayaven, "Ayop, evenana wam ame koewa inanap tapiwa, koewa mega wam animpo anu ae veain? Anu se dorapen wam nani yamunaet nani yamu dere go?"

²² Iesu gare wadien, “Ne wadiagivin, wam nani yamunaet nani yamu dere uon, go wam wam anu ae vingan.”

²³ Koewa anu ae vepen noa anu awapen menan gutut ma gapan toemu kimaniwa guegue da wadiain. Ayop da nao mega taine nagirewa moni puakewa garewa entan sia wanapen menan wan.

²⁴ Me taitamepen taiwandini gapan, apan da moni puakewa mega arugataet iragen sia wanapen menan namup wat onamon.

²⁵ Koni ame gapan me garewa tata umap uon, menan ayop ame anega wan, ‘Orup ma amba waenewa ge otu waiwa den amba kwan puraput muga iragi une ta amba garewa taitamep.’

²⁶ Ayop mega ap anega wani menan nao mega tainiwa ame omanip enu anega wan, ‘Ayop negawa, wabibigam nimanek amba garewa iravi taitamain.’

²⁷ Ap wani gapan ayop mega bagu sisi anun garewa mega iravi anu ae ve ya taitamepen menan vesen tau aen.

²⁸ Nao apane namua ame tau aeni gapan, me nao mega daitonawa da taneni. Evenewa ame, me inap garewa otu kamontu yogup tan go ya taitamen. Menan megap ware kaimakaet anega dien, ‘Garewa nega nen.’

²⁹ Nao taini dawa ameme omanip enu anega wan, ‘Wabibigam nimanek amba ewagai sia genain.’

³⁰ Go nao taini apante namua ame bagu sisi ya anun go evenewa gwat nokap barae garewa mega wanepi amba tau aet wan.

³¹ Nao taine nagire upine, inak koewa mame tan yawane, ap menan bagumu koe tan amon oisewa ame ayop muga wadian.

³² Menan ayop ame nao taini apanewa namua menan ven wan. Taueni anega diguren, ‘Ge nao nega koerage taiana apanewa. Mup inanap waana ne garewa nega inagapewa ae vean.

³³ Ne inagap bagu sisi anuna mini iwa dimen ge nao gega daitonawa menan bagu sisi ya anuan?’

³⁴ Menan ayop apante gari gangan naen nao taini apanewa namua ame gwat noke watu enen, tone etua vege aritavet anun,

amba garewa iragi taitamepi amba tau aet dien.

³⁵ Gutut ame ap umap sia, evenae wai da koewa muga potayap den anu ae ya veanewa, Mamana kimaniwa garewa ega ega ap umap di eneta.”

19

Meme waene dere seu ya enupen

¹ Iesu nop mega ameme wan uon tani, at Galili ae ve ae amba at ginewa Diudia kaum Diodan asepagan dotou aen.

² Waenapan aruga me ewap amon, amba ap mepe me wat inakam mumen.

³ Ian Parisi nagire upi ine tauan pusi warup tap Iesu nop ebo wapen menan singui wayawan, “Apan da waenewa tandayase ae vepiwa iup nuga paina yamaseta go?”

⁴ Iesu gare anega wan, “God nop mega batnagean go uon? Ame ere mangan God piup kiman tan venat mutane gapan apan ge waen tamon.

⁵ Iwa mame menan apan ine mame ae vemo ae waen da naisepi gapan, dere tobob tap etumu daiton entaneta.

⁶ Ap gapan mu mini mini sia ya wanumoin go endi mu daiton. Ap menan God tobob tamoni gapan waen apan da seu ya enumop.”

⁷ Parisi nagirewa nop ap anune gapan sia anega wayawan, “Ame umap, go iwa dimen apan Mosis iup anega sen, ame apan da waenewa ae veapen ogewa warepi gapan me, ok ame aroewa gapan, waenewa watu enep aeta?”

⁸ Iesu gare anega wan, “E imuya gware den! Mosis waen ae vemopen umap wani iwa e imuya gware dena menan, go erewa gapan God ap anega da ya anun.

⁹ Sia wapena anun, apan ansena da waenewa union ae ya veta, go waenewa ame apan dawa den aeni menan ae vepiwa, ame umap. Go union i uon, waenewa tandayat ae ve ae, amba waen da ugup naisepiwa ame gapan togane tapatap di tata.”

¹⁰ Ap anune menan Iesu wadiamot mega me inap anega wane, “Inak map anegawa waenapan yaumakamup venat

wandapinawa ame kakaewa ya naine nisinampen. Menan mondi goroa waninetawa ame umap di.”

¹¹ Iesu gare wadiamon, “Nop mame waenapan iravi ya wat natain, ame kaimake den go da da God wa watumoni mugenat anu tain.

¹² Iwa upi burumu pokaet, mu ap anega ine wai potamup yanane, upinamu ap anega apan nanimup tum tamone o siget warane, amba upi toemu kimaniwa menan goroa mondi wanumoin. Apan da da nop ma warat anupi warep.”

Iesu orup otu wat aipakam mumen

¹³ Amba, waenapan upi otu waiwa bawarewa amba amapewa den Iesu naniwa iamup sepen menan tambun onamone, go wadiamot megawa diguguram onamone, go wadiamot megawa diguguram onamone.

¹⁴ Go Iesu orup otua munan anega wan, “Orup otua ae vemone, nenan onamop, ya watanamone, iwa God toemu mega orup otua ma miniwa mugawa.”

¹⁵ Wam ame, me naniwa iamup seni, amba me ap mepe ae vemo aen.

Tamaru kwan puraput apanewa

¹⁶ Wam ame gapan tamaru da taue Iesu inap singui anega wayaven, “Wadianet kakaewa, ne map anenen tap amba yaibobot inagewa yon borain?”

¹⁷ Iesu gare wadien, “A, dimen ne apan kakaewa dianegingi? Orup kakaewa da uon go God megenat kakae. Ge inak yaibobot unuget anua, God iup mega aymase di ta kakayat.”

¹⁸ Apan ame gare wan, “Iup ansena da?”

¹⁹ Iesu gare anega wan, “Orup da ya togura boep. Wainan gogo ya taingan. Up ya taingan. Evenaga koewa da tani yawaana ame ebo aopan, ugup ya enu yawa waingan. Inaga mamagawa ayamase ta muningan. Amba gek ingane genan anuiana mini, evenak waigawa munan anu guringan.”

²⁰ Apan tamaru ame anuni sia anega wan, “Ne iup mame waran iravi ta ongingin endi mame tauen. Ne da ya di taingina ame dim da?”

²¹ Iesu gare anega wan, “Ge inak gega tamanagaet di waniget anua age wan dim dim gegawa iragi ase une ta moni ame wara amba kwan purapuse uoni nagirewa mun. Amba ge kiman kakae guragut megawa aupa evi amba warai. Ap tawa amba ewanap onak.”

²² Apan tamaru ame, nop ame anuni gapan bagu sisi den aen, iwa kwan puraput mega arugataet.

²³ Iesu wadiamot mega anega wadiamon, “Ne tave di wadiaivin, puraput nagirewa God toemu mega unuk amopen ame inamup kaimake iragen!

²⁴ Man bawarewa da, kainok ninoke gapan unuk tau aepen tapi ame umap uon. Ap umap, kwan purapuse dena apane da, God toemu mega unuk aepi ame den umap uon di, go kaimakewa mega aigap iragen.”

²⁵ Wadiamot mega nop ame anune gop baware anun anega wane, “Akae, God toemu mega unugepen kaimakewa da di, ap menan da inak ewakewa ware kimani unugeta?”

²⁶ Iesu kem kem yawamo gare anega wan, “Waenapan muk ingane aro muga tainewa gapan ya unugain, go God inap kaimake den uon menan dim dim tat anuini mek di tata.”

²⁷ Amba Pita Iesu anega wadien, “Ge anu. Nu dim dim nuga iragi ae veat evigap onanton. Garewa dim warait?”

²⁸ Iesu sia anega wan, “Ne tave di wadiaivin, wam uiwa gapan wan dim dim iragi entan tapi gapan Kimani Vitana apanewa ayop watarewa nega gagap oya oya den ae wanigepena e aonagaet pusinawan dere wadiaet nega nagirewa ayop watarewa ega ega gagap waniai. E Isurero nagire dugup ega ega aonagaet pusinawan dere kakaewa koewa muga wanene tamoi.

²⁹ Ap gapan da da nenan anu gure, pa o tase gwaniwa o domare waiwa o mame waiwa o ine waiwa o otu waiwa o nao mugawa, ae vemopi, ap omewa apane nani yamunaet mini aigap sia garewa warain amba inak yaibobot den tautanain.

³⁰ Menan waenapan endi evi yonine nagirewa, wam ame gapan, namu yonain.

Amba endi namu yonine nagirewa, wam ame gapan, evi yonain."

20

God megenat garaet nunini apanewa

¹ Iesu wadiamot megawa anega wadiamon, "Toemu kimaniwa guegue ame ma mini, piup i apanewa da mumaget ese goe den ae apan nao tapen menan tambu watu enamon ame egak mega gapan nao tapi moni munapen diamon.

² Mu nop gare gare wane gapan me moni yaua denarias daiton wam daiton menan munat wa amba nao watu enamon.

³ Wam nawanenupe wareni upi une gare gare taine arewa gapan mondi yoniwamune yawamon.

⁴ Me anega diamon, 'E den sia aisen nao nega tan amba dim da tane tamanaepiwa ne garewa ega enain.'

⁵ Wani mu nao amon.

Amba wam ianupe wareni amba sia wam airase yampaia wareni gapan ap mepe gine daiton tan, ame upi sia tambu me nao mega tapen watu enamon.

⁶ Amba uiwa me sia aeni upi mondi di yoniwanumune yawamon. Menan singui tayawamon, 'E iwa dimen wam ma uruga mondi dim da ya tayan yonayan iwanin?'

⁷ Mu gare anega wane, 'Iwa waenapan da nao ya nunane.' Menan mu inamup anega wan, 'E den sia aisen, egak nega gapan nao tan.'

⁸ Wam ame mum gine taueni, nao i apanewa tauue gauarape mega die anega wan, 'Nao nagire venamu wa tauuep garewa muga muga mun. Uiwa tauane nagirewa gapan muna aen e ere tauane nagirewa inamup tauuep.'

⁹ Nao nagirewa tauane garewa muga munen, ame gapan wam uiwa nao tauane nagirewa namu garewa muga muga denarias daiton tambune.

¹⁰ Ap menan namu nao tapen watu enamoni nagirewa, anega anun, 'Nu namu tauatoni menan garewa aigap sia tambuit,' ap anega anune. Go garewa muga om daiton ame megenat tambune.

¹¹ Ap menan nao i apane inap gunat anun anega wan,

¹² 'Uiwa tauane nagirewa wam koni daiton megenat nao tane go garewa nuga om daiton. Go nu wam baware aranen amun gatok arat pit taton.'

¹³ Go nao i apane gare wadiamon, 'Oru ma, ne koewa da inayap ya tan. Nu mu maget agi watoni moni garewa denarias daiton enat waton.

¹⁴ Ega ega waran aisen. Ne eviwa namua gine daiton munat anuivin ame ne negenat.

¹⁵ Ne moni nega dim da tat anupena di tain ame ne negenat di e ya watana negene. Uiwa tauane nagirewa baware munana menan e anu koeam mumiwanin go?'

¹⁶ Amba Iesu nop uiwa anega wan, "Ap menan, namu wadiena ameme di, endi evi yonine nagirewa, wam ame gapan, namu yonain. Amba endi namu yonine nagirewa, wam ame gapan, evi yonain."

Iesu bop mega oisewa koni yampaia sia wan

¹⁷ Iesu pa Ierusalem dot aiwandini gapan, wadiamot mega aonagaet pusinawan dere neginaet anega wadidiam aiwandin,

¹⁸ "Wapena anun. Nu pa Ierusalem dot anivin, amba Kimani Vitana Apanewa waranege amo pirisi bawarewa amba waenapan iup wadidiamuine nanimu gwanap bat nimanegain amba toguranegepen noa panain.

¹⁹ Diu nagire waranege Diu uoni nagirewa nanimu gwanap bat nimanegain. Diu uoni nagirewa nipec dianege wa koeragam nimanegain. Giton en ana nege amba wagu gapan tonek wanumain. Amba toguranegep bonigatain go wam yampaia gapan inak nigat sia yon wani gain."

Inan da kirurup megawa

²⁰ Amba Iesu wa ewamot mega, tase gwani dere, Diemis ge Dion, inamu den Iesu ine tauane. Inamua omanip enu dim da menan anuni mup wan.

²¹ Iesu waen ame wayaven, "Ge dim da menan anuingi?" Waen ame gare wan, "Otun waina dere mam, toemu gega amunewa warawa gapan mu den

bawarewa tap amba mainaga nutup gapan da senip gapan ae wanumop.”

²² Go Iesu gare wan, “E dim da da asik ya tayan amba mup waiwanin. Ne bagu sisi kaumewa napena e den nai go?” Mu gare anega wane, “E, nu den nait.”

²³ Menan Iesu sia wan, “Tave di e nai, go mainena nutup o senip gapan ya ve enapen waniai. At mame muna muna Mamana tata kakayat ta muneni nagirewa mugawa.”

²⁴ Iesu wadiamot mega aonagaeta upine nagirewa, mup mame oisewa anune gapan tase gwani derewa inamup ugu gangan mutan.

²⁵ Go Iesu munan wan tauane anega wadiamot, “E asigiap, ian ugupe nagirewa bawarewa muga tamu taiwanum amba gauarapewa wagup warapen menan inamup tayaviwanum.

²⁶ Go e ap anega ya tai. Da me yau-makayap bawarewa tat anupiwa me nao ega taini apanewa entanep.

²⁷ Amba da me namu yonat anupiwa, me nao kaimakaet enan tap.

²⁸ Ap umap sia Kimani Vitana Apanewa piup nagirewa ta warit imaeopen tauan e ta warit nimanegepen ya tauan. Menan bop tapena waenapan koewa muga garewa mega iravi warain.” Iesu ap anega wan.

Yame borat mutane dere wat inakam mumen

²⁹ Iesu wa ewamot mega tanamo pa Dieriko ae ve aiwandini, to iam baware da me ewap den amuiwanumun.

³⁰ Apan dere yame borat mutane negin etop wanumone, ame mu Iesu tau aiwandini oisewa anune menan mu ve anega wan, “Iesu watageta apane Devit naewa, bagu sisi nunan anu!”

³¹ Namu onamone nagirewa anega diguguramon, “Nop ae vean,” go mu uma sia anega wan, “Apan Devit naewa, bagu sisi nunan anu!”

³² Iesu ame anuni menan, ae yone mu inamup anega wayawamon, “Ne inayap dim da tat anuiwanin?”

³³ “Ayop nugawa, yamanu watap nuna, yangut tat anuivin.”

³⁴ Iesu bagua munan anu amba naniwa yamamup inatamon. Gine tutup mu yamamu i pak wan yangut tan amba me ewap amon.

21

Ayop Iesu pa Ierusalem taueni gaune wan

¹ Iesu, wadiamot megawa den, pa Ierusalem maniwanumune gapan, mu pa namu tauan at ame Oma Olip Yanane Tunupewa. Ap mepe wadiamot dere watu enamo

² anega diamon, “Pa sewa namunupe uta aisen tauanewa, use tauan man donki amba me otua da den damiga taumone yawamoi. Man dere ame vetamon, tam onaen, mapa tauan.

³ Ap mepe, orup da yawae singui anega wayawaepiwa, ‘E dim da taiwanin?’ Gare manega wan, ‘Ayop nuga, man donki mame munan wan tauaton.’ Amba orup ame, ap anupi gapan, menawaet man ame nenan watu enamota.”

⁴ Iesu ap anega wani ame nop dim da watageta God no oise waiwandini apanewa da wani tavewa tauen. Me manega wan,

⁵ Ierusalem nagirewa inamup anega wai, ‘Yawan, Ayop ega, inayap tauiwan, ae bibigaren, man donki gagap oniwan. Apan ame man donki otua gagap oniwan.’

⁶ Menan Iesu wadiamot mega wadiamoni gapan gapan di tan.

⁷ Mu man donki otu dere tambun onamon wanup muga gagap yogune, amba Iesu dore gagap wanden.

⁸ Waenapan arugataet wanup muga negina yogune, ame taiwanumune newap upinamu oma naniwa ketnagen tauan negina den yogun.

⁹ To iam baware ame namup onam wanumune amba evip onam wanumune den nomu ainagases anega waiwanumun, “Apan Devit otua, gaun baware inagap, God wat aipakamini apanewa, Ayop yaua gapan tauiagi! God paina wandiniwa yaua ao warivin,” ap anega waiwanumun.

¹⁰ Iesu pa Ierusalem taueni gapan, pa sewa ame garivi nau bambam mumeni menan anega wane, “Apan ma da?”

¹¹ To iam baware ame gare anega wan, “Ma Iesu, God no oise wainiwa, me at Galili gapan pa Nasaret apanewa.”

Iesu God Paewa daio aen

¹² Iesu Ierusalem taueni amba God Paewa sin gwanap unuk aen. Ap mepe, wan dim dim muga gare gare une taiwanumune nagirewa gut oimon tau amone. Moni entan wantan taiwanumune watarewa aie yamu tanamon amba watat gapan mu nenip bairantan une taiwanumunewa den baime uatamen.

¹³ Amba me anega diamon, “God nop mega ok anega sean, Ne pa nega, waenapan ne inanap mup waine paewa, ok ap anega sean. Go e taiana up nagire pa muga karauawa mini entanen!”

¹⁴ Ap mepe, God Paewa gwanap yame borat mutane amba pusi nani gege rawa tane nagirewa me inap tauane wat inakam mumen.

¹⁵ Go pirisi bawarewa amba iup wadidiamuine nagire den Iesu inak kakae taiwandini yawane menan garimu yaven. Orup otu God Paewa gwanap Iesu inap gaun anega waiwanumun, “Apan Devit naewa, gaun baware inagap.” Mu ap wane, pirisi bawarewa amba iup wadidiamuine nagirewa anune.

¹⁶ Menan mu Iesu anega dian, “Orup otu diak wanumune ge anuingi go uon?” Iesu gare anega wan, “E, mame God nop mega namua gapan ya batnak anuyan? Wataget nop mega ok ap anega seane, Maman God, aton genapen men orup otu amape den, tavewa gapan wa taragat gimagiwanum. Ok ap anega sean.”

¹⁷ Iesu ame wani ewap waenapan pa Ierusalem gapan ae vemo ae pa Betani gapan inen.

Iesu oma baip nop gapan wa koeraga-men kurat wan

¹⁸ Mumaget Iesu entane Ierusalem aiwandini gapan enup aren.

¹⁹ Menan oma baip negin etop yaveni, me ae iap taueni go tavewa da ya yaven, baewa megenat. Boge me oma anega dien,

“Ge tavewa gega da sia ya iai!” Gine tutup oma imokae kurat wan.

²⁰ Wadiamot megawa yawane no i kap wan anega wayawan, “Oma anenen menawaet wae inen?” Mu singui tayawane.

²¹ Iesu gare wadiamon, “Ne tave di wadiaivin, e anu tumat ega wandepiwa amba anu bambam ya tanewa, oma baip inap tana megenat uon, go aigap manega di tai, tunup inap anega wane, ‘Ao yon asepa puimani geak,’ ap anega diane ame di tata.

²² E anu tumat tanewa gapan dim da menan anun mup God inap wanewa ame e enep warai.” Iesu ap anega wan.

Iesu amun mega iwa yop tan

²³ Iesu God Paewa sin gwanap unuk ae opata wadidiam wandini gapan pirisi bawarewa ge waenapan namu yoyo nagire den ine tauan anega wayawan, “Ge amun ansena da waran gapan dim dim mame taingi? Amun mame, da genen?”

²⁴ Iesu gare wadiamon, “Ne singui nega daiton den, namu wayawain, garewa wadianegenewa amba da aro amun neneni gapan taina ame wadiain.

²⁵ Singui nega mam, Apan Dion dup iamuiwandiniwa ame amun mega aupa kimanware taiwandin go, gare mapa piupa waenapan upi inamup ware taiwandin?”

Mu iragi nop waran yaumakamup seyao wareyao muk inga ingane tan amba anega wan, “Endi nu kiman amun mega ware taiwandat wata, me anega dianeta, ‘E dimen Dion nop mega ya anu tumasiwanin?’

²⁶ Go nu endi anega watawa, ‘Amun waenapan inamup ware taiwandin,’ waenapan ma iragi gwara toguguranain iwa mu asigimup Dion me God watu eneni apanewa.”

²⁷ Ap anega anuiwanumune menan Iesu singui mega garewa anega wadian, “Dion amun ame wareni arewa nu oare.”

Menan Iesu ap anega diamon, “Ap menan ne den amun nega amba warana gapan ugup ugup mame taina ya wadiain.”

Apan da otu wai dere maibewa

²⁸ Iesu anega wadiamon, “Ne gutut da wadiain. Apan da otu wai dere den. Mamewa otua namua ine tauue anega dien, ‘Otunawa endi age nao nega di ta!’

²⁹ Otua ame gare anega wan, ‘Ne tanda’. Go otua ame, evi amba imua entan tan amba ae nao tan.

³⁰ Boge mamewa ae otua dawa ine tauue anega dien, ‘Otunawa endi age nao nega di ta!’ Orup ame wan, ‘Maman, ne angain.’ Go otua ame ya aen.

³¹ Menan orup ansena mamewa noa waren?”

Iesu singui ame wani gapan, Diu ayop mugawa gare anega wan, “Orup namua mamewa noa waren.” Menan Iesu anega wadiamon, “Ne tave di wadiaivin moni bongamine, ame koewa taine nagirewa, amba negin gagape waene den, mu namu God toemu mega kimaniwa tauain go e evi den ya tauai.

³² Iwa Dion taueni e inak tamanawa neginewa to ewaet wa tauen go e anu tumat me inap ya tayan, go koewa taine nagirewa me inap anu tumasene. Mu anu tumasene yawayana gapan den e imuya ya entane anu tumasean.”

Iesu Diu bawarewa nagire munan maibe wan

³³ Iesu sia wan, “Maibe da sia wapena anun. Apan da taba gureip naewa vere sin ikukuk taun. Gureip kaumewa magose waraben menan gwat bonawan gapan urasewa waren. Gopat tapen men dagurak paina tun. Egak mega kwayup ta maup gapan semu baware garewa muga waraben menan nao nagirewa munan wan tauane amba me at da ugup aen.

³⁴ Maup wamewa taueni gapan piup i apane nao mega nagirewa upi watu enamon, amo egak mega amase taine nagire inamup tauan, maup semua i apane wanaben menan mup wan.

³⁵ Go kwayup taine nagirewa gut oimon, mu daiton gaut enane dawa togurane boen amba yampa agima toguran.

³⁶ Egak i apanewa namu nao taine nagirewa aruga ya watu enamon go evi aruga watu enamon amon. Tauane egak kwayup taine nagirewa inamup gine daiton sia tane.

³⁷ Ui iragenawa, me otua inamup watu ene anega anun, ‘Mu ne otuna viripewa tain.’

³⁸ Otua watu enen oniwandin amase taine nagire paina yawan muk ase ma anega wawa mutan, ‘Piup i apane otua oniwan. Apan mam iman egak ma yon boreta, menan anet togurat boep, amba egak mame boge nu yon borat.’

³⁹ Menan waran sin garip uat enan tograne boen.

⁴⁰ Ap menan wam ame nao i apanewa tauepi nao nagirewa inamup anenen tata?”

⁴¹ Iesu singui wani ayop nagirewa gare anega wan, “I apane tauue koerage pia inine nagire gut momak mumeta amba egak mega waenapan upi munep kwayup tain. Maup wamewa gapan gapan taba mega wanain,” ap anega wan.

⁴² Iesu ayop nagire sia wadiamon, “Ame umap di go God nop mega ok seane e batnagean. Ok ame anega waiwan, Agim ame pa tuine nagirewa tandayasen, koerage dian, go God agim ame ware entanen amba pa tuine danewa venasen.

Ayop mame kakae di tan menan nu tarage waivin.

Ok ap anega sean.

⁴³ Ap menan, wapena anun, God toemu megawa e waseae amba amun mega eneni waseaeta, waenapan ugup, God menan yambuni ta amuine nagirewa, muneta.

⁴⁴ Menan waenapan da da agim ame aigap onan geamopiwa, ame kaime no topait wa pait ta seta, go gare agim ame orup da aigap gearepiwa ame to gogotonagep atabobo venaseta,” Iesu ap anega wan.

⁴⁵ Pirisi bawarewa Parisi nagirewa den mu asigimup, Iesu gutut ame mu koewa muga menan waiwandin.

⁴⁶ Menan mu ugu gangane den Iesu to warat anun go waenapan guramopi tawa anun, iwa waenapan Iesu God noa waini apanewa da anune menan.

² “Toemu kimaniwa guegue manega, ayop da otua waen naitapen tani barip mega tan.

³ Me nao mega nagirewa watu enamon amo, da da barip gagewa onamot wani ame wadiamop onamopen, go mu iravi tanda wane.

⁴ Menan me nao nagirewa upi sia watu enamon, nop manega wadiamopen menan watu enamon, ‘E iravi onaen iwa ne antaba gaset tunun sese kakayat tan. Man nega kao ine otu dere guran amba wan dim dim iragi gaset ta kakayasen, ganawan barip aige onaen.’

⁵ Go mu nop muga to kayasen amba daiton nao mega aen, dawa wan dim dim mega une gare gare taini arewa aen.

⁶ Upinamu nao nagire megawa tambun guramone borit wan.

⁷ Ayop ame ugu gangan naen menan ita nagirewa mega watu enamon amon koewa tane nagirewa enu girigamen guran pa sewa muga uta it baimene.

⁸ Ame tani amba me nao nagirewa mega upine diamon, ‘Naine mutat baripewa tata kakayat gaset tan, go waenapan venamu wana mu koerage menan ya tauep.

⁹ Ap menan negin ni enoa ise tau ase tau aisen amba waenapan da tautanamonewa munan wane barip aigewa onamop,’ ap anega diamon.

¹⁰ Ap menan nao nagirewa tau amon, waenapan iragi negin gage gage upamon togonen, mu da da iragi tanamonewa, kakaewa ge koewa, ai onamone amba naine mutat baripe paewa gwanap barat mutane.

¹¹ Barip wamewa gapan ayop ame tau apan da naine mutat wanupewa ya panen yaveni menan singui anega wayaven,

¹² ‘Enda, ge anenen amba mapa unuk tauan go naine mutat wanupewa ya panaana?’ Apan ame nop uon tan.

¹³ No uon wandeni menan ayop nao mega nagirewa diamon, ‘Orup ame pusinani taun garip sisipu aipa uat enan.’ At sisip ame gapan waenapan irip waiwanumun amba asi kitonak wanumun.” Iesu maibe ap anega wan.

¹⁴ Amba Iesu sia anega wan, “God wae napan aruga munan waiwan go agiap om

enumon.”

Moni seapen nopewa

¹⁵ Ian Parisi nagirewa tau amon, Iesu anenen tap nop wabambamasepen menan nopewa panan.

¹⁶ Wadiamot muga upi amba Erodian nagirewa den, Iesu ine watu enamone tauane anega wayawan, “Wadianet nugawa, nu asiginup ge waenapan muk anen wane taine ame menan ge imuga potaga ya wariniwa, go ge nop tavewa gapan God dim dim anuini om ap gapan tainampen neginewa wadianianawa.

¹⁷ Menan nu singui nuga mam. At Rom ayopewa Sisa nu moni se wanata ame gapan nu Mosis iup mega yamatait go uon?”

¹⁸ Go mu nanamaset wan taiwanumune Iesu me asigip tan, menan me anega wan, “E da wa da ta taiana nagirewa dimen wayawanek wanin?

¹⁹ Endi moni gwat make da ewanegen.” Mu gwat make da wat onamone.

²⁰ Iesu singui wayawamon, “Yawan, moni mame gamup da yaua o guewa ok seane?”

²¹ Mu gare anega wan, “Ame ayop Sisa guewa mega gamup wandia.” Menan Iesu anega wan, “Ap menan, wan dim dim Sisa mega wandepi ame Sisa di wanapen. God mega wandepi, ame God di wanapen.”

²² Wam ame mu nop mame anune tarak wan, menan mu ae veān amon.

Waenapan borit wane sia inak mutapen noa

²³ Wam ame daiton, dugup Sadusi nagire, upi Iesu inap tauan. Mu dugup anu fumat muga gapan waenapan manega wadiam wanumun, “Borit wata sia ya inak nitait.”

²⁴ Menan Iesu inap singui anega wayawan, “Wadianet nugawa, watageta apane Mosis nunan iup anega sen, ‘Apan da waenewa otu uon boepi gapan me gwaniwa kwapura ame naise tasewa uewa orup se wanep.’

²⁵ Endi apan upi tatap gwanip yananewa nanin yamunaet yamunewa dere mugenat wanumon. Namu bonewa mugawa waen naiseni go me otu uon boen

menan gwaniwa ewap yaneni, tasewa kwapuraewa sia naisen

²⁶ Gwaniwa orup da ya baraeni amba boen. Gwaniwa yampoa kwapura sia naisen. Ap anega ta amo wanumune dugup daiton apan nani yamu dere waen ap daiton naitan.

²⁷ Amba uiwa waen kwapura ame den sia boen.

²⁸ Ap menan endi apan nanin yamunaet yamune dere waen ame naitanewa go wam uiwa gapan waenapan inak muse sia yon wanumopi waen ame apan ansenawa waenewa?

²⁹ Iesu Sadusi nagirewa gare wadiamon, “E aopan waiwanin iwa ok seane e asik ya tayan amba God aro amun mega den e oare.

³⁰ Go waenapan borit wane evi amba sia yon wanumopi inak yaibobot eviwa gapan mu gare gare ya naine mutain, den ore wai naine mutapen menan ya munain. Iwa mu anea umap wanumoin sia ya borit wain.

³¹ Inak muta muta nagirewa gueguewa ame God wataget wat arogamen. Iwa watageta gapan God e inayap anega wan,

³² Omae baewa Eibaraam, otua Aisik, amba upewa Diekap, mu God muga daiton ame ne di.

Ap gapan endi nu asiginup ame waenapan kabaniwa ge bonigawa mu God yamap iravi kabani wanumamun, iwa mu guamu den.”

³³ Wam ame waenapan nop mame wadiamon anune, tarak wane.

Iup dere baware iragen

³⁴ Parisi nagirewa Iesu Sadusi nagirenop muga wa toboboramoni oisewa anune menan todagon wanumon.

³⁵ Apan muga da, me waenapan iup wadidiamuini amba Diu iup muga anu kakayasini otua, pusi warup ta Iesu irewa yawapen menan watu enane. Singui anega wayaven,

³⁶ “Wadianet nugawa, God iup mega ansena baware iragen?”

³⁷ Iesu gare wan, “Ge Ayop gega God, imuga potaga gapan, guaga gapan, epa guin pakao gega gapan, iak guine gapan, menan ae anu guringan.

³⁸ Iup mame aigap iragen.

³⁹ Derewa ap umap sia manega. Gek genan ae anu guriana mini, evenak waiga pa mainagape wanumuine nagirewa munan den anu guringan

⁴⁰ Mosis iup mega iragi amba God no oise waine nagirewa nop muga den iup dere mame onemup aoma yap enane wanumamun.”

God mega wa watu eneni Keriso noa

⁴¹ Wam ame gapan, Parisi nagirewa iam wanumone gapan, Iesu singui wayawammon,

⁴² “God mega wa watu eneni Keriso dim da anuiwanin? Me da naewa megawa?” Mu gare anega wane, “Me apan Devit naewa.”

⁴³⁻⁴⁴ Iesu sia wan, “Keriso me Devit naewa wane tavewa di go iwa dimen God Guewa ayop Devit wa ewaseni gapan me Keriso Ayop megawa dien? Iwa watageta bukaewa, yaua Sam, gapan Devit Keriso evi amba me denip mega gapan tauapen menan ok anega sen,
God yone Ayop anega wadien,
‘Nanina nutup arigewa gapan ae wanigan-
gan,
ne anavi gega tambup gauaragap sin-
gapena menan.’

⁴⁵ Nop ma gapan, Devit yone Keriso inap me Ayop diwandin go Devit namu yaneni apanewa amba Keriso evi yanen menan anenen entane Devit naewa mega ayop dien?” Iesu singui ap anega wan.

⁴⁶ Iesu singui wayawamoni Parisi nagirewa gare wa wa da uon. Wam ame gapan waenapan singui evi da sia ya wayawat anun.

23

Parisi nagire guegue muga koerage menan agun anut diamon

¹ Boge Iesu to iamene nagire ge wa ewamot mega anega diamon,

² “Iup wadidiaeine ge Parisi nagirewa mugenat watageta apane Mosis iup mega gueguewa wa arogamine nagirewa.

³ Ap menan wadiaepi anu tan go guegue muga taine gapan ya tane. Iwa mu da wa da ta taine nagirewa.

⁴ Mu iup ni enowa mega anu geonagene, go nop muga itani den waenapan ae natam wanum. Ap menan waenapan nop ame ware tapen menan umamup uon. Go waenapan wat agoat mumapen menan ya anuiwanumun.

⁵ Mu waenapan yawamopen men guegue muga taiwanum. God nop mega seane namu bonap ge nanip paniwanum. Amba God menan wanup muga ginewa ragigie den eniwanum. Ap taine gapan waenapan yawamone anu tumat nagirewa diamuiwanum.

⁶ Barip arewa gapan waenapan virimutat amba watat kakaewa munat anuiwanum amba iup anuine paewa gwanap watat kakaewa gapan wanumot anune taiwanum.

⁷ Une arewa gapan gaunamu wat anune amba wadiamuine nagirewa diamot anuiwanumun.

⁸ Go e iravi wadiamot nagirewa ya diaepen iwa wadiaet ega daiton megenat wandia amba e iravi tase gwani, dugup daitonawa.

⁹ Amba piup apante da maman ya diane, iwa e Mamaya daiton kimani wandia.

¹⁰ Orup da e namu yoyo ya diaepen, iwa e namu yoyo egawa daiton megenat, ame Mesaya.

¹¹ Da me yaumakayap bawarewa tat anupiwa me nao ega taini apanewa entanep.

¹² Ap umap sia, orup da da muk ingane yaumua ao wabawaraminewa ame God aoma wat otutam mumeta, amba waenapan da muk ingane yaumua aoma wat otutaminewa ame God ao wabawaram mumeta." Iesu ap anega wan.

Parisi da wa da ta taine nagirewa

¹³ Iesu sia anega wadiamon, "Anun, Parisi amba iup wadidiamuiana nagirewa, e da wa da ta taiana nagirewa, itan baware yawai. Waenapan God anupen men taine watanamuiwanin. E God ya anut anuiwanin go God anut anuine nagirewa watanamuiwanin.

¹⁴ Anun, waenapan iup wadidiamuiana Parisi nagirewa den, e da wa da ta taiana nagirewa itan baware yawai. Kwapura nagirewa puraput muga garaet tambuiwanin. Waenapan yawaepen men God

inap mup nononga waiwanin. Ap taiana menan God itan bawarevet eneta.

¹⁵ Anun, waenapan iup wadidiamuiana ge Parisi nagirewa den, e da wa da ta taiana nagirewa itan baware yawai. Apan daiton guegue ega anu tapen men puiman asepa gan at at iragi den yoa taiwanian. Orup ame waranewa me guegue egawa asik tapi gapan koewa ega megenat ya tata go aigap sia taiwandata. Menan e merao arewa aisene itan baware yawai go apan ame aigap iragen yaveta.

¹⁶ Anun, e negin asigipewa nagirewa go e yamaya borasen, itan baware yawai. Iwa e waenapan anega wadidiam wanin, orup da God Paewa inap agi wapi, amun ya wareta, go agi ame God Paewa gwanap puraput yananagaet gwayayame den gamup wapi, agi ame tavewa venaseta.

¹⁷ E yamae borasen bumbum bambam! Ap ya wai, iwa God Paewa ame aigap amba puraput yananagaet gwayayam denawa gauarap iwa God Paewa gwanap wanumune menan God wat aipakam munen.

¹⁸ Amba sia, e anega wadidiam wanin, orup da God Paewa gwanap God menan yan garaet sine watarewa gapan agi wapi, ame amun ya wareta, go orup ame yan garaet ame gapan agi wapi ame tavewa venaseta.

¹⁹ Ap menan e yamaya borasen! Aritawa ansenawa, yan garaetawa o gare yan ame wat aipakamini watarewa?

²⁰ Ap menan, me da agi watat inap waniwa me wan dim dim iragi gagapewa gapan den agi waiwan.

²¹ Menan me da God Paewa gapan agi wapi, God nuga pa gwanap wandini inap den waiwan.

²² Kiman amun mega gapan agi wapi ame God ae wandini arewa gapan den agi waiwan.

²³ Anun, waenapan iup wadidiamuiana ge Parisi nagirewa den, da wa da ta taiana itan baware yawai. Iwa kutut ugup ugup danse dena aonagaet tambuiana daiton ewagai sia God men bariana ame kakae. Go God menan koewa wat tamanam gueguewa amba God baigan mega gueguewa ya taiwanin. Kutut ugup

ugup upi God men barat anune umap di go guegue bawarewa den taiwanian.

²⁴ E negin asigipe nagirewa yamaya borasen. Iup otu koentu iravi ayamase taiwanin go iup bawarewa e to paisiwanin.

²⁵ Anun, waenapan iup wadidiamuiana ge Parisi nagirewa den, e da wa da ta taiana itan baware yawai. E taba naine yogupewa ge kaum naine sipewa gariwa megenat bigi guriwanin, go e potaya iragi wan dim dim koewa gui togon tayan wandia.

²⁶ E Parisi nagirewa yamaya borasen. Namu sip yogup gwanewa bigi warane amba gariwa den kakae wandeta.

²⁷ Kaiwan, waenapan iup wadidiamuiana ge Parisi nagirewa den, e da wa da ta taiana itan baware yawai. E yawaet ega etuya gapan kakae yaviwanum go guegue ega koerage, e yawaet ega garia gapan kakae go gwanapewa apan boeni kaimewa no dotouen amba wan dim dim iragi puakaini aninke dena, e ap umap.

²⁸ E yawaet ega ap me di, garip kakae go gwanapewa potayap ebo aopan bararaen amba koerage.”

God Parisi nagirewa itan baware muneta

²⁹ Iesu sia wadiamon, “Anun, waenapan iup wadidiamuiana ge Parisi nagirewa den, e da wa da ta taiana itan baware yawai. God noa wataget waiwanumune amba kakaewa taiwanumune nagirewa omae baewa guramone amba borit wane kaima muga arewa kwayup taiwanin.

³⁰ Ap tayan anega waiwanin, ‘Nu omayan baewa wamewa den waninemu God noa waiwanumune nagire guramone borit wane nu ap umap ya tapo.’

³¹ Ap anega wane, ek ae enu yawayan waiwanin, iwa guramone nagirewa naewa muga e me di.

³² Omae bae koewa muga ya taitamene go endi e taitamen.

³³ Guegue ega mokare seram naewa umap. God merao arewa aiset wapi e anenen mainep tau aitai? Umap uon.

³⁴ Ap menan God noa anune waine amba dima nagirewa amba Mosis iup mega wadidiae nagirewa den inayap

watu enamuivin. Go e upi guramone borit wain amba upi oma gapan gut batam mu-mai, amba upine iup anuiana pae gwanap gaura guramoi amba pa sewa sewa gapan wa koeragam mumane gapan gut oimop tau ge tau amooin.

³⁵ Ap tane menan waenapan at at iravi kakaewa taiwanumune nagirewa guramone garewa inayap taueta. Erewa gapan ame apan kakaewa Eiboro, namu to boniga baraene amba oniwandin e amba Berekaya otua Sekaraya God Paewa man irine watarewa yaumakap e omae baewa tone boen.

³⁶ Ne tave di wadiaivin. Koewa ame garewa endi waniana nagirewa inayap taueta.” Iesu ap anega wan.

Iesu pa Ierusalem men kaiwan wan

³⁷ Iesu Ierusalem menan anega wan, “Ierusalem, O kaiwan Ierusalem nagirewa! God noa waine nagirewa guramuiwanian borit waiwanum upi inayap watu enamoni agima guramuiwanian. Wam wam aruga kumkum otu wai ai bongamen magua gauarap enini, ne ap umap waenapan gega ai dangonet anun taivin, go e ap anega ya tat anu nimanegiwanin!

³⁸ Ap menan yawan, God Paewa, Ierusalem gapan, konintu amba e Diu anavi egawa tau to benagep pokaet wandeta.

³⁹ Amba iman e sia ya yawanegai. Go wam ansena evi da amba e ne inanap anega wai, ‘Ayop yaua amunewa gapan tauagi, ap menan God wat aipakam gimorgia,’ ap gapan, ne sia yawanegai.” Iesu ap anega wadiamon.

24

Wam verisiwa paua megawa

¹ Iesu God Paewa ae ve amba tau ai-wandini gapan wa ewamot mega me inap tauan anega wane, “God Paewa amba pa mainepewa upine den iravi kakaevet di tumone!”

² Go Iesu gare anega wadiamon, “E pa mame iragi yaviana menan nop nega anun. Wamewa da tauepi gapan anavi ega tau pa ma iragi to bebenak ae seain,

gwat da daiton didi batamene diriga aita ya wanumoin,” ap anega wan.

Itan wamewa oniwan

3 Wam ame evip, Iesu Oma Olip Yanane Tunupewa gapan wandeni, wa ewamot mega inap tauan wam paua anupen menan mugenat karaua singui wayawan, “Pa mame iragi to bebenak ae seopen wamewa andi amba taueta? Amba wam verisiwa amba ge sia tauapen wamewa taiwandapina, paua mega dim dim da namu taue aiwandapina yavinain?”

4 Iesu gare wadiamon, “Agun anun, waenapan da da aopan wababayan imaepi tawa.

5 E yao kakayat amba wanien, da aopan wababayan imaepi tawa. Waenapan iman arugataet tau, amba anega waiwanumain, ‘Ne Mesaya,’ amba arugataet ebo ewamoin.

6 Ita anan tapi oisewa anui amba ita anan tapen tapi oisewa anui go tap ya anune. Ita anan ame iravi taiwanumain go ap gapan wam verisiwa ya taueta.

7 Ita anan agagae tauue aiwandapina yawanewa, ame tap ya anu gurane. Wankakao ge puinunu amba inak aru ap mini namu venase di tau aeta, go wam uiwa ap mepe ya taueta.

8 Go mame iragi itan bagu sisi erewa da.

9 Ap wamewa, waenapan e panae togugurae amba wa koeragam imain upi gurayep borit wai. E ne dugup nega nagirewa menan waenapan iravi at at gapan tandayat imain.

10 Wam ame gapan waenapan arugataet anu tumat taine entan ta ae veain amba tanda ta ominamu gare gare wain.

11 Wam ame gapan, God oit mega tave uoni waine nagirewa aruga yone waenapan aruga aopan wababayan mumain.

12 Koewa wabawaremep amba baigan kakaewa to umep bigaret wane taiwanum.

13 Go e da da nenan aro ta waniwaniampina inak yaibobot di wariwaniai.

14 Amba God toemu mega No Oise Kakaewa at at iragi piup ma gapan wadidiam wanumain amba waenapan munan tani oisewa iravi anuin, boge wam verisiwa taueta.” Iesu ap anega wan.

Wam koerage iragen oniwan

15 Iesu sia anega wan, “Nop mame batnagine nagirewa batnagepi anu kakayasep. God noa wataget waiwandini apane Daniero namu wani ap me taupei mam. Apan da pa Ierusalem God Paewa wabigamepen menan guewa koewa iragen da wat tauue endavep yawai.

16 Ap yawanewa gapan, e at Diudia gapan wanienawa tap serarat aise tunupa dot aitai.

17 Amba apan da pa aigarip wandepi pa gwanape puraput mega da ya warep go serarat tap aep.

18 Amba orup da egaga wandepi me wanup mega menan ewagai ya aep.

19 Wam ame inepi wamewa, kaiwan, waen bagu dena o orup otu ine amape nagirewa inamup kaimake den!

20 Tap aise aise bodu wamewa go pura bawarewa wagat wamewa gapan ya venasepen menan God inap mup waiwanian.

21 Iwa wam ame gapan ita anan bagu sisi baware iragen taueta, erewa gapan ma onin en mame tauini ap mini da ya venasen amba inak ap mini da sia ya venaseta.

22 Menan wam ame om mega God ya wat oninkamepo, waenapan iragi borit waitamepo, go om enumoni nagirewa mugenat munan wam ame wat oninkameta.”

23 “Wam ame gapan waenapan da anega wapi, ‘Yawan, Mesaya ma tauen!’ o ‘Atapa tauen!’ da ya di anu tumasene.

24 Iwa Mesaya eboewa amba God noa tave uoni waine nagirewa tauue yo paua aigape taiwanumain. God om enumoni nagirewa aopan wababayan mumapen tayawaiwanumain.

25 Wapena anun. Ne mame ya venaseni gapan namu e wadiaen.

26 Amba da orup da anega wadiaepi, ‘Onaen yawan, Mesaya at kaimewa gapan sia tauen wandia,’ ap anega wapi yawapen ya aisene. Mu sia anega wapi, ‘Onaen Keriso sia tauen karaua wandia,’ ap anega wapi, nop muga ya anu tumasene.

27 Iwa yangwan warin kiman ganase waini mini, Kimani Vitana Apane wam

nega sia tauepi gapan waenapan yawane-gain.

²⁸ Maibe nega ma anun. Bonigawa etua wandepi arewa gapan, nenip tukau, etua napen menan ap mepe iamain.”

Kimani Viseni Apanewa sia taueta

²⁹ Iesu sia wadiamon, “Ita anan bagu sisi baware wamewa ame uon tapi gapan wam pumpuni ta, sisip taueta, amba siragam ganase sia ya wata. Buanae kimani aoma geareta, amba kiman aroewa da da erere goyago amooin.

³⁰ Ap gapan, Kimani Vitana Apanewa wam ame gapan tauapen tapena, paua nega kimani venaseta amba at at iragi piupawa irip turup wain iwa ne amun baware, oya oya ganasewa nega den irikup nokap tauapen yawaneg seke tain.

³¹ Pum upunepi gapan, anea nega watu enamopen, waenapan negawa piup etoa asiwa iragi wa upamoin.”

Wam verisiwa paua megawa

³² “Oma baip guegue mega yawane gapan anun. Gua ewake topi anuiwanin, bodu wamewa konintu taiwan.

³³ Ap umap sia, e wan dim dim mame tau aiwandapinawa, e anega anui, ne konintu tonana yonivin.

³⁴ Ne nop tavewa wadiaepen anun. Endi mame piupa yanane wanumamune naginewa, wam muga gapan wan dim dim mame venat tauet aep amba borit wain.

³⁵ Piup ge kiman iman ise wat museta, go ne nop negawa di wande aiwadata.” Iesu ap anega wan.

Iesu wam ansena sia tauepi nu oare

³⁶ Iesu sia wadiamon, “Ne God otua, sia tauapen wamewa orup da daiton asigip ya di tan, anea kimaniwa den oare amba ne den oare, go Mamana kimaniwa megenat asigip tan.

³⁷ Kimani Vitana Apanewa sia tauapen wamewa ame apan Noa wam mega gapan waenapan taiwanumune ap umap sia di tain.

³⁸ Menan, wataget Noa wam megawa gapan waenapan wanumon, taba kaum nana kakayat taiwanumun, amba waen ge apan naine musiwanumun. Mu ap anega

taiwanumune gapan, Noa kabum mega gwanewa unuk aen amba boge ningoe tauet umamon borit wane.

³⁹ Wam ame gapan ningoe oniwandini waenapan mu oare amba umamon mom yaten tau aen. Ap umap Kimani Vitana Apanewa sia tauapen wam ame e den oare.

⁴⁰ Sia tauapen, apan dere nao taiwanumampina, daiton warain da ae veain.

⁴¹ Amba sia, wam ame gapan, waen dere taba napen menan kanu etua wariwanumampina, daiton wat angain amba dawa ae yeain.

⁴² Ap menan nene yamam taiwanian, iwa e oare wam ansena Ayop ega taueta.

⁴³ Amba sia anu awan. Pa i apanewa wam ansena up apane tauapo anupo me nene yamam ta wandepo, amba up apane ame warup oisepo, ap gapan pa mega ya benak unuk aepo.

⁴⁴ Ap mini Kimani Vitana Apanewa wam ansena sia tauapen e oare, ap menan yama agun taiwanian.”

Ago noa warini noa ya warini dere

⁴⁵ Ayop Iesu maibe gapan gare anega wan, “Pa i apane nao mega taini asigip tan menan noa warini apanewa ware pa mega kwayup tapen dien. Amba nao mega taini apanewa ame ago nagire upine taba muga muga muniwandapen menan die amba at ugupe daio aen.

⁴⁶ I apane ae sia entan tauepi wamewa gapan, nao waneni apanewa nao mega taiwandapina yavepi nao taini apanewa ame aton arita anuta.

⁴⁷ Tave di waivin, me nao kakae tani menan, pa i apane puraput mega iragi kwayup tapen dieta.

⁴⁸ Go nao taini apanewa mek ingane koewa anega anupiwa, ‘Ne Ayop nega menawaet ya taueta.’

⁴⁹ Ap anuni menan, nao nagirewa upinewa gaura bim bim guramo ae semo amba nao ae ve taba kaum kaimake dena na, bumbawam ta aiwadata.

⁵⁰ Ap taiwandapina, pa i apanewa tauepi wamewa me oare menan me tauepi seke tata.

⁵¹ I apane tauet wanene baware tata amba wam uiwa gapan apan ame God ya

anu tumasene ge borit wane nagirewa at muga aeta. Ap mepe mu irip turup wa asi kitonagiwumanumain.”

25

Waenoro guturewa

¹ Iesu sia wadidiamon, “Wam ame gapan, toemu kimaniwa guegue mega manega, waenoro aonagaet da dun muga tambun naine mutat baripe da i apante tautanapen menan tau amon.

² Waenoro nani yamunaeta bumbawam nagirewa amba waenoro nani yamunaeta ame asigipewa.

³ Menan bumbawam nagirewa dun muga tambune go kaum muga senunawa da den ya utan tam amon.

⁴ Waenoro asigipe dun muga tambune amba kaum muga senunawa den tam amon.

⁵ Barip i apante taua taua wam nononga ase ma di tan, ap menan waenoro iragi aup enu keo tan di iniwanumune.

⁶ Mum gagewa gapan apan da nop kaimakaet ve anega wan, ‘Naita naita apante tauia! Tau aisen tanan!’

⁷ Boge waenoro iravi kanda mutan yonan amba dun muga ni tunu paitamon.

⁸ Waenoro bumbawam tainewa yonan waenoro asigipe singui ta anega wayawan, ‘Oruma kaum upi gem nunan, dun nuga yame gaup wapen taiwanumun.’

⁹ Asigipe waenoro gare anega wan, ‘Ae uon. Kaum enan amba nunan ame umap uon anuivin. Garewa aisen une taine arewa tauan ek da une di tan.’

¹⁰ Go wam ame mu une tapen menan amone, naine mutat i apante tauen. Waenoro upine tata kakayat tane menan apan muga tanan naine mutat baripewa menan pa gwanap unum amon amba tonan boren.

¹¹ Evi amba upinamu sia tauan anega wane, ‘Bawarewa! Bawarewa! Tonan nunan watap!’

¹² Go me gare wadiamon, ‘Wapena anun. Ne e oare,’ ap anega wan.

¹³ Ap menan nene yamam taiwanian, iwa ne wam ansenawa gapan tauapena e oare.” Iesu ap anega wan.

Ago nagirewa yampo garewa seane maibewa

¹⁴ Iesu sia wan, “Wam eviwa guegue da wadiain. Ayop da negin nononga aepen tani, nao mega taine nagire munan wa anu dao mume kwan puraput mega munen.

¹⁵ Nao tat muga muga gapan moni mega ap munen. Daiton moni nani yamunaet wanen. Dawa moni dere wanen. Dawa daiton wanen amba ap aen.

¹⁶ Moni nani yamunaet tambuni apanewa menawaet ware ae nao ta amba nani yamunaet aigap sia waren.

¹⁷ Moni derewa apanewa ap umap tani amba dere aigap sia waren.

¹⁸ Go moni daiton wareni apanewa wat ae piup urat ware amba moni mega karaua urata tu umen.

¹⁹ Ayop mugawa wam nonongataet wandeni ewap entan taue nao nagire mega moni waran dim da tane menan singui tayawamon.

²⁰ Apan moni nani yamunaet tambuni, nani yamunaet aigap den sia ware taue anega wadien, ‘Ayop negawa, ge moni nani yamunaet nenaana ne garewa aonagaet genian.’

²¹ Ayop mega gare wadien, ‘Ge umap di, nao nega kakae di taan nona wariana apanewa. Ne otu kamontu genana gapan nona wara ta agingian. Ap menan puraput nega baware kwayup tamopen bat gimagivin. Aton nega geniangina gapan wanigingan.’

²² Apan moni dere tambuni ine taue anega wan, ‘Ayop negawa, moni dere nenaana ne garewa degegede genian.’

²³ Ayop mega gare wadien, ‘Ge umap di, nao nega kakae di taan nona wariana apanewa. Ne otu kamontu genana gapan nona wara ta agingian. Ap menan puraput nega baware kwayup tamopen bat gimagivin. Aton nega geniangina gapan wanigingan.’

²⁴ Amba apan moni daiton wareni ine taue anega wan, ‘Ayop negawa, ne asigip tagen ge kaimake dena apanewa, ge taba ya veriana go naingi piup ya enuiana go bongamingi.

²⁵ Menan ne taga anun angena moni nega karaua urata tu uman. Yao, dim da gegawa mame.'

²⁶ Ayop mega gare dien, 'Ge koerage, nao ya taan endave wandave den taiana apanewa. Ge anuana ne nawan uon, taba ya veran naivin, amba piup ya enun bongamivin.

²⁷ Menan iwa dimen ge moni nega enine arewa gapan bondan mini ya baraan aigap da ya waraan? Ge ap tapo ne entan tauana gapan, moni enine arewa kwayup taine apanewa, ap mepe moni enaana menan, moni maup mega otu da aigap nenapo.'

²⁸ Ayop ap anega wani orup upine diamon, 'Apan ma moni mega daiton waseasen, ame moni aonagaeta neneni apanewa wanen.

²⁹ Wapena anun. Nop nega anune taine nagirewa God nop upi sia muneta. Go ya anune taine nagirewa nop otu da anunewa ame sia waseamota.

³⁰ Amba apan koewa endi waran garip sisipu aipa uat enan. Ap mepe mu irip turup wa asi kitonagiwanumain.' " Iesu maibe gapan ap anega wan.

God waenapan wanene ta yan semopi noa

³¹ Iesu sia wadiamon, "Wam uiwa gapan, ne, Kimani Vitana Apanewa, Mamana kakae guragut mega ganasewa warap amba ayop watarewa nega gagap ae wanigepena gapan ne anea nega den,

³² piup at at nagirewa iravi namunap todagon wanumoin. Man kwayup taini apanewa man gout ge man sip yan semopi mini ne waenapan yan semoin.

³³ Kakaewa taine nagirewa, man sip umap nanina nutup gapan seain amba koewa taine nagirewa, man gout umap senip gapan seain.

³⁴ Ame uon tapi, ne, waenapan ayop mugawa, nanina nutup gapan wanumopi nagirewa anega wadiamoin, 'Onaen! e iravi Mamana wat aipakam imaini nagirewa! Piup ta venasen oneni paua gapan toemu tata kakayat enan ta baraeni yon boran.

³⁵ Onaen, iwa ne enup aranegen menan e taba nenayan nan, ne megana pakaraeni

menan e kaum nenayan nan, ne at ugupewa apane da tauan e warupanege pa ega gwanap bat nimanegegan.

³⁶ Ne nin aroga waingena e gan gorogot pan nenayan, ne vek tana e amatana tayan. Amba ne gvat nokap wanigena gapan e nenan daio tauayan.'

³⁷ Ne ap anega wadiamopena nanina nutup wanumopi kakaewa taine nagirewa gare anega wain, 'Ayop nugawa, wam ansena enup arageni yawaget taba genaton o megaga pakaraeni kaum genaton?

³⁸ Amba wam ansena ge oarewa nu waupaget pa gwanap bat gimagetan? o gan gorogot yoa taingian amba nu gan gorogot pan genaton?

³⁹ Amba wam ansena vek waragen amataga taton o gvat noke waingean yawaget daio inagap onanton?'

⁴⁰ Ap anega wapi ne, waenapan ayop mugawa, gare anega wadiamoin, 'Ne tave di wadiaivin, dim da e, ne dugup nega nutu uoni nagirewa inamup ma daiton da munan tanewa, e ame ne inanap tayan.'

⁴¹ Amba ne waenapan nanina senip gapan wanumopi nagirewa anega wadiamoin, 'Ae venek aisen, e da God inayap ugu gangan ta yaibobot meravewa Seitan amba anea mega den tata kakayat tane gapan wanien.

⁴² Wataget ne enup aranegen go e taba ya nenayan, ne megana pakaraen go e kaum ya nenayan, ne at ugupewa apane da tauan go e ya warupanege pa ega gwanap bat nimanegegan.

⁴³ Ne nin aroga waingena go e gan gorogot ya pan nenayan, ne vek tan go e amatana ya tayan. Amba ne gvat nokap wanigena go e nenan daio ya tauayan.'

⁴⁴ Ap anega wapena mu gare wayawanegain, 'Ayop nugawa, wam ansena enup arageni o megaga pakaraeni o ge oarewa o gan gorogot yoa taingian o vek waraan o gvat noke waingean go nu ago ya genaton?'

⁴⁵ Ap anega wapi ne gare anega wadiamoin, 'A, wapena anun. Dugup nega nutu uoni apane da ap inap ya tayana, e ne inanap den ya tayan.' "

⁴⁶ Iesu sia anega wadiamon, “Menan koewa taine nagirewa itan yaibobot yawanumain go God menan kakae taine nagirewa inak yaibobot wanum amuiwanumain.”

26

Iesu topen menan nop karaua panan

¹ Iesu nop mega ame wadidiamon uon tani, me wa ewamot mega anega wadiamon,

² “E asigiap di, wam dere ewap Paina Yamaseni Baripewa taueta. Ame gapan waenapan Kimani Vitana Apanewa oma korosi gapan toguranegepen menan waranegain.”

³ Wam ame gapan pirisi bawarewa ge Diu namu yoyo nagirewa den, pirisi bawarewa ayop muga, apan Kayapas, pa mega gapan iamene.

⁴ Amba mu anenen ta amba Iesu karaua ware togurapen neginewa noa panan waiwanumun go waenapan tamu den anuiwanumun.

⁵ Menan anega wan, “Barip wamewa gapan Iesu ya warait iwa waenapan ita anan tapi tawa.”

Iesu paua da iap tan

⁶ Amba Iesu pa sewa Betani gapan, apan Saimon vek bo'o namu ware kakae tani apanewa pa mega gwanap wanden.

⁷ Wam ame waen da oma osewa kaum pokarik gwat pomponu gapan ta eneni, ame ware tauen. Ame tutua aigap iragen amba garewa mega baita da uon. Amba Iesu taba naiwandini gapan tauue iap damagen.

⁸ Iap wa damageni gapan Iesu wa ewamot mega ugu gangan tane menan noyam anega wane, “Iwa dimen kaum ame uniunion danamiwan?”

⁹ Oma ose tutu den mame une ta moni baware wara waenapan purapuse uoni kayakayawan taine nagirewa munapen.”

¹⁰ Mu anen wane Iesu imua gapan anuni menan gare anega wadiamon, “Waen ma ae veane anut mega gapan di taiwandan. Waen mame dim da inanap tani iwa den gapan di taiwan amba yaunewa mega kakae iragen.

¹¹ E iman kayakayawan taine nagire den nimakamup tanam waniai, go pot pot ne ya waranegiwaniai.

¹² Me oma ose tutu dena mame tasdi seneniwan, ame gapan ne iman bonigasepen tu negepi wamewa menan.

¹³ Ne tave di wadiaivin, ambagan da God No Oise Kakaewa ma piup iragi gapan wadidiamopi, waen mame dim da tani oisewa anupen menan wadidiam wanumain.” Iesu ap anega wan.

Apan Diudes Iesu omine wan umap tan Iesu warapen

¹⁴ Amba wadiamot mega aonagaet pusinawan dere da yaua Diudes Iskeriot. Me pirisi bawarewa inamup Iesu omine wapen menan aen.

¹⁵ Me anega wadiamon, “Ne Iesu na niap barae penawa e garewa animpo nenai?” Ap anega wani menan agim make muga apane daiton apan da aonagaet (30) wanane.

¹⁶ Ap mepe boge use aeni, Diudes wam arok da ware Iesu nanimup barae pen menan yowa taiwandin.

Iesu taba mega uiwa nan

¹⁷ Barip yaua Taba Buredi Ya Tutut Waine Baripewa tugupen wamewa taueni menan Iesu wadiamot megawa ine tauan anega wayawan, “At ansena gapan nu ane tata kakayat tat barip nugawa mame nat anuingi?”

¹⁸ Me gare wadiamon, “Pa sewa bawarewa, Ierusalem, aisenewa apan da yawane amba me anega dian, Wadianet apanewa anega wan, ‘Ne om enu nenane wamewa konintu taiwan. Menan ne wa ewamot nega den Paina Yamaseni Baripewa pa gega gapan tugut anuivin.’”

¹⁹ Iesu wadiamoni gapan mu barip ame napen menan tata kakayat tane.

²⁰ Wam ame mum gine taueni, Iesu wa ewamot mega aonagaet pusinawan dere tanamo taba napen menan ae wanumon.

²¹ Naiwanumune me anega wan, “Ne tavewa di wadiaivin, e daiton da ominana wapen taiwanin.”

²² Ap anune gapan mu bagu sisi baware di anun amba nop me inap daiton daiton singui wan, “Ayop, nenan waingi go?”

²³ Wane Iesu gare wadiamon, “Apan daiton da ameme wam mame ne den buredi ware sip kundaun gapan kaum pisit gwanaap antap enepiwa ameme di.

²⁴ God negin mega, ame ok gapan seane, Kimani Vitana Apanewa gase wat neneni ap omewa gapan bonigatain, go kaiwan, ominana wani apanewa itan baware yaveta. Apan ame ya yanapo ame kakae iwa ominana ya wapo.”

²⁵ Iesu ap anega wadiamoni gapan, omine wani apane Diudes Iesu wayaven, “Ayop negawa, nenan waingi go?” Iesu gare wan, “E, ge me di.”

Iesu taba mega uiwa

²⁶ Taba naiwanumune gapan, Iesu taba buredi semua ware God inap gaun wa, wa paise wa ewamot mega mune, amba anega wan, “Tambun nan. Mame etunawa.”

²⁷ Sip ware, God inap gaun wani mune anega wan, “E iragi mame gapan at nugutan.

²⁸ Kaum wain mame deninawa. God e waenapan mega, ne denina gapan agi ewakewa wa agiat imaeta. Bonigasepena denip mame tau visipi gapan waenapan aruga koewa muga wat museta.

²⁹ Wapena anun. Kaum wain mame ne sia ya nain go Mamana God toemu mega taupei e den tanae sia nain.”

³⁰ Wam ame God inap mu wak da wane amba mu tunup Olip dot amon.

Iesu Pita waboborepi oisewa namu wan

³¹ Boge Iesu anega wadiamon, “Endi mum mame gapan e iragi tap ae venek aitai, iwa watageta apanewa da God nop mega ok anega sen, God anega wan, Ne man sip kwayup taini apanewa topena, man mega punanan wat amooin, ok ap anega sen.

³² Go ne bonigasep amba inak nigat yon waingepena ne at Galili gapan namu tauain e evi amba tauai.”

³³ Wani Pita Iesu wadien, “Mu iragi tap ae vege amooin, go genan ne tap ya angain.”

³⁴ Pita wani go Iesu gare wadien, “Pita, ne wapena anu. Endi wam koni yampoa gapan ge waboboranegai amba kumkum nop wata.”

³⁵ Pita anega wan, “Ae, ge bop tawa ne den bop di tain, ne ya waboboragain.” Amba wa ewamot upinewa ap anega nomangaet wane.

Iesu at Getsemani gapan bagu sisi anun

³⁶ Amba Iesu wa ewamot mega den at yaua at Getsemani amon, amba me anega diamon, “Ne asirantu angep God inap mup wapena e mapa ae wanien.”

³⁷ Me Pita ge apan Sebedi otu wai dere tanam asirantu amon, amba me bagu sisi anu tanen amba bumage tuk wan.

³⁸ Boge Pita evene dere den inamup anega wadiamon, “Ne bagu sisi aritavet anu tanan ap gapan bumagana tuk wan, nene yangwan doranek wan. Mapa waniene ne den tananegen amba nene yamam taiwanian.”

³⁹ Ap anega wani amba asirantu aen, amba me gine namu pia ae to kutnage mup anega wan, “Maman, ge men anu gurawa, ugu vegaek anupena ao waseanek, go mame ne anut negawa uon go gek anuiana gapan di ta.”

⁴⁰ Boge me entane ae wa ewamot mega ine taue aup iniwanumune yawamon. Menan Pita inap anega wan, “E da wam airase daiton ne den tananege nene yamam ya tayan.”

⁴¹ Nene yamam tan, God inap mup wan, iwa pusi warup da inayap taupei tawa. Iwa guanu epa para tat anuiwan go etunu itani waiwan.”

⁴² Evi sia aeni God inap mup anega wan, “Maman, itan bagu sisi sipewa ma ne nat wa nenaana ya wat age ae vea ne nap, ap gapan gek anuiana ame venaseta.”

⁴³ Wam ame, me sia entan taueni, mu aup iniwanumune yawamoni mu yamamu itani wan.

⁴⁴ Menan ae vemo ae mup koni yampoa uap sia tan.

⁴⁵ Boge entane wa ewamot mega inamup taue anega wadiamon, “E aup inin kakayat taiwanin go? Yawan, wam nega onen di mananiwan, amba Kimani Vitana Apanewa waranege koewa taine nagineva nanimup bat nimanegain.”

⁴⁶ Ao yonane anepen! Yawan, ominana wani apane mame tauen!”

Ita nagirewa Iesu to waran amon

⁴⁷ Iesu nop ame waiwandini gapan, apan Diudes wa ewamot mega aonagaet pusingawan dere apane da tauen. Pirisi bawarewa ge waenapan dimae waine nagirewa den, waenapan aruga watu enam-one kereba kepata tambun tauane.

⁴⁸ Diudes, omin wani apanewa paua ta ewamopen menan namu waenapan anega wadiamon, “Apan ame gaune tap ua topenawa, ap me di.”

⁴⁹ Tauane boge Diudes Iesu ine tauue anega wan, “Wadidianet nugawa, baigan ge inagap wandep.” Anega wani boge ua ton.

⁵⁰ Iesu Diudes anega dien, “Enda, ge dim da menan anu tauana menaevet di ta.” Boge mu Iesu ambot warane.

⁵¹ Ame gapan, Iesu evenewa daiton da kereba mega ware, amba pirisi bawarewa ayop mugawa nao mega apanewa da darinewa to kuasen.

⁵² Go Iesu anega dien, “Kereba gega arewa gapan sia barao! Iwa waenapan da da kereba tambuinewa, mu kereba waniwa gapan borit wainewa.

⁵³ E oare go ne Mamana vene wapena, me menawaet anea arugataet watu enamatota, amba nenan anan tain.

⁵⁴ Go ap tapo God nop mega oitana wataget seane tavewa ya tauapo. Go mu waranegene gapan nop ame tavewa mame venasen.”

⁵⁵ Iesu apan aruga tauane singui wayawamon, “Endi, ne up apanewa mini waranegepen menan kereba ge kepata tam tauayan? Ne wam, wam God Paewa gapan wanigingina ya waranegean go endi waranegepen menan tauayan.

⁵⁶ Go ma iragi taiwaniana iwa wataget God no oise waiwanumune nagirewa ne oitana ok seane tavewa tauapen men taiwanin.” Boge wa ewamot mega iragi ae vean tap amon.

Iesu kansoro nagirewa namup yonen

⁵⁷ Amba Iesu kaimakaet waran nau amon pirisi ayop mugawa apan Kayapas pa mega amon. Pa mega gapan waenapan iup wadiamuine ge dimae waine nagirewa den iam iam tan wanumon.

⁵⁸ Go Pita wandap isipa evi oniwandin amba Pirisi ayop mugawa pa mega nimakap arok da gapan tauen. Gwanap unuk aeni, mu Iesu inap anenen tapi yao anupen menan, ita gopare taine nagirewa tanamo ae wanden.

⁵⁹ Pa gwanap, pirisi bawarewa ge kansoro nagirewa uruga Iesu inap nop eboewa yoa tan nau amo togurep boopen menan taiwanumun.

⁶⁰ Waenapan aruga tauane amba ebo aapan gapan Iesu koewa mega yop tane, go mu me koewa mega da ya tanane. Uiwa gapan apan dere tauan anega wan,

⁶¹ “Apan ma namu da anega wani, ‘Ne God Paewa wabenagep amba wam yampo gwanap sia tu waborain.’”

⁶² Boge pirisi bawarewa da ao yone amba Iesu anega wayaven, “Ge nop muga waine garewa wai go uon? Mu oitaga waine ge anenen anuingi?”

⁶³ Go Iesu no uon wanden. Pirisi bawarewa mugawa me inap anega wan, “God yaibobot wandini apanewa amun mega gapan diagivin. Wadian, ge God mega wa watu enageni Mesaya go uon? Ge God Otua go uon?”

⁶⁴ Wani Iesu gare wan, “E, ge ap me di waiagi! Go ne wapena anun. Wam evi amba da, Kimani Vitana Apanewa God Aro Iragenawa mainewa nutup gapan ae waingepena amba irikup gagap sia tauapena yawanegai.”

⁶⁵ Boge pirisi bawarewa wanup mega wabebenage anega wan, “Me God inap wawa koko taiwan! Iwa dim men koewa mega upine yoa tait? Me God inap wawa koko taini e gase anuyan.

⁶⁶ Menan e dim da anuiwanin?” Mu gare anega wan, “Me koewa mega garewa menan di boep.”

⁶⁷ Boge mu gine namu gitona en anan toianumun. Upi gine namu pan boran tuiwanumune nipec anega wan,

⁶⁸ “Ge God Keriso mega waingewa iagap wa anut da togen.”

Pita Iesu waboboren

⁶⁹ Ap mepe, Pita pa nimankewa arok da gapan ae wanden amba nao taine wae-newa da tauue anega dien, “Ge Iesu at Galili

apanewa den tautana ingiana apanewa da.”

⁷⁰ Go me iragi namumup wabobore anega wan, “Ge dim da waingiana ne oare.”

⁷¹ Boge me tonan noa tau aiwandiniwa, ap mepe waen da sia yave waenapan anega diamon, “Apan ma Iesu at Nasaret apane den iwandiniwa.”

⁷² Pita sia wabobore anega wan, “God yawanegiwan, apan ame waiana ne oare!”

⁷³ Wam koni otu da ewap, waenapan upi amena yaoyao yoniwanumunewa, Pita ine use amon amba anega wan, “Tave di, ge apan ame da iwa e nop waiana megaya daiton di!”

⁷⁴ Boge Pita kaimakaet anega wan, “Ne ebo wapena God ugu gangan mega yawain. Apan ame men waiana ne oare!” Boge gine tutup kumkum nop wan.

⁷⁵ Iesu Pita nop namu anenen Iesu dieni boge anu aven, ame, “Wam yampo waboboranegai amba kumkum nop wata.” Ame gapan Pita tau pa garip ae irip koevet wan.

27

Iesu ayop Pailat namup yonen

¹ Mumaget ese goe den, pirisi bawarewa amba waenapan dimae waine nagire den Iesu anen ta amba togurep boepen menan nopewa panan wawa mutan.

² Mu waran pan nao amon, Rom nagineva ayop muga om enuni apanewa Pailat wanen. Pailat ame at Diudia kwayup taini apanewa.

Apan Diudes mek ingane kwip enen

³ Wam ame Diudes, Iesu omine wani apanewa, Iesu togurapen oisewa anuni menan bagu sisi anun imua entanen amba moni gwat make apane daiton apan da aonagaet (30) pirisi bawarewa amba dima waine nagirewa ewagai munat anu aen.

⁴ Taueni anega wadiamon, “Ne koerage tan iwa ne denip kakaewa omine wan.” Mu gare anega wane, “Ame anenen, ame gegawa di.”

⁵ Menan Diudes gwat make God Paewa gwanap aipa uatame tau aen. Boge me tau ae mek ingane kwip enen.

⁶ Pirisi bawarewa gwat make ame bongamene amba anega wan, “Ma God Paewa menan yan ya tait, iwa apan boeni moniewa menan iup nuga watananiwan.”

⁷ Gwat make ame nopewa panan wane ewap mu ian ugape nagirewa ap mepe borit wapi kaima muga tumopen arewa une tapen menan seane. At ame yaua Unup Taine arewa une tan.

⁸ Ap menan at ame yaua ‘Apan Deniwa Piupewa’ diane, onin eni endi mame tauen.

⁹ Ap gapan watageta apane Dierimaya God no oise ok se wani tavewa tauen. Ok anega sen,
Mu moni gwat make apane daiton apan da aonagaet,
at Isurero gapan, apan daiton garewa mega seane.

¹⁰ Moni ame gapan unup warini apanewa piup mega une tan.
God dianegeni at umap di tan.
Apan Dierimaya ok ap anega sen.

Iesu ayop Pailat namup yonen

¹¹ Iesu piup ayopewa Pailat namup yoneni ayop singui anega wayaven, “Ge Diu nagirewa Ayop mugawa go?” Iesu gare wan, “E, ge ap me di waiagi.”

¹² Amba pirisi bawarewa amba waenapan dimae waine nagire den enu yawan wane go no uon wanden.

¹³ Menan Pailat sia singui wayaven, “Mu nop aruga gapan enu yawagene waine anuingi go uon?”

¹⁴ Go Iesu sia no uon wanden, nop muga kaimakaet wane go garewa da ya wan. Ap menan piup ayopewa imua upese anun.

Waenapan Iesu boet wan

¹⁵ Piup ayopewa gutut muga en en taine ame Paina Yamaseni Baripewa gagap, gwat noke apane waenapan om enu wapi gapan wat vesine tauen ainiwa.

¹⁶ Wam ame gapan, dayakam taini apane da, yaua Barabas, gwat nokap baraene wande en.

¹⁷ Ap menan wam ame waenapan to iamene gapan, Pailat singui wayawamon,

“Apan ansena da ne enan wat vetat anuiwanin? Apan Barabas wat vetat anuiwanin o Iesu, yaua da Keriso, wat vetat anuiwanin?”

¹⁸ Pailat singui ame wayawamoni iwa imup anuni Diu nagire ayop mugawa Iesu anu koeamene menan wat onamon wanane.

¹⁹ Wam ame Pailat wanene watarewa gapan wande nau taiwandini me wae-newa nop da menan watu ene anega wan, “Ge apan kakaewa ame inap dim da da yata, iwa me menan ne mumu enok gapan aritavet wat yapan.”

²⁰ Go pirisi bawarewa amba dima waine nagire waenapan datnak mumane Barabas wat vesep tau aep amba Iesu togurep boopen menan wane.

²¹ Piup ayopewa Pailat singui sia wayawamon, “Apan dere ma ansena da ne enan wat vetapen tau oneta?” Waenapan gare wan, “Barabas tau onep.”

²² Pailat sia anega wan, “Iesu, yaua da Keriso, inap dim da tain?” Mu iragi anega wan, “Oma korosi gapan to endawanane boep.”

²³ Pailat gare wan, “Iwa dimen boeta? Me koewa dim da tan?” Go waenapan nop kaimakaet aigap sia waiwanumun, “Korosi gapan boep!”

²⁴ Pailat imua anun, ‘Mu nop nega ya anuiwanum ita anan tapen taiwanum.’ Menan yamamup paua kaum gapan nani bigi ware anega wadiamon, “Apan ame boepi koewa da inanap ya taueta ek di.”

²⁵ Diu nagirewa iravi gare wan, “Me boepi intanewa nu iravi aiganup amba otun wainu aigamup tau ge tau aiwanda.”

²⁶ Boge Barabas wat vesen tau aen. Amba ita nagirewa diamone mu Iesu waran gaut gapan tone amba oma korosi gapan togurapen men wat amon.

Ita nagirewa Iesu inap nipec wan

²⁷ Amba piup ayopewa ita mega nagirewa Iesu waran apan bawarewa pa mega gwanap amon. Ita nagirewa iravi ap mepe wanumone munan wan Iesu namup tauan.

²⁸ Wanup mega waseasen ayop wanupe buinip pan wanana.

²⁹ Amba wanup dendeniwa pan wanane amba ipuni wagam waran Iesu iap tonat wanane amba gerok da wanane naniwa nutup gapan waren. Ayop paua ame inap tane namup omanimup enun nipec anega wan, “Kaewa kaewa, Diu nagire ayop mugawa!”

³⁰ Mu gitona en anan amba gerok waran iap toewanumune.

³¹ Mu nipec diane ewap, wanup dendeniwa pan wanane, ame wabutunagen amba wanup mega sia pan wanana. Boge mu oma korosi gapan togurapen menan wat nau amon.

Iesu oma korosi gapan tobatham endawan

³² Mu tau amuiwanumune at Sairini apane da yaua Saimon mu nanamasen wane gapan Iesu korosi mega waren.

³³ Amone at yaua Apan I Kaime Arewa (Iburu nop muga gapan Golugata diane) tauan.

³⁴ Ap mepe mu Iesu wapiwa vege ya anupen menan kaum wain oma baewa sisi dena gottenak en wanane yamot anu ae ven.

³⁵ Ita nagirewa Iesu oma korosi gapan to endawanewa amba mu wanup mega yan seapen menan kae otu da tane.

³⁶ Ap ewap mu ae wanumon amba Iesu kem kem yawiwanumune.

³⁷ Mu enu yawan wane ogewa me iap paina oma ginap tobatham endawan anega seane, ‘Ma Iesu Diu nagirewa Ayop mugawa.’

³⁸ Wam ame gapan up apane dere den oma korosi gapan gut batamene, da Iesu mainewa nutup gapan, amba da senip gapan gut dawamon.

³⁹ Waenapan tau ise amo tau use amo taiwanumune nagirewa no peromen Iesu inap nipec anega waiwanumune,

⁴⁰ “Ge God Paewa tobenage amba wam yampo gwanap sia tut waana apanewa, gek ingane inagit. Ge God Otua waingewa, oma ae ve vit onak.”

⁴¹ Ame umap sia pirisi bawarewa amba waenapan iup wadidiamuine ge dimae waine nagirewa den nipec anega wane,

⁴² “Me upi inak munen, go mek ingane inak ya wareta! Me Isurero Ayop nugawa

go? Oma ae ve visepi gapan nu me inap anu tumatait.

⁴³ Me God tumap wandiwan menan God anupi endi mame di wat inakamep. Iwa me anega wani, ‘Ne God Otua.’ ”

⁴⁴ Ap uap sia, up apane den gut batam mumane ap anega nipec den me inap wane.

Iesu boen

⁴⁵ Wam ianupe wariwandini gapan, piup ame iravi mum tatarin tunu taue aeni amba wam airase yampoa waren.

⁴⁶ Wam airase yampoa wareni gapan Iesu nop uma ve anega wan, “Eli, eli, lama sabak tani.” Ap anega wani guegue, “God negawa, God negawa, ge dimen ae venek agi?”

⁴⁷ Wam ame gapan, waenapan upi ap mepe yoniwanumune nagirewa nop ame ‘Eli, eli’ wan anune menan mu anega wan, “Me apan Elaidia vene waiwan.”

⁴⁸ Amba apan muga da serarat ae kaum warupini wanupewa waren. Kaum sisi dena yaua viniga gapan ae antapene gerok ginap enu, Iesu megewa pakaraeni men napen wanen.

⁴⁹ Go evene wai anega wan, “Ae ve ya wana. Watageta apane Elaidia taue wat inakameta go uon amase tait.”

⁵⁰ Iesu ve baware sia wani boge guewa puk wa tau aen.

⁵¹ Ap wamewa gapan God Paewa gwanaap wanup God wandini arewa tonan pan boriniwa aoma bebep wa vise ase ma wanden dere entanen. Piup menao manao tan amba gwat bonawan tuk tak wan.

⁵² Ame gapan den, kaima arewa urat no ikap wan amba waenapan etumu gapan wataget potamu woup seni borit wane nagirewa inak mutan sia yon wanumon.

⁵³ Mu urata tau onamon, amba Iesu boe inakae yon wardeni ewap mu Ierusalem unumon amba pa nagirewa aruga yawamon.

⁵⁴ Wam ame ita yamewa apane gauarape mega den Iesu kwayupe taiwanumune yamamup yawane, piup menao manao tan amba ame ugup ugup ta tau aen. Mu tap baware anun amba anega wane, “Tavewa di, me God Otua.”

⁵⁵ Wam ame gapan waen aruga painantuk yonan yaviwanumun. Mu Iesu at Galili gapan oneni kwayupe tapen menan ewap onamon.

⁵⁶ Mu yaumakamup waen Meri Makdalini amba apan Diemis ge Diosep inamua, Meri, amba apan Sebedi otu wai Diemis ge Dion inamua den.

Iesu etua dagupa baraen

⁵⁷ Mum gine, Iesu wadiamot mega, puraput apane da yaua Diosep pa sewa Ari-matia apanewa tauen.

⁵⁸ Ae, Ayop Pailat ine taue me Iesu etua menan singui wayaven amba Pailat wanapen menan umap wan.

⁵⁹ Diosep Iesu etua ware wanup kakaewa nononga da gapan viri viri ware panen.

⁶⁰ Paneni uon tani amba wat amon dagup ewakewa, mek megawa, gwat bonawan gapan kaiseniwa, ame gapan baraen. Gwat pepeta baware da wabaiman onamon tonan toboran amon.

⁶¹ Waen Meri Makdalini amba Meri dawa dagup yamunewa gapan amena wanumon yaviwanumun.

Ita nagirewa dagup tonanewa kwayup tan

⁶² Inane woup sen, ame Diu wagat wamewa gapan, pirisi bawarewa amba Parisi nagire den, ayop Pailat ine tauan anega wan.

⁶³ “Ayop nugawa, wataget nop tave uoni waiwandini apanewa kabani wardeni me anega wan, ‘Bonigasepena wam yampo ewap inak nigat sia yon waingain.’

⁶⁴ Me ap wani menan, ita nagirewa watu enamo wan amo dagup tonane kwayupe tap aepi wam yampo uon tapi amba onamot diamon. Ap ya tawa, Iesu wa ewamot mega taue etua up ta amoin. Ame gapan waenapan aopan anega wadiamoin, ‘Iesu boen go inakae sia yon warden.’ Ap gapan Iesu ebo aopan namu ta waiwandini ame otu kamontu go eviwa ebo aopan ame kai ware baware tata.”

⁶⁵ Boge Pailat gare anega wadiamon, “Umap ita nagirewa upi tam aisen, ek asik ega gapan dagup kwayup tan.”

⁶⁶ Anega diamon amon, dagup tonanewa agim tainamua inamat batamen

iwa Iesu etua up tapi ame inamat tak wapi irewa gapan yawapen menan tane. Amba ita nagirewa tonan kwayupewa ap mepe semone.

28

Iesu inakae sia yon wanden

¹ Diu pura muga bawarewa wamewa uon tani ewap, woup seni mumaget iragen Meri Makdalin ge Meri dawa den dagup yawapen amon.

² Ap mepe piup menao manao baware tan iwa Ayop anea mega kimani vise tau amba dagup unum amuine tonanewa gwat wabaim ae barae amba gagap ae wande en.

³ Yawat mega yangwan mini amba wanup mega pomponugaet.

⁴ Ita nagirewa tonan kwayup taiwanumune yawane tawa tan bop umap geomone.

⁵ Anea waen anega wadiamon, “Tap ya tane. Ne asik tan e Iesu yawapen tauayan, me oma korosi gapan to endawanewa.

⁶ Me mapa ya wandia. Me wani omewa tauen menan me gaset inakae yon wanden. Onaen me baraene arewa yawan.

⁷ Menan menawaet di aisen amba wa ewamot mega wadiamon. Iesu bop gapan sia yon wanden at Galili gapan namtaueta e evi amba tauan ap mepe yawai. Anun, ne di wadiaivin.”

⁸ Ap menan waen ikananam tan dagupa tauan tanini den go potamu aton bararaen, amba serarat wa ewamot mega wadiamopen amon.

⁹ Ap amone gapan mu Iesu tautanane amba me anega wan, “Baigan inayap wande.” Waen ine tauan me airanip warane amba wa taragasese.

¹⁰ Boge Iesu anega wadiamon, “Tap ya tane. Aisen dugup nega nagirewa wadiamone, mu at Galili amop, ap mepe yawanegain.” Iesu ap anega wan.

Tonan kwayup tane nagirewa oit muga wan

¹¹ Waen negin amuiwanumune gapan, ita nagire tonan kwayup taiwanumune, upi pa Ierusalem amon amba pirisi bawarewa anenen venaseni oisewa wadidiamon.

¹² Wam ame pirisi bawarewa ge dimae waine nagirewa iam iam tan amba wawa mutan amba mu ita nagire ame ebo wapen menan gwat make aritavet munan.

¹³ Amba ita nagirewa anega diamon, “E nop manega wan, ‘Mum oap, nu aup inintoni gapan, Iesu wa ewamot mega tauan etua up ta amon.’ Ap anega wadiamon.

¹⁴ Go nop oit mame ae piup ayopewa ine tauepi gapan e dim da tayana me anu ae veta amba itan ya enapen menan nu watanait.”

¹⁵ Ap menan ita nagirewa moni muga tambun amba amon, nop anenen diamone di tan. Amba gutut eboewa ameme Diu nagirewa iragi anun wa sesenamene onin eni, endi mame di tauen.

Iesu wadiamot mega inamup venasen

¹⁶ Amba Iesu wa ewamot megawa aonagaet pusinawan daiton at Galili amon tunup da ame Iesu amot diamoni tauan.

¹⁷ Ap mepe yawane gapan mu wa taragasesen, go upi gego anun.

¹⁸ Boge Iesu inamup tauue anega wan, “Maman piup kiman amunewa iravi ne nen.

¹⁹ Ap menan piup at at iragi tau aisen, ne wadidiaingina ap umap wa aisen amba waenapan ne wadiamot nega entan mu man. Maman amba ne Otua ge Guewa Woup Seniwa den amun nuga gapan dup iamuiwanian.

²⁰ Ne wadiaena mini e wadiamone amba nop nega iravi ayamase tap. Tave di ne pot poraet e den wanigepen aiwandan, evi wam verisiwa taueta.”

MAK Mak Iesu Keriso oisewa sen

Dion Iesu tauepi oisewa waiwandin

¹ God Otua Iesu Keriso No Oise Kakaewa erewa mame.

² Watageta God no oise waiwandini apanewa Aisaya oit mega ok manega sen, God anega wan, Wapena anun, ne oit nega wapi apanewa, namu watu enapen negin genan wareta.

³ Apan da pua, at kaimewa gapan, opata ve anega waiwandin, ‘Ayop nuga negin mega wa tarasen, wat tamanamene amba tauep.’

⁴ Aisaya anenen wani tavewa venasen, ame apan Dion waenapan dup iamopen menan pua tau opata anega waiwandin, “E inak koewa taiana ae vean, imuya entanen ne dup iaepena amba God koewa ega anu ae veta.”

⁵ Waenapan aruga, at Diudia gapan amba pa Ierusalem nagire den Dion yao anupen men tauwanumun. Koewa muga vetaet taiwanumun amba Dion kaum Diodan gapan dup iamuiwandin.

⁶ Dion wanup mega man kameru etua gume den eniwandin, amba berip mega, man etua paniwandin. Me taba mega naiwandini ame paki ge onaro.

⁷ Me opata gapan anega waiwandin, “Apan da evinap oniwandini me aiganap aroe amunu den taueta, amba ago otua ayop mega pusi okomewa vesini mini, ne ap wat agoaset anun, go ne kakae uon.

⁸ Ne kaum iragen gapan dup iaivin go me God Guewa Woup Seniwa gapan dup iaiwandata.”

Dion Iesu dup ien

⁹ Wam ame, Dion opata waiwandini ewap, Iesu at Galili pa Nasaret ae ve ae Dion ine tauen boge kaum Diodan gapan Dion yone Iesu dup ien.

¹⁰ Ame gine tutup, Iesu kaum ae ve kwatata ao dotoueni, amba kiman ase watapen, boge God Guewa Woup Seniwa nenip bairantan mini kimani visiwandin Iesu wapip doren.

¹¹ Doriwandini amba nop da kimani anega tauen, “Ge ne otun iragenawa, imuna genan anu gurivin. Ge gamugap ne imuna ae meare tau aen.”

Seitan pusi warup Iesu inap taiwandin

¹² Wani ewap, God Guewa Woup Seni Iesu nau at kaimewa aen.

¹³ Wam apane dere (40) pua wande eni gapan Seitan Iesu pusiwa warupe yaven. Anea tauan wat agoasene amba ap mepe man puawa den wanumune.

Iesu wadiamot mega erewa wa upamon

¹⁴ At Galili bawarewa nagirewa Dion waran gwat noke baraene ewap Iesu at Galili tauen God Nop Oit Mega Kakaewa opata gapan wadidiam wandin.

¹⁵ Me anega wani, “God om enuni wamewa tauen, toemu mega amunewa tauapen taiwan. Koewa ega ae vean imuya entanen God Oit Mega Kakaewa anu tumasen.”

¹⁶ Iesu kaum awan Galili etop ap aiwandin, amba me Saimon, gwaniwa Anduru dere yawamon. Mu ia muga kaum antap eniwanumun, mu meo dawane taine nagirewa.

¹⁷ Iesu anega wadiamon, “Ewanap on-aen, ne ta ewaepen e waenapan dawane tan.”

¹⁸ Boge ap gine tutup, mu ia muga ae vean amba me ewap amon.

¹⁹ Use sia aeni, apan Sebedi otu wai Diemis gwaniwa Dion dere yawamon. Mu kabum muga gwanap, ia muga nadi waran tata kakayat taiwanumun.

²⁰ Boge Iesu venamu wan. Menan mamewa ago mega den kabum gagap ae vemon dere Iesu ewap amon.

Airampu apan potap wändeniwa

²¹ Iesu wadiamot mega den pa Kaponiam ame vit amon. Ian Diu pura muga bawarewa wamewa gapan Diu nagire opata waine paewa gwanap wadidiam wandin.

²² Me opata waiwandini gapan waenapan iragi no i kap wan, iwa me nop aroe amunu den waiwandin go iup wadidiamuine nagirewa nop muga amunu uon.

²³ Airampu potap wardeni apanewa da taue ap mepe warden amba Iesu opata waiwandini gapan

²⁴ airampu senao uma anega wan, "Akae, ge Iesu pa Nasaret apanewa dim da inanup tat wa tauaan? Ge wa koeam ni manepen men tauan go? Ge orup ansena da ne asiginap di, ge God mega potaga Woup Seni apanewa."

²⁵ Iesu airampu ame anega dien, "Nop ae ve apan ae ve tau ak!"

²⁶ Airampu apan ware enu menawase senao wa tau aen.

²⁷ Waenapan ap yawanewa, iragi seke tan no i kap wan anega wawa mutane, "Ma anenen da taiwan? Nop ewakewa da? Nop mega aroe amunu den airampu up oimuiwandin tau amuiwanum."

²⁸ Iesu inak ame tani oit mega at Galili iragi senare tau aen.

Iesu waenapan aruga wat inakam mu miwandin

²⁹ Iup anuine paewa ae veane amba Diemis ge Dion tanam apan Saimon ge Anduru pa muga amon.

³⁰ Pa tauane Saimon tapunewa vek ato itanigaet ta eragi gagap iniwandini ame oisewa Iesu wadiane.

³¹ Menan Iesu me inap ae nanip ware ao endaveni gapan vek amun ame torot wan. Boge Pita tapunewa ao yone taba munen.

³² Amba mum gine taiwandiniwa, vek nagirewa amba airampu waramoni nagirewa aruga tambumon me inap tauane.

³³ Ap menan pa nagirewa iragi tauan tonan barat mutan.

³⁴ Vek ugup ugup iravi wat inakam munen. Upi airampu potamup wanumone up oimon tau amon. Airampu Iesu ire yawan wapen tane go Iesu nop ae veapen menan yam ta yawamo wan.

Iesu at Galili gapan opata waiwandin

³⁵ Mum igoe den, Iesu pa ae ve, God inap mup wapen menan waenapan uoni arewa aen. Ap mepe mup waiwandin.

³⁶ Go Saimon evene wai den me yoa taiwanumune.

³⁷ Amba Iesu yawane gapan, mu anega wane, "Waenapan iragi yoga taiwanum."

³⁸ Go Iesu gare wan, "Ne God toemu mega Oise Kakaewa at at iragi opata gapan

wadidiamopen menan ongen. Ap tapen menan nu pa sewa da da den anet."

³⁹ Ap menan mu at Galili pa sewa tau ge tau amuiwanumune. Iesu Diu nagirewa iup anuine paewa gwanap opata waiwandin, den airampu up eomuiwandin.

Iesu vek bo'o apanewa wat inakamen

⁴⁰ Vek bo'o apanewa da Iesu ine taue namup omanip enu mup anega wan, "Ayop, gek anua gapan, tanege ne kakae tap."

⁴¹ Iesu apan ame inap bagu sisi anuni menan naniwa endimase wapiwa inase anega wan, "Ne men anuivin, kakae ta!"

⁴² Gine tutup vek bo'o gamupewa siran taran amone me inakaen.

⁴³⁻⁴⁴ Wat inakameni menan nop kaimakaet anega wadien, "Endi inak mame inagap tana oisewa waenapan da ya wadiamo, noga botakamian. Amba tamana age pirisi ine taua vek gega uon tani yavep. Yavepi watageta apane Mosis vek mame inak warine gaunewa garaet God inap wanapen wani ame diagepi, ge di wan. Garaet ame wanawa, ap gapan waenapan yawage anuin, ame vek gega uon tan." Amba Iesu apan ame wa oisen aen.

⁴⁵ Go apan ame inak wareni oisewa at at iragi wadidiamon. Nop ame senareni menan Iesu pa sewa baware ame da aroga ase ya tauiwandin go at gine bigareni gapan ap mepe iwandin. Go ap mepe, waenapan at at iravi Iesu inap tauiwandum.

2

God koewa anu ae vepon aroewa Iesu wanen

¹ Wam animpo da uon tani ewap, Iesu pa Kaponiam sia entane aen. Amba me pa taueni oisewa waenapan anun.

² Menan waenapan arugataet tauan to iamene at bararaen arok da ya warden. Amba me God no oise wadidiam wandin.

³ Apan degede pusi nani itani wani apanewa da eragia baraaen waran tauan.

⁴ Go pa gwanewa waenapan amborane menan mu gwanap amo amo umap uon, menan apan waran pa aigarip dot amon, unenek napewa gapan to awan eragi

mega gagap antapenane visen. Waenapan aru ame iam wanumone nimakamup vise, Iesu namup tamana ae warden.

⁵ Amba Iesu mu anu tumat baware tane yawamo anuni menan Iesu vek apanewa inap anega wan, “Otunawa, ne koewa gega anun ae viangin.”

⁶ Iesu ap wani gapan, iup wadidiamuine nagire ap mepe den wanumone. Mu Iesu koewa anu ae veni noa anune menan muk imumup singui anega anun,

⁷ ‘Apan ma ambe da tauen, nop God mini wat wan taiwan? Me God inap wawa koko taiwan! God megenat waenapan koewa muga anun ae viniwa, apan iragen da koewa anu ae ya veta.’

⁸ Singui muga, Iesu imua gapan anuni menan gare wayawamon, “Iwa dimen imuya potaya gapan ap anega anuiwanin?

⁹ Ne nop daitonawa wana ame vek apanewa koewa mega anun ae viangin, o nop derewa ame manega wapena, ‘Ao yone, eragi mega ware aep,’ nop kaimake dena ansenawa?

¹⁰ Go e asigip taepen menan, Kimani Vitana Apanewa piupa waenapan koewa muga anu ae vepe menan aro amun warana ame endi to ewayain.” Menan Iesu vek apanewa sia anega dien,

¹¹ “Ne endi diagiangin, ao yon eragi gega wat, pa ak!”

¹² Ap wani boge no utap, waenapan namumup, ao yon wande eragi mega ware, pa mega aen. Menan mu nomu i kap wan God yaua ao waran anega wane, “Nu wataget inak map anega da ya yawaton.”

Iesu apan Livai (yaua dawa Matiu) menan wan

¹³ Wam da, Iesu entane kaum awan Galili etoa sia aen. Ap mepe waenapan arugataet ine tauane menan me wadidiam wandin.

¹⁴ Amba use sia aiwandini gapan apan Livai (yaua dawa Matiu), apan Alopias otua yaven. Me moni bongamini apane da menan moni bongamine paewa gapan warden. Iesu me inap anega dien, “Ev-inap onak.”

¹⁵ Wam ame, Iesu me wadiamot megawa den apan Livai pa mega gapan taba naiwanumun. Ap mepe moni

bongamine amba God iup mega ya anuine nagirewa aruga den taba naiwanumun, iwa waenapan ame Iesu ewap onam wanumun.

¹⁶ Parisi nagire ge iup wadidiamuine nagire Iesu yawan amba wadiamot megawa inamup noyam anega wane, “Iwa dimen moni bongamine amba koewa nagirewa den tanamon taba naiwan?”

¹⁷ Iesu nop muga waiwanumune ame anuni menan gare anega wan, “Vek nagirewa nuat apanewa menan anu guriwanum go kakaewa nagirewa nuat apanewa menan ya anuiwanum. Menan ne muk ingane kakaewa anune nagirewa munan ya tauan, go koewa taine nagirewa imu posewa ge inak muga entan tapen menan tauan.”

God menan taba sinunu inine noa

¹⁸ Dion, waenapan dup iamuini apanewa, wadiamot megawa ge Parisi wadiamuine nagire den God menan wam da da taba sinunu iniwanumun. Waenapan upi Iesu inap anega wayawan, “Apan Dion, waenapan dup iamuini apanewa, wadiamot megawa amba Parisi nagire wadiamot muga den God menan pot pot taba sinunu iniwanum amba den God inap mup waiwanum. Go iwa dimen wadiamot gegawa God menan taba sinunu ya iniwanum?”

¹⁹ Iesu gare anega wadiamon, “Naine mutat i apanewa barip mega gapan wandeipiwa, me evene waiwa taba virip ya veain, iwa aton anuiwanum.

²⁰ Go wam evi da, naine mutat i apanewa waseam wat nau aepiwa, wam ame gapan taba virip veain, bagu sisi anune menan.”

²¹ “Waenapan wanup namua bebep wapi nadi warapen men semu ewakewa wabenage aigap bare nadi ya warep. Wabenagepi ewakewa den koe tata amba wanup gine daiton uon, da nevera da kaimake den.

²² Guegue da sia mam. Apan da kaum wain ewakewa man etu namua kaum menan taginamene gwanap ya wa damagep. Wa damagepi kaum mek tutut wapi etua tuk wata amba kaum wa damagep etua den koe tata! Ap anega uon,

go waenapan kaum wain ewakewa etua ewakewa gapan wa damagep!"

Iesu pura bawarewa ayopewa

²³ Diu pura muga bawarewa wamewa gapan, Iesu nao egak da, maup taue wandeni, ame berip aiwandin. Wadiamot mega den aiwandin, mu taba uit verane maup taue wandeni makewa kukunagen tavewa nane.

²⁴ Ame gapan, Parisi nagire upi yawamoni Iesu inap anega wan, "Mu iwa dimen pura bawarewa iup nuga paina yamat wanum?"

²⁵ Iesu gare anega wadiamon, "Wataget da apan Devit evene wai den enup aguguramoni tane oisewa ok gapan e iravi batnak anuyan go?

²⁶ Wam ame gapan pirisi ayop mugawa yaua Abayata wanden. Devit evene wai den, enup aguguramoni menan me God pa mega unuk ae God men taba buredi tugu seane, ian pirisi mugenat nainewa, ame iup mega den go Devit aibu na amba upi evene wai den munen.

²⁷ Pura bawarewa wamewa ame waenapan ago tamopen menan God ta barae, go waenapan pura bawarewa iupewa aymase tapen menan ya tamon.

²⁸ Ap menan ne Kimani Vitana Apanewa pura bawarewa ayopewa menan ne dim da umap wapena, ameme di."

3

Pura bawarewa gapan Iesu orup da wat inakamen

¹ Wam da sia, Iesu iup anuine paewa sia unuk aeni, apan da, naniwa nutup in wandeni, ap mepe den.

² Iesu apan ame wagat wamewa gapan wat inakameta go uon menan waenapan kem kem yaviwanumun. Parisi nagirewa Iesu apan ame wat inakamepi mu Iesu ware wanene tapen anun.

³ Iesu nani in wandeni apanewa anega dien, "Onak, waenapan namumup mapa yon." Ap wani apan ame ao yone ase ma one Iesu namup yonen.

⁴ Iesu waenapan inamup anega wan, "Ne singui da inayap waiangin. Nu pura bawarewa iup nuga dim da waiwan? Pura bawarewa gapan waenapan inamup

kakaewa tain go koewa tain? Mu inakam mumain go waenapan wa danigam mumain?" Ap anega wani go waenapan no uon wanumon.

⁵ Amba Iesu ugu gangane den ase ma yawamoni amba bagu sisi munan anu guren, iwa mu imu pose iragi gware den wanumon. Iesu apan nani in wandeni ame anega dien, "Naniga ase endimat." Me naniwa ase endimaseniwa boge kakae tan.

⁶ Parisi nagirewa pa gwanape tau amon apan Erot waenapan mega den Iesu to boniga baraepen noa barim wanumun.

Waenapan arugataet Iesu ine tauan

⁷ Iesu at ame ae ve wadiamot nagirewa mega tanamo ae kaum awan Galili tauan. Waenapan arugataet me ewap amon. Ian ame at Galili amba at Diudia, ge pa Ierusalem nagirewa.

⁸ Ge Idumea nagirewa, amba kaum Dio-dan asepagan wanumuine nagirewa den, amba at Taya ge at Saidon ameme iragi den Iesu taiwandini oisewa anun tauan.

⁹ Iesu waenapan aru ame yawamoni menan me wadiamot mega nagire diamon mu kabum da warep me gwanap wande-pen menan diamon, iwa waenapan taue kapet nasepi tawa.

¹⁰ Ap mepe Iesu waenapan arugataet wat inakam mumen, menan vek nagirewa Iesu inatapen menan muk gare gare in-pakit wa pakit taiwanumun.

¹¹ Ame airampu potamup wanumone nagirewa, Iesu yawane gapan, iragi namup beaut geamon senao anega wai-wanumun, "Ge God otua di."

¹² Go Iesu kaimakaet nomu botakame anega diamon, "Ne God Otua ame waenapan ya wadiamone."

Iesu watu enamot mega om enumon

¹³ Amba Iesu togan dore munan anuni apane yaumu wan dot amon inewa tauan.

¹⁴ Amba Iesu apan aonagaet pusinawan dere om enumo, yaumu watu enamot mega nagirewa diamon. Iwa me den iwanumampen amba opata mega wadidi-amopen menan om enumon. Amba me watu enamop amo nop oit kakaewa wadiamopen.

¹⁵ Amba den aro amun ware waenapan airampu potamupe up oimop tau amopen.

¹⁶ Om enumoni nagire yaumua mam. Saimon (yaua dawa, Iesu dieni ame Pita).

¹⁷ Sebedi otu wai Diemis gwaniwa Dion, amba Iesu mu dere yaumua da Boanoges diamon.

(Yaumua ame guegue kiman ait waini mini waine nagirewa).

¹⁸ Upi Anduru ge Pilip ge Batolomio ge Matiu, ge Tomas ge Alopias otua, Diemis, ge Tadias, ge Saimon (waenapan mega men yonini apanewa).

¹⁹ Amba Diudes Iskeriot Iesu omine wapi apanewa. Iesu watu enamot megawa yaumua ap me.

Seitan yaua da Bieseboro

²⁰ Amba Iesu pa mega sia aen, at ame taueni gapan waenapan aruga tauan barat mutane gapan wadiamot megawa den taba muga na na wamewa wakau-man.

²¹ Waenapan upi ebo anega wane, "Iesu bumbawam taiwan," menan Iesu denip mega daitonawa nagirewa me wat nau amopen menan tauan.

²² Iup wadidiamuine nagire pa Ierusalem vit onamone nagirewa tauane, upi Iesu inap wawa koko anega wane, "Airampu bawarewa mugawa yaua Biese-boro potap unugen wandia. Airampu ame Iesu amun waneni gapan Iesu airampu up oimuiwandin tau amuiwanum."

²³ Parisi nagirewa ap wane menan Iesu waenapan iragi wan tauane amba nop maibe gapan anega diamon, "Seitanmek ingane anenen wa oiseta? Uon di.

²⁴ Toemu da da engirit ta waiwanumampina ame dumari amoин.

²⁵ Amba sia dugup da todum wadum taiwanumampina mu iragi ora amoин.

²⁶ Ap umap Seitan toemu mega endumepiwa, toemu mega uon di tata.

²⁷ Seitan me aro apane mini da. Menan up apane, up tat anupiwa, anenen amba aro apane paewa unuge kwan puraput mega tambuta, me namu aro apane ware

damiga pane barae amba evi kwan puraput mega tambuta."

²⁸ Iesu sia anega diamon, "Nop nega mondi uon anun di waivin. God waenapan koewa muga wawa koko muga den iragi anu ae veta.

²⁹ Go orup da God Guewa inap notatae koevet ta wapiwa, God koewa mega ame anu ae ya veta, koewa mega usenagaet wande aiwadata."

³⁰ Iesu ap me wani iwa iup wadidiamuine nagire anega wane, "Airampu da potap unugen wandia."

Iesu inewa gwani wai iragenawa noa

³¹ Wam ame gapan, Iesu inewa ge gwani waiwa pa garip tauan yoniwanumun. Iesu wap onapen menan orup da watu enane aen.

³² Amba waenapan aruga ikukuk enpanan ae wanumone ame Iesu anega wadian, "Inaga ge gwanik waiga yawagepen menan tauane, itapa pa garip yoniwanum."

³³ Amba Iesu anega wayawamon, "Inana ge gwanin wainawa da?"

³⁴ Boge me ikukuk yawamoni sia anega wan, "Ne inana ge gwanin waina mame di!"

³⁵ Waenapan da da God nop mega anune amba gueguewa tainewa ame ne inanawa amba gwanin wainawa."

4

Tamudu naewa verine maibewa

¹ Wam da sia, Iesu kaum awan yaua Galili etop ap mepe sia wadidiamu-wandin. Ame waenapan arugataet da tauan iamene at bararaen menan me awana kabum gagap dotoue ae wande en, amba waenapan iragi kaum awan etop wanum tau amone.

² Nop aruga maibe gapan anega wadidi-amon, nop daiton ame mam,

³ "Wapena anun. Apan da oma makewa mega verapen aen.

⁴ Nao mega gapan uasiwandin, upi negina geomone nenip tauan enun nan.

⁵ Amba makewa upi agim gagap geomone ap mepe piup baware uon. Oma makewa tuk tak wan serarat yanane,

⁶ kai warane go wam dotoini gapan, serarat kurat wan iwa visimu bobou.

⁷ Makewa upi ganongae berip geamone amba kai waran go gaian yan doran umen boge borit wane.

⁸ Amba makewa upi piup kakaewa gapan geamon. Ame yanan dorane tavewa iamone arugataet mek arugataet da iam ge iam tane. Tavewa apane nani yamunaet (100) o apane yampo (60), o apane daiton aonagaeta mini aigap iammon.

⁹ Darinaya den wandepi nop nega anun!"

Iesu maibe gapan waini iwa mega mame

¹⁰ Ame ewap Iesu megenat di wanden yawanewa, watu enamot nagire mega aonagaet pusingawan derewa amba upinewa ap mepe wanumonewa, Iesu maibe mame wani menan singui wayawane.

¹¹ Me gare wadiamon, "God toemu mega karaua wandini tavewa watap enen gase di yawayan anuiwanin, go waenapan upinewa maibe gapan megenat wadidiemuvin.

¹² Ap wadiamuingina iwa mega ame mu yangut tain go ya yao awain. Amba mu anuin go ya anu awain, iwa God inap entan onamop koewa muga anu ae veptawa."

Tamudu naewa maibewa tavewa mame

¹³ Iesu sia wayawamon, "Apan oma makewa uasiwandini maibewa wadiaena e ya anuyan menan da sia wapena anenen anui?

¹⁴ Maibe tavewa mam. Nao verini apanewa ame God nop mega waini apanewa.

¹⁵ Makewa negina geamone guegue ame waenapan God toemu mega oisewa anuiwanum, go Seitan tauen nop oit ame potamupe up taiwan.

¹⁶ Amba makewa piup baware uon gwat aigap geamone gueguewa ame waenapan nop ere anune atonu den anun.

¹⁷ Go koni ame gapan mu visimu ae ae umap uon, visimu bobou otu da megenat aen menan potamup ya waren. Go evi amba pusi warup inamup taueni gapan mu aro muga uon tan menawaet inak wakaumane.

¹⁸ Amba sia makewa ganongae berip geamone gueguewa ame, waenapan nop anun

¹⁹ go piup itan megawa o aton megawa o moni puraput imumu waren menan God imu pose ya waren amba kiman inak mega kakaewa da inamup ya venasen menan tavewa da ya ian.

²⁰ Amba makewa piup kakaewa gapan geamone gueguewa ame, waenapan nop anu kakayasene. Bumagamu totanen anu waran ayamase yaentuk mantuk di taiwanumune ae ya vene, menan inak muga tavewa mega kakaevet apane nani yamunaet (100) o apane yampa (60) o apane daiton aonagaetawa (30) tavewa dim da verine aigap ien aewan."

God nop mega anu awapen noa

²¹ Iesu sia wadidiamon, "Apan da dun mega pa wat onepi amba baraeta? Unup nokap wat eneta o diguma baraeta? Ae uon, paina aroga sineta.

²² Menan ap mini sia, dim dim iravi karaua tainewa wam da arogameta. Dim dim iragi ukum umanewa evi amba ganat gapan aroga tauain.

²³ Darinaya den wandepiwa nop nega anun.

²⁴ Ap menan ae anu guran, nop nega yaentuk anuiwanian. Upi wanene tamonewa, God gare ap umap wanene taeta, amba om enunewa, om ap umap sia enueta go aigap kaimake den enueta.

²⁵ Orup da da mu nop nega anu warepiwa, ame God nop upi sia aigap aigap muneta. Go orup da da ya anu warepiwa, nop otu da namu anun waranewa, God nop ame sia waseamo aeta."

Oma makewa naewa yanine maibewa

²⁶ Ame Iesu anega wan, "God toemu mega guegue manega. Apan da oma makewa naewa egak mega gapan veramon.

²⁷ Mum gapan apan ame aup ininiwa amba wam gapan yapagen dotogen tainiwa, oma makewa veramoni ame pamagen di yaniwanum, go anenen yanine apan ame, me oare.

²⁸ Piup mek ingane tavewa wat matakamen baria. Namu dumen amba yanen amba tavewa iniwa.

²⁹ Oma tavewa maup inin geraget tani, amba nao ame i apanewa kereba mega waren di guria, iwa maup matakamepen wamewa gaset inen. Endi God toemu mega amunua ap anega.”

Baip makewa maibewa

³⁰ Ambagan Iesu diamo anega wan, “Endi God toemu mega guegue anenen wat amba venaseta, o nop yaunewa anenen wapena amba anu kakayatai?”

³¹ Gueguewa mam, oma make potape mini. Oma baip makewa ame otu koentu iragen, go apan verepi

³² amba kai ware entanep oma baware iragen tata. Nenip tauue dugup muga oma ame nani naniwa gapan iragi gungunup waramoin.”

Iesu maibe gapan wadiamuini iwa megawa

³³ Iesu nop ugup ugup iravi maibe gapan waenapan wadidiamon.

³⁴ Nop aroga da ya wan go maibe gapan waenapan wadidiam wandin. Go wadiamot mega mugenat tanamo wandeniuwa, maibe tavewa iravi aroga wadiamon.

Tawak taueni Iesu wan tom wan

³⁵ Wam ame mum ginewa taueniwa, Iesu watu enamot nagire mega anega diamon, “Kaum awan to nuguset asepagan anepen.”

³⁶ Ap mepe waenapan ae vemon Iesu kabum namu dore warden amba evip wadiamot megawa dorane boge tanan amon. Kabum upi den amon.

³⁷ Ap amuiwanumune gapan taik aritavet da aroe den awan gagap tauen. Kaum dotoue kabum gwanap geariwandin amba kabum awana unugepen tan. Mu iragi bop nonokap tauapen taiwanumun.

³⁸ Go Iesu kabum nimere gapan iwa utugan gapan enu aup iniwandin. Menan mu wa kandasen anega wane, “Wadianet nugawa, nu bop tapen taivin nunan anuingi go uon?”

³⁹ Boge Iesu kandae taik ge kaum baware ame kaimakaet ase diamo anega

wan, “Ae bigagit! Ununke uon wainge!” Boge taik ge kaum baware ame tom wa ae bigaren.

⁴⁰ Iesu singui anega wayawamon, “E tap iwa dimen taiwanin? E anu tumat ega ne inanap otu kamontu.”

⁴¹ Go mu tap aigap sia tan tarak anega wawa mutan, “Akae, ma dim apan da? Taik ge kaum diamoni boge noa di warane.”

5

Airampu at Gerasin apan da potap wanumon

¹ Ame Iesu, watu enamot nagire mega den tanam, kabum gapan awan Galili ame gamu to nugusen pa sewa Gerasin tauan.

² Iesu kabum ae ve piupa viseni pa apane da airampu potap wardeni Iesu ine serarat tauen.

³ Apan ame kaima arewa gapan ininiwa, go waenapan da apan ame ware damiga ya taup umap, ame damik kaimake dena gapan panine go umap uon di.

⁴ Wam da da pusiwa naniwa damiga paniwanumun go nani vikimen pusiwa damik gwat gan ae tomangen siniwa. Waenapan warat anune go me gure pakit uatumen.

⁵ Mum wam kaima arewa amba tunupa den ve ao wan wapiwa mek ingane gwat gapan totomagen denip tauiniwa.

⁶ Apan ame Iesu paina yaveni serarat ae namup taue omanip enun.

⁷⁻⁸ amba Iesu airampu inap kaimakaet anega dien, “Apan ae ve, tau ak!” Ap menan airampu nop kaimakaet anega wan, “God Paina Iragenawa Otua Iesu, inanap dim tat anu tauaan? Kaiwan, ya ta koeragam nimanegépen menan God yamap agi wa.”

⁹ Anega wani Iesu singui wayaven, “Ge yauga anen?” Airampu arugataet potap unuk wanumone menan airampu gare anega wan, “Nu airampu arugataet waninan menan nu yaunu ‘Arugataet.’”

¹⁰ Airampu arugataet ame Iesu inap kayawan mini anega wan, “At ma gapan ya wa oine.”

¹¹ Ap mepe, togana tuan arugataet taba naiwanumun.

¹² Menan airampu Iesu nanamasen anega wane, “Wa oine, nu tuan potamup unuget.”

¹³ Menan Iesu anega wan, “A, umap tau aisen!” Airampu apan ae vean tau amon tuan potap unumon. Unumone tuan togana serarat vitan kauma geomone none namon. Tuan ameme arugataet mek arugataet (2000) da.

¹⁴ Tuan kwayup taine nagire yawamone tap serarat amon pa pa, at at oit wadiammon. Pa nagire oit anune gapan serarat tauan anen tane yawapen onamone.

¹⁵ Ame waenapan amon Iesu inewa tauanewa, airampu arugataet potap wanumone apanewa i guine tamana tan, wanup ene ap mepe ae wanden yawane menan mu tap ase anu guran.

¹⁶ Amba inak mame yamap ase yawane nagirewa, amon inak ame anenen apan ge tuan inamup venaseni oisewa waenapan iravi wadiamon.

¹⁷ Menan at Gerasin nagire iragi Iesu at muga ae ve aepen menan tapawan wane.

¹⁸ Iesu kabum gagap dorapen tani airampu potap tau amone apanewa tauue anega kayawan mini wan, “Tatan, gende anepen.”

¹⁹ Go Iesu watane anega wadien, “Ewagai pa ak, ap mepe Ayop God anenen genan tan amba imua inagap wareni oisewa denip gega daitona nagirewa wadiam.”

²⁰ Wani, apan ae pa sewa da da iragi aonagaet yaua Dekapolis gapan Iesu menan tani oisewa wadiam wadiam aeni menan waenapan no i kap wan.

Diairas orewa wat inakamen

²¹ Ame Iesu kabum dotoue kaum awan eto yamunewa sia entan aeni, ap mepe waenapan arugataet tauan awan etop ikukuk enpanane.

²² Diu nagire opata waine paewa kwayup taini apane da ap mepe den, me yaua Diairas. Me Iesu yaveni gapan ine tauue namup omanip enu, wae wae ta anega wan,

²³ “Ne orana boopen taiwan. Kaiwan endi onak naniga iap bare, me inak ware wande ep.”

²⁴ Anega wani Iesu dere amon. Go waenapan aru ame git git amon Iesu ase kapet natane.

Waen Iesu wanupe inase inakaeni guturewa

²⁵ Amba waenapan aru ameme yau-makamup waen da vek ewatopwareni en mega aonagaet pusingawan dere uon tan.

²⁶ Amba dom gigit nagirewa wa tomagepen men tane go me di wat ire aiwandin, me agim make mega iragi ap mepe danam oitamen, go vek ame uon tata bumagap di aiwandin.

²⁷⁻²⁸ Amba waen ame Iesu dim da taiwandini oisewa anuniwa, mek ingane anega anuni, ‘Ne wanup mega ginewa megenat inatapenawa, ne inak warain,’ ap anega anuni menan waenapan aru ame napamup garivi tauue Iesu wanup mega inasen.

²⁹ Inaseni boge ewatop taiwandini tom wan, menan me ugu wapi ae doron anuni me vek mega gaset uon tan inak waren.

³⁰ Iesu aro amun mega gamupe tau aen anun. Ap menan ikukuk to entane waenapan aru ame to iam wanumune anega wayawamon, “Wanup nega da inasen?”

³¹ Wadiamot megawa gare anega wane, “Waenapan aru ma to iamene kapet natagiwanumune yawamoan amba dimen da waraget wan waingi?”

³² Go Iesu yangut ikukuk di tanau iwandin ame wanup mega da inaseni otua ire yawapen taiwandin.

³³ Amba Iesu wanup mega inaseni waenewa ae anuni me gase inak waren, ap menan tauue Iesu namup nikapu enu, tap anu gure dararame den wanup inaseni oisewa iragi wadien.

³⁴ Ap wani Iesu waen anega wadien, “Oranawa, anu tumat nimanegeana menan inak wariagi. Nonup gapan ak, vek gega uon tan.”

Diairas orewa wat inakamen

³⁵ Iesu nop ame waiwandini gapan, sep nagirewa upi Diairas pa mega gapan tauan oit Diairas anega wadiane, “Oraga gase boon. Ap menan wadianini apanewa Iesu menan gamben gamben sia ya wa taingan.”

³⁶ Iesu nop ame anuni Diairas inap anega wan, “Tap ya anu. Aigap sia anu tumat nimanegewa, oraga inakaeta!”

³⁷ Iesu waenapan upi watanamon go Pita ge Diemis ge Diemis gwaniwa, Dion mugenat tautan amon.

³⁸ Ame tanam ae Diairas pa mega tauane gapan orup waen ame boeni menan waenapan irip turup ap mepe waiwanumune yawamon.

³⁹ Pa unuk aeni Iesu waenapan anega wayawamon, “E dimen gego anu tayan irip turup waiwanin? Irip ae vean, me mondi aup iniwan, ya boen.”

⁴⁰ Iesu nop ap wani menan waenapan iragi verea kaura tan top nop wane.

Go Iesu waenapan wa oimon namboya vitan. Amba Iesu yone orup ame ine mamewa amba watu enamot mega apan yampo tanam pa gwanewa enugutane ame gwanap unuk amon, orup bonigawa ap mepe iniwandin.

⁴¹ Amba Iesu orup waen boeni nanip ware anega dien, “Tarita koum,” nop ame guegue, “Orup waen, ao yon wanik!”

⁴² Iesu nop ap wani no utap orup waen ame ao yon wande ap pa gwane ikukuk aen. Menan waenapan iragi daramu wan no i kap wan. Orup waen ame en mega aonagaet pusinawan dere.

⁴³ Go Iesu anega diamon, “Ne tana oisewa waenapan ya wadiamone.” Iesu ine mame anega wadiammon, “Oraya, taba da wanane nap.”

6

Pa Nasaret nagirewa Iesu tandayasen

¹ Ap mepe Iesu at ame ae ve amba pa sewa mega di aen, watu enamot mega den tanam amon.

² Ap mepe wam pura bawarewa taueniwa, iup anuine paewa gwanap ere wadidiamon. Waenapan nop mega anuiwanumune gapan no i kap wan, anega waiwanumun, “Apan ma dima ge yo paua mame aroewa iragi ambagan waren taiwan?”

³ Go me pa tuini apane otua mo? Inewa yaua Meri. Amba gwani wai apan Diemis, Diosep, Saimon ge Diudes. Amba domare wai iravi nu den inivin. Me mondi pa otua

megenat.” Amba waenapan bagumu sisi wan Iesu tandayasene.

⁴ Go Iesu gare wadiamon, “God no oise viripe ya tainewa ame pa sewa megawa amba mek pa mega gwanap wanumuine nagirewa mugenat di.”

⁵ Inap ya anu tumasene menan kiman paua mega bawarewa da ap mepe ya tan. Vek nagirewa otu dere naniwa wapip se wat inakam mumen.

⁶ Me nop uon tan, iwa waenapan me inap anu tumat da uon. Ap menan Iesu sewa mega ae ve sewa ugupewa da gapan opata ap mepe wadiam wandin.

Wadiamot megawa dere dere watu enamon

⁷ Amba Iesu watu enamot mega aonagaet pusinawan dere munan wan tauane, amba aro amun mega airampu wa oimopen menan munen. Iesu apan dere dere watu enamon.

⁸⁻⁹ Anega wadiamon, “Aisene negin purapuse da den ya tam aisene. Taba go moni ega da den ya tambune go kaipat ega megenat tambun. Pusi okomewa megenat enan go wanup senunawa den ya tambune.

¹⁰ Ame aisene amba pa da atonu den waupaepiwa, ap mepe iniwanian, ap tapen wamewa tauepiwa, amba pa ame ae vean aisen.

¹¹ Go at da waenapan da da ya wau-paepi pa muga ae vean aisen, koewa muga ae bat munapen menan pusia atabobo toninigamen aisen, ame tane yam tatak munapen.”

¹² Iesu wadiamot megawa tau amone opata anega wadidiam wanumun, “Koewa ega ae vean imuya entanen.”

¹³ Amba den airampu waenapan potamupewa up oimone tau amuiwanumune amba vek nagirewa oma Olip osewa iamup gemiwanumune inak wariwanumun.

Apan Erot Dion mege to ketnaget wan

¹⁴ Iesu yaua senare aiwandini waenapan iragi asigip tane menan ayop Erot, at Galili ayopewa, Iesu oisewa anun. Waenapan anega waiwanumun, “Iesu yo paua

ugup ugup taiwandini iwa, Dion, dup iamini apanewa, bop gapan sia yon warden taiwan.”

¹⁵ Amba upinewa anega wane, “Iesu watageta apanewa Elaidia.” Upi anega wane, “Me watagaet God nop mega waiwandini apante da umap taiwan.”

¹⁶ Wane go apan Erot anuni anega wan, “Iesu me Dion di. Wataget ne wan apan nega Dion megewa to nugusen boen go sia inakae yon warden.”

¹⁷⁻¹⁹ Apan Erot gutut mega mam. Me gwaniwa Pilip waenewa Erodias up ta naisen. Dion dup iamoni apanewa ayop Erot anega diwandin, “Narawagawa waraana iup paina yamasean.” Dion ap waiwandini menan Erot waenewa ame, yaua Erodias, garewa tot anun go memewa watanen. Go waenewa Dion inap gari gangan naeni, iwa Dion Erot waenewa ameme wainan gogo taiwandat dien menan Erot wan ita mega nagirewa waran, taun gwat noke baraan.

²⁰ Erot me Dion tawa anuni menan tantan mega taiwandin. Me anuini Dion apan kakaewa imu pose woup am seni apanewa. Amba den me Dion opata mega anupen men wam da da gapan anutaet tainiwa.

²¹ Amba waen Erodias Dion topen neginewa da yop ta tautanen, ame Erot yaneni wamewa baripe gapan. Namu yoyo nagirewa ge ita yamewa nagirewa ge at Galili bawarewa mugawa iravi barip ame menan tauan.

²² Barip taiwanumune gapan Erodias orewa taue Erot evene wai den tarep munan waren. Mu tarep ame yawane gapan aton anune. Erot aton anuni menan waenoro ame anega wadien, “Ge dim da men anu wawa ne di genain. Mame di wa agiat gimagivin,

²³ ame ne yon tau nega upi seu enu genapen yon borai.”

²⁴ Boge waenoro tau ae inewa singui tayaven, “Inan, ne dim da men mua wain?” Inewa gare wan, “Ge Dion dup iamini apanewa iwa to nugut genapen mua wa.”

²⁵ Waenoro ame serarat ae ayop Erot ine taue mup anega wan, “Daragi mame di

Dion waenapan dup iamini apanewa iwa to nugut sera gapan barao ma di nen!”

²⁶ Erot waenoro ame mup mega wan anuni bagu sisi anun. Go evene wai barip men tauane yamap waenoro wanat wa agiaseni menan ae ya veat anun.

²⁷ Menan Erot ita apane mega da watu enen gwat noke taue Dion mege gamu to ketnagen.

²⁸ Dion i bonewa sera gapan bare wat onen, waenoro ame ase wanen. Waenoro wat ae inewa wanen.

²⁹ Amba Dion wadiamot megawa oit ame anunewa tauan etua waran amon amba urata tune.

Iesu waenapan 5000 aigap taba gapan watumon

³⁰ Iesu watu enamot mega nagire sia entan tauane amba dim dim tane oisewa iragi Iesu wadian.

³¹ Go waenapan aruga tau ge amo taiwanumune menan taba muga na na wamewa uon tan. Iesu wadiamot mega anega wadiamon, “Egenat onaene anet at iumai toni arewa da gapan ap mepe nonan banu warat.”

³² Ap mepe mu mugenat amon. Mu kabum waran at iumai toni arewa ame amon.

³³ Go waenapan oise anune menan pa sewa gapan pusimup ewap amone.

³⁴ Iesu kabum gapan asepagan taue, gerata enaseni gapan me waenapan arugataet yawamoni imu pose munan anu guren. Bagu sisi anuni iwa mu ago muga da uon, ame man sip kwayup taini mini, kwayup tamuini apante da uon, nutumu uon amba itan bagu sisi wariwanumun. Ap menan me nop ugup ugup arugataet wadidiam wandin.

³⁵ Mum gine di taiwandini gapan, wadiamot megawa ine tauan anega wan, “At ma waenapan uoni arewa, amba wam gaset gearen mum di tauapen taiwan.

³⁶ Menan waenapan to iam baware mame watu enamot amo, taba upi pa gwanap muk muk une ta nap.”

³⁷ Wane go Iesu gare wadiamon, “Ae, ap anega uon. E taba da munane nap.” Go mu gare anega wane, “A, nu anenen munait? Anet taba buredi une tat munat

nain go? Taba garewa baware nu moni apane aonagaet (200) sea sea umap uon."

³⁸ Ap wane menan Iesu sia wayawamon, "E taba buredi magamene animpo tambuyan? Aisen yawan." Amo yawane anega wan, "Nu taba buredi magamene nani yamunaet amba meo dere ap mugenat."

³⁹ Amba Iesu waenapan iragi unawat gagap ae wanumopen diamon.

⁴⁰ Upi apane nani yamunaet (100) upi apane dere apan da aonagaet (50) iam iam tan wanum wanum amone.

⁴¹ Amba Iesu taba buredi magamene nani yamunaet meo dere den ame tambukiman ao yave God inap gaun wa amba paise paise ta waenapan taba munapen men, wa ewamot megawa munen. Meo dere den paise munen boge mun ge mun amon.

⁴² Waenapan iravi taba tavewa nane bagumu bim wan.

⁴³ Nane ewap, wadiamot megawa taba semua bongamen kaenat aonagaet pusinawan dere enane no dotouen.

⁴⁴ Apan ap mepe taba tavewa nane arugataet 5000 umap, waen orup den bat-nagetawa aigap den sia.

Iesu kaum awan gagap pusip aen

⁴⁵ Amba Iesu wadiamot megawa kabum gagap kaum etop asepagan pa sewa Bet-saida namu amop amba me evi aet wan. Iesu waenapan to iam baware ame watu enamon amone.

⁴⁶ Amba me waenapan wa oimoni ewap, God inap mup wapen menan togan dot aen.

⁴⁷ Mum gine me megenat ap mepe warden. Kabum gaset ae awan bumagewa tauen.

⁴⁸ Me wadiamot mega yawamoni, kabum waran to entanepon menan tapanan taiwanumun iwa taik tau kabum nasiwandin gapan. Mum igoe dena gapan Iesu munan kaum gagap pusip ap oniwandin boge garawat mum tau aepen taiwandini.

⁴⁹ Wam ame wadiamot megawa kaum gagap ap oniwandin yawane, mu tap baware anun anega wane, "Ma guagup da tauia!" Amba tap den senao vebobop wane.

⁵⁰ Mu iravi yawan tap baware anun go Iesu anega diamon, "Ma ne, tap ae vean gop ya anune."

⁵¹ Kabum gagap dotoueni gapan taik tom wabigare tau aen. Wadiamot mega anu waramasene imumu puk wan.

⁵² Iesu namu taba buredi paise paise ta waenapan muneni ap gueguewa mu ya anu awan iwa imumu kaimake wan.

At Genesaret vek nagirewa wat inakam mumen

⁵³ Mu awan ame gamu to nugusene at Generaset gerata en natane.

⁵⁴ Kabum ae veane waenapan Iesu ire menawaet yawane,

⁵⁵ menan serarat amon at at ise tau ase tau amon vek ato nagirewa eragia se onam wanumun. Iesu amba wandeni arewa gapan ap mepe amon.

⁵⁶ At at pa pa Iesu tau ge tau aeni gapan waenapan vek nagirewa une gare gare taine arewa gapan sean wanumon. Mu Iesu wanup mega gine siwa den inasepen menan mup wane, orup da da Iesu wanup mega ginewa inatanewa iragi inak mutane.

7

Bigi denawa amba bigi uoniwa

¹ Wam da gapan Parisi nagirewa amba iup wadidiamuine nagirewa den pa Ierusalem gapan onamone tauan Iesu ikukuk nau panan.

² Iesu wadiamot megawa upi taba nanimu bigi den naiwanumune mu yawanmon. Parisi nagirewa God menan nani bigi warine mini, mu nani bigi ya waran.

³ Parisi ge Diu nagirewa den guegue muga ap anega. Isimure wai guegue ap taiwanumune menan mu ap anega sia taiwanum. Ap gapan mu God menan nani bigi warane amba nainewa.

⁴ Ap gapan mu taba da une gare gare taine arewa gapan une tane ya nain, namu God menan nanimu bigi ware amba nain. Amba den yogup sip unup dim dim den ap mini God menan bigi wariwanum, wataget ugup ugup taiwanumune ap den sia taiwanum.

⁵ Parisi iup wadidiamuine nagire den Iesu inap anega wawa koko tan, "Iwa

dimen wadiamot gegawa omayan baewa guturewa iup mega to paisiwanum? Mu God menan namu nanimu bigi ya warane amba taba naiwanum.”

⁶ Ap wane menan Iesu garewa anega wadiammon, “E da wa da ta taiana nagirewa. Apan Aisaya e evi taiwanian pina oisewa namu tave di wan. God enan anega wan,

E iravi noya gapan viripana den taiwanin, go imuya potaya ne inanap ya wariwan.

⁷ E wa taragat nimanegepen menan umap uon
iwa gutut ega ek anuiana gapan wadiamuiana menan.

⁸ God iup mega tandayasean gare apan iragen nop muga anuyan taiwanin.”

⁹ Iesu sia wadidiamon, “God nop mega ae vea gare iup ega tapen men daramuya dima wayan taiwanin.

¹⁰ Iwa watageta apanewa Mosis anega diaen,
Inae mamae virimu tan
amba da da mamewa o inewa ta koer-
agam mumepi,
ame togurep di boep.
Ap anega sen.

¹¹ Go e ugup anega waiwanin, Apan da da ine mame anega wadiamopi, ‘Nu enat wa agiat imae toni ya enait nu God wanait.’ Ap anega wapi ine mame virimu ya taiwanum go e umap waiwanin.

¹² Ame gapan ine mame ayamase tat anuine watanam wanin.

¹³ Menan e gutut ega tapen menan God nop mega ayamase ya taiwanin. Inak eboewa ame naewa ega den wadiamuiana gapan guegue ap miniwa ugup ugup den taiwanin.” Iesu ap anega wan.

Guegue nuga ansena gapan koewa di-aneta?

¹⁴ Iesu waenapan munan wan tauane anega wadiammon, “Wapena di anun, anu kakayesen.

¹⁵⁻¹⁶ Waenapan taba ugup ugup naine gapan imumu God yamap bigip ya taiwan. Go dim da no utap aoma tauiniwa, ame gapan imumu God yamap bigip taiwan.”

¹⁷ Mame ewap Iesu waenapan ae vemo pa gwane unuk aeni wadiamot mega maibe wani iwa anupen menan singui wayawan.

¹⁸ “E da ya anu kakayat wanin? Iwa dimen asik ya tayan? E asiglap, taba ugup ugup naiana gapan imuya potaya God yamap bigip ya tata.

¹⁹ Taba ap me nane gapan imuya potayap ya taueta go ni etavewa gapan wande amba tau aeta.” Ap wani gapan, Iesu taba ugup ugup iragi kakae diamon.

²⁰ Iesu sia wadidiamon, “Go wan dim dim ame noa gapan aoma tauini ame imu pose gapan tauwan, ap me gapan imuya God yamap bigip tan.

²¹ Imuya potaya gapan koewa anuyan taiwanin. Koerage anuiwanin, wainan gogo taiwanin, dim dim up taiwanin, apan naniap borit waiwanum,

²² gwep gorogot nau guguraiwan amba evenae wai puraput muga men wayan baguya kandaiwan amba koewa ugup ugup taiwanin. Evenae wai imua aopan wariwanin, koewa ek tayan kakae tat anuiwanin. Upi anu koeam mumiwanin, nuaroro waiwanin, apan apan taiwanin, amba bumbawam mini taiwanin.

²³ Koewa ameme iravi imuyap potayap wandia menan iravi mame gapan di God yamap wabigim imainiwa.” Iesu ap anega wan.

At ugupe waen da Iesu inap anu tumasen

²⁴ Iesu yone ae pa sewa Taya tauen. Amba me tauen pa gwane unuk aeni oisewa waenapan da ya anupen menan tan, go mu iragi asigip tane.

²⁵ Ap mepe waen da orewa airampu potap wanden, waen ame Iesu taueni oisewa anun. Ap menan menawaet taueni boge Iesu namup nikapu enun.

²⁶ Me Diu uoni Gurik noa waini waenewa pa sewa Ponisia at Siria gapan tauen. Waen ame Iesu inap noek noek wan airampu orewa potape warup oirenep tau aepen menan waiwandin.

²⁷ Ap wani, Iesu maibe gapan me namu Diu nagirewa ago tamopen menan taueni oisewa anega wadien, “Orup otu namu watumot. Go orup otu taba muga eyao ya munait, ame tamana uon.”

²⁸ Diu uoni waen ame sia anega wan, “E, ayop negawa, ge tave di waingi. Go

orup otu taba watara naine gapan semua
geamuine eyao den nainewa."

²⁹ Waen ap wani menan Iesu anega
gare wadien, "Nop nega wana garewa
kakaevet di waana menan pa ak. Airampu
oraga potap wandeni gase tap tau aen."

³⁰ Iesu ap wani boge waen ame pa ae
yaveni airampu orewa potape tau aen,
me kakae ta aup parata iniwandin yaven.

Iesu darine boraseni apanewa wat in- akamen

³¹ Iesu at Taya ae ve at Saidon arige pa
iragi aonagaet yaua Dekapolis den tau ge
tau aiwandin amba kaum Galili etoa sia
tauen.

³² Iesu ap mepe wandeni gapan, waenapan
upi darine borasen nop memo waini
apanewa da Iesu inap wat onamon. Iesu
naniwa wapip barae wat inakamepen
menan mup dagin dagin waiwanumun.

³³ Boge Iesu apan ame ware waenapan
ae vemo asira sensenui ae, nani piru apan
darine nokap ene, amba naniwa giton ene
apan meriwa inasen.

³⁴ Amba Iesu ao kimani yangut ta, gaup
kaimakaet warupeni amba apan anega
dien, "Epata." Nop ame guegue darine
purut wap.

³⁵ Wani boge apan darinewa purut wan
megewa awasen nop kin kin aroga ase
wan.

³⁶ Iesu ame tani oisewa pa pa ya wadi-
diamopen menan no botakamen. Aigap
aigap ap diamoni go mu ya anun aigap
aigap wadijam wanumun.

³⁷ Amba waenapan nop oit mame anune
iragi no i kap wan anega wane, "Iesu wan
dim dim taini iragi kakae iragen megenat.
Darine boraseni sia anuiwan, mege boraseni
sia nop waiwan," ap anega wan.

8

Iesu waenapan 4000 mini watumon

¹ Wam da sia waenapan arugataet tauan
amba Iesu inap sia iamene go taba muga
uon tan. Iesu wadiamot mega munan wan
tauane anega wadiamon,

² "Ne waenapan ma munan bagu sisi
anuivin. Mu tanamo wanigen wam
yampo gaset uon tan amba taba na na da
uon.

³ Wapimu negina torot wapi tawa
menan, mondi enup agut ya watu enamot
anuivin."

⁴ Wadiamot mega singui anega
wayawan, "Nu taba amba tambut
umanup tap amba to iam baware ma
watumoit, at ma kaimewa arewa mini,
taba da uon?"

⁵ Wane Iesu singui wayawamon, "Taba
buredi animpo inayap wanumam?" Mu
gare wane, "Nani yamu dere."

⁶ Iesu to iam baware ame diamon piupa
ae wanumon. Boge me taba buredi tambu
amba God inap gaun wani, paise paise ta
wadiamot mega munen amba mu waena-
pan munane.

⁷ Meo otu koentu upi den aie God inap
gaun wa waenapan munapen menan den
diamon.

⁸ Mu iragi nane umap tamon amba se-
mua bongamen kaenat nani yamu dere
enane no dotoouane.

⁹ Waenapan ap mepe taba nane aru-
gataet 4000 umap. Iesu waenapan wa
oimon amone.

¹⁰ Amba me boge wadiamot mega
tanam kabum gwanap dotouan at Dalo-
manuta amon.

Parisi nagirewa kiman paua da tap yawat anun

¹¹ Parisi ge Sadusi nagirewa upi Iesu
ine tauan pusi warup ta yawapen menan
singui anega wayawan, "Ge aro kimaniwa
paua da ta nu yawat anuivin."

¹² Nop ame wane Iesu gari yaven anega
wadiamon, "Endi iniana nagirewa iwa
dim men kimaniwa yo paua mega yawat
anuiwanin? Nop nega mondi uon anun di
waivin. Ne paua daiton da ya ta ewain."

¹³ Boge Iesu kabum gwanap dotoue
kaum yamu asepagan aen.

Parisi ge Sadusi nagirewa guegue mu- gawa koerage

¹⁴ Mu awan gamu to nugusen amon.
Iesu wadiamot megawa taba buredi na na
mega upi tambu tambu imumu borat mu-
tane, magamene daiton megenat kabum
gagap baraen.

¹⁵ Amba Iesu tagigit kaimakaet diamon,
"Agun anun, Parisi nagirewa ge ayop Erot
koewa muga anu kakayasen. Mu guegue

muga ame buredi tutut wapen menan atagin potap enine mini.”

¹⁶ Mu nop ame waran amba yau-makamup baraen wawa mutan amba anega wan, “Mame wani iwa nu taba buredi da ya tam onantoni menan waiwan.”

¹⁷ Iesu nop muga imup anun men anega wayawamon, “E anu tumat ega otu koentu, iwa dimen taba buredi ya warat waiwanin? Imuya potaya kaimake wan go?”

¹⁸ E yamaya den go ya yaviwanin dari-naya den go ya anuiwanin. Ne wana iwa dimen ya anuiwanin? E anuyan go uon?

¹⁹ E ya di anu aviaisi. Ne wata buredi magamene nani yamunaet gapan apan aruga 5000 munan nane amba semua bongameana kaenat animpo enayan?” Mu gare anega wan “E, nu kaenat aona-gaet pusinawan dere enaton.”

²⁰ Iesu sia wayawamon, “Amba ewap buredi magamene nani yamu dere gapan apan 4000 munan nane amba semua bongameana kaenat animpo enayan?” Mu gare anega wan, “E, nu kaenat nani yamu dere enaton.”

²¹ Ap wane Iesu singui wayawamon, “E sia ya anu kakayat wanin go?”

Iesu yame boraseni apanewa wat inakan-men

²² Amba Iesu wadiamot mega tanamo pa sewa Besaida tauan. Waenapan upi yame boraseni apanewa da waran Iesu inewa tauane amba naniwa wapip inase wat inakamepen menan noek noek wai-wanumune.

²³ Menan Iesu apan ame nanip ware pa sewa garip nau aen. Aeni apan yamap giton en anen naniwa wapip ae inase singui anega wan, “Endi ge yangut taingi?”

²⁴ Apan yangut paina ase ma yave anega wani, “Ne apan yawamuivin go mu oma ap amuine mini yawamuivin,” ap anega wan.

²⁵ Menan Iesu naniwa dere sia apan yamap use waboren. Boge apan yame ase meret wa kakayesen birom barom taini uon tan yangut kakaevet taiwandin.

²⁶ Iesu apan ame pa wa oiseni, anega dien, “Pa sewa ase inamup ya age go pa gega di ak,” ap anega wan.

Pita Iesu yaua Keriso aroga wan

²⁷ Wam da Iesu, wadiamot megawa den, pa sewa yaua Sisaria Pilipai arigewa gapan tauane, negina wadiamot mega singui wayawamon, “Waenapan ne da di-anek wanum?”

²⁸ Mu gare anega wane, “A, ge Dion waenapan dup iamoni apane diagiwanum. Upi watageta apane Elaidia diagiwanum. Upi ge God noa waiwandini apane da diagiwanum.”

²⁹ Menan Iesu mu inamup singui anega wayawamon, “Umap, go e ne da dianegi-wanin?” Saimon Pita gare anega wan, “Ge God mega wa watu enageni Keriso.”

³⁰ Iesu ame anega wani wadiamot mega kaimakaet sia diamon, “Ne God mega wa watu enanegeni Keriso ame waenapan ya wadiamone.”

Iesu bagu sisi bop mega oisewa ere wadiamon

³¹ Iesu wam ame use aeni nop ere watape wa ewamot mega aroga anega wadiamuiwandin, “Ne Ierusalem angep. Ap mepe waenapan dimae waine nagire amba pirisi bawarewa ge iup wadidiamuine nagire den nanimu gapan ugu vegaek bagu sisi baware anu tanain. Amba toguranegep bonigatain. Toguranegep bonigasepena amba wam yampooa God amun mega gapan inak nigat sia yon wanigain.”

³² Ap anega wani menan Pita Iesu nau asira ae amba, ap anega ya wapen menan dien.

³³ Go Iesu entane wadiamot mega upi yawamoni amba me Pita anega diguren, “Ge Seitan mini, tau garinap ak. Ge oma ibariwa mini namuna boringi go God wan dim dim mega iagap ya baraingi, go apan iak guine gapan waingi.”

³⁴ Amba wadiamot megawa waenapan den iragi onamopen wan tauane anega wadiamon, “Orup da inanap onat anupiwa, namu me mek dim da anuini tandayase, ae di vep, amba ne yauna menan, pot poraet ugu vegaek bagu sisi anu, korosi mega ware evinap oniwan-dan.”

³⁵ Amba orup da da muk inak mugawa menan anu gurane tainewa, ame inak

muga wakaumain, go orup da da mu inak muga nenan, amba God No Oise Kakaewa menan anu gure wakaumepiwa, mu inak kakaewa tautanain.

³⁶ Amba sia, orup da piup puraput mega iravi tambun go inak mega mek wa koeamepi o wakaumepi, ame tave uoni inagewa!

³⁷ Me garewa om dim da gapan inak mega sia une ta wat naseta?

³⁸ Waenapan endiwa mu koerage amba God menan ya anuiwanum. Da da umamuna anupi amba nop nega menan umam den anupi ne, Kimani Vitana Apanewa, wam da amba, Mamana kakae guragut ganasewa mega warap anea mega potamu woup seniwa den sia tauapena gare umamumu anuin.”

9

¹ Iesu sia wadiamon, “Ne tave di wa agiat imaivin. E da da mapa yoniana ya borit wai Kimani Vitana Apanewa amun nega den tauapena yawanegene amba borit wai.”

Iesu etua ge wanupewa entanen ganase wan

² Wam nani yamu daiton uon tani Iesu God inap mup wapen menan apan Pita, Diemis ge gwaniwa Dion tambumo mutanen tunup da dot amon. Ap mepe Iesu etua ugup entanen yawane.

³ Wanup mega pomponu ganase wa tauaen. Waenapan wanup bigi gurine umapda om ya inen go mek pomponugaet iragen.

⁴ Yawane boge watageta apanewa Mosis ge Elaidia venat mutan Iesu den nop waiwanumune yawamon.

⁵ Pita Iesu anega dien, “Ayop nugawa, nu ge den mapa wanin antoni menan ame kakae di. Menan pa namdat otu da yampo tumoit. Daiton gegawa da Mosis megawa da Elaidia megawa.”

⁶ Go Pita ge upine den tap baware anu gurane, menan me anu warāmat gapan ap anega wan.

⁷ Irikup pomponu aigamup tauue, waboboramom amba mu irikup potap wanumon. Nop da irikup potap anega tauen, “Ma ne Otun iragenawa, da ne

menan anu gurinawa, me inap atonu anuivin. Nop mega anun!”

⁸ Nop ap taueni boge Iesu wadiamot megawa ikukuk yawane go apan dere ame oak mutane amba Iesu megenat wanden yawan.

⁹ Tunup gapan mu vit onam wanumune, Iesu no botakam mume anega wan, “Dim da venasen yawayana oisewa waenapan da ya wadiamone. Ne Kimani Vitana Apanewa bonigasep sia inak nigasepena evip amba wadiamon.”

¹⁰ Iesu nop ame wani wadiamot mega potamup boge wanden, go anega wawa mutan, “Me boe sia yon wandepi, tavewa anenen?”

¹¹ Wadiamot mega singui anega wayawane, “Iwa dim men iup wadidiane nagirewa apan Elaidia namu tauat waiwanum?”

¹²⁻¹³ Iesu gare wadiamon, “Ne wapena anun. Elaidia gaseget namu tauen. Waenapan ire ya yawane menan koewa inap tat anune gapan di tane. Ame God nop mega namua gapan ap anega seane. Amba sia anega seane, Kimani Vitana Apanewa ta koeragam nimanegepi ugu vegaek bagu sisi anu tanain.”

Iesu orup apan airampu denawa wat inakamen

¹⁴ Tunupa vit onamone gapan, iam iam da potap tauane. Wadiamot mega upi sia tautanamon. Ap mepe, waenapan iam baraen amba iup wadidiamuine nagirewa den arak maken wariwanumune yawamon.

¹⁵ Go waenapan iragi Iesu yawanewa imumu puk wan atonu den waupane.

¹⁶ Ap menan Iesu singui wayawamon, “E dim da arage makene tanamoyan wariwanin?”

¹⁷ Waenapan berip apan da gare anega wani, “Wadianiana apanewa, airampu da otuna potap unugen wandia noa borasen menan genan wat ongen.

¹⁸ Airampu otuna waren pia ae toowan amba orup gitutu nop tauowan, no gitnagiwani, kaime i dat enun taiwan. Ne wadiamot gegawa airampu oirenaben men diamona go umamup uon. Wane go airampu tap ya tau aen.”

¹⁹ Iesu nop ame anuni garie den anega wadiamon, "Akae, koewa taiana nagirewa, ya anu tumat nimanek wanin. Ne wam animpo mini tanae wanigepen amba anu tumat tai? Orup ame wat onaen."

²⁰ Orup wat onamone airampu Iesu yave orup ware enu menawasen orup pia geare nikao makao tan gitutu nop tauen.

²¹ Iesu orup mamewa singui wayaven, "Otuga koewa mame wam ansena waren?" Me gare anega wan, "A, me orup otu wandeni gapan di waren."

²² Amba airampu orup ame waren oma yamewa ge kauma uarene togurep boepen menan wam arugataet ap anega di taiwandin. Aro ge inagap wandepiwa bagu sisi nunan anu ago di nun."

²³ Iesu gare wadien, "Dim men gego waingi? Anu tumat nimanegewa dim dim iravi tai."

²⁴ Iesu ame waniwa orup ame mamewa kaimakaet anega wan, "Ne anu tumat gimagivin. Go umap uon. Ago nena anu tumat nega baware tap."

²⁵ Waenapan aruga serarat toga uaren ta tauane, Iesu yawamoni me airampu kaimakaet anega dien, "Ge yauga no borat ge darine borat airampuewa, endi ne yam ta yawagen waian, tau ak, orup ma potap sia ya unuge."

²⁶ Airampu Iesu nop mega anuni ve baware wa orup ware enu menawase pia uat ene boge tau aen. Tau aeni orup pia boe bonigawa umap warden waenapan uruga yawane anega wan, "Gase boen."

²⁷ Go Iesu orup nanip ware endaven ao yon warden.

²⁸ Amba Iesu pa gwane unuk aeni, wadiamot mega singui mugenat waiwanumun, "Iwa dim men nu airampu ame wa oita-toni go ya tau aen?"

²⁹ Iesu gare wadiamon, "Iwa mam. Airampu ma miniwa mup aroewa megenat gapan tap tau aeta."

Iesu boepi oisewa sia wan

³⁰ At ame ae ve at Galili tau amon. Iesu wadiamot mega wadidiamopen anuni menan karaua amon amba anega wadiam wandin,

³¹ "Kimani Vitana Apanewa anavi waranege apan upi nanimu gwanap bat nimanege. Mu ne toguranegep bonigasepena amba wam yampa God aro mega gapan inak nigat sia yon waingain."

³² Go Iesu bop tapi oisewa waiwandin, wadiamot mega nop iwa ya anu kakayasene, tap tan. Menan singui da sia ya wayawane.

Iesu dugup mega gwanap da baware iragenawa?

³³ Ame amone, Iesu pa mega pa sewa Kaponiam gapan tauane. Amba Iesu wadiamot mega anega singui wayawamon, "Negin gagap dim da menan aigap waiwanian?"

³⁴ Go wadiamot nagire orup ansena bawarewa tata, mu negin gagap nop ap waiwanumune menan Iesu singui wani umam anune menan garewa ya wane.

³⁵ Iesu ap mepe ae wande wadiamot mega aonagaet pusinawan dere munan wan ine tauane anega wadiamon, "Da me yaumakayap bawarewa tat anupiwa me nao ega taini apanewa entanep!"

³⁶ Amba Iesu orup otu da wan namumup yonen. Ame ware tainamup bare anega wan,

³⁷ "Waenapan da da orup otu ma umap nenan waupepi ne den waupanek wanum. Waupanegepi negenat ya waupanek wanum go Mamana watu enane-geniwa den waupiwanum."

Evenan tainewa ge anavi tainewa gueguewa wadiamon

³⁸ Apan Dion Iesu wadien, "Ayop nuguwa, nu yawatoni apan da ge yauga gapan airampu wa oimuiwandin menan nu watanaton iwa me nu den ya inat nimamen."

³⁹ Go Iesu gare wadiamon, "Ae, ya watanane. Apan da amun nega gapan kiman paua da wa tapi ne ya wa koeragam nimanegeta.

⁴⁰ Iwa orup da da anavi ega ya tapi mu evenae waiawa.

⁴¹ Amba waenapan da da kaum kasi-gawa e ne wa ewamot nega menan enepiwa, ne tave di wadiaivin, ne inap

anu bambamat da uon, orup ame garewa mega kimani wareta.”

Ta pariset apanewa

⁴² “Go orup otu ma anu tumat ni manegini mini e anu tumat nimanegene go ta pariset apane koewa ta ewamopen menan naumo amopi, ap gapan ta pariset apane ame itan baware yaveta. Gwat itani dena megap pane puimani wat enep boepi ame umap di.

⁴³⁻⁴⁴ Menan ge nanigawa wat nauge ae koewa tapiwa, to ketnak aipa uat! Ap tom wapi gomunaet inak arewa ageawa ame kakae iwa ap ya tawa ge tawaga uruga yaibobot omae meravewa gapan uat enagain.

⁴⁵⁻⁴⁶ Ge pusigawa wat nauge ae koewa tapiwa, to ketnak aipa uat! Ap tom wapi gomunaet inak arewa ageawa ame kakae iwa ap ya tawa ge tawaga uruga yaibobot omae meravewa gapan uat enagain.

⁴⁷ Amba ge yamaga wat nauge ae koewa tapiwa, aoma wa totnak aipa uat! Ameme yamaga yamunaet inak arewa ageawa ame kakae iwa ap ya tawa ge tawaga uruga oma meravewa gapan uat enagain.

⁴⁸ Ap mepe mokare kaka waenapan wapimu pot pot di naiwanumain amba yaibobot meraovewa yagit mumiwanda.

⁴⁹ Ap mepe waenapan iragi oma yame yagimop God wanene mega gapan mu wawa sisi taiwanumain.

⁵⁰ Amba siuran kakae di, go dansewa mega menawaet ni nen garepiwa, ap gapan e anenen tane amba dansewa sia wata? Menan siuran ek gamuyap di wande ep, ap mini baigan nonup gare gare ta aisiwanian.” Iesu ap anega wan.

10

Meme waene dere seu ya enupen

¹ Amba Iesu at Galili ae ve ae amba at ginewa Diudia kaum Diodan asepagan dotou aen. Ap mepe waenapan aruga me ine sia tauane menan Iesu namu taini umap sia God noa wadidiam wandin.

² Ian Parisi nagire upi ine tauan pusi warup tap Iesu nop ebo wapen menan

singui wayawan, “Apan da waenewa tandayase ae vepiwa iup nugna paina yamaseta go?”

³ Iesu gare singui wayawamon, “Watageta apanewa Mosis iup namua baraeni anenen wan?”

⁴ Mu anega wane, “A, Mosis ok anega sen, Apan da waenewa ae veapen ogewa sepiwa gapan me, ok ame aroewa gapan, waenewa wa oisep aeta.”

⁵ Wane, Iesu sia anega wadiamon, “E imuya gware dena menan Mosis waen ae vemopen umap wan.

⁶ Go God ere mangan piup kiman tan venat mutane gapan, apān ge waen tamon.

⁷ God ap anega tani menan apan ine mame vemo waen da naisepi gapan,

⁸ mu dere tobottap etumu daiton entaneta. Ap gapan mu mini mini wanumone go endi mu daiton.

⁹ Ap menan God tobottamoni gapan wae-napan da seu ya enumop.”

¹⁰ Mu pa gwanap amone gapan, wadiamot megawa Iesu wani guegue wayawan.

¹¹ Me gare anega wadiamon, “Apan da waenewa ae ve waen da ugup sia naisepiwa me togane tapatap tata.

¹² Ap umap sia, waen da memewa ae ve apan da ugup sia naisepiwa me togane tapatap tata.”

Iesu orup otua wat aipakam mumen

¹³ Amba, waenapan upi otu waiwa bawarewa amba amapewa den Iesu naniwa iamup seapen menan tambun tauane, go wadiamot megawa diguguramon watanamone.

¹⁴ Iesu ame yawamoni gapan gari yaven anega diamon, “Orup otua ae vemone, nenan onamop, ya watanamone, iwa God toemu mega orup otua ma miniwa mugawa.

¹⁵ Ne tave di wadiaivin, e orup otu menawaet anu tumasine mini imuya yamu ya entanenewa, God toemu megawa ya tauai.”

¹⁶ Ame wani boge orup otu bumagap ma tambu naniwa wapimup se wat aipakam mumen.

Tamaru kwan puraput apanewa

¹⁷ Negina ap aiwandini apan da serarat taue namup omanip enu singui wayaven, "Wadianet kakaewa, ne map anenen tap amba yaibobot inagewa yon borain?"

¹⁸ Iesu gare wan, "A, dimen ne apan kakaewa dianegingi? Orup kakaewa da uon go God megenat kakae.

¹⁹ Ge God iup mega anuingi.
Orup da ya togura boep.
Wainan gogo ya taingen.
Up ya taingen.
Evenaga koewa da tani yawaana,
ame ebo aopan ugup ya enu yawa wain-
gan.
Imuga nop koe koe ya anuingan.
Amba inaga mamagawa ayamase ta
muningan.
Iup ap anega waiwan."

²⁰ Iesu wani apan ame sia wan, "Wadi-
anek apanewa, ne orup otunap waingena
gapan ne iup mame waran iravi ta ongin-
gin endi mame tauen."

²¹ Iesu apan ame yaveni imua pose inap
waren anega wadien, "Ge daiton da ya
taan. Age wan dim dim gegawa iragi ase
une ta amba moni ame kwan purapuse
uoni nagirewa mun. Amba ge kiman
kakae guragut megawa aupa evi amba
warai. Ap tawa amba ewanap onak."

²² Apan ameme piup puraput mega inap
arugataet menan Iesu wan anuni gine
namu en kukutume bagu sisi anu aen.

²³ Iesu waenapan ikukuk yawamoni wa-
diamot megawa anega wadiamon, "Pu-
raput nagirewa God toemu mega unuk
amopen ame inamup kaimakewa da di!"

²⁴ Ap anega wani gapan wadiamot
megawa seke tane. Iesu sia wadiamon,
"God toemu mega unuk amopen ame
kaimakewa da di!"

²⁵ Man bawarewa da, kainok ninoke
gapan unuk tau aepen tapi ame umap
uon. Ap umap, kwan purapuse dena
apane da God toemu mega unuk aepi ame
den umap uon go kaimakewa mega aigap
iragen."

²⁶ Wadiamot mega nop ame anune gop
baware anun anega wane, "Akae, God
toemu mega unugepen kaimakewa da di,

ap menan inak ewakewa da ware kimani
unugeta?"

²⁷ Iesu kem kem yawamoni gare anega
wan, "Waenapan muk ingane aro muga
tainewa gapan ya unugain, go God inap
kaimake den uon menan dim dim tat
anuinimek di tata."

*Iravi Iesu ewap amopi evi garewa
warain*

²⁸ Amba Pita Iesu anega wadien, "Ge
anu. Nu dim dim nuga iragi ae veat evigap
onanton. Garewa dim da warait?"

²⁹ Iesu gare anega wan, "Nop nega
mondi uon anun di waivin. Da da nenan
anu gure amba God No Oise Kakaewa
menan, pa o tase gwaniwa o domare
waiwa o mame waiwa o ine waiwa o otu
waiwa o nao mugawa, ae vemopi,

³⁰ mu garewa warain, ap omewa apane
nani yamunaet mini aigap sia vemoinewa
ame pa ge tase gwani o domare wai o
ine wai o otu wai o nao mugawa warain.
Amba mame gapan God nop mega anuyan
taiana menan waenapan wawa koko in-
ayap tain. Go inak eviwa taupei gapan
yaibobot inagewa warai.

³¹ Menan waenapan endi evi yonine
nagirewa, wam ame gapan, namu yonain.
Amba endi namu yonine nagirewa, wam
ame gapan, evi yonain."

*Iesu bop mega oisewa koni yampa sia
wan*

³² Ap mepe Iesu waenapan den tanam
neginaet Ierusalem amuiwanumun. Iesu
namu yone upam aiwandin. Wadiamot
megawa anu waramat anune amba wa-
enapan upi ta den amuiwanumun. Negi-
naet wadiamot mega aonagaet pusinawan
dere tambu asira sensenui ae amba me
inap dim dim venasepi oisewa anega wa-
didiem aiwandin,

³³ "Wapena anun. Nu pa Ierusalem
dot anivin, amba Kimani Vitana Apanewa
waranege amo pirisi bawarewa amba
waenapan iup waddiamuine mu nanimu
gwanap bat nimanegain amba togura-
negepen noa panain. Diu nagire wara-
nege Diu uoni nagirewa nanimu gwanap
bat nimanegain.

³⁴ Diu uoni nagirewa nipep dianege wa koeragam nimanegain. Giton en ana nege amba wagu gapan tonek wanumain. Amba toguranegep bonigatain go wam yampooa gapan inak nigat sia yon waniganin.”

Diemis ge Dion kirurup mugawa

³⁵ Apan Sebedi otu wai Diemis ge Dion Iesu ine tauan anega wadian, “Wadianiana apanewa, nu bagu sisi nuga menan mup inagap wata di ta nunai go?”

³⁶ Wane Iesu singui wayawamon, “Endi ne dim da da ta enat anuiwanin?”

³⁷ “A, yauga baware tap toemu gega kakae guragut den waingewa nu orup ansena da wa, da mainaga nutup gapan amba da wa senip gapan ae waninet, gapan nu den bawarewa tat.”

³⁸ Wane go Iesu gare wadiamon, “E dim da da asik ya tayan amba mup waiwanin. Ne bagu sisi kaumewa napena e den nai go? Ne itan ugu vegaek anu tanapena e den tanai go?”

³⁹ Mu gare anega wane, “E, nu den warait.” Iesu sia wadiamon, “Tave di e nai, amba ne itan ugu vegaek anu tanapena e den tanai.

⁴⁰ Go at mame muna muna Mamana tata kakayat ta muneni nagirewa mugawa.”

⁴¹ Iesu wadiamot mega aonagaeta na girewa, mup mame oisewa anune gapan tase gwani derewa inamup ugu gangan mutan.

⁴² Go Iesu munan wan tauane anega wadiamon, “E asigia, ian ugupe nagirewa bawarewa muga aro muga gapan itan muniwanum amba mu aroewa ap warane menan aton taiwanumun.

⁴³ Go e ap anega ya tane, da me yau makayap bawarewa tat anupiwa, me nao ega taini apanewa entanep.

⁴⁴ Amba da me namu yonat anupiwa, me nao ayamat enan tap.

⁴⁵ Ap umap sia, Kimani Vitana Apanewa piup nagirewa ta warit imae pen tauan, e ta warit nimanegegen ya tauan. Menan bop tapena waenapan koewa muga garewa mega iravi warain.”

Iesu yame boraseni apan Batimias wat inakamen

⁴⁶ Iesu wa ewamot mega tanamo pa Dieriko ae ve aiwandini, to iam baware da me ewap den amuiwanumun. Apan yame boraseni apanewa da, ap mepe negin etop, ae wande moni menan mup waiwandin. Apan ame yaua Batimias, Timias otua.

⁴⁷ Batimias Iesu pa Nasaret apanewa oniwandini oisewa anuni menan nop kaimakaet no ainagase senao anega wan, “Iesu watageta apane Devit naewa, bagu sisi nenan anu!”

⁴⁸ Waenapan aruga anega diguran, “Nop ae ve,” go me uma sia anega wan, “Apan Devit naewa, bagu sisi nenan anu.”

⁴⁹ Iesu ae yone anega wadiamon, “Wane onep.” Mu ase amon yame boraseni apanewa wadian, “Imuga potaga aro tap. Ao yon, Iesu genan waiwan.”

⁵⁰ Apan Batimias tumarim yon wande, wanup wa totnak aipa uarene Iesu ine tauen.

⁵¹ Iesu singui wayaven, “Ne inagap dim da tat anuingi?” Apan ame gare anega wan, “Ayop, ne yangut tat anuivin.”

⁵² “A, umap, ganawan ak. Ge anu tumat nimanegean menan inak gitaa.” Iesu ame wani, no utap apan ame yamewa ase watapen yangut ta neginaet Iesu ewap aen.

11

Ayop Iesu pa Ierusalem taueni gaune wan

¹ Iesu pa sewa dere, yaumua Betpadi ge Betani, maniwandiniwa sewa da ap mepe tunup yaua Oma Olip Yanane Tunupewa wakiap tauen. Ap mepe wadiamot dere watu énamo

² anega diamon, “Pa sewa namunup utapa ame aisen tauanewa, use tauan man donki otua da damiga taune yawai. Man ame gagap namu orup da ya amone. En vetan, wat onaen, mapa tauan.

³ Apan da anega wayawaepi, ‘E dim da taiwanin,’ e gare manega wadian, ‘Ayop nuga man donki menan wan tauaton amba gagap ae tauepi boge menawaet mapa sia watu eneta.’”

⁴ Iesu ap wani wadiamot mega amon man donki otua negin tonan ginap damiga taune yawan kwip vetan.

⁵ Vetane mondigawa nagirewa singui wayawamon, "Man otua dimen wat veswanin?"

⁶ Iesu namu wadiamoni nop ap sia wadiamone boge man waraben menan umap wan ame di wat amon.

⁷ Mu boge waran amon Iesu inewa tauan, amba wanup aigape muga da waran man donki gagap aoma baraene amba Iesu wat agoasene man donki ame gagap wanden.

⁸ Waenapan wanup mega aigape gaun wanapen men negina memegamene aen, amba Iesu taue gagap aen. Amba waenapan upi oma bae kaime den negin etop guran negina yogune gagap aen.

⁹ To iam baware ame namup onam wanumune amba evip onam wanumune den nomu ainagases anega waiwanumun, "Kaewa kaewa, gaun baware inagap, God wat aipakamini Ayopewa, God yaua gapan tauagi!"

¹⁰ Nu omayan baewa Devit amun mega sia waraan tauagi God wat aipakam gimasia. God paina wandiniwa yaua ao warivin," ap anega waiwanumun.

¹¹ Iesu pa Ierusalem taue God Paewa unuk ae dim dim iravi ikukuk yao nau aen. Mum gine taueni menan wadiamot mega aonagaet pusinawan dere tauanamo sia pa Betani amon.

Iesu oma baip dien

¹² Inane woup seni, pa Betiriem ae vean amon pa Betani tau amuiwanumune gapan Iesu enup aren.

¹³ Amba negin etop asirantu oma baip da yaven, me ae iap taueni, tavewa da ya yaven, go baewa megenat. Iwa makewa inini wamewa ya tauen.

¹⁴ Boge me oma ame anega dien, "Getavewa gega da waenapan sia ya nain!" Ap anega wani wadiamot megawa anune.

Une gare gare taine nagirewa wa oimon

¹⁵ Pa Ierusalem tauane boge Iesu God Paewa unuk aen. Ap mepe, wan dim dim muga gare gare une taiwanumune nagirewa gut oimon tau amone. Moni entan wantan taiwanumune watarewa me aie yamu tanamon amba watat gapan

mu nenip bairantan une taiwanumunewa den baime uatamen.

¹⁶ Amba waenapan God Paewa gwanap dim dim tam onam wanumat anune Iesu watanamon.

¹⁷ Amba me anega diamon, "God nop mega ok ap anega seane, Ne pa nega, waenapan ne inanap mup waine paewa.

Ok anega sean. Go e tayan up nagire pa muga karauawa mini entanen!"

¹⁸ Pirisi bawarewa ge iup wadidiamuine nagirewa den Iesu tani oisewa ap anune menan mu anenen ta togurapen noa barim wanumun. Go mu waenapan tamu anun iwa Iesu wadidiam wandini tarage waiwanumun.

¹⁹ Boge mum gine gapan Iesu amba wadiamot mega den pa sewa Ierusalem ae ve amon.

Oma baip dien wae ineni guegue wan

²⁰ Inane woup seni mumaget Iesu wadiamot mega sia onamon amba baip ine tauane ame visiwa gapan kurat wa dore wae inen yawan.

²¹ Wam ap Iesu anen wani Pita anu ase anega dien, "Tatan, oma ata yao! Wata diaana wae ine boen!"

²² Pita ap wani Iesu gare wan, "God inap anu tumasen.

²³ Ne tave di wadiaivin, e anu tumat ega wandeipiwa amba anu bambam ya tanewa, amba tunup inap anega wane, 'Ao yon asepa puimani geak,' ap anega diane ame di tata.

²⁴ Ap menan dim da menan anun mup God inap wanewa, namu gase warayana mini anu tumat tan, amba mup wanewa di eneta.

²⁵ Ao yona God inap mup waingawa gapan waenapan da koewa inagap tapi, ge koewa mega anu ae veawa, ge Mamaga kimaniwa koewa gega anu ae veta.

²⁶ Go waenapan da koewa muga anu ae ya veawa, ge Mamaga kimaniwa koewa gega anu ae ya veta."

Iesu amun mega iwa yop tan

²⁷ Amba pa Ierusalem sia tauan. Iesu God Paewa gwanap ap yone iwandini gapan pirisi bawarewa ge waenapan namu yoyo muga nagirewa den ine tauan

²⁸ anega wayawan, “Ge amun ansena da waran gapan dim dim mame taing? Amun mame, da genen?”

²⁹ Iesu gare wadiamon, “Ne singui nega daiton den, namu wayawain gare wadi-anegenewa amba da aro neneni gapan taina ame wadiain.

³⁰ Singui nega mam, Apan Dion dup i-a-muiwandiniwa ame amun mega aupa kimanis ware taiwandin go, gare mapu piupa waenapan upi inamup ware taiwandin?”

³¹ Mu iragi nop waran yaumakamup seyao wareyao muk inga ingane tan amba anega wan, “Endi nu kiman amun mega ware taiwandat wata, me anega dianeta, ‘E dimen Dion nop mega ya anu tumasiwanin?’

³² Go nu endi anega watawa, ‘Amun waenapan inamup ware taiwandin,’ wae-napan ma iragi gwara toguguranain iwa mu anune Dion me God watu eneni apanewa.”

³³ Ap anega anuiwanumune menan Iesu singui mega garewa anega wadian, “Dion amun ame wareni arewa nu oare.”

Menan Iesu anega diamon, “Ap menan ne den amun nega amba waran gapan ugup ugup ma taina oisewa ya wadiain.”

12

Iesu Diu bawarewa nagire munan maibe wan

¹ Iesu maibe noa anega wadiamon, “Maibe da sia wapena anun. Apan da taba gureip naewa vere sin ikukuk taun. Ni vtnagepen urasewa waren. Gopat tapen men dagurak paina tun. Egak mega kwayup tapen nagire munan wan tauane amat tapen men diamo amba me at da ugup aen.

² Maup wamewa taueni nao mega tainida maup semua tam onepen menan kwayup taine nagire inamup watu enen.

³ Egak taueni gapan kwayup taine nagirewa waran toin en mondi watu enane aen.

⁴ I apanewa nao mega taini da ugup sia watu enen ae taueni mu waran inamu tosisitnagen umam no mini tain en veane aen.

⁵ Nao taini apane da sia watu eneni togurane boen. Ap umap upi aruga sia

watu enamuiwandin go kwayup taine nagirewa yonan upi siget muniwanumune, upi gurane borit waiwanumun.”

⁶ “Amba nao i apanewa me otua daiton iragenawa megenat wandeni ame otua imua inap di wareniwa. Menan ui iragenawa, me otua inamup watu ene anega anun, ‘Mu ne otuna viripewa tain.’

⁷ Go otua inamup taueni kwayup taine nagire paina yawan muk ase ma anega wawa mutan, ‘Piup i apante otua oniwan. Apan mam iman egak ma yon boreta, menan anet togurat boep, amba egak mame boge nu yon borat.’

⁸ Menan waran sin garip uat enan togurane boen.

⁹ Ap menan wam ame nao i apanewa tauepi nao nagirewa inamup anenen tata? Tauepi, nao kwayup taine nagire gut momak mumeta amba egak mega waenapan upi munep kwayup tain.”

¹⁰ Iesu ayop nagire sia wadiamon, “God nop mega ok seane e batnagean. Ok ame ap anega waiwan,
Agim ame pa tuine nagirewa tandayasen,
koerage dian,
go God agim ame ware entanen amba pa
tuine danewa venasen.

¹¹ Ayop mame kakae di tani menan nu tarage waivin.
Ok ap anega sean.”

¹² Iesu ap wani Diu bawarewa nagirewa asigimup, Iesu gutut ame mu koewa muga menan waiwandin. Ap menan me wara-pen anune go waenapan tamu anune menan Iesu ae vean amon.

Moni seapen nopewa

¹³ Ian Parisi nagirewa amba Erodian nagirewa den, Iesu anenen i wabambamasepen menan nopewa panan. Menan wadiamot muga upi, Iesu ine watu enam-one.

¹⁴ Tauane anega wayawan, “Wadianet nugawa, nu asiginup ge waenapan muk anen wane taine ame menan ge imuga potaga ya wariniwa, go ge nop tavewa gapan God dim dim anuini om ap gapan tainampen neginewa wadianianawa. Menan nu singui nuga mam. At Rom ayopewa Sisa nu moni se wanata ame

gapan nu Mosis iup mega paina yamatait go uon?"

¹⁵ Go mu nanamaset wan taiwanumune Iesu me asigip tan, menan me anega wan, "E dimen wayawanek wanin? Endi moni gwat make da wat ewanegene yawap."

¹⁶ Mu gwat make da wat onamone. Iesu singui wayawamon, "Yawan, moni ame gamup da yaua o guewa wandia?" Mu gare anega wan, "Ame ayop Sisa guewa mega gamup wandia."

¹⁷ Menan Iesu anega wan, "Ap menan, wan dim dim Sisa mega wandepi ame Sisa di wanapen. God mega wandepi, ame God di wanapen." Nop ap anega gare wani menan mu no i kap wane.

Waenapan borit wane sia inak mutapen noa

¹⁸ Dugup Sadusi nagirewa, upi Iesu inap tauan. Mu dugup anu tumat muga gapan waenapan manega wadidiam wanumun, "Borit wata sia ya inak nitait."

¹⁹ Menan Iesu inap singui anega wayawan, "Wadianet nugawa, watageta apane Mosis nunan iup anega sen, 'Apan da otu uon boepi gapan me gwaniwa kwapura mega ame naise, tasewa uewa orup se wanep.'

²⁰ Endi apan upi tatap gwaniw yananeva nanin yamunaet yamunewa dere mugenat wanumon. Namu bonewa mugawa waen naiseni go me otu uon boen.

²¹ Menan gwaniwa ewap yaneni, tasewa kwapuraewa sia naisen. Gwaniwa orup da ya baraei amba sia boen. Gwaniwa yampooa kwapura ame sia naisen amba ap umap sia tan.

²² Ap anega ta amo wanumune dugup daiton apan nani yamu dere waen ap daiton naitan go iragi otu uon borit wane. Amba uiwa waen ame den boen.

²³ Ap menan waenapan upi anega anu tumat taiwanum, borit wane nagirewa sia inak muse yon wanumoin go endi apan nanin yamunaet yamune dere waen ame naitanewa wam uiwa gapan waenapan inak muse sia yon wanumopi waen ame apan ansenawa waenewa?"

²⁴ Iesu Sadusi nagirewa gare wadiamon, "E apan waiwanin iwa e ok seane asik

ya tayan amba God aro amun mega den e oare.

²⁵ Go waenapan borit wane evi amba sia yon wanumopi inak yaibobot eviwa gapan mu gare gare ya naine mutain den ore wai naine mutapen menan ya munain. Iwa mu anea umap kiman gapan wanumoin menan mu gare gare ya naine mutain.

²⁶ Inak muta muta nagirewa gueguewa ame God wataget wat arogamen. E, Sadusi nagirewa, namu batnageana go ya anuyan ame wataget wam da Mosis ap aiwandini oma ut yagit wandin yaveni God anega wadien, 'Omae baewa Eibaraam, otua Aisik, amba upewa Diekap, mu God muga daiton ame ne di.'

²⁷ Ap gapan endi nu asiginup ame waenapan kabaniwa ge borit wanewa mu God yamap iravi kabani wanumamun, iwa mu guamu den. Menan e nop ame aopan di waiwanin." Iesu ap anega wadiamon.

Iup baware iragenawa dere

²⁸ Sadusi nagirewa notatae gare gare waiwanumune waenapan iup wadidiamuini apane da yawamuiwindin. Mu singui wane, Iesu garewa kakaevet wadiamon anuni menan apan ame Iesu singui anega wayaven, "God iup mega ansena aigap iragenawa?"

²⁹ Ap wani Iesu gare wadien, "Iup aigap iragenawa ame. Isurero nagirewa, anun. Ayop God nugawa me megenat Ayop di.

³⁰ Amba ayop gega God, imuga potaga gapan, guaga gapan, epa guin pakao gega gapan, iak guine gapan, ae anu gura imuga warep.

³¹ Iup derewa ap umap sia manega. Gek genan ae anu guriana mini, evenak waiga pa mainagape wanumuine nagirewa munan den ae anu gura imuga warep. Iup dere mame aigamup aigap iragenawa da den uon."

³² Wani iup wadidiamuini apanewa Iesu sia wadien, "Wadianek negawa, nop gega tavewa di. Ayop nuga God me megenat God di tavewa daiton me megenat, me mainep God da den uon. Ge tavewa di waiagi.

³³ Amba ayop nuga God, imunu potanu gapan, guanu gapan, epara guin pakao nuga gapan, ian guine gapan, ae anu gurat imunu warep amba nuk nunan ae anu gurintoni mini, evenanu wainu pa mainanupe wanumuine nagirewa munan den anu gurinampen. Iup dere ameme baware iragen. Waenapan God men man irepi o garewa da ugup wanepi guegue ame gauarap go iup dere mame aigap iragen."

³⁴ Apan ame anut mega baware gapan wani Iesu anu gare anega wadien, "God toemu mega tonanewa nop yoningi, wandap uon." Iesu ap wani boge waenapan tap tan singui da sia ya wayawane.

God mega wa watu eneni Keriso noa

³⁵ Iesu God Paewa gwanap waenapan wadidiam wandini gapan singui anega wayawamon, "Iup wadidiaine nagirewa dim men anega waiwanumune, 'God wa watu eneni Mesaya me watageta apane Devit naewa?'

³⁶ Wataget amba di God Guewa Woup Seniwa apan Devit aro waneni gapan Devit Mesaya evi amba me denip mega gapan tauopen menan anega wan, God yone Ayop nega Mesaya anega wadien, 'Nanina nutup arigewa gapan ae wanigan-gan, ne anavi gega tambumopen aro gega gauarap wanumoin.'

God nop mega Devit ap anega wan.

³⁷ Nop ma gapan, Devit yone Mesaya inap me Ayop diwandin go Devit namu yaneni apanewa amba Mesaya evi yanen. Menan Mesaya ame Devit naewa megenat uon go aigapewa di." Iesu ap anega wani, waenapan atonu den anun.

Iup wadidiamuine nagirewa koewa mu-gawa

³⁸ Iesu waenapan manega wadiammon, "God iup mega wadidiaine nagirewa munan ae yao kakayesen amba yon iwanian. Ian ame mondi yonane wanup kakae guragut enane, waenapan ase yawamopen menan apan apan tainewa, amba taba une taine arewa

gapan amopi waenapan gaun munat anuiwanum.

³⁹ Amba den Diu opata waine paewa o barip gagewa gapan watat kakae iragena gagap wanumot anuiwanum.

⁴⁰ Go mu waen kwapura kaimakaet enu yawamon wane gapan kwapura puraput ge pa mugawa den tambune. Ap tane go mup paewa gapan waenapan yamamup muk ingane tap kakae tapen menan, God inap mup wa nonongaminewa. Koewa ap tainewa menan wanene muga kovet taine nagirewa wanene mugawa ame aigamup taueta."

Waen kwapura moni God inap ian garaet tan

⁴¹ Iesu Ierusalem God Paewa gwanap wandeni gapan waenapan God menan moni garaet enine arewa gapan eniwanumune yawamon. Puraput nagirewa moni aruga eniwanumune.

⁴² Den me yaveni inak daiton yaven kwapura koentu da taue moni mega den-deniwa dere otu uiwa ame enen. Moni ame baware uon.

⁴³ Iesu wadiamot mega munan wan tauane anega wadiamon, "Ne tave di waivin e anun, kwapura koentua ma yan mega tani arita, kwan puraput nagirewa yan muga tane gauarap.

⁴⁴ Iwa mu yan tanewa bondan muga omewa anun gapan tan. Go waen kwapura koentu mame kayawan tainiwa, evi ware na iniwanda wanda iragi yan taitamen."

13

God Paewa wat momagain

¹ Iesu Ierusalem God Paewa gapan tau aeni wadiamot mega da Iesu anega dien, "Wadianiana apanewa, pa baware ase yao gwat gapan tune kakae di tumone!"

² Go Iesu gare anega wadiamon, "E pa mame iragi yaviana menan nop nega anun. Wamewa da tauepi gapan anavi ega taupe pa ma iragi to bebenak ae seain, gwat da daiton didi batamene sia diriga aita ya wanumoin."

Wam verisiwa paua megawa

³ Wam ame evip, Iesu Oma Olip Yanane Tunupewa gapan wandeni, wa ewamot

mega, apan Pita ge Diemis ge Dion ge Anduru inap tauan wam ame paua anupen menan karaua singui wayawan,

⁴ “Wan dim dim arita mame andi amba venasiwadata? Amba wam verisiwa amba ge sia tauapen wamewa taiwandapina, paua mega dim dim da namu taue aiwandapina yavinain?”

⁵ Iesu gare wadiamon, “Agun anun wae-napan da da aopan wababayan imaepi tawa.

⁶ E yao kakayat amba wanien, da aopan wababayan imaepi tawa. Waenapan iman arugataet taue, amba anega waiwanumain, ‘Ne Keriso,’ amba arugataet ebo ewayain.

⁷ Ita anan tapi oisewa anui amba ita anan tapen tapi oisewa anui go tap ya anune. Ita anan ame iravi di taiwanumain go wam verisiwa ya taueta.

⁸ Ita anan agagae taue aiwandapina yawanewa, ame tap ya anu gurane. Wankakau ge puinunu amba inak aru ap mini namu venase di tau aeta, go wam uiwa ap mepe ya taueta. Go mame iragi itan bagu sisi erewa da.

⁹ Ek ingane kwayup ta aisiwanian. E ne dugup nega nagirewa menan, wanene taepen menan ayop bawarewa nagirewa ugup ugup namup tam nauyae amoin. Mame gapan, oitana wadidiamone Diu uon ian ugupe nagirewa den anupen menan.

¹⁰ God toemu mega No Oise Kakaewa at at iragi piup ma gapan wadidiam wanumampena amba wam verisiwa taueta.

¹¹ Go wam ame e tambuepiwa, dim da wawa menan gop ya anune. Iwa wam ame nop wapen tanewa God nop dim da enep di wai. Iwa nop ega da uon, go e Mamaya Guewa nop e gamuyap waiwandata.

¹² Ap wamewa gapan, tase gwani gare gare omine wap borit wain, amba ine mame muk orup mugawa omine wain, amba otu waiwa ugu gangan ine mame inamup tain, ap tapi gapan upi taue ine mame guramo boniga semoin.

¹³ Waenapan iragi nenan tandayat imayain, go e da da nenan tumban amun ae yonanewa, wam verisiwa gapan e inak warai.” Iesu ap anega wadiamon.

Wam koerage iragen oniwan

¹⁴ “Nop mame batnagine nagire batnagepi anu kakayasep. Apan da pa Ierusalem God Paewa wabigimepen menan guewa koewa iragen da wat tau endavep yawai. Ap yawanewa gapan, e at Diudia gapan wanienawa tap serarat aise tunupa dot aitai.

¹⁵ Amba apan da pa aigarip wandepi puraput mega warapen menan pa gwane ya aep, wam wakaumepi tawa menan tap aep.

¹⁶ Amba orup da egaga wandepi me wanup mega menan ewagai sia pa ya aep.

¹⁷ Wam ame inepi wamewa, kaiwan, waen bagu dena o orup otu ine amape nagirewa inamup kaimake den!

¹⁸ Tap aise aise bodu wamewa gapan mame iravi ya venasepen menan God inap mup waiwanian.

¹⁹ Iwa wam ame gapan ita anan bagu sisi baware iragen taueta, erewa gapan ma onin en endi mame tauini gapan ap mini da ya venasen, amba inak ap mini da sia ya venaseta.

²⁰ Menan wam ame God ya wat oninkamepo, waenapan iragi borit waitamepo, go om enumoni nagirewa mugenat munan wam ame wat oninkamen.

²¹ Wam ame gapan waenapan da anega wapi, ‘Yawan, Keriso ma tauen’ o ‘Atapa tauen,’ da ya di anu tumasene.

²² Iwa Keriso eboewa amba God noa tave uoni waine nagirewa taue yo paua aigap taiwanumain. God om enumoni nagirewa aopan wababayan mumapen taiwanumain.

²³ Menan agun anun. Dim dim iravi evi tauepi oisewa namu wadidiaen.”

Kimani Viseni Apanewa sia taueta

²⁴ Iesu sia wadiamon, “Ita anan bagu sisi baware wamewa ame uon tapi ame wam pumpuni ta, sisip taueta, amba siragam ganase sia ya wata.

²⁵ Buanae kimani aoma geomoin, amba kiman aroewa iravi erere goyago amoin.

²⁶ Wam ame tauepi ne Kimani Vitana Apanewa amun baware kakae guragut ganasewa nega den irikup nokap vitapena yawanegain.

²⁷ Amba anea nega watu enamopen, waenapan negawa piup etoa asiwa iragi wa upamoin.”

Wam verisiwa paua megawa

²⁸ “Oma baip guegue mega yawane gapan anun. Gua ewake topi yao anui, bodu wamewa konintu taiwan.”

²⁹ Ap umap sia, e wan dim dim mame tau aiwandapinawa, e anega anui, ne konintu tonana yonivin.

³⁰ Ne nop tavewa wadiaepen anun. Endi mame piupa yanane wanumamune nagirewa, wam muga gapan wan dim dim mame venat taue aep amba borit wain.

³¹ Piup ge kiman iman ise wat museta, go ne nop negawa di wande aiwadata.”

Iesu wam ansena sia tauepi nu oare

³² Iesu sia wadiamon, “Ne sia tauapena wamewa, orup da daiton asigip ya ditan, anea kimaniwa den oare amba ne den oare, go Mamana kimaniwa megenat asigip tan.”

³³ Ap menan nene yamam taiwanian, iwa e oare wam ansena Ayop ega taueta.

³⁴ Guegue da manega wain. Apan da pa ae ve daio aepi waenapan mega nao muga muga muneta amba tonan kwayup taini apanewa gopat tapen men die aeta.

³⁵ Tonan kwayupe taini apanewa ap umap e nene yamam tan. Pa i apanewa wam ansena entan sia tauepi e oare. Mum gine o mum gagewa o woup sese o munmaget wam ansena tauepi e oare.

³⁶ Aup boniga ya inane iwa me taue yawaepi tawa menan nene yamam taiwanian.

³⁷ Dim da inayap wana waenapan iragi den wadiamuivin. Nene yamam tan.”

14

Ayop nagirewa Iesu togurep boet anun

¹ Ap mepe Paina Yamaseni Baripewa ge Taba Buredi Ya Tutut Waine Baripewa wam dere namumup wanden. Wam ame gapan pirisi bawarewa ge iup wadidiamuine nagirewa den, mu anenen ta amba Iesu karaua ware togurapen neginewa noa panan waiwanumun.

² Mu anega wan, “Barip wamewa gapan Iesu ya warait iwa waenapan ita anan tapi tawa.”

Iesu paua da iap tan

³ Amba Iesu pa Betani gapan apan Saimon vek bo'o namu ware kakae tani apanewa pa mega gwanap wanden. Ame gapan waen da oma osewa da pokarik gapan enane, ame ware tauen, me tutua aigap iragen amba garewa mega arita iragen. Amba pokarik to dume Iesu iap damagen.

⁴ Iap wa damageni gapan ap mepe wanumune nagirewa upi ugu gangan tane menan noyam anega wane, “Iwa dimen kaum ame danamiwan?”

⁵ Oma ose tutu den mame une ta moni arugataet (300 aigap) wara amba waenapan purapuse uoni kayakayawan taine nagirewa munapen.” Mu waen ame inap ugu gangan tan kaimakaet wane.

⁶ Mu dim da wane Iesu imua gapan anuni menan gare anega wadiamon, “Waen ma ae veane anut mega gapan di taiwandan. Waen mame dim da inanap tani iwa den gapan di taiwan amba yaunewa mega kakae iragen.

⁷ E iman kayakayawan taine nagire den nimakamup tanam waniai, menan munat anune di munan. Go pot pot ne ya tanege waniai.

⁸ Iman bonigasepen tunegepi menan me oma ose tutu dena mame tasi di senenawan.

⁹ Ne tave di wadiaivin, ambagan da God No Oise Kakaewa ma piup iragi gapan wadidiamopi, waen mame dim da tani oisewa anupen menan wadidiam wanumain.”

Apan Diudes Iesu omine wan umap tan Iesu warapen

¹⁰ Amba wadiamot mega aonagaet pusinawan dere da yaua Diudes Iskeriot. Me pirisi bawarewa inamup Iesu omine wapen menan aen.

¹¹ Taueni mu aton anun moni garewa wanapen wa agiasen. Wam ap gapan Diudes arok da ware Iesu yan tapen menan amase taiwandin.

Iesu taba mega uiwa nan

¹² Barip yaua Taba Buredi Ya Tutut Waine Baripewa tugupen wamewa tauen. Wam ame gapan Paina Yamaseni baripewa guturewa taine menan waenapan man sip otua tambun guramone borit wan. Menan Iesu wadiamot megawa ine tauan anega wayawan, “At ansena gapan nu ane tata kakayat tat barip nugawa mame nat anuingi?”

¹³ Iesu pusi panamo anega wan, “Wapena anun. Aisen pa sewa ame tauan, apan da kaum undan wat aepi tautanan amba evip aisen, pa da dorepi den doran.

¹⁴ Pa i apane anega wadian, Wadianini apanewa anega wan, ‘Ne pa gwane ansena ange wadiamot nega den Paina Yamaseni Baripewa nait?’

¹⁵ Apan ame, pa gwane aigapewa baware da ame gapan watat iravi gaset tata kakayat tane amena ewaeta. Ap mepe taba wat iran.”

¹⁶ Ap anega wani menan, mu amon pa tauan amba Iesu wani no usewa gapan yao ge yao di amon. Amba pa ap me gapan Paina Yamaseni tabaewa, ap mepe wat iran.

¹⁷ Wam ame mum gine taueni, Iesu wa ewamot mega aonagaet pusinawan dere tanamo taba napen menan ae wanumon.

¹⁸ Taba naiwanumune Iesu anega wan, “Ne tavewa di wadiaivin, e daiton da ominana wapen taiwanin.”

¹⁹ Ap anune gapan mu bagu sisi baware di anun amba nop me inap daiton daiton singui wan, “Ayop, nenan waangi go?”

²⁰ Ap wane Iesu gare wadiamon, “Apan ame aonagaet pusinawan dere apane da yogup daiton taba dere nata apanewa ominana wata.

²¹ God negin mega, Kimani Vitana Apanewa gase wat neneni ap omewa gapan bonigatain, go kaiwan, ominana wapi apanewa itan baware yaveta!”

Iesu taba mega uiwa

²² Taba naiwanumune gapan Iesu taba buredi semua ware God inap gaun wa, wa paise wa ewamot mega mune, amba anega wan, “Tambun nan. Mame etunawa.”

²³ Amba sip ware God inap gaun wani munen iragi at nugut tan.

²⁴ Amba anega wan, “Kaum wain mame deninawa. Bonigasepena denip mame tau visepi gapan waenapan aruga koewa muga wat museta. Ne denina gapan God e waenapan mega agi ewakewa wa agiat imaeta.

²⁵ Wapena anun. Kaum wain mame ne sia ya nain go Mamana God toemu mega tauepi wamewa gapan e den tanae sia nain.”

²⁶ Wam ame God inap mu wak da wane boge mu tunup Olip dot amon.

Iesu Pita waboborepi oisewa namu wan

²⁷ Boge Iesu anega wadiamon, “Endi mum mame gapan e iragi ae venek tap aitai, iwa wataget ok map anega seane, Ne man sip kwayup taini i apanewa topena,

man sip mega punanan wat amoin.

Ok ap anega sean.

²⁸ Go ne bonigasep amba inak nigat yon waingepena ne at Galili gapan namu tauain e eyi amba tauai.”

²⁹ Ap wani Pita Iesu anega dien, “Mu iragi tap ae vege amoin, go genan ne tap ya angain.”

³⁰ Pita ap wani go Iesu gare wadien, “Pita, ne wapena anu. Endi ge wam koni yampoa gapan waboboranegewa amba kumkum wam koni dere nop wata.”

³¹ Pita kaimakaet sia anega wan, “Ae, ge bop tawa ne den di bonigatain, ne ya waboboragain.” Amba wa ewamot upinewa ap anega nomanagaet wane.

Iesu at Getsemani gapan bagu sisi anun

³² Amba Iesu wa ewamot mega den at yaua Getsemani amon, amba me anega diamon, “Mapa wanien, ne asirantu angep God inap mup wap.”

³³ Ame wani Pita ge Diemis ge Dion tanam asirantu amon, amba me bagu sisi anu taneni gapan bumage tuk wan.

³⁴ Boge Pita evene wai dere den anega diamon, “Ne bagu sisi aritavet anu tanan ap gapan bumagana vege waiwan. Mapa ne den tananegen wanien nene yamam taiwanian.”

³⁵⁻³⁶ Ap anega wani amba asirantu aen, amba me gine namu pia ae to kutnage mup anega wan, "Maman, ge aro dim dim tat anuana di tai, menan ge men anu gurawa, ugu vegaek anupena ao waseanek, go mame ne anut negawa uon go gek anuiana gapan di ta."

³⁷ Boge me entane ae wa ewamot mega inamu taue aup iniwanumune yawamon. Menan Pita inap anega wan, "E da wam airase daitona mini ne den tananege nene yamam ya tai?"

³⁸ Nene yamam tan, God inap mup wan, iwa pusi warup da inayap tauepi tawa. Iwa guanu epara tat anuiwan go etunu itani waiwan."

³⁹ Menan ae vemo ae mup koni yampooa uap sia tan.

⁴⁰ Wam ame, me sia entan taueni, mu aup iniwanumune yawamoni mu yamamu itani wan. Mu seke tane nop gare da wa wa uon.

⁴¹ Boge entane wa ewamot mega inamup taue anega wadiamon, "E aup inin kakayat din taiwanin? Yawan, wam nega onen di mananiwan, amba Kimani Vitana Apanewa waranege koewa taine nagirewa nanimup bat nimanegain.

⁴² Ao yonane anepen! Yawan, ominana wani apane mame tauia!"

Ita nagirewa Iesu to waran amon

⁴³ Iesu nop ame waiwandini gapan, apan Diudes wa ewamot mega aonagaet pusinawan derewa apane da tauen. Pirisi bawarewa ge waenapan dimae waine nagirewa amba iup wadidiamuine nagirewa den, waenapan aruga watu enamone ita gaut tambun tauane.

⁴⁴ Diudes, omin wani apanewa paua ta ewamopen menan namu waenapan anega wadiamon, "Apan ame gaune tap ua topenawa, ap me di waran."

⁴⁵ Tauane boge Diudes Iesu ine taue anega wan, "Wadianet nugawa, baigan ge inagap wandep." Ap anega wani boge ua ton.

⁴⁶ Ua toni ewap ita nagirewa Iesu kaimakaet wat natane.

⁴⁷ Ame gapan, da den yoneni apanewa kereba mega ware, amba pirisi bawarewa

ayop mugawa nao mega apanewa da darinewa to kuasen.

⁴⁸ Iesu apan aruga tauane ame singui wayawamon, "Endi, ne up apanewa mini waranegepen menan ita gaut den tam tauayan?

⁴⁹ Ne wam, wam God Paewa gapan wanigingina ya waranegean go endi waranegepen menan tauayan. Endi waranegeana God nop mega gapan oitana ok seane tavewa tauapen men taiwanin."

⁵⁰ Boge Iesu wa ewamot mega iragi ae vean tap amon.

⁵¹ Orup tamaru da Iesu ewap aiwandini ame wanup kakae da viri viri wareni, ap gapan ita nagirewa den warapen tane

⁵² go wanup mega wa totnagene ni aroga tap aen.

Iesu kansoro nagirewa namup yonen

⁵³ Amba Iesu kaimakaet waran nau pirisi ayop mugawa pa mega amon. Pa mega gapan waenapan iup wadidiamuine ge dimae waine nagirewa den iamen wanumon.

⁵⁴ Go Pita wandap isipa evi oniwandin amba Pirisi ayop mugawa pa mega nimakap arok da gapan tauen. Gwanap unuk aeni ame ita gopare taine nagire tanam wande irot menan oma tugun iram wanumun.

⁵⁵ Pa gwanap, pirisi bawarewa ge kansoro nagirewa uruga Iesu inap nop eboewa yoa tan nau amo togurep boopen menan taiwanumun.

⁵⁶ Apan aruga yonan ebo imup waiwanumune go Iesu ebo mega da ya tauatan.

⁵⁷ Uiwa gapan upi yonan ebo imup anega wane,

⁵⁸ "Apan ma namu da anega wani, 'Ne God Paewa wabenagep amba wam yampo gwanap negenat sia tu waborain.' "

⁵⁹ Go nop mame waiwanumune gapan, tavewa mini da uon.

⁶⁰ Boge pirisi bawarewa da ao yone Iesu anega wayaven, "Ge nop muga waine garewa wai go uon? Mu oitaga waine ge anenen anuingi?"

⁶¹ Go Iesu no uon wanden. Pirisi bawarewa mugawa me inap anega wan, "Ge God mega wa watu enageni Keriso go

uon? Ge God Kakae iragenawa Otua go uon?"

⁶² Iesu gare anega wan, "E, ne ap me di. Go ne wapena anun. Wam evi amba da, Kimani Vitana Apanewa God Aro Iragenawa mainewa nutup gapan ae waingepena amba irikup gagap sia tauapena yawanegai."

⁶³ Boge pirisi bawarewa wanup mega wabebenage anega wan, "Me God inap wawa koko taiwan! Iwa dim men koewa mega upine yoa tait?

⁶⁴ Me God inap wawa koko taini e gase anuyan. Menan e dim da anuiwanin?" Mu gare anega wan, "Me koewa mega garewa menan di boep."

⁶⁵ Boge mu gine namu gitona en anan toewanumun. Upi gine namu pan boran tuiwanumune ame nipep anega wan, "Ge God Keriso mega waingewa imugap anu wa, da togen." Boge ita nagirewa Iesu waran amon den to popounagene.

Pita Iesu waboboren

⁶⁶ Ap mepe, Pita pa nimankewa arok da gapan ae wandeni amba nao taine waenewa da tauen.

⁶⁷ Pita oma irasiwandini gapan waen ame Pita kem kem yave anega wan, "Ge Iesu at Nasaret apanewa tautana ingiana apanewa da."

⁶⁸ Go me iragi namumup wabobore anega wan, "Ge dim da waingiana ne oare." Ap wani boge ae tonan nop wandeni kumkum nop wan.

⁶⁹ Ap mepe nao taini waenewa ame sia Pita yave waenapan anega diamon, "Apan ase Iesu den iwandini apanewa da."

⁷⁰ Go Pita sia wabobore anega wan, "Uon, ne uon!" Wam koni otu da ewap, waenapan upi Pita anega sia dian, "Ge Iesu apan mega da di iwa ge den at Galili apanewa!"

⁷¹ Pita kaimakaet sia anega diamon, "Ne ebo wapena amba God ugu gangan mega yawap. Apan ame men waiana ne oare!"

⁷² Ap wani boge kumkum koni derewa wan. Iesu Pita nop namu anenen dieni boge anu aven, ame, "Ge wam yampo waboboranegai amba kumkum nop koni

derewa wata." Ame gapan Pita irip koevet wan.

15

Iesu ayop Pailat inap wat nau amon

¹ Woup sen pirisi bawarewa ge iup wadiiamuine amba dima waine kansoro nagirewa den, iravi Iesu inap anenen tapi menan wawa mutan. Mu waran pan nau amon piup Rom ayopewa Pailat wanana.

² Pailat Iesu singui wayaven, "Ge Diu nagirewa Ayop mugawa go?" Iesu gare wan, "E, ge ap me di waiagi."

³ Amba pirisi bawarewa enu yawan wan.

⁴ Apan Pailat Iesu sia wayaven, "Mu nop aru ma enu yawagene waine gare da wai go uon?"

⁵ Iesu no uon wandeni menan Pailat imua upese anun.

Waenapan Iesu boopen wane

⁶ Diu nagirewa gutut muga en en taine ame Paina Yamaseni Baripewa gagap, piup ayopewa, gwat noke apane da wae-napan om enu wapi gapan wat vesine tauen ainiwa.

⁷ Wataget apan upi bawarewa nagirewa inamup ita anan tane menan bawarewa nagire gare aian gvat noke sean. Wam ame gapan, dayakam taini apane da, yaua Barabas, gvat nokap baraene wande en.

⁸ Menan, wam ame barip aigap, wae-napan Pailat inap gvat noke orup da wat vesep tau aepen menan tauane.

⁹ Menan Pailat singui anega wayawamon, "E Diu nagire Ayop egawa Iesu enan ne wat vetapen tau aet anuiwanin go?"

¹⁰ Pailat singui ame wayawamon iwa imup anuni Diu nagire ayop mugawa Iesu anu koeamene menan wat onamon wanane.

¹¹ Go pirisi bawarewa waenapan wa datnak mumane menan Barabas wat vesep tau aepen wane.

¹² Pailat sia wayawamon, "Iesu e Diu nagire Ayop egawa waiana inap ne dim da tain?"

¹³ Mu kaimakaet anega wane, "Oma korosi gapan to endawane boep."

¹⁴ Pailat gare wan, "Iwa dimen boeta? Me koewa dim da tan?" Go waenapan

nop kaimakaet aigap sia waiwanumun, "Korosi gapan boep!"

¹⁵ Pailat waenapan aton anupen menan umap wan amba gwat noke apanewa Barabas wat vesen tau aen. Amba ita nagirewa diamone mu Iesu waran gaut gapan tone amba oma korosi gapan togurapen men wat nau amon.

Ita nagirewa Iesu inap nipec wan

¹⁶ Amba piup ayopewa ita mega nagirewa Iesu waran apan bawarewa pa mega gwanap amon. Ita nagirewa iravi ap mepe wanumone munan wan Iesu namup tauan.

¹⁷ Wanup mega waseasen ayop wanupe buinip pan wanen amba ipuni wagam waran iap tonat wanen.

¹⁸ Amba Iesu inap nipec anega wan, "Kaewa kaewa, Diu nagire ayop mugawa!"

¹⁹ Mu gitona en anan amba gaut da waran iap tone. Me namup omanip enun nipec den wa atonasen.

²⁰ Mu nipec diane ewap, wanup buinip pan wanane ame wabutunagen amba wanup mega sia pan wanen. Boge mu oma korosi gapan togurapen menan wat nau amon.

Iesu oma korosi gapan tobata men endawan

²¹ Wam ame gapan Saimon at Sairini apanewa at da gapan oniwandin. Me Aleksanda ge Rupas mamamua. Ita nagirewa Iesu oma korosi mega wat aepen menan nanamasen wane.

²² Amone at yaua Apan I Kaime Arewa (Iburu nop muga gapan Golugata diane) ap tauane.

²³ Ap mepe mu Iesu wapiwa vege ya anupen menan kaum wain oma baewa sisi dena den gottenak en wanane go me yamaet yave ae ven.

²⁴ Ita nagirewa Iesu oma korosi gapan to endawanewa amba mu wanup mega yan seapen menan kae otu da tan.

²⁵ Mumaget wam nani yamu degede wareni Iesu korosi gapan tobata men.

²⁶ Enu yawan wane ogewa oma ginap tobata men endawane ok anega seane, "Ma Diu Nagirewa Ayop Mugawa."

²⁷ Wam ame gapan up apane dere den oma korosi gapan gut batamene da Iesu naniwa nutup gapan amba dawa senip gapan dawamon.

²⁸ Wataget God nop mega ok seane tavewa tauen, Waenapan anega wan, Iesu koewa nagirewa den enam wanden.

Pa nagirewa Iesu nipec dian

²⁹ Waenapan tau ise amo tau use amo taiwanumune nagirewa no peromen Iesu inap nipec anega waiwanumune, "Yauapo, ge God Paewa tobenage amba wam yampo gwanap sia tut waana apanewa,

³⁰ menan gek ingane inagit, oma ae ve vit onak!"

³¹ Ame umap sia pirisi bawarewa amba waenapan iup wadidiamuine ge dimae waine nagirewa den nipec anega wane, "Me upi inak muniwan, go mek ingane inak ya wareta!

³² Me Isurero Ayop nugawa go? Oma ae ve visipi gapan nu yawat amba me inap anu tumatait." Ap uap sia, up apane den gut batam mumane ap anega nipec den me inap wane.

Iesu boen

³³ Wam ianupe wariwandini gapan, piup ame iravi mum tatarin tunu taue aeni amba wam airase yampa waren.

³⁴ Wam airase yampa wareni gapan Iesu nop uma ve anega wan, "Eli, eli, lama sabak tani." Ap anega wani guegue, "God negawa, God negawa, ge dimen ae venek agi?"

³⁵ Wam ame gapan, waenapan upi ap mepe yoniwanumune nagirewa nop ame wan anune, mu anega wan, "Me apan Elaidia vene waiwan."

³⁶ Amba apan muga da serarat ae kaum warupini wanupewa waren. Kaum sisi dena gapan ae antapene gerok ginap enu Iesu megewa pakaraeni men napen wanen. Apan ame anega wan, "Mapa amat tait, anse, apan Elaidia taue korosi gapan wat viseta go uon yawapen menan!"

³⁷ Iesu ve baware sia wani boge guewa tau aen boen.

³⁸ Ap wamewa gapan God Paewa gwanap wanup God wandini arewa tonan pan boriniwa aoma bebep wa vise ase ma wanden dere entanen.

³⁹ Ita yamewa apanewa Iesu korosi mega namup yone Iesu anenen boeni ase yaveni menan me anega wan, "Tavewa di, apan ma God Otua."

⁴⁰ Waen upi den paina yonan yaviwanumun. Yaumakamup waen Meri Makdalin ge Salomi ge Meri, apan Dioses amba evip yaneniwa apan Diemis dere inamua.

⁴¹ Wataget Iesu at Galili gapan wanden waen ameme ewap amon kwayup taiwanumun. Evi pa Ierusalem dot aeni gapan waen ameme, amba upi den ewap dot onamon.

Iesu etua dagupa baraen

⁴² Imana wagat wamewa menan taba endi bongamen tunun. Wam ame mum gine,

⁴³ apan Diosep at Arimatia apanewa me Diu nagire kansoro muga da ame tauke kansoro upine inap ayamat tainewa. God toemu mega amunewa inamup tauapen menan den amat taiwandin. Me epa ta apan Pailat ine ae Iesu etua menan mup wan.

⁴⁴ Pailat Iesu gase boeni oisewa anuni me no kap wan. Menan ita yamewa menan wan taueni singui wayaven, "Iesu gase boen go uon?"

⁴⁵ "E, me gase boen," ap anega wadieni menan Pailat Iesu etua Diosep wanat wan.

⁴⁶ Diosep wanup kakae ewake da nononga pepeku une tani gapan etua wa totnak wat vise wanup gapan viri viri ware amba dagup da gwat gapan kaitane gwanap baraen. Baraeni gwat pepeta baware da wabaim onamon tonan toboran.

⁴⁷ Iesu etua baraene arewa waen Meri Makdalin ge Meri apan Dioses inewa yawan asigip tane.

16

Iesu inakae sia yon wanden

¹ Diu nagirewa wagat muga wamewa uon tani Meri Makdalin ge Salomi ge Meri

apan Diemis inewa kaum ose tutu dena une tan Iesu etua enu iat anun.

² Menan wam pura bawarewa wamewa gapan woup seni mumaget iragen dagup yawapen amon.

³ Ame amone, negina muk anega wawa mutan, "Dagup tonanewa gvat da wabaim nuneta?"

⁴ Wane iwa gvat ame baware iragen. Tuan yawane gvat, gase wabaiman ase baraene yawan.

⁵ Dagup gwanap unuk amone, ap mepe apan tamari da yawane, wanup mega pomponu nononga pane amba at mainewa nutup gapan ae wanden. Yawane tap kaimamu doren.

⁶ Apan ame anega wadiamon, "Baguya ya arep. Iesu at Nasaret apanewa oma korosi gapan togurane boen baraene yawapen tauayan. Baraene arewa yawan. Inakae sia yon wanden mapa ya wandia.

⁷ Menan menawaet di aisen amba wa ewamot mega, apan Pita den, wadiamon. Me at Galili gapan namu taueta e evi amba tauai. Ap mepe namu wadiaeni arewa gapan wandep yawai," ap anega wadiamon.

⁸ Waen ame dagup ae veane nene yangwane den serarat amon. Waenapan da ya wadiamone iwa mu tap anune.

Nop da uiwa mam

⁹ Pura bawarewa gapan woup sese Iesu bop gapan yon wanden ewap, me namu Meri Makdalin inap venasen. Wataget waen ame airampu nani yamu dere potap unumone Iesu wa oimon tau amon.

¹⁰ Boge waen ame Iesu yaveni oisewa ae Iesu evene wai den tanamon ini ame wanumon bagu sisi anun irip turup waiwanumune tauue wadiamon.

¹¹ Waen ame Iesu inakae sia yon wanden yaveni oisewa wani mu ya anu tumasene.

¹² Ap me ewap, Iesu wadiamot mega apan dere ap pua amuiwanumune gapan Iesu gine namu ugup ta inamup tauen.

¹³ Taue sia aeni apan dere ameme pa Ierusalem entane sia amon wadiamot upinewa wadiamon go mu ya anu tumat muman.

¹⁴ Iesu uiwa megawa, apan mega aonagaet pusingawan daiton taba naiwanumune nimakamup ase venasen. Bop gapan sia yon wandeni waenapan da da yawane amba wadiamot mega wadiamone go imumu gware wan amba anu tumat ya tane menan Iesu upe diguguramon.

¹⁵ Amba me wadiamon, “Piup ginewa at at iragi aisen, waenapan Oitana Kakaewa wadidiamon.

¹⁶ Waenapan da da anu tumasep dup iamopi God inak ewakewa muneta. Go ya anu tumasepi God nemoro mega yawain.

¹⁷ Waenapan ne anu tumat nimanegepi gapan paua mame den ta amoin. Amun nega gapan airampu wa oimop tau amoin. Merimu tobayanep nop ewakewa ian uguge nagirewa waine mini wain.

¹⁸ Mokare warepi ya aramota amba iapa da napi ya borit wain. Nanimu vek nagire wapip sepi inak mutain.” Iesu ap anega wan.

¹⁹ Ayop Iesu nop mame wadiamon uon tani ewap God aro mega gapan kiman dot ae God mainewa nutup gapan ae wanden.

²⁰ Boge wadiamot mega tauan at at asiwa donewa iragi amon, Nop Oit Kakaewa waenapan wadiamone. Mu opata wadidiamone gapan Ayop muga aro mega munen ap menan kiman paua ugup ugup den taiwanumune. Paua ugup ugup yawane menan waenapan mu opata muga anu tumasen.

LUK Apan Luk Iesu inak mega guturewa sen

¹ Ae, apan nega Tiopilas, gaun nega inagap waian. God waenapan nimakanup ugup ugup taiwandini no oise seapen men waenapan arugataet tayao wareyao tanau amuiwanumun.

² Ok ame seanewa, mu Iesu den tanan erewa gapan mu iwanumune den yawiwanumune amba no oise waiwanumune nagirewa, inamup nu anutoni ame seane, da ugup ya seane.

³ Ap menan, Iesu guturewa ere ibariwa gapan, ameme ne ae yao anu kakayasepen men anu guran taingina. Ap menan, ayop nega Tiopilas, kakaewa ameme, nop oit ame se genat anuna.

⁴ Iwa, nop oit ame gapan, ge asigip tagep, ame nop anenen anuana, ame nop tavewa di, menan ok mame sivin.

Apan Dion dup iamuini apanewa yanapen tani oisewa

⁵ Wam da, apan Erot at Diudia ayop muga ta wandeni wamewa gapan, ap mepe Diu pirisi apan da yaua Sekaraya wanden. Me dugup Abaidia apanewa. Me waenewa, yaua Ilisabet, mu dere pirisi nave taine dugupewa naewa.

⁶ Apan Sekaraya waenewa Ilisabet dere mu kakaevet ta amuiwanumune iwa mu God iup mega iravi ayamase tainewa.

⁷ Mu dere otu uon irak mutane, iwa Ilisabet orup da ya wara wara mini. Mu en nononga otu uon wanumoin en aeta guramon.

⁸ Wam da, Sekaraya dugup mega nagirewa nao semon taiwanumune, menan me pirisi nao muga God men tainewa ame taiwandin.

⁹ Menan, dugup mega guegue muga gapan, apan Sekaraya om enun wane God Paewa unuk ae tutu dena omaewa iu iriwandapen dien.

¹⁰ Ame oma tutu dena iu God Paewa gwanap irapen wam airasewa ame taueni menan waenapan iragi tauan God Paewa sin panane gwanap, iamen, God inap mup taiwanumun.

¹¹ Wam ame gapan, Sekaraya God Paewa gwanap wandeni, oma tutu dena iu irine watarewa mainewa nutup gapan God anea mega da ap mepe ase venase yoniwandin.

¹² Apan Sekaraya anea use yaveni, me imua puk wan tap ase anu guren.

¹³ Go anea anega wadien, "Sekaraya, tap ya ta. God inap mup waingiana anu gimagiwandin. Menan waenaga Ilisabet iman orup apan bat geneta, ame ge yaua Dion diai.

¹⁴ Me yanepi ge aton anui amba imuga potaga tarep wareta, amba den waenapan aruga daramumu wata!

¹⁵ Iwa orup ame God yamap bawarewa tata kaum wain go kaimake dena kaumewa upi ya nata. Orup ame inewa potap wandeni wamewa gapan God Guewa Woup Seniwa imu pose no dotoueta.

¹⁶ Me at Isurero nagire aruga Ayop muga God inap imumu wat entan mumeta.

¹⁷ Watagenta apante Elaidia aro amun mega ap umap Dion wa taiwadata. Waenapan wadiamopi gapan mame waiwa entane otu waiwa munan sia onamoin. Amba God tandayasine nagirewa entane kakaewa nagire ewap amoin. Ap anega tapi gapan waenapan iragi bongam bongam ta Ayop sia tauapen menan amasewa ta wanumoin."

¹⁸ Amba Apan Sekaraya anea singui wayaven, "Otuna oisewa wadianegiana tavewa di wandepi ne anenen ta amba asigip tain? Ne waenana dere aeta guranen."

¹⁹ Anea gare anega wan, "Ne Gebero, God namup yonina apanewa, ame God watu enanegen, nop oit kakaewa mame wadiagepen ongen."

²⁰ Wapena anu. Nop nega evi amba tavewa di tauepi noa ya anu tumaseana menan nok borasep wanigai, otuga yanepi amba nop sia wai." Anea ap anega wan.

²¹ Koni ap gapan, waenapan iragi Sekaraya menan pa garip amat wanumon anu bambam taiwanumun, iwa di menan Sekaraya pa gwanap nononga wandia.

²² Wanumone, Sekaraya pa garip ma taué oneniwa, nop wapen tani umap uon

no borasen. Ap menan waenapan anega anun pa gwanap paua da utupa yaven. Me nop wawa umap uon menan naniwa gapan guegue ta ewamuiwandin.

²³ Me God nave taitameni amba pa mega aen

²⁴ Mame ewap, Sekaraya waenewa Ilisabet bagup tani. Ap menan, siragam nani yamunaet pa mainan bore wanden.

²⁵ Ap gapan Ilisabet mek anega wan, "God bagu sisi nenan anu ago neneni iwa ne orup ya seana menan umam nega waenapan yamamup wat musen."

Iesu Keriso yanepi oisewa taua aen

²⁶ Ilisabet bagup tani siragam mega nani yamu daitonawa gapan God anea mega Gebero watu enen at Galili pa yaua Nasaret tauen.

²⁷ Ap mepe waenoror ini denawa, yaua Meri, iniwandin. Apan Diosep, watageta apane Devit naewa, ganganasen.

²⁸ Anea ame waenoror inap taua aenega wan, "Nonup inagap wandep. God ge inagap wandia amba wat aipakam gimaginewa."

²⁹ Go Meri nop ame anuni bagua aguren, iwa anea nop wani ase anu bambamase anega anuni, gaun ma tavewa dim da.

³⁰ Anea sia wadien, "Meri, baguga ya arep, iwa God garaet mega inagap tauen.

³¹ Nop ma ae anu! Ge iman bagup tai orup apan barewa amba yaua Iesu diai.

³² Otuga Ayop bawarewa tata, yaua dawa God Paina Iragenta Otua diaine. Amba God, omae baewa apan Devit ayop tani umap, God Iesu ware apan Devit watat mega gagap barep ayop ta wandeta.

³³ Menan Iesu, apan Diekap naewa megawa, ayop mugawa wande aiwandata amba Iesu toemu mega no ya utu taeta."

³⁴ Gare Meri anea ase anega dien, "Ne waenoror wanik anginawa, inak arita mame inanap anenen venaseta?"

³⁵ Anea gare anega wan, "God Guewa Woup Seniwa inagap taueta, God amun mega to umageta. Ap gapan digumin tai amba otuga yanepiwa God Otua, posewa woup seni apanewa diain.

³⁶ Wapena anu. Ge asigigap dugup gega waenewa Ilisabet, aeta ton go me bagup

tan. Waenapan otu uon iragaet diane go endi me bagup tan wandini siragam mega nani yamunaet yamu daiton.

³⁷ Iwa God inap kaimake den uon, me aroe amunu den, dim dim wapi venaseta."

³⁸ Meri anuni sia wan, "Umap. Ne Ayop ayamat mega taina waenewa, menan ge anenen dianegeana inanap di venaseta." Meri ap wani amba anea ae ve aen.

Meri Ilisabet inewa daio aen

³⁹ Wam ame gapan Meri menawaet yon wandeni boge tunup arige, at Diidia gapan, pa da ap mepe aen.

⁴⁰ Ame taueni, apan Sekaraya pa mega unugen amba Ilisabet gaune tan.

⁴¹ Ilisabet Meri gaun mega anuni gapan Ilisabet orup potapewa vitagen doragen tan anun. Ap tani Ilisabet imu pose iragi God Guewa Woup Seniwa bararaen.

⁴² Menan Ilisabet Meri inap kaimakaet anega wan, "God wat aipakam mega inanup viseni gapan wat aipakam aigapewa ge waraan. Amba orup barewa den wat aipakameta!"

⁴³ Den Meri inap anega wani, "Ne kakae uon go Ayop nega inewa yawanegépen tauaana menan ne aton anuivin.

⁴⁴ Ame menan ne gaun gega anuna gapan otuna bagunape atonu den vitagen doragen tan.

⁴⁵ God genan ta wadiageni tavewa tauaepi ge anu tumaseana menan wat aipakam gíImagen."

Meri wak mega gapan God wa atonaseniwa

⁴⁶ Boge Meri God menan anega wan, "Imuna gapan God wa taragasiniv.

⁴⁷ God wat inakam nimanegeniwa menan inap atonua anuivin.

⁴⁸ Iwa, ne me nao mega waenewa, ne umap uon, go me anu nimanegen.

Wam endiwa mame use aeniwa gapan, waenapan iragi anega dianegain, 'Ge God wat aipakam gíImageni waenewa.'

⁴⁹ Iwa God aro amun apanewa aigap iragenawa,

inanap ugup ugup tani menan.

Tavewa di, me yaua woup am sen.

⁵⁰ Naewa naewa yan aiwandata,

iravi God inap anu gure wa taragase ta amuiwanumampina,
menan mu bagu sisi muga anuiwandata.
51 Me amun mega waenapan wa ewamon. Apan apan muk ingane wat wane taine nagirewa,
me gut marimeta.

52 Amba den piup namu yoyo taine nagirewa yaumu aoma waren,
go kayakayawan taine nagirewa yaumu ao waren.

53 Enup aramuine nagirewa wan dim dim kakaewa munen,
amba puraput dena nagirewa mondi up oimon amon.

54 Me nao nagire mega, ian Isurero ago munen.

Me imu ya oaraen go wat agoat nimanen.

55 Ap menan nu, omayan baewa Eibaraam,
ge naewa naewa mega wande aeniwa den,
nunan bagu sisi anu wa agiat nimaneni,
endi mame tauen.”

56 Menan Meri Ilisabet tane ap mepe iniwanumune siragam yampo uon tani amba entane pa mega sia aen.

Dup iamuini apanewa, yaua Dion, yanen

57 Ilisabet orup bare bare wamewa taueni me orup apan baraen.

58 Pa nagire, dugup mega den, yaneni oisewa anune tautanan aton tan, iwa Ayop Ilisabet menan anu gureni gapan, inak kakaewa ame ta waneni menan.

59 Orup ame ae yane wandeni, wam nani yamu yampa uon tani, orup apan ame mu waran etua tum tap God dugup mega entanepen menan amon. Mu orup ame wagup mamewa yaua Sekaraya diat wane.

60 Go inewa anega wadiamon, “Uon, orup ma yaua Dion diapen.”

61 Waenapan yonan anega wane, “Ame anenen? Ge dugup gega gapan wagup da ap anega uon.”

62 Sekaraya no borasen wandeni menan waenapan paua ta ewasene, dim wagup da wadiamopen menan tane.

63 Menan orup yaua sea sea onaewa menan wan. Mu wat wanane amba kem kem yaviwanumune. Apan Sekaraya ok

anega sen, “Me yaua Dion.” Seni waenapan ok mega yawane no i kap wan.

64 Ok seni boge Sekaraya noa borat wandeni nop wan. Meriwa itani wani bem wan boge nop ere God wa atonasen.

65 Pa nagire ap yawane menan tap gop anu gurane seke tan. Ap gapan ian Diudia, tunupa wanumuine nagirewa, inak mame oisewa anune menan nopewa panan wane.

66 Amba waenapan inak mame oisewa anunewa, anu waramat tan manega waiwanumun, “Orup ma kai warepi anenen taiwandata?” iwa mu anune Ayop God aro amun mega orup inap wandia.

Apan Sekaraya wak gapan God wa atonasiwandin

67 Boge God Guewa Woup Seniwa, Sekaraya potap tauue aro amun waneni gapan wam eviwa noa namu anega wan,

68 “Nu Isurero nagirewa ayop nuga God wa atonasivin.

Inanup tauue vetanen.

69 Watageta apanewa Devit, me God nave tainiwa,
dugup mega gamup wat inakam nimanini
apanewa,
da inanup watu enen.

70 Watageta God no oise waiwanumune,
imu pose woup am seni nagirewa,
dim evi tapi oisewa anega wan,

71 ‘Anavi nuga amba anu koeam nimanine
nagirewa,
aro amun muga gapan vetaneta.’

72 Anega taiwandapina,
nu omayan baewa wataget munan bagu
sisi anuni menan,
wa agiat mumeni ame imu ya oaraen.

73 God nu omayan baewa Eibaraam inap
anega wa agiasen,

74 ‘Anavi ega aro amun muga gapan ve
taepenawa,
ame gapan e nao nega tai, ap gapan tap da
ya anune.’

75 Ame gapan, nu wam wam pot pot
imunu woup am sep,
ge kakae guragut God namup yonat,
inat wainet nuga gapan tainampen.

76-77 Sekaraya God nop mega ame wani
sia orup Dion anega dien,
Otunawa, God ge God Paina Iragenawa,

nop mega waingawa, otua diageta.
 God waenapan megawa koewa muga anu
 ae vepen,
 inak ewakewa munapen neginewa wadi-
 amuingai.
 Ap taingawa gapan Ayop nuga neginewa
 namu waringapina,
 me amba taueta.

⁷⁸ God nugawa bagu sisi nunan anuiwan,
 kaimakaet ya dianeta.

Menan wam ganat mega ewa enuini mini,
 God om enuni apanewa, inanup taueta.

⁷⁹ Ap wamewa gapan waenapan sisipu
 inine nagirewa,
 amba bop tawa taine nagirewa ganat
 nuneta.
 Amba baigan negine gapan tam naune
 aeta.”

⁸⁰ Orup mega Dion Guewa aro wan-
 wandini gapan kai ware doriwandin.
 Isurero nagirewa ere wadidiamopen men
 at kaimewa gapan iniwandin eni amba
 aroga tauen.

2

Iesu yaneni guturewa

¹ Wam ame gapan, ayop bawarewa
 Sisa Ogastas, toemu mega at Rom gapan,
 nop baraen, waenapan iragi batnak
 mumapen, yaumu buka aritawa gapan
 enapen menan wan.

² Apan Kwirinias at Siria ayope taiwan-
 dini ap wamewa gapan namu batnak mu-
 miwanumun.

³ Ap menan, waenapan iragi pa sewa
 muga muga iragenawa amon. Yaumu
 buka aritawa gwanap enapen amon.

⁴ Menan, apan Diosep den yon wande
 pa sewa Nasaret, at Galili gapan ae ve
 amba pa sewa mega iragenawa Betiriem,
 at Diudia gapan, dot aen. Iwa Diosep
 watageta apane Devit dugup mega naewa,
 amba watageta apanewa Devit pa sewa
 Betiriem gapan yanen.

⁵ Diosep Meri naitapen menan wat
 nugut veane wanden, ap menan mu dere,
 yaumua buka aritawa gwanap enapen
 menan Betiriem amon. Meri bagup tan,
 orup baraepen menan taiwandin.

⁶ Ap mepe, Betiriem gapan wanumone,
 orup bare bare wamewa tauen.

⁷ Go pa gwanap ina ina at arok umap
 uon, iwa waenapan aruga tauan at
 warane umap tan. Ap menan man kao
 paewa amon. Orup mega namua apan
 baraen, wanupa wa panamen amba man
 kao taba naine arewa gapan ae baraen.

Anea man sip kwayup taine nagirewa inamup tauen

⁸ At ame gapan, man sip kwayup
 taine nagirewa muma pua uta man muga
 kwayup tamuiwanumun.

⁹ Boge Ayop God anea mega da inamup
 venasen. God ganat mega ine maine
 ikukuk ganase wan. Tap nene yangwan
 doramon.

¹⁰ Go anea anega wadiamon, “Tap ya
 tane. Wapena anun. Ne nop oit kakaewa
 da wat ongen, waenapan iravi anupi aton
 aigap iragen anuin.

¹¹ Iwa endi mame, apan Devit pa sewa
 mega Betiriem gapan, wat inakam imaini
 otua gase yanen. Me Ayop di, God mega
 wa watu eneni Keriso.

¹² Ne paua ma ewaingina gapan pa
 aisene, ame orup wanupa wa panamen,
 man kao taba naine arewa gapan ae
 baraene wandini yawai.”

¹³ Anea ap anega wani boge upine ki-
 maniwa barat mutan, anea namua tanan,
 God inap anega wa atonasen,

¹⁴ “God kimani paina iragen yaua ao
 warivin. Piupa wanumuine nagire aton-
 amu anuini gapan, God baigan mega
 warain.”

¹⁵ Ap anega wane anea kimani sia dot
 amon. Man kwayup taine nagirewa anega
 wawa mutan, “Pa Betiriem anepen inak
 mame venaseni oisewa Ayop wadianeni
 yawapen.”

¹⁶ Ame boge ao yonan, irut yani amone.
 Amone tauan, Meri ge Diosep amba orup
 mugawa, man taba naine arewa gapan ae
 baraene wandeni den yawamon.

¹⁷ Ame orup mame yawanewa, anea
 gaset orup mame nopewa anen wadia-
 moni iragi ase wat senamene.

¹⁸ Man sip kwayup taine nagirewa oit ame
 wane waenapan anune no i kap wane.

¹⁹ Go Meri inak kakae iragen mame venaseni menan imua upe se wande anui-wandin.

²⁰ Man sip kwayup taine nagire entan sia amone. Anea anen wadiamoni inagewa yawane menan God yaua ao waran, wa atonasiwanumun.

Me yaua Iesu diane

²¹ Wam nanin yamunaet yamunewa yampo uon tani ewap, Iesu God dugup mega intum tapen menan paua mega etua tunane amba yaua Iesu dian. Yaua ame anea namu dien amba inewa evi digumin tan.

Ine mame Iesu waran pa Ierusalem amon

²² Amba Diosep ge Meri, apan Mosis iup namua seni kwayup tapen menan naninan ta dup iapen wamewa tauen. Amba Iesu God ire di wanapen menan pa Ierusalem dot amon.

²³ Iwa wataget God nop mega ok anega seane, Orup namua apan yanepiwa ame Ayop God ase ire di wanep.

²⁴ Nop mega den anega wan, Orup yaneni menan nenip bugip dere, o bairantan otua dere tambun gut iran, God wa atonasen. Iesu ine mame, iup mame tapen menan Ierusalem dot amon.

²⁵ Wam ame gapan, ap mepe Ierusalem gapan, apan da yaua Simion iniwandin. Me apan kakae iragen iwa God men pot pot anu taiwandin. Isurero nagirewa ao sia wat nagat mumapen menan amat taiwandin. Ap gapan God Guewa Woup Seniwa Simion inap den wandiwindin.

²⁶ Guewa ame Simion namu manega wadien, God mega wa watu enepi Keriso namu tauep yavepi amba Simion boeta.

²⁷ God Guewa wadieni menan Simion God Paewa gwanap aen. Amba Iesu ine mame apan Mosis iup baraeni gueguewa tapen menan God Paewa gwanap Iesu wat amon.

²⁸ Amba Simion amawa Iesu bumagap ma wareni boge God inap anega wa atonasen,

²⁹ Ayop negawa, wa agiat nimaneggeana tavewa tauia, menan endi ne nao gega taina apanewa,

baigan gapan bonigatain.

³⁰ Iwa inak ewakewa nunepi, otua watu enaana mame, nek yamanap ase yaviangin.

³¹ Ame ge gaset waenapan iragi menan anu ta baraean.

³² Orup ma ganat otua, Diu uon ian ugape nagirewa, ganat mega gapan guegue gega yao anu awain.

Me Isurero gapan yaneni menan ian ugupewa nagirewa, nu ian Isurero nagirewa, wa atonat ni-manain.

³³ Simion Iesu oisewa ap anega wani menan ine mame dere no i kap wane.

³⁴ Simion Iesu ine mame wat aipakam mumeni amba inewa Meri anega wadien, "Wapena anu. Otuga mam Isurero nagire aruga upi wat momak mumapen, amba upi wat inakam mumapen menan God watu enen. Me God ire yaoyao paua mega da go waenapan aruga wawa koko tain.

³⁵ Ap wawa koko tapi imumu koeragewa ame wat arogameta. Amba ita enugin vegewa anuiana umap bumagaga enup vegewa anui." Ap anega wadien.

Waen Ana Iesu yaven

³⁶ Ap mepe God nop mega waini kwapura da yaua Ana iniwandin. Me dugup yaua Asa. Me mamewa yaua Panuero. Me waen aeta di, wataget waenorini dena wandeni gapan apan naisen, en nani yamunaet nani yamu dere den iniwandin, amba memewa boen.

³⁷ Ap gapan me kwapura ta wandeni en mega apane degede, amba apan da naniwa degede (84) uon tan. Me Ierusalem gapan God Paewa gwanap pot poraet aiwandin. Mum wam pot pot God wa atonasepen menan mup waiwandin, amba wam da da gapan taba virip taiwandin.

³⁸ Simion nop mega uon tani amba waen Ana taue God wa atonasiwindin. Amba den Ierusalem gapan wat inakam mumapen menan amat taiwanumune nagirewa, Iesu oisewa wadidiamon.

Iesu ine mame pa Nasaret entan amon

³⁹ Diosep ge Meri orup muga ewake yaneni menan God iup mega iragi tane

uon tani amba, at Galili pa muga Nasaret ewagai sia entan amon.

⁴⁰ Amba Iesu aroe den kai wat doriwandin. Me i namu iragi dima opata no dotouen, amba God kakae guragut mega iragi aigap visiwandin.

Iesu peruk peruk wardeni Ierusalem God Paewa aen

⁴¹ En da da gwanap Iesu ine mame barip yaua Paina Yamaseni Baripewa napen menan pa Ierusalem dot amuiwanumun.

⁴² Iesu en mega aonagaet pusinawan dere taeuni gapan mu barip ame menan Ierusalem sia dot amon.

⁴³ Barip uon tani ewap, ine mame entane ewagai pa sia amuiwanumune, go Iesu Ierusalem gapan warden ae ve amon, go ine mame da ya anune.

⁴⁴ Mu anega anun, ‘Orup den anivin.’ Menan wam daiton uon tani amba, anu awane menan, den tanam amuiwanumune nagirewa ge dugup muga nagirewa potamup, Iesu menan yop tan.

⁴⁵ Yop tane ya yao matagamene menan pa Ierusalem ewagai sia entan amon. Tauane Iesu yoa tane.

⁴⁶ Wam yampo uon tani amba God Paewa gwanap yao matagamen. Iesu ap mepe, wadidiamuine nagirewa nimakamup ae wande singui gare gare wawa musiwanumun.

⁴⁷ Iesu nop waiwandini anune menan, waenapan no i kap wan, iwa me nop anu kaonage garewa waiwandini menan.

⁴⁸ Ine mame yawane seke tan, amba inewa singui wayaven, “Otunawa, ge dimen map anega tanean? Mamaga dere gop yaginen yoga tainton.”

⁴⁹ Iesu gare wan, “Dimen yona taiwanin? Ne Mamana Pa mega gwanap wanik angina, e anuiwanin go?”

⁵⁰ Iesu nop ame wani mu da ya di anu awane.

⁵¹ Boge Iesu ine mame nomu ware ao yon wande tanam Nasaret vit amon. Go inewa inak ap iravi anu tam se doriwandin.

⁵² Iesu kai wariwandin anut mega baware taiwandin. Ap gapan, God ge waenapan iravi den Iesu menan atonu anuiwanumun.

3

Dion Iesu neginewa wariwandin

¹ At Rom bawarewa da, Taibirias Sisa, en mega aonagaet pusin yamunaet (15) ayop taiwandini gapan, gauarape mega upi at Isurero ayope taiwanumun. Gauarape nagire yaumua apan Pontias Pailat, at Diudia ayopewa, ge apan Erot, at Galili ayopewa ge Erot gwaniwa Pilip, at Ituria ge Tekonaetis ayopewa, ge apan Laisanias, at Abilini ayopewa.

² Amba ap wamewa gapan, apan Anas ge Kayapas pirisi ayop muga taiwanumun.

Wam ame, Sekaraya otua, Dion, at kaimewa gapan iniwandin. Ap mepe, God nop mega me inap tauen.

³ Inap taueni menan kaum Diodan arige tau ge tau ae opata anega waiwandin, “E koewa taianawa ae vean, imuva entanen anu tumat dupewa ian amba God koewa ega anu ae veta.”

⁴ Watageta God nop mega waiwandini apanewa Aisaya Dion oisewa ok anega sen, Apan da pua, at kaimewa gapan, opata anega waiwandin.

Ayop nuga negin mega wa tarasen, wat tamanamene amba tauep.

⁵ Bumak ae ao iragi piup tu enane pon tap. Tunup endao wandao iragi tu ponamene tau aep.

Negin gegerawa iragi wat tamanamene tamana tap, amba negin ae ao taniwa momagene pon tap.

⁶ Amba ap gapan, waenapan at at iravi, God inak ewakewa nunini apanewa ame yao anu asigip tain.

⁷ Dion dup iamopen menan waenapan aruga inewa onam wanumune, amba me anega wadiamon, “Guegue ega mokare seram naewa umap! E darinaya da enuni gapan God wae wae nemoro mega tawa aisepen taiwanin?

⁸ Inak ega koewa taiana ame ae vean garewa imuva entanen amba kakaewa yambuni ta aisiwanian. Ek mondi anega ya wane, ‘Nu omayan baewa Eibaraam menan God atonunu anuiwan,’ ap anega ya wane. Wapena anun, e Eibaraam naewa megawa megenat wane ya umap,

iwa God Eibaraam naewa upi gwat ma wapi venat mutain.

⁹ Wapena anun, endi mame di oma visiwa arogamen, gurini apanewa nugusepnu nauase wandia. “Oma da da tavewa kakaewa ya iamopi gure ireta.”

¹⁰ Dion anega wani menan waenapan iragi singui anega wayawan, “Endi ame nu anenen tait?”

¹¹ Me gare wadiamon, “E da da etua okomewa dere wanumopi, da ware, orup da uoniwa wanep. Amba e da da taba inayap wandepiwa den ap anega tan.”

¹² Ian moni bongamine nagirewa Dion dup iamopen menan den tauan anega wayawan, “Wadianet apanewa, nu endi anenen tait?”

¹³ Dion gare anega wadiamon, “Rom iup muga omewa gapan moni bongamepen diaene, aigap sia ya bongamene.”

¹⁴ Amba Rom ita nagirewa upi Dion anega wayawan, “Nu anenen, nu dim da tait?” Me gare wadiamon, “Apan da puraput mega menan aopan ega ya wane, up tapen menan kaimakaet ya nanam mumane. Nao ega garewa menan gunat ya anu wane.”

¹⁵ Ap menan, waenapan iragi God inak ewakewa munapen menan amat taiwanumun, amba anu bambam den taiwanumun, iwa Dion taueni mu imumup anega anun, ‘Dion God mega wa watu eneni Keriso go uon?’

¹⁶ Ap anega anune menan Dion gare wadiamon, “Ne kaum iragen gapan dup iaivin go ayop da evinap oniwandini. Me God Guewa Woup Seniwa ge oma yamewa merao gapan dup iaiwadata. Me aiganap aroe amunu den oniwan, amba ago otua ayop mega pusi okomewa vesini mini, ne ap wat agoaset anun, go ne kakae uon.

¹⁷ Me iman taue oma makewa bongameta, makewa kakaewa ai bongame mek mini siwandata amba pokewa mek mini siwandata. Makewa kakaewa tambu ae dugupa eneta go pokewa tam ae da ya togura gura omäe yamewa gapan uatamep yagimota.”

¹⁸ Amba Dion nop ugup ugup gapan, oit mega kakaewa mu anu tapen men wadidiam wandin.

¹⁹ Go wam ame gapan, ayop Erot Dion inap gari gangan naen iwa Dion namu anega diguren, “Ge apan koerage, narawaga Erodias up ta naitaan.” Amba Erot inak koe koe upinewa den taiwandini menan Dion aigap sia diguren.

²⁰ Ap menan, evi amba, Erot wan ita mega nagirewa Dion waran gwat noke baraene, mame tani Erot koewa mega aigap iragenawa tan.

Dion Iesu ware dup ien

²¹ Go Dion gwat noke ya baraene wamewa gapan, wam da, Dion waenapan iravi dup iamon uon tani ewap Iesu ware den dup ien. Amba Iesu God inap mup taniwa, kiman ase watapen.

²² Boge God Guewa Woup Seniwa nenip bairantan mini kimani visiwandin e Iesu wapip warden. Wandeni nop da kiman gapan anega tauen, “Ge Otun iragenawa, imuna genan anu gurivin. Ge gamugap ne imuna ae meare tau aen.”

Iesu Keriso omae baewa batnagen

²³⁻³⁸ Iesu God menan nao ere taiwandini, en mega apane daiton apan da aonagaet (30). Dugup mega se ge se manega onam wanumun endi mame tauen. God ere Adam nanip tan.

Adam orup Set baraen.

Set orup Inos baraen.

Inos orup Keinan baraen.

Kenan orup Maalaleo baraen.

Maalaleo orup Dieret baraen.

Dieret orup Inok baraen.

Inok orup Metusela baraen.

Metusela orup Lemek baraen.

Lemek orup Noa baraen.

Noa orup Sem baraen.

Sem orup Apaksat baraen.

Apaksat orup Keinan baraen.

Keinan orup Sila baraen.

Sila orup Iba baraen.

Iba orup Pelek baraen.

Pelek orup Reu baraen.

Reu orup Seruk baraen.

Seruk orup Neo baraen.

Neo orup Tera baraen.

Tera orup Eibaraam baraen.

Eibaraam orup Aisik baraen.

Aisik orup Diekap baraen.

Diekap orup Diuda baraen.
 Diuda orup Peres baraen.
 Peres orup Esiron baraen.
 Esiron orup Anai baraen.
 Anai orup Atmin baraen.
 Atmin orup Aminadap baraen.
 Aminadap orup Nason baraen.
 Nason orup Salomon baraen.
 Salomon orup Boas baraen.
 Boas orup Obet baraen.
 Obet orup Diesi baraen.
 Diesi orup Devit baraen.
 Devit orup Netan baraen.
 Netan orup Matata baraen.
 Matata orup Mena baraen.
 Mena orup Melea baraen.
 Melea orup Elayakim baraen.
 Elayakim orup Dionam baraen.
 Dionam orup Diosep baraen.
 Diosep orup Diuda baraen.
 Diuda orup Simion baraen.
 Simion orup Livai baraen.
 Livai orup Matat baraen.
 Matat orup Diorim baraen.
 Diorim orup Eliesa baraen.
 Eliesa orup Diosua baraen.
 Diosua orup O baraen.
 O orup Elemadam baraen.
 Elemadam orup Kosam baraen.
 Kosam orup Adi baraen.
 Adi orup Meluki baraen.
 Meluki orup Narai baraen.
 Narai orup Siatiero baraen.
 Siatiero orup Serababero baraen.
 Serababero orup Resa baraen.
 Resa orup Dioanan baraen.
 Dioanan orup Dioda baraen.
 Dioda orup Diosek baraen.
 Diosek orup Semein baraen.
 Semein orup Matatayas baraen.
 Matatayas orup Maat baraen.
 Maat orup Nagai baraen.
 Nagai orup Esili baraen.
 Esili orup Neum baraen.
 Neum orup Emos baraen.
 Emos orup Matatayas baraen.
 Matatayas orup Diosep baraen.
 Diosep orup Dianai baraen.
 Dianai orup Meluki baraen.
 Meluki orup Livai baraen.
 Livai orup Matat baraen.

Matat orup Elai baraen.
 Elai orup Diosep baraen.
 Diosep orup Iesu mamewa uon go waenapan mamewa dian.

4

Seitan pusi warup Iesu inap taiwandin

¹ Iesu kaum Diodan gapan dup ieni imu pose iragi Guewa Woup Seni no dotouen boge Diodan ae ve amba Guewa naue at kaimewa aen.

² Wam apane dere (40) pua wande en, Seitan taue Iesu nanamase pusi warup taiwandin. Wam ame gapan, me taba da ya na amba iniwandin e, wam uiwa gapan enup one manen anun.

³ Seitan taue anega wadien, “Ge God Otua wanigewa, gwat ma wa taba buredi venasep na.”

⁴ Wani Iesu gare anega wan, “God nop mega ok anega seane, Waenapan inak muga ibariwa taba naine megenat uon.”

⁵ Ap mepe, Seitan Iesu wat naue tunup ideve dot ae, boge piup ma kakae guragut mega iragi ewasen.

⁶ Ewase anega wadien, “Piup ma iragi wande aeniwa amba aro amun megawa iragi neneni wandia. Ap menan ne orup da wanat anupena di wanain.

⁷ Menan, ge iak poe inanap ta wa taragat nimanegegewa, toemu mame iravi genain.”

⁸ Iesu sia wan, “God nop mega ok anega sean, Nu Ayop nuga God megenat wa taragaset, ayamat mega taivinait.”

⁹ Amba Seitan Iesu pa Ierusalem wa upe naue aeni, God Paewa aigarip bare anega dien, “Ge God Otua wanigewa, map mepe pi ta aipa piupa wanigewa, pusiga ya en manai.

¹⁰ Iwa God nop mega ok anega seane, God wap anea mega taue genan amataga yaentuk ta naugep vitai.

¹¹ Anea nanimup di warak nauge vise pia bat gimagain, pusiga agima en manamewa tawa.”

¹² Iesu gare sia wan, “God nop mega ok anega seane, Ayop gega God uniunion pusi warup ya tayawa.”

¹³ Ap gapan, Seitan pusi warup ugup ugup Iesu inap tayavin en, ae ve anega anuni, wam kakaewa da inepi amba sia tayawain.

Iesu nao mega ere at Galili gapan tan

¹⁴ Iesu God Guewa amunewa aigap wareni gapan at Galili entan aen. Oit mega at at iragi anu wa ge wa amon.

¹⁵ Amba me Diu nagirewa opata waine paewa gapan gapan wadidiam wandin. Ap gapan waenapan iravi me wa atonasiwanumun.

Pa Nasaret nagirewa Iesu tandayasene

¹⁶ Ameme Iesu kai wareni arewa pa Nasaret sia aen. Ian Diu pura muga bawarewa wamewa gapan, guegue mega namua taiwandini mini, Diu opata waine paewa unuk aen. Ap mepe me waenapan inamup God nop mega batnagepen menan yonen.

¹⁷ Menan, ap mepe wanumune nagire God nop mega waiwandini apane Aisaya ok mega seni ame wanane. Iesu watape nop yoa ta yave inamup anega batnagen,
¹⁸ “God Guewa mega potanap bararaen, iwa kayakayawan taine nagirewa, oit mega kakaewa wadidiamopen menan om enunegen.

Itan panamoni nagirewa ne wapena gapan mu vetamoin, ap menan watu enanegen.

Yame borat mutane nagirewa yangut tapen, itan muga wat nagasepen menan tauan.

¹⁹ Amba God waenapan mega wat inakam mumapen wamewa, gase taueni oisewa wadidiamopen menan ongen.”

²⁰ Iesu ok ame batnagen uon tani tobore pa kwayup taini apane ok wane amba ae warden. Ap mepe wanumone nagirewa iragi Iesu kem kem yawiwanumun.

²¹ Me sia anega wadiamon, “Nop ame anuyana, God nop megawa wataget ok di seane, ap me batnagingina tavewa endi mame tauen.”

²² Menan, waenapan iragi nop mega anune dansewa aigap menan wa atonasen go mu anega wan, “Ma Diosep otua diawa, go anut baware ma amba waren taiwan?”

²³ Menan Iesu gare anega diamon, “Ne asiginap, e konintu maibe mame inanap anega wadianegai, ‘Ge pa gega nagirewa den wat inakam mum!’ Amba sia wadianegai, ‘Ge pa Kaponiam gapan yo ugup ugup taingiana oitaga anutoni ap mini endi mapa at pa gega gapan sia ta nu yawat.’ ”

²⁴ Boge Iesu sia wan, “Ne nop tavewa di wadidiaivin. God nop mega waini apanewa da, ame mek pa mega gapan opata wapiwa go waenapan mega ya anu warain amba ya waupain.

²⁵ Ne tave di waivin ne tandayat ni-manegenewa guegue ma mini venaseta. Wataget di at ma Isurero gapan God nop mega waiwandini apanewa Elaidia ini-wandini wamewa gapan, waen kwapura aruga wanumon. En yampo dawa semu wam marakapu tauen, ugin da ya wan, amba at at iravi enup baware tau aen.

²⁶ Go God Elaidia watu eneni ian Diu waen kwapura inamup ya tauen, go ian ugupe waen da, at Saidon pa Sarepat gapan, inap watu enen.

²⁷ Guegue da sia mam. Wam da ugup gapan, at Isurero gapan waenapan aruga vek bo'o waramon. Go God nop mega waiwandini apanewa Elaisia, ian Diu apan da ya wat inakamen. Go at ugupe, Siria apanewa yaua Neimen, megenat wat inakamen.” Iesu ap anega wan.

²⁸ Opata waine paewa gapan wanumone nagirewa Iesu nop mega anune gari gangan mutane.

²⁹ Menan yonane boge Iesu namanasene sewa bawarewa garip tau aen. Waran amon, pa sewa muga togana onan konintua ame gapan uat enapen tane.

³⁰ Amone go Iesu waenapan nimakamup endume boge tau aen, go waenapan da ya warane.

Iesu airampu apan da potap up oimon

³¹ Ap gapan, Iesu at Galili pa Kaponiam ame vit aen. Ian Diu pura muga bawarewa wamewa gapan Diu nagire opata waine paewa gwanap wadidiam wandin.

³² Me opata waiwandini gapan waenapan iragi no i kap wan, iwa me nop aroe amunu den waiandin.

³³ Opata waine paewa gwanap, apan da airampu potap den warden. Airampu senao uma anega wan,

³⁴ “Akae, ge Iesu pa Nasaret apanewa dim da inanup tat wa tauaan? Ge wa koeam nimanepen men tauan go? Ge orup ansena ne asiginap di, ge God mega potaga Woup Seni apanewa.”

³⁵ Amba Iesu airampu kaimakaet use anega dien, “Nok borasep, apan ae ve tau ak!” Boge airampu apan ware waenapan nimakamup wat aipa uare boge tau aen, go apan siget da ya waren.

³⁶ Waenapan ap yawanewa, iragi seke tan no i kap wan anega wawa mutane, “Nop ma anenen da? Nop mega aroe amunu den airampu up oimuiwandin tau amuiwanum.”

³⁷ Iesu inak ame tani oit mega at ame ikukuk wande aeni, iragi senare tau aen.

Iesu waenapan arugataet wat inakam mumen

³⁸ Ap ewapewa, Iesu opata waine paewa ae ve aeni apan Saimon pa mega tauen. Ap mepe, Saimon tapunewa vek ato itangiaget tan, ap menan waenapan Iesu wat inakamepen menan singui wayawane.

³⁹ Ame Iesu waen ame watat mega ginap yone, vek ame kaimakaet die wa pakisen, boge waen ame kakae tan. Menan me ao yone taba tunu munen.

⁴⁰ Amba wam augariwandiniwa, vek ugup ugup nagirewa inap naumo onamon. Naniwa wapimup se ge se aeni, iragi wat inakam mumen.

⁴¹ Iesu ap taiwandiniwa, airampu arugataet waenapan potamupewa up oimon tau amon. Airampu iravi no yani den tauamon anega waiwanumun, “Ge God Otua di!”

Go Iesu airampu pakit uatame, nop ae veapen menan diguguramon, iwa mu asigip tane me God mega watu eneni Keriso.

Iesu at Diudia gapan opata waiwandin

⁴² Inane woup sen, Iesu pa ae ve waenapan uoni arewa aen. Go waenapan me yoatain en amba yawanewa menan me vemo aepen taiwandiniwa wat nasep wandepen menan taiwanumun.

⁴³ Go me gare wadiamon, “Ne God toemu mega oise kakaewa ameme at at iragi wadidiamopen menan ongen. Ap tapen menan God watu enanegen.”

⁴⁴ Ap wani ewap, me at Diudia, ian Diu opata waine pa muga muga gapan opata wadidiamuiwandin.

5

Iesu wadiamot mega erekwa wa upamon

¹ Wam da Iesu kaum awan Genesaret etop yone, God nop mega wadidiam wandin. Waenapan nop mega anupen menan ikukuk enpanan, anuiwanumun.

² Iesu kaum etop kabum dere yawamon. Meo upine nagirewa kabum dere ame ae ve amon, ia muga bigi guriwanumun.

³ Boge Iesu kabum daiton gwanap dotouen. Kabum ame apan Saimon megawa. Me gagap dore Saimon anega wadien, “Etop otu da ve asirantu aisen.” Wani menan Saimon ap tan amba Iesu kabum ame gagap ae wande waenapan opata wadidiam wandin.

⁴ Iesu waenapan nop wadidiamon uon tani ewap, me Saimon ase die anega wan, “Kabum gega wara, awan bumagap asirantu anet, ia gega meo menan ae antapena yawat.”

⁵ Wani Saimon gare wan, “Aritawa negawa, nu muma nao kaimakaet da tayavinton go meo da ya di upaton. Go endi ge waingiana menan ne ia sia antapena yawain.”

⁶ Amba apan Saimon evenewa den, Iesu wani noa waran den tanewa. Meo mek arugataet da upane, ia muga taniwa tom tam wapen tan.

⁷ Ap menan evene wai, upi kabum dawa gapan wanumone, munan sisi tatau wane, tauan ago munan. Onamone meo waruppen kabum dere ame enane no dotouen amba itaniwa gapan kabum kauma unugepen tane.

⁸ Saimon Pita inak mame yaveni, Iesu namup nikapu enu anega wan, “Ayop, ge venek asira ak, iwa ne apan koerage!”

⁹⁻¹⁰ Saimon evene wai, Diemis ge Dion, apan Sebedi otu wai, tanamoni no i kap wan iwa meo arugataet yawane menan.

Go Iesu Saimon anega dien, “Tap ya anu gura, wam koni mame use aeniwa ge meo upamoiana mini ge waenapan upamuingai.”

¹¹ Ame boge mu kabum muga, meo den, en turunagene kwatata dotoouane amba wan dim dim muga iravi ae vemon, boge Iesu ewap amon.

Iesu apan da e omat nagureni apanewa wat inakamen

¹² Wam da, Iesu pa sewa da gapan wandeni. Ap mepe apan da epi no iragi omat na kakaurasen iniwandin. Me Iesu yaveni namup nikapu enu anega wan, “Ayop negawa, ge men di anua wat inakam nimanegai!”

¹³ Iesu naniwa endimase apan wapiwa inase anega dien, “Ne men anuivin, omat siran taran amop!” Boge no use gapan apan etua kakae tan.

¹⁴ Menan Iesu apan ame ase kaimakaet anega wadien, “Endi inak mame inagap tana oisewa waenapan da ya wadiamo noga botakamian. Amba pirisi ine age vek gega uon tani yavep. Yavepi watageta apane Mosis vek mame inak warepi gaunewa garaet God inap wanapen diagepi, ge God inap gaun garaet ap wawa gapan waenapan yawage anuin ame vek gega uon tan.”

¹⁵ Iesu anega wadieni go apan ame inakaeni oisewa senare tau aen. Ap menan waenapan arugataet Iesu nop mega anupen amba vek muga wat inakam mumapen menan tauwanumun.

¹⁶ Go Iesu me wam wam da waenapan ae vemon aen, at iumai toni arewa gapan, pakaraen warden mup tainiwa.

Iesu pusiwa naniwa itani wani apane wat inakamen

¹⁷ Wam da Iesu waenapan wadidiam wandini. Parisi ge iup wadidiamuine nagire pa sewa da da at Galili ge Diudia amba pa sewa Ierusalem gapanawa upi ap mepe den wanumon, Iesu nop mega anuiwanumune.

Ap wamewa gapan God aro amun Iesu vek nagirewa wat inakam mumapen menan waniwandin.

¹⁸ Amba apan upi, pusi nani itani wane apanewa da eragia baraen waran tauan. Pa gwane unuk amo Iesu namup baraet anun tane.

¹⁹ Go pa gwanewa waenapan amborane menan mu gwanap ya amon, go apan waran pa aigari dot amon unenek napewa gapan to awan eragi mega gagap antapenane visen. Waenapan aru ame iam wanumone nimakamup vise, Iesu namup tamana ae warden.

²⁰ Amba Iesu mu anu tumat muga baware ame tane yao anuni gapan Iesu vek apanewa inap anega wan, “Apan negawa, ne koewa gega anun ae viangin.”

²¹ Iesu ap wani menan, iup wadidiamuine ge Parisi nagire den Iesu koewa anu ae veat wani anune, muk imumup anega anun, ‘Apan ambe da tauen, nop God mini ta wat taiwan? God megenat waenapan koewa muga anun ae viniwa, apan da koewa anu ae ya veta.’

²² Singui muga imumup anunewa, Iesu imua gapan anuni menan gare wayawamon, “Iwa dimen imuya potaya gapan ap anega anuiwanin?

²³ Ne nop daitonawa wana vek apanewa koewa mega anu ae veat wan, o nop derewa ame manega wapena, ‘Ao yon ap ak,’ kaimake dena ansenawa?

²⁴ Go e asigip taepen menan, Kimani Vitana Apanewa piupa waenapan koewa muga anu ae vepeñ menan aro amun warana ame endi to ewayain.” Amba Iesu vek apanewa sia anega dien, “Ne endi diagiangan, ao yon eragi gega wat pa ak!”

²⁵ Wani boge no utap, waenapan namumup, ao yon wande eragi mega ware, God wa atonasiwandin eni boge pa mega aen.

²⁶ Waenapan iragi imumu yon warden amba God wa atonasen anega wane, “Wam endiwa inak bawarewa da ya yavintoni venasen yawaton.”

Iesu moni bongamini apanewa vene wan

²⁷ Mame ewap, Iesu pa ae ve tau ae, moni bongamini apane da yaua Livai moni bongamine paewa gapan warden yave anega dien, “Evinap onak.”

²⁸ Wani boge apan Livai yone wan dim dim mega iragi ae ve Iesu ewap aen.

²⁹ Livai Iesu menan pa mega gapan barip baware tan moni bongamine nagire amba waenapan aruga upi den tanamo taba naiwanumun.

³⁰ Go Parisi nagire ge iup wadidi-amuine nagire Iesu yawan amba wadiamot megawa inamup noyam anega wane, "Iwa dimen moni bongamine amba koewa nagirewa den tanamoyan taba naiwanin?"

³¹ Iesu nop muga waiwanumune ame anuni menan gare anega wan, "Vek nagirewa nuat apanewa menan anu guriwanum go kakaewa nagirewa nuat apanewa menan ya anuiwanumun."

³² Menan ne muk ingane kakaewa anune nagirewa munan ya tauan, go koewa taine nagirewa imu posewa ge inak muga entan tapen menan tauan."

God men taba virip veane noa

³³ Waenapan upi Iesu inap anega wayawan, "Apan Dion, waenapan dup iamuini apanewa, wadiamot megawa amba Parisi nagire wadiamot muga den God menan pot pot taba virip taiwanumun amba God inap mup waiwanum. Go wadiamot gegawa God menan taba virip ya taiwanum."

³⁴ Gare Iesu anega wadiamon, "Naine mutat i apanewa barip mega gapan wandeipiwa me evene waimua taba virip ya veain, iwa aton anuiwanum."

³⁵ Go wam evi da, naine mutat i apanewa waseam wat nau aepiwa, wam ame gapan taba virip veain, bagu sisi anune menan."

³⁶ Amba iup namua ge iup ewakewa guegue mega wadiamopen menan Iesu maibe gapan manega wan, "Waenapan wanup namua bebeb wapi nadi waraben men semu ewakewa ya wabenagepi. Wabenagepi ewakewa den koe tata amba wanup gine daiton uon, da vevera da kaimake den."

³⁷ Guegue da sia mam. Apan da kaum wain ewakewa man etu namua kaum menan taginamene gwanap ya wa damagep. Damagepi kaum mek tutut wapi

etua tuk wata amba kaum wa damagep etua den koe tata!

³⁸ Ap anega uon, go waenapan kaum wain ewakewa etua ewakewa gapan wa damagep!

³⁹ Guegue sia mam. Waenapan kaum wain namua napi ewakewa ya nap. Mu anega wain, 'Namua dansewa aigap, ewakewa dansewa uon.' " Iesu ap anega wan.

6

Iesu me pura bawarewa Ayopewa

¹ Diu pura muga baware wamewa gapan da, Iesu nao egak da, maup taue wandeni, ame berip aiwandin. Wadiamot mega den amon taba uit verane maup taue wandeni makewa kukunagen etua warapen menan nanimup gottenagen amba tavewa ao nane.

² Ame gapan, Parisi nagire upi yawamo anega wan, "E iwa dimen pura bawarewa iup nuga paina yamat wanin?"

³ Iesu iup namua tavewa wadiamopen menan anega gare wadiamon, "Wataget da apan Devit evene wai den enup aguguramontani oisewa ok gapan e iravi batnak anuyan.

⁴ Devit enup agureni menan God Paewa unuk ae amba God men taba buredi tugu sean, ian pirisi mugenat nainewa, ame iup mega den go me ware nan. Amba upi evene wai munen nane."

⁵ Iesu wani sia anega wadiamon, "Ne Kimani Vitana Apanewa pura bawarewa ayopewa menan ne dim da umap wapena, ameme di."

Pura bawarewa gapan Iesu orup da wat inakamen

⁶ Amba Diu pura bawarewa mugawa dawa gapan, Iesu Diu opata waine paewa unuk ae waenapan wadiam wandin. Apan da, naniwa nutup parasi tani, ap mepe den wanden.

⁷ Iup wadidiamuine ge Parisi nagirewa den Iesu enu yawa wapen anun. Ap menan Diu pura bawarewa, ame wagat wamewa gapan, Iesu apan ame wat inakameta go uon menan yama yama yawanumun.

⁸ Go mu imumu gapan ame anuiwanumune, Iesu me asigip tan menan nani parasi dena apanewa anega dien, "Onak, waenapan namumup mapa yon." Wani apan ao yone ase ma one namup yonen.

⁹ Iesu waenapan inamup anega wan, "Ne singui wayawaian. Nu pura bawarewa iup nuga dim da waiwan? Pura bawarewa gapan waenapan inamup kakaewa tain go koewa tain? Mu inakam mumain go waenapan wa danigam mumain?"

¹⁰ Wani amba Iesu yangut ikukuk yawam naumo aeni, boge apan nani parasi dena ame anega dien, "Naniga ase endimat." Me ase endimaseniwa boge kakae tan.

¹¹ Go iup wadidiamuine ge Parisi nagirewa ame, anu dagimen, no kwapi aran, Iesu inap dim da tapen noa barim wanumun.

Iesu watu enamot mega om enumon

¹² Wam ame gapan Iesu God inap mup wapen menan togan da dot aen. Mum ame, ap mepe yaugai wande, God inap mup taiwandin, woup sen.

¹³ Woup seni, wadiamot mega iragi munan wan, tauane amba apan aonagaet pusinawan dere om enumo, yaumu watu enamot mega nagirewa diamon.

¹⁴ Ame yaumua mam.

Saimon (yaua dawa, Iesu dieni ame Pita), ge Saimon gwaniwa Anduru, ge Diemis, ge Dion,

ge Pilip, ge Batolomio,
¹⁵ ge Matiu, ge Tomas,

ge Diemis (mamewa Alopias),

ge Saimon (waenapan mega men yonini apanewa),

¹⁶ ge Diudes (mamewa Diemis),

ge Diudes Iskeriot (Iesu omine wapi apanewa).

Watu enamot mega nagirewa yaumua ameme.

Iesu waenapan wat inakam mumen

¹⁷ Boge Iesu tunupa aupa wandeni watu enamot mega tanamo aoma vitan pona yonan. Ap mepe, wadiamot nagirewa aruga wanumone. Mu arugataet at Diudia ge pa Ierusalem amba puiman etop pa sewa dere Taya ge Saidon gapan tauan.

¹⁸ Mu Iesu nop mega anupen menan amba vek muga ugup ugup, ge airampu wa koeragam mumini nagirewa, wat inakam mumapen menan tauan. Iesu amun mega tau aen amba iravi wat inakam mumiwandin.

¹⁹ Ap menan, waenapan iragi Iesu inasepen taiwanumun, iwa aro amun me gamupewa ase tau aiwandini. Ap gapan mu iragi inak wariwanumun.

Aton ge bagu sisi noa

²⁰ Iesu wadiamot megawa anega wadiamon, "Kayakayawan taiana nagirewa aton anun, iwa God menan anuyan gututuguyan taiana,

menan God toemu mega ame egawa.

²¹ Amba e da da enup iniana nagirewa, e aton tan, iwa evi amba kiman maup mega gagap dorai.

Amba irip turup waiana nagirewa aton anun,

iwa evi amba top wa aton tai.

²² Amba, piup gapan waenapan da da anu koeam imaepi,

o tandayat imaepi, o nipec diaepi,

amba yauya wa koeamepi,

e aton anun, iwa ne Kimani Vitana Apanewa,

nenan itan wariwaniana menan.

²³ Wam ame taupei aton anun, imuya tarep warep,

iwa e garewa wara wara arita iragen,

aupa kiman gapan enan wanden, amat taiwan.

Aton anun, iwa ta koeragam imaine nagire,

omaya baewa God nop mega waiwanumune nagire,

ap umap wa koeragam mumane.

²⁴ Ae kaiwan, e puraput nagirewa.

Aton endi anuiana wam da uon tata.

²⁵ Kaiwan, e endi maup nagirewa.

Enup evi amba araeta.

Kaiwan, e top waiana nagirewa.

Evi amba bagu sisi anui irip turup wai.

²⁶ Ae kaiwan, e da wa da ta taiana nagirewa,

yauya waenapan ao warine go tavewa uon, iwa

wataget mu omae baewa,
God nop mega tave uoni waiwanumune
nagire,
yaumu ap umap ao sia di wariwanumun,
go mu wanene muga aigap warane.”

Anavi ega imuya warep munan anu guriwanian

²⁷ Iesu sia anega wadiamon, “E darinaya den, wapena anun. Anavi egawa munan anu guran, amba anu koeam imaine nagirewa, e yonan inamup kakaewa taiwanian.

²⁸ Wa koeragam imaine nagirewa, munan God inap mup wan. Nipep diaine nagire, gare wa aipakam munan.

²⁹ Amba orup da nawaneyap topi, gare ya tone go nawane yamu entanene sia top. Amba orup da etuya okome da ega aigape warupepi wanup gauarape men den wapi, ya watanane, ae veane, da den di warep.

³⁰ Waenapan da da mup inayap wapi, e di munan. Amba orup da dim dim ega warepi, waseasepen menan sia ya wane.

³¹ Menan waenapan e inayap dim dim da tat anuianawa, e mu inamup, ap umap sia tan.

³² Waenapan imumu potamu inayap warepi, e gare munan mugenat anu munane, ap gapan God wat aipakam mega ya warai. Iwa koewa taine nagirewa evene wai den muk gare gare baigan ap anega taiwanum.

³³ Amba sia, inak kakae inayap tapi nagire mugenat e gare inamup inak kakae tane, ap gapan God wat aipakam mega ya warai. Iwa koewa taine nagire baigan ap anega den taiwanum.

³⁴ Amba, evenae wai puakewa ega enapen menan amase taianawa, ap gapan God wat aipakam mega ya warai. Iwa koewa taine nagire puakewa muga warapen menan gare gare ap anega taiwanum.

³⁵ Uon! go guegue ugup manega tan. Anavi egawa munan anu guran, inak kakaewa inamup taiwanian. Amba wan dim dim garaet asenagaet munan, garewa entan sia enapen amasewa ya tane. Ap tanewa, garewa ega iman aritavet aupa

kimani warai. Amba den, God Paina Irage-nawa otu waiwa wanai. Iwa God noega-sine amba gaun inap ya waine nagirewa munan den bagu sisi anuiwan menan enan den tata.

³⁶ Ap menan Kimani Mamanu inayap bagu sisi anu gurini mini, waenapan in-amup bagu sisi anu guriwanian.”

Waenapan ya enu yawamo wane

³⁷ “Waenapan wanene uniunion ya tamone, ap tane, e iman God wanene mega gapan ya tauai. Ya diguguramone, God gare ya diguguraeta. Amba koewa muga anu ae veane, God gare koewa ega anu ae veta.

³⁸ Wan dim dim ega asenagaet munane, ap tanewa garewa evi amba God gare aritavet eneta. Garewa enepi ik ega enane no araseta. Menan yan otu kamontu munane gare otu kamontu warai, amba yan baware munane, gare baware warai.”

³⁹ Iesu waiwandini maibe sia anega wan, “Apan yame borat mutane dere, ame dawa yone dawa wat naue ap aeta go? Uon! ap tapiwa, mu dere urata geomoin.

⁴⁰ Amba sia, wadiamot nagirewa wadiamuine mugawa paina ya yamasep. Go evi amba wadiam kakayat mumepiwa ap gapan mu wadiamuini apanewa den om inamop.”

⁴¹ Amba Iesu sia wan, “Iwa dimen evenae wai koewa muga otu kamontu, kaiko umap, yamamupe toborini yaviwanin? Go koewa ega baware, oma ni koni umap, yamayape toborini ya anuiwanin?”

⁴² Amba ge kaiko evenaga yamap wandin warupapen menan anega diai, ‘Enda, kaiko yamagap warupapen taian’ Go baware yamagap toborini ya yavingi? Ame iwa dimen ap anega taingi? Ge da wa da ta taiana apanewa. Koewa gega baware oma nikoni yamagape namu warup, yangut ta kakayase, amba evenaga kaiko yamape warupai.”

Oma dere tavewa muga ire yawapen

⁴³ Ap me menan Iesu sia anega wan, “Oma kakaewa, tavewa koevet ya iamota, amba oma koerage, tavewa kakaewa ya iamota.

⁴⁴ Ap gapan oma daiton daiton tavewa iepi irewa mega gapan gapan yavinewa. Ap menan ganongae, tavewa baip ya ieta. Ipuni, tavewa mokot ya ieta.

⁴⁵ Ap umap, apan kakaewa, wan dim dim kakaewa mega imu pose gapan enen waboren wandini tambun taiwan, amba apan koerage, wan dim dim koerage imu pose enen waboren wandini tambun taiwan. Ap mini sia koewa kakaewa imu pose no dotouen arasiniwa gamup nomu gapan nop waiwanum."

Apan dere pa tuine maibewa

⁴⁶ Iesu sia anega wadiamon, "Dimen ayop ega dianegean go nop waina gapan ya taiwanin?

⁴⁷ Waenapan da da inanap taue nop nega anu tapi guegue muga manega wa ewayain.

⁴⁸ Apan da pa mega tupen menan ibariwa urat bumaga tantan waren amba sewa bonawan aigap ae antapenan amba tuini mini. Amba ningoe tawak da taue ise nasiwandin go ya wabaimen, iwa pa tu kayasen.

⁴⁹ Go da da nop nega anune go ya tapi, mu apan da pa mega upuna tuni mini. Urat ya ware pa ibariwa pia tun amba ningoe taue pa ise nasiwandin boge wabaim gearen, iragi wat musen uon tan." Iesu ap anega wan.

7

Iesu ita yamewa ago megawa wat inakamen

¹ Iesu nop ameme wan uon tani ewap, me pa Kaponiam aen.

² Ap mepe, at Rom ita yame apanewa iniwandin. Nao mega taini da menan anuiniwa vek wa guren, konintu bop tapen taiwandin.

³ Amba ita yame apanewa ame Iesu oit mega anuni menan Diu dimae waine nagire upi watu enammon amon, Iesu wap one vek apanewa wat inakamepen menan.

⁴ Sep amone Iesu ine tauanewa noek noek wan, anega diane, "Ita yamewa ame apan kakaewa menan onak ta warit.

⁵ Iwa me nu Diu nagirewa nunan anu gureni menan, amba nu opata waine paewa da tun nunen."

⁶ Boge, Iesu ao yon wande den tanam aen. Onam wanumune ita yamewa pa mega di maniwandini gapan ita yamewa evene wai upi, Iesu diapen menan, sia watu enammon amba Iesu inap tauan oit wan, "Ayop negawa, gek anu bambam da ya ta, ne wan menan pa nega tauapan taingi, go ya taua iwa ne koerage.

⁷ Endi ap menan nek inaga onge onge go ne kakae uon. Nop gega amunu den megenat wawa nao nega tainiwa inakaeta.

⁸ Iwa ne, ayop nega den, apan upinewa epara muga gauarap waingina apanewa amba den ita nagire gauaranap nona wariwanum. Da ak diapena di aeta. Da onak diapena di oneta. Da nao ma ta diapena di tata. Ap menan ge wawa, ne nao nega tainiwa di inakaeta."

⁹ Iesu nop ame anuni, me noa ase ginin wan, to entaneni boge waenapan aruga evip onamone nagirewa anega diamoni, "Ne wapena anun, anu tumat nimanegeni apane ma miniwa da at Isurero gapan ya yawan."

¹⁰ Sep nagirewa ame ewagai sia amon pa tauane, nao apanewa ame inakae warden yawane.

Iesu waen kwapura da otua boeni wat inakamen

¹¹ Ap ewap, Iesu ge wadiamot megawa, amba waenapan aruga den, pa yaua Nein dot amon.

¹² Iesu pa Nein tonane noa maniwandini gapan, pa nagirewa bop apane da watat gapan baraen, wat ororom warupan onam wanumun. Bop apane ame waen kwapura da otua daiton iragenawa ame boen. Pa nagirewa arugataet waen ame tautanan amon.

¹³ Boge, ap gapan Iesu waen kwapura ame yaveni menan bumagewa tuk wan bagu sisi arita anun, menan anega dien, "Irip ya wa."

¹⁴ Amba Iesu aeni otua boen eragia wa panam baraene ame naniwa gapan ase inasen gapan wat amone nagire ae yonan.

Boge Iesu anega wan, “Apan tamaru, ne diagiangin, ao yon wanik!”

¹⁵ Iesu ap wani boge apan bonigawa ao yon wande nip endave nop erekwan. Menan Iesu orup ame ware inewa wanen.

¹⁶ Waenapan iravi tap baware anun God wa atonasen, amba anega wane, “Nop waini apane baware da nimakanup tauen. Nu wat inakam nimanepen men tauen.”

¹⁷ Ap menan, Iesu oit mega at Diudia amba piup ikukuk wande aeni iragi ukum ume tau aen.

Dion sep mega Iesu ine tauan

¹⁸ Dion, dup iamuini apanewa, wadiamot megawa Iesu inak aru mame taiwandini no oisewa Dion wadian. Ap anuni gapan, Dion apan dere venamu wan tauane.

¹⁹ Amo, Ayop Iesu wayawapen men namu anega wan wadiamon, “Nu amat taitoni Keriso ge me di go gare apan da ugup tauapen amase tait?” Sep apane dere nop mame anune boge Iesu wayawapen amon.

²⁰ Iesu inap tauane anega wayawan, “Dion, dup iamuini apanewa, watu enanen. Nu amat taitoni Keriso ge me di go gare apan da ugup tauapen amase tait? Ap wayawagepen men onanton.”

²¹ Wam ameme gapan, sep apane dere, Iesu vek ugup ugup nagirewa wat inakam mumen airampu waenapan potamupe up oimon tau amone, yawan. Yame borat mutane nagirewa aruga watap mumeni yame i pak wan yangut sia taiwanumun.

²² Mu ap yawane menan, Iesu anega wadiamon, “Ewagai sia aisen, anenen yao anuiwanianq Dion wadian. Yame borat mutane nagirewa sia yangut taiwanum, pusiwa wabeberugaseni nagirewa ap sia amuiwanum. Vek bo'o nagirewa sia inak musiwanum, darine borat mutane sia anuiwanum. Bop tane nagirewa sia inak mutane yon wanumuiwanum. God oit mega kakaewa kayakayawan taine nagirewa wadidiamuivin.

²³ Waenapan ne ya tandayat nima-negepiwa aton anuiwanumain,” Iesu ap anega wadiamon.

²⁴ Boge Dion sep mega dere entan amone. Ap ewapewa, Iesu Dion oisewa ap

mepe wanumune nagirewa anega wadiamon, “Dion yawapen menan at kaimewa pua aiseana dim da yawat anuyan? Apan da i guine aro uoni yawapen aisean go?

²⁵ Ame uon wandepi e dim da yawapen menan aisean? Apan da wanup gan-ganataet eneni yawapen menan aisean go? Anun, wanup kakaewa enine ge kwan puraput nagirewa ame ayop yau taneni pa mega gapan ininewa, go at kaimewa gapan pua da uon.

²⁶ Go endi e dim da yawapen men pua aisean? God nop mega waini apanewa da yawapen aisean go? E, me ap me. Wapena anun. Tave di Dion apan ap me di go me aigap iragenawa.

²⁷ Me menan wataget God Dion oisewa wani ok anega seane, Wapena anun.

Ne oit nega wapi apanewa namu watu enain, negin genan wareta.”

²⁸ Iesu sia anega wan, “Menan ne wadiaepena anun, waenapan iragi yanane yaumakamup Dion megenat aigap. Go kiman gueguewa iup ewakewa gapan ame, evi amba God toemu mega gapan orup da God nave otu kamontu iragena tapi watat aigapewa wareta, go Dion me gauarap wandeta iwa Dion iup namua gapan taueni apanewa.”

²⁹ Iesu ame waiwandini waenapan amba moni bongamine nagirewa den darine entap anun amba iragi umap wan anega wane, “God nop mega tavewa di.” Iwa mu namua God anu tumat tane gapan, Dion inap amone dup iane.

³⁰ Go Parisi ge iup wadidiamuine nagire, God munan anuini tandayasene iwa Dion dup iamopen men ya amon.

Iesu den wanumuine nagire gueguewa

³¹ Iesu sia wadiamon, “Endi piup mame gapan iniana nagire guegue ega anen wapena amba om ineta? E inak ega anen?

³² E orup otu pa pa namboya kae taine umap. Mu gare isewa mawa anega noyam pot poraet waiwanum, ‘Nu sinao tuivin go e tarep ya taiwanin. Nu urai angingin waivin go irip ya waiwanin.’

³³ Tavewa ame mam, Dion waenapan dup iamuini apane yoneni God men taba virip viwandin kaum wain da ya nan. Ap tani menan e noyam anega wayan, ‘Airampu da potap wandia.’

³⁴ Go ne Kimani Vitana Apanewa tauana taba kaum wain den naingin menan anega noyam wayan, ‘Ase kem kem yawan! Me taba paututuma naiwan amba kaum wain pot pot naini menan bumbawam taiwan. Amba den moni bongamini ge inak koewa taine nagirewa evenan tan.’ Menan e noyam pot poraet waiana nagirewa.

³⁵ E ap anega waiwanin go God nop mega tavewa di wandia. God dim da da me waenapan gamumup ta oniwandini ame God anuini taine nagirewa mu wa ewamoin.”

Waen koeragewa Iesu pusiwa bigi guren

³⁶ Wam da, Parisi apane da Iesu den mum gine tabaewa napen men vene wan onen. Iesu pa mega taueni taba napen menan ae wanden.

³⁷ Pa sewa ame gapan, koewa taini waenewa da wanden. Iesu Parisi apane pa mega gapan taba naiwandin oisewa anuni menan me kaum pokari da gwat gapan kaitane kaum tutu dena ame damage ware tauen.

³⁸ Iesu aup parata ine taba naiwandini gapan waen ame Iesu pusip ae yone irip waiwandin. Irup waiwandini yame doge vise Iesu pusip enun. Amba waen ame i gume nononga gapan Iesu pusiwa muse darakamen. Pusiwa ua ton amba kaum tutu dena aigap wa damagen.

³⁹ Ap gapan, apan Parisi, Iesu onat wani apanewa, waen tani yavenimek ingane anega wan, “Apan ma God watu enep nop oit mega waini apane wandepo waen mame wakaiseni me koewa taini wae-newa anupo.”

⁴⁰ Iesu nop megawa anuni menan, gare anega wadien, “Apan nega Saimon, nop wadiagepena anu.” Saimon gare wan, “Wadianet negawa, anenen anuingi? Wadianek.”

⁴¹ Iesu maibe gapan sia wan, “Apan dere moni amase taini apanewa da inap amo mun wane amba moni ase ma totnagen.

Moni amase taini apanewa moni baware 500 totnagen apan daiton wanen amba dawa moni otu koentu apane dere apan da aonagaet (50) totnak wanen.

⁴² Garewa sia wanapen wamewa taueni. Go apan dere ame moni totnagene, moni amase taini apanewa ise sia wanapen menan umap uon. Ap menan moni amase taini apanewa puakewa mugawa ase musen, moni sia ya wanapen menan diamon. Ap menan orup ansena moni amase taini apanewa inap aton aigap anuta?”

⁴³ Iesu singui wani Saimon gare wadien, “Apan ap moni puakewa mega baware inape anu ae veni me aton aigap anuta.” Saimon wani Iesu gare wadien, “E, tave di waiagi.”

⁴⁴ Wani boge Iesu waen inap entane Saimon sia anega wadien, “Waen ma yavingi. Ne pa gega tauana pusina bigi warapen kaumewa ya nenaan. Go waen mame, me yame doge gapan pusina puakame amba i gume gapan mut darakamen.

⁴⁵ Ne tauana gaunana ta ua ya tonegean go waen mam ayamat nega baware tan pusina ua toiwandin en wandia.

⁴⁶ Amba den Diu gutut nuga menan ya anuan, ame ganip kaumewa ianap ya geman. Go waen mam kaum tutu dena pusinap gemen.

⁴⁷ Ap menan wapena anu. Ne waen mam koewa mega aruga ise wat mutana menan me gare ne inanap baigan arita tan. Go waenapan koewa muga aruga uon God anu ae veni mu gare otu da megenat God menan anuiwanumun.”

⁴⁸ Iesu nop ame wani waen inap sia wadien, “Ne koewa gega gaset ise wat mutan.”

⁴⁹ Iesu ap wani menan waenapan upi den tauan ap mepe taba naiwanumune mugenat anega wawa mutan, “Ma apan ansena da tauen, amba waenapan koewa muga ise mutat waiwan?”

⁵⁰ Go Iesu waen inap sia wadien, “Anu tumat nimanegeana menan inak ewakewa wariagi. Yaema baigan gapan ak.”

8

Waen upi Iesu tautane amuiwanumun

¹ Wam koni da amba, Iesu wadiamot megawa aonagaet pusinawan dere den, God toemu mega no oise kakaewa wadiiamopen menan, pa bawarewa ge otu koentua gapan opata wa ge wa tau ai-wandin.

² Waen upi den tautanan amon. Waen ame upi Iesu namu vek muga wat in-akam mumen amba airampu potamup up oimon tau amone. Waen da ame yaua Meri (yaua dawa ame Makdalin) wataget airampu nani yamunaet nani yamu dere potap wanumone Iesu up oimon tau amon.

³ Waen dawa apan Susa waenewa Dioana. Apan Susa me ayop Erot gauarape mega da. Waen dawa yaua Susana amba waen upinewa aruga den Iesu tautanan amon. Waen mame moni muga gapan Iesu, wadiamot mega den, kwayup tamuiwanumun.

Oma makewa uaseni maibewa

⁴ Wam da, waenapan arugataet iam wanumone amba waenapan upi sia pa ugup ugup Iesu inap tauwanumune gapan. Iesu maibe anega wadiamon.

⁵ “Apan da oma makewa mega verapen menan aen. Nao mega gapan uasiwandin, upi negina geomone waenapan aigap amu tau amon amba boge nenip tauan enun nan.

⁶ Amba makewa upi agim gagap geomone ap mepe piup baware uon. Oma makewa tuk tak wan yananewa, kai warane go serarat kurat wan iwa piup daraka, kaum uon.

⁷ Makewa upi ganongae berip geomone amba kai waran go gaian yan doran umen boge borit wane.

⁸ Amba makewa upi piup kakaewa gapan geomon. Ame yanan dorane tavewa ieni arugataet mek arugataet da ie ge ie tan. Tavewa apane nani yamunaet (100) iamon.” Iesu ame wani kaimakaet anega wan, “Darinaya den wandepi nop nega anun.”

Iesu maibe wani iwa mam

⁹ Iesu maibe wani menan, wadiamot mega tavewa anupen menan singui wayawane.

¹⁰ Iesu gare anega wadiamon, “God toemu mega karaua wandini tavewa watap enen gase di yawayan anuiwanin go waenapan upinewa menan maibe gapan megenat wadiamuivin. Ap wapena iwa mega ame mam, Mu yangut tain go ya yao awain. Mu anuin go ya anu awain.

¹¹ Maibe mame tavewa mam. Oma makewa ame God nop megawa.

¹² Amba makewa negina geomone guegue ame waenapan nop anuiwanumun go mu ya anu tumat tapen iwa Seitan taupe nop potamupe up taiwan.

¹³ Amba makewa piup baware uon gwat aigap geomone gueguewa ame, waenapan nop ere anune atonu den anun go potamup ya waren. Go evi amba pusi warup wamewa inamup taueni gapan mu aro muga uon tan menawaet inak wakau-mane.

¹⁴ Amba sia makewa ganongae berip geomone gueguewa ame, waenapan nop anun go piup itan megawa o aton megawa o moni puraput imumu waren menan God imu pose ya waren amba kiman inak kakaewa da inamup ya venasen.

¹⁵ Amba makewa piup kakaewa gapan geomone gueguewa ame, waenapan nop anu kakayasene. Bumagamu totanen anu warane ayamase yaentuk mantuk taiwanumune ae ya vene, menan inak muga tavewa mega kakaevet ien aewan.”

God nop mega anu awapen noa

¹⁶ Maibe da sia God nop mega menan Iesu anega wan, “Apan dun mega ire ware karaua unup ninokap o aup inine wantarewa gauarap ya baraeta. Go waenapan pa dorepi ganat yawapen menan aroga paina baraeta.

¹⁷ Menan dun ame gapan, dim dim iravi karaua tainewa wam da arogameta. Dim dim iragi ukum umanewa evi amba ganat gapan aroga tauain.

¹⁸ Ap menan ae anu guran, nop nega yaentuk anuiwanian. Iwa orup da da mu anu avepiwa, ame God nop upi sia aigap aigap muneta. Go orup da da ya

anu avepiwa, nop otu da namu anun waranewa, God nop ame sia waseamo aeta.”

Iesu inewa gwani wai iragena noa

¹⁹ Amba Iesu inewa ge gwani wai Iesu yawapen menan onamon, go umap uon iwa waenapan barat mutane.

²⁰ Menan orup da taueni boge Iesu anega wadien, “Inaga ge gwanik waiga yavagepen menan tauane, itapa pa garip yoniwanum.”

²¹ Go Iesu waenapan anega wadiamon, “Waenapan da da God nop mega anune amba gueguewa tainewa ame ne inanawa amba gwanin wainawa.”

Iesu taik tawak wan bigat mutane

²² Wam da Iesu wadiamot mega den kabum gagap dorane amba anega wadiamon, “Kaum awan yamu asepa gan anepen,” wani boge amon.

²³ Ame kabum gapan amuiwanumune, Iesu aup inen. Amba taik aritavet da aroe den awan gagap tauen. Kaum dotoue kabum gwanap geariwandin amba kabum awana unugepen tan. Mu iragi bop nonokap tauapen taiwanumun.

²⁴ Ap menan, watu enamot nagirewa amon Iesu wa kandasepen menan anega wan, “Ayop, ayop, borit wapen taivin!” Boge Iesu kandaeni taik ge kaum doak ame eniwandiniwa kaimakaet ase diamo wan boge taik ge kaum doak ame tom wa ae bigaren.

²⁵ Amba me anega diamon, “E anu tu mat ega ne inanap otu kamontu.” Go mu tap tan tarak anega wawa mutan, “Akae, apan ma anenen da? Taik ge kaum diamoni boge noa di warane.”

Airampu at Gerasin apan da potap wanumon

²⁶ Ame Iesu, watu enamot nagire mega den tanam, kabum gapan awan Galili ame gamu to nugusen at Gerasin tauan.

²⁷ Iesu kabum ae ve piupa viseni pa apane da airampu arugataet potap wanumone Iesu ine tauen. Airampu potap unuk wanumon wam nononga ni aroga wande en. Me pa ae ve pua ae, borit wane tumuine arewa gapan yone iniwandin.

²⁸⁻²⁹ Wam wam aruga airampu apan wariwandin menan pa nagire pusiwa naniwa damik kaimake dena gapan panan baraen yama yama yaviwanumun. Go me damik to totomage amba airampu to bambamasene pua aen.

Apan ame Iesu yave senao wan namup omanip enu amba Iesu airampu inap kaimakaet anega dien, “Apan ae ve tau ak!” Ap menan airampu nop kaimakaet anega wan, “God Paina Iragenawa Otua Iesu, inanap dim tat anu tauaan? Kaiwan, ya ta koeragam nimanegē.”

³⁰ Ap anega wani Iesu singui wayaven, “Ge yauga anen?” Airampu arugataet potap unuk wanumone menan apane gare anega wan, “Ne yauna ‘Nu arugataet.’ ”

³¹ Airampu arugataet ame Iesu inap kayawan mini anega wan, “Piup mum sisip usenagaet wandini arewa ame gapan ya wa oinene.”

³² Ap mepe, togana tuan arugataet taba naiwanumun. Menan airampu Iesu namanasen anega wane, “Wa oinewa, nu tuan potamup ununait.” Menan Iesu anega wan, “A, umap tau aisen!”

³³ Airampu apan ae vean tau amon tuan potap unumon. Unumone tuan togana serarat vitan kauma geamon none namon.

³⁴ Tuan kwayup taine nagire yawamone tap serarat amon pa pa at at oit wadidiamon.

³⁵ Pa nagire oit anune gapan serarat tauan anen tani yawapen onamone. Iesu ine tauane airampu namu potap wanumone apanewa Iesu pusip ae wanden yawan. Me i guine kakae tan, gan gorogot ene wanden. Mu apan ame yawane tap anu guran.

³⁶ Amba waenapan da da inak mame yamamup ase yawane Iesu wat inakameni oisewa waenapan upinewa wadidiamon.

³⁷ Go at Gerasin nagire iragi tap anu gurane menan Iesu at muga ae vepen wan. Ap menan Iesu kabum gagap sia dore aepen taiwandin.

³⁸ Ap gapan, inakaeni apanewa Iesu inap anega wan, “Tatan, gende anepen,” go Iesu entane anega wan,

39 “Ak, pa gega gapan God anenen tageni oisewa wadidiam.” Wani boge apan ame pa daiton daiton sewa mega gapan ae God inap tani oisewa wa ge wa aen.

Iesu waen dere wat inakam mumen

40 Iesu ewagai kaum awan asepa gan entane sia taueniwa, waenapan iragi atonu den waupane, iwa Iesu menan naine nambene taiwanumune menan.

41 Ambagan, Diu nagire opata waine paewa kwayup taini apane da yaua Diairas Iesu ine taue namup omanip enu wae wae ta anega wan, “Pa nega onak.

42 Orana daiton iragenawa, en mega aonagaet pusinawan dere, vek waren bop tapen taiwan.”

Iesu tautane aeni, waenapan aruga gigigit kapet nau amon.

43 Waenapan ameme nimakamup waend aen aonagaet pusinawan dere vek ewatop taiwandin, go waenapan da ya wat inakamene. Vek mega men garewadom gigit nagirewa moni munitamen go vek uon ya tan.

44 Iesu ap aiwandini gapan waen ame garivi taue wanup mega ginewa inasen boge ewatop mega tonaren.

45 Menan Iesu waenapan anega wayawamon, “Da inat tanegen?” Iravi uonagaet wane, menan Pita Iesu anega dien, “Ayop nugawa, waenapan aruga ma to iamene enpanagene, gigigit kapet natagiwanum. Menan da inataget wan, wayawaningi?”

46 Go Iesu gare wan, “Ae, da inat tanegen. Iwa ne anuna aro gamunape tau aen.”

47 Boge inaseni waenewa, Iesu imua anuni anun menan ine taue kaime pagagak ta namup omanip enu waenapan yamamup anega wan, “Ewatop nega uon tapen men inat tagen boge inak nigasen.”

48 Boge Iesu waen ame anega dien, “Oranawa, anu tumat nimaneggeana menan inak wariagi. Baigan gapan ak.”

49 Nop ame waiwandini gapan, Diairas, Diu opata waine paewa kwayup taini apanewa ame, pa mega apane da me ine taue anega wadien, “Oraga gase boen. Ap

menan wadianini apanewa Iesu menan gamben sia ya wa taingan.”

50 Iesu nop ame anuni Diairas inap anega wan, “Tap ya anu. Aigap sia anu tumat nimanegewa, oraga inakaeta.”

51 Amba Iesu apan Diairus pa mega taueniwa, Pita, Dion ge Diemis amba boeni ine mamewa den mugenat pa gwanap amon go waenapan upinewa watanāmon.

52 Koni ameme gapan, orup waen boeni menan waenapan irip turup ap mepe waiwanumune, go Iesu anega wadiamon, “Irip ae vean, me mondi aup iniwan, ya boen.”

53 Iesu nop ap wani menan waenapan iragi verea kaura top nop wan iwa mu asigimup orup waen ame gase boen.

54 Go Iesu ae taue orup waen naniwa ware inap anega wan, “Orup negawa, ao yon wanik!”

55 Orup waen guewa mega tau aeni sia entane one potap unugen, boge menawaet ao yon wanden. Ap menan Iesu anega wadiamon, “Taba da wanane nap.”

56 Orup waen ame ine mame daramumu wan, go Iesu anega diamon, “Ne tana oisewa waenapan ya wadiamone.”

9

Iesu watu enamot mega dere dere watu enamon

1 Iesu watu enamot mega aonagaet pusinawan dere munan wan tauane, amba aro amun mega vek nagirewa wat inakam mumapen amba airampu wa oimopen menan munen.

2 Aro ame muneni gapan God toemu mega oisewa wadidiopen amba vek nagirewa wat inakam mumapen menan watu enamon.

3 Me anega wadiamon, “Negin aisiwaniampina mondigataet aisen. Kaipat go taba go moni ega da den ya tambune. Wanup senunawa den ya tambune.”

4 Ame aisene amba pa da atonu den waupaepiwa, ap mepe iniwanian, ap tapen wamewa tauepiwa, amba pa ame ae vean aisen.

5 Go at da waenapan da da ya wau-paepi pa muga ae vean aisen koewa muga ae bat munapen menan pusia atabobo

toninigamen aisen, ame tane yam tatak munapen.”

⁶ Iesu ma iravi wani boge watu enamot megawa amon. God Oit Mega Kakaewa pa pa tau ge tau wadiam wadiam amuiwanumun amba vek nagirewa wat inakam mu-miwanumun.

Ayop Eerot anu bambamasen

⁷ Wam ame gapan, at Galili ayop muga Eerot, Iesu oisewa anuni anu bambam tan. Iwa waenapan upi anega waiwanumun, “Dion, dup iamoni apanewa boeni sia inakae yon wanden.”

⁸ Amba upi anega waiwanumun, “Watageta apanewa Elaidia boeni sia inakae yon wanden.” Upi den sia anega waiwanum, “God nop mega wataget waiwandini apane da boeni sia inakae yon wanden.”

⁹ Go ayop Eerot anega wan, “Ne wana menan ita nagirewa Dion waran i gamuto nugutane boen. Go endi mame da? Ne nop inapaet anuivin.” Ap menan me Iesu da ase yawapen menan taiwandin.

Iesu waenapan 5000 watumon

¹⁰ Iesu watu enamot mega nagirewa sia entan tauane, amba anenen taiwanumune oisewa Iesu wadian. Anuni boge naumo pa Besaida amon, mugenat ap mepe wanumon.

¹¹ Go waenapan me amba aeni asigip tane menan Iesu evip amon. Ap menan Iesu waupamon, God toemu mega oisewa wadidiamon, amba vek nagirewa inak warat anuiwanumune nagirewa wat inakam mumon.

¹² Wan gine taniwa gapan watu enamot megawa aonagaet pusinawan dere Iesu ine tauan anega wan, “Waenapan aru ma wa oimo, at sewa bawarewa amba pa pa amo taba napen ge aup inapen arewa menan yop tap. Iwa at ma waenapan uoni arewa.”

¹³ Go Iesu gare wadiamon, “Ae, e taba da munan.” Mu gare anega wan, “Nu taba nuga buredi magamene nani yamunaet meo dere mugenat. Go nu sia ane waenapan aru mame taba muga une ta munait?”

¹⁴ Apan ap mepe wanumone arugataet 5000 mini amba waen aigap sia den.

Iesu watu enamot megawa anega wadiamon, “Waenapan apane dere apan da aonagaet (50) iam iam ta wanum wanum amopen menan wadiamon.”

¹⁵ Watu enamot nagirewa Iesu wani gapan gapan tane.

¹⁶ Amba Iesu taba buredi magamene nani yamunaet meo dere den ame tambu kiman ao yave God inap gaun wan amba paise paise ta waenapan taba munapen men, wa ewamot megawa munen.

¹⁷ Waenapan iravi taba tavewa nane bagu i bim wan. Nane ewap, wadiamot megawa semua bongamen kaenat aonagaet pusinawan dere enane no dotouen.

Pita, Iesu God Keriso mega aroga wan

¹⁸ Wam da, Iesu megenat God inap mup taiwandini gapan, watu enamot mega den wanumon. Me singui anega wayawamon, “E anuiwaniana, waenapan ne da dianegiwanum?”

¹⁹ Mu upi gare manega wane, “A, ge Dion waenapan dup iamoni apane dianegiwanum. Upi watageta apane Elaidia dianegiwanum. Upi ge God nop mega waiana apane da wataget boeni sia yon wandet dianegiwanum.”

²⁰ Menan Iesu mu inap singui anega wayawamon, “E, umap, go e ne da dianegiwanin?” Boge Pita gare wan, “Ge God wa watu enageni mega Keriso.”

²¹ Pita ap anega wani menan Iesu waenapan upinewa oit ame ya wadiamopen men kaimakaet diamon.

²² Iesu anega wan, “Kimani Vitana Apanewa ugu vegaek bagu sisi baware anu tanain. Waenapan dimae waine nagire amba pirisi bawarewa ge iup wadidi-amuine nagire den tandayat nimanege toguranegepi bonigatain. Toguranegep bonigasepena amba wam yampa God amun mega gapan inak nigat yon wani-gain.”

²³ Amba Iesu waenapan iragi anega wadiamon, “Orup da inanap onat anu tapiwa, namu me mek dim da anuini tandayase, ae di vep, amba ne yauna menan, pot poraet ugu vegaek bagu sisi anu, evinap oniwandan.

²⁴ Amba orup da da muk inak mugawa menan anu gurane tainewa, ame inak muga wakaumain, go orup da da mu inak muga nenan anu gure wakaumepiwa, mu inak kakaewa tautanain.

²⁵ Amba sia, orup da piup puraput mega iravi tambupi go inak mega mek wa koeamepi o wakaumepi, ame tavewa, umap uon!

²⁶ Waenapan da da umamuna tapiwa, ne Kimani Vitana Apanewa kakae guragut nega ganasewa den Maman anea mega potamu woup seniwa kakae guragut muga ganasewa den sia tauapena gare umamumu tain.

²⁷ Wapena anun imuya ya oaraep. E da da endi mapa yoniana ya borit wai go God toemu mega amunewa taupei yawane amba borit wai."

Iesu etua tunupa ganase wan

²⁸ Nop ame wani amba wam nani yamunaet nani yamu yampo ewap, Iesu God inap mup wapen menan apan Pita, Diemis ge Dion tambumo tunup da dot aen.

²⁹ Ap mepe Iesu mup taiwandini gapan me gine namu ugup entanen, amba en wanup mega pomponugaet ganase wan.

³⁰ Amba watageta apane wai Mosis ge Elaidia venat mutan Iesu den nop waiwanumun.

³¹ Apan dere ameme God oya oyae mega den tauan amba God Iesu pa Ierusalem gapan boepi anuni menan ap noa waiwanumun.

³² Pita evene wai dere den aup iniwanumun, go mu nene nanan tan yamamu ase meret di wa kakayaseni amba Iesu oya oya mega ganasewa amba apan dere tautanamo yoniwanumune yawamon.

³³ Apan dere Iesu ae veapen taiwanumune gapan Pita Iesu inap anega wan, "Ayop nugawa, nu e den mapa wanineta ame kakae. Pa namdat otu da yampo tumoit. Daiton gegawa da Mosis megawa da Elaidia megawa." Pita anu waramat gapan ap anega wan.

³⁴ Pita nop mame waiwandini irikup guguk wa aigamup tauwaboboram on amba mu irikup potap wanumon ap menan Pita evene wai den tap tan.

³⁵ Nop da irikup potap anega tauen, "Ma ne Otun iragenawa, om enuna menan nop mega di anuiwanian."

³⁶ Nop ame uon tani amba mu Iesu megenat wanden yawan. Mu inak ame venasen yawane oisewa waenapan da ya wadiamon.

Iesu orup airampu potap wanden wat inakamen

³⁷ Inane woup sen, amba Iesu, watu enamot mega den, tunupa vit onamon, ap mepe waenapan aruga fautananmon.

³⁸ Waenapan nimakamup apan da Iesu inap nop kaimakaet wan, "Kaiwan, wadianet nugawa, otuna daiton iragenawa inap bagu sisi anu.

³⁹ Airampu ma otuna waren anap antapeniwan, boge orup ve waiwan daram daram taiwan, gwitutu nop tauowan. Airampu waren di enkakait nau iwan ae da ya vea vea mini taiwan.

⁴⁰ Ne wadiamot gega airampu wa oisep tau aepen men wayawamon go mu ya umap. Wane go orup ya inakaen."

⁴¹ Amba Iesu gare anega wan, "Akae, koewa taiana nagirewa, ya anu tumat nimanek wanin. Ne wam animpo mini tanae waingepen amba anu tumat tai?" Ap wani amba Iesu apan ame inap anega wan, "Otua wat mapa onak."

⁴² Orup ame waran onam wanumune, airampu orup ame ware patunen pia gearen amba ware enu menawasen. Go Iesu airampu kaimakaet die wa oise amba orup wat inakame ware mamewa wanen.

⁴³ Amba waenapan God aro amun mega ap yawane gapan tarak wan.

Iesu bop mega noa sia wan

Iesu inak mame tani menan waenapan yawan nenan bubup taiwanumun. Menan Iesu wadiamot mega anega wadiamon,

⁴⁴ "Endi wadiaepena di anuiwanian imuya ya oaraep. Waenapan Kimani Vitana Apanewa waranege anavi nega nanimu gwanap bat nimanegain."

⁴⁵ Go Iesu watu enamot mega nop mame waiwandini mu da ya di anu awane. Nop mame iwa mega karaua ukum umen wadia, ap menan mu ya anu awane go tap

anun. Tap anune menan mu singui sia ya wayawane.

Yaumakanup da bawarewa tata?

⁴⁶ Iesu wadiamot megawa mu ansena da bawarewa tata menan gare gare notatae waiwanumun.

⁴⁷ Iesu mu imumu potamu ase yave anuni menan orup otu da ware tainamup bare yonen.

⁴⁸ Amba Iesu anega wadiamon, "Waenapan da da orup otu ma miniwa nenan waupepi ame ne den waupanek wanumain. Ne waupanegepi Mamana watu enanegeni den wa upiwanumain. Apan da yaumakayap otu kamontu iragenawa me bawarewa iragen."

Apan da genan wapi ya watanageta

⁴⁹ Amba Dion Iesu inap anega wan, "Ayop nugawa, nu yawatoni apan da ge yauga gapan airampu wa oimuiwandin menan nu watanaton iwa me nu den ya inat nimanen."

⁵⁰ Go Iesu gare wadiamon, "Ya watanane. Iwa orup da da anavi ega ya tapi mu evenae waiawa."

At Sameria nagirewa Iesu tandayasene

⁵¹ Iesu kiman dot aepen wamewa maniwandini menan, Iesu gine namu ware entane pa Ierusalem neginaet di dot aiwandin.

⁵² Iesu evi pa da tauapen menan sep nagire namu watu enamond Iesu at mega ta kakayasepen menan at Sameria gapan pa da tauane.

⁵³ Go Iesu pa Ierusalem neginaet di dot aiwandini pa nagirewa yawane menan Sameria pa nagirewa Iesu ya waupan.

⁵⁴ Watu enamot mega dere, yaua Diemis ge Dion mu ya waupane ame yawane menan gare Iesu anega wayawan, "Ayop nugawa, ge anenen anuingi? Nu God inap mup wat merao kimani watu enep waenapan mam yagimop borit wain go?"

⁵⁵ Ap anega wane menan Iesu entane diguguramon,

⁵⁶ amba pa da ugup amon.

Iesu ewap anepen

⁵⁷ Ap mepe neginaet amuiwanumune, apan da Iesu ine taue anega wan, "Ge

amba amba da agewa, ne evigap ong ingain."

⁵⁸ Iesu gare anega wadien, "Ewatap piup nokap wande wande arewa den amba nenip dugup muga oma onep den wandia, go Kimani Vitana Apanewa wagat wanige iana bare bare arewa da uon, menan ne evinap ongepen menan kaimake den."

⁵⁹ Iesu apan dawa inap anega wan, "Evinap ongingan." Go apan ame gare anega wan, "Ayop negawa, namu angep mamana boepi tup amba ongai."

⁶⁰ Go Iesu gare wadien, "Ya anu tumat taine nagirewa vemone mu bonigawa di tumop. Go ge ak, God amun mega taueni oisewa wadidiam."

⁶¹ Amba apan da ugup sia Iesu inap anega wan, "Ayop negawa, evigap ong ingain go namu wa angep dugup nega gaune tamop amba."

⁶² Go Iesu gare wadien, "Waenapan da da God nave ere tapi ae ve sia entan pa muga amot anupi, me God toemu mega menan nao tata umap uon."

10

Iesu wadiamot mega nao tapen menan watu enamond

¹ Mame ewap, Iesu wadiamot mega apane yampo apan da aonagaet pusinawan dere (72) upi nao mega men wa nugut mumen. Iesu tau ge tau aepi arewa gapan apan dere dere namu watu enamond. Me evi amba ap mepe tau ge tau aeta.

² Iesu anega wadiamon, "Taba arugataet inin geraget tan wandia, go daupam tata nagirewa aruga uon. Ap menan maup i apanewa, God inap mup wane, watu enamop nao mega daupam tata nagirewa aruga tauepi maup mega tambuppen amop.

³ Menan endi aisen, go anun! E man sip otua ame baigan mane umap watu enaivin go waenapan anan eyao wasipen umap nimakamup waniai.

⁴ Ap gapan, moni igewa o ik pokaetawa, o pusi okomewa da den ya tambune. Amba waenapan negina gaun ya tane iwa wam ega wakaumene tawa.

⁵ Amba pa da da dorane namu manega wadiamon, ‘Nonup inayap wande ep.’

⁶ Baigan nonup apane da, pa ap me gapan wandepiwa, gare nonup gaun ega me aigap visep. Go nonup apane da ya wandepi nonup gaun ega inayap sia onep.

⁷ At da tauane, baiganaya tapi nagirewa inamup ap mepe pa daiton ame gapan wanien. Taba kaum da enepiwa, tanam nan. Dim da enepiwa tambun. Iwa nao taine nagirewa garewa muga den warianum.

⁸ Pa sewa da tauane amba waenapan waupaepi taba enepi ame aibu nan.

⁹ Vek nagire ap mepe wanumopi, wat inakam manan den anega wadiamon, ‘God toemu mega onen manaiwan.’

¹⁰ Pa da da tauane waenapan ya waup imaepi pa namboya yonan anega wadiamon,

¹¹ ‘Koewa tayana menan pa atabobo mega toninigamianit. Ya waup nimanean go ma ae di anu kakayasen, God toemu mega onen manaiwan.’ Ap anega wadiamon.

¹² Endi wadiaepena anun. Gop ya anune, God wanene mega wamewa gapan, pa sewa da da e ya waup imaene, koewa taine pa sewa Sodom nagirewa God wanene mega arita warane omewa mini ya yawain go pa ameme baware iragen yawain.’

God pa ugup ugup koewa muga batnagen

¹³ Iesu itan baware inamup tauepi oisewa namu manega wadiamon, “Kaiwan, pa Korasin Diu nagirewa, kaiwan, pa Besaida Diu nagirewa, itan baware yawai. Iwa yaumakayap yo baware taingina go ame Diu uoni nagirewa pa Taya ge pa Saidon ya yawan. Yawapo koewa muga ae ve yamu entanepo bagu sisi magunewa wara wanumopo. Go e yo baware taingina yawayan go imuya potaya ya entanean.

¹⁴ Menan God wanene mega wamewa gapan, pa Taya ge pa Saidon nagirewa itan yawain go e itan baware iragen yawai.

¹⁵ Den ian Diu nagirewa pa Kaponiam gapan. Ek anuyan taiana gapan kiman dot aitai go? Ae, ya dot aitai go God merao arewa gapan utam imaeta.”

¹⁶ Iesu ame wani amba wadiamot mega anega wadiamon, “Waenapan da da nop ega anupi nop nega den anuiwanumain. Amba da da tandayat imaepi ame ne den tandayat nimanegain. Amba da da ne tandayat nimanegapi ame ne Mamana, watu enanegeni, den tandayasiwanumain.”

Iesu wadiamot megawa sia entan tauan

¹⁷ Wadiamot mega apane yampo apan da aonagaet pusingawan dere (72) namu Iesu watu enamoni ame atonu den sia tauan Iesu anega wadian, “Ayop nugawa, ge yauga gapan airampu diamuintoni, nonu waran tap tau amuiwanumun.”

¹⁸ Amba Iesu gare anega wan, “Seitan kimani yangwan mini wat vese geareni ne yawan.

¹⁹ Wapena anun. Amun nega enana ap menan anavi ega Seitan aro mega iravi inayap aroe uon tan. Anan mokarewa o gayu gagap amune ya araeta. Amun nega enana menan dim dim da ya one araeta.

²⁰ Tavewa di, airampu noya warane go ap menan atonua arita ya tane go God kiman gapan yauya buka gapan ok seni menan aton aritavet ap menan taiwanian.”

Iesu aton anun

²¹ Wam ame gapan God Guewa Woup Seniwa Iesu potap no dotoueni menan atonu den anega wan, “Maman, ge piup kiman Ayopewa. Ne gaun inagap waingin, iwa anut bawarewa nagirewa nop maibe tavewa anuine nagirewa den nop gega ya anu awapen men karaua baraeang go ok ya taine anut baware uoni nagirewa nop gega wa ewamoan. E, Maman, atonu den ap anu taan.”

²² Iesu Mamewa inap wan uon tani amba waenapan sia wadiamon, “Ne Mamana dim dim iragi nanin gwanap sen. Amba ne God otua ame waenapan da asigimup ya tanegene go Mamana megenat Otua asigip tan. Amba sia waenapan da Mamana ya asigimup tane go ne, me Otua, ne negenat asigip tan. Ap menan ne Mamana guegue megawa waenapan da da ta ewamot anupena di ta ewamoin.”

²³ Nop ame wani amba Iesu wadiamot mega inamup ise to entane mugenat karaua anega diamon, “Dim dim iravi yawayana menan aton anun!”

²⁴ Iwa wapena anun. Wataget, God noa waiwanumune nagire amba Diu ayop nagire ugup ugup den endi e dim dim yavisiana yawapen menan taiwanumun go mu da ya yawane. Amba endi dim dim da anuisiana anupen menan taiwanumun go mu da ya di anune.”

At Sameria apanewa maibewa

²⁵ Iup wadidiamuini apante da yone Iesu pusip warupe irewa yawapen menan singui manega wayaven, “Wadianek negawa, ne anenen tap amba yaibobot inagewa usenagaet wandini yon borain?”

²⁶ Iesu gare anega wan, “Ge singui gega garewa God nop mega namua gapan ok seane anenen waiwan? Guegue mega ansena tavewa anuingi?”

²⁷ Amba apan mame gare anega wan, “Nop mega manega waiwan, ‘Ge ayop gega God imuga potaga gapan, guaga gapan, epa guin pakao gega gapan, iak guine gapan, ayop gega God menan ae anu guringan. Amba gek genan ae anu guriana mini, evenak waiga pa mainagepe wanumuine nagirewa munan den anu guringan.’”

²⁸ Apan ame wani Iesu gare anega wan, “Nop garewa tamana di waiagi, menan inak mame taingawa ge yaibobot inagewa gapan in agingai.”

²⁹ Go apan ame mek ingane apan kakae waenapan yawa anupen menan, me Iesu singui da sia wayaven, “Pa mainenape nagirewa ambe da?”

³⁰ Iesu gare anega wadien, “Gutut da wadiagain. Apan da pa Ierusalem ae ve pa Dieriko vit aiwandini gapan, up nagire waran wanup puraput mega seasen, epi tokait wakait tane, bop konintu ae bat vean amon.

³¹ Amba ian Diu pirisi apante da neginaet vit oniwandin. Tone apanewa ae yaveni go mainap sensenui tau aen.

³² Ap umap sia dugup Livai apante da taueni tone apanewa yaveni go mainap sensenui tau aen.

³³ Amba Diu nagirewa anavi muga, at Sameria apante da, ap aiwandin taue tone apante yaveni bagu sisi menan anu guren.

³⁴ Ine taue ganip kaumewa mone dena umap ge kaum wain den omat no utap ae geme okom panen. Tauni amba man donki mega gagap barae wat nau ae daio nagire inine paewa taue bare kwayup tan.

³⁵ Inane woup sen, apan Sameria ame moni mega up, daio nagire inine paewa i apante ase wane, anega wadien, ‘Apan ma kwayup ta. Ange entan tauapena kwayup taingawa menan moni ma uon tapi da sia genain,’ ap anega wan.”

³⁶ Gutut uon tani amba Iesu iup wadidiamuini apante ame inap singui anega wayaven, “Endi ge imuga anenen anuingi? Gutut gapan up nagire apan ton wanup puraput mega seasen amon amba apan yampo tauan yawane mu ansena da tone apanewa pa mainepe nagirewa mini ago tan?”

³⁷ Apan ame gare anega wan, “Tone apante inap bagu sisi anuni apanewa pa mainepe apante mini ago tan.” Iesu nop ame anuni gapan anega wadien, “Tave di waiagi. Ak, ap tani umap ta.”

Waen Meri ge Mata pa muga gapan

³⁸ Wam da, Iesu wadiamot mega den ap amuiwanumune amba pa sewa da tauan. Ap mepe waen da yaua Mata mu wau-pamo amba pa mega gwanap naumo aen.

³⁹ Mata gwaniwa waen, yaua Meri, taue Iesu pusip ae wande me nop mega anui-wandin.

⁴⁰ Go Mata nao wan dim dim ap mepe ta ta mega tapen menan taiwandin. Ap menan Iesu nop mega ya anun. Go evi amba me Iesu ine taue gunat anega wan, “Ayop, ne gwanina ae venegen nao aru ma negenat taingina menan ge anenen anuingi? Ge wadia me one ago tanegep.”

⁴¹ Go Iesu gare anega dien, “Mata, Mata! Ge wan dim dim aruga mame menan gop ge bagu sisi anu guran taangi.

⁴² Anut daiton megenat aigap iragen, ame nop nega anupen. Ap menan gwaniga Meri kakaewa da om enun, menan ne ya watanain.”

11

Iesu God inap mup waben gueguewa wadiamon

¹ Wam da Iesu at da gapan wande God inap mup waiwandin. Mup uon tani amba wadiamot mega da anega wadien, "Ayop nugawa, Dion, dup iamoni apanewa wadiamot megawa God inap mup waben guegue wa ewamoni ap umap wa ewan."

² Boge anega wadiamon, "God inap mup wane manega wan, Mamanua, yauga ao warat genan ayamat taivinain.

Toemu gega amunewa inanup tauiwan-dan.

³ Taba nuga wam wam nuningawa endi den nun.

⁴ Koewa inanup tane anuton ae vivin, menan koewa nuga anu ae ve.

Dim dim da pusinu ya warup naune age." Iesu ap anega wan.

⁵⁻⁶ Boge Iesu sia anega wadiamon, "Mup tat mega tavewa mega mam. Mum gagewa da gapan e evenaya paewa aisene mup anega wanewa, 'Enda, evenanu da oniwandini endi mame tauen go me taba wanapen menan nu inanup uon. Ap menan taba buredi magamene yampo nunawa umap?'

⁷ Go evenaya gare manega wadiaepiwa, 'Ya anu nimanegene. Tonan gase boran, otun waina den aup inivin. Ne yonap taba ya enain,' ap anega wapiwa e anenen tai?

⁸ Wapena anun. Evenaya menan yone taba ya eneta go sia wayao wayao taiwan-ampinawa menan yone taba megenat uon go wan dim dim arugataet eneta.

⁹ Ameme mini ne aigap sia wapena anun. Mup gapan God wayawane me gare eneta. Amba imutuan anune gare me ewaeta. Amba sia tonan mega ken ken tone gare enan watapeta.

¹⁰ Iwa waenapan da da God inap pot pot mup waiwanumampina ame garewa di warain. Dim da yoa taiwanumampina ame tautanain. Amba tonan mega ken ken toowanumampina ame munan watapeta.

¹¹ Ap mini sia, e ansena da otu waia man meo men mup wapi e gare mokare sisiwa munai go? Ae, ame uon.

¹² O otu wai kumkum bagua men mup wapi e gare gayu munai go? Ap mini e ya taianawa.

¹³ Ap menan e koewa taiana nagirewa go otu waiawa kakaewa garaet munapen asigiap di, go e taiana otu kamontu. Iwa Mamanu God garaet kakaewa aigap tainiwa, ap menan God inap mup wane Guewa Woup Seniwa aigap di eneta."

Seitan yaua da Bieseboro

¹⁴ Wam da, Iesu no boraseni apane da airampu potap oireneng tau aen, airampu tap aeni gapan apan ame boge nop wan. Ap mepe wanumuine nagirewa inak ame yawane no i kap wan.

¹⁵ Go upi yawane nipec anega wan, "Airampu bawarewa mugawa yaua Biese-boro Iesu amun mega waneni gapan me airampu up oimuiwandin tau amui-wanum."

¹⁶ Upi Iesu irewa yawapen menan aopan anega wayawane, "Ge aro ki-maniwa yo paua da ta, nu yawat."

¹⁷ Go Iesu mu imumu gapan dim da anune mek anuni menan anega wadiamon, "Toemu da da engirit ta waiwanumampina dumari amoin. Amba sia dugup da todum wadum taiwanumampina mu iragi ora amoin."

¹⁸ Ap umap Seitan toemu mega endumeipiwa, toemu mega uon di tata. Ap menan iwa dimen Bieseboro amun neneni gapan airampu upi wa oimop tau amot dianek wanin?

¹⁹ Ne ap tapo dugup ega nagirewa airampu wa oimop tau amopi amun da muneni gapan taiwanum? Bieseboro munen go? Ek wadiamot ega ap diguguramopo mu gare ebo diaepo.

²⁰ Uon, ne God amun neneni gapan airampu wa oimuivin. Ap taina menan God toemu mega amunewa inayap tauen.

²¹ Seitan me aro apane mini da. Apan ame ita kepata den, pa mega kwayup tapi up nagire ya tauain.

²² Go apan da aro mega baware iragen taue pa i apante topi garawase pa doreta. I apante namu imua manega anun, 'Ita kepata nega dena menan ne aro apanewa.' Go aro baware iragena apane

taue ita kepata mega sease ae se boge puraput mega tambu yan se evene wai muneta.

²³ Waenapan da da me imua inanap ya wandiniwa, orup ame tandayat nimane-gen taiwan. Amba sia orup da ya tanane-gen nao ya tainiwa, ame ne nao nega wa koeragamiwan.”

Airampu apan ae ve aeni, sia tauen

²⁴ Iesu nop da sia wan, “Airampu apan potap taue aen, at darakawa arewa ise ase aiwandini amba nonan enu wande wande arewa yop taiwandin go ya yaven. Ya yaveni menanmek anun, ‘Ne pa nega namu wanigena ap menan sia entan angain.’

²⁵ Ae taueni apan ame posewa kakae pa tarase dim dim sese kakayat tani yaven.

²⁶ Menan sia ae airampu upi nani yamunaet yamu derewa koerage iragen ame tanam tauan apan potap unum wanumon. Namu airampu daiton wanden gapan anan otu da taiwandin go evi aruga potap unumone gapan airampu anan aigap iragen taiwanumun.”

Aton iragenawa

²⁷ Iesu nop mame waiwandini gapan, waenapan nimakamup, waen da ve anega wan, “Bat gimage watugeni waenewa wat aipakam me inap wande ep.”

²⁸ Go Iesu gare anega wan, “Ge ap waingi go God nop mega anuine taine nagirewa wat aipakam aigap wariwanum.”

Iesu kiman paua tap yawat anun

²⁹ Waenapan arugataet inap sia tauwanumune menan Iesu anega wadiammon, “Waenapan endi ma use yan ainiwa inak muga koevet iragen. Mu yo ugup ugup paua mega yawiwanumat anune waiwanum, go kiman paua mega da ya munain go apan Diona yo paua mega megenat yawain.

³⁰ Watageta apane Diona pa Nineva nagirewa inamup paua wa ewaseni ap umap sia God paua mega Kimani Vitana Apanewa endi iniana nagirewa wa ewaeta.

³¹ Watageta ayope Solomon nop dima mega baware anupen men ayop waen da yaua Siba at wandap tauen. Solomon anut

mega baware go apan anut baware iragen da endi taueni wandia go nop mega ya anuiwanin. Ap menan God wanene taepi wamewa gapan ayop waene Siba ame e endi iniana nagire den yone diguguraeta.

³² Amba sia Nineva nagire e endi iniana nagirewa den yone digugurayain iwa apan Diona opata wadidiamoni gapan pa Nineva nagirewa koewa muga ae vean imumu wat entanen. Diona apan baware di go apan da Diona aigap wandini mapa wandia!” Iesu ap anega wan.

God ganat mega potanup wandia

³³ Iesu sia anega wan, “Apan da dun mega ire ware karaua ya baraeta o ware unup ninokap ya wat eneta. Go waenapan pa dorepi ganat yawapen menan aroga yaumakap baraeta.

³⁴ Ap mini, yamaya etuya dun ganat megawa. Menan e yamaya kakae wande-piwa, e ugu wapi uruga ganat no dotoue wandeta. Go yamaya koe tapiwa, e ugu wapi den mum tatarin tau aeta.

³⁵ Ap menan yambuni wanien ganat potayape mum tunupi tawa.

³⁶ Ap me menan, etuya iravi ganase wapi amba semu otu da den mum da uon, e ganat ega dun wariana ganasewa mini ewa mega gapan waniai.”

Iesu Parisi ge iup wadidiamuine nagire den diguguramon

³⁷ Iesu nop mega ame wan uon tani ewap, Parisi apane da taba napen men vene wan dere pa gwanap amon watara ae wanumon.

³⁸ Parisi apane ame, Iesu naniwa bigi ya gureni yaven, ap menan Iesu Diu nagire guegue muga ya tan. Parisi apane ame yave anu bambamasen.

³⁹ Menan Iesu apan ame anega dien, “E Parisi nagirewa, e taba naine yogupewa ge kaum naine sipewa gariwa megenat bigi guriwanin, go e potaya iragi wan dim dim koewa gui togon taiana wandia.

⁴⁰ E bumbawam nagirewa! God gariwa megenat ya tan, go gwanapewa den ap anega sia di tan.

⁴¹ Ap menan imuya ge potaya kakaewa gapan, iravi kayakayawan taine nagirewa

munan, ap gapan imuya etuya dere den bigi wat aiwandata.

42 Kaiwan, Parisi nagirewa itan baware yawai. Iwa kutut ugup ugup danse dena aonagaet tambuiana daiton ewagai sia God men bariana ame kakae. Go God menan koewa wat tamanam gueguewa amba God anu gurat mega gueguewa ya taiwanin. Kutut ugup ugup God men baraet anune ame umap di, go nop bawarewa derewa ame den taiwaniampen.

43 Kaiwan, Parisi nagirewa, itan baware yawai. Iwa opata waine paewa gapan watat kakae iragen gagap waniepen imuya waren taiwanin. Amba sia antaba une arewa gapan e gaunaya waenapan yaentuk mantuk diait anuiwanin.

44 Kaiwan, itan baware yawai. E kaima arewa pu waboreni mini, ame waenapan bigip piup nokapewa wandeni mu asigip ya tane menan aigap tauane amuiwanum.” Iesu ap anega dien.

45 Iesu ame wani menan iup wadidiamuini apanewa anega wan, “Wadianet nugawa, Parisi nagire inamup ap waingianawa, ame nu den di diguguranean.”

46 Iesu gare wan, “Kaiwan, e iup wadidiamuiana nagirewa, e den itan baware yawai! E iup ni enowa mega anu geonageana menan, nop ega itani den waenapan ae natam wanin. Ap menan mu nop ame ware tapen menan umamup uon. Go e mu wat agoat mumapen menan ya anuiwanin.

47-48 Kaiwan, itan baware yawai. E omaya baewa watageta God nop mega waiwanumune nagire guriwanumun. Omae baewa koewa ame tane e umap wayan iwa mu guriwanumune nagirewa kaima muga arewa ben tayan kwayup taiwanin.

49 Iwa inak mame venasepen menan God dima mega namu anu anega wan, ‘Ne nop nega waiwanumampen nagirewa amba watu enamot nega nagire den, Diu nagire inamup watu enamoin, amba Diu nagirewa upi guramop borit wain amba upinewa wa koeragam mumain,’ God ap anega wan.

50 Ap menan, endi iniana nagire God kaimakaet wanene taeta iwa God nop mega waiwanumune nagirewa piup ma ere mangan ta venasen onin en endi mame gapan guramone menan.

51 Ame tave di, watageta apante Eiboro namu ton boniga baraeni oniwandin amba apan Sekaraya God Paewa woup am seni watarewa ge man irine watarewa yaumakap ton boeni menan bop muga garewa endi iniana nagirewa inayap taueta.

52 Kaiwan, iup wadidiamuiana nagirewa, itan baware yawai. Waenapan God anupen men taine watanamuiwanin. E God ya anut anuiwanin go God anut anuine nagirewa watanamuiwanin.” Iesu ap anega wan.

53-54 Iesu ae vemo aepen tan go Parisi ge iup wadidiamuine nagire den koevet diguran amba singui gapan anenen Iesu wabambamasepi warapen menan tane.

12

Da wa da ta taine nagirewa

1 Koni ap gapan, waenapan arugataet iragen da tauan, to iam iwanumune, ap mepe barat mutan, evene wai den kapet natamuiwanumun. Ap gapan, Iesu wadiamot mega namu anega wadiamon, “Buredi tutut wapen menan atagin mini enane, ap umap Parisi nagirewa nop muga watutunak gene taine men ae yao kakayesen. Iwa mu da wa da ta taine nagirewa amba mu koewa muga e imuya warepi tawa.

2 Yao kakayesen, iwa dim dim iravi ukum umine, wam evi amba God wa arogameta. Dim dim da gungunu tainewa, wam evi amba aroga taueta.

3 Ap mini, nop da da mumakaraua wane ame wamu amba anuin. Amba sia nop da da simura pa gwanap wanewa, ame pa namboyap oit aroga wain.” Iesu ap anega wan.

Da tawa anuit?

4 Iesu sia anega wan, “Evenan wainawa, ne wadiaepena anun. Waenapan etuya megenat toguguraep borit wai, ame mu tamu ya tai, iwa guaya den ya to koeragamain.

⁵ Go da tawa tapen menan wadiain. Ame God tawa daiton anun. Iwa me toguguraep borit wane go aigap sia aro amun mega wandia, ap gapan guaya merao arewa gapan uatameta. Menan, e God tawa taiwanian!

⁶ Nenip muguap nani yamunaet garewa muga baware uon, ame moni agim make dendeniwa dere mugenat gapan une tainewa. Go nenip iragi, daiton daiton, God munan anuiniwa.

⁷ Ap umap sia, God iae gume daiton daiton iragi batnak itaminawa. Ap menan tap ya anune. God enan aigap tata iwa garewa ega tapi nenip arugataet om mega garao mumen.”

Upi Iesu menan wane, amba upi waboborane

⁸ Iesu sia anega wan, “Wapena anun. Orup da da, waenapan yaumakamup anega wapi, ‘Ne Iesu otu waiwa’ ame ne Kimani Vitana Apanewa, wam eviwa, God anea mega namumup gare anega wain, ‘Ge ne orup negawa.’

⁹ Go waenapan yaumakamup orup da waboboranegipi ne God anea mega namup gare evi amba waboborain.

¹⁰ Orup da da Kimani Vitana Apanewa inanap nop koevet wapiwa, God koewa mega ameme anu ae veta. Go orup da da God Guewa inap notatae ta wapiwa, God koewa mega ame anu ae ya veta.

¹¹ Wam evi da amba, waenapan pusia warupapen menan wat naue Diu opata waine paewa gwanap amopi, ap gapan ek tantanaya ta ta ge nop wa wa gopewa ya anune.

¹² Iwa wam ame gapan nop anenen wawa Guewa Woup Seniwa amba wadi-aeta.” Iesu ap anega wan.

Puraput apanewa bumbawam tani maibewa

¹³ Orup da waenapan aru ame iam wanumone berimup Iesu anega dien, “Wadianet nugawa, tatana da, mamana wan dim dim yon boreni, ame tagu mega, ae ve nun aeni, ame upi yan se nenep.”

¹⁴ Go Iesu gare wadien, “Apan negawa, bagu sisi ega tamanamepen menan orup ambe ne tat wan?”

¹⁵ Boge Iesu waenapan iravi anega wadiamon, “Ae yao kakayesen amba taiwanian! Gui togon tane tawa menan agun anu kakayesen. Apan da inak kakaewa warapen menan wan dim dim yon boreni ame inak ibariwa uon.”

¹⁶ Amba Iesu maibe gapan anega wadiamon, “Kwan puraput apanewa da at piup mega taba kakae guragut veramon amba arugataet yaniwandin.

¹⁷ Mek imua anun, ‘Taba nega aruga semo semo paewa gase bararaen. Ne dim da tain?’

¹⁸ Endi ne map anega tain. Sea sea paewa benak mumain amba bawarentu tumop, amba taba ge puraput nega gwanap semoin.

¹⁹ Ap tumopena nek ingane anega wain, Enda, taba puraput en aruga munan seaan. Menan wagat wanigingan amba taba kaum gega naingan amba aton tain-gan,’ mek ingane ap anega wan.

²⁰ Go God apan ame anega dien, ‘Ge bumbawam apanewa. Mum ma endiwa gapan ge inak gega waseagepen, bogitai. Bogisewa taba puraput goandage waana da tambuta?’ God ap anega dien.

²¹ Inak mame orup da da muk munan anu gurane wan dim dim diriga aita seane tainewa. Go mu God menan ya anu tapi menan mu maup nagirewa uon, go mu bumbawam nagirewa.” Iesu ap anega wan.

Inak ega menan gop ya yagiep

²² Menan Iesu wadiamot mega anega wadiamon, “Ap menan ne wadiaepena anun, inak ega menan gop ya yagiai wan-dan. Inak ega warapen menan taba am-bagan tam nai amba wanup ambagan tam enai ap menan gopewa ya anune.

²³ Iwa inak wariana ame ibariwa, go taba ame gauarap. Amba sia etuya ame ibariwa go en wanup megawa ame gauarap.

²⁴ Nenip wao guegue muga yao anun. Taba ya veriwanum, ya tuiwanum dugupa ya siwanum go God taba muga munowan. Amba e garewa ega nenip garewa garawase aigap aen, ap menan gop ya yagiep.

²⁵ Ame den, e gop anuihana gapan borit wapen wamewa ya garawatai amba inak gega wam upi sia use intum ya tai.

²⁶ Ap menan wam otu da bobou inak ega gapan sia use intum ya taianawa iwa dimen wan dim dim aritawa men gope yagien taiwanin?

²⁷ Endi rarema yanine ame ase anun. Mu nao ya taiwanum amba wapimu okomewa menan ya anuiwanum. Go wapena anun. Ayop Solomon kakae guragut mega arugataet go me en wanup kakaewa rarema ame enini umap da ya eniwandin. Rarema mega ame aigap iragen.

²⁸ Ap den sia, God unawat ame kwayupe tainiwa go wam daiton megenat iwa iman kurat wapi piup i nagirewa omaya irain. Menan God unawat menan ap anun taini apanewa, enan den taiwan. Ap menan sisi kwayup aigap di ta eneta. Kaiwan, e God inap otu da anu tumasiana nagirewa.

²⁹ Menan, taba kaum ega yoa ya tane. Imuya gop ya anuiwanian.

³⁰ Iwa God tandayasine nagirewa, at at iragi, wan dim dim mame miniwa yoa taiwanum. Menan Mamaya kimaniwa bagu sisi egawa asigip tan. Menan gop ya yagiep taiwanian.

³¹ Go gare, inak ega gapan namu iragen, God toemuewa yangure taiwanian. Amba gare God taba en wanup ega den eneta.”

Garewa nuga kimani gapan wandia

³² Iesu sia anega wan, “Menan wae-napan nutuya uoni nagirewa, e gop ya anune, iwa Mamaya toemu mega amunewa atonu den enat anuiwan.

³³ Puraput ega ase une tan amba moni ame purapuse uoni nagirewa munan. Ap gapan moni ige egawa bebep ya wata iwa garewa ega kimani barene wandepi uon ya tata. Amba sia aupa up nagire da up ya tain amba kensere ya ketnak nata.

³⁴ Iwa, e puraput ega kakaewa ambagan wandini, imuya potaya ap wandini arewa gapan ap mepe den wandia.”

Iesu sia tauepi menan nene yamam tan

³⁵⁻³⁶ Iesu sia anega wan, “Pa ayope da nao mega taiana nagirewa umap wanien. Ayop ame naine mutat baripe napen

menan aepi, ago mega pa amat taiwanu-main. Sia tauue, tonan ken ken topi ago mega serarat watapain. E ap umamup en wanup ega en en kakayat tan, aitambu wantambu tan, nene yamam taiwanian.

³⁷ Tavewa di, ago nagire wanumo nene yamam taiwanumampina pa i apane tauue yawamopi mu aton anuin. Amba pa i apante en wanup mega kakae entan ta nao nagire wanupewa eneta amba, ago nagire megawa ae wanumot diamo amba tauue taba muga muneta.

³⁸ I apante mum gagap o woup yumewa gapan sia entan pa tauepi ago mega nene yamam taiwanumampina yawamopi, mu aton anuin.

³⁹ Amba sia anu awan. Pa i apanewa wam ansena up apante tauepi anupo nene yamam ta wandepo, gapan up apante warup oisepo, amba pa mega ya benak unuk aepo.

⁴⁰ Ap mini Kimani Vitana Apanewa wam ansena sia tauapena e oare, ap menan yama agun taiwanian.”

Upi Iesu noa anuin upi ya anuin

⁴¹ Apan Pita Iesu singui wayaven, “Ayop nugawa, ge maibe ame nunan waan o waenapan iravi munan den waan?”

⁴² Ayop Iesu maibe gapan gare anega wan, “Pa i apante nao mega taini asigip ta noa warini apanewa ware pa mega kwayup tapen dien. Amba nao mega taini apanewa ame ago nagire upine taba muga muga muniwandapen menan die amba at uguge daio aen.

⁴³ I apante ae sia entan tauepi wamewa gapan, nao waneni apanewa nao mega taiwandapina yavepi nao taini apanewa ame aton arita anuta.

⁴⁴ Ame menan, pa i apante puraput mega iragi kwayup tapen dieta.

⁴⁵ Go nao taini apanewa mek anega anupiwa, ‘Ne ayop nega menawaet ya taueta.’ Ap anuni menan, nao nagirewa upinewa gaura bim bim guramo ae semon amba nao ae ve taba kaum kaimake dena na, bumbawam ta aiwadata.

⁴⁶ Ap taiwandapina, pa i apanewa tauepi wamewa me oare iwa me menan amat ya taiwandin boge me taueta. I

apane taue gamu to keketnage semu semu ta ae se amba God ya anu tumasene ge borit wane nagirewa at muga gapan baraeta.

⁴⁷ Ap menan, nao taini da ayop mega noa anun go amat nene yamam ya tapi ame garewa gaura kaimakaet to papau-nageta.

⁴⁸ Go nao taini apante dawa ayop mega noa ya anu aven menan koevet tani ame garewa gaura otu kamontu tota.

God nao mega baware enepi ame garewa baware warapen anuiwan. Amba aigap sia enepi garewa aigap sia warapen anuiwan."

Iesu waenapan nugut nugut apanewa

⁴⁹ Iesu sia anega wan, "Ne piup ma omaya iramopen men tauan. Tave di, ne namunap iramopo ame kakae!"

⁵⁰ Ne itan ugu vegaek anu tanapena ame dup mini ianegepi wandia. Tave di, serarat dup ianegepo, ame kakae iwa ne nononga anu sisimepena tandaewa anuivin.

⁵¹ Ne pia nonup enapen tauat anuiwanin go ap menan ya tauan. Ne seu todumapen tauan.

⁵² Ap menan, endi mame use aeniwa, waenapan nani yamunaet pa daiton inine nugut mumain amba derewa yone yampoa den gare gare nenan notatae wain.

⁵³ Apan otua dere gare gare nenan notatae wain. Waen orewa dere waginiwa ewa dere nenan notatae wain."

Iwa dimen God endi dim dim da tainiwa ya anu aviwanin

⁵⁴ Ap mepe, Iesu waenapan sia anega wadiamon, "E yangut tane amba irikup gwagwara yawane anega wai, 'Ma ugin taueta,' ame boge ugin di taueta.

⁵⁵ At sirit bubup tapi yawane anega wai, 'Endiwa amun viseta,' ame boge di viseta.

⁵⁶ E da wa da ta taiana nagirewa. E piup ge kiman gwanewa guegue mega anenen venasini yawa wat mega, ame asigip tayan. Go iwa dimen God endi dim dim da tainiwa ya anu aviwanin?"

Anavi ega inamup gare baigan tan

⁵⁷ Iesu sia anega wan, "Amba sia, iwa dimen guegue kakaewa koewa ya anu aviwanin?

⁵⁸ Evenaya koewa ega men diguguraepi amba nauyae wanene nagirewa namumup aisene tawa menan e namu baigan tapen neginewa yop taiwanin. Iwa baigan ya tanewa, apan ame nauyae wanene nagirewa namumup yonane amba wanene nagirewa punip nagirewa nanip seaep, amba gwat noke gapan seaep wanien.

⁵⁹ Wapena anun. Gwat noke seaepi ap mepe di waniai. Evenaya garewa mega iragi seane amba e tau aitai," Iesu ap anega wan.

13

Koewa ega ae ya veanewa, e borit wai

¹ Wam ame gapan, waenapan upi ap mepe wanumone Iesu inap anega wan, "Galili nagire da God men man gure iriwanumune ayop Pailat ita mega nagire tauan toguguramon borit wan."

² Iesu gare anega singui wayawamon, "Endi e anuiwanianawa, ian Galili nagirewa inak muga koevet iragen menan mu ap anega borit wane? Amba Galili nagirewa upinewa koewa muga baware uon menan ya borit wan?

³ Ap menan uon! Ne wadiaepena anun. E imuya potaya ya entan tanewa, mu umamup e iravi borit wai.

⁴ Amba sia, wata waenapan aonagaet pusin yamunaet pusin yamu yampo (18) at Sailoam, Ierusalem gapan, wanumone pa nononga da beure aigamup geare natamon borit wan. E anuiwanianawa mu inak muga koewa bumagap iragen aeni menan borit wane amba upinewa, Ierusalem gapan wanumuine, mu umamup uon?

⁵ Ap da uon! Wapena anun. E imuya potaya ya entan tanewa, mu umamup e iravi borit wai."

Inak nuga tavewa ya ieni maibewa

⁶ Iesu maibe gapan anega wadiamon, "Apan da egak mega gapan oma baep veren yaniwandin. Me tavewa iepi menan

nawan tani yangut taiwandin, go me tavewa da onep ya yaven.

⁷ Menan me egak kwayup taini apane inap anega wan, ‘Yao, oma ma en yampo gapan, ne ongingin baip ma tavewa da iepi menan nawan tanan taivin go da ya yaviangin. Menan ge to ae barao. Iwa dimen warden, piup taba mega mondi wapasimiwan.’

⁸ Go kwayup taini apanewa gare anega wan, ‘Ayop negawa, ae vea bodu daiton megenat sia wandep yawat, amba ne piup sia enu, noa borap denanu aigap seap.

⁹ Amba oma mame bodu uta namunupewa tave iepiwa, ame kakae. Go ya iepiwa, amba to ae bat.’”

Diu pura muga bawarewa gapan Iesu waen da wat inakamen

¹⁰ Diu pura muga bawarewa wamewa gapan da, Iesu Diu nagire opata waine paewa gwanap wadidiam wandin.

¹¹ Ap mepe, waen da airampu wareni menan vek tan amba gari wakautamen yon iwandin en aonagaet pusin yamunaet pusin yamu yampo (18) uon tan.

¹² Iesu waen ame yaveni anega dien, “Waen nega, ne vek gega endi mame di vesiangin.”

¹³ Boge Iesu naniwa waen ame aigap baraeni gapan, no utap gariwa endimasen tamana tan, yon wande amba God wa atonasen.

¹⁴ Iesu wagat wame gapan wat inakanmeni menan Diu opata waine paewa ame aritawa apanewa da gari gangan naen menan waenapan anega wadiamon, “Pura daiton gwanap, ame wam nani yamunaet nani yamu daiton nao ta ta wamewa wanumam. Menan wam ap me gapan inak warapen menan onaen go pura nuga bawarewa wagat wamewa gapan umap uon.”

¹⁵ Amba Iesu gare anega wadien, “E da wa da ta taiana nagirewa! Pura bawarewa gapan e den nao taiwanin iwa kaum munapen menan man kao ge man donki ega vetayan kaum napen men tam naumo aisiwanin.

¹⁶ Waen ma, watageta apane Eibaraam naewa, go Seitan panen vek mega en aonagaet pusin yamunaet pusin yamu yampo

(18) wande en. Iwa dimen waen mam pura bawarewa wamewa gapan vek mega ya wat vetat dianek wanin?”

¹⁷ Iesu nop mame wani menan, enu yawan waiwanumune nagirewa iragi umam wa guguramon. Go waenapan, Iesu nao kakae guragut ame taiwandini menan aton taiwanumun.

Oma maibewa

¹⁸ Iesu sia anega wan, “God toemu mega amunua dim da mini? Guegue ansena da wapena amba e anu kakayatai?

¹⁹ Guegue mega ame, oma baip makewa naewa mini. Naewa ame otu koentu go apan da vereni kai ware oma baware tan amba pu nenipewa onep dugup warane, nat enane ininewa.”

Taba buredi tutut waini maibewa

²⁰ Iesu sia wan, “Guegue ega ansena da wapena God toemu mega anu awai?

²¹ Waen da, buredi tutut wapen menan atagin mini potap wa damage kwaviro tan iravi tutut wan. God toemu mega ap anega.”

Kiman tonanewa kampon kampon

²² Iesu pa Ierusalem aiwandini gapan pa sewa otu koewa bawarewa den tau ge tau ae wadidiam wandin.

²³ Apan da singui wayaven, “Ayop nugawa, iman waenapan aruga o otu dere mugenat inak ewakewa tautanain?” Iesu gare anega dien,

²⁴ “Anun, kiman tonanewa kampon kampon ap menan kaimakaet utu unuk dotou aisepen menan tan. Iwa iman waenapan aruga unuk amopen menan tain go mu ya unuk amooin.

²⁵ Ap gapan, pa i apanewa yone tonan toboreta. E pa garip waniene tonana ere ken ken to anega wai, ‘Ayop nugawa, tonan nunan watap.’ Go me gare wadiaeta, ‘Ne ya asiginap, e amba tauayan waiwanin?’

²⁶ Amba e anega wai, ‘Taba kaum tau-tanaget nainton amba ge pa nuga namboya opata wadianean.’

²⁷ Go pa i apane sia gare anega wadiaeta, ‘Ne e oare, e amba tauayan waiwanin? ae venek asira aisen, inak koe koevet taiana nagirewa!’

²⁸ Wam ame gapan, ap mepe irip turup wan, ni kweramen asiginimen taiwaniai amba watageta apane Eibaraam, me otua Aisik amba upewa Diekap ge God nop mega waiwanumune nagire den God toemu mega gapan wanumuine yawamoi, go e garip inkae ankae wa irip waiwaniai.

²⁹ Wam ame gapan, waenapan piup at at iravi tauan God toemu mega gapan taba nain.

³⁰ Ap menan, endi evi yonine nagirewa, wam ame gapan, mu namu yonain. Amba endi namu yonine nagirewa, wam ame gapan, mu evi yonain.”

Koevet taiwandini apane Erot

³¹ Wam ame gapan Parisi nagire upi Iesu ine tauan anega wadien, “Ayop Erot toget anuiwan. Ap menan ge at ma ae ve, ak.”

³² Go Iesu anega wadiamon, “Aisen, ebo aopan apanewa ame manega wadian, ‘Ge anu, endiwa amba imanawa ne airampu gut oimop amba den vek nagirewa wat inakam mumivin. Go wam yampa nao nega uon tata.’ Nop mame apan Erot wadian.

³³ Go endiwa amba imanawa den ne angina neginewa gapan di angingain pa Ierusalem amba tauain. Iwa, God noa waini apanewa amba amba da togurep boepi ame tamana uon. Go Ierusalem gapan megenat di togurep boeta!”

Iesu pa Ierusalem men kaiwan wan

³⁴ Menan Iesu Ierusalem menan anega wan, “Ierusalem, O Ierusalem nagirewa! God noa waine nagirewa guramuiwanian borit waiwanum upi inayap watu enamoni agima guramuiwanian. Wam wam aruga kumkum otu wai ai bongamen magua gauarap enini, ne ap umap waenapan gega ai dangonet anun taivin, go e ap anega ya tat anu nimanegiwanin!

³⁵ Ap menan yao, God Paewa, Ierusalem gapan, konintu amba pokaet wande aiwandata. Amba iman e sia ya yawanegai. Go wam ansena evi da amba e ne inanap anega wai, ‘Ayop yaua amunewa gapan tauiagi, ap menan God wat aipakam gimasia,’ ap gapan, ne sia yawanegai.”

14

Iesu vek apanewa wat inakamen

¹ Pura bawarewa wamewa da gapan, Iesu Parisi ayope da pa mega gapan taba napen men aen. Mu ap mepe wanumone, waenapan me ebo da wapi anupen menan kem kem yaviwanumun.

² Ap gapan, vek ugu wapi, tutut tatawani apane da Iesu ine tauen.

³ Menan, Iesu Parisi ge iup wadidiamuine nagire den singui wayawamon, “Endi wagat wame gapan wat inakamepenawa iup nuga paina yamatain go?”

⁴ Go mu singui mega garewa da ya wan, no uon wanumone. Ap menan Iesu vek apan ame ware wat inakame watu enen aen.

⁵ Amba Iesu sia wayawamon, “Pura bawarewa gapan, e otuya o man ega da kaum menan urat warane urasewa gapan gearepi, wagat wame gapan serarat warupai go uon?”

⁶ Nop ame anune go garewa wapen menan umap uon, menan no uon di wanumon.

Ayamat ta wanien waenapan upi munan anun

⁷ Ap mepe, Iesu yawamoni, waenapan taba napen menan tauan go iravi watat kakaewa gapan wanumopen menan nanamu taiwanumun.

Ap menan maibe gapan anega wadiamon,

⁸ “Apan da naine mutapen baripe genan wapi, watat kakaewa da yop ya ta, wanige, iwa apan bawarewa da evi tauepi menan,

⁹ barip i apante, e dere enan wani, go inagap tauet anega wadiageta, ‘Bawarewa taueni menan watat gega mame apan ma ve wan,’ ap anega wapi umame den etop asira age ae wanigai.

¹⁰ Go guegue ame ya tane gare ma tan. Genan wapi etop wainge amba i apante tauet yawagepi anega wata, ‘Enda, at ma ae ve age watat kakaewa paina ao gapan wainge.’ Ap anega wapi, waenapan ap mepe wanumopi viriga tain.

¹¹ Ap umap sia, orup da da muk ingane ao wat bawaramene tainewa ame God aoma wat otutam mometa, amba waenapan da muk aoma wat otutamene tainewa

ame God ao wabawaram mumeta.” Iesu anega wan.

¹² Iesu barip i apante, Parisi apante ame, inap anega wan, “Ge wam ianupewa o mum gine tabaewa napen menan, evenak waigawa o tatak gwanik amba dugup gegawa o evenak waiga pa mainagape puraput dena nagire munan ya wa. Iwa mu wam da gare genan wain ap menan ge garewa gega ewagai warai.

¹³ Go barip tawa, puraput uoni nagire, enkana ankana nagire, pusi berok mutanewa nagire amba yame borat mumeni nagire munan wa.

¹⁴ Waenapan ame garewa gega ya genain, ap menan God wat aipakam gimagaeta. God wam uiwa gapan wapi ame kakae tane borit wane nagirewa inak muse sia yon wanumopi ap mepe garewa gega warai.”

God barip mega maibewa

¹⁵ Orup da, ap mepe Iesu den naiwandini, nop ame anuni menan anega wan, “Waenapan God toemu mega gapan taba naiwanumampina ame aton aigap anuin.”

¹⁶ Boge Iesu apan ame die anega wan, “Ne gutut wapena anun. Apan da barip baware tapen taiwandin waenapan arugataet da munan sep baraen.

¹⁷ Barip wamewa gapan, barip i apante ame nao nagirewa wa oimon amo gaset sep munan wani nagirewa wadiamon anega wane, ‘Onaen, wan dim dim iragi ta seton amat wandia.’

¹⁸ Go mu iravi imumu daiton tan tanda di wane. Apan namua sep apante anega wadien, ‘Enda, sintan nega ma anu. Ne at piup ewake une tana yawapen angewan barip gage ya ongain.’

¹⁹ Apan da sia anega wan, ‘Enda, sintan nega ma anu. Man kao nega aonagaet une tana menan ange upa semo yawapen taivin ap menan barip gage ya ongain.’

²⁰ Amba apan da sia anega wan, ‘Ne waen ewake naitan menan barip gage ya ongain.’

²¹ Boge sep apante sia entan tauue barip i apante oit muga wadien. Barip i apante gari gangan naen anega wadien, ‘Serarat

ak! negin negin, pa namboe namboe ame gapan kaya kayawan tanewa, pusi nani koe tanewa, yame borat mutanewa amba dai tanane nagirewa iragi wa upam onaen.’

²² Sep apante ae amba entan sia tauue anega wan, ‘Ayop negawa, wadianegeana di tan. Waenapan tauan go pa ya barat mutan.’

²³ Ap menan, barip i apante sia wadien, ‘Waenapan pa nega barat mutapen men sia ak nein nein iragi yop ta waenapan yawamo kaimakaet wa naumo onak,’ barip i apante ap anega dien.

²⁴ Ne wadiaepena anun. Waenapan namu venamu di wana nagirewa, mu barip nega da den ya tananek nain.” Iesu ap aenga wan.

Nuk anutoni ae veat Iesu mega anut

²⁵ Wam da, Iesu waenapan aruga tauan amuiwanumune gapan, Iesu inamup anega wan,

²⁶ “Waenapan da da ewanap yonat anupi nenan anu gurat aigap anup. Ine mame, waene otu, tase gwani, domare waiwa amba mek inak megawa ya tandayat mumiwandapinawa ame ne wadiamot nega ya di tain.

²⁷ Ap menan, orup da da ne yauna menan ugu vegaek bagu sisi anu, evinap ya onamopiwa, ame ne wadiamot nega ya di tain.

²⁸ Ame anupen menan nop ma anun. Orup da pa nononga ao tu dorat anupiwa, me namu ae wande, moni om ta, pa ame tu wabora bora omewa wat nugut ae barepi amba pa ame tuta.

²⁹ Me namu ap ya tapiwa, pa ibariwa sewa megenat ene ae veta iwa moni umap uon, ap gapan konintu wanumone nagirewa yave wawa koko anega wain,

³⁰ ‘Apan ma pa tut wa tani go ya tun waboria,’ ap anega wain.”

³¹ Iesu maibe dawa, gine daiton, anega wan, ‘Nop da sia mam. Ayop da yone ayop dawa inap anan warat anupiwa me namu ae wande imua upe se anega anuta, ‘Ne ita nega nagire 10,000 den go me ita mega nagire 20,000, nu garao mumait go?’

³² Uon anupi, anavi mega wandap onam wanumampina gapan me nao nagirewa

sep watu enamo nonup warup barepen noa wain.

³³ Ap umap, dim dim ega da ae ya veanewa, wadiamot nega ya tai.”

Siuran danse mega uon tan

³⁴ Amba Iesu sia anega wan, “Siuran kakae, go dansewa mega menawaet ninen garepiwa, ap gapan e anenen tane amba dansewa sia wata? Ame umap uon.

³⁵ Dansewa mega ap uon tapiwa, wae-napan taba kakae sia tapen menan den ya danamain go siuran ame denanu mini aipa uare ae di veain. Darinaya den wandepi wana anun.”

15

Man sip wakaumeni maibewa

¹ Wam da, moni bongamine amba koewa taine nagirewa Iesu nop mega anup menan tauan.

² Parisi ge iup wadidiamuine nagire yawamone gunare den anega wan, “Iesu koewa taine nagirewa waupamo taba tanamon naiwan.”

³ Menan Iesu maibe gapan anega dia-mon,

⁴ “E orup da man sip gega apane nani yamunaet (100) inagap wanumopiwa. Wam da man sip daiton wakaumewa, ge man sip upinewa 99 pua ae vemoi, daitona ame yoagai.

⁵ Daiton ame yawawa, ge aton aigap di anui amba man sip ame wara onegap barae wat ongai.

⁶ Ge pa gega tauawa gapan evenak waigawa, pa mainagape wanumune nagirewa den munan wap onamop anega wadiamoi, ‘Aton anuivin iwa man daiton wakaumana go yop tan amba sia waran.’

⁷ Menan endi wadiaepena anun. Gutut mame wana ap umap sia, orup daiton inak mega koewa tainiwa, me imu posewa amba inak megawa wat entan tapi menan kimani, anea iravi den, atonua aigap iragen anuin. Go waenapan upinewa (99) ame mu koewa muga uon anune menan, kimani, anea iravi den, inamup aton otu kamontu anuin.”

Moni daiton wakaumeni maibewa

⁸ Iesu sia anega wan, “Ambera sia, waen da moni gwat make mega aonagaet inap. Daiton wakaumepi, me dun ire pa kuyokuyo to, yambuni yop tapi amba yaveta.

⁹ Yavepi evene wai pa mainape den munan wap onamop anega wadiamota, ‘Aton anuivin iwa moni nega wakaumana sia waran,’ ap anega wata.

¹⁰ Menan, endi wadiaepena anun. Maibe wana ap umap sia, orup daiton inak mega koewa entan tapi menan aupa kimani God anea mega aton baware di tain.”

Otua da wakaumeni guturewa

¹¹ Iesu anega wadiamon, “Apan da otu wai dere.

¹² Gwaniwa mamewa anega dien, ‘Maman, kwan puraput yan se negawa nen.’ Menan mamewa seu enu yan se tase dere di munen.

¹³ Wam animpo mini amba, gwaniwa tambuni ao yone at wandap da di aen. Ae erere goyago ta di danamen.

¹⁴ Iravi wakaumeni amba at ame gapan wankakau baware da tau aen, ap mepe enup aren.

¹⁵ Ap menan me ao yone at ame apane da inap nao wat nasen, amba apan ame tuan mega amat tamuiwandin.

¹⁶ Tuan kanu etua tunu munen nai-wanumune me den nat anun, go waenapan da kanu ya wanane.

¹⁷ Wam ame, anu aven namu anenen taiwandiniwa, mek anega anun, ‘Maman nao mega nagirewa antaba arugataet nai-wanum, go ne mapa enup aranegiwandin bop konintu tapen taivin.

¹⁸ At ma ae veap ewagai angep tauap mamana inap anega wain, Maman, koewa God inap tan den inagap tana kakae uon.

¹⁹ Ne otuga dianek dianek go ne kakae uon, go tanege nao ayamat gega taine apanewa mini da tap.’

²⁰ Ap menan otua at ame ae ve yone mamewa ine di aen.

Otua isipa wandap oniwandin gapan, mamewa yaveni otua menan bagu sisi anun. Boge mamewa serarat ae dana taun ua ton.

²¹ Otua anega wan, ‘Maman, ne koewa God inap tan den inagap tana kakae uon. Ne otun dianek dianek ne kakae uon.’

²² Go mamewa nao nagire megawa diamo anega wan, ‘Serarat wanup gogotaewa wat onaen pan wanen. Den naniwa kwasip wat enan ge pusi okomua en wanen.

²³ Amba man kao otu uruavewa togurane barip tat wat aipakamepen.

²⁴ Iwa otuna boen, go endi me inakaen, me wakaumat anun, go endi tautananggia,’ wani boge barip menan tugun wat aipakamene.

²⁵ Koni ap gapan, tasewa egaga iwandin. Ame onin e pa auge taueni, sinao tarep doak ame anun.

²⁶ Menan nao taini apane da vene wan onen singui wayaven, ‘Utu dimen sinao tarep taiwanin?’

²⁷ Nao taini apanewa ame gare anega wan, ‘Gwaniga sia tauen menan mamaga yone man uruavewa da toguren mame barip tuguiwanum, iwa me inak ware pa sia taueni menan.’

²⁸ Tasewa nop ame anuni gari gan gan naeni menan pa gwane ya unuk aen. Menan mamewa garip tauue ae namanasen pa gwanap onapen dien.

²⁹ Go otua ame anega wan, ‘Maman, wapena anu. Ne en arugataet inagap waingen ayamat taingin amba nop gega waingiana ame nogda ya to kayasen taingin. Go ne ap taingina menan man da ya nenan amba barip evenan waina den ya tanam nan.

³⁰ Go ge otuga ame, yone moni gega ware negin gagape waene wai mun wandin uon tan, ma pa taueni amba ge yonaan man uruavewa da togut wanaan.’

³¹ Ap wani menan, mamewa gare anega wan, ‘Otunawa, ge wam wam inanapaet waingianawa, menan wan dim dim nega ame iravi gegawa.

³² Go endi onge wat aipakamet aton tapen, iwa gwaniga mam boet anutoni, go inak ware sia tauen, me wakaumat anutoni go me sia tautananen.’ ”

¹ Iesu wadiamot mega gutut ma anega wadiamon, “Puraput apane da nao mega kwayup taini apane den wanumon. Orup upine tauan i apane ame anega wadian, puraput gega kwayup tainiwa upi ebo aopan tan wakaumiwan.

² Menan, i apane apan ame menan wan taueni anega wadien, ‘Oitaga anuina ma dim da gapan? Ge daragi moni nega anenen taana oisewa wadianek, iwa endi ne wa tonak gimagian, nao gega mame uon di tan.’

³ Puraput kwayup taini apane mek ingane anega anun, ‘Endi map anenen tain? Aritawa nega nao nega ae veat dianegen. Ne nao piup tupen menan umap uon amba den mondi moni menan mup ae wainga wainga umam anuin.

⁴ O, endi gase anuna. Ap tapena gatawan nao nega mapa wakaumapena, evenan waina aruga pa muga muga gapan waup nimanegain.’

⁵ Ap anega anuni menan, me manega tan. Manapawa, ayop mega inap, waenapan da da moni totnagene nagirewa munan wan tauan. Apan namu inap taueni singui wayaven, ‘Enda, ge ayop nega moni puakewa garewa animpo wanapen wandia?’

⁶ Apan ame gare wan, ‘Ae, ne kaum ganip monewa mini udan baware 100 wanapen wandia.’ Ap anega wani menan, kwayup taini apane manega wan, ‘Umap, garewa gega ogewa ma wara, ae wanik, amba ugup da manega se, ame udan baware 50 wanapen megenat ogewa se.’

⁷ Apan dawa taueni kwayup taini apane singui wayaven, ‘Ge ayop nega garewa animpo wanai.’ Apan derewa gare anega wan, ‘A, ne garewa taba uit kaenat enana 1000 wanapen.’ Ap anega wani menan, kwayup taini apane sia anega wan, ‘Garewa gega ogewa wara ok manega se, taba uit kaenat enapena 800 megenat wanap.’

⁸ Kwayup taini apanewa eboewa ap anega taiwandini. Amba ayop mega oisewa ame anuni gapan kwayup taini apanewa wa atonase anega wan, ‘Ge asik taana apanewa.’ Ayop mega me

wa atonasen iwa piup gapan koewa nagirewa iamupe baware taiwanum go God ganat mega nagirewa iamupe baware ya taiwanum. Ap menan kwayup taini apanewa puraput gapan waenapan aruga evenan tamoni mini taiwanian.

⁹ Menan, ne wadiaepena anun. Piup monie purapuse gapan piup nagirewa aton munigan amba evenan taingen, iwa evi amba puraput ega uon tapi gapan evenak waigawa yaibobot paewa gapan waup gimagain."

¹⁰ Amba Iesu sia anega wan, "Waenapan guegue muga manega, orup da wan dim dim otu kamontua tamana di kwayup taiwandapinawa, evi amba wan dim dim bawarewa tamana di kwayup taiwadata. Go orup da wan dim dim otu kamontua ebo aopan gapan ta koeragamepiwa, evi amba wan dim dim baware den ebo aopan gapan ta koeragameta.

¹¹ Ap gapan sia, ge piup monie purapuse ebo aopan gapan wa koeragam taianawa. God den ya anu tumat gimageta iwa me kimani yaibobot kakae guragut megawa ge wakaumewa tawa.

¹² Ap sia den, waenapan puraput muga genane go ge yambuni kwayup ya taana menan puraput upine garaet gegawa da ya genain.

¹³ Amba nao apante da aritawa mega dere wanumopiwa, ame gauaramup nao ya taiwadata iwa aritawa mega dawa menan anu guriwadata amba dawa anu koeamiwadata. Da noa wareta, amba da tandayaset. Ap umap God men anuiana moni tandayatai moni men anuiana God tandayatai." Iesu ap anega wan.

Iesu nop upi den wan

¹⁴ Nop ame wani, Parisi nagire Iesu nipec diane iwa mu moni menan anu gurine nagirewa.

¹⁵ Menan Iesu gare anega wadiamon, "Ek kakaewa ega waenapan wadiamuiwanin go God imuya yaviwan. Waenapan dim dim yave imuwa waren menan anu gurane tainewa ame God yamap aninke den.

¹⁶ Iup namua God nop mega waiwanumune nagire nop muga den oniwandin

en amba Dion tauen. Dion taueni God Nop Oit Kakaewa ap gapan endi ma onini, menan waenapan aruga opata gapan wadidiam wanumam. Ame gapan den wae-napan iravi God toemu mega muk use enu wanane, unuk amopen menan taiwanum.

¹⁷ Go piup ge kiman wat mutapen ame bemta go God iup mega namua semu otu koentu ase muta muta umap uon, kaimake iragen. Menan, iup namua wande aiwadata.

¹⁸ Apan da waenewa ae ven amba waen da ugup sia naisepiwa, ame inak koewa wainan gogo taiwan, amba waen memewa ae ven apan da ugupewa sia naisepiwa, ame inak koewa wainan gogo di taiwan."

Puraput apanewa ge apan Lasiros guturewa

¹⁹ Iesu gutut da anega wan, "Ap mepe kwan purapuse dena apante da me en wapagin mega tutup dena wat ene pot pot antaba kakae guragut na aigap dore iniwandin.

²⁰ Me pa mega tonanewa gapan dai apante da yaua Lasiros ugu wapi e omasi den wande en, amba wan dim dim mua wainiwa. Menan pot pot wat tauan tonana bariwanumun.

²¹ Apan kwan purapuse dena ame antaba napi semuroro pia geamopi aibu napen menan anu warden, amba eyao den tauan omat mega yamot naiwanumun.

²² Evi amba Lasiros wam mega tauen boen, amba anea kimani vitan waran amon omae baewa Eibaraam mainep baraen.

Ame ewap, kwan purapuse dena apante bop tan tune.

²³ Boeni amba ae koewa nagirewa borit wane amone wanumuine arewa gapan wande ugu wapi vege wa guren, yangut ao tani Eibaraam wandap da aupa yaven, Lasiros mainep den warden.

²⁴ Ame yaveni menan, ven anega wan, 'Maman Eibaraam bagu sisi nenan anu! Lasiros watu ena vit one nani piru kauma antapene merinap baraep wat iroramep, iwa ne oma meravewa gapan waingen yaginegiwan!'

²⁵ Go Eibaraam gare wan, ‘Otunawa ma yao anu, wataget piupa kabani waingeana wamewa gapan wan dim dim kakae guragut inagap no tantan, go Lasiros wan dim dim menan wat ire taiwandin. Endi me mapa kakaewa gapan yaentuk wandia, ap garewa ameme waingean oma yagiriwandin vek anuingi.

²⁶ Amba den endi mame e amba nu yau-makanup bumak kapit kanama da garaet ta baraene wandia, menan orup da da mapa enan asepagan ya onamoin gare amena nunan mapagan ya onamoin.’

²⁷ Menan purapuse dena apane sia anega wan, ‘Kaiwan, Maman Eibaraam, ne inagap waiangin, Lasiros watu ena vit ae mamana pa mega tauep.’

²⁸ Iwa, ap mepe, ne gwanin waina nani yamunaet vemo ongen wanumamun. Ame darine enumop, mu oma merao arewa mame tauepi tawa.’

²⁹ Go Eibaraam gare anega wan, ‘Ae, apan Mosis iup megawa amba God nop mega waiwanumune nagire ok semonewa, aipa inamup wandia. Mu ap gapan yave anuin.’

³⁰ Go purapuse dena apane sia anega wan, ‘Ae, Maman Eibaraam, ame ya umap. Go apan da namu boe sia inakae yon wande inamup aepi, ame nop mega anuin amba imumu gapan entanain.’

³¹ Go Eibaraam gare sia anega dien, ‘Go mu apan Mosis amba God noa waiwanumune nagirewa nop muga den ya anu warepiwa, ame boeni otua da sia inakae yon wandepiwa, nop mega den ya anu warain.’ ”

17

Pusiwa warup yavini apanewa

¹ Iesu wadiamot mega anega wadiamon, “Waenapan da da pusia di warup yawain, go kaiwan ta parisepi apanewa.

² Iwa ta pariset apanewa agim kanama da megap pansi antapene me ware puimania uat enepi, ame kakae iwa evi sia aro uoni nagirewa upi ta koeragam mumepi tawa. Go ame otu koe, iwa ta pariset apanewa me wanene aigap wareta. Gwat itani den megamup tau

sisinamo puimani pakit uasep borit wapi ame umap di.

³ Ap menan yambuni wanien!

Ame gapan den, tatae gwani koewa da tapiwa, me koewa mega vetavet tapen menan, kaimake den di dia wa. Me vetaet tapiwa, ame gapan koewa mega anu ae ve.

⁴ Amba den, me wam daiton gapan, koewa nani yamunaet yamu dere ge inagap ta amba koni nani yamunaet yamu dere taue anega diagepiwa, ‘Ne vetavet taivin,’ ame wapi ge koewa mega anu ae ve.” Iesu ap anega wan.

God anu tumat ibariwa

⁵ Iesu watu enamot mega Iesu anega dian, “Nu aigap sia anu tumat gimagepen menan wat agoat niman.”

⁶ Me gare anega wadiamon, “Oma baip make naewa otu koentu. E otu ap umap anu tumat nimanegene ame aroe gapan oma mokot ata anega diane, ‘Visik den ao bun yon wanik, ak puimania ae yan,’ ame no utayap di tata.”

Nao nagirewa guegue mugawa

⁷ Iesu anega wan, “Nao ega taine nagirewa inamup anenen anuiwanin? Egaga nao taini o man ega kwayup taini ame mum gine entan pa tauepiwa ge anega ya diai, ‘Serarat onak ae wanik, taba wat na.’ ”

⁸ Go gare manega wadiai, ‘Ak, taba nega da ta nen. Taba naingapena amase ge nenan bongam bongam ta amat wainge. Ne naitamepena amba ge taba gega ewap amba na.’ ”

⁹ Nao gega taini apanewa wadiana gapan tapi menan gaun wanai go?” Singui garewa Iesu mek anega wan, “Ae, ya wanai iwa ame nao mega di taiwan.

¹⁰ Endi e ap umap sia. E dim da tat God diaeni, ame taitamenewa amba e ek gare gare anega wai, ‘Nu nao taitoni nagirewa megenat di, nu bawarewa uon. Wadianeni gapan di taivin.’ ”

Vek bo'o tane apan aonagae

¹¹ Iesu pa Ierusalem dot aiwandini gapan, me at Sameria ge Galili yau-makewa poup tanatan muga gapan aiwandin.

¹² Pa sewa da taueni gapan, vek bo'o tane apan aonagaet paina yawan.

¹³ Mu Iesu asirantu wandap yawane gapan ven kaimakaet anega wan, "Ayop nuga Iesu, bagu sisi nunan anu!"

¹⁴ Iesu yawamoni anega wan, "Aisene, pirisi nagirewa vek ega kem kam yawaep." Iesu ap wani menan, mu negina amuiwanumune gapan vek muga uon tan.

¹⁵ Amba apan ameme da, mek ingane ae yaveni, omat gaset siran taran amone kakae tan menan, ewagai Iesu inewa sia one amba senave den God wa atonasi-wandin.

¹⁶ Apan ame Iesu ine taueni, boge namup nikapu enu amba inap gaun wan. Apan mame Sameria apanewa, (Diu uon go Diu nagirewa anavi mugawa).

¹⁷ Ap menan Iesu anega wan, "Ne vek bo'o tane apane wai aonagaet wat inakam muman. Daiton megenat sia entan tauen, upine amba amon?

¹⁸ At ugape apane ma megenat God yaua ao warapen sia tauen go Diu apane wai iwa dimen ya tauan?"

¹⁹ Boge Iesu apan ame anega dien, "Ao yon wanik ak. Anu tumat nimanegearna menan inak wariagi."

God toemu mega amunua namu tauen evi sia taueta

²⁰ Wam da, Parisi nagirewa Iesu singui wayawan, "God toemu mega andi amba taueta?" Amba Iesu gare anega wan, "God toemu mega tauapi yamayap ase ya yawai.

²¹ Menan apan da anega ya wata, 'Yawan, mame tauen o yawan, ata me tauen.' Ap anega uon, iwa God toemu mega gaseget tauen endi nimakayap wandia."

Kimani Viseni Apanewa sia taueta

²² Boge Iesu me wadiamot mega anega wadiamon, "Wam oniwan, evi amba Kimani Vitana Apanewa wam nega daiton endi waingina ame sia yawat anui, go ya yawai.

²³ Amba waenapan upi Kimani Viseni apanewa menan anega wain, 'Yawan, me itapa tauen,' o 'Yawan, taueni ase me,' ap

yawapen menan ya aisene, ewamup ya yonane iwa nop muga tavewa uon.

²⁴ Go yangwan warin kiman ganase waini mini, Kimani Vitana Apane wam nega sia tauapi gapan waenapan yawane-gain.

²⁵ Go iman namu iragen, ugu vegaek arugataet da anu wat ireta amba waenapan endi ma wanumune nagirewa enu tandaya nimanegain.

²⁶ Kimani Vitana Apanewa sia tauapena wamewa ame apan Noa wam mega gapan waenapan taiwanumune ap umap sia di tain.

²⁷ Menan, wataget Noa wam megawa gapan, waenapan wanumon, taba kaum nana kakayat taiwanumun, amba waeng apan naine musiwanumun. Ap anega tane aeni, Noa ae kabum mega gwanewa dotou aen amba boge ningoe tauen umammon borit wane.

²⁸ Amba watageta apane Lot wam mega gapan ap anega den sia tane. Taba naiwanumun, une gare gare taiwanumun, antaba veriwanumun, amba pa tuiwanumun ap anega taiwanumun.

²⁹ Go apan Lot pa Sodom ae ve tau aeni gapan oma yamewa aupa kimani aoma ugin mini vise waenapan iragi yagit gugurramon.

³⁰ Wataget taiwanumune ap mini, iman Kimani Vitana Apanewa sia tauapena wamewa gapan, waenapan ap umap sia di tain.

³¹ Wam ame inepi gapan apan da pa mega aigarip wandepi puraput mega pa gwanap tambupen menan sia ya vit aeta go ae ve tap serarat aeta. Ap umap sia, orup da egaga wandepi pa ewagai ya entan aeta.

³² Watageta apane Lot waenewa tani ap guturewa sia anun.

³³ Menan anun, orup da me inak mega menan anu gure taiwandapinawa, inak mega wakaumeta. Go orup da nenan anu gure inak mega wakaumepiwa, ame inak wareta.

³⁴ Endi ne wadiaepena anun. Ne sia tauapena wamewa gapan apan dere eragi daiton gapan aup inepi daiton wat angain amba dawa ae vein.

³⁵ Amba sia, wam ame gapan, waen dere taba napen menan kanu etua wariwanumampina, daiton wat angain amba dawa ae veain.” Iesu ap anega wan.

³⁶ Amba sia, apan dere nao tapi da wat angain amba dawa ae veain.

³⁷ Iesu anega wani menan, wadiamot megawa singui anega wayawan, “Ayop, inak ma iman amba venaseta?” Iesu gare wan, “Maibe da wapena anun. Bonigawa etua amba wandepi arewa gapan, nenip gingiman, etua napen menan ap mepe iamain.”

18

Wawa sisi taini kwapuraewa

¹ Amba Iesu gutut ma watu enamot nagire mega wadiamop anu gapan, mu wam wam mup taine ae ya veapen menan manega wadiamon.

² “Pa sewa bawarewa da gapan, waenapan wanene tamuini apanewa da ap mepe warden. Apan ame God viriwa ya tainiwa amba waenapan munan ya anuiniwa.

³ Amba ap mepe, waen kwapura da pot pot aen wanene tamuini apanewa ame ine tauen anega wainiwa, ‘Ne anavi nega paina yamasepen menan wat agoat nimanek!’

⁴ Wam nonongataet, kwapura ame ap taiwandini gapan, wanene apanewa waen nop mega tanda ta ago ya wanat anun. Go evi amba sia, mek ingane anega anun, ‘Ne God inap tap ya anuivin amba waenapan munan ya anuivin.

⁵ Go kwapura ma pot pot wayawangen waiwan, ap menan me aton anupen menan me mup wani ap omewa gapan di tain. Iwa ap ne ya tapena amba me pot pot manega taiwandapinawa, ne inak nega koe di tata!’ ”

⁶ Iesu sia wadiamon, “Gutut ame gapan, wanene apanewa ame, me apan kakae uon iwa God tawa amba waenapan munan ya anuiniwa go me ap anega tan.

⁷ Ap gapan nu God nuga, me kakae iragen menan waenapan mega mum ge woup dim kakaewa menan God inap mup wainewa, God me waenapan garewa

muga muniwadata, me ase ma da ya ta amba muneta.”

⁸ Iesu mek sia anega wan, “Den ne wadiaepena anun, God serarat wat agoat mume anavi muga toboramota. Go Kiman Vitana Apanewa sia tauapena piup gapan anu tumat nimanek wanumampina nagirewa da den yawamoin go?”

Parisi apanewa ge moni bongamini apanewa da

⁹ Waenapan upi muk ingane ae anuine muk kakae wanumot anuiwanum amba waenapan upinewa iragi koewa diamuiwanum. Ap taine nagirewa, guegue muga tamanamepen menan Iesu maibe gapan mu inamup anega wan,

¹⁰ “Wam da, apan dere Ierusalem God Paewa gapan mup wapen men dot amon. Da Parisi apanewa, da moni bongamini apanewa.

¹¹ Amba Parisi apanewa taue mek mini asira wandeni, ao yon wande mup manega tan, ‘Maman God, ne waenapan upinewa taine mini ya tainawa, mu yonane up tainewa, inak koe koe tainewa, negin gagap wainan gogo ise ta ase ta tainewa amba moni bongamini apane ase wandini mini den ya tainawa.

¹² Amba, maman God, ne pura daiton daiton gwanap wam dere genan taba virip taivin amba ne garewa nega warina, semua aonagaet genan den barivin.’

¹³ Go moni bongamini apanewa asirantu yone, i kaut enu amba bagu sisi anuni menan naniwa toganep pom pom to, God inap mup anega waiwandin, ‘Maman God, ne apan koerage bagu sisi nenan anu,’ ap anega wan.”

¹⁴ Iesu sia anega wan, “Wapena anun. God moni bongamini apanewa koewa mega anu ae veni gapan me pa mega aen, go God Parisi apanewa mup mega ya anun, pa mega mondi di aen. Ap gapan orup da da mek ingane yaua ao warepiwa, garewa God aoma wat otutameta, go orup da mek yaua aoma wat otutamepiwa, gare God me yaua paina ao wareta.”

Iesu orup otua wat aipakam mumen

¹⁵ Amba, waenapan upi otu waiwa bawarewa amba amapewa den Iesu

naniwa iamup seapen menan tambun onamone, go wadiamot megawa yawamo diguguramon watanamone.

¹⁶ Go Iesu orup otua munan anega wan, “Orup otua ae vemone, nenan onamop, ya watanamone, iwa God toemu mega orup otua ma miniwa mugawa.

¹⁷ Wapena anun, tave di waivin. Waenapan da orup otu ma mini God ya anu tumasepiwa, me God toemu mega ya unugeta.”

Piup puraput apanewa Iesu inap singui wan

¹⁸ Diu nagirewa, ayop muga da, Iesu singui wayaven, “Wadianet kakaewa, ne map anenen tap amba yaibobot inagewa yon borain?”

¹⁹ Iesu gare anega wan, “A, dimen ne apan kakaewa dianegingi? Orup kakaewa da uon go God megenat kakae.

²⁰ Endi ge God iup mega mame asigigap tan go uon? Me iup mega mame, Wainan gogo ya taingen. Orup da ya togura boep. Up ya taingen. Evenaga koewa da tani yawaana, ame ebo aopan ugup ya enu yawa waingan.

Inaga mamagawa ayamase ta muningan.”

²¹ Apan ame gare anega wan, “Ne orup otu waingena gapan ne iup mame waran iravi ta ongingin endi mame tauen.”

²² Nop mega anuni Iesu sia anega wan, “Go ge inak daiton megenat garawasingi. Ame wan dim dim gegawa iragi ase une ta amba kwan purapuse uoni nagirewa mun. Amba ge kimaniwa kakae guragut megawa aupa evi amba warai. Ap tawa amba ewanap onagai.”

²³ Go ayop apane, nop ame anuni gapan bagu sisi anun, iwa kwan puraput mega arugataet.

²⁴ Apan ame bagu sisi anuni menan Iesu anega wan, “Puraput nagirewa God toemu mega unuk amopen ame inamup kaimake iragen!

²⁵ Man bawarewa da, kainok ninoke gapan unuk tau aepen tapi ame umap uon. Ap umap, kwan purapuse dena apante da God toemu mega unuk aepi ame

den umap uon go kaimakewa mega aigap di.”

²⁶ Iesu ap wani menan waenapan manega anune, ame God wat aipakam mumeni gapan kwan puraput nagirewa puraput aruga tambune, menan uoni nagirewa anenen tain. Ap menan, waenapan Iesu inap singui anega wayawan, “Akae, God toemu mega unugepen kaimakewa da di, ap menan da inak ewakewa ware kimani unugeta?”

²⁷ Iesu gare anega wan, “Waenapan muk ingane aro muga tainewa gapan ya unugain, go God inap ap me kaimake den uon, menan dim dim tat anuini me di tata.”

²⁸ Apan Pita Iesu anega wadien, “Endi yao, nu dim dim nuga iragi ae veat evigap onanton. Nu inanup anenen?”

²⁹ Iesu sia anega wan, “Nop tave di waivin, orup da da God toemu mega menan pa megawa o waenewa o tase gwaniwa o ine mamewa o otu waiwa ae vemopi,

³⁰ piupa inak mame gapan God wat aipakam mega aigap tautaneta amba wam eviwa inak yaibobot wariwadata.”

Iesu boepi ao sia yon wandepi oisewa sia wan

³¹ Iesu yao tomage gapan watu enamot mega aonagaet pusinawan dere anega wadiamon, “Wapena anun. Nu pa Ierusalem dot anivin. Ao mepe God noa wataget waiwanumune nagirewa Kimani Vitana Apanewa oitana ok seane iragi tavewa taueta.

³² Diu nagire waranege waenapan ugupe nagire nanimu gwanap bat nimanegain. Ugupe nagire nipec dianege wa koeragam nimanegain. Giton en ananege amba

³³ wagu gapan tonek wanumain. Amba toguranegipi bonigatain go wam yampoa gapan inak nigat sia yon waingain.”

³⁴ Iesu ap anega wani go mu da ya anu awan. Iwa imumu ase to waramen.

Yame boraseni apanewa wat inakamen

³⁵ Ap mepe sewa arita da yaua Dieriko maniwandiniwa, yame boraseni apanewa da, ap mepe negin etop, ae wande moni menan mup waiwandin.

³⁶ Yame boraseni apane ame, waenapan aruga tau amone ununkewa anuni menan singui ma wayawamon, “Ma dim da taiwanin?”

³⁷ Mu gare anega wadian, “Iesu at Nasaret apanewa tauen aewan.”

³⁸ Yame boraseni boge kaimakaet ven anega wan, “Iesu watageta apane Devit naewa, bagu sisi nenan anu!”

³⁹ Namu onamone nagirewa anega diguran, “Nop ae ve,” go me uma sia anega wan, “Apan Devit naewa, bagu sisi nenan anu.”

⁴⁰ Iesu ame anuni menan, ae yone yame boraseni apane me inap wat onamopen menan diamon. Me ine taueni gapan Iesu me inap anega wayaven,

⁴¹ “Ne inagap dim da tat anuingi?” Apan ame gare anega wan, “Ayop, ne yangut tat anuivin.”

⁴² “Umap, yangut ta. Anu tumat nima-negeana menan inak wariagi.”

⁴³ Iesu ame wani, no utap apan ame yamewa ase watapen yangut tan. Menan Iesu ewap ae God wa atonasiwandin. Waenapan ap yawane menan iravi God wa atonasiwanumun.

19

Apan Sakias gutut megawa

¹ Iesu pa sewa Dieriko tau e iawandin.

² Pa sewa ame gapan puraput baware apane yaua Sakias iniwandin. Me moni bongamine nagirewa bawarewa mugawa.

³ Sakias apan Iesu waine, me dime den menan yaway anu gure taiwandin, go me da ase ya yaven, iwa me apan oninke amba waenapan aru ame iamen, toborane, napamup warden.

⁴ Menan, Iesu neginaet oniwandini gapan me namup serarat aeni boge oma da yaua Sikamo pain dore, Iesu yawapen men onep warden.

⁵ Iesu oma iap taueni paina ao yave anega wan, “Sakias, serarat vit onak. Wam ma endiwa pa gega gapan wain-gain.”

⁶ Sakias menawaet viseni boge atonu den Iesu gaunewa tan. Amba dere pa mega amon.

⁷ Waenapan ap mepe iam wanumune, ap yawane gapan notatae anega wane, “Iesu apan koewa pa mega gapan dere wanumopen menan aen.”

⁸ Pa gwanap, Sakias yone Ayop Iesu anega wadien, “Ayop, ne wapena anu. Ne endi wan dim dim nega yon borana upi seu enup kwan purapuse uoni nagirewa munain. Amba den orup da da puraput muga ebo aopan gapan karaua tambuna garewa degede aigap gapan gapan sia munain.”

⁹ Menan Iesu gare anega dien, “Wam ma endiwa, dun ganat pa gega tauen, iwa ge watageta apane Eibaraam naewa di.

¹⁰ Ne, Kimani Vitana Apanewa, God inak mega wakaumene nagirewa yomu tap inak ewakewa munapen menan tauan.”

Moni gwat make maibewa

¹¹ Iesu waenapan aruga waddidiam wandin gapan mu nop mega anuiwanumun. Ap gapan Iesu Ierusalem tauapen tani menan mu God toemu mega gine tutup da ase venaset anuiwanumun iwa mu anune Iesu pa Ierusalem tauepi gapan me piup iravi ayopewa tata.

Ap anune menan Iesu maibe gapan sia anega wadiamon,

¹² “Apan aritawa da, at wandap ayop tapen menan ae amba ewagai sia entan tauapen tan. Sia entan tauepi, me at mega gapan ayop muga taiwadata.

¹³ Aepen tani namup nao nagirewa mega aonagaet munan wan tauane. Moni mega gwat make daiton daiton mune amba anega wadiamon, ‘Moni mame tambun nao tan. Ne mawanap moni watu doriwaniampen menan moni mame eni-angin. Ne tauapena gapan sia nenan.’ Amba me at wandap di ayop tapen menan aen.

¹⁴ Go aritawa ame, at ame waenapan megawa ayop muga ya tat anune menan tanda tan amba sep nagire watu enamon at wandape nagirewa ame anega wadiamon, ‘Nu apan aritawa ma, ayop nuga ya tat anuivin.’

¹⁵ Go me gaset ayop tan, menan evi amba at mega sia tauen. Taueni amba anega wadiamon, ‘Nao nega taine nagire moni munana wane onamop. Mu moni

munana ame watu dorane omewa anupen menan.’

¹⁶ Nao taini apane namua taue anega wan, ‘Ayop negawa, moni gega daiton nenaana ne garewa ase aigap sia tambun aonagaet genian.’

¹⁷ Ayop apane anega wan, ‘Ge nao nega ta kakayat neniana apanewa. Ne otu kamontu genana gapan nona wara ta agingian menan pa sewa baware aonagaet ayopewa endi tat diagiangin.’

¹⁸ Nao taini apane derewa taue anega wan, ‘Ayop negawa, moni gega daiton nenaana ne garewa ase aigap sia tambun nani yamunaet genian.’

¹⁹ Ayop apane sia wan, ‘Umap, ne pa baware nani yamunaet ayopewa endi tat diagiangin.’

²⁰ Nao taini dawa inap taue anega wan, ‘Moni gega nenaana sia wat ongena mam. Ne warana wanup muku gapan wa panam karaua baraen wanden.

²¹ Ap tana iwa ge kaimakaet taiana apanewa menan taga tan. Dim dim gega da uoni union waringi. Ge nawak uon taba ya veringi go mondi naingi.’

²² Ayop apan ame anega wadien, ‘Ge nao koerage taiana apanewa! Nop gega waana gapan ne diguragain. Ne kaimake taina apanewa amba dim dim nega da uoni ame union warivin amba nawan uon taba ya verina go mondi naivin, ame ge asigigap.

²³ Menan iwa dimen ge moni nega enine arewa gapan bondan mini ya baraan aigap da ya waraan? Ge ap tapo ne entan tauana gapan, moni enine arewa kwayup taine apanewa, ap mepe moni enaana menan, moni maup mega otu da aigap nenapo.’

²⁴ Ayop anega digureni amba mainap yonane nagire anega wadiamon, ‘Apan ma moni mega daiton waseasen, ame moni aonagaeta neneni apanewa wanen.’

²⁵ Go mu anega wane, ‘Ayop nugawa, me moni gaset aonagaet tambuni, aigap wanat sia waingiana?’

²⁶ Ayop apane sia wan, ‘Wapena anun. Nop nega anu taine nagirewa God nop upi sia muneta. Go ya anune taine nagirewa nop otu da anunewa ame sia waseamota.

²⁷ Menan endi ne ayop ya tapen menan tandayat nimanegine nagirewa tambun onaen, namunap mapa guran boniga ae semon.’”

Waenapan Ierusalem gapan, Iesu wa atonasen

²⁸ Iesu gutut mame waiwandin uon taniwa ewap, me pa Ierusalem namu dot aiwandin.

²⁹ Iesu pa sewa dere, yaumua Betpadi ge Betani, maniwandiniwa sewa da ap mepe tunup yaua Oma Olip Yanane Tunupewa wakiap taueni. Ap mepe wadiamot dere watu enamo

³⁰ anega diamon, “Pa sewa namunup utapa ame aisen tauanewa, use tauan man donki otua da damiga taune yawai. Man ame gagap namu orup da ya amone. En vetan, wat onaen, mapa tauan.

³¹ Ap mepe, orup da yawae singui anega wayawaepiwa, ‘Man ame iwa dimen wat veswanin?’ Gare manega wan, ‘Ayop nuga, man donki mame menan wan tauaton.’”

³² Watu enamoni, dere amonewa gaset Iesu anen anen wani gapan yawane.

³³ Man donki ine tauan amba wat veswanumune gapan, man i apane singui wan, “E man donki ame dimen wat veswanin?”

³⁴ Amba mu gare anega wane, “Nu ayop nuga, man donki mame menan wan tauaton.”

³⁵ Mu boge waran amon Iesu inewa tauan, amba wanup aigape muga da waran man donki gagap aoma baraene amba Iesu wat agoasene man donki ame gagap wanden.

³⁶ Iesu man gagap ap aiwandini, waenapan wanup aigape muga tambu tauan amba negina memegamene aen, amba Iesu taue gagap aen.

³⁷ Oma Olip Yanane Tunupewa neginewa viseni gapan, ap mepe Iesu pa Ierusalem mainep tauen, ap gapan wadiamot mega aruga iravi atonu den God wa atonasen ve waiwanumun iwa mu Iesu yo ge kiman paua ugup ugup taiwandin yawiwanumune menan.

³⁸ Mu anega wane, “Ge Ayop nugawa. God amun mega gapan tauiagi menan wat

aipakam gimagia. Nonup kimani paina wandia amba oya oyae den God inap!"

³⁹ Parisi nagire ap mepe den. Senao ame anune menan gunat tan amba Iesu anega dian, "Wadianet nugawa, wadiamot gega atonuga manega waiwanumune menan diguguramo, nop ae vep!"

⁴⁰ Go Iesu gare anega wadiamon, "Wapena anun. Mu nop virip vepiwa, agim ata gare ao yone wa atonat nimane-gain."

Iesu pa Ierusalem menan irip wan

⁴¹ Iesu pa Ierusalem konintu taue ase yaveni gapan, bumagewa tuk wan Ierusalem menan irip wan,

⁴² amba anega wan, "Ierusalem nagirewa, baigan negine e endi anu kakayasepen menan anuivin. Go e tanda taiana menan negin ame oagaen wandia ap menan e ya anu awai.

⁴³ E baigan negine endi anu kakayasepen menan anuivin iwa, wam oniwan, anavi ega taue tonum ikukuk enu panayain, amba tainamu yamu yamu amboboraep wainiai, amba Ierusalem gapan yonep umap tapiwa ame sin dotoue garip onamoin.

⁴⁴ Amba anavi ega pa mame taue e otu wai den gut kokoeam imayain, ap gapan gwat daiton didi batamene gwarewa diri gagap da ya wandeta. Koewa ma iravi e inayap venaseta iwa God wat inakam imaepan taueni e ya anuina menan."

Iesu God Paewa unuk aen

⁴⁵ Iesu Ierusalem taueni amba God Paewa unuk aen. Ap mepe, wan dim dim muga gare gare une taiwanumune nagirewa gut oimon tau amone.

⁴⁶ Me anega diamon, "God nop mega ok anega sean,

Ne pa nega, waenapan ne inanap mup waine paewa.

Ok anega sean. Go e taiana up nagire pa muga karauawa mini entanen!"

⁴⁷ Amba Iesu wam wam God Paewa gapan God noa wadidiam wandin. Go Pirisi bawarewa ge iup wadidiamuine nagirewa ge ian Diu bawarewa mugawa upi den, Iesu waran togurapen tane.

⁴⁸ Go mu ware togut togut neginewa da ya anun amba taiwanumun, iwa pa nagire Iesu inap darinamu pemagen nop mega anuiwanumune menan.

20

Iesu amun mega noa

¹ Wam da Iesu God Paewa gapan waenapan wadidiam wandin amba God Oit Mega Kakaewa opata taiwandini gapan pirisi bawarewa ge iup wadidiamuine nagire amba waenapan dimae waine nagirewa den Iesu ine tauan anega wane,

² "Ge amun ansena da waran gapan dim dim mame taingi? Amun mame, da genen?"

³ Menan Iesu gare anega wadiamon, "Ne den singui inayap wayawaepen taivin.

⁴ Singui nega mam, apaan Dion dup iamuwandiniwa ame amun mega aupa kimani ware taiwandin go, gare mapa piupa waenapan upi inamup ware taiwandin?"

⁵ Singui mega anune muk wawa mutan anega wane, "Endi nu kiman amun mega ware taiwandat wata, me anega dianeta, 'E dimen Dion nop mega ya anu tumasiwanin?'

⁶ Go nu endi anega watawa, 'Amun waenapan inamup ware taiwandin,' ap anega watawa, waenapan ma iragi gwara toguguranain iwa mu anun Dion me God watu eneni apanewa."

⁷ Anega anuiwanumune menan Iesu singui mega garewa anega wadian, "Dion amun ame wareni arewa nu oare."

⁸ Menan Iesu anega diamon, "Ap menan ne den amun nega amba warana gapan ugup ugup mame taina ya wadiain."

Egak kwayup taine nagire maibewa

⁹ Iesu maibe gapan waenapan anega wadiamon, "Apan da nao egak mega da veren, amba amase taine nagire egak kwayup tapen menan semoni amba ae vemo at da ugup aen, en nononga di wande en.

¹⁰ Taba maup wamewa taueni gapan piup i apante nao mega apante da watu enen ae egak mega amase taine nagire inamup tauen, maup semua i apante

wanapen menan mup wan. Go amase taine nagirewa to papaunagen wa oisene mondi aen.

¹¹ Menan i apante, nao mega apante dawa sia watu enen tauen. Go sia to papaunagen me inap ta umamasene menan nao apante ame mondi aen.

¹² Ap menan, nao i apante apan yampoa sia watu enen. Egak amase taine nagirewa me epi tosisitnagen warup uat enane tau aen.

¹³ Amba nao i apante anuan sese anega tan, ‘Ne map anenen tain? Ne otuna imuna inap warina watu enain. Anse, ne otuna yave viripewa tain go?’

¹⁴ Otua watu enen oniwandin e egak amase taine nagire paina yawan muk ase ma anega wawa mutan, ‘Piup i apante otua oniwan. Apan mam iman egak ma yon boreta, menan anet togurat boep, amba egak mame boge nu yon borat.’

¹⁵ Menan waran sin garip uat enan togurane boen.” Iesu ap anega wan.

Amba Iesu anega singui wayawamon, “Ap tane menan piup i apante inamup anenen tamota?

¹⁶ Tave di, me taua egak amase taine nagirewa guramop borit wap, amba egak mega ware waenapan ugupewa munep kwayup tain.” Waenapan nop ame anune menan anega wan, “Akae, manega ya venasep, nu tanda!”

¹⁷ Ap wane menan, Iesu kem kem use-nagaet yawamo anega wayawamon, “Go God nop mega ok mame anega seane iwa mega anenen wai?

Arim ame pa tuine nagirewa tandayasen, koerage dian,

go God agim ame ware entanen amba pa tuine danewa venasen.

¹⁸ Menan waenapan da da agim ame aigap onan geomopiwa, ame kaime no topait wa pait ta semuroro ta seta, go gare agim ame orup da aigap gearepiwa ame to gogoton-agep atabobo venaseta.”

At i nagirewa moni seait go uon?

¹⁹ Iesu maibe mame waiwandini menan, pirisi bawarewa ge iup wadidi-amuine nagire den Iesu ambot warapen menan negin yop taiwanumun. Iwa mu asigimup maibe ame mu koewa muga

menan waiwandin. Go mu waenapan tamu anun menan Iesu evi amba to warat anun.

²⁰ To warapen menan amat taiwanumune nagirewa, Iesu enu yawa wapen menan gopat nagirewa karaua moni munan amba Iesu inap watu enamon. Mu mondigawa nagirewa mini tan iwanumun go singui tangui gapan Iesu nop da wabambamasepiwa, ap gapan mu anu to ware amo, at ame bawarewa apanewa nani gwanap barain.

²¹ Ap menan, wam da, mu Iesu inap singui anega wayawan, “Wadianet nugawa, nu asiginup ge waenapan muk anen wane taine ame menan ge imuga potaga ya wariniwa, go ge nop tavewa gapan God dim dim anuini om ap gapan tainampen neginewa wadianianawa.

²² Menan nu singui nuga mam. At Rom ayopewa Sisa nu moni se wanata ame gapan nu Mosis iup mega yamatait go uon?”

²³ Go mu nanamaset wan taiwanumune Iesu me asigip tan, menan me anega wan,

²⁴ “Endi moni agim makewa da ewangen. Yao, moni ame gamup da yaua o guewa ok seane?” Mu gare anega wan, “Ame ayop Sisa yaua ge guewa.”

²⁵ Me sia wadiamon, “Ap menan, wan dim dim Sisa mega wandepi ame Sisa di wanapen. God mega wandepi, ame God di wanapen.”

²⁶ Mu nop mega anune gapan gare tarak wan no uon wanumon. Waenapan namumup Iesu nop da anenen wa koeamep warapen menan tane go umap uon.

Borit wane nagirewa sia yon wanumoin

²⁷ Amba dugup Sadusi nagire, upi Iesu inap tauan. Mu dugup anu tu-mat muga gapan waenapan manega wadiam wanumun, “Borit wata sia ya inak nitait.”

²⁸ Menan Iesu inap singui anega wayawan, “Wadianet nugawa, watageta apante Mosis nunan iup ogewa anega sen, ‘Apan da waenewa otu uon boepi gapan me gwaniwa kwapura ame naise tasewa uewa orup se wanep.’

²⁹ Endi apante upi tatap gwanip yananewa nanin yamunaet yamunewa

dere mugenat wanumon. Namu bonewa mugawa waen naiseni go me otu uon boen.

³⁰ Menan gwaniwa ewap yaneni, tasewa kwapuraewa sia naiseni go otu uon boen.

³¹ Amba yampoa yaneni, waen ame naiseni go otu uon sia boen. Amba upinewa iragi ap anega tan orup ya sean amba borit wane.

³² Amba uiwa waen kwapura ame den sia boen.

³³ Menan endi apan nanin yamunaet yamune dere waen ame naitanewa go wam uiwa gapan waenapan inak muse sia yon wanumopi waen ame apan ansenawa waenewa?"

³⁴ Iesu nop ame gare anega wadiamon, "Endi waenapan naine musiwanum amba ore wai naine mutapen men muniwanum.

³⁵ Go waenapan borit wane evi amba sia yon wanumopi inak yaibobot eviwa gapan mu gare gare ya naine mutain den ore wai naine mutapen menan ya munain.

³⁶ Iwa mu anea umap wanumoin sia ya borit wain. Ame mu God otu waiwa iwa mu bop gapan God amun mega gapan sia yon wanumopi menan.

³⁷ Borit wane nagirewa evi sia inak muse yon wanumopi ame tavewa apan Mosis ok namua seni gapan wa ewanen. Oma ut yagit wandin yaveni guturewa gapan ok anega sen,
God anega wan 'Omae baewa Eibaraam, otua Aisik,
amba upewa Diekap, mu God muga daiton ame ne di.'

³⁸ Nop ame gueguewa mam, waenapan kabaniwa ge bonigawa mu God yamap iravi kabani wanumamun, iwa mu guamu den."

³⁹ Iesu ap anega wani menan iup wadidiamuine nagire upi anega wan, "Wadianet nugawa, nop gega kakae di waan."

⁴⁰ Ap anega wane iwa mu tap tan inap singui sia ya wayawan.

God Keriso mega Iesu

⁴¹ Iesu singui Sadusi nagirewa anega wayawamon, "Anenen gapan God wa watu eneni Keriso mega me watageta apane Devit naewa?

⁴²⁻⁴³ Ame tave di, go? Iwa watageta bukaewa, yaua Sam, gapan Devit Keriso evi amba me denip gapan tauapen menan ok anega sen,

God yone Ayop anega wadien, 'Nanina nutup arigewa gapan, ae wanigingan, ne anavi gega tambup, gauaragap singapena menan.'

⁴⁴ Nop ma gapan, Devit yone Keriso inap me Ayop diwandin go Devit namu yaneni apanewa amba Keriso evi yanen menan anenen entane Devit naewa mega ayop dien?" Iesu singui ap anega wan.

Iup wadidiamuine nagirewa koewa mugawa

⁴⁵ Waenapan Iesu nop mega anuiwanumune gapan wadiamot mega sia anega wadiamon,

⁴⁶ "God iup mega wadidiaine nagirewa munan ae yao kakayesen amba yon iwanian. Ian ame mondi yonane wanup kakae guragut enane, waenapan ase yawamopen menan apan apan tainewa, amba taba une taine arewa gapan amopi waenapan gaun munat anuiwanum. Amba den Diu opata waine paewa o barip gagewa gapan watat kakae iragena gagap wanumot anuiwanum.

⁴⁷ Go mu waen kwapura kaimakaet enu yawamon wane gapan kwapura puraput ge pa mugawa den tambune. Ap tane go mup paewa gapan waenapan yamamup muk ingane tap kakae tapen menan, God inap mup wa nonongaminewa. Koewa ap tainewa menan wanene baware aigap yawain." Iesu ap anega wan.

21

Waen kwapura moni God inap ian garaet tan

¹ Ap mepe, Iesu yangut ao taiwandini, me kwan puraput nagirewa upi yawamon pa Ierusalem, God Paewa gwanap, moni garaet muga enine arap eniwanumun.

² Den me yaveni inak daiton yaven, kwapura koentu da taue moni mega den-denawa dere otu ame enen.

³ Iesu yaveni anega wan, "Ne tave di waivin e anun, kwapura koentua ma yan mega tani arita, kwan puraput nagirewa yan muga tane gauarap.

⁴ Iwa mu yan tanewa bondan muga omewa anun gapan tan. Go waen kwpura koentu mame kayawan tainiwa, evi ware na iniwanda wanda iragi yan taitamen.”

God Paewa tobebenagepi noa

⁵ Iesu wadiamot mega upi God Paewa yawane anega wan, “God Paewa yawat mega kakae iragen iwa waenapan garaet muga God wanawena ap gapan gwat kakae guragut gapan kaitan tune.” Go Iesu gare anega wadiamon,

⁶ “E pa mame endi yavisiana menan waiwanin. Wamewa iman tauuepi gapan Diu anavi ega taue pa ma iragi to bebenak ae seain, gwat da daiton didi batamene diriga aita ya wanumoin.”

⁷ Mu gare singui wayawan, “Wadianet nugawa, wan dim dim arita mame andi amba venasiwanda? Amba venasepen taiwandapina, paua mega dim dim da namu taue aiwandapina yavinain?”

Ita anan bagu sisi wamewa oniwan

⁸ Iesu gare anega wan, “E yao kakayat amba wanien, da aopan wababayau imaepi tawa. Waenapan iman arugataet tauue, ne yauna gapan ebo aopan waiwanumain, ‘Ne Keriso, God wa watu enanegeni di, tauan waivin, God wam mega mame tauen.’ Ap wapi go ewamup ya aisene.

⁹ Ita anan agagae tauue aiwandapina yawanewa, ame tap ya anu gurane. Inak aru mame namu venase di tau aeta, go wam uiwa ap mepe ya taueta.”

¹⁰ Amba den Iesu anega diamon, “Piup da da ge toemu da da yon wanumo ita anan gare gare tain.

¹¹ Amba sia, piup nutanut enu tau aeta, enup wankakao tau aeta amba vek ato bararae tau aeta. Dim dim koewa ugup ugup taueta den kiman gapan paua ugup ugup tauuepi yao seke take taiwaniai.

¹² Inak mame venasepen taiwandapinawa, waenapan namu ta koeragam imain amba Diu opata waine paewa gapan wanene tayain amba gwat noke gapan seayain. E ne dugup nega nagirewa menan, wanene taepen menan

ayop baware nagirewa ugup ugup namup tam nauyae amoин.

¹³ Mame gapan, ne oitana wadidi-amopen menan wam ega arogawa ame venaseta.

¹⁴ Go endi namu anu yao se yao ya tane. Wam namuyape onini tantan ega tapen menan gop ya anuiwanian,

¹⁵ iwa ne nop dimat enapena gapan, gapan di waiwanian ame anavi ega ya watanayain go mu nop ega garewa wapen gapan waramatain, umap ya wain.

¹⁶ Ap gapan, e inae mamae, tatae gwani, amba dugup egawa evene wai den yone ominaya wap, amba waenapan guraep borit wai.

¹⁷ Nenan waenapan iravi anu koeam imain.

¹⁸ Go gop ya anune, iwa wan dim dim ontotu baware mame da ya one araeta.

¹⁹ Iwa nenan kaimakaet ta waniwanampina inak di wariwaniai.”

Pa Ierusalem evi to koeragamepi oisewa Iesu namu wan

²⁰ Iesu sia anega wan, “Anavi nagire pa Ierusalem tauue ikukuk enpanepi gapan e anui, pa Ierusalem konintu wa koeamain.

²¹ Ame venasepi wamewa gapan, at Diudia nagirewa tap serarat tunup dot amop. Pa Ierusalem gapan wanumuine nagirewa ae ve amop amba egaga inine nagirewa pa Ierusalem sia entan ya tauep.

²² Iwa wae wae nemoro mame one aigamup wandepi ame wataget God nop mega ap ok seane inepi wamewa.

²³ Wam ame inepi wamewa, kaiwan, waen bagu dena o orup otu ine amape nagirewa inamup kaimake den! Piupa anan bagu sisi baware yawai amba God gari gangan mega inayap taueta.

²⁴ Ap gapan den, waenapan upi ita no utap boniga inain amba upi at at ugup ugup tam naumo amoин. Diu uon ian uguge nagirewa pa Ierusalem wa koeragam wanumain. Amba God om enuni wamewa gapan ma iravi uon tata.” Iesu ap anega wan.

Kimani Viseni Apane sia viseta

²⁵ Iesu sia anega wan, “Wam ame gapan, paua ugup ugup yawat mega wam gapan, siragam gapan amba buanae gapan muk

muk tapi waenapan irewa yawain. Amba piup gapan, at da da wande aeniwa iman puiman nikuru enu one toponage ame gapan den tap baware anuin.

²⁶ Wam ame gapan, borit wa seke seke ta ise geam ase geam taiwanumain iwa dim dim da piup gapan venasepi tawa. Ame gapan kiman aroewa ame ugup ugup erere goyago amooin.

²⁷ Ap wamewa tauepi, Kimani Vitana Apene paua nega kimani tapena yawai. Amun baware, oya oya ganasewa nega den irikup nokap tauapena yawanegai.

²⁸ Wan dim dim mame venase tau aiwandapina gapan, ao yon wanien, yangut ao kiman yawai, iwa God konintu wat inakam imaeta.” Iesu ap anega wan.

God toemu mega konintu

²⁹ Iesu maibe gapan anega wadiamon, “Yangut tan, oma baip ge oma upine den guegue muga yawamón.

³⁰ Gua ewake topi anuiwanin, bodu wamewa konintu taiwan.

³¹ Ap umap sia, e wan dim dim mame tau aiwandapinawa, e anega anui, God toemu mega aroewa konintu taueta.

³² Ne nop tavewa wadiaepen anun. Endi mame piupa yanane wanumamune nagirewa, wam muga gapan wan dim dim mame venat taua aep amba borit wain.

³³ Piup ge kiman iman ise wat museta, go ne nop negawa di wande aiwadata.”

Wam wam nene yamam tan amba iniwanian

³⁴ Iesu sia anega wan, “Ap menan yambuni wanien, wam ega wakauman baripaet ya ta isiwanian, kaum kaimake dena usenagaet ya naiwanian, amba wan dim dim piup ma megawa menan ya anu guran taiwanian. Iwa denkoe patukarewa muk waini mini God wam mega ap umap inayap tauepi tawa.

³⁵ Wam ameme waenapan at at iragi inamup taueta.

³⁶ Ap menan nene yamam wam wam pot poraet taiwanian. Itan bagu sisi wamewa ameme inayap tauepi kaimakaet di waniepen menan inap mup waiwanian.

Amba den Kimani Vitana Apanewa namunap yonan tap ya anupen menan mup waiwanian.” Iesu anega wan.

Iesu wam mega uiwa

³⁷ Amba Iesu God Paewa, Ierusalem gapan, pot pot wadiam wandin go mum gine me pa Ierusalem ae ve Oma Olip Yanane Tunupewa dot ae ap mepe ini-wandin.

³⁸ Menan waenapan wam wam pot poraet mumaget iragen, Iesu nop mega anupen menan God Paewa tauwanumun.

22

Iesu topen noa karaua barimen

¹ Diu nagirewa barip muga yaua Taba Buredi Ya Tutut Waine Baripewa yaua da Paina Yamaseni Baripewa konintu taiwandin.

² Ap gapan, pirisi bawarewa iup wadiamuine nagire den anenen ta amba Iesu karaua ware togurapen neginewa noa panan waiwanumun iwa waenapan tamu den anuiwanumun.

Apan Diudes Iesu omine wan

³ Amba Seitan apan Diudes, yaua da Iskeriot, potap unugen. Diudes me Iesu wadiamot mega aonagaet pusinawan derewa apane da.

⁴ Menan, Diudes ao yon wande boge pirisi bawarewa ge God Paewa ita yamewa nagire den tanamo, amba Iesu omine wani anenen to warapen menan noa wan.

⁵ Nop mega wan anune mu aton anun menan garewa moni wanat wane.

⁶ Apan Diudes nop ame tanam wan, umap tani gapan, ae negin arogawa da yave, amba Iesu karaua ware munapen menan amat taiwandin.

Barip napen men taba tugun

⁷ Barip Taba Buredi Ya Tutut Waine Baripewa yaua da Paina Yamaseni Baripewa napen taiwanumune. Wam ame gapan, Diu nagire gutut muga ayamat tapen menan man sip otua upi tambun gurane.

⁸ Menan, Iesu apan Pita ge Dion watu enamo anega wadiamon, “Aisen Paina Yamaseni Baripewa wanin nana arewa

da yop tan amba wan dim dim bongam bongam tan.”

⁹ Mu singui wayawan, “Endi ge taba nana at ansena gapan bongam bongam tat anu nimaningi?”

¹⁰ “A, wapena anun. Aisen pa sewa ame tauane, apan da kaum udan wat aepi apanewa tautanan amba evip aisen pa da dorepi den doran.

¹¹ Pa i apene anega wadian, ‘Wadianini apanewa anega wan, Ne pa gwane ansena ange wadiamot nega den Paina Yamaseni Baripewa nait?’

¹² Apan ame, pa gwane aigapewa baware da ame gapan watat iravi gaset tata kakayat tane amena ewaeta. Ap mepe taba wat iran.”

¹³ Ap anega wani menan, mu amon pa tauan amba Iesu wani no usewa gapan yao ge yao di amon. Amba pa ap me gapan Paina Yamaseni tabaewa, ap mepe wat iran.

Iesu taba mega uiwa

¹⁴ Taba nana wamewa taueniwa, Iesu watu enamot mega nagire den taba wantarewa gapan ae wanumon.

¹⁵ Iesu anega wadiamon, “Ugu vegaek bagu sisi amba tanain go namu Paina Yamaseni Baripe mame e den napen taingina menan imuna potana waria.

¹⁶ Wapena anun, piup gapan, barip nega uiwa mame naian. Iwa iman barip mame tavewa God toemu mega gapan arogamepi amba ne barip mame sia nain.”

¹⁷ Ap anega wani sip ware God inap gaun wa anega wadiamon, “Oma wain makewa kaumewa ma waran, ek yan ase ma sean nan.”

¹⁸ Wapena anun. Kaum wain mame ne sia ya nain go God toemu mega tauepi amba sia nain.”

¹⁹ Amba Iesu taba buredi semua ware God inap gaun wa, wa paise watu enamot mega mune, amba anega wan, “Mame etunawa enan bariangin. Anu nima-negepen menan taba mame naiwanian.”

²⁰ Ap umap sia, taba nane ewap, Iesu sip wareni boge anega diamon, “Kaum wain mame deninawa enan tau viseniwa, God

e waenapan mega, ne denina gapan agi ewakewa wa agiat imaeta.

²¹ Go anun! taba naitoni wantarewa gapan ominana wani apanewa da mapa inanap den wandia.

²² God negin mega, Kimani Vitana Apanewa gase wat neneni ap omewa gapan bonigatain, go kaiwan, ominana wani apanewa itan baware yaveta.”

²³ Ap anega wani gapan watu enamot mega muk ase ma wawa mutan anega waiwanumun, “Nu nimakanup orup ansena da inak koewa ame tata?”

Apan ansena bawarewa noa

²⁴ Amba, watu enamot megawa mu apan ansena da bawarewa tata menan gare gare notatae waiwanumun.

²⁵ Menan Iesu yone anega wadiamon, “God ya anuine nagirewa ayop mugawa kaimakaet wapi gauarap wanumune nagirewa nop ame bagu sisie den anu warianum. Go ayop mugawa ame muk anega anune, ‘Nu gauarape nagirewa munan ago taintoni nagirewa.’

²⁶ Go e ap anega ya tane. Go gare e orup da ayop taniwa, ame aoma vise orup mondigawa mini tap. Amba ayop egawa aoma vise ayamat taini apanewa mini tap.

²⁷ Menan endi, apan aritawa da, apan wantat gapan wandiniwa bawarewa o taba mega waniniwa bawarewa? Tave di, apan bawarewa ame wantat gapan wandini apanewa. Go ne, yaumakayap tauan, taba enina apanewa mini tainawa.

²⁸ Tave di, ne itan bagu sisi ugup ugup anu taningga e ne inanap wainean.

²⁹ Ap menan, endi ne Mamana toemu mega amunewa neneni ap umap ne God toemu mega amunewa enain.

³⁰ Menan toemu nega gapan taba ge kaum nega nai. Amba den ayop watarewa ega ega gagap waniai amba Isurero nagire dugup ega aonagaet pusingawan dere kakaewa koewa muga wanene tamoi.”

Pita Iesu waboborepi noa

³¹ Iesu anega wan, “Saimon, Saimon, nop ma anu. Tavewa ge otarewa pemagine mini e koewa kakaewa yan seapen amba ta koeragam imaepen menan Seitan

e iraya yawapen men God inap singui wayaven.

³² Go Saimon, ge anu tumat kin kin anuiana ame aoma ya vitapen menan God inap genan mup waingin. Iwa koewa gega tawa amba nenan sia ongewa ameme gatawan tatak gwanik wat kaimagam mumapen taigan.”

³³ Pita gare anega wan, “Ayop negawa, ge gwat noke agewa o bop menan agewa, ne den angepen menan amat tan di wani-gain.”

³⁴ Wani go Iesu gare wadien, “Pita, ne wapena anu. Endi wam koni yampoa gapan ge waboboranegai amba kumkum nop wata.”

Bagu sisi wamewa oniwan

³⁵ Iesu wadiamot mega singui wayawamon, “Manap ne watu enaan aiseanawa, moni igewa da uon, ik pokaetawa da uon, amba pusi okomewa den uon, wam ame gapan e wan dim dim menan bumbam da tayan go uon?” Mu gare anega wane, “Uon, inanup iravi umap.”

³⁶ Ap menan Iesu anega wadiamont, “Wataget ap umap di iwanian go endi moni igewa o ik da inayap wandepiwa ame den di tambun. Amba den inak kwayupe menan kereba inayap ya wan-depi wanup ega ase une tan amba garewa gapan kereba da une tan.”

³⁷ Iwa wapena anun. Wataget God nop mega ok seane tavewa mega ne me di. Mu ok anega seane,

Waenapan anega wan, ‘Me koewa nagire garewa muga den waren.’

Oitana ok ap anega seane, menan ap anega di venaseta.”

³⁸ Amba watu enamot upi anega wan, “Ayop nugawa, ma yao. Nu kereba dere den tambuton.” Go Iesu gare manega diamon, “Ap anega ya tane, kereba ega ae sean.”

Iesu God inap mup wan

³⁹ Amba Iesu pa Ierusalem ae ve tau ae, pot pot taini mini sia Oma Olip Yanane Tunupewa dot aen amba wadi-amot megawa evip amon.

⁴⁰ Ap mepe tauane anega wadiamont, “God inap mup wan dim dim da pusia warupepi tawa.”

⁴¹ Ap gapan Iesu mu ae vemo mainantup asira aen, boge omanip enu mup anega wan,

⁴² “Maman, ge men anu gurawa, ugu vegaek anupena ao waseanek, go mame ne anut negawa uon go gek anuiana gapan di ta.”

⁴³ Ame gapan anea aupa kimani tau, inap venase amba epara wanen.

⁴⁴ Amba Iesu bagu sisi anu taneni baware iragen menan God inap mup kaimakaet sia di waiwandin. Gatok denip mini tauve vise piupa seu endumen.

⁴⁵ Mup mega uon tani ewap, ao yone watu enamot mega inamu ae yawamoni, bagu sisi arita anu tanane iwa mu aup iniwanumun.

⁴⁶ Me anega diamon, “Iwa dimen aup iniwanin? Ao yonan, God inap mup wan, iwa pusi warup da inayap taupei tawa.”

Ita nagirewa Iesu waran amon

⁴⁷ Iesu nop ap waiwandini gapan, apan Diudes, watu enamot mega aonagaet pusinawan dere apane da, apan aruga naumo onen. Iesu ware ua topen men tauen.

⁴⁸ Go Iesu singui anega wayaven, “Diudes, endi ge ua gega gapan Kimani Vitana Apanewa ominana taingi?”

⁴⁹ Watu enamot mega Iesu warapen menan tane yawan, anune menan mu singui anega wayawan, “Ayop, kereba nuga ma gapan guramoit?”

⁵⁰ Boge Iesu watu enamot da yone pirisi ayop mugawa ago megawa darinewa nutup to kuasen.

⁵¹ To kuaseni menan Iesu watu enamot megawa anega diamon, “Anan ae vean, mame da sia ya tane!” Amba Iesu apan ame darinewa wat enasen, kakae tan.

⁵² Amba pirisi bawarewa ge God Paewa ita yamewa nagire ge waenapan dimae waine nagire Iesu warapen men tauane gapan Iesu inamup anega wan, “Endi, ne up apanewa mini waranegepen menan kereba ge kepata tam tauayan?”

⁵³ Ne wam, wam God Paewa gapan wanigingina ya waranegean go endi waranegepen taiwanin. Sisip aroewa wamewa mame di taueni menan e koewa tapen amunewa ap gapan di tauen.”

Pita Iesu waboboren

⁵⁴ Ap mepe boge ita nagirewa Iesu to waran amba pirisi aritawa mugawa pa mega nau amone. Pita kara karaua ewamup wandap oniwandin.

⁵⁵ Pirisi aritawa mugawa pa mega sinewa gwanap arok da gapan ita nagirewa irot menan oma watu tugun iragi ap mepe enpanan wanumon, amba Pita taue ap mepe den tanam wanden.

⁵⁶ Amba ap mepe nao taine waenewa da taue, Pita oma ganasewa gapan warden mana mana use yave anega wan, “Apan mame Iesu den iwandini apanewa da!”

⁵⁷ Go Pita ae wabobore anega wan, “Ae, waen negawa, apan ame ne oare.”

⁵⁸ Amba wam koni ap gapan sia apan da den Pita yave anega wan, “Ge Iesu ewap ingiana ap da den di!” Go Pita sia anega wan, “Ae, apan negawa, ne uon.”

⁵⁹ Wam airase da sia uon tani ewap, apan da ugup kaimakaet anega wan, “Apan ma at Galili apanewa, Iesu enana tan ini di!”

⁶⁰ Go Pita sia anega wan, “Apan negawa, ge anen waingiana ne oare!” Pita nop mame waiwandini gapan, kumkum boge no utap wan.

⁶¹ Ap gapan, Ayop Iesu to entane Pita kem kem yaven. Muma wani Pita sia anu aven, ‘Mum endiwa ge koni yampo waboboranegewa amba kumkum wata.’

⁶² Anuni boge garip tau ae irip koevet wan.

Ita nagirewa Iesu wa koeragamen

⁶³ Ap mepe, ita nagirewa Iesu warane nipep dian to papaunagen.

⁶⁴ Amba Iesu yamewa pan boran amba ton anega diwanumune, “Imugap wa anut, endi da togen?”

⁶⁵ Anega wa koeragamene nop aruga sia nipep ugup ugup waiwanumun.

Iesu kansoro nagirewa namup yonen

⁶⁶ Ap gapan, woup ase nenen waiwandiniwa, Diu Kansoro nagirewa ame dima waine nagirewa ge pirisi bawarewa ge iup wadidiamuine nagire tauan iragi ap mepe, pa gwanap, to iamen. Ita nagire Iesu wat onamon.

⁶⁷ Ap gapan, Kansoro nagirewa Iesu anega singui wayawan, “Wa anut, ge God mega wa watu enageni Keriso di go uon?” Iesu gare anega wan, “Ne wadiaepena e ya anu tumat nimanegai.

⁶⁸ Amba ne gare singui wayawaepena, e garewa ya wadianegai.

⁶⁹ Go endi mame use wande aeniwa, Kimani Vitana Apanewa, God Aigap Ira- genawa mainewa nutup gapan ae wani- gain.”

⁷⁰ Amba mu iragi singui anega sia tane, “Ap waana gueguewa ame ge God Otua di?” Iesu gare anega wan, “E, ap me di waiaisi.”

⁷¹ Iesu ap wani menan, Kansoro nagirewa gare anega wan, “Endi nu dimen no oise wadian dian nagirewa munan waivin? Mame no kaime gapan gasetmek ebo wani anuton.”

23

Iesu apan Pailat namup yonen

¹ Wam ame gapan, kansoro nagirewa yonan, Iesu waran, Rom ayop mugawa apan yaua Pailat ine wat nau amon.

² Ap mepe tauane anega enu yawan waiwanumun, “Nu apan mam waenapan nuga aopan wababayan mumiwandi menan waraton. Amba ayop nuga bawarewa Sisa moni mega ya waniwanumampen menan diamuiwan. Amba me mek ayop da God mega wa watu eneni Keriso waiwan.”

³ Menan apan Pailat Iesu singui wayaven, “Ge Diu nagirewa Ayop mugawa go?” Iesu gare wan, “E, ge ap me di waiagi.”

⁴ Apan Pailat pirisi bawarewa, wae- napan den anega wadiamon, “Apan ma koewa mega da ne ya yaviangin.”

⁵ Go mu kaimakaet sia waiwanumun, “Iesu waenapan wadidiam wandini gapan wa danigam mume taiwandin.

Namu at Galili amba at Diudia iravi mame den ap anega taiwandin.”

Iesu ayop Eerot namup yonen

6 Pailat nop ame anuni menan singui anega wayawamon, “Me at Galili apanewa go?”

7 “E, me at ame apanewa di,” anega wane menan at Galili Rom ayopewa yaua Eerot, me pa Ierusalem daio taueni menan me inap watu enen.

8 Eerot inap tauane gapan, ayop Eerot Iesu yaveni aton baware tan iwa Iesu oit mega wataget aniwandin yawat anun. Amba Iesu yo da tapi yawat anun.

9 Ap menan, ayop Eerot singui tangui arugataet wayawiwindin, go Iesu no uon wanden.

10 Pirisi bawarewa ge iup wadidiamuin nagire den yonan enu yawan kaimakaet dian waiwanumun.

11 Ame gapan, Ayop Eerot ita mega nagirewa den, Iesu wa koeragamen nipec dian. Amba waran, ayop guegue mega mini wanup kakaewa pan wanana amba ayop Pailat inap sia watu enan.

12 Wataget ayop dere Eerot ge Pailat anavi taiwanumun go wam ame gapan mu evenan tan.

Iesu boepen menan dian

13 Amba ayop Pailat pirisi bawarewa ge Diu bawarewa nagire upi amba waenapan iravi den munan wan, tauan.

14 Amba anega diamon, “Apan ma inanap wat nau onayan amba waenapan aopan wababayam mumiwindini oise wayan. Menan namuyap singui tangui gapan ne me enu yawan wan. Go endi wapena anun. E koewa mega aruga batnagean go koewa mega da ne ya tautanan.

15 Amba sia ayop Eerot den koewa mega da ya yaven menan nunan watu enen sia onen. Koewa mega boe boe da ya tan.

16 Ap menan ne wapen mondi gaut arep amba tau aeta,” ap anega wan.

17 Iwa Pailat ian Diu nagirewa aton munapen menan, en gapan gapan Paina Yamaseni Baripe wamewa gapan, gwat noke apane da wat vesep tau aepen tainiwa.

18 Nop ap anune menan waenapan iragi, ve anega wan, “Iesu wat aisen togurane

boep. Gwat noke apene Barabas nunan wat veta tau aep.”

19 Wataget da apan Barabas pa Ierusalem gapan Rom bawarewa nagirewa inamup ita anan tapen men waenapan anan datnak mumen amba me upi guramon borit wane menan bawarewa nagire waran gwat noke baraene iniwindin.

20 Go Pailat Iesu veset tau aet anuni menan waenapan aigap aigap diamo wan.

21 Go waenapan senao wa ge wa di taiwanumun, anega waiwanumun, “Oma korosi gapan togurane boep! Togurane boep!”

22 Amba Pailat koni yampaia dia mo anega wayawamon, “Iwa dimen togurat waiwanin? Koewa mega dim da tan? Koewa mega boe boe da ne ya tautanan. Ap menan ne wapen gaura to vep amba tau aeta.”

23 Go waenapan Iesu di boepen menan senao paina iragen da waiwanumun. Menan Pailat nop muga anun.

24 Ap menan Pailat Iesu boet wan.

25 Gwat noke apanewa Barabas, wataget pa nagirewa anan datnak mumen amba waenapan upi guramon borit wane apanewa, Pailat wat vesen tau aen. Go Iesu ware anut muga anuine tapen menan ase munen.

Iesu togurapen waran amon

26 Iesu wat nau amuiwanumune gapan, apan yaua Saimon at mega Sairini at wandap da gapan Ierusalem oniwandin, negina tautanan. Iesu oma korosi mega waseasen Saimon onep baraene ware Iesu ewap aen.

27 Waenapan arugataet den ororom warupiwanumun, ame nimakamup waen upi den ap mepe bagu sisi anu tanan menan irip wa amuiwanumun.

28 Ap menan, Iesu inamup to entane anega wadiamon, “Pa Ierusalem waene wai, nenan irip ya wane go otu wai den ek ingane iria wan.

29 Iwa, wam oniwandin waenapan iman anega wain, ‘Waen otu uon irak musinewa amba orup waen am ya mun yawane nagirewa mu inak muga endi bemta, menan mu aton taiwanum.’

³⁰ Wam ame gapan waenapan tunup inap anega wain, ‘Tunup, beut git aiganup aoma geek, nu borit wat!’ Amba togan inap anega wain, ‘Togan ge ukum umane gwanap karaua waninet!’

³¹ Endi wam kakaewa gapan waenapan koewa mame tainewa, wam iman wanene wamewa gapan mu anenen tain? Iwa endi ma e duewa ega wamewa gapan go evi amba tane inaepi wamewa, e anenen tai?”

Iesu oma korosi gapan tobatamen endawan

³² Amba ap mepe, up apane da dere, Iesu den guramo boniga semopen menan naumo amon.

³³ Amone at yaua Apan I Kaime Arewa tauan. Ap mepe apan koerage dere Iesu den oma korosi gapan paina gut batam dawamone, dawa nutup arigewa gapan amba dawa senip arigewa gapan dawamon.

³⁴ Amba Iesu God inap anega mup wan, “Maman, koewa muga anu ae ve. Dim da taine mu oare.” Ita nagirewa wanup mega orup ambe da wareta, menan kae otu da tane amba waran.

³⁵ Amba ap mepe yonane nagirewa yangut taiwanumun go Diu nagire bawarewa mugawa wawa koko inap anega wan, “Waenapan upi wat inakam mumen. Menan endi me God mega wa watu eneni Mesaya wandepiwa, mek ingane wat inakamep yawat.”

³⁶ Ap mini sia, ita nagirewa onam Iesu inewa tauan nipep wan. Amba mu kaum sisi dena yaua viniga wanat anun.

³⁷ Mu anega wan, “Ge Diu nagire ayop mugawa waingewa gek ingane wa inagita nu yawaget.”

³⁸ Amba, ap mepe, Iesu korosi mega i kaimap ok manega sean tobatamene, Ma Diu Nagire Ayop Mugawa.

Apan koeragewa da imua entanen

³⁹ Amba, up apanewa da, den to endawanewa, Iesu inap wawa koko ta anega wan, “Ge God mega wa watu enageni Mesaya di? Menan gek ingane wa inagit amba nu den wa inak nitat!”

⁴⁰ Go up apanewa dawa anega diguren, “Ge God tawa anuingi go uon? Nu yampo koerage dianene.

⁴¹ Go gende itan nunane, iwa nu inak nuga koewa taitoni yamewa menan itan ma warianit. Go apan mame koewa mega da uon.”

⁴² Amba apan ame Iesu anega dien, “Iesu wam ma endiwa toemu gega posewa unugewa ne den anu nimanek.”

⁴³ Iesu gare anega wadien, “Wapena anu. Wam ma endi nu gende at kakaewa kiman tauait.”

Iesu boen

⁴⁴⁻⁴⁵ Wam ianupe wariwandini gapan, piup ame iravi mum tatarin tunu sisip taue ae wanden aeni amba wam airase yampoa waren. Iwa wam ganasewa uon tan. Amba Ierusalem God Paewa gwanap wanup nononga antapenanewa ame yau-makap bebeb wa ase ma wanden.

⁴⁶ Ame boge Iesu wawa sisi kaimakaet ta anega wan, “Maman, ne guana nanik gwanap ae bariangin.” Wani boge gaup mega uiwa use puk wa tau aen boge boen.

⁴⁷ Ita yamewa apane da, ame yaveni, God yaua ao ware anega wan, “Tave di, apan ma kakaewa di, koewa da ya tan.”

⁴⁸ Amba, waenapan aruga ewan tauan amba ita nagire dim da taiwanumune yawane bagu sisi anun kaiwan baiwan wain en boge pa muga muga entan amon.

⁴⁹ Iesu evene waiwa, amba waen upi at Galili gapan tautan onamone den, mu wandap yonan yaviwanumun.

Iesu etua dagupa baran

⁵⁰⁻⁵¹ Ap mepe apan da yaua Diosep, pa sewa yaua Arimatia apanewa da, wande en. Me apan kakae amba ian Diu nagirewa kansoro muga apanewa da. Me evene wai, Kansoro nagirewa, namu Iesu noa panan wan to waran taiwanumune go me den ya taiwandin, iwa me God toemu mega onini nauase tainiwa.

⁵² Me ayop Pailat ine ae mup anega wan, “Iesu etua nen.” Amba Pailat umap wan.

⁵³ Menan me Iesu etua wa totnak wat vise wanup nononga kakaewa gapan viri

viri waren amba dagup ewakewa da nanip kaitanewa gapan baraen. Dagup ap me namu da ya danamene.

⁵⁴ Mum gine ameme Diu nagirewa barip menan taba bongamiwanumun, menan Diu pura bawarewa wameawa imanawa amba taueta.

⁵⁵ Amba ian waen at Galili gapan Iesu tautanan onamone ame Diosep ewap amon amba dagupa anenen baraene gueguewa yawan.

⁵⁶ Boge mu pa sia entan amon. Kaum tutu denawa Iesu etua enu iapen menan bongam bongam ta seapen menan amon. Amba wam pura bawarewa menan mu God iup mega wani ame viriwa tan menan wagat wanumon.

24

Iesu boe inakae yon wanden

¹ Diu pura muga bawarewa wameawa uon tani, wam namupewa, mumaget iragen, ian waen ame, kaum tutu denawa waran dagup amon.

² Ame tauane, dagup tonanewa no aroga warden iwa gwat baware tonan borane ame baim wa tau aen yawane.

³ Menan, mu dagup gwanewa unuk amone go Ayop Iesu etua ya yawan.

⁴ Anu bambamatian wanumone boge apan dere wanup muga ganase den enan mainamup yoniwanumune yawamone.

⁵ Waen tap kaime doran menan pia nikapu enun. Apan anega wayawamon, "E dimen mapa kaima arewa gapan inakaeni apanewa yowa taiwanin?"

⁶ Me mapa uon, me gaset inakae yon warden! Iesu wataget at Galili gapan wardeni nop wadiaeni anu awayan go uon?

⁷ Iesu manega wan, 'Ne Kimani Vitana Apanewa ian uguge nagirewa nanimu gwanap bat nimanegain amba oma korosi gapan toguranegep bonigatain amba wam yampooa gapan ne inak nigat sia yon wani-gain.'

⁸ Boge waen ameme nop ap anune gapan, Iesu nop mega anen wani ame ase anu awane.

⁹ Menan, mu menawaet amone Iesu watu enamot mega aonagaet pusinawan

daiton amba waenapan upi den inamup tauan oit wadidiamon.

¹⁰ Waen ap wadidiamone nagire yau-mua Meri Makdalin, waen Dioana, ge Meri (otua apan Diemis) amba waen upine den.

¹¹ Wadidiamone go mu nop muga ebo mini anune menan ya anu tumasen.

¹² Go Pita yon wande, dagup yawapen menan serarat aen. Dagup tauen kaut enu, wa panam taune wanupewa megenat gwanap warden yaven. Boge Pita pa mega ae, inak mame venaseni menan anu yao seyao ta aiwandini.

Pa Emeas negine guturewa

¹³ Wam ame daiton, Iesu wadiamot mega dere pa Ierusalem ae vean pa Emeas amon. At ame wandap uon, (ame 10 kilomita mini).

¹⁴ Mu inak wan dim dim aruga ame venaseni, no oisewa gare gare wan amui-wanumun.

¹⁵ Ap waiwanumune gapan Iesu inamup tauen den amon.

¹⁶ Mu Iesu yawane go irewa ya yawan anune iwa God yamamu toboboren.

¹⁷ Iesu singui anega wayawamon, "E ap aisiwaniana gapan dim noa da gare gare wawa isiwanin?" Ap wani gapan, mu bagu sisi anune amba gine namu ae bigat mutane ae yonan.

¹⁸ Apan dere, dawa yaua Kiliopas gare anega wan, "Ge Ierusalem daio ageanawa wam ap gapan dim da ta waiwanumune ge da ya anuana menan waingi go?"

¹⁹ Iesu gare anega wan, "Dim dim da venasiwandin?" Apan ame gare anega wan, "A, nu Iesu pa Nasaret apane oisewa waivin. Me God nop mega waini apane amba waenapan namumup nop wat ge tat mega aroe amunu den.

²⁰ Go Pirisi bawarewa amba ayop nuga nagire upi den Iesu waran ian uguge nagire nanimu gwanap baraen oma korosi gapan tone boen.

²¹ Me nu Isurero nagire anavi nuga aro muga gapan vetanep tau anepen men anutton. Inak baware mame venaseni, wame yampooa endi mame.

²²⁻²³ Go endi waen nuga upi mumaget iragenawa dagup yawapen amone, go

mondi pokaet yawan tauan amba wabambam nimanene. Amba den anega wane, ‘Nu anea dere yawamoton. Anea ame anega wane, Iesu me inakae yon wanden.’ Waen oit ap anega wan.

²⁴ Waenapan nuga tanam waninetoni, upi dagup amone waen oit wane ap uap sia Iesu ya yawane.”

²⁵ Apan dere nop ap waiwanumune menan Iesu gare anega diamon, “E bumbam anenen da tayan waiwanin. God nop mega wataget waiwanumune nagire nop muga menawaet ya anu tumat wanin.

²⁶ Mu ok anega seane, God mega wa watu eneni Keriso ugu vegaek bagu sisi anu tanep amba oya oya mega kimaniwa gapan wagup wareta.”

²⁷ Ap gapan, Iesu watageta nagirewa Mosis namu amba God nop mega waiwanumune nagire den Iesu oit mega, ok gapan seane, gueguewa wadidiamon.

²⁸ Amba pa Emeas maniwanumunewa, Iesu wa garawat mume taué namu aepen tan.

²⁹ Go mu anega wan watanane, “Onge tanak inat, ma wan gine gaset tan, mum di tauapen taiwan,” ap anega wane menan tanamo pa gwanap aen.

³⁰ Amba taba napen menan Iesu ae wande, buredi ware God inap gaun wa, wa paise amba munen.

³¹ Muneni gapan, God yamamu watapen, Iesu ire ase yawane boge oagaen, da sia ya yawan.

³² Mu gare gare anega wan, “Iesu negina God nop mega gueguewa wadidian wandini nu potanu oma yame mini yagiri-wandin.”

³³ Boge mu wam ameme di yonan ewagai sia entan pa Ierusalem amon. Tauane Iesu watu enamot mega aonagaet pusinawan daiton amba waenapan upine den tanam wanumone yawamon,

³⁴ go pa wanumuine nagire namu anega wan, “Ayop nuga di yon wanden apan Saimon inap venasen.”

³⁵ Amba apan dere ame neginaet amuiwanumune gapan anenen venasen yawane oisewa wadidiamon, amba Iesu den taba napen tane gapan buredi wa

paiseni wamewa gapan ire yawane oisewa den wadiamon.

Iesu watu enamot megawa inamup venasen

³⁶ Mu inak mame yawane oise waiwanumune, Iesu me mek taueni boge nimakamup yone anega diamon, “Nonup inayap wande ep.”

³⁷ Mu boeni apane guewa da yawat anune menan guamu pua aen tap anu gurane.

³⁸ Menan Iesu anega diamon, “E di menan nene yangwan doraen taiwanin? Iwa dimen imuyap gego den anuiwanin?”

³⁹ Nanina pusina yawan ma ne di! Onaen wat anu nimanegen amba yawane-gen, ne etuna kaimana den go guewa etua kaimewa uon.”

⁴⁰ Iesu nop ame wani, boge naniwa ge pusawa siran ewamon.

⁴¹ Mu aton anuiwanumune go anu bambamat inamup di wandeni menan, me sin-gui anega tamon, “E taba nana da den?”

⁴² Menan mu meo bonigawa da wat onam wanen.

⁴³ Iesu boge ware, watu enamot megawa yamamup nan.

⁴⁴ Amba Iesu sia wadiamon, “Ne manap tanaen wanigena, inak map anega venasepi oisewa, namu wadiaen ame Apan Mosis ge God nop mega waiwanumune nagire amba den buka Sam seane nagirewa oitana iravi ok seane mame di venasia.”

⁴⁵ Ap gapan me God nop mega mu anu awapen menan imumu watapen.

⁴⁶ Amba Iesu anega wadiamon, “Wataget God nop mega ok anega seane, God om enuni Keriso da tauapei ugu vegaek anu bop tata,

amba wam yampoa ewap me bop gapan, sia inakae yon wandeta.

⁴⁷ Ap menan Keriso me yaua gapan inak koewa anu ae veat, ge wat entan tapen no oisewa, namu pa Ierusalem gapan,

amba at at iragi wadidiamoin. Ok ap anega sean.

⁴⁸ Inak ma yaviana no oise ase wase-namene nagirewa e me di.

⁴⁹ Amba ne nek Mamana kimani agi mega wani ne enan watu enain, go e mapa Ierusalem gapan amat taiwanian amba aro amun da aupa kimani aigayap visepi waran amba tau aisen.”

Iesu kiman dot aen

⁵⁰ Amba Iesu wadidiamot mega naumo taue at Betani mainep tauan. Ap mepe nani ao wadave wat aipakam mumen.

⁵¹ Wat aipakam mumiwandiniwa gapan, me pusiwa ao bunen boge ae vemo, God aro mega gapan kiman dot aen.

⁵² Ame boge waenapan mega Iesu wa taragasene atonu den sia entanen pa Ierusalem amon.

⁵³ Ap mepe God Paewa gwanap pot pot usenagaet God inap wa atonasiwanumun.

DION

Dion Iesu Keriso oisewa sen

Iesu piup ma taueniwa

¹ Ere mangan ap mepe God Nop Oit mega, Iesu, wande en. Nop ame God den, amba Nop ame God di.

² Tavewa di, ere mangan me God den wande en.

³ Me gamup wan dim dim iragi venat mutan, amba me gamup gine mawap da ya wandia.

⁴ Me inap ap mepe inak, amba inak ame waenapan iragi ganat mugawa.

⁵ Ganat ame sisipu yagiriniwa, go sisip ganat ya toboriniwa.

⁶ Wam nugawa gapan God apan da watu eneni, me yaua Dion.

⁷ Dion ganat tavewa iragenawa ewamopen menan tauen, amba me gamup waenapan iragi anu tumat tapen menan tauen.

⁸ Dion mek ingane ganat uon, go me mondi waenapan ganat tavewa ewamopen tauen.

⁹ Iesu ganat tavewa di piup ma gapan tauiniwa. Me tauepi ganasewa iragi enup piup ma gapan mun ge mun aiwadata.

¹⁰ Ere mangan wan dim dim iravi Iesu gamup venasen go me piup ma gapan tauw wandeni, waenapan irewa ya yawan anu awane.

¹¹ Piup ma mek megawa di tauen go me taueni me waenapan megawa tandayasene.

¹² Go da iragi Iesu warepiwa amba anu tumat me yaua gapan tapiwa, Iesu tamana di diamon God otu waiwa entan mumeta.

¹³ God otu waiwa entanamoni ame waenapan deniwa gapan uon, inewa mamewa anut muga gapan uon, waenapan muk ingane anut muga gapan den uon, go Iesu anu tumasene gapan otu waiwa entanammon yanane.

¹⁴ Nop ame entanen apan venasen amba wandet megawa nu yaumakanup. Oya oya mega nu yawaton. Oya oya mega aigap iragen iwa God mek otua daiton iragenawa di. Me imu pose wat aipakam ge nop tave iragenawa no dotouen.

¹⁵ Dion nop tavewa Iesu menan ve anega waiwandin, "Apan daiton menan wainginawa, me ewanap oniwandini, me aritawa go ne uon, iwa me namunap yai-bobot ine wande oniwandin."

¹⁶⁻¹⁷ God iup Mosis gamup nuneni ame wat aipakam erekwa go endi nop tave iraganewa Iesu gamup tauen, iwa me imu pose kakaewa no dotoueni gapan wat aipakam mega arugataet tauini ame aigap aigap iragi waritonika.

¹⁸ Orup da daiton God ya di yaven, go God Otua daiton megenat Mamewa yave anun iwa mek Mamewa mainep wandiniwa. Amba me piup ma taueni God Mamewa irewa to ewanen.

Dion me da?

¹⁹ Apan Dion gutut mega mam. Wam ame Diu pa Ierusalem gapan pirisi gauarape mugawa den watu enamone Dion inap tauan, singui wayawan, "Ge da?"

²⁰ Dion ya wa umen go oit aroga wadiamon, "Ne God om enuni apanewa, Keriso uon."

²¹ Boge mu singui wayawan, "Go ge da? Ge apan Elaidia go?" Me gare wan, "Ae, ne ap uon." Mu sia wayawan, "Ge God nop mega wataget waingianawa apanewa ameme go?" Me gare wan, "Uon."

²² Uiwa mu anega wane, "Ge da? Nop garewa nuna wat anet watu enanene nagirewa wadiamot. Gek ingane oitaga anen waingi?"

²³ Wataget God nop mega waiwandini apane Aisaia nop wani mini Dion gare anega wan,
Ne at kaimewa gapan pua opata waingina apanewa.
Ayop negin mega wat tamanamene amba tauep.

²⁴⁻²⁵ Wam ame gapan Parisi nagirewa upi sia apan Dion singui anega wayawane, "Ge God om enuni apanewa, Keriso uon waingi o Elaidia o God watageta noa waiwandini apanewa ameme uon waingi, go ge iwa dimen dup iamuingi?"

²⁶⁻²⁷ Dion gare wan, "Ne kaum gapan dup iaivin go apan ame evinap oniniwa, me aigap iragenawa menan pus i okomu damigewa en veta veta ne umanap uon.

Go apan ame daiton da yaumakayap yonini e oare.”

²⁸ Nop mame gare gare wane arewa kaum Diodan asepagan, at Betani ap mepe Dion waenapan dup iamuiwandini gapan.

Iesu God Man Sip Mega Otua

²⁹ Inane woup sen Iesu Dion inap oniwandin yaveni anega wan, “Ase yawan, God man sip mega otua, waenapan koewa nuga garewa wat museta.

³⁰ Apan ase me menan om tan anega wana, me ewanap oniniwa me aritawa di, go ne uon iwa me namunap yaibobot ine wande oniwandin.

³¹ Ne namu nek den Iesu oare, go Isurero nagirewa Iesu anu awapen menan ne tauan dup iamuinivin.”

³² Boge Dion Iesu guturewa wadiamon, “God Guewa nenip Bairantan mini visiwandin wapip doreni yawan.

³³ Namua me da ne oare go waenapan dup iamopen watu enanegeni manega wadianegeni menan ne asigip tan, ‘Apan ansena yawa Guewa vise gamup dorepi ameme evi Guewa Woup Seniwa den dup iamuiwanda,’ me ap anega wadianegen.

³⁴ Ne yawan tavewa di venasen menan wadiaivin, Apan mame God otua di.”

Iesu wadiamot mega erewa

³⁵ Inane woup sen Dion wadiamot mega dere den ap mepe sia yoniwanumun,

³⁶ Iesu ap aiwandini Dion yave anega wan, “Yawan, God man sip mega otua.”

³⁷ Wam ame Dion wadiamot mega dere nop wan anunewa, mu Iesu ewap amon.

³⁸ Iesu ewagai entane yaveni ewap onam wanumune yawamo singui wan, “E dim da men anuiwanin?” Mu gare wan, “Rabai, ge amba iningi?” Nop Rabai wane gueguewa ame wadianiniwa apanewa.

³⁹ Iesu gare wan “Onaen, amba e yawai.” Ap menan mu amon amba inini arewa yawan, amba wam ame yaugai tanan wanumon. Wanumone aeni wam airase degedeawa wareni menan ap mepe inane.

⁴⁰ Apan dere ame Dion wan anun Iesu ewap amone ame dawa Anduru, Saimon Pita gwaniwa.

⁴¹ Gine tutup Anduru ae tasewa Saimon tautane wadien, “Nu God Mesaya mega yawaton.” Mesaya tavewa ame Keriso amba gueguewa ame God om enuni apanewa.

⁴² Amba tasewa waren Iesu ine aen. Iesu kem kem yave anega dien, “Ge Saimon Dion yauga Sipas diagivin” (Sipas tavewa Pita gueguewa gvat bonawan).

Iesu Pilip ge Nataniero munan wan

⁴³ Inane woup seni, Iesu at Galili aet anun. Pilip yowa ta taneni anega dien, “Ewanap onak.”

⁴⁴ Pilip me pa Besaida at Galili apanewa, Anduru ge Pita pa muga daitonawa.

⁴⁵ Pilip ae yop ta apan Nataniero tane anega dien, “God nop namua gapan, apan Mosis ge God oise waine nagirewa apan daiton menan ok sean anega wan. Apan daiton ameme nu yawaton. Apan ame Iesu, Diosep otua, at Nasaret apanewa.”

⁴⁶ Nataniero anega wan, “At koewa Nasaret! Asepa dim da kakaewa tau onepi menan waingi?” Pilip gare wan, “Onak yao.”

⁴⁷ Wam ame Nataniero Iesu ine oniwandin yave Nataniero menan anega wan, “Me mek tamana Isurero apanewa di, me inap ebo da uon.”

⁴⁸ Nataniero anega wan, “Anenen amba asik tanegean?” Iesu gare wan, “Ne namu ge oma baip iap wanigean yawagen Pilip venaga evi amba wan.”

⁴⁹ Boge Nataniero aroga wan, “Wadianianawa apanewa, ge God otua, Isurero Ayop nugawa.”

⁵⁰ Menan Iesu anega wan, “Ge anu tumat tanegean iwa baip iap wanigean yawagen wana menan. Endi wana ame otu koentu go inak bawarewa evi amba tapen yawanegai.

⁵¹ Ne tamana tavewa di wadiaivin, ki-man watapep God anea mega Kimani Vitana Apanewa aiganap vitagen doragen taiwanumampinawa e yawanegai.” Iesu ap anega diamon.

2

Iesu naine mutat wamewa gapan wan kaum iragen entanen wain venasen

¹ Wam dere uon tani ewap, naine mutat baripewa da sewa bawarewa yaua Keina at Galili gapan tane. Iesu inewa ap mepe den wanden.

² Amba Iesu ge wa ewamot mega den tanamo naine mutat baripewa ame gapan venamu wane tauan.

³ Ap mepe kaum wain uon tan menan Iesu inewa yone me anega dien, "Mu kaum wain inamup iragi uon tan."

⁴ Iesu gare wan "Ae inan, ge dimen wadianeget waan taingi? Ne wam nega ya tauia."

⁵ Go Iesu inewa yone waenapan nao nagire ame anega diamon, "Me anen wadiaepi gapan di tan."

⁶ Pa ap me gapan unup no um baware iragenawa nani yamunaet nani yamu daiton pa gwanap seane iwa barip wamewa waenapan arugataet taupei menan. Unup no um baware iragenawa tat mega mu Diu nagirewa anu tumat muga iupewa gapan. Ian Diu nagirewa anu tumat iup muga arugataet. Iup da ameme orup da pa gwanap aet anupiwa namu pusi nani bigi ware amba unuk aeta. Ap menan pa pa gapan unup no um baware iragenawa daiton daiton tonana sinewa.

⁷ Iesu nao nagire ame anega diamon, "Unup no um ame kaum utan gemane no dotou dotou aep." Me ame wani gapan mu iragi kaum utan gemane unup iragi no dotou dotou aen.

⁸ Boge me anega sia diamon, "Kaum upi geman tambun barip ma i apane ine aisen." Ame Iesu anen wani no usewa gapan di tane.

⁹ Amba barip i apanewa kaum wain venaseni ame na anun, go me kaum wain ame amba taueni me oare. Nao nagire kaum ame utan gemiwanumune mugenat asigimup tane. Boge barip ame i apanewa, naine mutat apane ame wandeni vene wan tauen,

¹⁰ anega dien, "Waenapan iragi kaum wain kakaewa imumu wareni namu yan seane waenapan venamu wane tauane ame nainewa, amba kaum wain ni nen seniwa ame evi amba yan sene nane aton tainewa, go ge endi kaum wain

gega kakaevet gine ambot waingean endi mame waran tauiagi?"

¹¹ Endi mame Iesu yo mega erekwa at Galili pa Keina gapan to ewamon. Mame gapan me kiman oya oya mega ta ewamon, ap menan watu enamot mega imu pose waren inap anu tumat tane.

¹² Mame tani ewap Iesu inewa, wa ewamot megawa, ge tase gwani tanam at pa Kaponiam ae wam upinewa den ap mepe wanumone.

Iesu Ierusalem God Paewa gwanap waenapan gut oimon

¹³ Ian Diu Paina Yamaseni Baripewa tuguinewa wamewa da konintu taiwandin, ap menan Iesu at Ierusalem dot aen.

¹⁴ Ap mepe God Paewa sin gwanap namboya waenapan, man kao, sip ge nenip bairantan une taiwanumun, amba upine wanumon moni entan wantan taiwanumune Iesu yawamon.

¹⁵ Boge me gaut bunum nanip tani ware waenapan amba man sip ge kao gut oimon tau amon. Moni entan taiwanumune togojam wagoyam ta, ge moni entan taiwanumune watarewa tambu yamu en tanamon.

¹⁶ Iesu nenip bairantan une taine nagirewa anega diamon, "At ma gan iragi tam tau aisen! E anenen menan Mamana God Paewa wat entan tayan wan dim dim une taine paewa mini entanen!"

¹⁷ Iesu ap me waniwa, wa ewamot mega wataget God no oise kakaewa gapan seane ame ase anu awane. Ame anega seane, Pa gega men anu gurana menan potana oma yame mini yagiriwan.

¹⁸ Iesu ame tani menan, Ian Diu nagirewa yonan singui anega wayawan, "Endi ge yo ansena da ta ewane yawat gapan aro amun arita mame waran taiana nu anu tumat gimaget!"

¹⁹ Iesu garewa anega wadiamon, "God Paewa ma ae wabenagene wam yampoa gwanap ne sia tu waborain."

²⁰ Go Diu nagirewa sia anega wane, "God Paewa ame tune en apane dere apan da nani yamunaet nani yamu daiton

gapan tu waborane go endi ge waingiana wam yampoa gwanap tu waborat waingi?"

²¹ Go Iesu God Paewa menan ya waiwandin go mek etua menan waiwandin.

²² Amba Iesu bop ta sia yon wandeni ewap wa ewamot mega nop mame Iesu waniwa ap mepe darinamu purut wan ase anu awane. Amba God oit mega ge Iesu mek anen waiwandiniwa iragi anu tumat tane.

Iesu waenapan iragi ire yao kakayat mumiwan

²³ Ierusalem gapan Paina Yamaseni Baripewa tuguiwanumune Iesu ap mepe den wande yo ge paua ugup ugup taiwandin waenapan arugataet to iamen, yawan anu tumasiwanumun.

²⁴ Go Iesu mek ae anuiwandini ya anu tumat mumiwandin iwa me waenapan imumu potamu asigip tan.

²⁵ Den me anuiwandini orup da yone waenapan oitamu me da ya wadieta. Iwa waenapan imu pose anenen anuine me asigip tan.

3

Iesu ge Nikodimas

¹ Ap mepe, Ierusalem gapan, Parisi apan da yaua Nikodimas wande en Me Diu nagirewa namu yoyo muga da. Gutut mega mam.

² Me mumia Iesu inap tauue anega wan, "Wadianiana apanewa, nu asiginup ge wadianet da God inap ongean. Iwa ge yo ugup ugup taianawa, orup da God me inap ya wandepiwa ge taianawa mini ya tata."

³ Nop garewa Iesu aroga anega wan, "Ne tavewa di wadiagivin, God toemu mega orup da daiton ya unugeta. Orup da me Guewa Woup Seniwa gapan ya yanepiwa me God toemu mega ya unugeta."

⁴ Nikodimas singui anega wan, "Apan arita tani anenen amba sia yaneta? Tavewa di me inewa potap unuk ae wam derewa sia yaneta go?"

⁵ Iesu gare wan, "Ne tave di wadiagivin, orup da me kaum ge Guewa Woup Seniwa gapan ya yanepiwa me God toemu mega ya unugeta."

⁶ Etua gapan yanepi etua di, go Guewa Woup Seniwa gapan yanepi ame guewa di.

⁷ Ne sia di yanapen menan waingina anu seke ya ta. Ge iravi tanamo mek sia di yanan.

⁸ Taik arik ansena tauat anuini gapan tauen aewan. Ge taik ununkewa megenat anui, go at ambe gapan oniwan o at ambe gapan aewan ge anu wawa da umap uon. Ap mini daiton daiton Guewa anuini gapan yanapen."

⁹ Nikodimas singui sia anega wan, "Ma anenen venaseta?"

¹⁰ Iesu gare wan, "Ge Isurero nagire wadiamot mugawa dimen ge inak ma iragi ya anuitamiagi?

¹¹ Ne tave di wadiagivin, nu asiginupe gapan waivin amba gutut waitoni ame yawatoni gapan waivin, go waenapan e gutut nuga ya di anuyan warisi.

¹² Ne piup guegue mega wadiagena ge ya anu tumat nimanegean. Anenen amba kiman guegue mega wadiagepena ge anu tumat nimanegai?

¹³ Waenapan daiton da kiman ya dot aen, go daiton megenat kimani aoma taueni, ame ne, Kimani Vitana apanewa.

¹⁴ Mosis mokare guewa at kaimewa gapan iap eneni mini, Kimani Vitana apanewa paina ao iap enain.

¹⁵ Ap menan da da ne anu tumat nimanegapiwa inak yaibobot warain." Iesu ap anega wan.

¹⁶ Iwa God piup nagirewa munan bumaga tantan anu guren menan otua daiton iragena nunen. Ap menan da da God otua anu tumasepiwa guamu ya wakaumain go inak yaibobot warain.

¹⁷ God otua watu enen piup ma taueni tavewa waenapan wanene tamopen menan ya tauen, go me gamup waenapan inak warapen menan tauen.

¹⁸ Mu da da anu tumasepiwa koewa gapan wanene ya tamota, go mu da da ya anu tumasepiwa gaseget God wanene mega gapan yonane, iwa God otua daiton iragenawa ya anu tumasene.

¹⁹ God wanene ame tamopi tavewa ame mam, ganat piup tauen, go ya anu tumasene nagirewa mum sisip imumu

wareni menan ganat tandayasene iwa mu inak muga koevet.

²⁰ Mu iragi koewa taine ganat tandayasiwanum, iwa koewa muga ganat arogamepi tawa menan mu ganat gapan ya tauain.

²¹ Go mu da da ganat warane den tamana ininewa, ganat inap tauain iwa mu den aroga ase yao anuin ame mu dim da tainewa mu God gamup taiwanum.

Dion, dup iamuiniwa, Iesu gutureewan

²² Mame ewap, Iesu amba wa ewamot megawa at Diudia arige use amone, ap mepe wam animpo mini den tanamo wandeni amba anu tumat dupewa iamuiwanumune.

²³ Ap wamewa at ugupewa at Aenon, at Seilim konintu, Dion dup iam wandin, iwa at ame gapan kaum aruga, amba waenapan aruga pot poraet dup iamot wan tauianumun.

²⁴ Mame tane ewap ita nagirewa Dion waran gwat noke baraene.

²⁵ Dion wa ewamot megawa amba Diu apan da den God yamap bigip muga wat mutapen gueguewa menan notatae waiwanumun.

²⁶ Mu Dion ine tauan anega wane, "Wadianiana, apan ap me ge den Diodan asepagan daiton menan guturewa wawa kakayat taingianawa, ame waenapan dup iamuiwan, amba mu iragi me inap amuiwanum."

²⁷ Dion gare wan, "Apan da tat mega aroewa God kimani wanini gapan megenat taiwan.

²⁸ E ek gutut nega wana anuyan, ne, God om enuni apanewa, Keriso uon go ne me namup watu enanegen ongena apanewa.

²⁹ Waenapan negawa, waen apan gan-ganaseni megawa di. Apan ame, me evenewa, naine mutat gapan me amase taiwandata. Menan naine mutat apane noa anupiwa me aton anuta. Ne naine mutat apane evenewa mini amba aton ame negawa potanap no dotouen iwa Iesu taueni menan.

³⁰ Iesu ne aiganap aiwadata go ne me gauarap angingain."

Da kimani visen?

³¹ Kimani viseni apanewa me aigap iragenawa. Go piupa yaneni apanewa piup megawa, amba piup guegue mega wainiwa.

³² Kimani Viseni apanewa dim da aupa yaveni ge anuni oisewa waiwan go wae-napan noa ya wariwanum.

³³ Apan ansena da Iesu nop mega ware di anu kakayaseni, me aroga ase manega wata, "God ame tavewa di."

³⁴ Iwa God wa watu eneni apanewa, Iesu God oise wainiwa iwa God Guewa Woup Seniwa om aigapewa Iesu waniniwa.

³⁵ Mamewa otua menan anu guren menan dim dim iragi Otua nani bagup baraen.

³⁶ Orup ansena me God otua anu tu-masepiwa inak yaibobot wariwandata, orup ansenawa da God mek otua tandayasepiwa me inak da ya wareta go God nemoro mega ware me inap baraeta.

4

At Sameria waen da Keriso gamup inak waren

¹ Ian Parisi nagirewa Iesu nop oit mega anune me waenapan wa upamuiwandin ge dup iamuiwandin arugataet ewap amuiwanumune, go Dion ewap amuine aruga uon.

² Go dup ame Iesu ya iamuiwandin, go wadiamot megawa ame taiwanumun.

³ Ambagan Iesu ian Parisi nagire nop ame Iesu menan waiwanumune anuni at Diudia ame ae ve ewagai at Galili sia aen.

⁴ At Diudia ge Galili nimakamup at Sameria wanden, ap menan Iesu piup Sameria tau ge tau aiwandini.

⁵ Sewa da ap mepe Sameria gapan yaua Saika tauen, at piup da watageta apane Diekap otua Diosep ire di ve waneni ame mainep.

⁶ Diekap kaum men urat ware tu matakameni ap mepe wanden. Amba Iesu ap nonongataet oniwandin wam ianupewa wareni menan epi torot wan amba kaum tu matakamene ame no kaimap ae wanden.

⁷⁻⁸ Iesu kaum no kaimap wanden, wam ame den wadiamot mega vean at sewa baware da ame taba une tapen amon. At

Sameria waen da kaum urat ame gapan utapen tauen. Iesu waen ame anega dien, “Kaum da ut nena napena umap?”

⁹ At Sameria waen ame gare anega wan, “Ge Diu apanewa amba ne Sameria waen go endi ge kaum ut genapen waingi?” (Sameria nagirewa naine sipewa ian Diu sip ame gapan sia ya nain, amba ugup ugup ap mini den iwa mu dere anavi wanumamun.)

¹⁰ Iesu sia wadien, “God genat anuni ge oare amba kaum mut nenat wana ne da ge oare. Anu nimanegopo amba God genat anupo, ge mup inanap wapo, ne inak yaibobot kaumewa genapo.”

¹¹ Waen ame Iesu anega dien, “Ge yaibobot kaumewa ame endi amba utai? Kaum aipa urata diawa, den ge kaum uta uta pokewa da ya waraana.

¹² Endi waingiana ge yauga ao waran mamanu Diekap yaua aoma waringi, me urat ma ware kaum tu matakam nuneniwa megenat gamup naivin. Otu waiwa ge man tap megawa iragi ap mepe den naiwanumun.”

¹³ Iesu gare sia wan, “Orup da kaum iragen ma napiwa me megewa sia pakarai-wandata.

¹⁴ Go orup da kaum ne wanapen napiwa, me megewa sia ya pakaraeta. Amba tave di kaum ne wanapena ame kaum urewa bot bot yaugai potap di tauiwandata ame yaibobot inagewa tautaneta.”

¹⁵ Waen ame Iesu anega dien, “Enda, kaum ure dena ame nen! Napena megana sia ya pakaraep amba urat ma gapan kaum utapen menan da sia ya ongep.”

¹⁶ Iesu waen ame anega dien, “Ak, memaga wadia, dere sia onaen.”

¹⁷ Waen ame entane gare anega wan, “Ne memana da uon.” Iesu waen anega sia dien, “Ge memak uon waana ame tavewa di waan.”

¹⁸ Ge namu apan nani yamunaet naimoana, go endi apan den wanik agiana ame ge memaga uon. Tavewa di, endi ge gaseget memak uon waana ame tavewa gapan di waan.”

¹⁹ Waen ame Iesu dien, “Enda, ne anuingina ge God nop mega waiana apanewa da.

²⁰ Nu at Sameria isimuran ge omayan bae wataget tunup ma gapan God wa taragasiwanumun, go Diu nagirewa e anega waiwanin, wa taragaset arewa Ierusalem gapan megenat di.”

²¹ Boge Iesu anega wani, “Waen negawa, anu tumat nimanek, wam konintu taiwan amba e Mamana God tunup ma gapan ya anu tumatai amba Ierusalem gapan den ya anu tumasiwaniai.

²² Ian Sameria e wa taragaset ega tavewa ya anuiwanin go nu Diu nagirewa wa taragaset nugawa iwa mega den anuivin, iwa inak ibariwa Diu nagirewa inamup tauen aewan.

²³ Wam usira wandeni onin en endi gaset tauen ame waenapan Guewa Woup Seniwa ge tavewa gamup Maman God wa taragatain. God waenapan ap umapewa God yomu taiwan.

²⁴ God me Guewa di, ap menan Guewa aro amun megawa tavewa gapan waenapan Maman God wa taragasep.”

²⁵ Waen ame sia anega wan, “Ame tauepi ne asiginap, me Mesaya inak nunini apanewa Keriso, me tauepiwa anu tumat nuga guegue mega iragi wa ewaneta.”

²⁶ Waen ame ap anega wani, Iesu gare entanen aroga anega dien, “Inak enini apanewa mame diagivin.”

²⁷ Iesu nop ame waiwandini, me watu enamot mega taba une tapen amone sia entan tauane. Tauan yawane Iesu waen ame dere nop waiwanumune yawane anu bambamat anune go singui manega da ya tayawane, “Ge dim menan waen inap nop waingi, dim menan nop dere waiwanin?”

²⁸ Boge, waen ame kaum pokarik mega ae veniwa, entane sewa bawarewa ame sia ae waenapan anega diamon,

²⁹ “Onaen, apan da ne da ya anuina ge da ya taina noa iragi wadianegeni ame yawan. Endi anuiana ameme God om enuni apanewa Keriso di, go?”

³⁰ Boge waenapan pa sewa ame ae veian tauan Iesu yawapen amon.

³¹ Pa sewa nagirewa onam wanumunewa Iesu watu enamot megawa nanamasen anega wane, “Wadianet nugawa, taba ma wat nan.”

³² Go Iesu anega diamon, “Ne taba nega wandia go e asigip ya tayan.”

³³ Iesu nop ame wani, watu enamot mega gare gare ase ma manega wawa mutan, ‘Orup da taba gaset tam taue wanen nan?’

³⁴ Ame waiwanumune anuni, Iesu anega wani, “Watu enanegeni anut mega navewa amba nao mega neneni taitamepena ame ne taba negawa.

³⁵ E asigiap e naewa veranewa, siragam degede uon tapi ame maup wamewa. Ne wadiaep, yamaya uarenan nao egak yawan gaseget maup taue aen daupam menan inin geraget tan wandia. Go God daupam mega wam wam di wande aiwanda.

³⁶ Daupam taini apanewa garewa mega tawanane wariwan ameme maup taue aeni ame bongamiwan. Maup ame tavewa Iesu anu tumasine nagirewa. Mu inak yaibobot wanumoin. Ap menan vereni apanewa ge daupam taini apanewa mu dere aton tain.

³⁷ Wataget wane nopolwa ame tavewa di, Apan da verepi amba apan dawa daupam tata.

³⁸ Navewa e ya tayan go taba maupewa taueni bongamepen menan watu enaen. Ame waenapan upinewa nao kaimakaet tane, go nao muga ginewa e ta yon borapen aisewan.” Iesu ap anega wan.

Ian Sameria nagirewa arugataet anu tumat tane

³⁹ Waen ame Iesu yave oisewa wan anune menan Ian Sameria nagirewa pa sewa baware ame gapan wanumune iragi Iesu anu tumasene.

Waen ame pa nagirewa anega wadiamon, “Ne da ya anuna da ya taina noa aruga me wadianegen.”

⁴⁰ Ap menan Sameria nagirewa Iesu ine tauan kaimakaet wan watanane. Ap menan Iesu mu tanamo wam dere wanden.

⁴¹ Ap mepe wanden gapan me nop mega waiwandiniwa waenapan imu pose

wat entanen boge arugataet anu tumat tane.

⁴² Mu iragi waen ame anega diane, “Nu, ge Iesu oise wadianeana ap me megenat anu tumat ya taivin, go me nop wani nuk anutoni gapan. Tave di, apan mame waenapan wat inakam mumini apanewa.”

⁴³ Wam dere uon tani ewap, Iesu at Galili di aen.

⁴⁴ Iesu namu da anega wani, “God nao mega taini apanewa at piup mega iragenawa nagirewa viriwa da ya tainewa.”

⁴⁵ Amba me at Galili taueni at ame nagirewa iragi atonu den Iesu warupane. Iwa mu iragi Ierusalem gapan wanumone, Paina Yamaseni Baripewa gapan Iesu yo mega ugup ugup taiwandini mu iragi ap mepe den yaviwanumun.

Iesu nao aritawa apanewa otua da wat inakamen

⁴⁶ Wam da sia Iesu me at mega daio sewa bawarewa Keina at Galili aen. Wataget ap mepe me yo mega erewa tan, kaum iragen wan wain venasen. Den ap mepe Kaponiam apan aritawa da otua vege den at Kaponiam gapan iniwandin.

⁴⁷ Apan ame Iesu at Diudia gapan one at Galili taueni oisewa anuni menan me ae Iesu inewa taue noek noek manega waiwandini, “Vit onak ne otuna wat inakamepen iwa otuna bop konintu di.”

⁴⁸ Iesu anega dien, “Ne yo nega paua ugup ugup tapena yawanaget anuyan taiwanin? Yo ya tapenawa e ya anu tumat nimangai.”

⁴⁹ Nao aritawa apanewa ame anega wani, “Ayop otuna boepi tawa menawaet vit onak.”

⁵⁰ Iesu gare wan, “Ganawan ak otuga inakaeta.” Apan ame Iesu nop mega anu tumaseni ao yon wande di aen.

⁵¹ Apan ame neginaet di aiwandini nao nagire mega onamon negina tautanan, otua oisewa anega wadiane, otuga gaset kakae tan.

⁵² Apan aritawa ame singui wayamon, “E wane anup otuna wam airase anse-nawa gapan inak waren?” Mu anega wadiane, “Wata wam airase daitonawa gapan otuga kakae tan.”

⁵³ Boge Kaponiam aritawa apane anuni, wam airase daitonawa ap omewa gapan Iesu anega me dieni, “Ge otuga inakaeta.” Ap menan apan ame ge waenapan pa mega gapan ininewa iragi Iesu anu tumsiwanumun.

⁵⁴ Mame Iesu at Diudia gapan ase ma tauue yo mega derewa pa Keina, at Galili gapan taniwa.

5

Iesu kaum awan etop vek apante da wat inakamen

¹ Wam ame ewap da, Diu nagirewa barip muga menan Iesu pa Ierusalem dot aen.

² Pa Ierusalem gapan tonan da yaua Man Sip tonane diane. Tonan ame mainantup kaum awan da ian Iburu nop muga gapan yaua Betsaida diane. Kaum awan ame etop, pa namdat nani yamunaet ikukuk tumone.

³ Ap mepe enkana ankana nagirewa arugataet ininewa, upi yame borat mutanewa, upi pusi nani gegerawa, upi ugu wapi in wandeniwa.

⁴ At ame nagirewa anu tumat manega taiwanumun, Anea da vise kaum awan (yaua Betsaida) menawasep amba orup da kauma awan gapan namu taupei etua kakae tata.

⁵ Ap mepe vek apante da pusi nani in wandeniwa en mega apante daiton aonagaet nani yamunaet nanin yamu yampo (38) wande en.

⁶ Wam ame Iesu apante ap mepe iniwandin yaveni gapan me anu aven, apante ma vek tan en nonongataet di wanden. Me singui inap wan, “Ge inak warat anuingi?”

⁷ Apan ame gare wan, “Kaiwan, ago da uon, orup da inanap mapu uon ago nenep ae kaum menao manao taini gapan taua taua. Nek ta yawan ae tauapen taingina go upi namunap vit amone namu ae tauwanumun.”

⁸ Boge Iesu inap anega wan, “Ao yon, eragi gega pait ae ma wara ak.”

⁹ Ame no utap apante inakaen. Me eragi mega ae ma ware boge aen. Yo mame venaseniwa, Diu nagirewa wagat wamewa gapan gapan.

¹⁰ Ap menan Diu nagirewa inak wareni apante inap wane, “Diu pura muga bawarewa wagat wamewa ge eragi waran ingiana ame iup paina yamasingi.”

¹¹ Go Iesu gare anega wan, “Apan ansena tanegen inak warana ame inanap anega wan, eragi gega pait ae ma wara ap ak.”

¹² Menan mu singui anega tayawane, “Ame orup ambe da wan amba ge eragi ae ma wara ap agean?”

¹³ Inak waneni apante me oare ame da, iwa Iesu boge ap mepe waenapan barat mutane gapan karaua totnak tauue yaumakamup aen.

¹⁴ Evi amba Iesu apante ame God Paewa gwanap taneni anega dien, “Yao anu kakayat, ge gaset inak waraan. Ap menan koewa da sia ya ta iwa koewa iragenawa da sia waragepi tawa.”

¹⁵ Apan ame aeni tauue Diu namu yoyo nagire anega wadiamon, “Wat inakam nimanegeni apante ame yaua Iesu.”

¹⁶ Ian Diu nagirewa Iesu inap wawa koko tane, iwa Iesu wam pura bawarewa iupewa to paiseniwa amba apante ame den wat inakameni menan.

¹⁷ Iesu anega diamon, “Ne Mamana God nao mega ta onin en mame tauia, ap menan ne den nao taivingain.”

¹⁸ Ap menan ian Diu nagirewa Iesu topen menan anu sisimen taiwanumun, iwa wam pura bawarewa iupewa to paiseni megenat uon go God mek mame iragena waiwandiniwa amba mek ingane God den om inat wa taiwandini menan.

God Otua inak ibariwa

¹⁹ Iesu garewa manega wadiamon, “Ne tave di wadiaivin, ne Mamana God otua ne di, ap menan dim dim da ne negenat ya di tain iwa Mamana dim da taniwa ne gaset yawana gapan ap umape megenat di taingapen iwa ne, God otua, Mamana umapewa tainawa.

²⁰ Mamana nenan anu gureni menan dim da anun taini ta ewanegiwan. Yo ugup ugup yawayana ame gauarap, evi amba Mamana ewanegep ne yo aigape di taingain e yawane amba kuin tarak wai.

²¹ Ne Mamana waini bop tane nagire inak musinewa. Otua ne ap mini orup da da imuna warepiwa ne inak wanain.

²² Mamana waenapan wanene ya tamota go wanene tata aroewa ne nenen.

²³ Ap menan waenapan iragi i omani seane Mamana viriwa taine mini ap anega ne inanap tain. Menan ne otua Iesu waenapan viripana ya tapi Mamana, ne watu enanegeni, viriwa mu den ya tain, iwa Mamana watu enanegeni menan.

²⁴ Nop tavewa di wadiaivin, da da nona anu amba wa watu enanegeni apanewa God anu tumasepiwa inak yaibobot wariwandata. Orup ame God ya wanene tata go bop arewa gapan am ninigame inak arewa dotou aen.

²⁵ Ne tame di wadiaivin, wam usira wardeni onin en ma gaset tauen bop nagire God otua nona anuin amba mu da da anupiwa inak warain.

²⁶ Mamana me mek inak urewa di menan, me otua, ne, inak urewa nenen.

²⁷ Amba ne wanene tapen aroewa neneni iwa ne Kimani Vitana apanewa.

²⁸ Ap menan seke ya tane, wam oniwan borit wane nagirewa nona anu

²⁹ ao yon wanumoin, mu kakae tane nagirewa mu ao yone inak warain, go mu koewa tane nagirewa ao yone wanene tautanain.

³⁰ Ne nek ingane dim da ya tain, go dim da Mamana wadianegeni ap gapan wanene tamuivin. Ne wanene nega tamana iragen iwa ne nek nenan ya taivin go Mamana imu pose warapen menan taivin." Iesu ap anega wan.

Iesu inak gueguewa

³¹ Iesu sia anega wan, "Ne nek ingane oit nega wapenawa, oit nega aroewa uon.

³² Go God oitana waiwan amba ne asiginap anenen me oit nega wainiwa ame tavewa di.

³³ E Dion inap singui tayawapen menan waenapan watu enamoyan amba me oit nega tavewa di wadiaen.

³⁴ Ne waenapan da oitana wapen menan yowa ya taivin go Dion ne oitana wadiaeni gapan e inak warapen menan nop mame wadiaivin.

³⁵ Dion me dun mini yagire ganasewa muniwandin, ap gapan e wam koni otu da ganat mega atonu tayan.

³⁶ Go ne inak nega gueguewa itaniwa aigap Dion mega mini uon. Nao nega iragena Mamana taitamet wa nenen, mame di taivin. Nao nega mame tavewa wadiaviv ame God wa watu eneni apanewa ne me di.

³⁷ Amba Mamana watu enanegeni mek ingane gutut negawa waiwan. E Mamana nop waini da ya anuyan o irewa da ya yawayan,

³⁸ o nop mega potayap dugup ya waren wandia, iwa e ya anu tumasiwanin me daiton da ne watu enanegeniwa.

³⁹ God nop mega namua ok seane pot pot batnagiwanin iwa nop ame gwanap inak yaibobot warayana anuiwanin. Nop ame oitana waiwan.

⁴⁰ Go e inanap tanda taiwanin inak wara wara menan onaet ya anuiwanin.

⁴¹ Ne apan wa atonat mega ne ya warain,

⁴² go ne asik taena ame, God baigan mega potayap ya wandia.

⁴³ Ne Mamana Kimaniwa yaua gapan tauan, go e ya waranegean, go ne asiginap orup ugupe da ambagan mek yaua gapan taupei, e menawaet warai.

⁴⁴ E gare gare wa atonat taiwanin go God wa atonat imaepen yowa ya taiwanin ap menan anenen amba anu tumat nimane-gai?

⁴⁵ Go Mamana namup e tandayat nimanegiana menan ne ya anu koeragam imain go Mosis, e anu daviana apanewa, me anu koeragam imaeta.

⁴⁶ E Mosis anu tumasiwaniampinawa, ne den anu tumat nimanegai, iwa me ok nenan se wan.

⁴⁷ Go Mosis ok se wani ya anu tumaseana, anenen amba ne wapena anu tumat tai?" Iesu ap anega wan.

6

Iesu waenapan arugataet (5000) mini watumon

¹ Wam mame ewap, Iesu kaum awan Galili kabum gagap to nuguse eto yamu dotou aen, kaum awan ame yaua dawa wainewa, Taibirias.

² Iesu yo mega paua ugup ugup ta vek nagire wat inakam mumiwandin gase yawane menan waenapan iragi to iamen ewap kaum etop ikukuk pusimup amon.

³ Boge Iesu togan dot ae wadiamot mega tanamo den wanden.

⁴ Wam ame gapan ian Diu nagirewa Paina Yamaseni Baripewa konintu tauiwandin.

⁵ Ap mepe wanumone Iesu yangut tani waenapan arugataet da to iamen inewa onam wanumune yawamon. Menan Pilip anega dien, “Nu taba une amba tat waenapan aru ma munat nain?”

⁶ Me singui ame wani mondi Pilip pusip warup yawapen menan, go anenen ta ta inagewa me gaset anun.

⁷ Pilip gare anega dien, “Akae Ayop, nu bodu daitona navewa tatawa, garewa nugawa agim make warat, taba une ta munat, ame umap uon, iwa waenapan daiton daiton semu otu otu napi umamup ya tamota!”

⁸ Amba Iesu wadiamot megawa apaneda, Anduru, Saimon Pita gwaniwa, anega wan,

⁹ “Orup apan otu da mapa buredi magamene nani yamunaet amba meo kamontua dere mapa tambun, go waenapan aru mame mu napi umamup ya di tata.”

¹⁰ Menan Iesu wadiamot mega anega diamon, “Waenapan diamone, ap mepe unawat aigap ae wanumop.” Boge waenapan ap mepe ae wanumone. Apan paua muga arugataet da (5000 mini) wanumon.

¹¹ Boge Iesu buredi magamene ame tambu God inap gaun wan, yan aiman se munen muk anuine gapan amba tam naiwanumun, amba meo ap anega den sia tan.

¹² Waenapan taba ame nane iragi umamup tan. Iesu wadiamot mega anega diamon, “Taba nan semua veanewa iragi bongamen, da danam danam ya tapen.”

¹³ Ap menan buredi magamene ge meo semua veane bongam enane kaenat aonagaet pusinawan dere no dotou wane.

¹⁴ Taba nane ewap, waenapan iragi Iesu yo ame tan yawane anega waiwanumun, “Tavewa di, apan mame God noa waini

apanewa da, nu piup ma gapan amase taintoniwa mame tauen.”

¹⁵ Waenapan nop barim onamo Iesu nanamase wap ayop muga tapen menan waiwanumune. Iesu ame anuni menan tanda ta megenat togan dot aen.

Iesu kaum gagap ap aen

¹⁶ Wam ame mum gine, Iesu wadiamot mega, mugenat, kaum awan baware Galili ame vit amon.

¹⁷ Ap mepe kabum gagap dotouen awan ame gamu to nugusen at Kaponiam amuiwanumune, mum tauen. Wam ame Iesu den intum ya tamon.

¹⁸ Ame gapan taik baware tauen kaum tuewa tonagasiwandin.

¹⁹ Mu bara tan awan nimakap tauane (6 kilomita mini) ap mepe Iesu kaum gagap ap mu gambenamu oniwandin yawan tap anu guran.

²⁰ Go Iesu anega diamon, “Ma ne, tap ya anune.”

²¹ Mu boge daramu wan Iesu wat agoasene kabum gwanap dotouen, menawaet kabum amot anuiwanumune arewa gapan awan etop ase enesen.

Waenapan Iesu yope taiwanum

²²⁻²³ Woop seni amba, waenapan, ayop buredi wat aipakam munen nane arewa gapan wanumone, Iesu wadiamot mega mugenat kabum daiton ame gapan dotou amone yawamone. Mu Iesu den ya aet anun iwa kabum dawa da uon. Go ame mumagetawa kabum upi at Taibirias gapan tauan.

²⁴ Menan waenapan yawamone Iesu go wadiamot mega ap mepe den uon, boge mu kabum upi gapan sia dotouan Iesu yowa at Kaponiam amon.

Iesu me inak tabaewa

²⁵ Waenapan Iesu yowa tane kaum awan ame eto yamune gapan yawane singui wayaviwanumun, “Wadianiana apanewa, ge mapa andi tauan?”

²⁶ Iesu gare wan, “Ne tavewa gapan di wadiaivin, ne yona taiwaniana iwa e yo paua nega yawayana menan uon, go iwa e taba nayan bagu kaume yaneni menan sia onayan.

²⁷ Taba koe taini navewa menan ya taiwanian go yaibobot tabaewa menan

navewa taiwanian. Yaibobot tabaewa ame God Kimani Vitana apanewa, ne, enain. Iwa Mamana God amun mega nene umap wani menan.”

²⁸ Iesu ame wani mu singui ase sia wayaviwanumun, “Nu God anuini navewa nu ansenawa da tata me aton anuta?”

²⁹ Iesu gare sia wan, “God nao megawa mam, wa watu enanegeni otua ne di anu tumat nimanek waniampen.”

³⁰ Ap menan mu anega sia diane, “Endi ge yo ansena da sia tai gapan nu yawat anu tumat gimagait? Ge dim da tai?”

³¹ Nu isimuran wainu wataget at kaimewa gapan taba mana nane, Oise Kakaewa gapan ok seane wandia,

Me buredi mana kimaniwa munen nane.”

³² Iesu anega wadiamon, “Ne tavewa di wadiaivin, buredi mana ame Mosis muneni ame kiman tabaewa da uon, ne Mamana taba buredi tave iragenawa kimaniwa di eniwandata.

³³ Amba God buredi megawa kimani viseni ameme ne me di amb a ne waenapan inak yaibobot muningain.”

³⁴ Mu sia wayaviwanumun, “Arita nuga, wam mame use aeniwa gapan buredi mame pot pot nuningan.”

³⁵ Menan Iesu gare wadiamon, “Ne inak yaibobot tabaewa, da ne dirin wapun menan nanamuna tapiwa me enup ya areta. Me ne di anu tumat nimanek wandaipinawa, me mege ya pakaraiwadata.

³⁶ Go ne gaset namu wadiaen, e yawanegiwanin go e ya di anu tumat nimanegisi.

³⁷ Mamana da da imu pose entan ta nenepi ame nanamuna onamoin, ame nenan onamopi ne ya up oimoin.

³⁸ Iwa ne kimani vit ongena, Mamana God dim da anuini tapen menan ongen, nek anut nega men uon.

³⁹ Endi God watu enanegeni apanewa anut mega mam, me neneni waenapan da daiton mini ya wakaumapen go wam verisiwa taupei ne tapena inak muse iravi ao yon wanumoin.

⁴⁰ Ne Mamana anuini ame waenapan ne yawanoge anu tumat nimanegipi mu yaibobot inagewa tautanain. Amba wam

verisiwa ne tapen inak muse ao yon wanumoin.”

⁴¹ Nop ma wani, iam Diu nagirewa gwen gurut wan notatae wane, iwa me anega wani menan, “Ne Kimani Vitana tabaewa.”

⁴² Menan mu anega wane, “Ma Iesu apan Diosep otua ine mame nu asiginup iwa dimen me anega waiwandini ne Kimani Vitana tabaewa?”

⁴³ Iesu anuni me gare anega wan, “Gare gare gwen gurut ek waiana ae vean,

⁴⁴ Orup da da mu aro muga gapan inanap ya onamoin go Mamana watu enanegeni wa upamopi inanap tauain. Amba ame wam uiwa gapan, ne tapen inak muse ao yon wanumoin.

⁴⁵ Wataget God nop oit mega waiwanumune nagire ok anega seane, God mek waenapan wadidiamuiwadata. Nop ame tavewa waenapan da da darine pemak Mamana nop wapi anupiwa amba me inap yao asik tapiwa ame nenan onamoin.

⁴⁶ Waenapan da Mamana ya yawane, ame God den wandini otua megenat Mamana yaven.

⁴⁷ Ne tavewa di wadiaivin, orup da anu tumat taiwandapinawa yaibobot inagewa wareta.

⁴⁸ Ne inak tabaewa.

⁴⁹ E isimurae wai wataget at kaimewa gapan taba mana nane go mu borit wane.

⁵⁰ Go taba endi mame kiman vit oneni ame ugup, orup da napiwa me ya boeta.

⁵¹ Ne yaibobot tabaewa Kimani Vitana, orup da taba mame napiwa yaibobot wande aiwadata. Taba mame ne etunawa ame ne iragi piup ma munan inak gamup wariwanumain.” Iesu ap anega wan.

⁵² Iesu nop mame waiwandin anune menan, ian Diu nagirewa ugu gangane den nop kaimakaet gare gare anega wane, “Apan ma nive mone anenen nunep nata waiwan?”

⁵³ Iesu anega sia diamon, “Ne tavewa di wadiaivin, e kimani viseni apanewa etua ge deniwa ya nanewa, kiman inak megawa da potayap uon.

⁵⁴ Orup da da ne etuna ge denina napiwa mu yaibobot inagewa gapan

wanumoin. Amba wam uiwa gapan ne tapen mu inak muse ao yon wanumoin.

⁵⁵ Ap menan, ne etunawa ame inak tabae iragenawa amba deninawa inak kaume iragenawa.

⁵⁶ Orup da da etuna ge denina napiwa ame mu ne potanap wanumoin amba ne mu potamup wanik angingain.

⁵⁷ Ne Mamana yaibobot wandiniwa watu enanegen menan ne wanik angin iwa Mamana gamup, ap umap sia orup da ne gamunap inak tabaewa naiwandapinawa me wande aiwadata iwa ne gamunap.

⁵⁸ E isimurae omae bae taba mana nane borit wane, go taba buredi mame kimani viseniwa menan orup da taba mame na iniwandapinawa me yaibobot wande aiwadata.”

⁵⁹ Iesu nop mame waiwandini ame iam iam paewa at Kaponiam gapan wadidiamuiwandin.

Wadiamot mega arugataet Iesu ae ve amon

⁶⁰ Nop mame anune Iesu wadiamot mega anega wane, “Ma anenen opata ma kaimake den, da anu wareta?”

⁶¹ Iesu mawap wane go Iesu imua gapan anuni, wadiamot mega aigap doran waiwanumune menan me anega wan, “Nop mam kaimake den waingina menan endao imaeewan?

⁶² Endi ne namu kimani waingena arewa sia angepen yawaneg e anenen anui!

⁶³ Mame Guewa Woup Seniwa yonen inak muniwan, go nu etunua inak da ya muniniwa. Ne inak nopewa wadiaena ame God Guewa aroewa gapan tavewa arogameta, amba nop ame inak muniniwa.

⁶⁴ Endi ne waingina e upi anu tumat ya taisi.” Iesu ame wani iwa ere mangan iragen Iesu me asigip tan orup ansena ya anu tumasiniwa amba orup ambe da omine wata.

⁶⁵ Iesu sia anega wan, “Ap menan ne namu wadiaena orup da mek aro mega gapan inanap ya oneta go Mamana imu pose entan tapi gapan amba oneta.”

⁶⁶ Wam mame use aeni gapan wadiamot mega upi tandayasen ae vean, amba ewap da sia ya amon.

⁶⁷ Iesu apan aonagaet pusinawan derewa anega wayawamon, “Endi e den ae venek aiset anuiwanin go?”

⁶⁸ Amba Saimon Pita garewa wadien, “Ayop, nu aneta da menan anait? Ge nop gegawa megenat yaibobot inagewa.

⁶⁹ Nu anuton anu tumat taivin ge God watu eneni potaga woup seni apanewa daiton iragenawa.”

⁷⁰ Iesu entan gare wan, “E aonagaet pusinawan derewa nagirewa om ne enuyen. Go e yaumakayap orup daiton megenat koerage.”

⁷¹ Iesu ame wani Diuda apan Saimon Iskeriot otua menan wan. Me apan aonagaet pusinawan derewa ame da go evi me Iesu ominewa wata.

7

Iesu Isurero barip muga da aen

¹ Mame ewap, Iesu at Galili gapan ikukuk tau ge tau aen, amba at Diudia den ya aen iwa Diu nagirewa togurapen amase ap mepe taiwanumune.

² Go wam ame Diu nagire dugup wanup gapan tune baripe konintu tan.

³ Iesu gwani waiwa denip mega daitonawa me inap anega wane, “Ge at ma ae ve amba at Diudia ak, ap me gapan wa ewamot gegawa Diudia gapanawa yo paua ugup ugup gega yawain.

⁴ Iwa orup ansena da yaua aroga tauat anuiniwa karaua ya tata. Ap menan wataget ge inak ugup ugup taingiana, gek ingane piup ma to ewat.”

⁵ Iesu mek gwani waiwa anu tumat da me inap ya tane menan ap anega wane.

⁶ Go Iesu inamup wan, “Wam nega tamanawa ya di onen tauia, go wam ega union da di.

⁷ Piup ma e ya tandayat imaiwan, go ne tandayat nimanegiwan iwa mu koewa muga wat arogam mumivin.

⁸ E barip gage aisen. Ne endi barip ame gage ya di dot ongain, iwa endi mame ne wam nega tamanawa da uon.”

⁹ Mame wani ewap me Galili gapan wande en.

¹⁰ Ap menan, gwani waiwa barip menan amone ewamup, me den aen, aroga uon, go karaua.

¹¹ Endi yawat mega barip ame gagap Diu nagirewa Iesu menan yangut tan singui waiwanumun, “Apan ame amba?”

¹² To iam baware ameme gapan nop simura wa agagam baraene senaren. Upi wane, “Me apan kakae” upi gare wan, “Uon, me waenapan ebo ewamuiniwa.”

¹³ Go Iesu menan da daiton aroga ya di wane iwa Diu nagirewa tamu tane.

Iesu barip gagap wadidiamon

¹⁴ Barip tane uon ya tan amba yau-makap Iesu God Paewa dot ae opata wadidiamon.

¹⁵ Diu nagirewa no i kap wane amba anega wan, “Apan ma anut amba anenen waren, anut yowa da ya tainiwa?”

¹⁶ Iesu gare wan, “Dim da wadiaing-inia ma negawa uon go God watu enanegeniwa me inap tauen.

¹⁷ Da da God nop mega anu tapiwa, ne God amun mega gapan waivin o nek waivin, ame mu anuin.

¹⁸ Me da megenat menan nop wainiwa, mek yaua ao wabawaramepen men mek ingane waiwan, go da me watu eneni menan nao tan yaua ao wabawaramepen men tainiwa apan ame tavewa, ap mepe me inap ebo da uon.

¹⁹ Mosis God iup mega da enen go uon? Go daiton iup da amat ya taiwanin. Dimen wat toguranegepen menan taiwanin?”

²⁰ Mu gare wane, “Ge airampu wa guragen. Ma da toguragepen taiwan?”

²¹ Iesu inamup anega wan, “Ne yo daiton pura bawarewa gapan tan e iragi yao ugu gangan anuyen.

²² Iwa dimen? Mosis God paua mega apan etuya tunapen ok seni iup ame enen. (Tat mega tamana di mame Mosis inap ya tauen go mame apan Eibaraam amba isimuran wainu upi den). Ap menan e orup otu upi etumu pura bawarewa gapan tunamoyañ.

²³ Orup da pura bawarewa gapan etua tunepiwa menan ame Mosis iup mega ya

topaitayan, iwa dimen pura bawarewa gapan apan wat inakamena e ugu gangan inanap taiwanin?

²⁴ Guegue ase yavianawa gapan wanene ya tane, tavewa gapan wanene tan.”

Iesu me Keriso go?

²⁵ Nop ame gapan waenapan upi pa Ierusalem gapan singui tayawamon, “Apan ma togurapen taine apanewa?”

²⁶ Me mame nop aroga di waiwan, iwa dimen mu ya watanane? Ap menan Iesu me God om enuni apanewa, Keriso di anuiwanumun?

²⁷ Go nu anuivin apan ma ambagan tauen, wam ame God om enuni apanewa, Keriso tauepiwa da daiton ya anuin me at ambe gapan tauen.”

Iesu me ambagan tauen?

²⁸ Menan Iesu God Paewa gapan yone wadidiam wandini ve anega wan, “Tave di, e ne asisiap amba den anuyan ne at Galili gapan tauan. Go God, ne kiman gapan watu enanegeni, me da e ya yao anuyan. Piupa Vitana aro amun nega gapan ya wanik angin go God tavewa iragenawa watu enanegen gamup wanik angin.

²⁹ Ne God asiginap tan iwa ne me inap tauan amba me watu enanegen.”

³⁰ Ap me wani menan Iesu warapen tane, go umap uon, iwa togurapen wamewa ya di tauia.

³¹ Ap me gapan waenapan arugataet to iam ame berip me inap anu tumat tane. Mu anega wane, “God wa watu eneni mega Keriso tau yo paua arugataet tata, go Iesu taini mini aigape orup da ya tata!”

³² To iam baware ame gapan Parisi nagirewa waenapan nop simura waiwanumune anune menan mu ge pirisi nagirewa, God Paewa amat taine nagirewa Iesu to warapen menan watu enamone.

³³ Iesu anega wan, “Ne inayap wanigepena wam koni bobou otu da, amba boge watu enanegeni apanewa ine angain.

³⁴ E yona tai, go e ya tananegai. Ne amba wanigepena e ya tauai.”

³⁵ Diu nagirewa muk gare gare anega wane, "Apan ma anut mega gapan amba aepi nu me ya tanat waiwan? Me wandap Diu nagirewa ian Gurik at muga arige gapan wanumuinewa mu inamup ae wadidiamopen menan waiwan go?

³⁶ Me manega waini tavewa dim da? 'E yona tai, go e ya tananegai. Ne amba angepena e ya tauai? "

Iesu Guewa Woup Seniwa menan wan

³⁷ Barip ame wam verisiwa gapan, Iesu ao yon wande amba nop kaimakaet anega wan, "Da da megewa pakaraepiwa, me inanap one amba kaum nap.

³⁸ God nop mega namua ok anega seane, Me da da ne anu tumat nimanegepiwa, me gamup inak yaibobot,

kaume urewa bobot wa taue aiwadata."

³⁹ Iesu inak yaibobot kaumewa maibe mini wani, tavewa ame Guewa Woup Seniwa menan wan. Da da anu tumasepiwa Guewa Woup Seniwa evi da mu warain. Iwa Iesu wam ame gapan kiman ya dot aen, go evi amba Iesu kimani aepi Guewa Woup Seniwa watu en muneta.

⁴⁰ Nop mega anuiwanumune waenapan upi anega wane, "Tave di apan ma Keriso tauapen menan God noa waini apanewa."

⁴¹ Upi anega wane, "Me God wa watu eneni mega Keriso di." Go upi gare wane, "Uon, iwa Keriso at Galili gapan ya taueta.

⁴² God oise kakaewa namua seane ame, Keriso, me Devit naewa, at Betiriem gapan taueta,

(at Betiriem ame apanewa Devit iniwandi arewa)."

⁴³ Menan waenapan seu enun iwa Iesu gagap wane.

⁴⁴ Upi warapen anun, go da ya to warane.

Diu bawarewa muga anu tumat da uon

⁴⁵ Menan God Paewa amase taine nagirewa ewagai amon pirisi bawarewa amba Parisi nagirewa mu singui wayawamon, "Iwa dimen Iesu ya wat onayan?"

⁴⁶ Amase taine nagirewa aroga gare wan, "Apan daiton da nop manega ya waiwandini ame Iesu me waiwan."

⁴⁷ Parisi nagirewa gare kaimakaet dia mon, "E waiana Iesu e den pusiat warupen go?

⁴⁸ Diu namu yo yo nagirewa, iup namua anut warine nagirewa, ge nu Parisi nagirewa da Iesu ya anu tumat taton.

⁴⁹ Uon! Go orup mondigawa, iup ya anuine nagirewa, mugenat Iesu anu tumat tane. Ai! God nemoro mega inamup wandep."

⁵⁰ Nikodimas erewa gapan Iesu ine ae amba Parisi nagirewa den tobob daitonawa, singui anega wayawamon,

⁵¹ "Iup nuga manega waiwan, orup da namu wanene ya ta go me dim da taniwa e namu yao anun amba wanene tan."

⁵² Mu gare wan, "Ge den at Galili apanewa go? Ge yambuni God iup mega namua gapan yop ta, God oise waini apanewa da at Galili gapan ya taueta."

⁵³ Ame wane gapan mu daiton daiton pa muga muga amon.

8

Togane tapatap tani waenewa

¹ Go Iesu tunup Olip, Ierusalem mainepewa, dot aen.

² Amba mumaget iragen Iesu Ierusalem vit ae God Paewa sin gwanap namboya tauen, ap mepe waenapan iragi ikukuk nau panane me boge ae wande opata wadidiamuiwandin.

³ Amba God iup mega amase tainewa ge Parisi nagirewa togane tapatap tani waenewa da waran tauan. Waen ame waenapan namumup wane yonen.

⁴ Amba Iesu anega diane, "Wadianet nugawa, waen ma togane tapatap tani menan wara tauaton.

⁵ Apan Mosis iup mega manega waiwan, ame waen togane tapatap ap anega tainiwa agima togurep boep. Menan endi ge anen wai?"

⁶ Mu singui mame waiwanumune iwa Iesu pusi warupep ebo wa gapan God iup mega da yamasepen menan. Go Iesu kaut enu nani piru gapan ok pia ae siwandin.

⁷ Mu yaugai di singui yasiwamumune, me ao endimase anega diamon, "Endi e orup ansena koewa da inap uon wande piwa, orup ame namu agim ware waen mame top ne yawap."

⁸ Iesu nop ame wani amba, kaut sia enu ok piupa siwandini.

⁹ Waenapan nop mame anune menan tap daiton daiton di amuiwanumun, aeta nagirewa namu di amon. Ap menan Iesu waen ame den mugenat wanumune.

¹⁰ Iesu gari sia endimase waen ame anega dien, "Waenapan mapawa ambagan? Orup da koewa gegawa menan da ya wa koeragam gimagen?"

¹¹ Waen gare wan, "Ayop, orup da ya wa koeragam nimanegen."

Amba Iesu nop uiwa anega dien, "Endi ne den koewa gega gapan ya wa koeragam gimagain. Go ganawan, ak koewa da sia ya ta."

Iesu nop mega iwa den

¹² Wam ame gapan, Iesu waenapan ame anega sia wadidiam wandin, "Ne piup ma dun ganat megawa, orup da ne evinap oniwandapinawa me ap mum sisip gapan da ya aeta go inak dune ganasewa wareta."

¹³ Go ian Parisi Iesu diane, "Ge gek oitaga waingi amba yauga wat bawaramepen menan taingi menan nop gega tavewa uon."

¹⁴ Iesu gare wan, "Ame endi nek nenan anu ta guringapenawa, ne nop oit nega tavewa di, iwa ne amba tauana arewa ge angepena arewa e oare go ne asiginap.

¹⁵ Piup om mega gapan e wanene tamuianawa go ne ap mini orup da inap ya tainawa.

¹⁶⁻¹⁷ E iup ega gwanap ok manega seane, Apan evene siwa naun nop daiton dere waine ame tavewa.

Ap menan endi ne anut nega gapan wanene tapenawa tamana venaseta, iwa ne negenat ya wanik angin. Ne mamana me watu enanegeniwa den yonivin.

¹⁸ Ne nop oit nega nek waivin, amba ne watu enanegeni Mamana God, sina nauiniwa."

¹⁹ Ian Parisi nagirewa singui anega wane, "Ge Mamaga endi ambagan?" Iesu gare anega wan, "E ya asigiap tanegeean amba den ne Mamana ya asigiap tayan, endi e asik tanegepoa e Mamana den asigip tapo."

²⁰ Iesu nop mame waiwandini God Paewa yan garaet sine mainep ap mepe opata wadidiam wandin, ap waiwandini

waenapan da ya to warapen tane, iwa wam mega iragena ya tauen.

Iesu me piup ma megawa uon

²¹ Nop ap me uap Iesu sia diamon, "Ne angepena e yona taiwaniai, go ne amba angepena e ap mepe ya tauai, amba e koewa ega den borit wai."

²² Iesu nop mame wani Diu nagire singui muk wa wa mutan, anega wane, "Mek ingane togurep boeta? Endi ap menan Iesu anega wan, 'Ne amba angepena e ap mepe ya tauai?'

²³ Go Iesu aigap di waiwandin, "E aoma isira mapa ne aigap aupa, e piup ma megawa, ne piup ma megawa uon.

²⁴ Ne gaset wadiaena, ne Keriso ya anu tumat tanegenewa, tavewa di, e koewa ega den borit wai."

²⁵ Mu singui wayawan, "Enda ge da?" Iesu gare wan, "Ne gaset gaset amba di wadiae angingin.

²⁶ Ne wanene ega tae tae arugataet di. Go Mamana watu enanegeni apanewa nop mega tavewa di, me inap gego da uon. Amba ne nop, me gamup anuinawa ne piup ma waenapan iragi wadidiamoin."

²⁷ Iesu Mamewa God menan waiwandin mu da ya di anu awane.

²⁸ Ap menan Iesu anega wan, "Ne Kimanis Vitana apanewa ao waran to endawanegene e anu awai ne Keriso di. Menan noa wainawa nek anut nega gapan ya taivin, go Mamana anen wadianegeni gapan di taivin."

²⁹ Endi watu enanegeni inanap di wandaia. Me ae wat, vetanegen negenat da ya waingiangin iwa ne pot pot dim da taina God anuini imua ame wabibigamina menan aton anuiwan."

³⁰ Me nop waiwandini waenapan aruga imu pose iravi me inap waren, amba anu tumat tane.

Koewa ayamase nagirewa

³¹ Ian Diu me inap anu tumasenewa, Iesu anega diamon, "Endi e nop nega wat kakayasenewa, e ne wadiaet nega iragenawa di."

³² Ap menan nop tave tavewa e asigip tai, amba nop tavewa ega vetaeta."

³³ Mu garewa anega diane, “Nu Eibaraam naewa! Nu orup da pusi nani wanawase da ya taton. Endi ame anenen vetanep tau anait?”

³⁴ Iesu sia anega wan, “Ne tavewa di wadiaivin, waenapan da koewa tainewa ame koewa ayamase di taiwanum.

³⁵ Dugup da gapan nao ayamat mondi kaimakaet taini otua go wam da ayamase apanewa dugup ame ae ve garip aeta, iwa me dugup ame otua uon. Go dugup ame otu iragenawa di wande aiwadata iwa me dugup megawa di.

³⁶ Menan God mek otua ne vetaepen tau aisenewa ame di vetae kakayasen.

³⁷ Ne anuivin e Eibaraam naewa, go endi e toguranegopen amase taiwanin iwa nop nega wana warayan potayap da ya wandia.

³⁸ Ne wadiaingina Mamana inap yawan anuina gapan wadiaivin go e taiana ame mamaya ame wadiaeni gapan di taiwanin.”

Ge mamaga da?

³⁹ Mu gare wane, “Eibaraam nu manua.” Iesu sia wan, “Go endi Eibaraam otu tasine wandepiwa, e wan dim dim Eibaraam taiwandini ame uap taiwanampen!

⁴⁰ Ne nop tavewa wadiaina apanewa, God no utap di anun waivin. Go endi e toguranegopen taiwanin. Eibaraam ma miniwa da ya tan.

⁴¹ Amba ne yawaena e tat ega ame Eibaraam mini da uon, ap menan e Eibaraam naewa da uon.” Diu nagirewa anega wane, “Nu nain gagape otu tasinewa uon. Nu mamanua ame God nuga megenat di.”

⁴² Iesu anega diamon, “Go endi e mamaya God di wandepiwa, e imuya potaya nenan anu guriwaniampen. Iwa ne God inap ongen mame waingian, amba ne nek ya ongen, go God watu enanegen.

⁴³ Di menan ne nop nega waingina aroga iragen ase ya anuiwanin? Iwa mamaya piupawa darinaya toboren.

⁴⁴ E mamaya piupawa ame Seitan otu tasinewa e me. Amba e mamaya inak megawa taiwaniat anuiwanin. Wataget ere mangan me togut wagut apanewa

wande en, me nop tavewa da ya wat nat wande en, ap menan me nop mega iragenawa ame ebo aopan apanewa, amba eboewa mamewa.

⁴⁵ Ne nop tavewa gapan waingina go e mamaya ewap aisiana menan ne ya anu tumat nimanegiwanin.

⁴⁶ Endi ne koewa tainawa, e da yao matakamiwanin? Go ne nop tavewa di wainawa, dimen ya anu tumat tanek wanin?

⁴⁷ Orup da God otua di wandepiwa God anen wainiwa me anuta. Go e God nop mega ya anuiana menan e God otu wai uon.”

Iesu mek menan waiwandin

⁴⁸ Ian Diu nagire gare anega diane, “Endi nu Sameria apanewa diagitoni ge airampu potagap den waintoni ame tavewa di waivin?”

⁴⁹ Iesu anega wan, “Ne airampu da potanap uon. Go ne Mamana viripewa taina ap mini e virina ya taiwanin.

⁵⁰ Ne nek yauna ya wabawaramivin go God ne virina tainiwa menan ne yauna wabawarameta. Amba me wanene taini apanewa.

⁵¹ Ne tave di waivin, orup da nop nega wat kapet wandepiwa me bop da inap ya taueta.”

⁵² Ian Diu mame menan aigap doran sia wane, “Endi nu asiginup ge airampu potagap wandiniwa! Eibaraam boen ge God nop mega waiwanumune nagirewa den borit wane, go endi ge anega waingiana orup da nop gega wat kapet taiwandapinawa me ya boeta?

⁵³ Endi ge Eibaraam amba watageta God noa waiwanumune aigamup? Eibaraam boen amba God watageta noa waiwanumune nagire borit wane. Ge anenen, endi anuingiana ge da?”

⁵⁴ Iesu gare anega wan, “Go endi ne nek oya garie den wa taingapenawa oya gari ame tavewa da uon. Ne Mamanawa menan endi God ega waiana, oya oya mega neniniwa.

⁵⁵ Ame e den God asigiap ya tayan, go ne asiginap tan. Endi ne God ya asiginap wapoa ne ware ame ne umayap ebo wapo.

Go ne me asiginap tana menan nop mega ayamase taivin.

⁵⁶ E omae baewa Eibaraam Guewa Woup Seni wadien anun ame ne nao tat nega wamewa tauapen tani atonua anun. Ap menan Eibaraam bet ine yaveni aton tan."

⁵⁷ Ian Diu sia anega wane, "Ge bodu gega apane dere aonagaet ya tauiagi, go ge Eibaraam yawaan?"

⁵⁸ Iesu anega wan, "Ne tavewa di wadiaivin, ne watageta da di waingen amba Eibaraam yanen."

⁵⁹ Iesu nop mame waniwa mu agim tambun topen tane, go Iesu waenapan yamamu ware karau ta God Paewa arige ae ve aen.

9

Iesu apan ine potap yame boraseni wat inakamen

¹ Iesu me neginaet aiwandini, apan da ine potap yame borasen yaneni yaven.

² Me wa ewamot mega singui me inap anega wane, "Wadianet nugawa apan ma koewa me tani gapan go gare ine mame tane menan yame borasen yanen?"

³ Iesu anega wan, "Apan ma koewa mega gapan uon den ine mame koewa muga gapan uon. Go me yame boraseni iwa megawa ame God amun mega me inap arogamepen menan ma venasen.

⁴ Nu wam ganase wardeni gapan God, ne watu enanegeni, nao mega menawaet di tainampen, iwa mum oniwan mum gapan daiton da nao ya tata.

⁵ Ne piup ma gapan wanik anginawa, ne piup ma ganat mugawa di."

⁶ Anega wani ewap me giton piupa ene tan motok entanen amba tambu apan yamap ao batamen.

⁷ Iesu anega dien, "Ak, yamaga kaum awan Sailoam gapan bigi wat." (Nop Sailoam gueguewa ame Watu Enen.)

Menan apan ae yamewa ap mepe bigi wareni, boge yame meret wan yangut ta amba pa mega aen.

⁸ Apan ameme evene waiwa amba mu da da namu yaviwanumune inamup mu paet wan nani mese eneni, mu singui

anega wane, "Apan ma daiton pot pot wanden mup tainiwa?"

⁹ Upi wane "Ameme di." Upinewa anega wane, "Uon, me yawat mega apan ap umap." Go apan mek ingane wan, "Ne apan ameme di."

¹⁰ Mu anu kakayasepen menan singui wane, "Da anenen amba yamaga watapen?"

¹¹ Me gare wan "Apan yaua Iesu piup upi ware motok ta yamanap batamen, me dianegen ange kaum Sailoam, gapan bigi warat wan menan angen kaum Sailoam, gapan bigi waran, boge yangut tan."

¹² Mu singui sia wayawane, "Apan mame endi amba?" Me gare wan, "Ne oare."

Ian Parisi apan anenen inakaeni aipe ketnagen

¹³ Apan namu yame borasen wardeniwa mu waran Parisi nagirewa inamup tauan.

¹⁴ Yawat mega wam ame Iesu motok ta apan yamewa watapeni ap me pura bawarewa wamewa.

¹⁵ Menan Parisi nagirewa singui me inap tane anenen amba yamewa kakae tan. Me gare wan, "Apan da yamana motok batamen. Amba bigi waran endi yangut taivin."

¹⁶ Parisi upi anega wane, "Apan mame God inap ya tauen, iwa me pura bawarewa iup mega topaisen." Go waenapan upi singui wane, "Anenen amba koewa taini apane yo aru baware ma tata?" Menan mu imumu tum gitit waren.

¹⁷ Ap menan uiwa gapan mu entanan apan yame boraseni inap singui wan, "Ge yamaga Iesu watapen. Endi me menan anenen waingi." Apan gare wan, "Me God noa wainiwa."

¹⁸ Go Diu nagirewa apan ame tamana di me ine potap yame boraseni, ya anu tumasene menan ine mame munan sepe amon.

¹⁹ Ine mame tauane amba mu singui wane, "Mame e orup egawa? Orup ega yaneni gapan namu yame borasen? Ame anenen endi yangut taiwan?"

²⁰ Ine mamewa anega wane, “Nu anuivin me nu otunua. Amba yame borasen yaneni nu asiginup.

²¹ Go endi anenen amba me yangut taiwan, go da yamewa watapeni, nu oare. Mek singui tayawan, me orup arita di, mek ingane oit mega di wata.”

²² Me ine mame manega wane iwa mu Diu nagirewa tamu anune, iwa Diu nagirewa nop namu bariman wane orup da Iesu me Keriso di anu tumasepiwa ame dugup paewa gwanap warupe garip uat enain.

²³ Ap menan ine mame ap anega wane, “Me orup arita di, mek ingane oit mega di wata.”

²⁴ Koni derewa mu apan namu yame boraseni menan wane. Mu singui anega wayawane, “God yampat tave di wa, nu asiginup apan mame koewa tainiwa.”

²⁵ Me gare wan, “Me koewa tainiwa go gare uon, ne oare. Daiton megenat ne asik tana, ne yamana borasen go endi ne yangut taivin!”

²⁶ Boge mu singui tayawan, “Me anenen tagen? Anenen ta amba yamaga watapen?”

²⁷ Me gare wan, “Ne gaset wadiaena e ya anu warayan. Iwa dimen sia anupen waiwanin? E wa ewamot mega den entan imaep Iesu anu tumat tat anuiwanin?”

²⁸ Boge mu togo uaren tan anega wane, “Ge apan ma wadiamot megawa di! Nu wadianet nugawa Mosis!

²⁹ Nu asiginup God nop Mosis inap wan go apan mame nu oare anenen da amba tauen.”

³⁰ Apan gare wan, “Endi ame anenen! Me amba taueni e oare yamana me di watapen.

³¹ È nu den asiginup God me koewa nagire nop muga ya anuiniwa. God apan tamanawa nao menan taini noa anuiniwa.

³² Waenapan da apan inewa potap yame borasen yaneniwa ame wat inakameni oisewa da ya wane anuton.

³³ Menan apan ma God inap ya tauepiwa me dim kakaewa da ya di tata.”

³⁴ Mame gapan mu gare wane, “Ge anenen e koewa inak ega gapan ap anegataet den yanianawa koewa ame guegue dimen

wadianing!” Amba mu me garip uat enane tau aen.

Yame borat guewa gapanawa

³⁵ Iesu mu namu yame boraseni apanewa garip uat enane tau aeni oisewa anun amba wam da me apan ame taneni gapan Iesu anega singui wayaven, “Ge Kimani Viseni apanewa anu tumasingi?”

³⁶ “Me da?” apan singui anega wan. “Wadianege amba ne me inap anu tumat tap.”

³⁷ Iesu anega wan, “Ge endi mame yavingianawa, ame tave di, daiton da, mame nop inagap waiwan.”

³⁸ Boge apan anega wan, “Ayop, ne anu tumat taivin,” amba me i poe Iesu inap ta wa taragasan.

³⁹ Iesu anega wan, “Ne wanene menan piup ma tauan, menan yame borat mutanewa yangut taini amba mu da yangut tainewa yame borat mutain, ame gapan ne gamunap seu enu munain.”

⁴⁰ Parisi upi ap mepe me den nop anen wani anun menan anega wan, “Dim da? Nu den yaman borasen?”

⁴¹ Iesu anega wan, “E yamaya boraseniwa, e koewa inayap da uon, go endi e yangut kakaevet tat waianawa menan koewa ega di wandia, iwa tandayat nimegean menan.” Iesu ap anega wan.

10

Man sip kwayupe taini apanewa

¹ Iesu anega wan, “Ne tavewa di wadiavin, apan da man sip sin mega tonanewa gapan ya unugepiwa, go negin ugupewa gapan sin pain dore gwanap gearepi ame up ge togut wagut taini apanewa.

² Go apan da tonana unugepiwa ame man sip kwayup taini i apanewa di.

³ Tonan kwayup taini apanewa tonan watap wanep, amba sip kwayup taini apanewa sip mega yaumu gapan gapan wap, mu noa ire anune ewap tauane amuinewa.

⁴ Ame mek man megawa iragi naumo tauue garip amopiwa, me use namumup aep, amba sip mega ewap ororom warup amooin, iwa me noa ire anune menan.

⁵ Go mu apan da ugupewa evip ya di amooin, tave di, mu tap ae ve amooin, iwa apan ugupewa ame noa mu oare.”

⁶ Iesu gutut mame guegue anupen maibe mini waiwandin, go me wadidiam wandini mu da ya di anu awane.

⁷ Ap menan Iesu sia wan, “Ne tavewa gapan di wadiaivin. Man sip tonanewa ne.

⁸ Namu yo yo ebo taine nagirewa namunap tauanewa ame up ge togut wagut nagirewa, ap menan man sip nomu ire da ya anune.

⁹ Ne tonan, orup da ne gamunap unuk aepiwa me inak wareta. Me ne gamunap unuge ge use taue aepi amba at kakaewa tautaneta.

¹⁰ Up apanewa ame up tapen ge togut wagut amba wa koeamepen megenat di oniwan, go ne tauana ame gamunap inak wariwaniampen amba inak ame di wat kakayasinampen menan.”

Iesu man sip kwayup taini i apane kakaewa

¹¹ Iesu sia anega wan, “Ne man sip kwayup taini i apane kakaewa. Sip kwayupe kakaevet taini apanewa inak mega man sip menan wakaumepen menan anun taiwan.

¹² Apan da man sip amasewa tan garewa den warini ame man sip i apanewa uon, menan okoi wasipen da onep yavepi, me sip ae vemon tap di aewan. Amba okoi wasipen ma tauen sip gut ise se ase se tata.

¹³ Apan ame tap aepiwa iwa, me mondi nao tan garewa warini apanewa menan. Kwayup yaentuk ya ta kakayasiwan.

¹⁴ Ne man sip kwayupe kakaewa. Ne man sip iragi asiginap tamon amba mu iragi asigimup tanegene.

¹⁵ Ap umap sia ne Mamana ne asigip tanegen amba ne me asiginap tan amba inak negawa man sip munan wakaumain.

¹⁶ Ne sip nega upinewa wanumam go endi sin mame gwanap uon, ap menan ne den tambumopen sin gwanap onamot anuivin, amba mu den nona ire anupi gapan dugup daiton kwayup taini i apane daiton den wanumoin.

¹⁷ Ne Mamana inanap anu guriniwa iwa megawa ame ne inak nega piup iragi

munan wakaumain amba inak nega ae ma sia wat angain.

¹⁸ Waenapan da ne inak nega ase ya waseanegain, go negenat inak nega ae bat munain. Ne inak nega ae barae barae amun megawa ge inak nega ae ma wara sia angepen amun mega ne gase waran. Ne inak nega ae barapena ame ne Mamana God anuni gapan di.”

¹⁹ Iesu nop mame waiwandini menan, Diu, nagirewa sia ae seu enun nop mame aigap doran waiwanumun.

²⁰ Upi anega wane “Me airampu tauan potap unugen menawasene bumbam tan waiwan, menan iwa dimen nop mega anupen taiwanin?”

²¹ Go upine anega wane, “Airampu apan potap unugepi nopewa wat mega map anega uon. Airampu apanewa apan yame boraseni anenen wat inakameta?”

Diu nagirewa anu tumat ya tane

²² At Ierusalem gapan God Paewa Wat Aipakamepen Baripewa tauen, ame au-nari wamewa gapan.

²³ Iesu God Paewa sin gwanap namboya warden. Iesu apan Solomon sewae gotugue arewa gapan ap yon iwandin.

²⁴ Diu nagirewa tauan Iesu ikukuk nau panan waiwanumun, “Ge guegue gega anupen menan nononga wandia go kontintu wa wainai? Endi ge God om enuni apanewa Keriso wandepiwa, aroga iragen ase ma wadian.”

²⁵ Iesu gare wan, “Ne gaset wadiaen, go e anu tumat ya tayan. Ne yo ugup ugup Mamana yaua gapan tainawa, ame ne paua nega ta ewaiwan.

²⁶ Go e ya di anu tumasiwanin, iwa e man sip negawa uon.

²⁷ Ne sip nega nona ire anuinewa, ne iravi asiginap tamon, amba mu evinap yonane inewa.

²⁸ Ne yaibobot inagewa muninawa, amba mu borit da ya di wain. Waenapan da nanin gwane gapan sia ya waseanek amooin.

²⁹ Mu gaset ne Mamana ma di nenen, me waenapan iragi aigamup. Orup da, anu tumat apanewa Mamana nani ninokap gapan sia ya warupeta.

³⁰ Ne amba Mamanawa nu dere gine daiton.”

³¹ Nop ame anune gapan Diu nagirewa agim bun topen tane.

³² Go Iesu anega diamon, “Ne Mamana God gamup, yo ugup ugup arugataet da ta ewaen, go endi yo ansenawa menan agima tonegepen taiwanin?”

³³ Diu nagirewa anega gare wan, “Nu upine menan agima ya togepen taivin, go ge nop koevet di waingi, iwa ge apan iragen di go gek waan God di waingi,” Diu nagirewa ap anega gare wane.

³⁴ Iesu gare wadiamon, “God no oise kakaewa namua ega gapan ok manega seane go uon?

E piup ma god megawa diaivin.

³⁵ E asigiap God nop mega ame entan wantan da ya tata, nop mega di wande aiwandata. Ap menan God Diu namu yo yo nagirewa inamup piup ma god megawa ap anega diamoniwa nop ame tamana di.

³⁶ Ap mini Mamana God wat nugut kiman gapan watu enanegeni piup ma tauan menan ne God mek otua waivin. Ap menan dimen God nop mega koevet wain-gat dianegiwanin?

³⁷ Ne Mamana mini ya di tapenawa e da ya di anu tumat nimanegai.

³⁸ Go endi ne Mamana God umap tainawa. Go ne nop nega ya di anu tumasenewa, ame ne yo nega yawan gapan anu tumat taiwanian. Ame gapan Mamana ne potanap wandia, amba ne Mamana potap waingina, anu awai.”

³⁹ Ap menan sia to warapen tane, go tap yamamu ware totnage aen.

⁴⁰ Boge Iesu ewagai sia kaum Jordan gamu to nuguse yamu dotoue wataget Dion waenapan dup iam wandini arewa ame aen. Ap mepe wanden.

⁴¹ Amba waenapan arugataet Iesu inap tauan. Amba gare gare anega wane, “Dion yo paua ugup ugup da ya di tan. Go dim dim da me apan Iesu menan nop waiwandini ame iravi tavewa di.”

⁴² At ame gapan waenapan arugataet Iesu anu tumasene.

¹⁻² At Betani gapan apan da yaua Lasiros vek ta wanden. Me domare wai dere ame Mata amba gwaniwa Meri. Waen Meri mame, me evi da amba kaum tutu dena ware Ayop aigap wageme amba Ayop pusiwa me igumewa gapan mut daragamen.

³ Menan Lasiros domare waiwa Iesu inap nop watu enan, “Ayop, naunu daiton da menan anu guriana ame vek tan.”

⁴ Nop ame taueni Iesu anuni, amba anega wan, “Vek mame koevet iragen, go iwa megawa God oya oya megawa menan venasen amba God mek otua oya oya megawa ao wareta.”

⁵ Iesu Mata amba gwaniwa Meri ge Lasiros munan anu guriniwa.

⁶ Dena, go wam ame Lasiros vek tan oise anuni me serarat inamu ya aen go wam dere sia wande amba aen.

⁷ Boge wa ewamot mega inamup anega wan, “Nu yonane ewagai Diudia anepen.”

⁸ Mu anega wane, “Go wadianet nungawa, wata konintu Diu nagire gwara toguragepen tane, dimen sia ewagai at ame agepen taingi?”

⁹ Iesu maibe gapan anega wan, “Wam airase aonagaet pusi nawan dere (12) ganasewa wandia. Apan da wamu yonen ap iniwa pusiwa ya enuta, iwa me piup ganat megawa gapan ini menan.

¹⁰ Mum wamewa megenat ap aepi pusiwa enuta, iwa ganat me inap uon.”

¹¹ Nop mame wani ewap, me use dotoue wadiamon, “Evenanua Lasiros gearen aup iniwan, go ne at ase me angep wa kandasepen ao yonep.”

¹² Wa ewamot mega gare anega wane, “Ayop, me mondi aup iniwandapinawa mek amba kandaeta.”

¹³ Iesu apan Lasiros boeni nopewa wai-wandini, go me wa ewamot mega anune aup mondigawa iniwandat anun.

¹⁴ Menan boge oit aroga wadiamon, “Lasiros bop tan,

¹⁵ go e kakaewa ega menan, e anu tumat ega wabawaramepen menan Lasiros inap menawaet ya angen. Menan ame gapan e anu tumat ega wabawaramepiwa ne aton anuin. Endi nu me inap anepen.”

¹⁶ Boge Tomas (yaua dawa Naturup), wa ewamot upine inamup anega diamon, “Ao yonane, Iesu den anepen me boepi nu den borit wat.”

Iesu me inak yaibobot ibariwa

¹⁷ Wam ame Iesu pa Betani konintu tauiwandini, oit wane anuni Lasiros boen dagupa baraene wardeni wam degede gaset uon tan.

¹⁸ Pa Betani ae Ierusalem taueniwa koni otu da nonongantuk (3 kilomita mini),

¹⁹ Diu nagirewa arugataet Ierusalem gapan tauane, Mata ge Meri naumu boeni tanamo bagu sisi tonengamepen, naumu wakaumane menan.

²⁰ Wam ame Mata Iesu oniwandini oisewa anuni, me negina Iesu tautanapen menan aen, go Meri pa wande en.

²¹ “Ayop,” Mata Iesu inap wan, “Ge mapa wanigepo nauna bop ya di tapo.

²² Go ne anuivin endi ma den di God inap mup anen wawa me geneta.”

²³ Menan Iesu waen inap anega wan, “Ge naugawa ao sia yon wandeta.”

²⁴ Amba Mata gare wan, “Ne anuivin me ao sia yon wandeta wam verisiwa gapan.”

²⁵ Amba Iesu me inap anega wan, “Borit wane nagirewa inak ware ao sia yon wanumopen ibariwa amba inak yaibobot ibariwa ne me di. Me da anu tumat nimanegepiwa boeta go inak sia wareta.

²⁶ Amba waenapan da da ansena ine wande anu tumat nimanek wandapinawa bop ya tata. Ge nop nega mame anu tumasingi?”

²⁷ Menan Mata anega wan, “Umap, Ayop, ne anu tumasivin ame ge God om enuni apane, Keriso, God mek otua da piupa tauat wa tauana apanewa.”

Iesu irip wan

²⁸ Amba mame wani ewap Mata ewagai ae gwaniwa Meri wa upe asira amon amba anega wan, “Wadianini apanewa mapa, amba me genan waiwan.”

²⁹ Wam ame Meri anuni menawaet ao yone Iesu inap aen.

³⁰ Endi yawat mega Iesu pa sewa ya di tauia, go me Mata tautaneni arewa gapan ap mepe wandia.

³¹ Wam ame Diu nagire Meri tanan pa wanumon bagu sisi tonengam wanumune, Meri mek menawaet ao yon wande tau aen yawane menan mu Meri ewap amon. Meri tau aeni mu anune babat gage ae irip wat anune.

³² Wam ame Iesu amba yoniwandini arewa, Meri taue Iesu yaveni, Meri Iesu pusip gearen nikapu enu amba anega wan, “Ayop ge mapa wanigepo, nauna bop ya di tapo.”

³³ Wam ame Iesu waen Meri irip waiwandin yaveni amba Diu nagire waen tanan onamone ap menan mu den irip waiwanumune, me guewa gapan bumaga tantan anu tanen.

³⁴ Amba me singui anega wan, “E amba baraeans?” Mu gare wane, “Ayop, onage yao.”

³⁵ Iesu irip wan.

³⁶ Boge Diu nagire anega wane, “Yawan Lasiros menan anu guriniwa.”

³⁷ Go upinewa anega wane, “Me apan yame boraseni yamewa watapeniwa go anenen menan Lasiros bop gapan ya watanen?”

Iesu wan apan Lasiros inakae ao yon wardeniwa

³⁸ Iesu bagu sisi bumaga tantan sia anuni one babat arewa tauen. Ame dagup tonanewa gwat parata ma toboriniwa.

³⁹ Iesu anega wan, “Gwat wabaim ase baraeans.” Amba Mata, Lasiros domarewa anega wan, “Go, Ayop, wam degede wardeni endi mame etua gase aninke wan.”

⁴⁰ Boge Iesu anega wan, “Ne namu ge wadiagena ame anu tumat tawa, ge God oya oya mega yawai.”

⁴¹ Menan mu gwat wabaimen ase baraene. Boge Iesu yangut ao ta amba anega wani, “Maman, ne nona anuana menan gaun inagap waivin.

⁴² Ne asiginap ge pot pot nona anuianawa, go manega waiangina, iwa waenapan mapa yoniwanumune kakaewa muga menan, amba ge ne watu enanegeana anu tumat tanegepen.”

⁴³ Wam ame anega wani, Iesu tumban amu ve wan, “Lasiros, tau onak!”

⁴⁴ Bop apanewa tau onen, pusi nani wanup gapan viri viri waran, gine namu pan borane ame tau onen. Iesu anega mu inamup wani, "Bop wanupewa butunagen ae veane me tau aep."

Iesu togurep boet wan nopewa karaua panane

⁴⁵ Ap menan, Diu arugataet Meri inewa daio tauane, Iesu dim da tani yawan me inap anu tumat tane.

⁴⁶ Go Iesu dim da tani oisewa upi amon Parisi nagire wadiamone.

⁴⁷ Boge pirisi bawarewa nagirewa ge Parisi nagirewa kansoro muga iam iam menan wane. Iam iam gapan mu anega wane, "Endi nu dim da tait? Apan mame yo paua arugataet taiwan."

⁴⁸ Nu manega ae veat ta aepiwa mu iragi me anu tumat tain, amba boge Rom nagirewa taue nu kansoro nuga epara muga waseamoin amba at piup nugawa waseanaine."

⁴⁹ Boge mu yaumakamup apan daiton, yaua Kayapas en ame gapan me pirisi bawarewa ta wande eni nop ao ainagase anega wan, "E dim da asik ya di tayan."

⁵⁰ E da ya di anu avisi ame kakaewa nunan apan daiton da boep iwa ame gapan piup nuga waseanepi tawa."

⁵¹ Me megenat menan mame ya wan, go en ame gapan me pirisi bawarewa ta wande en menan me eviwa noa wan, ame Iesu boepi ian Diu nagire munan,

⁵² amba Diu nagirewa mugenat munan uon go God otu waiwa punanan wat amone munan den, ame gapan naumo tobob mumep daiton tapen.

⁵³ Menan wam ame use aeniwa mu Iesu inak mega waseasepen menan negin yop tane.

⁵⁴ Ap menan Iesu Diu nagire Ierusalem gapan inamup tage aroga da ya tan. Go garewa me ewagai totnage at piup gwat mugenata arige konintu, pa da yaua Eparam aer. Ap mepe me wa ewamot mega den wande en.

⁵⁵ Wam ame konintu taiwandin Diu nagire Paina Yamaseni Baripewa, waen apan aruga at muga muga ae vean pa Ierusalem anu tumat iupewa ayamase tapen menan pusi nani bigi ware amon

bongam bongam namu tap amba Paina Yamaseni Baripewa evi amba tugupen wa amon.

⁵⁶ Mu Iesu menan yangut pot pot di taiwanumun, amba mu God Paewa sin gwanap namboya yongan singui gare gare wane, "Ge anen anuingi? Iesu barip menan ya di taueta?"

⁵⁷ Go pirisi ayop mugawa amba Parisi nagirewa nop pusi pan pan tamone ame orup ansena da Iesu amba wandep yavepi me one oit wap amba mu amo Iesu ware panapan.

12

Meri Iesu viripewa tan

¹ Paina Yamaseni Baripewa manamui wandin wam nani yamunaet yamu daiton namumup wandeni, Iesu at Betani tauen, ame apan Lasiros wandini arewa, me namu boen Iesu wat inakameni apanewa.

² Map mepe Iesu taueni menan Lasiros wat inakameni baripewa tugune. Mata taba yan siwandini, taba nana watarewa ap gapan waenapan wanumune. Lasiros ap mepe den tanam wande en.

³ Boge Meri oma da osewa pokarik gapan enane, ame ware tauen, me tutua aigap iragen amba garewa mega baita da uon. Me ware Iesu pusip wa damage amba i gume tau vitane ame gapan sia mut darakamen. Amba oma ose ame tutua pa ame gwanewa iragi bararaen.

⁴ Go Iesu wadiamot mega da, apan Diudes Iskeriot, gatawan Iesu omine wapiwa, ap mepe den wandeni, me anega wan,

⁵ "Oma ose tutu dena mame une ta moni wara waenapan purapuse uon kayakayawan taine nagirewa muna muna anenen menan? Moni ame bodu daitona garewa mega warine ame omewa."

⁶ Me nop mame waniwa iwa me pura puse uoni nagire munan ya anuiwan go iwa me up apanewa, wadiamot nagire moni muga igewa amase tainiwa, moni me inap sine gapan up tan inak taniniwa.

⁷ Iesu gare anega wan, "Waen ma ae veane anut mega di taiwandan. Inak tamanawa di, me oma ose tutu dena mame tasi di seneniwan, ame gapan

ne iman bonigasepen tunegepi wamewa menan.

⁸ E iman kayakayawan taine nagire den nimakamup tanam waniai, go ne pot pot ya waranegiwaniai."

⁹ Wam koni ap gapan, Ian Diu waene apane arugataet Iesu Betani gapan wandeni yawan inewa onamon. Iwa Iesu menan megenat ya onamone go me Lasiros boen wat inakamen yon wandeni den yawapen menan onamon.

¹⁰ Ap menan pirisi bawarewa yonanewa nagirewa Lasiros den topen menan noa barimene.

¹¹ Lasiros inakaen yawane menan Diu nagirewa arugataet Iesu aigaven amon anu tumat muga iravi Iesu inap bariwanumun.

Iesu man donki gagap Jerusalem tauen wat atonasene

¹² Inane woup seniwa waenapan aru ame barip ame menan tauanewa Iesu Jerusalem oniwandin oisewa anune.

¹³ Boge mu yonan oma naniwa bae nini den ketnagen tambun, amon negina tautanan ve senao waiwanumun,

Iesu ge paina iragen! God wat aipakamini
Ayopewa Isurero,

God yaua gapan tauiagi!
ve senao ap anega wane.

¹⁴ Iesu man donki otua, namu yop ta wareni gapan, gagap wande aen, no oise kakaewa namua gapan ok seane anega wan,

¹⁵ Tap ya anune, ae waenapan nega
Ierusalem nagirewa,
yawan, Ayop ega, man donki otua gagap
wanden oniwan.

¹⁶ Mame venaseniwa Iesu wadiamot mega da ya di anu awane. Go evi amba Iesu kiman dot ae oya oya wareni gapan mame venaseni gueguewa ok namua wataget sean wane omewa gapan venaseni ame mu anu awan.

¹⁷ Iesu, apan Lasiros wat inakameni, ap wamewa gapan waenapan aru ame Iesu Lasiros wat inakameni ase yawane, mu Lasiros oisewa ise wa asewa amon.

¹⁸ Menan waenapan arugataet Iesu tautanapen amone, iwa me yo paua mame tan oisewa anune menan Ierusalem negine amuiwanumune.

¹⁹ Ap menan pirisi nagirewa gare gare ase ma wawa mutan anega wane, "Yawan, nu taintoniwa tavewa da uon. Endi uon, endi ase yawat mega waenapan ma gaset iragi Iesu ewap amone."

²⁰ Endi Ian Gurik nagirewa upi nimakamup ap mepe Ierusalem gapan wanumuine den barip ame gagewa wa taragasepen dot amon.

²¹ Amone apan Pilip, inewa tauan, (Pilip pa Betsaida, at Galili apanewa) mup muga inap anega wane, "Ae apan nugawa, nu Iesu yawat anuivin."

²² Pilip mup ame tauen anuni boge ae Anduru wadien amba Pilip ge Anduru sia entanen Iesu wadiane.

Iesu boepi oisewa namu wan.

²³ Iesu gare wan, "Mamana God Kimani Vitana apanewa oya oya nega ao wara wara wamewa gaset tauen.

²⁴ Endi ne nop tavewa di wadiaivin, tamudu makewa daiton megenat, go me pia geare boepiwa, me naewa wabawaramep aruga tata.

²⁵ Apan da inak mega menan imu pose warep anu gure taiwandapinawa me inak wakaumeta, go apan da inak mega piup ma gapana tandayasiwandapinawa me inak mega yaibobot inagewa wat nat wandaeta.

²⁶ Orup da nenan ayamat tat anupi, me yon wande evinap onep, ne amba waingina arewa, nao nega ayamase tainiwa me ap mepe den wandeta. Orup ame nenan ayamat tainiwa Mamana menan anu gure viriwa tata."

²⁷ Iesu sia anega wan, "Endi menan ne bumagana vege waia, ap menan ne anen wain? 'Maman wam koni mame gapan iana warupai,' anega wain? Uon, ne endi wam koni mame miniwa menan tauan." Iesu anega wan.

²⁸ "Maman yauga oya oyae den ao wat!" Boge nop da kimani anega tauen, "Ne yauna oya oyae den gaset ao waran, amba yauna oya oyae den sia ao warain."

²⁹ Waenapan ame iam wanumone nop kimaniwa ame anun anega wane, "Ma ait da kimani waia," amba upine anega wane, "Anea nop Iesu diwan."

³⁰ Menan Iesu anega wan, “Nop endi kimani taueni mame e inak ega menan, ne nenan uon.

³¹ Wam ma endi ganawan piup koewa muga wanene tapen wamewa, endiwa piup ma namu yoyo taini ayopewa, Seitan, to oirenep tauue garip aeta.

³² Go ne, piup ma gapan ne paina to endawanegepiwa waenapan iravi wa upamopen nek nenan onamoin.”

³³ Iesu nop mame waniwa me bop mega gapan anenen ta ewamo boepi noa waiwandin.

³⁴ Waenapan ame iam wanumone ao waiwanumun, “Nu God nop mega namua gapan anutoni ame Keriso tunano di wande aiwandata. Endi ge ame anenen waingi? Kimani Viseni apanewa paina to endavep boeta? Kimani Viseni apanewa ame da?”

³⁵ Boge Iesu anega wadiamon, “E dun ganat mame inayap nononga ya wandeta, dun mame wandini gapan wat aisiwanian iwa sisip tauue anap antapen imaepi tawa. Apan da sisipu ainiwa me aini neginewa me oare.

³⁶ Menan anu tumat ega dun ame gapan ap mepe wandep, ame menan e dun ganat ame otu waiwa entan imaep.” Iesu nop ame waiwandini uon taniwa, me boge waenapan inamup karau ta at ame ae ve aen.

Diu nagirewa anu tumat ya di taiwanumun

³⁷ Iesu yo ge paua ugup ugup mame yamamup di taiwandin. Go Diu nagirewa aruga Iesu inap da ya di anu tumasene.

³⁸ Mame taiwanumunewa apan Aisaia God nop mega wataget waiwandini ame tavewa tauapen menan venasiwandin. Ame Aisaia manega sen,
Ayop negawa. Oit nuga mu ya anu tumasen.

Aro amun gega ewamoan yawan, go usenagaet ya anu tumat gimak wanum.

³⁹ Iesu nop mega mu anu tumat ya di tane tavewa mega ame apan Aisaia nop mame wataget den se wan,

⁴⁰ God yamamu toboboren ge imu pose to musen,
ap tani yamamu gapan da God yavep, ge imu pose gapan da anu avepi,

amba entan God menan onamop,
amba wat inakam mumepi menan tawa iragi toboboren.

⁴¹ Aisaia mame wani, iwa me watagetawa Guewa Woup Seniwa gapan Iesu oya oya mega yaveni menan Aisaia no oise mame ap anega sen.

⁴² Go waenapan arugataet ge Diu davewa yonanewa upi den Iesu anu tumasene. Go mu anu tumat muga aroga ase ya wan, iwa ian Parisi nagirewa wanumone tamu tan, ap wapiwa dugup paewa gapan up oimop tau amopi tawa.

⁴³ Mu ap anega tanewa iwa mu waenapan wa atonat muga menan imumu waren, go God wa atonat mega men imumu ya ware kakayasen.

⁴⁴ Menan Iesu no ainagase nop uma anega wan, “Apan da ne anu tumat nimanegepiwa, ame ne negenat ya anu tumat nimanegiwian, go ne watu enanegeni inap den anu tumasiwan.

⁴⁵ Me yangut ta ne yawanegepiwa, ne watu enanegeniwa den yaveta.

⁴⁶ Ne piup ma tauana ganat di tauan, menan waenapan da anu tumat nimanegepiwa, mu sisip gapan ya wanumoin.

⁴⁷ Ame orup da nop nega anuiwan go me ya anun tainiwa, ne wanene me inap ya tain. Ne tauana piup ma wanene tapen ya tauan, go wat inakam mumapen menan tauan.

⁴⁸ Go wanene apanewa den wandia menan orup da tandaeyat nimanegi nop nega ya wariwandapinawa, ame wanene mega den wandia, wam uiwa gapan, iwa ne nop nega tandayasene menan. Ne nop God Mamana wadiapenawa ame waenapan wanene tamota.

⁴⁹ Iwa den, nop ma nek ianap ya waivin, go ne Mamana me watu enanegeni ame wadiae diae ge anenen wawa ame wani gapan di waivin.

⁵⁰ Ne anuivin God nop megawa ame up naunen yaibobot neginewa gapan aewan, ap menan ne anen waingina ame Mamana wadianegeni uap di waivin.” Iesu ap anega wan.

13

Iesu wa ewamot mega pusimu bigi waren

¹⁻³ Den Paina Yamaseni Baripewa kontiu taiwandini, wam ame gapan mum gine tabaewa naiwanumune. Amba Iesu asigip tani wam gaset tauen me piup ma ae ve amba Mamewa ine aepen. Seitan Diudes Iskeriot apan Saimon otua, inap taue Iesu omine wapen menan dien. Go God Mamewa ik amun megawa iragi Iesu sin waneni, Iesu gaset asik ta kakayasen, amba Iesu God inap taueni sia ewagai God ine aepen di anun taiwan. Iesu waenapan megawa piupa wanumunewa munan anu guriniwa menan endi me anu gurat mega tave iragenawa wadiamot mega to ewamopen tan.

⁴ Ap menan Iesu ao yon wande, wanup mega garipe warup ase barae atup wanupewa kankamup panen.

⁵ Ame ewap, kaum kabum gapan wageme ap mepe erewa wa ewamot mega pusimu bigi waramoni, atup wanupewa kankamup paneni gapan mut daragam mumen.

⁶ Me ta oniwandin Saimon Pita ine tauen, Pita me inap anega wani, "Ayop, ge pusina bigi di warai?"

⁷ Iesu gare anega wan, "Dim da taingina endi ma ge ya anu awai, go evi utapa amba ge asik tai."

⁸ Pita sia anega wan, "Uon, ge pusina da bigi ya warai." Iesu gare anega wan, "Ne bigi ya warapenawa, ge ne upinana uon."

⁹ Saimon Pita gare anega wan, "Ayop, pusina megenat uon go naninawa amba ianawa den bigi wat!"

¹⁰ Iesu gare anega wan, "Apan daiton da dup ieniwa ame pusiwa megenat bigi wareta iwa me pusip ap aeni menan pusiwa bigip tan go me ugu wapi iragi kakae di. Endi e iravi kakae di, go orup daiton kakae uon."

¹¹ Me ame wani iwa orup da me omine wapi me asigip tan menan anega wani, "E iragi kakae go orup daiton da kakae uon."

¹² Wam ame pusimu bigi waritameni, me wanup entan mega pane amba at mega gapan sia ae wanden. Amba Iesu

singui anega tayawamon, "E inayap dim da tanawa e anu awayan go uon?"

¹³ E Wadiaet ge Ayop dianek wanin ame tavewa di dianek wanin.

¹⁴ Menan endi mame ne ayop wadiaet egawa pusia bigi warian, e ap mini pusia gare gare bigi wariwanian.

¹⁵ Ne dim da tanawa ame guegue ta ewaen, e ap umap ta aisen.

¹⁶ Ne tave di wadiaivin, nao taini apanewa ayop mega ya garawaseta, ap mini sep apanewa da watu eneni ya garawaseta.

¹⁷ Endi mame iragi asik tayana, ame taiwaniampinawa God e wat atonat imaeta."

Iesu omine da wapi namu anu wan

¹⁸ Iesu anega wan, "Ne da da om enuena, ne asiginap. Ne nop mame iragi inayap ya waivin, go orup daiton megenat. Ap menan ok watagetawa seane tavewa tauapen menan waivin,

Orup da mapa taba nega den naini, me gariwa gamunap entani wan.

¹⁹ Ya venaseni go ominana wani oisewa endi namu mame wadiaivin, menan wam ame venasepiwa e anu tumat tai ame God watu enanegeni ame ne me di.

²⁰ Nop nega mondi uon anun di waivin. Waenapan da da dugup nega watu enamopena waupamopi ne den waupanek wanum. Amba waupanegepi Mamana watu enanegeni den waupiwanum."

²¹ Nop mame wani ewap Iesu bagu sisi guewa gapan anuni amba nop anega wan, "Ne tavewa di wadiaivin, e daiton da ominana wapen taiwanin."

²² Me wa ewamot mega gare gare ase ma yayao mutan, anune imumu puk wan, ma da menan waiwan.

²³ Yaumakamup wadiamot mega da, Iesu me menan anu guriniwa, Iesu mainep wanden.

²⁴ Saimon Pita apan ame die anega wan, "Wayao ma da menan me waiwan?"

²⁵ Apan ame Iesu gamup ase dave me singui anega tayaven, "Ayop, orup ansena da?"

²⁶ Iesu gare wan, "Apan daiton da ameme wam mame ne buredi warap sip kundaun gapan kaum pisit antap enap

wanapenawa ameme di.” Boge me buredi ware Diudes Iskeriot wanen.

²⁷ Diudes taba wareni Seitan mek menawaet potap unugen, menan Iesu Diudes die anega wan, “Dim da tat anu taana menawaet di ta.”

²⁸ Go mu da daiton ya di anu awane dimen Iesu manega me inap wan.

²⁹ Koni ame Diudes wadiamot moni mugawa kwayupe me taiwandin menan, upi anune Iesu barip menan taba une tapen men inap nop waiwandat anun, go upi anune gare kayakayawan nagire munat anun.

³⁰ Diudes buredi ame ware menawaet tau aen. Ame muma.

God iup mega ewakewa

³¹ Diudes aeni amba Iesu anega wan, “Endi Kimani Vitana apanewa Mamana God oya oya mega wabawaramen.

³² Mamana God ne gamunap oya oya aigap wariniwa menan ne oya oya nega aigap wabawarameta amba ne oya oya nega menawaet di wat arogameta.

³³ Orup tasin negawa, ne nononga ya di tanae wanigain. E yona tai amba konida, Diu wadiamona mini, endi sia ne wadiaivin, amba angepena ap mepe e ya onayai.

³⁴ Iup ewakewa ne enivin, imuya warep baigan tan gare gare anu guriwanian. Ne enan anu gurana mini, e den anu gurat ega gare gare taiwanian.

³⁵ E ek gare gare anu guriniampinawa, ame gapan waenapan iravi asik tayain ame e ne wa ewamot negawa.”

Iesu Pita waboborepi menan namu wan

³⁶ Saimon Pita Iesu inap singui anega wan, “Ayop, ge amba agingi?” Iesu gare wan, “Ne amba angingina endi ge ya ongai, go evi amba onagai.”

³⁷ Pita singui sia anega wan, “Ayop, dimen endi ne ewagap ya ongain? Inak nega genan wakaumet anuivin.”

³⁸ Boge Iesu gare anega wan, “Tamana di ge inak gega nenan di wakaumai? Ne tave di waivin, ge wam koni yampo waboboranegewa amba kumkum nop wata.”

14

Iesu wadiamot mega wabibigam mu-men

¹ Iesu anega wan, “E imuya potaya nene yangwan ya doriwandan, God inap anu tumasen, amba ne den anu tumat nimanegegen.

² Ne Mamana pa mega gwanewa arok arugataet da di wanumam, endi ap me da uon wandepoa, ne da ya wadiaepo. Endi ne at ega da amu watupen menan ap mepe angewan.

³ Amba ne ange at ega da amu watupenawa, ne sia entan ongep tambue ange ne wanigina arewa gapan ap mepe den di waninait.

⁴ Negin ae ne wanigepena arewa taueni ame e asigip tayan.”

Iesu me negin, ae Mamewa ine taueniwa

⁵ Apan Tomas Iesu anega dien, “Ayop, ge agewa arewa nu oare, ap menan negin ame nu anenen asiginup tait?”

⁶ Iesu gare anega wan, “Ne negin di, ne nop tavewa di, ne inak iragenawa di. Orup da God inap tauapen menan, negin daiton megenat ne gamunap di.

⁷ Endi e anu kakayat nimanegenewa, ne Mamana den anu kakayatai. Endi koni mame use aeniwa, e Mamana asigia iwa ne gamunap yawayan.”

⁸ Apan Pilip anega wan, “Ayop, Mamaga God to ewan.”

⁹ Iesu gare wan, “Pilip, wam arita mame nimakayap den di ininginawa, ge asik ya di tanegiagi? Orup da da ne yawaneginewa ame Mamana God den di yaviwanumun. Endi ge ame anenen God Mamewa sia to ewaget waingi?

¹⁰ Endi, ame ne Mamana potap wanik anginawa amba Mamana ne potanap wandiniwa endi ge anu tumat ya taingi? Ne nop ma ase wadiaina ame nek negawa uon go ame Mamana potanap nao wariniwa gapan waivin.

¹¹ Ne ma wapenawa e di anu tumat nimanegen, ame ne Mamana potap wanik angin amba Mamana ne potanap wandia, o gare yo paua ugup ugup taingina ame gapan ase yao anu tumasen.

¹² Ne tavewa di wadiaivin, orup da da anu tumat nimanegepiwa, ne dim dim

da tainginawa me ame umap taiwadata. Gosi me tapen tapiwa ame aigapewa da taiwadata, iwa ne Mamana ine angewan.

¹³ Amba dim dim da men yauna gapan mup waiwanianampinawa ne ta eningain, ap gapan ne Mamana oya oya mega aigap wabawaramain.

¹⁴ Menan dim dim da men anune, yauna gapan mup wane, ne di tain.” Iesu ap anega wan.

Iesu wa agi Guewa Posewa Woup Seni manan tan

¹⁵ Iesu sia anega wan, “E imuya potaya nenan di anu guriwanianampinawa, e nop nega waran taiwaniai.

¹⁶ Amba ne Mamana inap mup wapen wat ago ega da sia enep tanae wande aiwandata,

¹⁷ ame Guewa Woup Seniwa nop tavewa wainiwa. Guewa ame piup waenapan ma ya warain, iwa mu da ya yao asik tane, go e asigiap di iwa Guewa gamunap yawayan, ame e den tanaen wandiniwa amba potayap wande aiwandata.

¹⁸ Ne inanam mini ae ya wat veta veain, ne e inayap sia di ongingain.

¹⁹ konintu amba piup ma da sia ya yawanegain, go e di yawanegiwaniai, iwa ne inak gapan wanik angina menan e den inak gapan di waniai.

²⁰ Wam ame gapan e manega anui ne Mamana potap wanik angingain e ne potanap den waniwaniai amba ne e potayap wanik angingain.

²¹ Orup da da nop nega anune warinewa, ame nenan anu gurine waene apane ap me. Ame nenan anu gurinewa garewa Mamana munan anu gureta, ne ap umap sia munan anu gurain amba ne inamup ase to ewamoin.” Iesu ap anega wan.

²² Menan Diudes, (apan mame Diudes Iskeriot uon go da ugup), me anega wan, “Go Ayop dimen ge nugenat to ewanet waangi, iwa dimen waenapan den ya to ewamoi?”

²³ Iesu gare entane sia wan, “Orup da nenan anu guriniwa, ame opata nega wariwadata. Mamana me menan anu gureta amba nu me inap tauat den tana waninait.

²⁴ Go orup da nenan ya anu guriniwa, ame nop nega ya anu taiwadata. Amba opata ma anuiana ame nek negawa uon, ame Mamana watu enanegeni nopewa.

²⁵ Nop arita ugup ugup wadiae ongingina amba endi mame den tanaen waingena gapan wadiaen.

²⁶ Go wat ago egawa ame Guewa Woup Seniwa, ame Mamana yauna gapan watu eneta, me dim dim iravi wa ewaeta, amba ne anen wadiaenawa imuya den wa aveta.

²⁷ Nonup nega inayap ae viangin, nonup nega eniangin. Piup ma nonup mega eniniwa tavewa uon, ame mini ne ya eniangin, menan potaya nene yangwan ya dorep, tap den ya anuiwanian.

²⁸ Ne wadiaena e gase anuyan, ame ‘Ne angepena amba e inayap ewagai sia tauain.’ E nenan di anu guranewa ne Mamana menan angepena e daramuya wata, iwa Mamana ne aiganap amba ne me gauarap.

²⁹ Ne mame endi wadiaingina evi amba venaseta, ap me venasepiwa e yawan anu tumat tai.

³⁰ Endi e den nop nononga ya wa nonongamain. Iwa piup ma ayopewa, Seitan, oniwan. Go ne me aroewa da ya wat nat nimanegeta,

³¹ Go ta koeragam nimanegeta. Ame gapan waenapan iragi yao asik tap ame ne Mamana menan anu guran amba Mamana nop waini no usewa gapan gapan di taivin. Endi onaene at mame ae di ve anepen.” Iesu ap anega wan.

15

Oma wain maibewa

¹ Iesu wa ewamot mega anega diamon, “Ne oma wain kaimewa mini di, amba ne Mamana nao i apanewa.

² Naniwa ansena da makewa ya iamopiwa Mamana ketnagen ae siniwa. Naniwa ansena make iwandapinawa ayane warep makewa arugataet den sia iamopen menan.

³ Endi menan inayap nop wainginawa ame gapan e gaset kakae tayan.

⁴ E ne den wanien, amba ne e den waningain. Ap mini naniwa da mek megenat wandepiwa makewa ya ieta, go

oma naniwa ame, oma wain kaimewa ni enoa gapan enasepi makewa ieta. Ap mini sia di e ne inanap ya wanienewa, e makewa ya iai.

⁵ Ne wain kaimewa mini di. E damik naniwa. Ne den uon e dim da da ya tai. Ap menan apan ansena ne den ya wandepiwa amba ne me den ya wanigepenawa, me makewa da ya ieta.

⁶ Apan ansena ne den ya wandiniwa, me yawat mega naniwa wae inen geariniwa mini, naniwa ap me ae ma tambune oma yame gapan uasine yagimuiniwa.

⁷ Ne e den wanigepenawa, amba nop nega inayap wandepiwa, dim da men anu mup wanewa ameme Mamanua God eneta.

⁸ Ne Mamana oyaoewa wabawaramepen menan e makewa arugataet ian, ame gapan e ne wa ewamot negawa ek ingane to ewat taiwanian.

⁹ Mamana nenan anu gurini mini, ne enan anu guran. Endi anu gurat nega potap wanien.

¹⁰ Ne Mamana nop mega ayamase tan menan ne me anu gurat mega potap wainginawa. Ap mini e nega ayamase taiwanianpinawa, anu gurat nega potap wanien,

¹¹ Ne mame wadiaena iwa aton nega e potayap no dotouep, amba aton egawa mame bararaep umayap tata.

¹² Ne nega ayamase tat mega mam, Ne enan anu gurana mini, e baigan tan gare gare anu guriwanian.

¹³ Orup da me evene wai munan inak mega bop gapan wakaumepiwa, baigan anu gurat ap mini, ame aigap iragenawa.

¹⁴ Iup nega wapena taiwanianpinawa, e ne evenan wainawa.

¹⁵ Endi ma e ne nao nagire ya diaivin, iwa nao apane ayop mega nao anenen taini yaunewa me oare. Garewa, ne evenan waina diaivin, dim dim iragi Mamana inap asik tanawa gapan ne wadiena e gaset asik tayan.

¹⁶ E ya om enu nimanegean, go ne e om enuen. E om enuena iwa e aisen makewa iwaniampen, amba makewa ega ame nononga wande aiwandata. Amba dim da ne yauna gapan mup wanewa Mamana eneta.

¹⁷ Mame ne nop negawa di gare gare anu guriwaniampen.

Wa ewamot piup ma tandayat mumen

¹⁸ Piup tandayat imaeipiwa, iaya barao anun, iwa mega ame namu ne tandayat nimanegen.

¹⁹ E piup megawa di wanienewa, piup enan anu gureta iwa e piup megawa. Go ne om enuen menan e piup megawa uon, iwa ap menan piup tandayat imaiwan.

²⁰ Nop inayap waingina sia anun, Nao apanewa aritawa mega da ya garawaseta. Menan mu nop negawa ayamase tapiwa, ap menan egawa ayamase den tain, go mu ta kokoeragam nimanegeli, mu den ta kokoeragam imayain.

²¹ Mu negin manegawa gapan inayap tain iwa e ne yauna gapan taianawa amba mu God watu enanegeni mu oare.

²² Go endi ne tauana amba wadiamona go mu nop nega tandayasene, menan mu koewa muga wandia amba ebo aopane wawa da uon.

²³ Me da tandayat nimaneginiwa Mamana den tandayasiwan.

²⁴ Amba sia, ne yo dim da da tana mu nimakamup apan da ap mini ya tainiwa, go mu ne yo nega ya anu tumasiwanum, menan mu koewa muga wandia. Iwa endi yo aruga ma yawane go Mamana dere tandayat nimanwanum.

²⁵ Go mame venaseni God oit nop mega namua gapan ok anenen seane tavewa venasepen,

Mu tandayat nimanegene, go tavewa da uon.

²⁶ Ne Mamana inapewa Guewa Woup Seniwa watu enapena ame inayap taueta. Ame Guewa tavewa iragenawa da Mamana inap tauen ainiwa, me ne inak nega tavewa ta ewamota.

²⁷ Amba e den ne inak nega tavewa ta ewamuiwanian iwa e erewa gapan tanagean ma onaninton.” Iesu ap anega wan.

16

¹ Amba Iesu sia wan, “Endi nop arita mame wadiaingina anu tumat ega ya wakaumepen menan.

² Tave di wam da oniwan, mu dugup paewa gwanap up oiep tau aitai, amba orup da gurae boniga seae amba me manega anuta, ‘Ne yan aiman garaet God wanivin.’

³ Mu inak koe koe mame inayap taiwanumain iwa Mamanawa go gare ne mu asigimup ya tane.

⁴ Ne mame wadiaena menan wam da taupei ame ne tagigiraya wana e ase anu awai.” Iesu ap anega wan.

Guewa Woup Seni nao megawa

Iesu sia anega wan, “Nop mame erewa gapan ya wadiaena iwa ne inayap den waingena menan.

⁵ Go endi ne me watu enanegeniwa ine angewan, go daiton da singui anega da ya wayawanegean, ‘Ge amba agewan?’

⁶ Nop aruga mame waingina menan e bagu sisi den anuiwanin.

⁷ Go ne tavewa di wadiaivin. Ame e kakaewa ega menan ne angewan. Ame ne da ya angepenawa, ne e wat ago ega Guewa Woup Seniwa da enan ya watu enapen oneta. Go ne angain amba me watu enain.

⁸ Amba wat ago egawa ame tauepiwa, me waenapan mu koewa muga wat matagamep mu anuin, amba God negin mega tamānawa wat matagamep mu anuin, amba den God wanene mega wat matagamep mu anuin.

⁹ Koewa muga wat matagamepi iwa iragena ame waenapan ya anu tumat ni-manegiwanum.

¹⁰ God negin mega tamanawa wat matakamepi iwa mega ne God negin mega tamanawa taitamen menan ne Mamana God ine angewan.

¹¹ Amba God wanene mega wat matagamepi iwa piup ayopewa, Seitan, God wanene mega gapan tauen wandia, ap mini God piup nagirewa wanene tamota.

¹² Ne nop arugataet da wadiae diae di, go e da ya waran tanau aisene umap.

¹³ Wat ago ega, Guewa Woup Seniwa, nop tavewa megenat di wainiwa, me amat taep tavewa gapanaet ta aisiwaniai, iwa mek anuini nopolwa ya wadidiewandata go me nop kimani wadiane noa gapanaet

di waiwadata, amba utapa venasepi nopolwa den wadidiewandata.

¹⁴ Guewa Woup Seniwa ap me di nop negawa da ware inayap tau e wadiap amba e asigip tai. Ap gapan oya oya nega wabawarameta.

¹⁵ Dim dim iragi Mamana megawa iragi ame negawa di. Endi ap menan ne anega wana dim dim iragi negawa ame Guewa Woup Seniwa ware to ewaep iravi asigip tai.”

Iesu wadiamot mega bagu sisi muga wat entanen aton tauen

¹⁶ Amba Iesu sia anega wan, “Wam koni otu da e da sia ya yawanegai, amba ame ewap wam koniwa da e sia yawanegai.”

¹⁷ Ap anega wani gapan Iesu watu entamot mega upi gare gare ase ma wawa mutan anega wane, “Iwa dimen nop map anega wani, koni otu da nu sia ya yawait, amba koni otu da nu me sia yawait, amba me Mamewa inewa aeta?”

¹⁸ Mu nop ame anupen men di waiwanumun, “Me nop wam koni otu da wani tavewa dim da? Nu nop ma wani nu ya di anu avianit.”

¹⁹ Iesu yawamoni nop mame menan singui wayawapen taiwanumune menan me anega diamon, “Endi ne manega wana, wam koni otu da e da sia ya yawanegai, amba ame ewap koniwa da e sia yawanegai, ap menan gagap dorayan din wanauiwanin?

²⁰ Endi ne nop tavewa di wadiaivin, e iman irip turup wan bagu sisi warai, go piup ma da da aton taiwanumain, e bagu sisi warai go bagu sisi ega aton entaneta.

²¹ Ap mini waen da orup baraeni vegewa anun, iwa orup bare bare wamewa taueni menan. Go me orup mega yaneni me vek wat ire taiwandini imu borasen, iwa orup mega yaneni atonu tani menan.

²² Menan e den, endiwa bagu sisi den wara wara wamewa, go ne sia yawaepena e aton tai, amba waenapan da aton ega ya waseae amooin.

²³ Wam ap me gapan e wan dim dim da menan ne inanap mup sia ya wayawanegai. Endi ne tavewa di wadiaivin, e dim dim da men anunewa yauna gapan mup wanewa Mamana eneta.

²⁴ Oniwandine endi ma taueni, e dim dim da mupewa yauna gapan da ya wayan. Mup wanewa e warai amba aton ega di wande aiwadata.

²⁵ Ne nop maize gapan wadiaingin. Ame wadidiaingina iwa tavewa ukum umingin endi wam oniwandin nop gutut map anegawa da sia ya wain. Go Mamana oisewa aroga ase wadiain.

²⁶ Wam ame yauna gapan mup waiwanian go enan ne dim da da Mamana inap mup ya wayawain.

²⁷ Uon, iwa Mamana e enan mek imua waren menan me mup ega garewa eneta. Mamana enan imua waren iwa e nenan imuya wareni menan, amba anu tumat tayana ne me inap di ongen.

²⁸ Tave di, ne Mamana inap ongen piup ma posewa unugen, endi ne piup ae viangin Mamana inewa sia angewan.” Iesu ap anega wan.

²⁹ Boge Iesu wadiamot mega anega wane, “Endi ganawan nop aroga iragen waiagi nop ukum da sia ya umiagi.

³⁰ Endi nu anuivin ge wan dim dim iravi anuitamean menan ge anuingiana orup da singui tangui ya wayawaget anuingi, iwa ge namu me singui mega anuan amba me evi wata. Mame taana menan nu anu tumat taianit ge God inap di ongean.”

³¹ Iesu gare ap anega wan, “Tamana di, anu tumat taiasi?

³² Go wam oniwan, amba gaset tauen, amba e punanan waran daiton daiton pa ega ega aitai. Amba e negenat wat veta aroga venegai go ne negenat ya wanigain, ame Mamana inanap den wandia.

³³ Ne wan dim dim mame wadiaingina, ame gapan ne gamunap e nonup warai. Piup ma gapan itan bobon aritavet eniwan. Go imuya potaya gan tumban amu yonane bigarep, iwa ne piup ma aroewa gaset ae wabigamen.”

17

Iesu mek ingane menan mup wan

¹ Iesu mame wani ewap, me kimani yangut ao ta amba mup wan, “Maman, wam gaset tauen. Otugawa oya oya nega ao wat, gare ne ge oya oya gega ao warain amba waenapan to ewamoin.

² Iwa ge aro epara waenapan kwayup tamopen menan nenaana ap menan mu iragi da da ge nenaanawa ame ne inak munain.

³ Endi inak yaibobot mam, Ame mu asik tagepen ge God daiton tave iragenawa amba ne, Iesu Keriso, ge watu enanegeanawa ameme asik tapen.

⁴ Ne piup ma gapan tauan nao nenaana taitamena gapan oya oya gega wat bawaramen.

⁵ Ap menan endi, Maman, oya oya nega ge ao wat, namu gende wainintoni piup ya venaseni gapan ap umap omewa inep.” Iesu ap anega mup wan.

Iesu wa ewamot mega munan mup tan

⁶ Iesu sia anega mup wan, “Ne wa ewamot negawa piup ma gapan nenaana inamup wat matakam gimagen. Mu iragi gegawa, go ge nenaana amba mu nop gega ayamase tane menan.

⁷ Endi mu asik tane wan dim dim ge nenaanawa ame iragi ge inagap tauwanum.

⁸ Menan nop ge nenaana ne wadiamona amba mu warane. Ap menan mu den gaset asik tane ne ge inagap tauan, amba mu anu tumat tane ame ge watu enanegean.

⁹ Ne mu munan mup waivin. Ne piup ma gapan waenapan iravi munan mup ya waivin, go wa ewamot nagirewa ge nenaanawa munan mup waivin, iwa mu iragi gegawa.

¹⁰ Waenapan negawa ame gegawa, amba waenapan gegawa ame negawa, amba oya oya ne inanap tauiniwa ame mu gamumup oniwan.

¹¹ Ne piup ma gapan nononga ya wanigain, go endi ne inagap ongivin. Go mu piupa sia di wanumoin, menan Mamana potaga woup seniwa, ge yauga aroewa nenaana gapan papat munan ta mu daiton tap ame nu gende daiton tatoni mini.

¹² Ne tanamon wanigena wamewa ne papat munan tan amba kwayupamu yambuni tan yauna ame nenaana gapan. Daiton da ya wakauman. Go at koewa aepen menan yaneni apanewa megenat wakauman, iwa ame gapan God ok namua seane tavewa venasepen menan.

¹³ Konintu ne inagap ongain, go piup ma gapan wanigen nop nega ma wainginawa, menan ame mu afon nega warep potamu no dotouep inamup ene pone inep.

¹⁴ Ne nop gega munan menan piup ma tandayat mumane, iwa mu piup ma mugawa uon ap mini ne den piup ma megawa uon.

¹⁵ Mup nega waingina ame wa ewamot negawa piup ma gapan ge tam agepen menan uon go ame ge papat muga tapen koewa apane, Seitan, ya maninamopen menan.

¹⁶ Mu piup ma mugawa uon, ap mini ne piup ma megawa uon.

¹⁷ Maman, nop gega tavewa gapan mu wat aipakam kakayat mum.

¹⁸ Ge piup gapan watu enanegeana mini, ne piup gapan watu enamon.

¹⁹ Ne wa ewamot negawa wat agoat mumapen menan ne nek ingane wat aipakamen, ap gamup mu waenapan piup ma gapan wat agoat mumapen menan ne nop gega tavewa gapan wa ewamot negawa wat aipakam kakayat mumain.” Iesu ap anega mup wan.

Iesu anu tumat nagirewa iragi munan mup wan

²⁰ Iesu sia anega mup wan, “Ne mup nega, wadiamot nega mugenat munan uon, go mu gamumup da da anu tumat tanegepi munan den.

²¹ Amba mu den iragi daiton tapen menan. Mamana, ge ne potanap wanik agi amba ne ge potagap wanik angin ap mini munan mup waivin mu den tanane wanumoin ap me gapan piup nagirewa anu tumat tanepe ame ge ne watu enanegean.

²² Oya oya ame ge nenaana ne munan ame gapan nu daiton tatoni mini mu den daiton tap.

²³ Ne mu potamup wanigepen amba ge ne potanap wanigepen ap gapan mu den uruga naumo one tobob tamo kakayasep amba piup nagirewa ame ge watu enanegeana ame mu anu tumat tain. Menan piup nagirewa manega anuin, nenan anu guringiana mini anu tumat nagirewa munan anu guringi.

²⁴ Maman, kiman piup ya venaseni gapan ge nenan anu guringian menan oya oya nenaana. Endi ne manega anuivin, orup da da nenaanawa ne amba wanigepenawa ame mu den tanamo wanigain ame gapan oya oya ge nenaana ame ganasewa mu den yavep.

²⁵ Maman kakae iragenawa, piup anu waramat tagiwanum go ne anu gimagivin amba anu tumat taine nagirewa asigimup ame ge watu enanegean.

²⁶ Ge inak gega ne wa ewamona amba sia di wa ewamuingain ap me gapan baigan ne inanap taingiana ame mu inamup wandep amba ne nek mu potamup waingain.” Iesu ap anega mup wan.

18

Iesu ambot warane

¹ Iesu Mamewa inap mup wan uon tani, me wadiamot mega tanam at bumak nape da yaua Kidron, Ierusalem mainap konintu di, ame to nuguse asepagan dotou amon. Yamu asepagan ap mepe nao egak da wande en, amba Iesu wadiamot mega den egaga dotou amon.

² Endi apan Diudes Iesu omine wani, at ameme asigip tan, iwa Iesu wadiamot mega den wam wam pot pot gapan ap mepe iamiwanumun.

³ Ap menan Diudes, Rom ita nagire ge God Paewa amase taine nagirewa, koniwa da wat nugutan iragi tanam egaga ap mepe tauane. Mu pirisi ge Parisi aritawa yonanewa watu enamon. Mu dun iran ita gaut muga tambun tauan.

⁴ Iesu dim da inap venasepen taiwandi asigip tani menan tau ae anega wayamon, “Endi e orup ansena menan anuiwanin?”

⁵ Mu garewa anega wane, “Iesu at Nasaret apanewa.”

Iesu anega wan, “Ne me di,” (Diuda omin apanewa ap mepe den tanam yoniwandin).

⁶ Ame Iesu anega waniwa, “Ne me di,” mu tap nitue use tan pia geomone.

⁷ Iesu singui sia wayawamon, “Endi e da menan anuiwanin?” Mu anega wane, “Iesu at Nasaret apanewa.”

⁸ Iesu gare wan, “Ne gaset wadiaena, ne mame. Go endi ne yona taiwanianampinawa, apan ma upinewa ae vemone amop.”

⁹ Inak mame venaseniwa ame Iesu gaset namu manega waiwandini, “Daiton da nenaana ya wakauman,” ame om inapen menan venasen.

¹⁰ Boge Saimon Pita kereba megawa da wareni ame ware pirisi bawarewa ame nao apane mega topen tani boge darinewa nutup to kuasen, (nao apante ame yaua Malukas).

¹¹ Go Iesu Pita ase anega dien, “Kereba gega mek ae di bat! Endi ne Mamana negeni itanewa di warapen taivin, e ya watananegene!”

Iesu waran apan Anas inewa amon

¹² Boge Rom ita anan nagirewa ge namu yoyo mugawa ge Diu God Paewa amase taine nagirewa amon Iesu to waran. Mudamiga panan,

¹³ amba waran namu Anas inewa tauan, apante Kayapas ame nemnagewa. Bodu ame Kayapas pirisi aritawa wanupe ware wanden.

¹⁴ Apan Kayapas ame namu Diu nagire pusi tau tau ta anega waniwa kakaewa ame Diu nagire munan apan daiton boep.

Pita Iesu waboboreni erewa

¹⁵ Simon Pita ge wadiamot apan da Iesu waran amone ewap amuiwanumun. Wa ewamot apan dawa ameme pirisi aritawa asigip tani menan, me Iesu den tane pirisi aritawa pa sin mega namboya unuk aen.

¹⁶ Go Pita tonan garip amat wanden. Amba wadiamot ame, pirisi aritawa asigip taniwa, ewagai sia taue, tonan kwayup taini waene da die amba Pita wat unuk aen.

¹⁷ Waen ame Pita yave anega dien, “Ge Iesu wadiamot mega da go?” Pita gare wan, “Ae, ne ap me uon.”

¹⁸ Irot waramon menan nao nagirewa ge God Paewa amase taine nagirewa epi amunu wap amba wanumopen men oma iran ikukuk nau panan iramuiwanumun, menan Pita inamup ase ae den tanamo oma irasiwandin.

Pirisi aritawa Iesu singui yasiwandin

¹⁹ Koni ame gapan, pirisi aritawa namua, Anas, Iesu nop opata anenen wani amba Iesu wadiamot mega oit muga anupen menan Iesu singui yasiwandini.

²⁰ Iesu anega wan, “Ne nop aroga iragen Diu nagirewa iragi wadiamon,” Iesu gare anega wan, “Ne pot pot nop opata waine paewa ge God Paewa gwanap wadiamuungin, ap mepe Diu iragi anupen menan iam tauwanumun, go ne nop da karaua ya wan.

²¹ Endi dimen singuat nimanegingi? Waenapan ame nop waingin anuiwanumune ame wayawam, ne nop waingina mu asigip.”

²² Iesu nop mame waniwa, God Paewa amase taini apante da Iesu gine namup to arame, kaimakaet anega wani, “Endi nop garewa pirisi aritawa wadia dia nopewa map anega?”

²³ Menan Iesu toni apanewa inap gare wan, “Ne nop da me inap wa koeamena, endi nop wa koeamena ame to ewam. Go ne nop tavewa gapan di waingina ge endi di menan union ginan namun to waramean?”

²⁴ Anas Iesu mudamiga panane wanden boge watu enen pirisi aritawa Kayapas inewa aen.

Pita koni derewa ge yampa Iesu waboboren

²⁵ Ame Pita yone oma irasiwandini, waenapan ap mepe singui inap wane, “Ge Iesu wadiamot mega da, go?” Me wabobore anega wani, “A, ne uon.”

²⁶ Pirisi aritawa ame nao mega tainewa da, dugup mega daitonawa apanewa gata Pita darine to kuaseniwa, ma taue Pita wayaven, “Ae, ge apan gata Iesu den egaga yawagenawa?”

²⁷ Sia Pita waboboren, me ap wani no utap kumkum nop wan.

Iesu Pailat namup yonen

²⁸ Mumaget iragen Iesu Kayapas pa mega gapan wat naun ian Rom ayopewa, Pailat, ine amon. Amba Diu epimu ya wabigimet anune menan pa arita ame gwanewa den ya unuk amon, iwa mu Paina Yamaseni Baripewa wan sepi

tuguin. Amba Paina Yamaseni Baripewa iupewa topaise barip ya tugupi tawa.

²⁹ Menan Pailat tau garip one wayawamon, “Apan ma taparit mega dim da yawa amba wayan?”

³⁰ Mu gare wane, “Endi me koewa apane uon wandepiwa, nu endi wara ase ya genait.”

³¹ Pailat anega wan, “Ek waran anuiana iupewa gapan wanene tan.” Diu nagirewa gare wan, “Go nu orup da paina to endao endao aroewa da nu inanup uon.”

³² Iesu bop anenen ta paina to endavepi noa Iesu namu waiwandini ame tavewa tauapen menan nop ma venase tau aen.

³³ Pailat pa mega gapan unuk ae amba Iesu me inap wat tauapen wan. Iesu taueni amba me Iesu inap singui wan, “Ge Diu nagirewa ayop arita mugawa go?”

³⁴ Iesu gare wan, “Endi ame gek di anuan waingi, go gare waenapan da oitana wadiagene?”

³⁵ Pailat gare wan, “Ne Diu apanewa da uon. Go ge dim da taana menan ge waenapan gega amba pirisi ayopewa wat nauge onam nenan?”

³⁶ Iesu anega wan, “Toemu negawa ame piup ma mega uon. Ame wandepiwa, ne Diu toguranegopen menan amatana taine nagire tantanana nenan anan tain, Diu nagirewa ya waranegepen menan. Go toemu negawa at ma gapan da uon.”

³⁷ Pailat anega wani, “Endi ge ayop aritawa di?” Iesu gare wan, “Ap me di waingiana, ne ayop aritawa di. Mame menan ne piup ma gapan tauan, waenapan nop tavewa anu kakayasepen menan. Tavewa mame menan ne yanan. Waenapan nop tavewa gambene wanumuinewa ame nop nega anuin.”

³⁸ Pailat singui anega wan, “Nop tavewa ame dim da?”

Nop mame waniwa me sia tau garip ae Diu nagirewa anega diamon, “Ne koewa da me inap ya tautanan.”

³⁹ Go endi e guegue ega da inanap wandinawa, orup da agim noke baraene wandinawa ame Paina Yamaseni Baripewa wamewa gapan wat vetane tau aeta. Endi

anuiwaniana ne ian Diu ayop aritawa egawa Iesu wat vetapen tau aeta go?”

⁴⁰ Mu gare senao ase wane, “Me uon! Barabas watu en nun!” Barabas me ita anan koevet taiwandini apanewa da.

19

Ita nagirewa Iesu wawa koko tane

¹ Boge apan Pailat Iesu gaut gane de-nawa gapan toianumat wan. Boge mu Iesu gaura tone.

² Amba ita nagirewa ipuni wagam waran Iesu iap tonat wanane. Amba wanup bunip pan wanane iwa mu piup ayop muga ap me guegue tane.

³ Mu Iesu inap dot amo ge amo tan, anega waiwanumun, “Kaewa kaewa Diu nagire ayop aritawa mugawa!” amba mu gine namup toianumun.

⁴ Koni daiton sia Pailat tau one amba Diu nagire inamup anega wan, “Yawan, ne me naun inayap ongivin iwa ne yop tana koewa da me inap ya tanan.”

⁵ Wam ame ita nagirewa Iesu ipuni wagam warane iap tonasen amba wanup bunip pan wanana amba waran Pailat inap tauan, Pailat anega wadiamon, “Apanewa mame!”

⁶ Mek menawaet pirisi nagirewa amba ita nagirewa Iesu yawane, mu ve anega wan, “To endawan! To endawan!” Go Pailat gare anega wan, “Apan ek waran amba to endawan. Nek nenan, koewa me inapewa ne da ya tautanan.”

⁷ Diu nagire gare anega wane, “Nu iup nuga wandia, amba iup ame wainiwa me boopen di, iwa mek ingane God otua wan.”

Iesu ware togurep endawat wa munen

⁸ Wam ame Pailat nop mame anuni, boge me tap aritavet anun,

⁹ amba me entane pa mega gwanap aen. “Ge at ambe gapan tauaan?” Iesu singui wayaven, go Iesu nop gare da ya wan.

¹⁰ “Ge nop inanap wawa tanda taingi?” Pailat anega wan. “Ge anu avingi ne wat vetagepen go to endavagepen aroewa inanap wandia?”

¹¹ Iesu gare anega wan, “Ge God aro amun ame ya genapo ge bawarewa

inanap ya tapo. Ibariwa ameme apan da ne waranege ge nanik gwanap baraeniwa me koewa megawa arita iragen.”

¹² Amba, Pailat Iesu vesep tau aepen tan, go Diu nagire ve uma waiwanumun, “Apan ma wat veta tau aepiwa ge Rom nagirewa bawarewa iragenawa muga Sisa evenewa uon. Iwa Iesu ayop mek tan wainiwa Sisa uewa warapen taiwan. Da ayop mek ta wapi ame ayop bawarewa Sisa anavi megawa.”

¹³ Wam ame Pailat mame wane anuni, Iesu nau tau one amba Pailat wanene watat mega gagap ae wanden, at ameme yaua gwat gwaratan tane arewa (Iburu nop muga yaua dawa Gabata diane).

¹⁴ Wam imanawa Paina Yamaseni Baripewa menan endi Diu nagirewa taba bongam bongam ta napen taiwanumune wamewa. Wam ame ianupe wareni gapan, Pailat Diu nagire anega diamon, “Ayop aritawa ega mam.”

¹⁵ Go mu ve uma wane, “Wat asira aisen! wat aisen! To endawane boep!” Pailat singui wan, “Ne ayop aritawa ega to endawain?” Pirisi namu yoyo muga nagirewa gare wane, “Nu ayop aritawa nuga da uon go Sisa megenat.”

¹⁶ Pailat uiwa gapan Iesu ware munen amo to endawapen menan.

Iesu oma korosi gapan tobatamen endawanewa

Ap menan ita nagirewa Iesu waran amat tane.

¹⁷ Mu Iesu nanamasene oma korosi wat aen. Boge Iesu nau amon at yaua Apan I Kaime Arewa tauan (Iburu nop muga gapan Golugata diane).

¹⁸ Ap mepe mu korosi gapan tobatamen endawan, apan dere den guramon yamu yamu dawamon amba Iesu yaumakamup.

¹⁹ Apan Pailat ok tata kakayat ta munen korosi gagap tobatamen. Ok anega seni, ‘Ma Iesu at Nasaret apanewa. Diu nagirewa ayop mugawa,’ ok ap anega sen.

²⁰ Ian Diu nagirewa aruga ok ma batnagene, iwa Iesu tone arewa pa Ierusalem konintu, amba den nop paupe yampo, Iburu nop mugawa, Latin nop mugawa amba Gurik nop mugawa gapan ok seane.

²¹ Diu pirisi namu yoyo mugawa ororom warupan amon Pailat inap noyam manega wane, “Nu tanda anuivin, ‘Diu nagire ayop mugawa’ ya sea go anega se, ‘Apan ma mek anega wan, Ne Diu nagirewa ayop mugawa’ ap anega se.”

²² Pailat gare anega wan, “Ok dim da seana, ap me di sean.”

²³ Wam ame ita nagirewa Iesu oma korosi gapan tobatamen, mu wanup mega tambun, yan i degede seane, apan animpo om muga gapan, Iesu wanup mega gauarape megenat wanden. Wanup mame taginamene intume no usewa da uon, amba wanup nononga daiton aipa aupa.

²⁴ Ap menan mu anega gare gare wane, “Nu wanup ma ya benagepen. Nu kae otu da tayawat amba da wareta.” Mame tane ame God nop mega ok namua seane tavewa tauapen menan anega wani, Mu wanup nega yan sean ase ma tambun, amba wanup nega warapen menan kae tan.

Amba ap me ita nagire tanewa.

²⁵ Iesu korosi mega mainep yoniwanumune me mek inewa, me inewa gwaniwa, Meri, apan Kolopas waenewa, amba Meri Makdalin.

²⁶ Menan Iesu inewa ap mepe yaven, amba wa ewamot da me menan anu guriniwa konintu mainep yoniwandin, menan inewa inap anega wan, “Inan kaiwan, ase me endi ge otugawa.”

²⁷ Amba wadiat mega inap wan, “Endi ma, ge inagawa.” Wam ame use aeniwa, wadiat apane mame Iesu inewa pa mega gapan kwayup taiwandin.

Iesu bop tan

²⁸ Evi amba, God nop mega namua ok seane tavewa tauapen menan amba Iesu me nao mega iragi taitamen anuni menan, Iesu anega wan, “Ne megana pakaraia.”

²⁹ Unup sera da kaum sisi dena yaua viniga no dotouen ap mepe wanden, menan ita apanewa wanup kaum aipa antapene puakame amba gerok ginap panen, Iesu nop use baraen.

³⁰ Wam ame kaum mut mut tani, Iesu anega wan, “Iragi taitamen.” Ap gapan, me guewa tau aen nawane pae waren.

³¹ Endiwa wam bongam bongam wamewa amba wam aigapewa Diu nagirewa pura bawarewa amba Paina Yamaseni Baripewa wamewa menan Diu nagire anune kakae uon iwa bonigawa etumu korosi muga muga gapan ya wanumopen. Ap menan, mu amo Pailat singui tayave pusimu kaimamu topapaisep menawaet borit wap amba etumu tambu vitapen.

³² Pailat umap wani menan, ita nagirewa tauan up apane Iesu mainap to endawane namua pusi kaime topapaisen amba up apane dawa ap anega den tane.

³³ Go mu Iesu ine tauan yawane gaset boen menan, mu pusi kaimewa ya patane.

³⁴ Ap menan garewa ita apane da Iesu itaya bembenip enun denip ge kaum to tamage tau visen.

³⁵ Apan da ame yaveni guturewa wan, me anuni gutut ameme tavewa di. Amba yamap yaveni apanewa nop mega ame tavewa di ap menan e den anu tumat tan.

³⁶ Dim dim ma iragi tan venaseniwa ame gapan God mega nop namua ok seane tavewa tauapen, ok ame manega sen, Kaimewa daiton da sep ya wan.

³⁷ Amba sia God nop namua ok dawa gapan manega seane, Apan daiton da mu itaya enune. Itaya enune nagirewa muk den me ase yawan.

Iesu tunewa

³⁸ Evi amba, Diosep at Arimatia apante ae Pailat Iesu etua warapen menan singuitan. Diosep Iesu wadiat mega da, go karaua anu tumat taiwandini iwa Diu nagire tamu tan. Pailat umap wani me tau Iesu etua wat aen.

³⁹ Diosep ge Nikodimas dere amon, Nikodimas ame namu Iesu ine daio muma taueni apanewa. Apan Nikodimas ame oma ose tutu dena gotonak, yaumua Elo ge Mer, ene wat onen, itan mega paua ik tuat dere enepi ame om inen.

⁴⁰ Apan dere ame Iesu etua oma osewa tutu dena gapan enu iran amba wanup nononga da gapan viri viri warane. Mame tane Diu nagire borit wane tumuine guegue muga gapan tan.

⁴¹ At ap mepe Iesu to endawane ap mainep egak da wande en, dagup ewakewa da egaga ap mepe, dagup ameme gapan namu daiton da boeni ya baraene.

⁴² Iesu etua dagup konintu wandiniwa gapan baraene iwa mu wam ame Diu nagire bongam bongam muga aritawa da wamewa nanamu tane.

20

Iesu dagupa baraene arewa pokaet

¹ Pura namunupewa ame wam ibariwa gapan mumaget iragen, mum igoe den wandeni, Meri Makdalin yon wande dagup yawapen aeni dagup tonanewa agim wabaimene no aroga yaven.

² Boge me serarat aeni Saimon Pita ge wadiamot apan da, Iesu apan ame menan anu guriniwa, ame anega diamon, "Akae, ayop etua dagupa wat tau amba amone, endi nu oare wat amon amba baraene!"

³ Menan Pita ge wadiat apan dawa dagup yawapen menan amon.

⁴ Mu dere serarat amone, go apan dawa Pita wat garawase dagup namu tauen.

⁵ Wadiat apante ame kaut enuni dagup gwane yangut tani, wanup en totnak baraene ame megenat geat warden yaven go me ya unuk aen.

⁶ Go Saimon Pita, tauie tamana dagup gwanewa unuk aen, me wa panam baraene wanupewa warden yaven.

⁷ Ap mepe bop taine gapan tumuine wanupewa Iesu iap ikukuk panane den warden. Tumuine wanupewa ap me gapan wa panam baraene, mek mini warden.

⁸ Amba wadiat apan dawa dagup namu taueni, den sia unuk aen, yaveni amba anu tumat tan.

⁹ Mu wataget God no oise kakaewa namua gapan Iesu bop gapan yon wandepi no oise waiwanumune ame da ya di anu awane go ma venaseni gapan mu di anu awane.

Iesu meri Magdarin inap tauen

¹⁰ Wadiamot dere ame ewagai pa muga amon,

¹¹ go Meri ewamup taue, dagup garip yone irip waiwandin. Meri iri den kaut enu dagup gwanewa yangut tani,

¹² anea dere, wanup muga pomponugaet, Iesu etua wandeni arap wanumone. Anea daiton iap use ma warden amba dawa pusip use wandeni.

¹³ Mu singui wayawane, “Waen ge irip dimen waingi?” Meri gare anega wan, “Ayop nega waenapan da wat amon. Endi ne oare amba baraene wandia.”

¹⁴ Meri nop wani ewap to entane Iesu yoniwandin use yaven go Iesu irewa ya yao aven.

¹⁵ Iesu anega wan, “Waen ge, dimen irip waingi? Ge da yowa taingi?” Meri me egak i apanewa da anuni menan anega wan, “Ge ayop negawa etua wat agean go? Baraena arewa wadianege ne ange warap.”

¹⁶ Iesu ase dien, “Meri.” Gine tutup Meri gabenewa to entane ian Diu nop muga gapan anega wan, “Rabonai” (nop ame guegue, Wadianet Nugawa).

¹⁷ Ap me gapan Iesu anega wan, “Ae venek, ya waranege, iwa ne Mamana inewa sia entanen ya angen. Go wa ewamot negawa menan ak amba oitana mame wadiam, ‘Ne entanan, ne Mamanawa amba e Mamayawa, ne God negawa amba e God egawa inap angepen taivin.’ ”

¹⁸ Boge Meri Makdalin ware wadiamot nagire inamu aen anega wan, “Ne Ayop yawan!” amba me Iesu wadieni oisewa ase wadiamon.

Iesu wadiamot mega inamup venasen.

¹⁹ Wam ame pura ibariwa mum gine, wa ewamot nagire iravi at daiton to dagonen. Diu nagirewa tamu anune menan tonan gin kapet tan wanumone. Boge Iesu ap mepe inamup venase anega wan, “Nonup inayap wandeep.”

²⁰ Mame wani ewap, me naniwa ge bembeniwa ewamon. Boge wa ewamot nagire mega aton aigap di anune, iwa mu ayop yawane menan.

²¹ Iesu sia wan, “Nonup inayap wandeep Mamana watu enanegeni mini, ne watu enaiangin.”

²² Nop ame wani gaup aigamup upune anega wan, “Guewa Woup Seniwa waran.

²³ E orup da koewa mega anu ae veanewa, koewa mega uon tata. E koewa mega anun ae ya veanewa, koewa mega wandeta.”

Iesu ao yon wandeni ewap, Tomas inap tauen.

²⁴ Endi apan Tomas (me yaua dawa Naturup) apan aonagaet pusingawan derewa apan ame da. Wam ame Iesu wadiamot mega inamup venasen, me wa ewamot upinewa den ya tanam warden.

²⁵ Menan Tomas evi amba taueni, wa ewamot upinewa me anega diane, “Nu Ayop yawaton.” Go Tomas anega diamon, “Ne anu tumat ya taivin go me naniwa ikoko tone guinewa yawap nanina pirua wat enapenawa amba bembeniwa gwin den wat anupenawa ap gapan ne anu tumat tain.”

²⁶ Pura daiton uon tani ewap wa ewamot nagire Tomas den tanam warden. Ame tonan iravi gin kapet tan wanumone, go Iesu taue yaumakamup yone anega diamon, “Nonup inayap wande ep.”

²⁷ Boge Iesu Tomas ise anega dien, “Nanina ma yao, nanik piru wat onak mapabat nanina guin wat anu. Naniga endimat bembeniap bat anu. Anu bambam ae ve anu tumat ta.”

²⁸ Tomas yone Iesu anega dien, “Ayop negawa amba God negawa!”

²⁹ Boge Iesu anega dien, “Iwa ge ase ma yawanegeneana menan ge anu tumat taiagi. Go waenapan da da ya yawaneginewa go mu anu tumat tainewa mu wat atonat aigape warain.”

³⁰ Iesu yo paua arugataet da wa ewamot mega namumup taiwandin, go nop ap me buka ma gapan den ya seane.

³¹ Go endi nop oit mame seanewa ame Iesu me God om enuni apanewa, Keriso di, amba me God otua di, e anu tumat tapen menan. Ap anu tumat taiwaniampinawa e Iesu yaua gapan inak warai.

¹ Evi da sia Iesu wa ewamot mega inamup venasen, awan Galili etop (yaua dawa Taibirias diane). Tani gueguewa manega di,

² Saimon Pita, Tomas, Nataniero pa sewa mega Keina at Galili apanewa, Sebedi otu waiwa, amba wa ewamot da dere ap mepe den tobob tan wanumon.

³ Saimon Pita anega diamon, “Ne meo dawane angewan.”

Amba mu anega wane, “Nu ge den anait.” Menan mu iragi tau amon kabum gwanap dotouan, go mum ame dawan tane meo da ya warupane.

⁴ Woup seni, mumaget iragen Iesu awan etop gerata yonen, go wa ewamot nagire Iesu irewa da ya yao awane.

⁵ Iesu inamup anega diamon, “Oruma, meo da upayan?” Mu gare anega wane, “Uon.”

⁶ Menan me anega diamon, “Ia egawa kabum nutup arigewa gapan antap enane amba e upi upai.” Me wani no utap tane gapan, ia wa panan tain en amba warupane iwa meo arugataet.

⁷ Boge wa ewamot da Iesu menan anu guriniwa Pita inap anega wan, “Ase Ayop!” Mek menawaet Saimon Pita nōp ame anuni, “Ase me Ayop,” me wanup mega garipewa me namu warup ase baraeni sia ware kankamup paneni bōge bup ta kauma gearen,

⁸ Wa ewamot upinewa kabum waran Pita ewap amon, ia meo no dotoueni den warupen onam wanumune, iwa kaum etoa nononga uon, damik wagu dere intum tapo om mega mini.

⁹ Onamon piup tauane gapan, meo omaya yagit wandin yawan amba taba buredi upi den yawamon.

¹⁰ Iesu mu inamup anega wan, “Meo endi ma ewake upayana upi tam onaen.”

¹¹ Amba Saimon Pita kabum mainep ae ia okokok warup one kaum etoa tauen. Ap mepe meo bawarewa mugenataet, apane nani yamunaet nani yamu dere apan da aonagaet pusinawan yampo (153), dena go meo arugataet ame ia da bebep ya wan.

¹² Iesu inamup anega wan, “Onaen mu-mageta tabaewa nan.” Wa ewamot da

singui ya tane “Ge da?” iwa mu asik tane me Ayop di.

¹³ Iesu one, taba buredi ware muneni, amba meo ap umap den sia munen.

¹⁴ Mame endi yamat mega wam koni yampoa Iesu bop ta inakae yon wan-deni ewap wa ewamot mega inamup ve-naseniwa.

Iesu Pita ware God nao mega wanen

¹⁵ Wam ame mu taba nane ewap, Iesu Saimon Pita inap singui wayaven, “Saimon apan Dion otua ma upi nenan anui-wanumune mini ge tave di nenan bumaga tantan anu guringi go?” Saimon Pita gare anega wan, “Umap, Ayop, ge asigigap ne genan anu gurivin.” Iesu gare wan, “Man sip otu nega watu muingan.”

¹⁶ Sia Iesu anega wan, “Saimon apan Dion otua ge tave di bumagan tantan ne-nan anu guringi go?” Saimon Pita gare anega wan, “Umap, Ayop, ge asik taan ne genan anu gurivin.” Iesu sia anega wan, “Man sip nega kwayup tamuingan.”

¹⁷ Wam koni yampoa Iesu Pita inap anega wan, “Saimon apan Dion otua ge tave di nenan anu guringi go?” Pita bu-magap anu tanen iwa Iesu koni yampoa me inap singui wayaven, ‘Ge tave di nenan anu guringi go?’ Me gare anega wan, “Ayop negawa ge iragi anuitamingi. Ge asik taan ne genan anu gurivin.” Iesu gare anega wan, “Man Sip otua negawa watumuingan.

¹⁸ Ne nōp tavewa di wadiaivin, ge wam ame tamaru gapan wanigeana gan gorogot gek ingane pana amba aget anuana gapan agingian, go apan tave tawa naniga en nonongame, orup dawa naniga damik gapan panep amba ya aget anuiana arewa wat nauge aeta.”

¹⁹ Iesu nōp mame wani guegue ame, Pita evi amba anenen ta ae amba bop tapi ap gapan God oya oya mega wabawaramepi oisewa Iesu namu wan. Boge Iesu me inap anega wan, “Pusin wakukurup amu amu onak.”

²⁰ Pita entane yaveni ame wa ewamot da, Iesu me inap anu guriniwa, ewamup oniwandin yaven. (Mame da Iesu to-ganep dave Paina Yamaseni Baripewa

nane gapan anega wani, “Ayop ma da ominaga wata?”)

²¹ Wam ame Pita yaveni, me Iesu inap singui wan, “Ayop, amba me anenen?”

²² Iesu gare anega wan, “Ne anupenawa me wande aiwandapina amba ne ewagai sia entan tauain, ame ge inagap anenen? Ge mek ewanap di onak.”

²³ Iwa Iesu nop mame wani menan nop oit senare tau aen amba wadiamot megawa manega anu waramat ta wane, “Iesu wadiat mega da, Iesu me inap anu guriniwa apanewa, me ya di boeta.” Go Iesu anega ya wani, “Me ya boeta.” Go me manega megenat wan, “Ne anupenawa me wande aiwandapina amba ne ewagai sia entan tauain, ame ge inagap anenen?”

²⁴ Ne Iesu wadiat mega, yavina apanewa, ameme nop mame wadidiaivin, ok mame sivin. Ne anuivin nop mame tavewa di.

²⁵ Iesu piup ma gapan yo ugup ugup baita da ya tan. Go me taniwa oisewa iragi buka gapan ok ae seapoa ne anuingina ame piup uruga gapan buka iragi arok muga umap ya di tapo.

Gutut Iesu watu enamot mega nagire guturewa

1-2 Kaewa kaewa gwanina Tiopilas, ge asigigap, ne buka nega daitonawa gwanap Iesu nao ere watape iragi wadidiam ai-wandin eni amba kiman dot aeni, ame oisewa namu inagap ok sean. Go Iesu namu om enumoni watu enamot mega inamup Guewa Woup Seniwa gamup nop pusi panamoin eni amba kiman dot aen.

3 Iesu ugu vegaek anu bop tani sia yon wandeni anu kakayasepen menan wam apane dere gapan me aroga inamup tauen. Me wadiamot mega tamana di yawane amba me God toemu mega oisewa wadidiamuiwandin.

4 Wam daiton ame Iesu wadiamot mega iragi tanamo wandeni Iesu anega diamon, "Pa Ierusalem ae ya ve aisene go Mamana God Guewa garaet enat wa agiat imae ni men wadiaena tavewa warapen menan amase mapa tan."

5 Dion waenapan kaum gapan dup iammuiwandin, go wam konintu amba God Guewa Posewa Woup Seniwa gapan dup iaeta."

God aro mega gapan Iesu kiman dot aen

6 Menan wadiamot mega me singui anega wayawan, "Ayop, Rom nagirewa nu at piup nuga warane, wam mame gapan ge at piup nuga Isurero ewagai sia nunai?"

7 Iesu gare wan, "Ne Mamana wame wa om enuini apanewa, me megenat asigip tan. E iragi mame ya anu anu."

8 Go Guewa Posewa Woup Seniwa aigayap visepi, e aro amun warai. Amba iragi nop oit nega wa aitai, at Ierusalem, Diudia iragi, amba Sameria, amba den at piup uruga oitana wadidiam wanian."

9 Nop mame wani ewap, yamamup Iesu pusiwa ao bunae kiman dot aen, dot ai-wandini irikup taue yamamup waboren.

10 Menan kimani yangut ao kem kem yaviwanumune gapan, apan dere wanup pomponu enan mainemup venat mutan yonan, amba anega wan,

11 "At Galili nagirewa, iwa dimen yon-ayan kiman gwane ao yaviwanin? Iesu mame yawayan dot aeni, ewagai tauapen tapi anenen yawayan dot aeni ap umap sia taueta."

Diudes uewa Matayas om enune waren

12 Amba ap mepe tunup yaua Olip gapan entanen pa Ierusalem sia amon, Diu nagire pura bawarewa muga iup mega kwayupe tane menan mu ap nononga ya amon go konintu amon amba pa sewa Ierusalem tauan.

13 Wam ame mu tauanewa mu inine paewa, pa aigapewa dot amon. Tauane apane yaumua mam, Pita, Dion, Diemis, Anduru, Pilip, Tomas, Batolomio, Matiu, Alopias otua Diemis, Salmon namu ian Rom nagirewa wa oimopen taiwandini apanewa amba Diudes apan Diemis otua.

14 Iesu wa ewamot megawa, Iesu gwani waiwa, Meri Iesu inewa, amba waen upi den, mu iragi imu pose daiton tobob tan wam wam ap mepe mup taiwanumun.

15 Ame gapan, wam da, Iesu anu tumat taine nagirewa tobob tane ame paua muga apane nani yamunaet nani yamu daiton (120) ap mepe iam wanumune. Amba Pita yaumakamup yone anega wadiamon,

16-17 "Tatan, gwanin, apan Diudes anen tapi oisewa wataget Guewa Woup Seni gapan apan Devit wani no utap ame tavewa mame tauen. Ame Diudes nu nao nuga daitona apanewa, negin ta, ita nagirewa naumo tauen Iesu panan waran."

18 Diudes Iesu omine wani garewa agim make ap gapan piup da une tan. Me une tani piupewa gapan me geare boen bagua tuk wa ase ma warden amba nia iragi aroga tauen.

19 Oit ma pa Ierusalem gapan wanumone nagirewa iragi anune, menan mu piup ame nop muga gapan yaua Akelodama diane. Akelodama (guegiewa ame, apan deniwa piupewa).

20 Amba Pita sia wan, "God no oise na-mua kakaewa buka Sam gapan ok anega seane,

Pa mega pokaet wandep, waenapan gwanap ya wanumop.

Nao mega apan dawa ware namu yoyo tap.

²¹⁻²² Ap menan Diudes garewa, apan da, Ayop nuga inakae sia yon wandeni oisewa nu den Iesu oisewa yonat wadidi-amot anuini apanewa om enuit. Amba apan ap me, nu den tana intoni apanewa amba erek Dion dup iam wandini gapan watape ta oneni wam mame taueni amba God aro mega gapan Iesu kiman dot aen yaveni apan ameme Diudes uewa wareta.”

²³ Ap menan mu apan dere om enume. Da yaua Diosep Basabas (yaua dawa den mu asik tane ame Diastas) amba apan dawa me yaua Matayas.

²⁴⁻²⁵ Boge mu mup anega wane, “Ayop nugawa, ge waenapan iragi imunu potanu yavitamianawa. Apan Diudes watu enamot gege navewa ae ve at mega aeni apan dere mame ansena da ge om enuana to ewan.”

²⁶ Mup wane, God apan ansena men anuni mu yao anupen menan iraga yaoyao kaewa otu da tane gapan apan Matayas om mega enturunagen. Ap menan apan Matayas Iesu watu enamot megawa aonagaet pusinawan daiton ame den tobob tan yonan.

2

Pentikos wamewa gapan God Guewa

Woup Seniwa inamup tauen

¹ Iesu kiman dot aeni wam aonagaet ewap, wam yaua Pentikos gapan, Iesu anu tumasine nagirewa mu pa daiton iamen wanumon.

² Amba unuk baware da taik tawak mini kimani tauen, taik ununkewa pa gwanewa bararaen.

³ Mu iamup daiton daiton merao meriwa yan se yagim wandin yawan.

⁴ God Guewa Posewa Woup Seni gine daiton potamup tau aro muneni gapan merimu to bayanen ian da da nop muga ugup ugup ya anuine nopewa gapan waiwanumune.

⁵ Pentikos wamewa gapan, God aymase taine ian Diu nagirewa, at at iragi gapan Ierusalem Pentikos baripewa menan tauan iamen.

⁶ Mu nop waiwanumune ununkewa anunewa seke tane no i kap wane amba

iragi at ap me gapan to iamen iwa mu anune daiton daiton nop muga muga gapan waiwanumune.

⁷ Waenapan arugataet ame imumu yon wanden menan tarak anega wane, “Yawanmon! waenapan mame nop waiwanumune anuintoni mu iragi Galili nagirewa?

⁸ Go anenen nu anuintoni iragi nop nuga nuga gapan waiwanum?

⁹ At nuga ugup ugup gapan tauaton ame, Patia, Midia, Ilam, Mesopotemia, Diudia, Kapadosia, Pontas, Eisia,

¹⁰⁻¹¹ Pirigia, Pampilia, Idip, Libia arigewa at Sairini mainep, nu upi at Rom gapan tauaton amba nu upi at Kurit ge Arebia nagirewa. Nu Diu nagirewa ge ian ugupe Diu guegue nuga tat anuine nagirewa. Anuintoni iragi nop nuga nuga gapan God anenen baware iragen tani oisewa waiwanum.”

¹² Anu bambam den tarak gare gare wan, “Ma tavewa dim da?”

¹³ Go upinewa wawa koko tan anega wane, “Kaum sisi denawa aritavet nane!”

Pita opata wan

¹⁴ Go Pita, Iesu watu enamot mega aonagaet pusinawan daiton nagirewa den tanamon, ao yon wande iam iam baware ame inamup opata kaimakaet anega wan, “Evenan waina, Diu nagirewa, e da da mapa Ierusalem gapanawa. Neman guran nop anen wapena anun.

¹⁵ Waenapan ma kaum kaimake dena nat ya anune iwa ma mumaget wam airase nani yamunaet nani yamu degede megenat.

¹⁶ Go watageta God oisewa waiwandini apane Dioero endi ma anenen venaseni nopewa watageta ok manega sen,

¹⁷ God anega wan, ‘Wam verisiwa gapan waenapan ugup ugup, ne Guana aigamup wagemain. E otu waiawa ge ora waiawa God wadiamopi nopewa wain.

E tamaru egawa bet ine yawain, amba e aeta egawa enok inain.

¹⁸ Wam ame gapan ne Guana nao nega waene apānewa, aigamup den wagemain, amba mu ne nop oit nega wain.

¹⁹ Ne kiman ge piup gapan, denip amba oma yamewa,
ge dagin uni gware dena gapan ne yo paua ta ewamoin.

²⁰ Wam mum tunuta, siragam dendeni tata.

Iragi mame venasepi ewap Ayop wam mega bawarewa taueta.

²¹ Amba waenapan da da Ayop Iesu menan wap, anu tumasepiwa ame inak warain.'

²² Ian Isurero, nop ma iragi anun, Iesu at Nasaret apanewa, me aigap iragen. God Iesu kakae guragut megawa ta ewaepen menan yo kimani paua baware ugup ugup ame Iesu gamup tan. E mame iragi anuyan, iwa endi mame yamayap venasen.

²³ God Iesu eneni go e God iup mega ya anuine nagirewa den, wara korosia toyen. Go mame God anut mega wataget anenen venaset anuni gapan di venasen.

²⁴ Go God Iesu bop gapan wat inakamen ap menan bop gapan me wat vesen, iwa bop aroewa wat nat wat nat umap uon.

²⁵ Wataget apan Devit Iesu bop aroewa ya wat nasepi oisewa namu manega wan, Ne Ayop nega God pot pot imunap yavivin. Ne dararam ya tain iwa me mainanap wandia.

²⁶ Ap menan ne potanap aton anuivin, amba nonap wa atona gimagingain. Ne tamana di bonigatain go anu dao gim-age gapan iningain.

²⁷ Iwa guana borit waine nagire at muga aepi,

ap mepe ge ae ya venegai. Ne ayamase den nao gega pot poraet taina apanewa, menan epina ya puakaet anuingi.

²⁸ Inak neginewa ge wa ewanegingai gende gende wanineta, menan aton nega baware anuingain."

²⁹ Pita opata aigap sia wan, "Tatan, gwanin, ne gego den ya wadiaivin, ame omayan baewa Devit bop tan amba tune, kaima mega ma wanden oneni endi mame wandia.

³⁰ Watageta apanewa Devit, God no oise waiwandiniwa menan God wa agiaseni ame Devit me asigip. God Devit inap agi wan, ame Devit ani sibabasi mega da evi

amba Ayop dieta amba Devit watat mega gagap wandeta.

³¹ God dim da tapi Devit namu anun menan Iesu boe inakae sia yon wandepi oisewa manega wan, Me kaima arewa gapan ae ya veta, etua mega ya puakaeta.

³² Devit wataget wani tavewa tauen. God aro mega gapan Iesu bop gapan wat inakamen. Nu mame iravi venasen yawatoni nagirewa ame oisewa waivin.

³³ Iesu kiman dot aeni endi mame God mainewa nutup gapan wandia. Mamewa Guewa Posewa Woup Seniwa otua Iesu wa agiaseni gapan wanen. Amba Iesu Guewa ame aoma wagemen, endi ma me di yawaton anuivin.

³⁴⁻³⁵ Devit kiman ya dot aen go Iesu menan anega wan, Ayop Mamewa God, me Ayop inap anega wan, 'Mainena nutup gapan wanigingan, ne anavi gega iravi tambumop gauaragap semopena menan.'

Devit ap anega wan.

³⁶ God nop mame wani iwa mega ame at Isurero nagirewa iragi tavewa ma anu kakayasepen menan. Tavewa mame di, apan Iesu, e oma korosi gapan tograyana, ame God Ayop nuga dien amba God om enuni apanewa Keriso den dien," Pita ap anega wan.

³⁷ Wam ame Pita wani anune, koewa muga menan bumagamu tuk tak wan amba Pita ge Iesu watu enamot mega upinewa den singui tayawamon, "Orup ma, nu anenen tait?"

³⁸ Pita gare anega wadiamon, "E iragi daiton daiton inat waniet ega gapan imuya entan tane amba Iesu yaua gapan dup iai, God koewa ega anu ae veapen menan. Ame gapan Guewa Posewa Woup Seniwa warai, ame God garaet megawa.

³⁹ God agi mame enen, ge otu waiawa munan den, amba den waenapan wandapewa munan. Ap me Ayop God waenapan munan wapiwa me munan tata."

⁴⁰ Pita tagigiramu nop arugataet wan, amba me anega sia wan, "Endi piup gapan waenapan koewa taine bararaen ap menan inak ega kwayupe ek di tan."

41 Ap menan, Pita wani nopolwa anun warane nagirewa dup iane ameme paua mugawa wam ame arugataet 3000 mini tauen.

Anu tumat taine nagirewa wanumot mugawa

42 Anu tumat taine nagirewa wam wam Ierusalem gapan uat enan Iesu watu enamonii nagire nop oit waiwanumune anuiwanumun, den nop oit gare gare wawa mutan, buredi paise paise tan ian sean naiwanumun, amba den iragi iamen mup wariwanumun.

43 Waenapan iragi Iesu watu enamot mega yo ugup ugup taiwanumune yawiwanumune menan imu pose yon warden.

44 Iesu anu tumasine nagire iragi daiton to iamen wan dim dim muga yan aiman sean gare gare ise wan ase wan taiwanumun.

45 Den at piup ge wan dim dim muga yon boranewa iragi une tan moni waran pura puse uoni nagire munan.

46 Wam wam God Paewa Ierusalem gapan iame wanumen amba pa muga gapan buredi paise paise tan naiwanumun. Taba atonu den naiwanumun amba daiton da goandage ya anun.

47 Ap menan, mu God wa atonasiwanumun. Ap gapan waenapan upine imumu wareni menan mu iragi baigan gapan wanumone. Ap menan wam wam God inak ewakewa munat anuni nagirewa aigap aigap intum tamuiwanumun.

3

Pita apan pusi waberugaseni wat inakanmen

1 Wam da mup wapen wamewa, wam airase yampoa, wareni gapan Pita ge Dion God Paewa Ierusalem amon.

2 God Paewa, sin panane tonane da, yaua Tonan Yawat Kakaewa diane. Tonan ame gapan apan da pusi waberugasen dai tanen, inewa potap yaneni boge wande en. Wam wam wat amon tonana ap mepe bariwanumune warden. Iwa waenapan da da God Paewa unuk onam wanumune gapan, inamup moni mu dagin dagin waiwandapen menan.

3 Wandeni Pita ge Dion unuk amuiwanumune yawamo, dim da da wanapen men mua dagin dagin da inamup wan.

4 Mu vek apene ame kem kem asenagaet yawane amba Pita anega dien, “Ae ma yawan.”

5 Vek apene ao yawamo anega anuni, ma moni da nenapen taiwanum.

6 Go Pita anega dien, “Endi ne moni da inanap uon, go endi dim da inanapewa, ap me genain, Iesu Keriso Nasaret apanewa yaua gapan diagiangin, ao yona ap ak!”

7 Amba Pita me naniwa nutup ao wareni gapan me yon warden, boge apan pusi ni koniwa kakae ta aro waren.

8 Ame pusip amu yone karapun vitagen doragen ta ase ae ma on taiwandin. Boge Pita ge Dion tanam God Paewa unuk ae aton ta karapun dore God wa atonasiwandin.

9 Waenapan yawane apan ame ap ae God wa atonasiwandin yawan.

10 Ame yawane God pa sin mega Tonan Yawat Kakaewa gapan wande en moni mua waini apanewa ire yawan, yawane waenapan tap no i kap wan, iwa inak ame anenen venasen yawane menan.

Pita opata yangut nagirewa inamup wan

11 Inak wareni apanewa Pita ge Dion ase tam natam wandeni gapan waenapan aruga no i kap baita ya wane amba inamup tauan. At ame yaua Solomon sewae pue mega diane, ap mepe God Paewa gapan wanumon.

12 Pita yawamoni anega wadiamon, “At Isurero nagirewa apan ma pusiwa kakae tani menan dimen noya i kap waiwan? Dimen kem kem yawaniwanin? Apan ma ap aeni aro nuga gapan o guegue nuga tat gapan ya aewan, go nu Iesu anu tumasintoni gapan me ap aewan.

13 Omayan baewa Eibaraam, ge Aisik ge Diekap, mu God muga daiton. Ame God Iesu, God nao mega taini apanewa, yaua wabawaramen. Go e wara togurep boopen menan bawarewa nagire nanimu gwanap barayan, go Pailat wa oisep tau aet wani go e wa watanayan.

14 Daiton Iesu, me apan tamanawa, posewa woup seniwa go e waboborayan.

Amber garewa e apan koewa, waenapan guramon borit wane apanewa gwat ni-noke wandeni wat vesep tau aepen menan Pailat inap mup wayan.

¹⁵ E Inak Ibariwa apanewa togurayan boen, go God aroewa gapan wan amba Iesu sia inakae yon wanden, ame nu yawatoni oisewa mame waivin.

¹⁶ Iesu me inap anu tumasintoni gapan apan ma da e yao anuiana kakae sia tan.

¹⁷ Tatan gwanin, ne asiginap, e amba aritawa ega den, anu bambamase menan Iesu togurayan.

¹⁸ Watageta, God no oise waiwanumune nagirewa, Mesaya Iesu evi ugu vegaek bagu sisi anu tanepi oisewa namu wane, ame tavewa endi tauapen menan God wani gapan e Iesu togurayan.

¹⁹ Ap menan endi mame e vetavet tan amba God inap entanen. Ame tanewa God koewa ega ise wat museta. Ap taiwani-ampina nonan banu wara wara wamewa Ayop inap taueta.

²⁰ Amba Iesu ame God mega, enan om enuni apanewa, Keriso watu eneta.

²¹ Iesu endi kimani wandia, God dim dim iragi ewake sia tap amba taueta. Wam ame menan God watageta no oise waiwanumune potamu woup seni nagirewa gamumup ap agi wan.

²² Watageta apane Mosis agi ame Iesu menan anega wan,
Ayop God egawa, e yaumakayap apan da, ne umanap,
om enup, yone God no oise wata. Me dim da wadiaepi,
e ae di anun.

²³ Waenapan da da me nop mega ya anupiwa,
God waenapan mega intum den ya tain go garip borit wain.

²⁴ Tavewa di, God no oise waiwanumune nagirewa, watageta apane Samuero gapan amba me ewap ma onini nagirewa iragi, endi mame venasiwandini menan waiwanumun.

²⁵ E, oit ame waiwanumune nagire naewa mugawa. God omae baewa namu munat wa agiat mumeni endi e den wariwanin. Menan God apan Eibaraam anega wadien, 'Naewa gega wanumopi

gamumup ne waenapan at at iravi wat aipakam mumingain.'

²⁶ Ap wani menan, wam mame God nao mega apanewa, Iesu, om enun, nu Diu nagirewa inamup namu watu enen. Iwa God Iesu gamup wat aipakam imaepi gapan e koewa ega daiton daiton wat entan tapen menan." Pita ap anega wan.

4

Pita ge Dion kansoro nagirewa namumup yonan

¹ Pita ge Dion yaugai waenapan opata di wadidiamuiwanumune, ian Diu Pirisi muga ge God Paewa tonana yonine nagire bawarewa mugawa, amba Sadusi dugup nagirewa tauan.

² Pita ge Dion Iesu ao yon wandeni oisewa ge borit wane nagirewa sia yon wanumopi oisewa waenapan wadidiamon. Diu pirisi muga ap anune menan, notatae wane. Ap menan Pita ge Dion tambumon.

³ Mu gwat noke enamon iwa mum taueni menan. Woup sepi amba singui tayawamopen.

⁴ Go waenapan aruga Pita ge Dion God oise waiwanumune anune ame imumu waren anu tumat tane. Ap menan wam ame gapan apan mugenataet anu tumat tan intum tane arugataet (5,000 mini) wanumon.

⁵ Inane woup seni Diu bawarewa mugawa, iup wadiamuine nagirewa den amba dima waine nagire iragi Ierusalem gapan iamen.

⁶ Pirisi aritawa muga Anas amba Kypass, Dion, Aleksanda amba Anas dugup mega upi den at daiton iamen nop bari-men.

⁷ Amba Pita ge Dion wane namumup yonane amba singui wayawamon, "E ma dim da taiwanin? E aro amun da yaua gapan warayan taiwanin?" Diu bawarewa muga ap anega waiwanumune.

⁸ God Guewa Pita potap no dotouen, aro waneni gapan nop garewa anega wadiamon, "Waenapan amase yonayana ge ayop nagirewa,

⁹ endi singui arita mame wayana inak kakae mame yawayan vek apane inakaeni menan.

¹⁰ Ap menan e, amba ian Isurero nagirewa iragi mame anun, apan pusi waberugaseni endi kakae tan yoniwandin iwa mega mame, Iesu Keriso Nasaret apane e togurayana go God wani gapan me sia ao yon wanden.

¹¹ Iesu me gwat umap. E pa gwat gapan tuiana nagirewa, gwat ame bontait dia aipa uarean, menan Iesu tandayasean. Go God sia ware baraen, pa mega aigap tuiwan ap menan pa sewa amit iragenawa Iesu me di.

¹² Inak tana tana neginewa ambagan da uon di, iwa piup ma gapan, kiman gauarap apan daiton megenat God nuneni me yaua gapan nu inak warait. Apan ame Iesu di.” Pita ap anega wan.

¹³ Mu Pita ge Dion kaimakaet tumban amu yonan waiwanumune yawamon, amba anu awane, mu anut arita uoni nagirewa menan mu tarage wane. Amba mu Iesu den iniwanumune anun.

¹⁴ Go koni ame gapan apan wat inakmene Pita ge Dion tanamo yoneni yawan menan nop da wawa uon tamon.

¹⁵ Menan kansoro nagirewa wa oimone tau pa garip amon amba mugenat wawa mutan, anega waiwanumune,

¹⁶ “Nu apan ma inamup dim da tait? Waenapan iragi pa Ierusalem gapan ininewa yo paua mame tane mu asigimup amba nu ya waboboramoit.

¹⁷ Go oitamu seset ya wa aepen menan Iesu oisewa noa sia ya wapen diamoit.”

¹⁸ Boge mu venamu wane pa gwanap sia onamot wane tauane amba Iesu oisewa sia ya wapen, waenapan sia ya wadidi-amopen menan kaimakaet diamon.

¹⁹ Go Pita ge Dion nop gare anega wane, “Nop seyao wareyao ek inga ingane ta yawan God yamap ansena kakae, God nop mega warait go nop ega warait?”

²⁰ Ap menan nu dim da yao anutoni gapan di wait.”

²¹ Kansoro nagirewa nop mame menan tut om tane menan mu wa oimone amon. Mu itan munat anune go waenapan tamu anune menan ya munan iwa Pita ge Dion

yo ma tane menan waenapan God wa atonasiwanumun.

²² Pusi waberugaseni apanewa wat inakameni me orup otu uon, go en mega apane dere (40) upi aigap den.

Anu tumat nagire muc tanewa

²³ Wa oimone ewap Pita ge Dion ewagai entan amon evene wai inamup tauan. Amba pirisi nagirewa ge waenapan dimae waine nagirewa nop iragi inamup wane ame oisewa wadidiamon.

²⁴ Oit ame anune imumu daiton gapan God inap mup anega wan, “Ayop nuga iragenawa, piup, kiman, puiman amba wan dim dim iragi nu den waan ta venat nitaton.

²⁵ Ge watageta Guaga Woup Seniwa gapan nu omayan bae Devit no utap taueni manega wan,

Iwa dim men Diu uoni ian ugup na-girewa,

ugu gangan taiwanum?

Amba Diu nagirewa God dim da tat anuni, wa koeragamepen taiwanum, go umap uon.

²⁶ God om enuni apanewa Keriso dere anut muga toborapen,

menan piup ayopewa waenapan muga bongamiwanum,

bawarewa nagirewa iam iam taiwanum.

²⁷ Ame watageta apanewa Devit wani tavewa tauen iwa Erot ge Pontias Pailat dere at ugup nagirewa amba Diu na-girewa at ma Ierusalem gapan iamen wanumune amba nao gega taiwandini posewa woup seni, om enuni apanewa, Iesu to boniga baraet anun noa karaua panane.

²⁸ Go ge dim da ta venaset namu anuana amba wam om enuana ame gapan mu di tane.

²⁹ Ayop nuga God, endi guranepen menan sia taiwanum ge yawam. Menan nao gega taintoni nagirewa kaimakaet tumban amu yonat nop gega epara ta wadidiamopen menan aro nun.

³⁰ Yo paua ugup ugup ta, inak munapen menan naniga endimat, nao gega taini posewa woup seni apanewa Iesu yaua gamup.”

³¹ Mu mup tane ewap mu ambagan to iamen wanumone paewa nutanut enun. Amba mu iragi Guewa Woup Seniwa potamup no dotou mumeni gapan God nop mega epara ta waiwanum.

Kwan puraput muga yan aiman gare gare sean tambumon

³²⁻³³ Ame gapan, Iesu watu enamot mega aro amun aigap iragena waran Ayop Iesu bop gapan yon wandeni oisewa wa kakayasen wa nau amuiwanumun. God baware iragen garaet ta warit mumi-wandin. God wat aipakam mega aigamup viseni amba Iesu anu tumasine nagire iragi imu pose wat entanen daiton tan. Menan ao yonan puraput tap muga gauda ya wane, go iragi tobob tan danami-wanum.

³⁴ Menan orup da puraput menan ya wat ire taiwandin. Wam ame gapan, at piup aigapewa, pa gwanapewa ame iragi une tan moni tam tauane

³⁵ amba Iesu watu enamot mega munane. Ame boge tambun yan aiman ase ma Sean Iesu anu tumasine ame purapuse uoni nagire muniwanumun.

³⁶ Ap taiwanumune, apan Diosep, dugup mega Livai, at Saiparas gapan yaneni apanewa tauen. Iesu watu enamot mega nagirewa me yaua dawa Banabas wainewa (Banabas gueguewa ame dadak apanewa otua).

³⁷ Me piup mega une ta amba moni iravi ware one Iesu watu enamot mega nagirewa munen.

5

Ananayas ge Sapira

¹ Wam ame gapan, apan yaua Ananayas waenewa Sapira den, memewa piup muga da ase une tane garewa warane.

² Go memewa piup garewa agim make wareni semua otu da karaua ae tam nasen. Waenewa anuni umap den wan, amba semu upine tam ae Iesu watu enamot mega mūnen.

³ Ap menan Pita yone anega dien, "Ananayas, ge dimen Seitan arok wanaan taue potagap unugen amba God Guewa Woup Seniwa inap ebo waan, at piup

une ta garewa waraana agim make upine dimen karaua ae wat nataan?

⁴ Piup ame wataget gega di wande en amba ase une taan. Ame une taana ewap agim make ame gega bondan di baraean wande en. Menan dim da anen tagen amba koe koe mame anu taan? Ame waenapan inap ebo ya waan go ame God inap ebo ewasean."

⁵ Apan Ananayas nop ame anuni boge beure geare ae boen. Apan ame boeni no oise iragi waenapan bunao mumen anune tap anun.

⁶ Amba apan tamaru upi ma tauan epiwa eragi gapan wa panamen, iri turu uon, wat amon urata tun.

⁷ Wam airase yampaia uon tani ewap, Ananayas waenewa taueni, pa gwane use unugen. Memewa boeni me oare.

⁸ Menan, Pita waen ame singui tan, "Wadianek ge memaga dere piup ega ase une tayana garewa iragi mame di?" Waen Sapira gare wan, "E, om mega iragi ap me di."

⁹ Ap menan Pita anega sia dien, "Iwa dimen memaga dere wawa itayan amba God Guewa ire yawapen tayan? Endi ita yao, apan memaga tune nagire tonana yoniwanumun. Endi ge sia wat nauge amooin."

¹⁰ Pita nop ap anega wani boge waen ame namup beure geare ae boen. Boge apan tonana yoniwanumune ma tauan waen boniga yawan, boge waran tau amon memewa tune mainap tun.

¹¹ Nop oit ame aeni, Iesu anu tumasine nagirewa ge waenapan upine den anune tap gop den anun. Iwa inak arita ame venaseni menan.

Anu tumat nagire tat mugawa

¹² Iesu watu enamot megawa waenapan yaumakamup kiman yo ge paua megawa ugup ugup taiwanumun. Iesu dugup mega nagirewa iragi God Paewa gwanap apan Solomon sewae pue mega gapan ap mepe tauga tanatan tan tobob tan iam wanumun.

¹³⁻¹⁴ Ame gapan waen ge apan arugataet anu tumat tane, menan Iesu dugup mega nagirewa intum tane paua mega taue

aigap aen. Amba ya anu tumasine nagirewa Iesu dugup mega wa atonat muman go tap tan intum ya tamon.

¹⁵ Iesu watu enamot mega nagirewa kakaevet taiwanumune menan vek nagirewa pa pa gapan tambumon eragi gagap semone wanumon. Iwa mu Pita mainamup tau aepi Pita gungun mega upi vek nagirewa aigamup tau aep inak mutat anun.

¹⁶ Menan sewa iragi pa Ierusalem ikukuk wanumone nagirewa vek nagire mugawa amba airampu wa guguramoni nagirewa tam onamone, iravi inak mutane.

Watu enamot wa koeragam muman

¹⁷ Amba pirisi bawarewa ayop mugawa, me evene wai Sadusi nagirewa den, Iesu watu enamot mega inamup ugu gan gan koevet tan iwa waenapan aruga Iesu watu enamot mega nagirewa munan anuiwanumun. Ap menan mu wa koeragam mumapen menan anun.

¹⁸ Ame gapan mu watu enamot nagirewa panamon tambun amon gwat noke gapan semon.

¹⁹ Go mum ame gapan Ayop God anea mega taue gwat noke tonanewa watape amba naumo ae anega diamon,

²⁰ "Aisen, God Paewa gwanap inak ewakewa mame oisewa waenapan iragi wadidiamon."

²¹ Ap menan woup seni gapan, anea wani no utap mu God Paewa gwanap yonan inak ewakewa oisewa wadidiamon.

Amba pirisi bawarewa ayop mugawa, me evene wai den yonan Diu kansoro nagirewa dimae waine nagirewa den iravi munan wan tauan iamen. Ame gapan mu Iesu watu enamot mega nagirewa gwat ninoke gapan upam onamot wan.

²² God Paewa tonan amase taine nagirewa amon gwat noke tauane go Iesu watu enamot mega gwanap da uon menan entan amone bawarewa muga inamup tauane amba oit manega wadiamone,

²³ "Nu gwat ninoke tauatoni tonan iragi gitnak mumane amba God Paewa tonan amase taine nagirewa tonan noa gapan gapan yoniwanumun. Nu tonan watapetoni apan upi gwanap uon."

²⁴ Oit mame anune gapan, God Paewa amase taine nagire, bawarewa mugawa ge pirisi bawarewa mugawa anu bambamasen, imumu upase anun ma anenen tau amon.

²⁵ Imumu upan sean anuiwanumune gapan, apan da taue anega wan, "Yao! apan ame e tambumo gwat noke semoyana mu endi God Paewa gwanap opata gapan waenapan wadidiam wanum."

²⁶ Ame gapan, God Paewa tonan amase taine bawarewa mugawa amba God Paewa tonan amase taine nagirewa upi den, amo Iesu watu enamot mega upam onamon. Mu ya guramone go mondi naumo onamone iwa waenapan God Paewa tonan amase taine nagirewa gwara guramopi tawa menan.

²⁷ Naumo onamone iam iam paewa gwanap kansoro nagirewa namup yonat diamon. Amba pirisi bawarewa ayop mugawa singui tayawamon,

²⁸ "Nu nop kaimakaet diaetoni, e opata gapan Iesu oisewa da sia ya waiwanianampen. Go yawan, endi e nop oit ega pa Ierusalem gaset senare tau aen ame nu Iesu deniwa garewa yao nao aninat waiwanin."

²⁹ Pita, Iesu watu enamot mega upi tanamo gare anega wadiamon, "Nu God noa di anu warait go apan noa ya anu warait.

³⁰ E oma korosi gapan Iesu togurayan boen. Go nu, omayan baewa den, God nugawa daiton, wani gapan Iesu inakae sia yon wanden.

³¹ Amba God wani gapan Iesu kiman dot aen aro amun wanupe ware God mainewa nutup gapan wandia. Me ap tani iwa mega ame nu Isurero nagirewa koewa nuga ae ve imunu entanet me koewa nuga ame anu ae vepen menan. Me Ayop nugawa, wat inakam nimanini apanewa.

³² Nu wan dim dim mame yavintoni amba oisewa waintoni nagirewa go nugenat uon, God Guewa Woup Seniwa den waiwan. God ayamase taine nagirewa yan aiman muga ame Guewa Woup Seniwa munen."

³³ Kansoro nagirewa nop mame anune, garimu di ganganean gure boniga semot

anun.

³⁴ Go Parisi apan da yaua Gamelio, Parisi iup muga wadidiamuini apanewa, waenapan iravi me ayamase tainewa, kansoro gapan yoneni ame, Iesu watu enamot mega nagire wam konintu mini pa garip amot wan.

³⁵ Mu garip amone. Amba Gamelio kansoro nagirewa anega wadiamon, “Isurero apane waiwa, neman guran e namu anu kakayesen, amba apan ma inamup taiwanian.

³⁶ Iwa e anuyan, en namua apan da yaua Tiudas taueni anega wan, ‘Ne apan bawarewa da,’ menan apan 400 intum tan ewap amon. Go waenapan, apan ame tone boen evene wai tap punanan wat amon, anu tumat mega uon tan.

³⁷ Wam ap me ewap, apan dawa yaua Diudes, at Galili apanewa, waenapan paua muga batnak mumapen wamewa yonen. Me den waenapan upam aen go me tone boen evene wai iragi tap punanan wat amon.

³⁸ Ap menan, ne manega wadiaivin, apan mame ae di vemon, watu enamone amop! Iwa muk imua gapan muk taiwanumampina ame uon tata.

³⁹ Go God aro muneni gapan taiwanumampinawa, e ya di watanamoi, iwa e God inap anan tat wayan taiwanin, ame gapan iravi wakaumai.”

Gamelio nop wani kansoro nagirewa anu waran.

⁴⁰ Mu Iesu watu enamot mega nagirewa venamu wane sia onamon tauane amba wagu gan guramon. Iesu oisewa sia ya waiwanumampen menan tantanewa diamon amba watu enamone amon.

⁴¹ Iesu watu enamot mega Kansoro ae vemone amone gapan, mu aton aigap anune iwa God kakae diamoni menan amba Iesu menan umam anune, ame kakae di.

⁴² Amba wam wam pot pot God Paewa gwanap amba waenapan pa muga muga gapan oise kakaewa, Iesu me God om enuni apanewa Keriso di, ap anega wadidiam wanum.

6

Apan nani yamunaet nani yamu dere om enumon

¹ Wam ame ewap, Iesu anu tumat nagirewa aruga taiwanumune gapan wam wam agim make yan sean kayakayawan taine nagirewa ago muniwanumun. Diu ame Gurik noa waine nagirewa kwapura mugawa agim make ame ya muniwanumune menan Diu ame Iburu noa waine nagirewa inamup gunat anu wane.

² Iesu watu enamot megawa aonagaet pusinawan dere, anu tumat nagirewa munan wan tauane, amba anega diamon, “Nu God nop oit mega ae veat amba tabage moni megenat yan ta aneta ame koerage.

³ Ap menan, tatan gwanin, e yau-makayap apan nani yamunaet nani yamu dere om enumon. Mu da da anut aigap asik tane amba waenapan yamamup inat wanumot muga kakae iragen ge God Guewa gapan dima mega potamup no dotoueni nagirewa om enumon. Nu wat entan tamot nao ma intanewa taue mu onemup aep.

⁴ Ame gapan, nu Iesu watu enamot mega nagirewa God nao mega ya wakau-mait, go wam wam God inap mup wainampen, amba nop mega opata gapan wadidiamopen taivinait.”

⁵ Waenapan nop muga ame anune gapan, iragi atonu den umap wane. Ap menan mu Sitiven, me anu tumat kaimakaet taini apanewa amba God Guewa aro waneni gapan God nave taini apane om enun. Amba upine sia Pilip ge Porokoras ge Naikano ge Timon ge Pamemas amba Nikolas, at Antiock apanewa, me Diu apanewa uon go Diu gueguewa taini apanewa, om enumone.

⁶ Iesu watu enamot megawa aonagaet pusinawan dere, mup wan, nanimu iamup semon, wat aipakam mumane.

⁷ Ap menan God nop mega senare tau aen. Ap mepe, pa Ierusalem gapan anu tumat nagirewa paua muga menawaet ao doren, amba Diu pirisi mugawa arugataet Iesu anu tumasen.

Waenapan ugu gangan den Sitiven waran

⁸ God Sitiven aro wane garaet wat aipakameni gapan waenapan yau-makamup yo paua ugup ugup wa tai-wandin.

⁹ Go Diu waenapan upi watanan. Waenapan ame Diu opata waine paewa yaua Vetamone Nagirewa, at Sairini ge Aleksandria gapan tauane nagirewa. Mu ge Diu nagirewa Silisia ge Eisia gapan tauane, Sitiven den notatae waiwanumun.

¹⁰ Go God Guewa Sitiven anut baware waneni menan gare da ya wane.

¹¹ Ap menan Diu nagirewa ame apan upi aopan wapen menan karau wadi-mone. Amba mu aopan waenapan in-amup anega wan, "Sitiven mame, apan Mosis ge God dere wa koeragam mume wan, anuton."

¹² Ap me gapan mu pa nagirewa, dima waine nagirewa ge iup waddidiamuine nagirewa anan menan datnak muman. Ap menan waenapan ame Sitiven warup oit-tan waran tauan, Diu kansoro nagirewa iam iam muga taiwanumune gapan na-mumup yonen.

¹³ Amba ebo aopan imup waine nagirewa tauane anega wan, "Apan mame God Paewa ge Mosis iup namua seni den pot pot wa koeamiwan.

¹⁴ Nu me manega wan anuton, apan Iesu at Nasaret apanewa God Paewa mame wabenageta amba Mosis gutut nuneni gapan inintoniwa ame wat entaneta, anega wan."

¹⁵ Iam iam ame gapan wanumone nagirewa iragi Sitiven kem kem yaviwanumune, ambu mu yawane me gine namu anea mini ganase den wan.

7

Sitiven opata wan

¹ Pirisi bawarewa, ayop mugawa Sitiven singui wayaven, "Oitaga wane anutoni ame tavewa di go?"

² Sitiven gare wan, "Maman wainawa, tatan gwanin, neman guran nop wapena anun! Nu omayan baewa Eibaraam at Eran ya aeni namup, at Mesopotemia gapan iniwandini, God oya oya mega ganase denawa me inap venasen.

³ God anega dien, 'Piup ge waenapan gega ae vemo ak, agingapina amba piup ame ne to ewagepena ap mepe ak.'

⁴ Ap menan me at mega Kadea ae ve amba at Eran taue tabara to ap mepe botakae wande en. Eibaraam Mamewa boeni ewap God at ame gapan wat nau one piup mame endi initoniwa arewa Isurero tauen.

⁵ Go God wam ame gapan Eibaraam piup mame semu otu da ya di wanen. Go God Eibaraam wa agiaseni tavewa ame Eibaraam ani sibabasi mega munapen menan at piup mame mu evi amba yon borain. Go wam ame gapan Eibaraam orup da ya baraen.

⁶ God anega dien, 'Ge ani sibabasie gega at ugupe gapan en 400 wanumoin, piup muk mugawa uon. At i nagirewa gauaramup nao kaimakaet garewa uoni tap gapan wa koeragam mumain.'

⁷ Go piup ame i nagirewa ne wanene tamoin, evi amba ani sibabasi gega ae ve tau onamo at ma gapan wa taragat nimanegain.'

⁸ Boge God mu God muga wandepen amba kwayup tamopen menan Eibaraam orup apan etua tum tapen paua wanen. Waneni Eibaraam otua Aisik yaneni pura daiton uon tani ewap etua tum tan. Evi amba Aisik otua Diekap etua tum tan. Amba Diekap me otu waiwa aonagaet pusinawan dere, nu omayan baewa i nagirewa, etumu tum tan."

Omayan baewa guturewa

⁹ Sitiven opata aigap sia wan, "Omayan baewa daiton ame Diosep. Diosep inap tase gwani anu koeamen. Ap menan mu Diosep waran Idip nagirewa agim make uoni navewa kaimakaet tapen menan in-amup ase une tane. Go God Diosep inap den wanden.

¹⁰ Itan bagu sisi mega iragi arugataet go God kwayup mega gapan me ta aiwandin. Wam ame gapan God Diosep wat agoase anut waneni menan, at Idip, ayop mugawa Pero, Diosep inak mega yave aton tan. Ap menan Pero at Idip ge pa mega aruga, iravi Diosep kwayup tapen menan dien.

¹¹ Wam ame evip, wankakao baware da at Idip ge Keina taueni gapan waenapan bagu sisi arita anun. Nu omayan baewa taba yoa at muga Keina gapan tane go ya tanan.

¹² Ap gapan apan Diekap taba at Idip gapan wandeni oisewa anun. Ap menan me otu waiwa ame, nu omayan baewa i nagirewa, daio muga erekwa at Idip watu enamon.

¹³ Mu daio muga derewa gapan, Diosep tase waiwa irewa ya yawane menan anega diamon, ‘Ne gwania di.’ Boge Pero Diosep dugup mega gutut muga anun.

¹⁴ Menan, Diosep sep mega mamewa Diekap inap watu enen. Diekap ge dugup mega waenapan iragi 75 nagirewa me inap onamot wan.

¹⁵ Ap menan Diekap otu wai den at Idip ora amone amba ap mepe borit wane.

¹⁶ Go evi amba, waenapan mu kaimamu tam at Keina onamon amba at muga pa Sekem gapan tumon. Namu apan Eibaraam at Emo nagirewa piup muga ame une tani gapan waenewa ap mepe tun. Menan omae bae kaimamu at ap mepe den tumon.” Sitiven ap anega wan.

Mosis wam megawa

¹⁷ Sitiven sia anega wan, “God Eibaraam wa agiaseni tavewa konintu tauapen taiwandin menan, waenapan nugawa at Idip gapan yanane senare tau aen.

¹⁸ Ayop Pero ewakewa da, at Idip gapan yoneni go nu omayan baewa Diosep namu dim da Idip gapan tani guturewa me oare.

¹⁹ Menan ebo aopan gapan waenapan nugawa, Isurero nagirewa, wa koeragam mumen. Me iup kaemakaet baraeni ame, Isurero orup da yanepi kwayup ya tapen go pa garip sep borit wain. Iup ame gapan me Isurero nagirewa wa koeragam mümen.

²⁰ Wam ame gapan orup Mosis yanen, God yamap me orup kakae da, mondi-gawa da uon. Orup Mosis yaneni gapan siragam yampo me pa gapan kwayup tane.

²¹ Wandeni amba iup dena menan garip baraene go ya bop tan iwa Pero orewa orup Mosis ware megawa di wa wat aen.

²² Menan Mosis, kai ware baware tani gapan at Idip dima muga iragi anuitamen amba nop mega waiwandini, amunu den.

²³ Mosis en mega apane dere wandeni gapan me dugup mega Isurero nagirewa munan anuni menan inat wanumot muga anenen yawapen menan inamup aen.

²⁴ Inamup taueni, Idip apane da, Isurero orup da to koeragameni yaven. Mosis, Isurero apan ame aigavene ae Idip apan ame ton boen.

²⁵ Mosis imua anuni, waenapan mega naumo at Idip ae ve amopen menan God me om enun, ap anega anun, go Isurero nagirewa ap anega ya anune.

²⁶ Inane woup sen, Mosis Isurero nagirewa inamup sia aeni gapan, Isurero apan dere anan wariwanumune inamup tauen. Me wa totomak mumapen ta anega diamon, ‘Apan negawa, e tatap gwaniip, iwa dimen ek ingane anan wariwanin?’

²⁷ Go evene ta koeragameni apane dawa Mosis in pakisen asira aen amba anega dien, ‘Da bawarewa nuga tat diagen amba wanene inanup taingi?

²⁸ Idip apanewa wata toguraan boeni mini endi ge toguraneggepen taingi?’

²⁹ Nop ame anuni menan Mosis tap at Midian ora aen amba ap mepe botakae warden, amba waen naiseni, orup apan dere sen.

³⁰ En apane dere tau aeni ewap, Mosis at kaimewa tunup Sainai mainap pua warden. Ap mepe anea da Mosis inap taueni, pua oma merave den yagirini mini venasen yaven.

³¹ Mosis oma yagit wandini arewa yaveni, me imua upese anun. Ame konintu yao kakayaset anu dotou aiwandini me Ayop God noa anega wani anun,

³² ‘Omayak baewa Eibaraam ge Aisik ge Diekap God muga daiton ne me di.’ Mosis nop ame anuni tap kaime doren yame agümen.

³³ Amba God sia wan, ‘Pusik okomu upa amena ae se, piup ame gagap yoningiana ame pose woup seni piupewa, ayamase ta.

³⁴ Waenapan nega at Idip gapan wanumine yawamuingina. Wa koeragam mu-miwanumune kakae uon di. Ne mu irip turup muga anun wat vetamopen menan

kimani vit ongen. Menan endi watu ena-giangin ge entane at Idip sia ak.'

³⁵ Wataget Isurero nagirewa Mosis inap garimu yaven nomu gapan tandayasen anega wane, 'Da bawarewa nuga tat di-agen amba wanene inanup taingi?' Go anea pua oma yagit wandini gamup God mek di Mosis om enun amba Isurero na-girewa ayop muga, wat vetamopen apane dien.

³⁶ Mame Mosis at Idip taueni gapan kiman paua ugup ugup tani Isurero na-girewa tam naumo aen. Me Puiman Den-denika gapan yo bawarewa da tan amba at kaimewa gapan yo ge paua taiwandini en apane dere (40) uon tan.

³⁷ Mame Mosis watagetawa Isurero na-girewa anega diamon, 'God no oise waini apane da, ne umanap, ek denip ega gapan evi amba watu eneta.'

³⁸ Mame Mosis wataget Isurero na-girewa den at kaimewa gapan wanumone. Mosis omayan baewa den wanden amba anea Tunup Sainai gapan Mosis wadi-eni gapan God inak wande bobot iupewa ware Isurero nagirewa muneni wadiam wadiam onin en nu inanup mame tauen.

³⁹ Go nu omayan baewa Mosis nop mega ayamase ya tane go Mosis tandayasen amba imu pose ewagai Idip sia entan amot anun.

⁴⁰ Mu Mosis tasewa, Eron anega diane, 'Apan Mosis mame at Idip gapan upe naune oneni me dim da me inap venaseni nu oare! Ap menan god da nanigap ta nuna ame naune aep,' ap anega diane.

⁴¹ Wam ame gapan man kao otua guewa nanimup tane. Guewa tane ame inap man garaet guran, iran yaua ao warapen baripewa tugun.

⁴² Ap tane menan God gari yavenu gapan, wam, siragam amba kiman buanae mega inamup wa taragasiwanumune me ya watanamon. God nop mega ok seane ame om inen, O Isurero nagirewa, at kaimewa gapan en apane dere (40),

man garaet gurayan iriana ame nenan uon.

⁴³ Go e god yaua Molak pa mega, man epiwa gapan tune, wa taragase kawanem ena taiwanian.

Amba God ega dawa yaua Repan me buanae mega guewa kaitayan.

Ame god dere e wa taragat mumapen menan kaitamoyanawa.

Ap menan at Babilon asewa ora watu enain.

God anega wan." Sitiven ap anega opata wan.

Watagetawa Isurero nagirewa God pa mega tun

⁴⁴ Sitiven sia anega wan, "Nu omayan bae nugawa at kaimewa gapan wanumone God pa mega man epiwa gapan tune. God Paewa ame yaua God Den Wandia dian. Pa ame tupen menan God Mosis wa ewasen yaveni omewa gapan tun.

⁴⁵ Mosis boeni amba God apan Diosua aro amun mega wanen. Diosua gamup at ugup ugup i nagirewa upe oimon amone amba Isurero nagirewa piup muga waseamone ame gapan omayan baewa God pa mega yaua God Den Wandini diane ame wat onamon. Ap mepe, en nononga wande en aiwandin eni apan Devit wamewa tauen.

⁴⁶ God Devit atonu anun menan Devit gare God inap mup anega wan, 'Apan Diekap amba nu dugup nugawa God daitonawa ame ge, pa kakaewa genan tut anuivin.'

⁴⁷ Tupen men mup wani go ya tun. Go mek otua Solomon God pa mega kakaewa ame tun.

⁴⁸ Pa tune go God Paina Iragenawa apan nanip tune paewa gapan ya ininiwa. Ap gapan watagenta God no oise waini apan da anega wan,

⁴⁹ Kiman ame watat negawa amba piup ame, ne pusina gapan amun yoninawa.

Pa dime dena nenan tui? Ne nonan banu warapena arewa, ambagan wandia?

⁵⁰ Wan dim dim mame iravi taitameni apanewa ame ne me di.

God ap anega wan."

⁵¹ Sitiven opata mega kansoro nagirewa wadiam waiwandini endi kaimakaet anega wan, "E imuya potaya gware wani nagirewa. Imuya potaya God ya waren menan nop mega ya anuiwanin.

E omae bae God Guewa Woup Seniwa tandayasene ap umap e tandayasiwanin.

⁵² Watageta, e omayaе bae God noa waiwanumune apane iravi wa koeragam muman. God no oise waine nagirewa God nao taini apanewa Iesu tauapen oisewa waiwanumune go mu guramone borit wane. Me mame di tauen go e Iesu omine wayan boge toyen boen.

⁵³ E anea gamup God iup mega wariana nagirewa go iup ame ayamase ya di anuyan taiwanin." Sitiven ap anega wan.

Sitiven agima tone boen

⁵⁴ Kansoro nagirewa Sitiven opata mega anune gapan ugumu gangan naen, amba anan menan no kwapi arane.

⁵⁵ Go God Guewa Woup Seniwa Sitiven potap wande aro waneni gapan kiman ao yave God kakae guragut mega ganasewa God mainewa nutup gapan Iesu yoniwandin yaven.

⁵⁶ Men anega wan, "Yawan, kiman watapen yavivin. Kimani viseni apanewa God mainewa nutup gapan yoniwan!"

⁵⁷ Sitiven ap anega wani Diu nagirewa nop vero vero wane darinamu waboboran dagimen set tat wa tau amon Sitiven waran.

⁵⁸ Okokok warupan tau amon pa sewa garip aipa uarenan gwara ton. Gwara toowanumune nagirewa wanup muga aigapewa totnagen iraga yaoyao menan apan tamari Sol pusip seane.

⁵⁹ Gwara toowanumune Sitiven God inap mup anega wan, "Ayop nega Iesu, guana wat."

⁶⁰ Wani omanip enu nop uma sia anega wan, "Ayop negawa, koewa muga anu ae ve." Wani boge ae beure geare bop tan.

8

¹⁻² Sol waenapan tone boen ase yave anega wan, "Umap." God menan pot pot anun taiwanumune apane wai upi irip turup bawarevet wan amba Sitiven etua tun.

Sol Iesu dugup mega nagirewa wa koeragam mumen

Wam ame Ierusalem gapan wa koeragam aritavet da Iesu dugup mega nagirewa inamup tane. Ap menan, Iesu dugup mega nagirewa iravi punanan waran at Diudia ge at Sameria amon go Iesu watu enamot mega aonagaet pusinawan dere mugenat Ierusalem gapan wanumon.

³ Apan Sol den Iesu dugup mega nagirewa gut okonak mumiwandini. Pa pa iragi tau ge tau ae waenapan upe okonage ae gwat nokap semuiwandin.

Pilip at Sameria gapan wadidiamuwindin

⁴ Iesu anu tumasine nagirewa da da punanan wat amone nagirewa at at Iesu oisewa wadidiam wanumun.

⁵ Ap gapan den, Pilip at Sameria gapan pa bawarewa ame vit ae Keriso oise wadidiam wandin.

⁶ Pilip nop amunu den ge yo ugup ugup taiwandini menan waenapan keam ton yaviwanumun.

⁷ Yo ame taiwandin gapan airampu no yani den waenapan potap tap tau amuiwanumun, ge pusi gegerawa amba etumu gwade waniwa inak waran ap amon.

⁸ Ap menan at Sameria gapan inak ame yawane waenapan ni gwane ao tan aton tane.

Kayao banao apane Iesu anu tumasen

⁹ Wam ame gapan, at Sameria gapan, apan da yaua Saimon, banao pa sewa ame gwanap taiwandin. At Sameria nagirewa yawan seke tan no i kap waiwanumun. Saimon mek ingane yaua wabawarame aritawa apane da wa taiwandin.

¹⁰ Waenapan iragi aigapewa ge gauarapewa nagirewa nop mega neman guran anune anega wane, "Apan Saimon mam, nu God nugawa, yaua Aro Aigap Iragenawa, kimani aoma viseni apanewa mame di."

¹¹ Me wam wam nuat mega taiwandini menan waenapan nomu i kap wan tarage waiwanumune amba me ewap di amuiwanumun.

¹² Pilip tauue God toemu mega oisewa kakawera amba Iesu guturewa den wadidiamon. Nop ame waenapan anu tumasene gapan mu dup iamom.

¹³ Saimon mek ingane den Iesu anu tumat ta dup ien. Pilip ap aiwandini Saimon den tane aiwandin iwa Pilip yo kimani paua baware ugup ugup taiwandini Saimon yave no kap wan.

¹⁴ Wam ame at Sameria nagirewa God noa anu warane oisewa Iesu watu enamot mega nagirewa pa Ierusalem gapan anun. Ap menan mu Iesu watu enamot megawa dere Pita ge Dion watu enamone Sameria nagirewa inamup amon.

¹⁵ Wam ame mu tauanewa, Sameria anu tumat nagirewa munan mup wane ame Guewa Woup Seniwa inamup tauep warapen menan.

¹⁶ Iwa mu Iesu anu tumat tane amba Iesu yaua gapan dup iamom go Guewa Woup Seniwa aigamup ya visen.

¹⁷ Boge Pita ge Dion nanimu iamup seane amba mu Guewa Posewa Woup Seni warane.

¹⁸ Iesu watu enamot megawa dere ap anega tane gapan God Guewa yan muneni ame apan Saimon ase yaven. Menan Saimon aro ame warapen menan garewa munat anu,

¹⁹ anega wadiamon, "Aro mame ne den nenane amba da da nanina iamup seapena mu Guewa Woup Seniwa den warain."

²⁰ Go Pita gare anega wan, "Ge evi amba moni gegawa den merao arewa age bogitai! Iwa ge God aro ma nuniniwa moni gapan une tat anuan!"

²¹ Ge nu den nao daitonawa da uon iwa ge inak gega God yamap ebo aopan no dotouen.

²² Ma koewa gega entan tapen anua, God inap vetavet ta, mup wa. Ayop, ge imuga koewa anuana, anu ae veta go uon, ne oare,

²³ iwa gek anu koeam tan sisiwa potagap no dotouen menan koewa panagen yavivin."

²⁴ Amba Saimon tap anu Pita ge Dion anega diamon, "Ayop inap nenan mup wa oitana koewa gat waana inanap ya tauep."

²⁵ Wam ame Pita ge Dion Ayop Iesu inak mega gapan dim dim ase yawane ame guturewa wadidiamone amba mu entanen pa Ierusalem sia amon. Mu sewa Sameria pa muga arugataet tau ge tau

amon God No Oise Kakaewa opata gapan wadiam amuiwanumun.

At Itiopia apan da Iesu anu tumasen

²⁶ Go Pilip ap mepe wandeni gapan, God anea mega da apan Pilip inap tauue anega dien, "Negin Ierusalem ae Gasa taueni, at kaimewa negin ap me ak."

²⁷ Boge me ao yone neginaet aiwandin eni at Itiopia gorowa apane da tautanen. Apan ame, at Itiopia ayop mugawa waenewa yaua Kandasi, ame moni mega kwayupe taini aritawa muga yonen. Me God inap mup wapen men Ierusalem aen.

²⁸ Aeni ame ewagai sia entan neginaet pimai mega man osi warupiwanumune ame gagap wande aiwandin. Buka da watageta apane Aisaya God nop mega ok seni ame batnak aiwandin.

²⁹ Amba God Guewa Pilip anega dien, "Age pimai gagap amoine ase mainep mainep agingan."

³⁰ Boge Pilip serarat ae osi pimai warupiwanumune ame ine taueni apan gorowa ame watageta apane Aisaya buka mega batnak wandin anun. Menan Pilip anega wayaven, "Ge ok ame batnagigiana iwa anuingi go uon?"

³¹ Itiopia apanewa gare anega wan, "Ne anenen anu awain, go orup da guegue mega wadianegepiwa, ne iwa mega anu awain." Ap wani boge, Pilip dore pimai mega gagap dere wanumopen menan wan.

³² Boge apan gorowa ame God no oise seane koni da anega batnagiwandin, Me man sip togurapen amoine mini, ge man sip otua gume ketnagiwanumune gapan, no uon wandini mini, me nop da daiton ya wan.

³³ Me inap ta koeamene umame anun, amba mu wanene eboewa gapan tane go me no uon wanden,

Me inak mega piup ma gapana uon tani menan, naewa mega da uon. Ap menan me oisewa waenapan da wadidiamui-wandata.

³⁴ Amba gorowa apante ame Pilip singui tayaven, "Endi wadianek apan Aisaya ma

da nop mega waiwan, mek menan waiwan go orup da menan waiwan?"

³⁵ Amba Pilip boge Aisaya nop mega ame uap sia wadien ge nop oit kakaewa gapan Iesu oisewa den wadien.

³⁶ Pilip ge gorowa apan ame neginaet amoин ene kaum da tauane, apan gorowa ame anega wan, "Kaum da ma yao, kaum ma gapan dup ianek ianek anenen?"

³⁷ Pilip gare wadien, "Ge imuga potaga God anu tumasewa ne dup iagain." Goroa apane gare wan, "Iesu Keriso God Otua di, ne anu tumasivin."

³⁸ Boge man osi pimai mega warupen gagap amuiwanumune wan ae yonan. Ame Pilip ge gorowa apane ap mepe ae vitan kaum amon, boge Pilip gorowa apane ame ware dup ien.

³⁹ Wam ame mu kaum ae vean amba kwatata ae ma dotothane, ame gine tutup God Guewa aroewa gapan Pilip wat oagases, menan gorowa apane Pilip da sia ya yaven go me neginaet atonu den aen.

⁴⁰ Pilip ap mepe oagaeni boge at ugupewa yaua Asidot ap mepe ase matagaen amba ap ta God No Oise Kakaewa opata gapan pa sewa sewa iragi wadiam wadiam aeni amba at Sisaria tauen.

9

Iesu apan Sol imua wat entanen

¹ Pa sewa Ierusalem gapan apan Sol Iesu anu tumasine nagirewa guramopen menan tue ene waiwandin. Me pirisi ayop mugawa ine aen.

² Aro warapen ogewa ware amba at Damaskas aepen menan mupe wan. Ok ame wapi gapan Iesu anu tumasine nagirewa, waen ge apan ap mepe wanumopi damiga panamo ai okonak pa Ierusalem ewagai entan onapen menan aen.

³ Menan Sol entane Damaskas di aiwandin eni amba pa maniwandini gapan, menawaet kiman ganasewa gamup enun, ine maine iragi ganase wan.

⁴ Kiman ganat ewa enuni Sol man osi gagap onana pia gearen nop da inap anega tauen anun, "Sol, Sol, ge dimen ta koeragam nimanegingi?"

⁵ Sol gare singui wan, "Ayop, ge da?" Amba nop ame anega sia tauen, "Ma ne Iesu ta koeragam nimanegingi.

⁶ Endi ao yon pa Damaskas ak, ap mepe apan da dim da tapen menan wadiageta."

⁷ Tanam amone apane wai yonan kiman ganasewa yawan ununke anun go mu no gwade wan. Nop wani anune go nop da wani tavewa ase ya yawan.

⁸ Sol piupa ao yone yangut tapen tani, go yamewa borasen. Evene wai nanip waran amon pa Damaskas tauan.

⁹ Sol yamewa wam yampaia boraseni wanden ap wamewa gapan kaum ge taba da ya naiwandin.

Ananayas Sol wat inakamen

¹⁰ Iesu wadiamot mega da yaua Ananayas at Damaskas gapan wande en. Bet ine gapan Ayop Iesu yaveni, amba Iesu anega wan, "Ananayas." Me gare wan, "Ne mam, Ayop negawa."

¹¹ Wani Ayop Iesu sia wadien, "Ge ao yon, negin da yaua Tamanawa ak. Apan Diudes paewa gapan Sol, at Tasas apanewa, age yop ta. Sol endi God inap mup waiwan.

¹² Me bet ine manega yaven, apan Ananayas ine tauep, yame boraseni watapep yangut sia tapen menan naniwa iap barae mup wan."

¹³ Ananayas Iesu nop mega anuni gare wadien, "Ayop negawa, apan Sol ame waenapan gega at Ierusalem gapan kaimakaet ta koeragam mumiwandini oisewa apan arugataet wadianegene anun."

¹⁴ Mapa Damaskas tauen pirisi bawarewa aro waneni gapan inagap anu tumat taintoni taunepen menan tauen."

¹⁵ Iesu gare Ananayas dien, "Sol nao nega arita da tapen menan ne om enun. Ap menan ge di ak. Me Diu ian ugape nagirewa amba mu ayop mugawa den amba at Isurero nagirewa oitana wadidiamota.

¹⁶ Nenan ugu vegaek bagu sisi baware anupi nek wa ewatain."

¹⁷ Menan Ananayas aeni boge apan Diudes pa mega taueni me naniwa Sol iap baraeni ap anega wan, "Sol, apan negawa, Ayop Iesu watu enanegen. At

mame ongingiana gapan, me apan negina yawaanawa daiton ameme di. Me watu enanegen menan ge yangut sia tapen amba Guewa Posewa Woup Seni potagap no dotouepen menan tauan.”

¹⁸ Wani boge meo epi yarewa mini Sol yamewa gapan tot tat wa geomone me sia yangut tan. Ao yoneni Ananayas Sol Iesu anu tumat dupewa gapan ien.

¹⁹ Sol taba nani gapan aro mega sia tauen.

Sol pa Damaskas gapan opata wan

Sol aro wareni ewap, me at Damaskas gapan wam agiap Iesu anu tumat taine nagirewa ap mepe tanamo wande en.

²⁰ Wam ame gapan me opata ere Diu opata waine paewa gwanap, anega wadiamon, “Iesu me God otua di.”

²¹ Mu da iragi me wan anunewa tarak anega wane, “Apan mame pa Ierusalem gapan Iesu anu tumasine nagirewa enu girigam mume taiwandini apanewa go? Me mapa taueni iwa mega mu tambumo ae pirisi bawarewa munep gwat noke gapan seat anu tauen go?”

²² Ap anega wane go Sol aro ta opata di waiwandin. Me opata gapan aigap di ewa-muiwandini ame Iesu me God om enuni apanewa Keriso di. Diu pa Damaskas wanumuine nagirewa nop gare wapen tane go umap uon.

Sol muma karaua tau aen

²³ Wam aruga tauue ewagai aeni ewap, Diu nagirewa Sol to boniga baraet anun menan nop panan.

²⁴ Mu Sol menan mum wam pot poraet togurapen menan pa sewa sin gapan tonana Sol menan nauase taiwanumun. Go Sol omine wane oisewa anun.

²⁵ Mum da Sol kaenat gwanap unugen damik panan amba wadiamot megawa pa sewa Damaskas sin garip kaenat ame damigewa gapan enuanane vise tau aen.

Sol Pa Ierusalem aen

²⁶ Sol pa Ierusalem aeni Iesu wadiamot mega nagirewa intum tamot anun, go mu iragi tawa tane, iwa mu Sol Iesu anu tumaseni oisewa da mu ya anu tumasene.

²⁷ Go apan da yaua Banabas, Sol ware Iesu watu enamot megawa ine nau tauen.

Taueni amba Banabas Sol gutut mega anega wadiamon, “Sol ap daio Damaskas negina aiwandini gapan Ayop Iesu ire yaveni amba Iesu me inap nop dien. Evi amba Sol pa Damaskas gapan Iesu oisewa epara ta wadidiamon.”

²⁸ Banabas ap anega wani menan Sol tanam wanden pa Ierusalem gapan ise ase momonagaet yone iwandin amba Iesu oisewa eparae den wadidiam wandin.

²⁹ Sol nop kaimakaet Diu ame Gurik noa waine nagirewa den tanamo gare gare waiwanumune, go mu togurep boet anun di taiwanumun.

³⁰ Tot wan tane oisewa Iesu anu tu-masine nagirewa anune menan mu Sol waran vit amon pa Sisaria tauan amba Sol watu enane at Tasas aen.

³¹ Wam ame gapan Iesu dugup megawa ikukuk wanumunewa at Diudia, Galili amba Sameria iragi nonup gapan wanu-men. Ap gapan Guewa Woup Seniwa aroe muneni gapan paua muga kai ware doren amba Iesu viriwa taiwanumun.

Pita pa Lida ge pa Diopa daio aen

³² Pita at da da daio tan. Wam da God waenapan mega pa Lida gapanawa inamu den daio aen.

³³ Apan da yaua Aeneas tautanen, me dai tanen eragi gagap aup parata iniwandi en mega nani yamunaet nani yamu yampo wande en.

³⁴ Pita apan ame anega dieni, “Aeneas, Iesu Keriso wat inakam gimagiwan. Ao yon eragi gega pait,” boge Aeneas menawaet ao yon wanden.

³⁵ Waenapan aru ame pa Lida ge Saron gapan wanumuinewa, inak ame yawan boge imu pose wat entanen Ayop anu tumasene.

³⁶ Pa da ame yaua Diopa ap mepe Iesu wadiamot waenewa da yaua Tabita (ian Gurik yaua muga gapan ame Dorokas di-anne) me inat wandet mega kakae iragen wanden. Me waenapan purapuse uoni ame ago tamuiniwa.

³⁷ Koni ame gapan me vek waren boen, etua bigi ton pa diri gagap tune ame aigapewa gwanap baraene wande en.

³⁸ Pa Lida ae Diopa taueni ame konintu di, nononga uon. Ap menan pa Diopa

Iesu anu tumasine nagire, Pita pa Lida gapan wandeni oise anun, menan apan dere sep watu enamon amon Pita anega diane, “Mek menawaet ao yona nunan mapa di tau.”

³⁹ Ap menan Pita oit ame anuni yone tanam di aen.

Pa ame taueni wat naun pa aigape ame gwanewa dot amon. Pa ame gwanewa un-ugen waen kwapura mugenataet tauan nau panan irip turup waiwanumune, Tabita kabani wandeni gapan en wapagin etumu okome taginam muneni ame tambun Pita ewasene.

⁴⁰ Pita waen ame wa oimon tauan garip amone, me omanip enu God inap mup wan. Boge waen boe wandeni inap entane anega wan, “Tabita ao yon wanik,” boge waen ame yame emeramen, Pita ao yaveni boge yone nip endaven.

⁴¹ Pita waen nanip ao waren yon wan-den. Pita Iesu anu tumasine nagirewa ge waen kwapura ame munan wan tauan, waen boeni ame sia inakaeni ewamon.

⁴² Pita ame tani oisewa at Diopa iragi senare tau aen amba waenapan anune boge Ayop Iesu anu tumasene.

⁴³ Pita wam agiap da pa Diopa gapan man epi getaven darakamini apante da yaua Saimon dere inane.

10

Apan Koniliyas Pita menan wan

¹ Pa Sisaria gapan ap mepe apan da yaua Koniliyas iniwandin. Me Rom ita nagirewa arita mugawa at Italia gapan.

² Me God menan pot pot anu taiwandini gapan dugup mega den God wa taragasi-wanumun. Kayakayawan nagirewa wat agoat mumiwandin amba pot pot me God inap mup waiwandin.

³ Wam da, wam airase yampoa wareni gapan me bet ine God anea mega da aroga pa unugiwandini yaven. Anea anega dien, “Koniliyas!”

⁴ Boge Koniliyas tap tan, kem kem yawi-wandini gare singui anega wan, “Ayop, dim da?”

Anea ame gare wan, “Ge mup gega waingian amba kayakayawan nagirewa wat agoat mumingiana ame God yao

anu gimagiwan ap menan ge garaet gega genapen taiwan.

⁵ Menan endi ge apan da watu enamo pa Diopa amo apan da yaua Saimon Pita wat onamop.

⁶ Me man epi getaven darakamini apante dawa yaua Saimon den wandiwan. Pa ame puiman etop tun.”

⁷ Nop ame dieni gapan anea boge ae ve aen. Koniliyas nao mega apanewa dere amba ita apanewa daiton munan wan tauan. Ita apante God menan pot pot anu taiwandini apanewa, Koniliyas inap ayamase kaimakaet di tainiwa.

⁸ Me dim dim iragi inap venaseni oisewa wadiamon amba watu enamon pa Diopa amon.

Pita bet ine yaven

⁹ Inane woup sen, wam ianupe wareni mu ap wandap amon amba pa sewa Diopa maniwanumune, ap wamewa gapan, Pita pa aigarip mup wapen dot aen.

¹⁰ Mup waiwandini enup aren nat anun. Go pa gwanap antaba ewake wat iriwanumune. Ame gapan Pita bet ine manega yaven.

¹¹ Me kiman watapen ao yaven amba yawat mega wanup baware da mini ginewa degede en memegamen aoma pi-upa visiwandini yaven.

¹² Wanup ame gwanapewa man tap gine ugup ugup, ame wariwa ge mokare den gine ugup ugup amba nenip gine ugup ugup wanumone yawamon.

¹³ Boge nop da kiman gapan anega wadien, “Pita, ao yona, gut na.”

¹⁴ Pita gare wan, “Ayop ame umap uon! Ne antaba koeragewa ian uguge nagire mugawa iup gega topaitapena tawa menan ne ya nainawa.”

¹⁵ God sia wan, “God taba dim dim da kakae diamoni ge koerage ya dia.”

¹⁶ Mame koni yampo venaseni amba wanup ame ene wabore ewagai kimani sia aen.

¹⁷ Pita bet ine yaveni ame tavewa dim da menan anu waramase wande anuan sese taiwandini newap Koniliyas watu enamoni apan yampo Saimon pa mega yoa tan, wa ewamon, fauane pa tonana yonan.

¹⁸ Mu yonane singui wan, “Daio apane yaua Saimon Pita mapa iniwan go?”

¹⁹ Pita wande bet ineni ame tavewa dim da menan anuan sese taiwandini gapan Guewa Woup Seniwa anega wadien, “Saimon, apan yampo yoga taiwanum.

²⁰ Ao yon vit ak. Mu tanam agepen menan gego ya anu iwa ne watu enamon.”

²¹ God Guewa wani menan, Pita vit ae amba apan ame anega diamon, “Yoa tiani apanewa ne mame. Iwa dimen ma onayan?”

²² Mu gare anega wan, “Ita apanewa Konilius watu enanen tauaton. Me apan kakaewa, God wa taragasiniwa amba waenapan iragi me viriwa tainewa. God anea mega da Konilius wadien menan nu ge nauge pa mega anet, amba ge nop dim da wawa me anupen menan wan.”

²³ Boge Pita apan ame upamo pa mega gwanap semon inane.

Inane woup sen, mu Pita upan den nau amon amba Iesu dugup mega nagirewa upi pa Diopa gapanawa mu den tanam amon.

Pita apan Konilius ine aen

²⁴ Wam ame amuin en inane, sia amon at Sisaria tauan. Ap mepe Konilius amba dugup mega evene wai den munan wani tauan, amase taiwanumun.

²⁵ Pita pa unuk aepen taiwandini Konilius tautane namup geare wa taragases.

²⁶ Go Pita nanip ao ware anega wan, “Ao yon, ne den apan iragen di, ne bawarewa uon.”

²⁷ Amba mu dere nop waiwanumune pa unuk amone amba Pita waenapan aruga ame to iam tan wanumone yawamon.

²⁸ Pita mu anega wadiamon, “Nu Diu gutut nuga e anuiwanin. Diu uon ian uguge nagirewa den union ya waninait, pa ega daio ya anait. Go endi waenapan da imumu koevet ya diaepen menan God ewanegen.

²⁹ Ap menan nenan wayan ne tanda ya wan boge di ongen. Go endi ne singui wayawaivin, e sepana dimen watu enamoyan?”

³⁰ Konilius gare wan, “Wam degede taue ewanup aeni gapan wan airase yampo, ma miniwa, ne pa nega gwanap mup

taingina apan da wanup mega ganase den namunap yone

³¹ amba anega wan, ‘Konilius, God mup gega anun amba kayakayawan taine nagirewa wat agoat mumingiana ame yavage anun.

³² Ap menan sep nagire ame pa Diopa watu enamo apan Saimon ame yaua dawa Pita nau onamop. Me man epi getaven darakamini apane dawa yaua Saimon ame pa mega puiman etop iniwan.’

³³ Menan ne sep gine tutut genan watu enan, amba ame ongeana kakae di. Ap menan endi nu iravi ma mepe God namup iam iam taivin amba Ayop nop wadiageni ame nu wadiane anut anuivin.”

Pita opata megawa

³⁴ Pita opata ere manega wan, “Ne endi di anu kakayasivin ame God yamap waenapan iragi gine daiton di.

³⁵ Piup at at iragi gapan waenapan da da God wa taragasepi nop mega ayamase ta amopi God waupamota.

³⁶ God oit mega Isurero nagirewa inamup watu eneni e asik tayan. Oit kakaewa ame Iesu Keriso tani menan God baigananu tani anuton. Ap menan Iesu wan dim dim iravi Ayopewa.

³⁷ At Diudia gapan dim da venaseni e anuiwanin, ame namu at Galili dup iamopen oisewa Dion opata gapan waiwandini amba

³⁸ God anenen da Iesu at Nasaret apanewa Guewa Woup Seniwa aroewa gapan uriri tan, amba Iesu yone at at iravi nao mega kaimakaet taiwandin amba da da Seitan nani gwanap wanumuine nagirewa wat inakam mumiwandin, iwa God me den inap wande en, ame iravi e anuyan.

³⁹ Iesu pa Ierusalem amba pa ugup ugup den nao taiwandin yavintoni oisewa waivin.

Amba mu oma korosi gapan tobatamen endawane boen,

⁴⁰ go wam yampa gapan God wan me inakae sia yon wanden, ame tani ewap Iesu waenapan inamup taueni yawane.

41 Waenapan iragi ya yawane, go God gaset om enunen Iesu boe sia yon wardeni ewap taba kaum den natoni nagirewa nugenat yawaton.

42 God nu Iesu oisewa kakaewa waenapan at at iragi wadiamopen dianen amba God daiton me Iesu om enuni ame kabaniwa ge borit wane nagirewa wanene tamopi oisewa God wadiamopen dianen.

43 Watagaet God no oise waiwanumune nagirewa me guturewa manega wane, da da Iesu anu tumasepiwa me gamup God koewa muga anu ae veta." Pita ap anega wan.

God Guewa Woup Seniwa ian ugape nagirewa potamup tauen

44 Pita nop opata waiwandini gapan, opata anuiwanumune nagirewa Guewa Woup Seniwa aigamup visen.

45 Pita, at Diopa gapan tanan onamone Iesu anu tumasine ian Diu nagirewa, nomu i kap wan. Iwa Guewa Woup Seniwa God garaet Diu nagirewa muneni endi ian ugape aigamup wage-meni yawane menan.

46 Amba Guewa aroewa gapan mu merimu tobayanen ian ugup ugup nop muga wane amba God wa atonasiwanumune, Diu nagirewa anun.

Menan Pita anega wan,

47 "Waenapan mam, nu umanup God Guewa potamup tauen. Ap me menan iragi kaum gapan dup iamopen menan da watanamota?"

48 Wani Iesu yaua amun mega gapan dup iamopen diamon. Dup iamone amba pa nagirewa Pita wam upi den ap mepe wanumot wane.

11

Pita mek tani oisewa wan

1 Ian ugape nagirewa God nop mega den anu tumasene oisewa Iesu watu enamot megawa amba anu tumat taine nagirewa at Diudia gapan oisewa ame anune.

2 Menan Pita Ierusalem aeni. Ap mepe epimu tum aramon anu tumat taine nagirewa Pita diguran anega wane,

3 "Ge age apan epimu tum ya aramoni nagire ame tanamo pa muga gwanap taba den naan!"

4 Pita tavewa di wan dim dim taiwan-dini venat musiwanumune ame oisewa ere anega wadiammon,

5 "Ne pa sewa Diopa gwanap mup taingina, ame gapan bet inan yawan. Ne yawana ame wan dim dim baware da wanup mini pepeta kimani en memegamene, viseni ame ginewa degede den enuanene. Visiwandin ne amba wanigena arewa gapan tauen.

6 Ne gwanewa yangut tan yawana ame man tap puawa gine ugup ugup, ame warawa ge mokare den gine ugup ugup amba nenip gine ugup ugup wanumone yawamon.

7 Kiman gapan nop da inanap taueni anega anun, 'Pita, ao yon, gut na.'

8 Ne gare anega wadian, 'Ayop, ame umap uon! Ne antaba koeragewa ian ugape nagire mugawa iup gega topait tapena tawa menan ne ya nainawa.'

9 Nop sia kimani taueni anega wan, 'God taba waenapan dim dim da kakae diamoni ge koerage ya dia.'

10 Mame koni yampo venaseni amba wanup ame ene wabore ewagai kiman sia dot aen.

11 Wanup kimani sia dot aeni gapan, apan yampoa pa sewa Sisaria gapan ne-nan watu enamone ne pa ambagan wanigena ap mepe tauane.

12 Mu Diu uon, go ian ugape nagirewa. Ne gego ya anupen menan, God Guewa anega wadianegen, 'Tap ya anu mu den di tanam ak.' Pa Diopa Iesu anu tumat nagirewa nani yamu daiton mame ne den tanam aneton. Anetoni pa sewa Sisaria tauaton amba Konilius pa mega iravi un-ugeeton.

13 Unuk anetoni, Konilius gutut mega wadianen. Anea da pa mega taueni me yaven. Anea anega wadien, 'Sep nagire ame pa Diopa watu enamo, apan Saimon ame yaua dawa Pita nau onamop.'

14 Me nop enan wa tauepi ame gamup e ge dugup egawa den iragi inak warai.'

15 Ne tauan nop ere watapan waingina gapan, Guewa Woup Seniwa nu potanup taueni ap umap Diu uon go ian ugape nagirewa potamup den tauen.

¹⁶ Ame gapan ne Iesu namu wadianeni anu awan, me anega wadianen, ‘Dion waenapan kaum gapan dup iamon, go e Guewa Woup Seniwa gapan dup iai.’

¹⁷ God yan garaet ta nuneni mini ame gine daiton ian ugupewa munen. Ne God nao mega anenen watanain, ame umap uon!” Pita ap anega wan.

¹⁸ Mu Pita gutut mega anune gapan imumu entanen amba aigap sia ya diguran go God wa atonasene anega wane, “Tavewa di, God ian ugupe nagirewa koewa muga veta veta imumu entanepen inak ewake warapen menan neginewa tun!”

Iesu dugup mega nagirewa pa Antiok gapan

¹⁹ Mu apan Sitiven togurane wamewa gapan Iesu dugup mega nagirewa ta koeragam mumon at at punanan wat amon. Amone upi at Ponisia, Saiparas, amba pa Antiok den tauan Iesu oisewa Diu nagirewa mugenat wadiam wanumun, ian ugupe nagire den ya wadiam wanumune.

²⁰ Go upi at Saiparas ge at Sairini Iesu anu tumasine nagirewa punanan wat amone pa Antiok tauan Ayop nuga Iesu Keriso oisewa Diu uon go ugupe nagirewa den wadiiamon.

²¹ God aro mega muneni gapan waenapan aruga nop muga anu tumasen, Ayop nuga Iesu inap imumu entanen.

²² Pa Antiok nagirewa imumu entanene oisewa Iesu dugup mega pa Ierusalem nagire anune menan apan Banabas mu inamup watu enane.

²³ Pa Antiok taueni, God waenapan wat aipakam mumiwandin yaveni menan aton anun. Amba Banabas mu iragi dadak munen anega wadiiamon, “Ayop Iesu inap imuya potaya iragi gapan di wat nasiwanianampen, nop mega wariwanian.”

²⁴ Banabas me apan kakae anu tumat ge Guewa Woup Seniwa me potap no dotouen amba waenapan paua arugataet Ayop inap naumo aen.

²⁵ Amba apan Banabas, Sol yo a tapen menan at Tasas aen.

²⁶ Yaveniwa, me wat nau pa Antiok ewagai onen. Banabas ge Sol, ap mepe

dere, en daiton gapan Iesu dugup mega nagirewa den wanumon amba waenapan aruga wadiiamon. At Antiok gapan Iesu dugup mega nagirewa namu yaua Kuristian diamon.

²⁷ Wam mame gapan, God no oise waine nagirewa upi pa Ierusalem gapan pa Antiok amone.

²⁸ Apan ap me da yaua Agabas. Me ao yone amba God Guewa aroewa gapan evi venasepen noa namu anega wan, “Wankakao baware da konintu at at iravi tau aeta.” (Wankakao mame venaseni Rom nagirewa ayopewa Kolodias ayop ta wandeni wamewa gapan tauen.)

²⁹ Nop evi venasepen namu wani menan, Antiok Iesu dugup mega nagirewa ago muk anut muga muga gapan moni bongamen, at Diudia gapan inine nagirewa garaet munat anun.

³⁰ Ap menan, Antiok Iesu dugup mega nagirewa mame di tane, moni bongamene Banabas ge Sol munane amba Diudia Iesu dugup mega namu yo yo nagirewa munapen menan mu tam amone.

12

Ayop Erot apan Diemis tone boen

¹ Wam ame gapan ayop Erot Iesu dugup mega nagirewa upi wa koeragam mumon.

² Me wani gapan ita nagirewa Dion tasewa Diemis waran tuma engurane boen.

³ Erot ap tani gapan, Diu nagirewa aton anune, me ap yaveni menan ita mega nagirewa Pita to warapen diamon. Mame tane wamewa ame Taba Buredi Tutut Ya Waini Baripewa gapan, yaua dawa ame Paina Yamaseni Baripewa.

⁴ Ita nagirewa Pita waran gwat nokap baraen. Ap mepe ita nagirewa i degede tomangen apan degede yon ge yon amon Pita amase taiwanumune. Paina Yamaseni Baripewa tugup uon tapi ewap, ayop Erot Pita ware aroga baraep Diu nagire togurapen menan munat anun.

⁵ Ap menan Pita wat nasen gwat noke gapan di wande en, go Iesu anu tumasine nagirewa Pita menan wam wam mup dan-damunagaet God inap waiwanumun.

Pita gwat nokap tau aen

⁶ Mum ame woup sepiwa gapan, ayop Erot Pita Diu nagire munat anun. Go muma Pita God Paewa tonana yonine apan dere yaumakamup aup iniwandin. Damik kaimake dena gapan naniwa yamu yamune ita nagirewa nanimu den pamanone amba gwat noke tonanewa God Paewa tonana yonine nagirewa upi ap mepe amat taiwanumune.

⁷ Wanumone menawaet ununke uon da, Ayop anea mega tauue ap mepe yonen, amba ganasewa gwat noke en ganatamen. Anea Pita onewa gapan to kandase amba anega dien, "Serarat, ao yon."

Wani boge Pita nanip damik panane butut batat wa geomone.

⁸ Anea Pita sia dien, "Pusiga okome en, wanup gega den pan." Pita ame tani anea sia wan, "Wanup gega aigapewa den wat en ewanap onak."

⁹ Pita gwat noke ae ve tauue anea ewap aen. Anea anenen taiwandini, Pita me da ya anu aven, anuni me bet ine yaviwandalanun.

¹⁰ Tonan amase taine nagirewa garawat garawat amone amba uiwa tonan intanigaet gware denawa ame watapane pa sewa arige gapan amon. Tonan ame mek ingane watap munen, amba mu tauan gwat noke paewa garip tau amone. Mu neginaet vit amuiwanumune gapan anea ame boge Pita ae ve oagaen.

¹¹ Oageni, Pita mek di anu anega wan, "Endi Iesu nenan tani tavewa di ne gwat noke garip tauan, bet inine mini da uon. Ayop Iesu anea da watu enen papat negatan. Ayop Erot aro megawa amba Diu nagirewa inanap tat anune den ne ya yawapen menan anea ta warit nimangen."

¹² Wam ame Pita anu aveni menan me Dion, yaua dawa Mak inewa Meri pa mega aen. Pa ame gapan waenapan arugataet tobot tan Pita menan God inap mup waiwanumun.

¹³ Pita tonana ken ken toiwandini, amba nao waenewa da yaua Roda tonan wata-papan menan tauen.

¹⁴ Taue, Pita noa ire anu daramu wan, aton tan waenapan wadiamopen menan entane use sia aen go tonan ya watapen.

Me anega wadiamon, "Pita tonana yoniwan!"

¹⁵ Anune go manega wane, "Ge iaga bambamaen waing!" Go waen nop mega tavewa menan aigap aigap wa ge wa di taiwandin. Menan pa nagirewa anega wan, "Apan tonanawa, Pita uon, go ame anea mega kwayup tainiwa tauen taiwan."

¹⁶ Go Pita tonana ken ken nonongataet di toiwandin, menan mu tonan watapan yawane nomu i kap wan.

¹⁷ Pita mu nop ae veapen menan naniwa gapan ta ewamon amba Ayop anenen ta gwat nokap nau tau aeni oisewa wadiamon. Amba me anega wan, "Diemis ge Iesu anu tumasine nagirewa den oit ma wadiamon." Pita ap wani boge ae vemo at da aen.

¹⁸ Inane woup seni, gwat noke amase taine nagirewa Pita gwat nokap dim da anenen tani menan anu waramasen amba yoa at at iragi taitamen.

¹⁹ Ayop Erot Pita yoa taiwanumam-pen menan diamon. Mu yoa tain en da ya di yawane gapan Erot gwat noke amase taine nagirewa singui arugataet wayawamo amba mu gurep borit wapen menan wan.

Ambe Erot Diudia ae ve pa Sisaria tauue wanden, wam koni otu da ap mepe wanden.

Ayop Erot boen

²⁰ Wam ame den Erot pa Taya ge pa Saidon nagirewa inamup gari gangan naen menan ian ame iame Erot yave baigan tapen menan amon. Tauane namu Erot pa mega kwayup taini ayopewa yaua Balastas evenan tan amba imua waren. Ap tane amba ayop Erot namup tauan baigan tapen menan singuiasene, iwa taba muga Erot egak mega gapan warianumune menan.

²¹ Menan Ayop Erot baigan tapen wamewa om enuni gapan, ayop wanupewa mega wat ene amba ayop watat mega gagap ae wande waenapan inamup opata wan.

²² Opata wani gapan waenapan kaimakaet ve anega wane, "Anun, god da inanup waiwan, apan umanup mini da uon!"

²³ Ame gine tutup Ayop anea mega Erot to baimen gearen amba motamot posewa na ugunagene boge boen, iwa me God ya wa atonasen amba waenapan me God mini wa taragasiwanumune me ya watanamon.

²⁴ Go God nop mega yaugai di senare tau aen.

²⁵ Wam ame Banabas ge Sol ap muga Ierusalem amo tauan sia entan onamone apan Dion Mak den tanam amon.

13

Banabas ge Sol watu enamone amon

¹ At pa Antiok gapan, Iesu dugup mega nagirewa gapan, upi wadiamot nagirewa amba upi God oise opata waine nagirewa. Upi mu yaumua mame, Banabas, Simion yaua dawa Epi Pumpuniwa apanewa, Lusias at Sairini apanewa ge apan Manaen ayop Erot gwep mega daitonawa, amba Sol.

² Antiok Iesu dugup mega nagirewa God menan taba virip tan amba God wa taragasiwanumune gapan, Guewa Woup Seniwa anega diamon, “Ne Banabas ge Sol om enumon, nao munat anuna menan, mu nugut ma nenan.”

³ Ap menan mu taba virip tane amba mup gapan nanimu iamup sean Banabas ge Sol watu enamone amon.

At Saiparas gapan

⁴ Apan dere ame, Guewa Woup Seniwa negin muga ta watu enamoni menan mu vit amone at Selusia tauan ap mepe kabum gagap dotouan, puiman topaneni at Saiparas amon.

⁵ At ame gapan pa sewa yaua Salamis tauane, Diu nagirewa opata waine pa muga muga gwanap God nop mega opata wadidiamon. Dion Mak mu den ap mepe ago muga taiwandin.

⁶ Puiman topaneni ame ikukuk pa pa iravi daio amon amba pa Papos tauan. Ap mepe Diu nuat apane yaua Ba-Iesu tautanane (ian Gurik noa gapan Elimas diane). Me God nop mega tave uon waini apanewa.

⁷ Ba-Iesu at ame ayop mugawa yaua Sogias Polas evenewa. Sogias me anut

apanan menan Banabas ge Sol inewa onamo God nop mega wadiapen menan nop watu enen.

⁸ Go nuat apante Ba-Iesu, watanamon. Me ayop mega Polas Iesu oisewa ya anupen menan watanen.

⁹ Ap menan Sol, yaua dawa Pol, Guewa Woup Seniwa potap no dotoueni gapan, Elimas kem kem ase yave

¹⁰ amba anega diguren, “Ge Seitan umapewa di! Ge inak kakaewa anavi megawa. Koewa ugup ugup ge potagap no dotouen amba pot pot waenapan wababayan mumingi.

¹¹ Menan wapena anu, endi Ayop Iesu aroewa gapan yamaga boraseta amba wam animpo gapan ge yangut sia ya tai, wam ganasewa da ya di yawai.”

Ap wani gine tutup sisip taue me yamewa aoma umasen, amba me orup da nanip wat nau amopen menan momak anuiwandin.

¹² Wam ame dim da venasen piup Ayop mugawa, Sogias Polas yaveni amba anu tumat tan den no kap wan, iwa God oisewa anuni menan.

At Pisidia pa Antiok amon

¹³ At Papos gapan, Pol evene waiwa tanamo kabum gagap at Pampilia gapan pa sewa Poga tauane. Ap mepe Dion Mak ae vemo ewagai pa Ierusalem sia aen.

¹⁴ Pa Poga ve use amone at Pisidia gapan pa yaua Antiok Diu pura bawarewa wamewa gapan tauan. Ap menan Diu opata waine paewa unuk amon ae wanumon.

¹⁵ Apan Mosis iup namua seni ogewa amba wataget God no oise waiwanumune seane ogewa den batnagen. Uon tani ewap, pa ame kwayup taine nagirewa Pol ge Banabas singui wayawamon, “Tatan anega, waenapan dadak diamo diamo guturewa da inayap wandepi ame wane umap di.”

¹⁶ Pol yone, waenapan nop ae veapen menan naniwa wadave amba anega wadiamon, “At Isurero waene apanewa amba e ian uguge nagirewa da God wa taragasiawanawa, nop nega neman guran anun!”

¹⁷ Nu at Isurero nagirewa God nuga omayan baewa at Idip wanumone gapan

God om enumon amba Idip gapan naewa muga aruga tan. Mu aruga tane amba God aro mega gapan at Idip gapan naumo tau aen.

¹⁸ Tau amone, en apane dere (40) at kaimewa gapan iniwanumune koewa taiwanumune go God imu pose inamup ae bigaren.

¹⁹ At Keina gapan God ian ugup ugupe nagirewa nani yamu dere gut momak mumeni amba waenapan mega Isurero nagirewa at Keina munen yon borane.

²⁰ Mame tani aeni enewa iragi 450 gwanap venasen.

Mame ewap, wa tamanam mumine nagirewa God om enumoni Isurero nagirewa kwayup tamopen menan munen. Ap aeni, God no oise waini apanewa Samuero wam mega tauen.

²¹ Samuero wam mega gapan, omayan baewa ayop muga bawarewa da endawapen mupe wane, menan God apan Kis otua Sol munen. Sol dugup mega yaua Bendiman apanewa, me Ayop en apane dere (40) ta wande en.

²² Watageta apane Sol ayop taiwandini go evi amba God wa totnagen amba apan Devit ayop muga tan. Devit oisewa God manega wan, ‘Apan Diesi otua Devit ne yao tanana ame nek bumaganapewa. Me evi amba wan dim dim ne tat anuina me tata.’

²³ Apan Devit ani sibabasi megawa ame God nunan wa agiaseni apane ge wat inakam nugawa, ame Iesu, God om enuni ware tauen.

²⁴ Iesu tauapen tani namup, apan Dion waenapan at Isurero nagirewa iragi vettavet tapen opataewa wa amba dup iamui-wandin.

²⁵ Dion nao mega uon tapen taiwandini gapan waenapan inamup singui anega wayawamon, ‘Ne da anu nimanek wanin? Apan amase taiana ne uon. Go anun, ewanap apan bawarewa da taueta go ne bawarewa uon. Ne ago otua ayop mega pusi okomewa vesini mini ne ap wat agoaset anun go ne umanap uon.’

²⁶ Tatan gwanin, Eibaraam otu tasinewa, amba ian ugup God wa taragasiana nagirewa, wapena anun, Iesu

inak ewakewa nunat wani oise kakaewa mame inanup tauen.

²⁷ Ierusalem wanumuine nagirewa mu arita mugawa den, nu inak nunini apanewa Iesu irewa ya yao anu kakayasene. Pot pot pura bawarewa gapan gapan wataget God no oise waiwanumune nagire seane ogewa batnagianumune go ya anu awane. Ap menan Iesu boepi oisewa wataget God nop mega namua gapan seane tavewa tauapen menan Iesu togurapen wan.” Pol ap anega wan.

²⁸ Pol opata mega sia waiwandin, “Iesu koewa mega da ya tanan go mu di boet anun amba Ayop Pailat inap anega wane, ‘Ge togura boep.’

²⁹ Ugup ugup iravi wataget God no oise namua gapan seane taitamene gapan Iesu etua oma korosi gapan aoma wa totnagen vitan amba wat amon dagupa baraan.

³⁰ Go God wan Iesu inakae sia yon wanden.

³¹ Iesu inakae sia yon wanden gapan, at Galili pa Ierusalem tanam amone nagirewa wam aruga inamup venasiwandin yaviwanumun. Waenapan ameme endi at Isurero nagirewa yawane oisewa wadidiam wanum.

³²⁻³³ Menan, nu endi God oise kakaewa ame wadiaivin. Oit ame God omayan bae nagirewa munat wa agiat mumeni nu mu naewa muga inanup tauen. Me wat inakam nimanini apanewa munapen menan manega wa agiat mumeni ta munen, ‘Iesu boepi ne wapen inakae sia yon wandeta.’ Ok da sia buka namua yaua Sam paup derewa gapan God Iesu menan anuni oisewa anega sen, Ge ne otunawa, amba endi ne ge mamaga entan nimanegeta.

³⁴ Amba nop da sia buka namua gapan seane ame gapan God tavewa di wan Iesu bop gapan inakae sia yon wanden, go etua ya puakaeta. Ok ap anega sean, God anega wan, Watageta apanewa Devit wat aipakam, ge kiman kakae guragut nega me wanapen menan, wa agiasena ame iravi tavewa mega di e enain.

³⁵ Ap menan ok da sia, buka Sam gapan, aroga Iesu wat aipakam mega menan anega sean,

Nao nega taini apanewa etua ya puakaepen menan dian.

³⁶ Nop ame God wani Devit menan ya wan iwa Devit wam mega gapan God dim da anuni taitameni amba me boen. Boeni omae baewa den tune etua puakaen.

³⁷ Go God wan Iesu ao yon wandeni etua ya puakaen.

³⁸⁻³⁹ Ap menan, waenapan negawa, nop mame di anu kakayasen ame God Iesu gamup koewa nuga anu ae veapen oisewa opata gapan wadidiaivin. Wataget apan Mosis iup namu seni gapan koewa nuga garewa ya musen go Iesu anu tumasetoni menan God koewa nuga wat musen.

⁴⁰ God oise waiwanumune nagirewa wane ame inayap taupei tawa menan amat ek ingane di tan. Mu anega wan,

⁴¹ Yawan, e nipep waiana, wapena anun. E God aroewa yawane no i kap wap, amba tavewa da ya yawai go mondi borit wai,

iwa ne wan dim dim da baware di tapen taivin,

go e ya anu tumat tai.

Apan da ne tana oisewa wadiaepi, go den e ya anu tumat tai.”

⁴² Pol opata mega uon tani, Banabas dere Diu nagirewa opata waine paewa ae vean tau amuiwanumune gapan Diu ge ian ugupe nagirewa da God wa taragasin anega wan, “Wam pura bawarewa utat sia onaen nop ame sia wadianen.”

⁴³ Wam ame waenapan to iamen wanumone yap marimen amon, Diu nagirewa amba Diu uoni go Diu guegue muga taine nagirewa aruga Pol ge Banabas ewamup amon. Menan Iesu watu enamot megawa dere ame waenapan God garaet mega gapan wanumopen menan aigap wadidiamon.

Diu nagirewa Iesu oisewa tanda anun

⁴⁴ Pura ame use aigapewa pa sewa ame gapan iragi tobob tan iamen, Ayop nop mega anut wan tauan.

⁴⁵ Wam ame Diu nagirewa to iam baware ame yawane da di anu koeam mumane ap

menan Pol dim da waiwandini mu nipep waiwanumun.

⁴⁶ Go Pol ge Banabas tumban amu yonan nop aigap sia kaimakaet anega diamon, “God nop mega e inayap namu wadi-aeton go e inak yaibobot tandayaseana menan watananean, ap menan nu endi ian ugupe, Diu uoni nagirewa ane wadi-amoit.

⁴⁷ Iwa God anega dianeni, Ne Diu uon go ian ugupe nagire ganat mugawa entan imaena, menan waenapan at at iravi inak yaibobot nega warain.”

Ap anega diamon.

⁴⁸ Ian ugupe nagirewa Pol nop mega ame anune menan aton anun God nop mega ao waran. Amba da da inak yaibobot warapen menan God ganganat mumeni nop mega anu tumasen.

⁴⁹ God nop mega at ame iragi seset wa tau aen.

⁵⁰ Go Diu nagirewa tanda anun menan God menan taine waen bawarewa mugawa amba apan bawarewa muga den, anan datnak muman. Mu Pol ge Banabas wa koeragam mumapen menan anan datnagene, amba mu at muga ae ve amopen menan upa oimone.

⁵¹ Menan waenapan koewa ae bat munapen menan Pol ge Banabas pusimu atabobo toninigamen ae vean amon pa Aikoniam tauan.

⁵² Go Iesu dugup mega nagirewa pa Antiok gapan aton baware anun amba Guewa Woup Seni potamup bararaen den aro muniwandin.

14

At Aikoniam gapan opata wan

¹ At Aikoniam tauane amba Pol ge Banabas Diu nagirewa opata waine paewa unuk amon. Ap mepe mu opata kakae di waiwanumune menan ame Diu amba ian ugupe nagirewa paua muga arugataet anu tumasene.

² Go namu venaseni ap umap sia venasen, Diu nagirewa upinamu da da nop ya anu tumasene ame ian ugupe nagirewa anan datnak muman. Amba Iesu dugup megawa nagirewa nop eboewa diamone.

³ Go Pol ge Banabas wam nononga ap mepe wanumon. Ayop oisewa epara tan wadidiam wanumun. Mu opata muga tavewa di ewamopen menan God garaet aro mega muneni gapan kiman yo paua mega ugup ugup taiwanumun.

⁴ Menan waenapan pa sewa ame gapanawa seu enun, upi Diu nagire arige yonan amba upinamu Iesu watu enamot gambenamu yonane.

⁵ Amba upi ian uguge nagirewa ge Diu nagire, bawarewa muga den, Iesu watu enamot megawa dere ta koeragam mumapen amba gwara guramopen anun.

⁶ Go mu oit ame anune gapan tap serarat at Laekonia pa sewa Listura ge mainepewa at sewa Dobi den tauan amba at ame ikukuk amon.

⁷ Ap mepe mu oise kakaewa opata gapan di wadidiam wanumun.

Pa sewa Listura ge pa Dobi gapan

⁸ Pa Listura gapan pusi waberugaseni apanewa da ap mepe wande en, anega da inewa potap da ap anega yanen, ap den ya ainiwa.

⁹ Me neman gure Pol nop waiwandini ame anuiwandin. Pol kem kem apan ame asenagaet yave manega anun, apan mame inakaepen men anu tumasiwan.

¹⁰ Ap menan Pol me inap kaimakaet ve anega wan, “Pusigap amu, ao yon!” Wani pusi koe tani apanewa karapun doren amba ap erewa mega aen.

¹¹ Pa nagirewa Pol dim da tani yawane menan mu nop muga Laekonia gapan ve wan, “God nuga dere mame apan venat mutan tauan!”

¹² Menan Banabas mu god muga aritawa yaua Sus diane amba Pol mu opata waini god muga yaua Omis dian.

¹³ God muga Sus mup paewa pa sewa sin garip mainep tune wanden. Sus pirisi mugawa, ae man kao ge rarema ben wat sin tonanewa tauen, iwa me amba wae-napan yan garaet muga Iesu watu enamot megawa dere munat anu taiwanumune.

¹⁴ Go wam ame Pol ge Banabas mu dim da tat wan taiwanumune oise anune, menan mu wanup aigapewa muga benagen amba to iam ame berip ve wa ge wa serarat amon anega diamon,

¹⁵ “Waenapan, ma iwa dimen taiwanin? Nu apan iragen e umayap di! Nu Iesu oise kakaewa wadiaepen menan tauaton ame gapan e naniap gvat kaitayana god eboewa egawa ame ae veapen. Go God tavewa kabani wandiniwa, piup kiman puiman gagape den wan venat mutanewa, me anu tumat tapen menan imuya inap entanan!

¹⁶ Wataget oniwandini piup nagirewa muk anut mugawa taiwanumune go God ya watanamon.

¹⁷ Go me inak tat megawa aroga di wande en ameme wat aipakam mega tauiwandini nu yavintoni gapan anuivin me wandia. Wat aipakam mega ame wam gapan ugin watu eniniwa, amba taba gine ugup ugup wam muga muga gapan yaniwanumat diamuiwan. Taba nuga nuniniwa den potanu aton nuniwan.”

¹⁸ Go nop mame Pol wani amba Banabas dere watanamot anun go waenapan sia man gura munat anun.

¹⁹ Ma ewap, Diu nagirewa upi at Pisidia pa sewa Antiok ge pa sewa Aikoniam gapan den tauan amba to iam ame nanam mumane. Menan mu Pol gwartan okokok pa garip warup tau amon, anune me boet anun.

²⁰ Go Iesu anu tumasine nagirewa Pol inap tauan me enpanane gapan me ao yon wande ewagai pa sewa Listura aen. Inane woup sen Banabas dere amon pa sewa Dobi tauan.

At Siria pa Antiok entan onamon

²¹ Mu pa sewa Dobi gapan Iesu oit mega kakaewa wadidiamone waenapan aruga anu tumat tane. Amba Pol ge Banabas ewagai sia amon, pa Listura tau amon, pa Aikoniam tau amon, amba at Pisidia gapan pa sewa Antiok tauan.

²² Mu Iesu dugup mega nagirewa aro munan amba dadak diamone nop tavewa gapan anu tumat ta di wanumopen menan. Den mu anega wane, “God toemu mega gwanap anepen menan itan bagu sisi ugup ugup namu yao anuit.”

²³ Iesu dugup mega pa pa gapan namu yoyo nagirewa om enumone dugup daiton daiton amat tapen semone. God menan taba virip tan mup wan amba namu yoyo

nagirewa ame Ayop inap asenagaet di munane, iwa mu da da anu dao mumine nagirewa.

²⁴ Amba at Pisidia tau amone ewape at Pampilia tauan.

²⁵ Ap mepe mu Iesu oisewa pa Poga gapan opata wadiamone ae vean at Atalia vit amon.

²⁶ Pa Atalia gapan kabum gagap ewagai at Antiok sia amon. Namu Antiok gapan mu erewa gapan God nao warapen menan Iesu dugup mega nagirewa mup gapan wat aipakam mumeni anega wan, “Man God, apan mame kwayup tam.” Ap anega mup wane boge amon, sia entan onamone, nao munane taitamen.

²⁷ Pa Antiok tauane, mu Iesu dugup mega nagirewa iravi iamepen menan wan. Iesu dugup mega nagirewa iravi todagonen gapan God mu gamumup dim da tani amba ian ugupe Iesu anu tumat neginewa watap muneni oisewa wadidiamon.

²⁸ Amba mu ap mepe Iesu anu tumasine nagirewa den tanamon wam nononga di wanumon.

15

Pa Ierusalem gapan Iesu dugup kansoro nagirewa tat mugawa

¹ Wam ameme at Diudia Iesu anu tumat tane nagirewa upi at Antiok vit onamon amba at Antiok Iesu dugup mega nagirewa anega diamon, “Mosis iup God inap wareni ame menan apan epiwa paua tum ya tapiwa God inak ewakewa ya waneta.”

² Pol ge Banabas ap mepe den. Ap menan mu yone Diudia nagirewa den notatae aritavet wane. Ap wane menan Antiok Iesu dugup mega nagirewa Pol, ge Banabas amba upi den om enumone pa Ierusalem dot amopen menan. Ierusalem gapan mu Iesu watu enamot megawa ge Ierusalem Iesu dugup mega kwayup tamuine nagirewa den epiwa tum arini noa wayawamopen menan amoain.

³ Iesu dugup mega nagirewa watu enamone. Amba mu pa Ierusalem amuinewa neginaet at Ponisia ge at Sameria tau ge tau amon. Diu uon go ian ugupe nagirewa

imumu God inap entanene oisewa Iesu dugup mega nagirewa ap mepe wanmuine wadiam amon. Gutut mame wane gapan Iesu dugup mega nagirewa iravi aton aigap di anun.

⁴ Mu pa Ierusalem tauane gapan, Iesu dugup mega nagirewa, Iesu watu enamot mega nagirewa amba kwayup tamuine nagirewa den waupamon. Pol ge Banabas God dim dim iragi mu gamumup tani oisewa wadidiamon.

⁵ Go Parisi dugup muga upi Iesu anu tumasine nagirewa yonan anega wane, “Ian ugupe nagirewa epimu tum di tap amba Mosis iup namu se wani ayamase tap.”

⁶ Ame wane menan Iesu watu enamot mega nagirewa ge dugup kwayup tamuine nagirewa iamen.

Pita opata wan

⁷ Nop nonongataet wayao seyao taiwanumune ewap, Pita ao yon wande amba nop anega wadiamon, “Tatan gwanin, e anuyan watagentuk di God e yaumakayap om enunegen ame ian ugupe ne non utap Iesu Oise Kakaewa anupi amba anu tumat tain.

⁸ God waenapan iravi imumu anuitamini apanewa menan ian ugupe nagirewa, Diu uoni, evenan tat anun. Ap menan Guewa Woup Seniwa nu nuneni ap umap den munen.

⁹ Me yamap nu iravi gine daiton ap menan ian ugupe nagirewa Iesu anu tumat tane menan God mu koewa muga anu ae ven.

¹⁰ Ap menan endi iwa dimen God pusip warup yaviwanin? Iup nuga itaniwa nu omayan baewa amba nu den kwayupe ya taintoni iwa itan baware iragen. Iwa dimen Iesu anu tumat taine nagirewa itan ame onemup seait?

¹¹ Ame umap uon, ya seait iwa nu God Ayop Iesu garaet nuneni gapan wat inakam nimanen, ap mini ian ugupe nagirewa mu den ap anega.”

¹² Ap wani, Pol ge Banabas yonane God ian ugupe munan yo ge kiman paua baware ugup ugup anenen mu gamumup taiwandini oisewa wadidiamon, menan to

iamene nagirewa iravi no uon wanumon, neman guran anuiwanumun.

Diemis opata wan

13 Mu nop wane uon tani ewap, apan Diemis anega wadiamon, “Tatan gwanin, nop wapena anun.

14 Oit ameme Saimon Pita gaset wadi-anen anenen da God namu anut mega to ewamoni ame ian uguge nagirewa yaumakamup upi tambumop waenapan megawa entanamon.

15 Saimon wani ame tavewa di iwa wataget God no oise waiwanumune nagirewa nop mame den anega seane, God anega wan,

16 Mame ewap ne sia tauain, amba Devit toemu mega ta koeragamene, ne to bongamep inak munain. Pa sewa wabenagene, ne sia tuin.

17 Ap tapena gapan, waenapan iravi, piup gapan, inanap tauain, Diu uoni ian uguge nagirewa den tauain, iwa mu ne waenapan negawa gaset dia-mona menañ.

18 Ne ayop di, namu wadiaena evi taueta. God ap anega wan.”

19 Ap menan, Diemis aigap sia wadi-amon, “Ne anuingina mam, ian uguge imumu God inap entanene nagirewa nu kaimakaet wat itan da ya munat.

20 Go manega ok inamup enu wadi-amoit, ame nanimup god eboewa guewa kaitane ameme antaba irine god muga munapen ame tabaewa ya nap. Amba waen ge apan wainan gogo ya tap. Amba man mege wat imokaminewa ya nap. Amba deniwa da ya nap.

21 Iup mame ian uguge nagirewa asik tane iwa en arugataet gapan Mosis iup mega Diu pura bawarewa gapan bat-naginewa amba pa da da gapan wadidiamuinewa menan mu anune.” Diemis ap anega wadiamon.

Wat tamanam mumane ogewa watu enan

22 Ap menan Iesu watu enamot mega nagirewa, dugup kwayup tamuine nagirewa amba Iesu anu tumasine nagirewa iragi den nop panane apan mugawa wa watu enamop, Pol ge Banabas tanamo pa Antiok

amot wan. Ap wane apan Diudes, yaua da Basabas amba apan Sailas mu den watu enamon. Iesu anu tumat nagirewa apan dere mame virimu tainewa.

23 Mu den ok manega watu enan, Kaewa kaewa tatan gwaninua ian uguge Iesu anut tumasiana nagirewa, pa Antiok, Siria amba at Silisia gapan iniwanin.

Nu Iesu watu enamot megawa amba Ierusalem dugup mega, kwayup taintoni nagirewa den gaun in-ayap waivin.

24 Nu anuton apan ame upi mapa inanup tau onamone aro da ya munaton, amba am dauro taen, opata muga wane iae guine wa koeamene.

25 Ap menan nu iragi iametoni amba imunu daiton manega anuton. Apan dere nu potanup watu enamoton. Apan dere, ame evenan wainu kakaewa, ame Ban-abas ge Pol, tanam inayap onamot waton.

26 Banabas ge Pol, nu ayop nuga Iesu menan, nao taine ge bop tawa ya anuine, apane waiwa.

27 Potanup amuine apan dere ame Diudes ge Sailas, mu nu dim da ok gapan seatonwa nop gapan, sia aigap di wadiain.

28 God Guewa Woup Seniwa nu den imunu daiton gapan, iup itan mega da e oneyap ya seapen menan anutoni, go nop mame megenat ayamase tapen,

29 Waenapan nanimup god eboewa guewa kaitane, ameme antaba irine god muga munapen ame tabaewa ya nane.

Amba man deniwa ya nane. Amba man mege wat imokaminewa ya nane.

Amba waen ge apan wainan gogo ya tane. Koewa mame iragi ya taiwanianampinawa ame e kakae di tai.

Nop otu nuga mame uon tan. Gaun inayap waianit. Mu ok ap anega watu enan.

³⁰ Oit wat amone nagire pa Antiok tauane. Amba Antiok Iesu dugup mega nagirewa ok ame munan.

³¹ Dadak nopewa ame ok gwanap wane waenapan iravi nop bibigawa anune atonaware tan.

³² Diudes ge Sailas mu den God oise wainewa, menan tase gwani dadak munep aritavet amun imumu to kimepen menan wam nononga wadidiamon wanumun.

³³ Wam nononga wanumone amba pa Antiok Iesu dugup mega nagirewa baigane den watu enamone ewagai Ierusalem sia amon.

³⁴ Go apan Sailas ya aet anuni menan ap mepe wanden.

³⁵ Amba Pol ge Banabas pa Antiok gapan di wanumon, ap mepe mu upinamu aruga den ayop nopewa gapan di wadidiamon wanumun.

Pol ge Banabas dum marimen amon

³⁶ Wam da Pol Banabas anega wadien, "Pa sewa sewa daio nu namu ane wadidiamotoni mu anenen taiwanumune anupen menan ewagai sia daio inamup ane yawamopen."

³⁷ Banabas apan Dion Mak den aet anun.

³⁸ Go Pol Dion Mak ya aet anun iwa wata pa Pampilia tauane gapan me yone ae vemo ewagai pa Antiok aeni menan.

³⁹ Ame menan Pol ge Banabas Dion Mak aigap noyam notatae warane amba dum marimen amon. Banabas Dion Mak den kabum gagap at Saiparas amon.

⁴⁰ Amba Pol apan Sailas om enu. Amba Antiok Iesu dugup mega nagirewa Pol ge Sailas munan mup wane, God kwayupe gapan wat aipakam mumane amba Pol ge Sailas tau amon.

⁴¹ Amone at Siria ge Silisia tau ge tau amone, Iesu dugup megawa wadidiamone anun imumu wat kaimagamepen aroewa muniwanumun.

16

Apan Timoti Pol ge Sailas intum tamon

¹ Apan Pol, Sailas den, pa Dobi tauan amon amba pa Listura tauan. Iesu wadidiamot apane da yaua Timoti ap mepe iniwandin. Timoti inewa Diu waen da

Iesu anu tumat taini waenewa, go me mamewa ian Gurik apane da.

² Iesu dugup mega nagirewa, pa Listura ge Aikoniam gapan, Timoti kakaewa taini oise tarage wane.

³ Pol imup me den wat nau daio aet anun. Go at Aikoniam ame gapan Diu nagirewa aruga wanumon amba Timoti mamewa ian Gurik apanewa mu asigimup. Ap menan Diu nagirewa aton anupen menan God paua mega Timoti epiwa tum tan.

⁴ Mu pa sewa sewa tau ge tau amone, pa Ierusalem Iesu watu enamot megawa amba dugup kwayup tamuine nagirewa iam iam gapan ok seane ame tavewa anu tapen menan, mu ap muga gapan, waenapan iravi wadidiamone.

⁵ Ap tane menan at iravi gapan Iesu dugup mega nagirewa wat kaimagam man ap menan Iesu anu tumat tane nagirewa paua muga kai ware aigap aen.

Pol Masedonia apane da bet ine yaven

⁶ Pol ge evene wai den at Piriglia ge Galesia tau ge tau amon iwa me at Eisia paua mega gapan opata ya wapen menan Guewa Woup Seniwa mu watanamon.

⁷ Wam ame mu Misia paup tanatan mega tauane amba at Bitinia gwanap unumopen tayawane go Iesu Guewa mu watanamon.

⁸ Watanamoni menan mu at Misia mainep tau amone vitan pa Toroas puiman etop tauane.

⁹ Mum ame gapan Pol bet ine yaveni at Masedonia apanewa yone inap mup anega waiwandini, "Paina yamat onaen at Masedonia tauan amba wat agoat nimamen."

¹⁰ Pol bet ine yaveni ewap, nu at Masedonia anet anuton iwa God Oise Kakaewa mu wadidiamopen menan dianeni anuton.

Pa sewa Pilipai gapan waen Lidia imua entan tan

¹¹ Nu pa Toroas gapan kabum gagap dotouat tamana anetoni pa Samotures tauaton inaton, woup sen sia anet pa Niapolis tauaton.

¹² Puiman etoa ae veat pusinup anet at Pilipai tauaton. Pa sewa Pilipai ame sewa

bawarewa at Masedonia gapan, ap mepe ian Rom nagirewa aruga iniwanumun.

Nu ap mepe wam agiap mini den wanineton.

¹³ Diu Pura bawarewa muga gapan nu pa sewa sin mega garawaset kauma aneton. Iwa nu Diu nagirewa at ame gapan God inap mup waine arewa anuton. Nu ap mepe ae waninet amba waen iamen wanumone inamup nop erekewa waton.

¹⁴ Mu wanumon nop nuga anuiwanumune waen da daiton yaua Lidia, pa sewa Tayataira wanup buinip tambun une gare gare tainiwa. Me God tavewa wa taragasini menan God me imu pose watapeni amba Pol nop wani bemta anun.

¹⁵ Wam ame, waen ame amba pa mega gapan iniwanumune nagirewa iragi Iesu anu tumat gapan dup iamoton. Amba waen Lidia inanup anega wani, "Apan negawa, ne Ayop nuga Iesu anu tumasena oitana anuyana menan onaen pa nega gapan iniwanian." Wa ge wa tani menan nu pa mega aneton.

Pol ge Sailas gwat nokap semon

¹⁶ Wam da sia kauma Diu nagirewa mup waine arewa anetoni nao kaimake garewa uoni taini waenoro da tautanaton. Waen ame guewa koewa airampu da potap wande en. Waen ame guewa koewa aroewa gapan namup dim da venasepiwa yave waiwandin. Ap waiwandini gapan garewa bawarewa wariwandin go i nagirewa seasiwanumun.

¹⁷ Waen mame nu ewanup aiwandin amba nop ve nunan manega waiwandin, "Ian ma mu God aigap iragena menan nao tainewa! E inak wara wara neginewa wadidaiwanum!"

¹⁸ Waen mame nop ame pot poraet waiwandini menan Pol gari yaven, boge me entane airampu yam ta yave wan, "Iesu Keriso yaua gapan, waen ae ve tau ak." Boge gine tutup airampu waen ae ve tau aen.

¹⁹ I nagirewa, waen ap me munan nao tan moni warine nao sia ya taiwandin yawan. Ap menan Rom baware muga inap noyam wapen menan, Pol ge Sailas tambumon okonagen amone une gare gare taini arewa tauan.

²⁰ Bawarewa muga inamup anega wane, "Apan dere mame Diu nagirewa go nu at nuga nagirewa wa koeragam mumianum.

²¹ Gutut muga nu tat dianene go tata iup nuga paina yamatit. Nu at Rom nagirewa iup muga den to paitait."

²² Pa nagirewa iravi intum tan amba Pol ge Sailas wa koeragam muman. Ap menan, Rom iup kwayup taine bawarewa mugawa Pol ge Sailas wanup muga aigapewa ae benak sean bunum gapan guramot diamon.

²³ Wam ame apan dere tambumon bunum gapan kaimakaet guramon amba gwat noke kwayup taini apanewa kwayup ta kakayat mumapen dian.

²⁴ Ap anuni menan gwat noke amat taine apanewa gwat noke bumagap iragen semon, oma nikoni tambun pusimu kapet umane wanumon.

²⁵ Mum bumagewa gapan Pol ge Sailas mup tan amba wak God inap waiwanumun, amba gwat noke gapan upinamu den wanumone nagirewa wak muga anuiwanumun.

²⁶ Wak waiwanumune gapan unuk bawarewa da tauen piup nutanut enun gwat noke pa sewa ibariwa menao manao tane sep tap wapen tan. Amba gwat noke tonanewa iragi ingane tap sen no aroga, amba kaimake dena damigewa nanimu panamone imup butut batat wane.

²⁷ Gwat noke kwayup taini apanewa wa kandasen yonen. Me gwat noke tonan iravi no tapamone menan tum ware mek ingane bumage entanapen tan iwa me gwat noke nagirewa gaset tap tau amot anuni menan.

²⁸ Go Pol kaimakaet anega wan, "Gek ingane bumagaga ya entana, nu iravi mapa!"

²⁹ Gwat noke kwayup taini apane dun menan mup wani amba wareni gapan serarat tau Pol ge Sailas namup omanip enu tap pagagak tan.

³⁰ Amba ao yonen, Pol ge Sailas naumo garip aen amba singui anega wayawan, "Bawarewa negawa, ne dim da tap, amba God inak mega warain?"

³¹ Mu gare wan, “Ayop Iesu anu tumat tawa ge God inak mega ewakewa warai, ge amba pa gega nagirewa den.”

³² Wane amba pa mega nagirewa den God nop mega wadidiamon.

³³ Mum ame gapan gwat noke kwayupewa mu tambumon epimu gaura guramon siget munane ame omasewa denipe bigi waramon, amba me pa mega nagirewa iravi den anu tumat dupewa iamone.

³⁴ Dup iamoni ewap, me Pol ge Sailas tam naumo one pa mega tauue amba taba tunu munen. Me pa mega nagirewa den Iesu anu tumasene menan aton baware anun.

³⁵ Inane woup seni at Rom wanene taine nagirewa punip nagirewa watu enamone gwat noke tauane anega wane, “Apan dere ame vetamone tau amop.”

³⁶ Menan gwat noke kwayupe taini apanewa Pol anega dien, “Wanene nagirewa nop watu enane ge amba Sailas vetaep tau aisepen menan wane. Menan nonup gapan aisen.”

³⁷ Go Pol punip nagirewa gare anega diamon, “Nu wanene aopan tanean amba koewa nuga da e ya yawayan amba waenapan yaumakamup gaura guranean, ame anenen? Nu Rom apante wai di, go gwat noke senean! Iwa dimen karaua watu enanet anuiwanin? Ame umap uon! ae venen, wanene nagirewa muk di onamo amba tam naune amop.”

³⁸ Punip nagirewa wanene taine Rom baware mugawa nop mame wadiamone gapan, wanene nagirewa tap tane iwa Pol ge Sailas, mu at Rom apante waiwa oise anune menan.

³⁹ Menan wanene taine gwat noke amon Pol ge Sailas potamu wabibigamen amba naumo onamone pa sewa muga ae ve at da ugup amopen menan mup wane.

⁴⁰ Pol ge Sailas gwat noke ae ve tau amone ewap waen Lidia pa mega amon. Ap mepe Iesu dugup mega upi tautanamon amba dadak diamon. Boge mu at ame ae ve amon.

¹ Apan Pol ge Sailas pa Ampipolis ge pa Apolonia tau amone pa Tesalonaeka tauan. Ap mepe Diu nagire opata waine paewa warden.

² Taini asigliwa gapan, Pol pa ameme gapan Diu nagirewa tanamon Iesu nopolwa wadiamuiniwa. Diu pura bawarewa wam yampo gapan Pol nop i davewa Diu nagirewa tanam gare gare wawa musiwanumun. Pol waenapan imu pose wat entanepen menan nop

³ ni enowa geonage anega wadiamom, “God anuni gapan Iesu nunan ugu vegaek anu boe yon warden. Union ya boen. Iesu mame oisewa wadiaena me Keriso, God wa watu eneni megawa.”

⁴ Diu nagire upinewa ge Gurik God iup mega anuine nagirewa arugataet amba waen yaumu taneni aruga mu imu pose entan tamon amba Pol ge Sailas intum tamon.

⁵ Go Diu nagire anu koeam mumane menan naina yoyo nagirewa bongamen tobob tamon amba anan tapen menan nanam mumane. Ap tane gapan, pa nagirewa iravi, Pol ge Sailas ae guramopen menan yomu tane amon apan Dieson pa mega tauane. Pol ge Sailas pa gwanap anune menan pa tobebenagen.

⁶ Go ya yawamone gapan mu apan Dieson amba Iesu dugup mega nagirewa upi den tambumon okokok upamon, pa sewa airasewa inamup tauane anega wane, “Pol ge Sailas at at iravi koevet ta onamuin ene, endi mame tauan

⁷ amba apan, Dieson ma, wa atonat mume upamo pa mega gapan sermon. Mu iravi ayop nuga bawarewa Sisa iup baraeni tandayasiwanum, go gare mu ayop muga dawa, Iesu menan waiwanum.”

⁸ Nop mame wane gapan pa sewa airasewa nagirewa amba to iam ame nagirewa iragi arara babara wan.

⁹ Ap menan pa sewa baware nagirewa Dieson me evene wai den anega diamon, “Ebo tayana menan garewa nunan amba pa aisen.” Ap anega wane menan mu garewa munane amba amon.

¹⁰ Ap menan mum ase di wa guguriwandin gapan, Iesu dugup mega nagirewa yonan Pol ge Sailas watu enamone pa Beria amon. Mu at ap mepe tauanewa boge Diu opata waine paewa dot amon.

¹¹ Pa Beria gapan Diu nagirewa mu kakae, iwa namu pa Tesalonaeka Diu nagirewa tane mini da ya tane, menan Pol oit mega wadiamoni gapan mu aton den anun. Mu pot pot nop anu awapen menan God ok mega namua gapan batnagen yawanumun, Pol dim da wani ame tavewa di go uon ap anupen menan.

¹² Mu aruga anu tumat tane. Ian Gurik kwan puraput waene waiwa amba Gurik apane wai den, aruga anu tumat tane.

¹³ Go Tesalonaeka nagirewa Pol Beria gapan God nop mega wadiam wandiniwa oise anune gapan mu at Beria to iam onamone amba Beria nagirewa anan datnak mumane.

¹⁴ At Beria Iesu dugup mega nagirewa anan tapen oisewa anune menawaet Pol amba apan upi den puiman eto watu enamone amone, go apan Sailas ge Timoti ap mepe wanumon.

¹⁵ Pol wat amone nagirewa wat nau amon pa Atensi tauan. Tauane pa muga ewagai entan amopen tane menan Pol anega diamon, “Apan Sailas ge Timoti nao muga asepa uon tapi serarat onamo inanap tauep.” Ap diamoni mu amon.

Pol pa Atensi gapan

¹⁶ Pol pa Atensi gapan Sailas ge Timoti me inap tauapen amase taiwandini gapan, me at Atensi yangut tan bagu sisi anun iwa Atensi nagirewa god muga ugup ugup guewa nanimup kaitane inamup wa taragasiwanum.

¹⁷ Menan me Diu nagirewa opata waine paewa ugup ugup aiwandini amba Diu ge God anuine ian ugupe nagirewa den gare gare wawa musiwanumun. Amba sia orup da da mondi tauane pa sewa namboya wanumuine nagirewa den tanam nop waiwandini.

¹⁸ Anut nagirewa upi dugup muga yaua Epikurian ge Stoic ame den nop gare gare waiwanumun. Mu upi Pol inap nipec anega wan, “Apan mam anut uoni bumbawam tan menan dim da anun waiwan?”

Upi gare nop anega wane, “Me ugupe nagirewa god muga oisewa da waiwan.” Mu ap anega wane iwa Pol Iesu oise kakae amba ao yon wandeni oisewa opata gapan wadidiam wandin.

¹⁹ Menan mu Pol wat nau amon iam iam arewa muga ame togan yaua Ariapagas gapan tauan. Ap mepe iam iam tan amba me inap anega wan, “Nop ewakewa gega waingiana nu oare.

²⁰ Anut ugupe da waana gapan nu anu bambamasivin. Menan gueguewa wadi-anet nu anut anuivin.”

²¹ Mu ap anega tane iwa wam wam gapan pa Atensi nagirewa at ugupe daio tauane nagirewa nop oit muga ewakewa anupen menan pot poraet nop gare gare mondi waiwanumun.

²² Togan Ariapagas gapan iam iam tane, Pol yone opata anega wadiamon. “Pa Atensi apane waiwa, ne wapena anun. Ne yawaingina e pot pot god ega aruga munan anuiwanin.”

²³ Pa ega ikukuk angena naniap kaitayana god ega mup inap taiana watarewa yavingina. Amba god ega da watarewa gagap ok anega seane yawan, ‘Watat mam God oarewa megawa.’ E dim da oarewa inap wa taragasiiana endi ne wapena anun.

²⁴ God ame, me piup kiman amba wan dim dim iragi wan venat nitaton. God ame piup kiman Ayopewa iragenawa amba pa apan nanip tune gwanap da ya iniwan.

²⁵ Me inap anenen tat ago wanait? Ame umap uon, iwa me inak ibariwa, wan dim dim kakae guragut amba inak nuniniwa gapan nu inak warivin.

²⁶ Me apan daiton, yaua Adam, tani gapan piup waenapan iravi me naewa mega yanaton. Piup at at punanan wat aneton, inintoni ibariwa God. Wam ansena gapan ininait at ambe gapan waninait me namu wan evi amba venasen.

²⁷ Ameme taiwandini iwa waenapan God yoa tapen menan. Me wandap uon go mainanup konintu di wandia.

²⁸ Watageta apane ok anega sen, God wani gapan nu yonaton inivin waninivin.

Apan ega da den ok manega sen,
Nu iravi God naewa megawa.

²⁹ Nu God naewa di waninetawa, manega ya anuinampen, apan tat mega kakaewa gapan nanip agim bangae gwayayame dena god gueguewa kaitane ame God di. Iwa God gueguewa ap mini da uon, me kabani wandia.

³⁰ Watageta wamewa waenapan God ya anu awane menan koewa muga me ya batnagen. Go endi waenapan iravi koewa nugae ae veat imunu entanepen men dianiwahn.

³¹ Iwa piup iravi wanene tamopen menan apan daiton om enun. Om enuni apanewa ame wanene tamana di taneta. Me ameme di tapi wa ewanepen menan God om enuni apane ame boe inakae sia yon wanden.” Pol opata ap anega wan.

³² Mu Pol apan Iesu yon wanden oise wani anune menan upi nipep diane go upi Pol anega diane, “Nu nop gega sia anut anuivin.”

³³ Diane menan Pol ae vemo aen.

³⁴ Apan Daionisias at Ariapagas apanewa ge waen yaua Damaris amba upi den mu Iesu anu tumasene, amba Pol tanam amon.

18

Pol pa Korin gapan

¹ Mame ewap Pol at Atensi ae ve pa Korin tauen.

² Pa ap me gapan Diu apane da yaua Akila at Pontas gapan yaneni apanewa, ap mepe iniwandin. Namu, waenewa Pirisela dere at Itali gapan wanumone, wam ame at Itali ayope bawarewa yaua Kolodias Diu nagire gari yawamon pa mega Rom ae vepen diamoni menan mu ae vean pa Korin tauan. Menan Pol apan ame waene dere yawamopen aen.

³ Pa muga gapan den wanden iwa mu nao muga daitonawa ame pa wanup gapan tumuine ame taginamene une tainewa. Pol ap mepe wändeni nao ame taiwandin.

⁴ Diu pura bawarewa da da gapan Pol Diu nagirewa opata waine paewa gwanap tanamo nop waiwandin. Diu ge Gurik nagirewa Iesu oisewa anu tumasepen menan nop kaimakaet inamup waiwandin.

⁵ Wam ame Sailas ge Timoti at Macedonia gapan tauane. Tauane menan, Pol me nao mega ae veni amba wam wam opata gapan Iesu me God om enuni apane Keriso di ap anega Diu nagirewa wadidiam wandin.

⁶ Go Diu nagirewa Pol watanan wa kereragamene menan Pol wanup mega ware atabobo pem pem ta amba anega wadiamon, “God wanene taep gapan e itan egawa ame ek egawa di, ne inanap da ya taueta. Endi ma use aeniwa ne Diu uoni go ian ugupe inamup ange wadidiamoin.”

⁷ Pol ap wani, Diu nagirewa ae vemo Diu uoni God wa taragasin apan da yaua Taitias Diastas pa mega taue ap mepe iniwandin. Pa mega Diu opata waine paewa mainap.

⁸ Diu opata waine paewa namu yoyo apane da yaua Kurisipas waene otu wai den Ayop Iesu anut tumasen. Pa Korin nagirewa aruga Iesu oisewa anune amba anut tumat tane gapan iragi Iesu anu tumat dupewa gapan iamon.

⁹ Mum da, Pol bet ine gapan, Ayop Iesu yave Pol inap nop anega dien, “Tap gop ya anu, nop nega di waingan, nok uon ya wanige,

¹⁰ Iwa ne ge den wanik angin. Apan da amborage ya togeta, iwa ne waenapan nega pa sewa ma gwanap arugataet wanumamun.”

¹¹ Ap menan Pol en daiton derewa semu ap mepe wande en, waenapan God nop mega wadidiam wandin.

¹² Evi at Rom apane yaua Galio, at Guris ayope tani gapan, Diu nagirewa iame Pol anu koeamen menan waran wanene paewa amon.

¹³ Mu wanene apanewa Galio inap anega wane, “Apan ma negin ugupe gapan God wa taragasepen waiwan menan me iup paina yamasen, nu waenapan wababayen nimaniwan.”

¹⁴ Pol gare wapen tani go ayop Galio Diu nagirewa anega wadiamon, “Pol aopan da go koewa da tani oisewa e wapo ne anu imaepon,

¹⁵ go mame anuiangina ame e nop ega o yaua ugup ugup o iup ega gapan notatae waiwanin menan e ek wa kakayasen.

Menan wan dim dim ap gapan ne wanene ya tain."

¹⁶ Ap diamoni amba wanene paewa gapan Diu nagirewa up oimon.

¹⁷ Garip amone Diu nagirewa opata waine paewa kwayup taini apane yaua Sosenis kaimakaet waran wanene paewa namboyap tone. Ap tone gapan ayop Galio gari yaven yawamo ae vemon.

Pol pa Antiok entan sia aen

¹⁸ Pol pa Korin gapan wam aruga di wanden. Amba me tase gwani ae vemo amba kabum gagap at Siria aen. Tanamo aeni nagirewa yaumua Akwila waene Pirisela dere. Go namu pa Senkiria gapan God inap dim dim wa agiaseni ame tapen menan Pol i gume ware ae sen.

¹⁹ Mu pa Epesas tauane, Pol Pirisela ge Akwila ap mepe ae vemon. Me megenat Diu nagire opata waine paewa gwanap unuk ae amba Diu nagirewa den nop gare gare waiwanumun.

²⁰ Waenapan Pol nonongantuk inamup wandepen menan anune menan singiasene go Pol me tanda wan.

²¹ Me ae vemopen tani gapan agi anega diamon, "God anut mega wandepiwa ne entan sia inayap tauain." Wani boge pa Epesas ae ve kabum gagap aen.

²² Pol pa Sisaria taueni kabum ae ve pa Ierusalem ae amba waenapan mega gaun inamup wan. Wani pa Antiok ewagai aen.

²³ Pa Antiok gapan wam agiap da wardeni ewap, Pol at Galesia ge at Pirigia ame gapan ikukuk tau ge tau ae Iesu dugup mega nagirewa iravi wa kaimagam mumiwandin.

Apan Pol pa Epesas tauen

²⁴ Wam ame, Diu apane da yaua Apolos at Aleksandia gapan yanen, pa Epesas tauen. Me God nop mega opata wat mega kakae iragen amba God ok mega namua iragi anu kakayesen.

²⁵ Namu waenapan upi Apolos Iesu inak megawa wadidiane menan endi me atonu den Iesu oisewa tamanagaet wadidiam wandin. Go me Dion waenapan dup iamoni oisewa megenat anun.

²⁶ Diu opata waine paewa gapan Apolos aro ta tumban amu yone God no oise wadidiamon. Wam da apan Akwila, waenewa Pirisela den, opata mega anune menan apan Apolos pa muga wat nau amon amba God negin mega tamanawa aigap sia Apolos wa ewasen.

²⁷ Evi amba, Apolos at Guris aet anuni menan, Epesas Iesu dugup mega nagirewa me wa agoasene menan Gurik Iesu dugup mega nagirewa inamup ok seane. Iwa Iesu wadiamot upi asepa at Gurik gapan Apolos waupapen menan. Apolos ok muga ware at Guris taueni gapan, God garaet mega gapan, anu tumat tane nagirewa God no oise wadidiam wandin. Mu opata mega anune gapan imumu wat kaimagamen, aro baware waran.

²⁸ Iwa, pa nagirewa iame wanumone gapan Apolos yone nop kaimakaet aroe den God nop mega, namua gapan, Iesu me God watu eneni Keriso wa ewamon. Diu nagirewa upi ya anut anune menan mu nop gare diane, go me epa ta gare wadiamoni gapan Diu nagirewa inamup nop uon tan.

19

Pol pa sewa Epesas tauen

¹ Apan Apolos pa Korin gapan wande en. Ap wamewa gapan, Pol pa Epesas tauen. Ap mepe Iesu wadiamot mega nagirewa upi yomu tani ame yawamo,

² amba singui wayawamon, "Wam ame e anu tumat tayana ame e Guewa Pose Woup Seniwa warayan go uon?"

Mu gare anega wane, "Ae uon, nu Guewa Woup Seniwa da ya anuton."

³ Menan Pol singui sia wayawamon, "E guegue ambe gapan dup iayaen?" Mu gare wane, "Apan Dion waenapan dup iamoni guegue mega gapan dup ianen."

⁴ Pol sia wadiammon, "Dion dup guegue mega ame koewa anu ae ve sia entanapen dupewa. Me waenapan anega wadiammon, 'Ewanap tauepi apanewa inap anu tumasen, ame Iesu di.' "

⁵ Mame wani, mu Ayop Iesu yaua gapan dup iamoni.

⁶ Dup iamone amba Pol naniwa iamup seni gapan Guewa Woup Seniwa mu

potamup tauen, amba merimu tobayanen ian ugupe noa wan, amba God no oise den waiwanumun.

⁷ Apan anu tumat dupewa iamoni ame apan aonagaet pusinawan dere.

⁸ Pol Diu nagirewa opata waine paewa aeni siragam yampo gwanap pura gapan gapan, epara ta, nop kaimakaet wadidiamon. God toemu mega amunua oisewa nop tavewa mu anupen menan Pol wae-napan den nop gare gare waiwanumun.

⁹ Go upi epara tan ya anu tumaset waiwanumun. Mu aroga Iesu anu tumat neginewa inap wawa koko ta wane. Ap menan Pol mu ae vemo, wadiamot nagirewa tambu aen. Mu wam ame use aeniwa iam iam paewa yaua Tiranas gapan pot pot waenapan den anu tumat nopol ame seyao wareyao taiwanumun.

¹⁰ Mame taiwanumune aeni en dere uon tan. Ame wamewa gapan at Eisia arige wanumuine nagirewa, Diu ge Diu uoni ian ugupe nagirewa iravi Iesu oisewa anune.

Apan Sikiva otu wai gutut mugawa

¹¹ God Pol gamup kiman yo paua baware ugup ugup taiwandini.

¹² Menan Pol wanup megawa da paniwandiniwa den atup megawa ame wae-napan ap me tambun vek nagire inamup amone. Wanup ap gapan inak mutan airampu potamup wanumone tau amon.

¹³⁻¹⁴ Diu apan upi, at da da tau ge tau amon, amba airampu waenapan potamupewa wa oimopen taiwanumune. Diu pirisi ayop mugawa yaua Sikiva otu waiwa nani yamu dere mu ap den taiwanumun. Mu iravi Ayop Iesu yaua aroewa gapan airampu wa oimot wan taiwanumune, anega dian, “Apan Pol opata Iesu yaua waini aroewa gapan airampu ge tau ak!” ap anega wan taiwanumune.

Wam da Sikiva otu wai apan da potap airampu wandeni inap ap anega diane.

¹⁵ Go airampu gare diamon, “Ne Iesu asik tan amba Pol den asik tan, go e da?”

¹⁶ Airampu ap wani, apan airampu potape wandeni ame yone set wa aigamup wandeni gure baime ene apan apan tan. Wanup muga benak ae sen, epimu aroga

saget munen, amba mu pa garip serarat tau amon.

¹⁷ Diu amba ian ugupe nagirewa den, oit ame anune menan tap baware anun. Menan mu Iesu viriwa aigap di tane.

¹⁸ Menan Iesu anu tumasine nagirewa, kayao banao koewa muga vetavet aroga tan.

¹⁹ Nuat taine amba banao nagirewa aruga buka muga iravi tam tauane, wae-napan yamamup omaya iramon. Buka iravi iramone garewa muga moni 50,000 mini.

²⁰ Negin manegawa gapan Ayop nop megawa senare tau aen amba Iesu dugup mega nagirewa anu tumat muga kai wariwandin.

²¹ Wan dim dim ma iragi venaseni ewap, Pol imua upe se pa Ierusalem aet anuni menan at Masedonia ge at Guris tau ge tau aeni, amba pa Ierusalem tauat anun. Pol manega wan, “Pa Ierusalem tauapena amba den ange pa Rom yawat anuivin.”

²² Ap anuni menan ago mega dere Timoti ge Erastas at Masedonia watu enamongo me wam upine den at Eisia gapan warden.

Pa Epesas nagirewa anan tan

²³ Wam ame gapan Ayop Iesu anu tumat inagewa taine menan pa Epesas gapan anan da tuk wan.

²⁴ Ap gapan, gwat keri mini, go gwayayame dena, gapan nanip kaisini apane da yaua Demitias, at Epesas gapan wandiniwa. Me gwat ame gapan god muga yaua Atemas mup paewa gueguewa otu kamontua arugataet kaitamuiniwa. Ap kaisiwanumune gapan apan Demitias evene wai den garewa baware ap gapan wariwanumune.

²⁵ Menan god muga kaisine nagirewa apan upi nao muga ap umap taine den Demitias venamu wan tauan. Tauane amba Demitias anega wadiamom, “Tatan gwanin, e asigiap nu kaisitonu garewa baware di warivin.”

²⁶ Go e asigiap, apan Pol me opata gapan anega wadiamuiwan, apan da nanip god nuga gueguewa kaisepiwa ame god da uon, ap opata wani gapan waenapan arugataet at Epesas gapan amba at Eisia paua gapan uruga oit ame anu tumasiwanum.

²⁷ Ap anu tumasepi menan waenapan guewa kaisitonu ya tambupen menan anuin. Amba koewa dawa ame waenapan nu god nuga baware Aremas amba me mup paewa ae antapenain. Nu at Eisia nagire piup iravi den god nuga Atemas aigap wa taragasin, menan ap tapi ame koerage.”

²⁸ Nop ame pa nagirewa den anune gapan, mu ugu gangan mutane amba mu ve erewa anega wan, “Nu pa Epesas nagirewa god nuga baware Atemas.”

²⁹ Ap anega wane menan pa iragi arara babara wa taiwanumun. Amba Epesas nagirewa Gaias ge Aristakas tambumone, mu Pol at Masedonia gapan tanam onamone apane waiwa. Pa nagirewa mu ai okonagen amba iam iam taine paewa gwanap toga uaren ta tauan.

³⁰ Pol anut mega to iam ame gapan wadidiamopen waenapan imumu wap bigarepen menan aet anun. Go Iesu dugup mega nagirewa me ya aepen menan watanane.

³¹ Amba at ame kansoro nagirewa upi, mu Pol evene wai, nop watu enan mup anega wane, “Enda, iam iam taine paewa ya age iwa mu togepi tawa.”

³² Iam iam paewa gapan waenapan iravi anu waramasene iwa upi itap wa atap wa taiwanumun. Waenapan aruga iam iam ame gapan tauane, iwa mu oare.

³³ Diu nagirewa apan muga da yaua Aleksanda iam iam nagirewa namumup baraene, ap menan anu waramasene nagirewa anega anune, arara babara ibariwa apan ma me di. Aleksanda yone waenapan nop ae vep me gare wadiamopen menan naniwa wadaven.

³⁴ Go wam ame iam iam nagirewa me ire yawane me Diu apanewa, menan mu iragi senao wa ge wa tan anega wan, “Nu pa nuga Epesas, god nuga Aremas me aigap iragen!” Ap anega senao waiwanumune amba wam airase dere uon tan.

³⁵ Senao waiwanumune pa sewa kwayup ok sini apanewa baigan tapen men watanamo amba anega diamon, “Pa Epesas waenapan negawa, wapena anun. Waenapan iravi asik tane nu pa Epesas nagire god nuga baware Atemas mup

paewa kwayup taitoni nagirewa. Gwat kimani viseni viriwa kwayupe den taivin.

³⁶ Apan da nop ame ya waboboreta menan nop ae vean bumbawam da ya tane.

³⁷ E apan dere mam naumo onayan go mu god nuga mup paewa gwanap puraput da up ya tan, god nuga yaua da ya wa koeamen.

³⁸ Demitias evene wai den apan da enu yave wat anupiwa ame wanene paewa watapane bawarewa nagirewa gwanap wanumam menan mugenat wat tamana-main.

³⁹ Go nop da aigap sia wat anunewa, waenapan iragi ap mepe iamet amba nop ame sia wait.

⁴⁰ Menan ma dimen taiwanin? Ibariwa nu oare. Bawarewa nugawa nu anan tat anu enu yawan wapi, nu gare anenen wait?”

⁴¹ Ap anega wani iam iam tobore boge pa wa oimon.

20

Pol at Masedonia ge at Guris daio aen

¹ Wam ame arak maken wane uon tani, Pol wadiamot nagirewa munan wan tauane amba dadak diamoni ewap, gaun wan boge at Masedonia aen.

² At Masedonia tau ge tau aiwandini Iesu dugup mega nagirewa iravi epara mun aiwandin eni amba at Guris tauen.

³ Ap mepe siragam yampo wandeni. Amba me kabum gagap at Siria aepen taiwandini gapan Diu nagirewa karaua me tot wane oisewa anuni menan ewagi entane at Masedonia aen.

⁴ Apan Sopata (mamewa Piras) at Beria apanewa Pol den aen. Apan upi tanamo aeni ame at Tesalonaeka apan dere Aristakas ge Sekundas, amba apan Gaias, Dobi apane, amba Eisia apane dere Toropimas ge Taitikas, amba Timoti den.

⁵ Apan ame namu pusimup amon pa Toroas tauane gapan nunan amat tan.

⁶ Go nu barip yaua Taba Buredi Tutut Ya Waini Baripe tugune ewap, ame nu kabum gagap at Pilipai aneton, amba wam nani yamunaet uon tani ewap, at Troas gapan apan upinewa ame tautanamoton,

ap mepe mu den pura daiton tanam wanineton.

Apan Yutikas, Troas gapan boeni ame Pol wat inakamen

⁷ Pura ame ibariwa mum gine, taba buredi ame paise paise ta napen menan iameton. Ap mepe, Pol God nop mega waenapan wadidiamuiwandin. Me woup sese aet anuni menan nop nonongataet wa aiwandini mum gagewa tauen.

⁸ Pa ame diri gagap tune, nu watat aigapewa gwanap wanineton. Ap mepe dun aruga iran seane.

⁹ Orup apan da, yaua Yutikas, taik tonanewa gapan dore wande en. Pol nop nonongataet waiwandini gapan, Yutikas aup boniga ine beuren, pa diri gagap tune watat yampoa gapan onana visen. Waenapan vit amone ae ma warane go me gase boen.

¹⁰ Pol yone vit ae, amba Pol ae geare Yutikas aigap ine bumagap wat nase anega wadiamon, "Gop ya anune me sia inakaen, kabani wandia."

¹¹ Anega wani amba pa sia dot ae, taba buredi paise nan. Nane nop nononga sia tanamo waiwandin woup seni amba me ae vemo aen.

¹² Apan Yutikas kabani wat pa mega amon, ame gapan mu imumua bigaren, aton anune.

Pol pa Epesas baware nagirewa inamup gaun uiwa wa aen

¹³⁻¹⁴ Pol dianeni menan, nu namu pa Asos kabum gagap aneton go Pol pusip aet anun. Pa Asos gapan Pol tautananen kabum gapan dotouen amba pa Mitilini aneton.

¹⁵ Sia anet inaton woup seni pa Kaios tauaton. Sia tau aneton, woup seni pa Samos tauaton amba wam use aigapewa anet pa Mailitas tauaton.

¹⁶ Pol Pentikos baripewa menan serarat pa Ierusalem taut anuni menan me wam mega Eisia gapan ya wakaumat anun. Ap menan me pa Epesas daio ya tapen anun, menan pa Epesas ya tauapen menan nu kabum gagap negin garigat tau aneton.

¹⁷ Menan, pa Mailitas gapan, Pol Epesas Iesu dugup mega kwayup taine nagirewa onamopen menan sep wātu enen.

¹⁸ Wam ame mu tauane, Pol mu anega diamon, "Wataget at Eisia namu tauana yaumakayap iningina amba endi den ap menan guegue nega iragi e asigiap.

¹⁹ E anuyan, Diu nagirewa pot pot toguranegepen menan taiwanumune go ne ae bigat nigesen, irin den Ayop Iesu navewa taingin.

²⁰ E anuyan, pa ega ega gwanap wadidiangina, ame ta warit noa iravi wadiaingina, karaua da ya baraen.

²¹ Ne ian Diu ge ugupe nagirewa God mu koewa muga anu ae vepen menan mu namu vetavet wa amba Iesu anu tumasepen menan inamup aroga waingina.

²² God Guewa Woup Seniwa ne pa Ierusalem anget dianegeni menan ne angewan go dim da ap mepe inanap tauepi, ame ne oare.

²³ Go mame megenat ne asiginap, Guewa manega wadianegen, pa tau ge tau ongepena, ita anan, gwat ninoke megenat tautaningain.

²⁴ Go dim da uon, ne etuna menan ya anuivin amba bop tawa den ya anuivin. Ne anut nega bawarewa ame nao nega Ayop Iesu neneni ame God No Oise Kakaewa, amba me garaet mega gueguewa, waenapan wadidiamopen, gapan nao nega taitamepen menan anuivin.

²⁵ E yaumakayap ise tau ase tau angingina amba God toemu mega amunewa oisewa wadiaena nagirewa go endi ne anuivin, da sia ya yawanegai.

²⁶ Ap menan, ne nop bawarewa ma wapena e neman guran anun, e dim da wadiaena nop nega tandayasenewa, ame ek di, itan ne inanup da uon.

²⁷ Iwa God anut ge tat mega iravi wadiaena, ne daiton da ya karaua baraen.

²⁸ Menan e, Iesu dugup mega kwayup taiana nagirewa, yambuni wanien. God Guewa Iesu anu tumat nagirewa naniap seni menan kwayupe taiwanian iwa Iesu korosi gagap God aigaven tani gapan nunan boen. Ap menan Iesu dugup mega nagirewa kwayup taiwanian, sip kwayup taini apane mini.

²⁹ Wapena anun, ne ae veae angepena ewap, apan upi okoi wasipen mini tauain.

Enan bagu sisi mu ya anuin go Iesu dugup mega nagirewa gure oimop ewai amoin.

³⁰ Amba waenapan ega da da Iesu wadiamot negin mega ame ae veapen menan ebo aopan wain amba Iesu dugup mega nagirewa upi naumo negin ugup amoin.

³¹ Ap menan, yama taiwanian, ne enan tana anu nimanek wanian iwa enan en yampo gwanap mum ge woup irin den e iragi wadidiaingin.

³² Endi God nani gwanap seaivin. God nop mega gapan garaet ta warit imaeni ame gapan kwayup taep. Nop mega ame batnagene gapan aro tai. Ap gapan den God wat aipakam mega iravi tanai, wat aipakam ame God waenapan mega munan.

³³ Ne gwat make go wanup ega da yawana ame imuna ya waren.

³⁴ Menan, e di anu awan, ne naninap nao taingina gapan evena wainan den iningina dim da menan anuintoni, garewa ne taingin.

³⁵ Nao kaimakaet ap taingina gapan ne to ewaena ame nu aro uoni nagirewa ta warit mumapen. Menan Ayop nuga Iesu wani anu nau aninan. Me anega wani, ‘Nu wan dim dim waenapan ase munata, ame aton aigap tautanait, go waenapan wan dim dim nuneipiwa ame aton gauarap tautanait.’ ”

³⁶ Pol nop mega uon tani ewap, omanip enun waenapan den God inap mup wan.

³⁷ Ame gapan mu iragi iri den Pol waran gaune tan ua ton.

³⁸ Pol evi sia ya yavepi nopol wadiamoni menan, mu bagu sisi baware anun. Menan Pol kabum gapan watu enapen menan, tanan amon.

21

Pol pa Ierusalem aen

¹ Waenapan den gaun gare gare tatoni amba bagu sisi baware den ae vemot aneton, nu kabum gagap dotouat tamana ane pa Kos tauaton. Inaton, woup seni anet at Rodes tauaton, amba aneton pa Patara tauaton.

² Ap mepe, kabum da ugup sia at Ponisia aepen tan menan nu ame gagap dotouat aneton.

³ Puiman topaneni at Saiparas senip arige gapan ase yawatoni amba mainep tau at Siria menan di aneton. Nu pa Taya tauat amba ae vitaton iwa kabum i nagirewa puraput muga ap mepe ae seat anune menan.

⁴ Iesu dugup mega nagirewa yomu tat yawamotoni ame pura daiton den ap mepe tanam wanineton. God Guewa anennen Ierusalem gapan Pol inap venasepiwa wadiamoni menan Iesu dugup mega nagirewa Pol pa Ierusalem ya aepen dian.

⁵ Daio nuga wamewa uon tani, ame nu ae vemot sia aneton. Iesu anu tumasine apane, waene otu wai den tanamo pa sewa aveat amba puiman etop gerata omaninup enut mup waton.

⁶ Amba gaun gare gare ta watoni ewap nu kabum gagap dotouaton, amba mu ewagai pa amon.

⁷ Pa Taya ae veat ap sia anet pa Tolomas tauaton. Iesu dugup mega nagirewa yawamot gaun waton amba wam daiton mu den wanineton.

⁸ Inaton woup seni anet pa Sisaria tauaton amba oise kakaewa waini apane Pilip pa mega gapan wanineton. Namua, pa Ierusalem Iesu dugup mega nagirewa, Pilip waenapan agim make yan se munapen amba Iesu dugup mega nagirewa kwayup tamopen menan om enun.

⁹ Pilip ore waiwa, ame degede waenorini denawa ap mepe wanumuinewa. Mu God nop mega opata gapan wainewa.

¹⁰ Ap mepe wam animpo da waninetoni God nop mega waini apane da yaua Agabas at Diudia gapan vit oneni evi venasepi oisewa namu wan.

¹¹ Inanup taue amba Pol berip kankamup panini ware mek pusi nani paneni amba evi venasepen noa namu anega wadien, “Guewa Woup Seniwa anega waiwan, Berip mame panana mini Ierusalem Diu nagirewa apan Pol ware panain amba ian uguge nani gwanap barain.”

¹² Nop ma anutoni gapan, pa nagirewa amba nu den, Pol pa Ierusalem ya dot aepen menan nu irin den watanaton, Pol anega diaton, “Apan nugawa, ge Ierusalem ya agai.”

¹³ Go Pol gare anega wan, “Iwa dimen e iragi iri den anega potana todum wadum taiwanin? Ne pananegepi megenat ya anuivin, go den pa Ierusalem gwanap Ayop Iesu menan bonigasepen menan anuivin.”

¹⁴ Nu watanaton go me epara ta di aet anun, ap menan nu ae veat anega waton, “Umap, God anuni gapan venasep.”

¹⁵ Wam animpo amba nu puraput nuga, sese kakayat tat, amba pa Ierusalem dot aneton.

¹⁶ Iesu wadiamot nagirewa upi pa Sisaria gapan tauan tautananen, amba naunen apan Neson, at pa mega anet den waninet wan. Neson at Saiparas gapan taueni apanewa amba me Iesu erewa gapan anu tumat tani apanewa da.

Pol at Ierusalem gapan apan Diemis inap daio aen

¹⁷ Pa Ierusalem tauatoni gapan Iesu dugup mega nagirewa atonu den waup nimanen.

¹⁸ Inaton woup seni Pol amba nu iragi apan Diemis inap daio aneton. Ierusalem Iesu dugup mega kwayup taine nagire amena Diemis den tanam wanumon.

¹⁹ Pol gaun inamup wani amba God aro waneni gapan Diu uoni nagirewa yau-makamup nao mega taiwandini oisewa wadiamon.

²⁰ Mu nop ma anune, mu God wa atonasen. Amba mu Pol inap anega wane, “Tatan Pol, mapa Diu nagirewa arugataet Iesu anu tumasene, amba God iup mega tantanewa waiwanum, ame ge asigigap.

²¹ Go mu ge oitaga anega anune, ame ge ian ugupe at muga gapan wanumuine Diu nagirewa iravi Mosis iup namua seni amba Diu gutut nuga tat mega ae veapen amba orup apan etua muga paua tum ya tapen wadidiamuingiana, ap anune.

²² Ge mapa tauana oisewa mu di anuin, ap menan ge dim da tai?

²³ Menan nu wadiageta gapan ta. Apan degede mapa mu agi God inap wane.

²⁴ Mu imumu woup sepen menan God yampaua tapi, ge den tanam ta. God garaet wanat anune garewa ge munan se amba mu i gume ware ae seain. Boge Diu nagirewa iragi anu awain oit gega namu

anune tavewa uon, go gek ingane Mosis iup namua seni ayamase taiana apanewa.

²⁵ Go Diu uon, ian ugupe Iesu anu tuma-sine nagirewa guegue nuga iragi ya tapen menan ok manega inamup enuton, Waenapan nanimup god eboewa guewa kaitane ameme antaba wat irine god muga munapen ame tabaewa ya nane. Amba man deniwa ya nane. Amba man mege wat imokaminewa ya nane. Amba waen ge apan wainan gogo ya tane.”

²⁶ Pol apan degede ame den tanam ae inen. Woup seni imumu God yamp woup sepen menan paua tan. Tane God Paewa unuk ae agi wane gueguewa wam ansena gapan uon tapi amba God menan man irinewa oisewa den pa nagire wadiamon.

Ita nagire Pol kaimakaet waran

²⁷ Wam ame pura daiton uon tapen taiwandini, at Eisia Diu nagirewa, upi God Paewa gwanap Pol yawan. Menan waenapan ame uruga anan datnak mumane Pol waran.

²⁸ Mu senao anega wane, “At Isurero apane wai tawarit nimanen! Apan mam, at at iravi tau ge tau aiwandini, waenapan iravi nu Diu nagirewa tandaya nimanen amba Mosis iup seni ae veapen amba God Paewa gapan tandaet den wadidiam wandin. Amba den Diu uoni nagirewa, tambun God Paewa mapa naumo onen. Ap tani God Paewa, virip arewa mame wabigimen!”

²⁹ Mu ap anega wane iwa mu at Epe-sas apan da yaua Toropimas, Diu uoni apanewa, Pol den pa Ierusalem tauane yawamo anega anun, Pol apan Toropimas den God Paewa gwanap amone.

³⁰ Menan arara babara wane, pa nagirewa iravi toga uaren tan tauan, Pol okokok warupan God Paewa garip tau amon. Boge, God Paewa tonan amase taine nagirewa God Paewa tonan iravi toboram.

³¹ Ierusalem nagirewa Pol top boopen taiwanumune arara babara waiwanumune oisewa at Rom ita nagirewa baware mugawa inap tauen anun.

³² Me oit ame anuni gapan, menawaet ita yame bawarewa upi amba gauarapewa nagirewa tambu serarat waenapan to iam ame nimakamup tauan.

Waenapan Pol towanumune gapan ita nagirewa yawane menan Pol ae veane.

³³ Ita yamewa Pol inap tauue damik dere kaimake dena gapan Pol panapen diamon. Panane amba ita yamewa apanewa singui wayaven, “Apan ma da? Me koewa dim da tan?”

³⁴ To iam ame gapan upi nop senao waiwanumun amba upi senao ugup waiwanumune. Arak maken mame gapan ita yamewa tavewa yope tan, go Pol dim da tani me ya anun. Ap menan ita nagirewa Pol warupe pa muga amopen diamon.

³⁵ Wat amone, nesip gine tauane gapan waenapan arugataet guguk wa tauane menan Pol paina ao waran dot amon.

³⁶ Pa nagirewa, Pol evip onamone kaimakaet ve anega waiwanumun, “Toguran wat aisen!”

Pol to iam inamup opata wan

³⁷ Ita nagirewa Pol pa muga gwanap wat amopen taiwanumune gapan, Pol ita yamewa inap anega singui wayaven, “Ne nop inagap wapena, umap?”

Ita yame ame gare anega wan, “Ge nop Gurik waiana apanewa?

³⁸ Go ne anuna ge at Idip apane anun. Apan ame watageta Rom kansoro nagirewa inamup tandayasiwandin anan datnak mumeni amba 4000 ita nagirewa naumo at kaimewa aen, ge apan ap me go?”

³⁹ Pol gare wan, “Ae, ne ap da uon. Ne Diu apanewa at Silisia pa sewa Tasas gapan yanan. Ne pa sewa bawarewa ame apanewa. Ne waenapan wadiamot anuivin, ame umap go?”

⁴⁰ Ita yamewa umap wani menan Pol nesipa yone waenapan nop ae veapen menan naniwa ao wadaven. Wam ame mu nop ae veane, me Iburu nop muga gapan inamup nop wan.

¹ Pol anega wan, “Maman wainawa, tatan gwaninawa, enu yawanegean wiana garewa wapena anun.”

² Nop muga Iburu gapan wani menan waenapan nop iragi ae vean.

Pol sia anega wadiamon,

³ “Ne Diu apanewa, at Silisia pa sewa Tasas gapan yanan. Go ne Ierusalem gapan kai waran baware tan amba wadiagnevi apanewa ame Gamelio, nu omayan bae iup muga baware ame seane wadiagnevi anu kakayasen. E endi God menan amunugaet taiwaniana ap umap ne taingin.

⁴ Iesu anu tumat negin megawa gapan amuine nagirewa ne wa koeragam mumingin amba upi borit wane. Amba waenapan ame kaimakaet tambun pamanon amba gwat noke semuingin.

⁵ Ne oitana mame pirisi baware megawa amba kansoro nagirewa iragi mu asigimup, ne tave di waivin mu den wain. Mu inamup namu yoyo ogewa seanewa tambun. Ap me tambuna menan Damaskas angena. Iesu anu tumasine nagirewa, waen ge apan ap mepe da wanumopi, damiga panamo aibu okonak pa Ierusalem ewagai entan ongepen menan angen.

Pol Iesu anu tumat tani oisewa wan

⁶ Wam ianupe mini ne Damaskas neginewa angen pa Damaskas maningina gapan, dun ganat baware da kimani aoma gamunap enun ganasewa inan mainen bararaen.

⁷ Ne piupa geanegena nop anuna anega wani ‘Sol, Sol dimen ta koeragam ni-manegingi?’

⁸ Ne gare wan, ‘Ayop, ge da?’ Ayop anega wan, ‘Ne Iesu at Nasaret apanewa ta koeragam ni-manegingi.’

⁹ Mu tanam ongena nagirewa nop wani da ya anune, go mu ganat megenat yawane.

¹⁰ Ne gare wan, ‘Ayop, ne anenen tain?’ Ayop gare anega wan, ‘Ao yon Damaskas ak, ap mepe orup da wadiageta.’

¹¹ Ne tanam ongena nagirewa nanimup waranegene at Damaskas aneton, iwa kimian kapesiewa enun menan yaman borasen.

¹² Apan yaua Ananayas ap mepe wanden. Me God menan anun taini apanewa, Diu iup nuga ayamase taiwandini, Diu pa Damaskas nagire iravi ayamat tainewa.

¹³ Ananayas ne inanap tauen. Me inanap yone anega wan, ‘Gwaninawa Sol, yangut sia ta.’ Boge yangut tana, ase me yawan.

¹⁴ Me anega wan, ‘Wataget omayan bae God mugawa om enu geneni navewa tapen, den Apan Tamanawa ire yawapen, amba nop mega wapi anupen.

¹⁵ Dim da ge yawa anuanawa oisewa waenapan inamup wa senamepen menan.

¹⁶ Endi, dimen nononga tait? Ao yon, dup iagepen ge koewa gega bigi warep.’

God Pol ian ugape wadidiamopen menan om enun

¹⁷ Wam animpo ewap ne pa Ierusalem entan angena, God Paewa gwanap, God inap mup waingina ame gapan bet inan yawan.

¹⁸ Ne Ayop yawana me anega dianegen, ‘Menawaet at Ierusalem ae di ve ak iwa ge guturana waingawa mu nogya di anu warain.’

¹⁹ Ne gare wan, ‘Ayop, mu asigimup Diu opata waine paewa gwanap tau ge tau angena mu da da anu tumat gimate na-girewa gwat nokap semon guramuingin.

²⁰ Amba wam ame oitaga waini apane Sitiven togurane boeni ame ne ap mepe den yonan yawamon umap wan. Amba Sitiven toguriwanumune nagirewa wanup muga ne amat taingina. Menan ne nop nega warain.’

²¹ Ayop sia dianegen, ‘Ge at wandap ian ugape nagirewa inamup watu enagepen, ak!’”

²² Waenapan Pol nop mega anuiwanumune, go mu nop uiwa ame Ayop me Diu uoni nagirewa inamup aepen dieni anune menan mu sia nop ya anut anune amba nomu ainagassen amba senao anega waiwanumun, “Piup ma gapan me wat mutan! Me tone boep! Me wande wande umap uon!”

²³ Mu senao waiwanumune, wanup aigape muga totnak ase uatamen

amba ugu gangan anune menan piup ataboboewa tam ao uatam wanumun.

²⁴ Ita yamewa Pol ware pa muga amopen diamon. Ita nagirewa Pol waran pa gwanap amone. Gwanap tauane, Diu nagirewa Pol inap ugu gangan anu senao manega waiwanumune tavewa anupen menan ita yamewa Pol gaut gapan kaimakaet topen diamon.

²⁵ Mu naniwa endimasen gaura topen di taiwanumune gapan, Pol ita apanewa, amena yoniwandini, anega dien, “Ne at Rom gapan aro warana apanewa, koewa da ya tan. E ya wayawanegean amba tonegepen taiwanin? E at Rom iupewa da topaisiwanin.”

²⁶ Wam ame ita apanewa nop ma anuni, me ae ita yamewa inap singui anega tayaven, “Apan ame nu at nuga Rom apane da. Ge dim da tai?”

²⁷ Ap menan ita yamewa ae Pol inap singui anega wayaven, “Wadianek, ge at Rom apanewa da go?” Pol gare wan, “E, ne ap me di.”

²⁸ Ita yamewa Pol inap sia dien, “Ne agim make baware at Rom i nagirewa munana gapan ne at Rom entan nimanegen.”

²⁹ Pol gare wan, “Go ne at Rom gapan yanana apanewa.” Pol wani boge ita nagirewa iravi tap anun ae ve asira amon. Ita yamewa den tap anun iwa Pol, at Rom apanewa, damiga panane menan.

Pol kansoro nagirewa namumup aen

³⁰ Inane woup sen. Ita yamewa Pol damik vese amba tavewa anu kakayasepen menan Diu kansoro na-girewa iam iam tapen diamon, Pol singui wayawapen menan. Diu kansoro nagirewa iam iam tauane gapan, me Pol ware tauan wan, mu namumup yonen.

23

¹ Pol kansoro nagirewa ame kem kem yawamoni amba anega wadiamon, “Tatan gwaninawa, ne wataget amba endi den God ne asigip tan. Ne imuna bigaren, ian guine kakaewa gapan ne koewa da ya tan, mame tauan nop waivin.”

² Anega wani menan pirisi aritawa mugawa, apan yaua, Ananayas, Pol mainep

wanumuine nagirewa Pol no to ponamepen diamon.

³ Tone boge Pol gare wan, “Oma gega etua yavingi go posewa ya yavingi. Garewa God amba togep. Ge iup nugagapan wanene tanegepen menan amena wanik agi, go ne toneget diamoana ame iup nugagapa paina yamasean.”

⁴ Pol mainep yoniwanumune nagirewa Pol anega dian, “Ge iwa dimen God pirisi baware mega, ayop nugawa wa koeamingi?”

⁵ Pol gare wan, “Kaiwan, tatan gwanin, me bawarewa nugawa ap me, ne ya anun. God nop mega anega seane, ‘Ge waenapan ayop mugawa ya wa koeame.’”

⁶ Boge Pol kansoro nagirewa dugup dere Parisi amba Sadusi nagirewa ap mepe iam wanumone anuni menan, kansoro nagire inamup anega wan, “Tatan gwanina, ne mamana dugup mega Parisi amba ne den dugup Parisi apanewa. Ne anu dao nega ame borit wane nagirewa God inakam mumepi sia yon wanumopi anu tumasivin menan endi mame wanene tanek wanin.”

⁷ Wani boge dugup Parisi ge Sadusi nagirewa ere notatae waiwanumune menan kansoro nagirewa seu endumane.

⁸ To iam ame to dumane iwa mega dugup Sadusi nagirewa anega anu tumat taiwanum, ame borit wane nagirewa God sia inaka mumep yon wanumopen da den uon amba anea o guewa gine ugup ugup da uon, anut muga ap anega. Go Parisi nagirewa ap iravi anu tumat taiwanum.

⁹ Ap menan nop baware da verat mutan wane, amba Parisi nagirewa upi iup wadidiamuinewa, mu ao yonan garewa kaimakaet anega wan, “Nu apan ma koewa dim da tani nu ya yavivin. Nu anuivin anea da, o guewa da, me inap nop wan!”

¹⁰ Notatae baware gare gare wan amba toto mutapen taiwanumune menan ita yamewa Pol menan tap anun iwa kansoro nagirewa Pol yamu yamu wa totomagepi tawa. Ap menan ita nagirewa diamoni, anan taine nagire yaumakamup vit amon, Pol waseamon ita nagirewa pa muga amon.

¹¹ Mum ame gapan, Ayop Iesu Pol inap taue anega wan, “Aro ta wanik! Pa Ierusalem gapan oitana waingiana mini pa Rom gapan den oitana waingan.”

Pol togurapen menan noa karaua panan wan

¹² Inane woup seni ame Diu nagire Pol togurapen menan nope karaua panan. Muk nop anega barimen wan amba taba ge kaum ya napen menan virip tan amuiwanumun, Pol togurepi amba nain.

¹³ Nop karaua panan togurapen wane nagirewa apane dere (40) amba aigap den sia.

¹⁴ Mu amon, pirisi bawarewa amba dima waine nagirewa anega wadiamon, “Nu wa agi kaimakaet God yaua gapan tatoni ame nu dim da ya nait go aninan, Pol togurat boepi amba taba ge kaum nait.

¹⁵ Menan e ge kansoro nagirewa den at Rom ita nagirewa bawarewa mugawa inap nop manega watu enane. Pol gutut mega wap anu kakayasepen menan ita nagirewa Pol wat onamop. Aopan anega wane amba wat onam wanumampina, Pol togurapen menan nauase waninait.”

¹⁶ Go Pol wanugewa, apan tamaru da, nop ma paniwanumune anuni me ae ita nagirewa pa muga unuge Pol oit wadien.

¹⁷ Boge Pol ita apane vene wan oneni amba anega wadien, “Tamaru ma ware ita yamewa ine ak, me oit da wadiat anuiwan.”

¹⁸ Ap menan ita apane ame, ita yamewa inap taue anega wan, “Waratoni apanewa Pol nenan wan amba orup mame ge inagap wat ongepen wan iwa nop da wadiagepen anuiwan.”

¹⁹ Ita yamewa Pol wanugewa nanip wat nau asirantu amon mugenat wanumone singui wayaven, “Ge dim nop da wadiagepen tauaan?”

²⁰ Pol wanugewa gare anega wan, “Wam imanawa Diu nagirewa ge diagep Pol wara kansoro namumup tauapen menan wawa mutane ame Pol mu inamup nop wap anu kakayasepen menan aopan waiwanumun.

²¹ Go mu nop muga ya anu iwa apan muga apane dere (40) amba aigap den,

Pol togurapen menan nauat ponamene, negina wanumamun. Mu God yaua gapan agi kaimakaet wawa mutane ame tabage kaum ya nain, Pol togurepi amba nat wane. Endi mu gaseget nauat wanumam, nop gege amase taiwanum.” Pol wanugewa ap anega wan.

²² Ita yamewa anega wan, “Oit ma wadianegeana ame waenapan da sia ya wadiamo.” Amba Pol wanugewa watu enen, aen.

Pol waran ayop yaua Pilikis ine amon

²³ Ita yamewa ame, ita apane dere venamu wan tauane, amba nop anega wadiamon, “Ita nagirewa iragi 200 amba man hosi gagap amopi nagirewa apane yampo aonagaet (70) amba ita tambupi nagirewa 200, muma aup ina ina wamewa gapan pa Sisaria di amop.

²⁴ Man osi Pol menan wanana, e den hosi gagap kwayup ta aisen, Ayop Pilik ine tauan.”

²⁵ Amba ita yame ame ok da manega enun,

²⁶ “Kaewa kaewa, ayop nega Pilik ge bawarewa negawa, ne yauna Kolodias Laisias.

²⁷ Diu nagirewa apan ma ware togurep boopen taiwanum. Go me at Rom apanewa da anuna menan ita nega nagirewa den anet waseam onanton.

²⁸ Mu dimen enu yawan waiwanumune, ame anu kakayaset anuna menan, Diu kansoro nagirewa muga namup Pol wat nau angen.

²⁹ Ange tauana anun, koewa mega boe boe o gwat noke bare bare tani iwa mega da ne ya anuna. Go Pol inap singui yasiwanumune ame Diu nagirewa iup muga gapan taiwanumun.

³⁰ Mu karaua togurat anune oisewa anuna menan inagap watu eniangin. Diu nagirewa sia enu yawat anupi ge namugap yone wapen menan ne Diu nagirewa ap anega diamon. Ok nega otu mame uon tan.”

³¹ Ap gapan ita nagire ayop muga diamoni gapan Pol waran muma amon, pa sewa Antipatis tauan.

³² Inane woup sen, ita nagire ame pusimup onamone ae vemon, ewagai entanan pa muga, Ierusalem sia amon. Man osi gagape nagirewa mugenat Pol den amon.

³³ Pa Sisaria tauane, bawarewa ayop Pilik inap tauane amba ita bawarewa muga ok enuni ame wanane amba Pol me nanip gwanap baraen.

³⁴ Ayop Pilik ok ame batnageni amba Pol singui tayaven, “Ge at ansena gapan tauan?” Pol gare wan, “Ne at Silisia apanewa.”

³⁵ Amba Pol inap anega wan, “Ge enu yawagen wane nagirewa mapa tauepi ame gapan wanene tagain.” Wani amba Erot pa mega namua gwanap Pol yambuni wandepen menan, ita mega nagirewa kwayup tat diamon.

24

Diu nagirewa Pol enu yawan wan

¹ Wam nani yamunaet uon tani ewap, pirisi bawarewa aigamupewa, yaua Ananayas, amba dima waine nagirewa upi, tanamo pa Sisaria vit amon. Mu wanene noa tamanamini apanewa, yaua Totalas, den amone. Pa Sisaria tauane amba ayop Pilik namup yonane, apan Pol koewa taini oisewa wap anupen menan.

² Wam ame Pol vene wane pa gwanap unuk aeni gapan apan Totalas Pol koewa tani oisewa ere anega wan, “Bawarewa nugawa, apan Pilik. Nu nonup gege gauarap aton nonongataet di ta onaninton, nunan anuana menan nu koewa nuga aruga wat tamanam nimanean.

³ Ap taingiana menan nu pot pot atonuga den gaun baware inagap anuivin.

⁴ Go wam gege ya wakaumat anuivin menan baguga inanup anu ame nop nuga otu mame ge anupen menan nu mup inagap waivin.

⁵ Apan Pol mam, me koerage iragen yawaton. At at iragi amba Diu nagirewa den anan tapen menan nanam mumiwandin. Me anu tumat dugupewa, yaua Neserinis, God inap ebo aopan anuine apanewa da.

⁶ Apan Pol mame, Ierusalem gapan God Paewa wa koeamet wani menan nu waraton.

⁷ Iup nuga gapan wanene tat anuton go ita yamewa apan Laisias taue kaimakaet naninup wasean aen.

⁸ Sia enu yawat wat anutoni namugap yonapen dianen.

Ge Pol singui wayawawa dim dim iravi enu yawat watoni oisewa wadiagep anui."

⁹ Totalas Pol ap anega digureni gapan, Diu nagirewa den anega wan, "E, nop mega tavewa di waiwan."

Pol gare wan

¹⁰ Ayop Pilik, Pol me inap nop wapen menan nani piru tan. Pol gare anega wadien, "Nu anuivin ge en arugataet at nuga gapan wanene taingiana menan namugap yonan, nop muga garewa wadiagepen menan ne atonu den wadiagain.

¹¹ Waenapan wayawamo, ame mu wap anui, nu wam garinup aeni, wam aonagaet pusi nawan dere megenat gapan, God wa taragasepen menan Ierusalem dot angen.

¹² God Paewa gwanap o Diu opata waine pa gwanap o Ierusalem gapan, at ap me gapan notatae da ya waingin amba waenapan anan ya datnak mumingin.

¹³ Endi mondi enu yawanegene waiwanum go tavewa da mu ya wadiagain.

¹⁴ Go nop daiton gapan mu tavewa di waiwanum, ame ne Iesu anu tumat neginewa gapan God, nu omayan bae God nugawa, ne wa taragasivin. Go Iesu anu tumat neginewa ame mu aopan dian Apan Mosis iup megawa ge God noa wataget waiwanumune nagire ok seane den ne anu tumasivin.

¹⁵ Ne waenapan mame taine mini ne anu dao God inap taivin. Anu dao tavewa ame, waenapan kakaewa amba waenapan koewa, mu iravi borit wane evi wam uiwa gapan inak muse sia yon wanumoin.

¹⁶ Ap menan, ne God ge waenapan namumup bigat nigat wanik wanigepen taivin menan pot pot wa panan di ta dorivin.

¹⁷ Amba ne en animpo mini pa Ierusalem gapan ya waingena menan, ne yan garaet waenapan nega, Ierusalem

gapan munat anuna menan wat ongen. Den man da God inap gura irat anun.

¹⁸ Ame gapan ne God yamap imuna woup sepen paua tan. Guegue ame taingina waenapan mame yawanegene. Ap gapan ne inanap, waenapan da ap mepe ya iame amba dim da da koewa ya taiwanumune.

¹⁹ Go Diu nagirewa at Eisia gapan wanumuine ap mepe den yawanegen. Tandayat nimanegene mu mapa namugap tauapo enu yawanek wapo.

²⁰ Go ian ame ya tauane menan, Diu nagirewa mapa ne wataget kansoro nagirewa namumup yonan menan koewa nega da yawane endi ame wadiagep.

²¹ Go namumup yonana, nop daiton megenat kaimakaet manega wan, 'Ame borit wane nagirewa evi inak muse sia yon wanumot anuna menan endi e wanene tanek wanin.'

²² Boge, ayop Pilik, me Iesu anu tumat neginewa asigip tani menan wanene ame toburat anun, amba anega wan, "Ita yamewa yaua Laisias mapa taupei amba ge koewa da taan go uon ame ne amba wadiagain."

²³ Menan ita nagirewa mega ame Pol kwayupe yambuni tapen dien go ap ap otu da aet anupi me ya watanep. Pol dimen anuni evene wai taué wanep.

Pol ayop Pilik waenewa dere namumup yonen

²⁴ Wam animpo amba ayop Pilik waenewa, ame Diu waen da yaua Durusila, dere tauan. Pol menan wan taueni amba Pol Iesu Keriso inap anu tumasepi gueguewa wadiamoni mu anune.

²⁵ Pol inak tamanawa, ingane wat tamanam, amba wanene wam evi taupei gueguewa ugup ugup mam waiwan-dini menan, ayop Pilik tap anu amba anega dien, "Endiwa menan ame umap! Ganawan ak. Ne nao nega wamewa arok da wandepi ame ne nop sia genan watu enain."

²⁶ Pilik Pol gwat ninoke ae veapen menan agim make da garaet karaua wanat anuiwandini. Menan pot poraet nop dere gare gare waiwanumun, go Pol agim make da ya wanen.

²⁷ En dere uon tani, ayop Pilik nao da ugup aen. Garewa mega Posias Pestas tauen, uewa waren. Pilik Diu nagire me yaua ao warapen menan Pol gwat nokap di wandet wa ae ve aen.

25

Pol ayop Pestas namup enu yawan wan

¹ Apan Pestas, Pilik uewa wareni gapan, wam yampo ewap, pa Sisaria ae ve amba pa Ierusalem dot aen.

² Ap mepe, pirisi baware nagirewa amba Diu namu yoyo nagirewa, Pol enu yawa wapen nopewa apan Pestas inap kaimakaet mup anega wane, "Ayop nugawa, nunan anu,

³ Pol at Ierusalem watu en." Ap anega wane, iwa Pol nauase wanumo togurep boet anun.

⁴ Apan Pestas gare anega wan, "Pol at Sisaria gapan wat nasep wandep, amba wam konitu amba ne at ame sia angepen taivin.

⁵ Ap menan dima ega apane wai upi ne den tanamo angep amba apan Pol ap mepe me koewa tan go uon singui wayavep."

⁶ Ayop Pestas wam nani yamu nani yamu yampo o wam aonagaet tanamo wandeni ewap me pa Sisaria vit aen. Sisaria taueni inane woup seni ame wanene paewa unuk ae ayop watat mega gagap paina ae wande, amba Pol wat nau onamo me namup tauapen wan.

⁷ Wam ame Pol taueni, Diu nagirewa da da pa Ierusalem gapan vit onamone ame mu Pol enpanan yongan nop kaimake den me enu yawan wane, go nop muga tavewa uon.

⁸ Boge Pol nop garewa anega wadiamon, "Ne koewa dim da ya tan den Diu nagire iup muga da ya topaitan, o God Paewa gapan dim da ya wa koeragamen amba ayop nuga Sisa inap den ne koerage da ya wan."

⁹ Go Pestas Diu nagirewa aton munepmek yaua ao warapen menan Pol singui anega wayaven, "Ge imugap, pa Ierusalem dot age amba namunap ap mepe yona, ne wanene taget anuingi go?"

¹⁰ Pol gare anega wan, "Endi ne ayop Sisa wanene mega arige gapan di wanik

angin, menan iwa dimen Ierusalem angain? Ne Diu nagire inamup koewa da ya tan, ge gek ingane asigigap di taan.

¹¹ Ne iup paina yamasepo o koerage bonigasepen menan tapo ne tap ya tau anget anupo. Go enu yawanek wane tavewa uon menan waenapan da nanimu gwanap ya bat nimanegain. Ap menan ayop Sisa megenat wanene tanegepen waivin."

¹² Pesta kansoro mega nagire tanamo wawa mutane ewap, anega wadien, "Ge ayop Sisa inap aget waan menan ayop Sisa inap di watu enagain."

Pol ayop Agiripa, waenewa den, namumup yonen

¹³ Wam da amba ayop Agiripa, waenewa Bonis dere, apan Pestas pa Sisaria erektaueni menan gaun aton wanapen menan tauane.

¹⁴ Daio wam animpo mini wanumone, amba apan Pestas, Pol oit mega ayop Agiripa manega wadien, "Apan da mapa Pilik gwat nokap ae ve aen.

¹⁵ Wam ame ne pa Ierusalem angena, ian Diu nagirewa, pirisi muga bawarewa amba dima waine nagirewa, Pol enu yawan wane, ame ne itan wanapen menan wayawanegen.

¹⁶ Go ne gare manega wadiamona, ameme nu Rom nagirewa guegue nuga manega, apan da koerage tani menan enu yawapen anuta, namu koewa tani apanewa amba enu yawan waiwanumune nagirewa den, at daiton wanumo mu gare gare nop wap iwa me koewa tani oisewa mek wa tamanamepen menan arok wanat amba wanene nagirewa nanimup barait. Nu wanene nuga guegue ap anega.

¹⁷ Ap menan, wam ame mu ne tau-tananek mapa tauane, ame ne wanene wamewa ya wakauman go inan woup seni gapan menawaet wanene watat mega gapan ae waingen Pol wat onamot dia-mon.

¹⁸ Enu yawan waiwanumune nagirewa ao yongan nop wane. Mu enu yawan wane menan ne anuna koewa baware tap gapan enu yave waiwanumat anun, go uon.

¹⁹ Garewa, muk aopan anune menan gare gare notatae waiwanumun. Amba Iesu boeni oisewa wane, go Pol Iesu inakae sia yon wandet wan.

²⁰ Ne inak ap mini ne oare. Menan ne singui Pol anega wayawan, ‘Ge pa Ierusalem dot age ap mepe ne wanene tagepen anuingi go?’

²¹ Go Pol tanda wan. Mapa gwat nop wandet anun amba ayop baware nuga Sisa wanene mega wa kakayaset wan. Ap menan ne ita nagirewa me wat nat kwayup tapen menan diamon, evi amba ayop nuga Sisa inap watu enain.” Apan Pestas ap anega wadien.

²² Boge ayop Agiripa apan Pestas anega dien, “Ne anuingina, apan ma nop wapi nek anut anuivin.” Pestas gare wan, “E, umap, iman amba nop mega wapi anui.”

²³ Inane woup sen, ayop Agiripa waene Bonis dere ayop wanupewa tambu enan, guegue mugā yaemanfu gwen gwen mutan onam wanumun, iam iam paewa tauan. Ita yamewa nagire amba namu yoyo nagirewa den tanam tauan. Apan Pestas wani menan Pol wat onamon.

²⁴ Pestas anega wan, “Ayop nuga Agiripa, waenapan mapa tauayana nagirewa den, wapena anun, apan ma yaviwaniana Diu nagire mapa pa Sisaria amba pa Ierusalem gapan den me tandayasiwanumun. Amba senao wan anega waiwanumun, ‘Me boep, me boep!’

²⁵ Bop tata iupewa da ya topaiseni menan amba me ayop baware nuga Sisa wanene tat wani menan, ne at Rom watu enain.

²⁶ Go iwa koewa mega da tani ne oare menan bawarewa nuga Sisa inap ok anenen enuin? ap menan e iragi namuyap wat ongen. Go ayop nega Agiripa ge namugap iragen wat ongen. Anse, nop oit mega anune ne anenen ok seapena anuin go?

²⁷ Iwa ne gwat noke apanewa ayop nuga bawarewa inap union watu enapena go koewa tani ogewa ya seapena ap me koerage.” Pesta ap anega wan.

26

Pol garewa ayop Agiripa wadien

¹ Ayop Agiripa Pol anega dien, “Umap, genan nop gega gek di wa.” Ap menan Pol naniwa ao wadave amba nop garewa anega wadiamon,

² “Ayop Agiripa, Diu nagirewa enu yawanek wane menan endi ne garewa namugap nop wapena menan aton baware anuivin.

³ Aton anuivin iwa Diu nagirewa gutut nuga amba notatae nuga ge asigigap. Ap menan nona ge yaemantu anupēn menan mupewa inagap waivin.

⁴ Ne orup otu waingena, ge guegue nega inan taingina ameme Diu nagirewa asik tane. Ne at Isurero pa Ierusalem den yonan ingina ame den asigimup.

⁵ Mu wam nonongataet asik di tanegene menan guturana mame wat anupi di wain go uon, ne oare. Ne Parisi nagirewa dugup muga apanewa da. Nu Parisi nagirewa iup kaimakaet waraton taintoni nagirewa, iup da ya topaiseton.

⁶ Go endi anu dao negawa ame God omayan bae nugawa inamup agi wa agiat mumeni menan enu yawanegene waiwanum.

⁷ Nu omayan bae nugawa, dugup i nagirewa, aonagaet pusinawan dere, wataget agi mame menan God inap ayamat tamanagaet mum woup wa taragasiwanumun. O ayop aigapewa, ne anu dao mame menan Diu nagirewa enu yawanegene waiwanum.

⁸ E da da iwa dimen God borit wapi nagirewa wap sia inak muse yon wanumopi ame e anu waramasiwanin?

⁹ Ne den, Iesu, at Nasaret apanewa waenapan megawa watanamopen menan anun.

¹⁰ Ap menan, ne pa Ierusalem gapan ap anega tan. Amba Diu pirisi bawarewa amun nenane gapan ne Iesu waenapan mega aruga gwat noke semon, amba wam ame wanene tamon amba borit wapen diamone, ame ne den umap wan.

¹¹ Wam aruga gapan opata waine paewa gwanap tau ge tau angen, mu itan muningina. Mu anu tumat muga Iesu inap ae vepen menan ap anega taingina. Mu inamup uguna gangan naiwandini menan sewa da da at wandap angen, wa koeragam mumingin.” Pol ap anega wan.

Pol Iesu inap entaneni noa wadiamon

¹² Pol sia anega wan, “Ap wa koeragam mumapen ingina gapan, wam da pirisi bawarewa, at Damaskas Iesu anu tumasine nagirewa wa koeragam mumapen menan amun nenan, amba watu enanegen.

¹³ Ayop nuga aigapewa Agiripa, ne neginaet angingina, wam ianupe wariwandini gapan, ganat baware da kimani vise gamunap enun yawan, wam ganasewa otu koentu, go ganat ame baware iragen, ame tanam angena nagirewa den enunen.

¹⁴ Nu iragi piupa geanetoni amba ne inanap nop da ian Iburu nop muga gapan, anega dianegen, ‘Sol, Sol, dimen ta koeragam nimanegingi? Ap taingawa, man kao i apane gaura ni benop toin ame vek anuni ap mini gek ingane vek anuingi.’

¹⁵ Boge ne singui anega wan, ‘Ayop, ge da?’ Me gare anega wan, ‘Ne Iesu, ta koeragam nimanegiana apanewa.

¹⁶ Go endi pusigap ao yon. Ne inagap venat nigesena iwa ne om enugen ame ge nao nega ayamase tapen menan. Ge endi yawanageana oisewa amba evi amba dim da wa ewagepena oisewa waenapan wadiamopen menan om enugen.

¹⁷ Isurero nagirewa ge ian ugupe nagirewa inamup watu enagivin go mutoguragepen tapi ame ne ta warit gima-gain.

¹⁸ Yamamu boraseni nagirewa inamup age amba mum sisip gwanap wat entanamo, mu ganat gapan tauapen. Seitan aroewa gapan wanumuine nagirewa wat entanamo God inap tauapen. Ap gapan mu anu tumat nimanegepiwa, God mu koewa muga anu ae veta amba aro muga muneta. Aro ame God om enumoni anu, tumat nagirewa den wanumopen menan. Iesu ap anega dianegen.

Pol nao mega taiwandini noa wan

¹⁹ Ayop Agiripa, ap menan ne kiman paua mega, Damaskas neginewa gapan, yawana, ame ae ya vean, itap atap ya tan.

²⁰ Menan ne God inap wat entane, koewa muga tane ame vetavet ta anu tamanamepen oisewa, namu at Damaskas amba pa Ierusalem, ame ewap at Isurero

iragi, amba ian ugupe at muga wanumuine nagirewa den nop ame wadiamona.

²¹ Ap wadiamuingina menan Ierusalem God Paewa gapan waingena Diu nagirewa waranegen toguranegepen tane.

²² Go ne God wat agoat nimanek wandin gapan ongingin endi mame tauan namuyap yonivin wagup ontotua amba bawarewa ame gine daiton oit wadiaviv. Wataget God noa waiwanumune nagirewa, apan Mosis den, dim da evi tauepi noa wane ame gine daiton wadiaviv.

²³ Mu nop manega wane, ame God om enuni apane Keriso watu enepi, anu tanep borit wane nagire yaumakamup namu inakae sia yon wandeta. Ap yon wandepi nu Diu amba Diu uoni ugupe nagirewa den God ganat mega gapan wat inakam nimanini noa wadianeta.” Pol ap anega wan.

²⁴ Pol nop ma waiwandini gapan ayop Pestas kaimakaet anega wan, “Pol ge bumbam taingi! Ge anut baware waraan ame gapan bumbam taingi!”

²⁵ Go Pol gare anega wan, “Ayop nuga aigapewa, ne bumbam ya taivin. Nop dim da waingina ame yaunewa den men tavewa di waivin.

²⁶ Ayop Agiripa! Nop mame wadiaingina iravi ge asigigap ap menan inagap aroga di waivin. Dim dim iravi venaseni ge anu kakayasean, iwa karaua ya tainton.

²⁷ Ayop nuga Agiripa, wataget God noa waiwanumune nagirewa anu tumat mumingi go? Ne asik tagen ame watageta noa waiwanumune nagirewa ok seane ame anu tumasingi.”

²⁸ Boge Ayop Agiripa Pol anega wadien, “Ge anuingiana wam koni otu ma gapan wababayen nimanegi amba Kuristian tat anuingi go?”

²⁹ Pol gare anega wan, “Wam bobou o nononga, ne God inap mup wapen ame ge gegenat uon go iragi da da endi nona anuiana nagirewa den, ame ne umanap Kuristian tat anuivin. Go nanina damik kaimake dena gapan panane umap e ya waniet anuivin.”

³⁰ Nop ame wani boge Ayop Agiripa, waenewa Bonis den, amba at i apane ge

da da tanam wanumone nagirewa yonan amone.

³¹ Mu pa gwane ame ae veane amba nop gare gare anega wane, “Apan ma top boe boe o gwat noke barae barae koewa ap mini da ya tan.”

³² Amba ayop Agiripa Pestas inap anega wan, “Apan ma Ayop bawarewa nuga Sisa wanene tapen menan ya wapo, me wat vetapo tau aepo.”

27

Pol kabum gagap at Rom aen

¹ Amba mu Pol at Itali kabum gagap watu enat anune. Menan Pol ge gvat noke wanumuine nagirewa upi den tambumo, Rom ita yamewa yaua Diulias munen. Apan ame ita nagirewa dugup yaua ‘Ayop aigap bawarewa ita anan taine dugupewa’ gapān tauen.

² At Adiramitiam kabum muga da, at Eisia paua gapan puiman etoet tau ge tau anet wat, gapan dotouaton. Apan Aristakas, at Masedonia apane, pa Tsalonnaeka gapan taueni den aneton.

³ Inaton woup seni, nu pa Saidon tauaton. Ita yamewa Diulias, Pol inap imu pose bibiga tan. Menan Pol ae evene wai, pa Saidon ap mepe wanumuine, yawamo amba me kwayup tapen menan umap wan.

⁴ Kabum gagap sia anetoni go taik tau kabum kaimakaet naseni menan puiman topaneni yaua Saiparas garip aneton, iwa nu taik guraneni menan.

⁵ Puimani at Silia ge at Pampilia paina yawamot anetoni, at Lisia pa Maira tauaton. Ap mepe kabum dawa veaton.

⁶ Amba ita apante ame at Aleksandia kabum muga at Itali aepen menan taiwandini yaven. Menan kabum ame gagap nu anepen menan wan. Wani amba nu kabum ame gagap aneton.

⁷ Sia anet wam animpo yaemantu aninton iwa taik kabum ewagai sia to uariwandini menan kaimake wan, go pa Naidas tauaton. Tamana sia anet anutoni go taik ame kaimakaet nataneni menan topaneni Kurit garip gungunu ane at gine da yaua Salamone tau aneton.

⁸ Nu puiman etoet anetoni ame kaimake dena at yaua waine, At Kakaewa, gapan tauaton, pa Lasea mainep.

⁹ At ame onantoni menan wam aruga wakaumeton. Go kabum gagap anepen menan umap uon iwa gaseget puiman koewa entanen taik baware iragen tauen iwa Koewa Nuga Anu ae veni Baripe wamewa paua gaset uon tani.

Ap anuni menan Pol tagigit muga anega diamon,

¹⁰ “Evenan wainawa, ne imunap anuingina ap sia anetawa koewa baware venaseta amba kabum puraput megawa den to okonageta waenapan upi borit wain.”

¹¹ Go ita yamewa, Diulias, Pol nop mega ya waren go kabum i apante ge kabum wat aini apanewa nop muga anu waren.

¹² Amba sia, kabum gwanape nagirewa aruga pa Pinikas amopen anune iwa taik ugin baware wamewa gase tauen, amba kabum enat wande wande arewa ap mepe umap uon. Ap menan mu at Pinikas amot anun iwa pa Pinikas at Kurit gapan taik ugin baware wamewa gapan gungunutup ma wam gearini arigewa wandet anun.

Taik tawak puimani tauen

¹³ Evi taik otu kamontu ise ma taueni gapan bibigare tau aeni menan mu amopen wamewa tauen anune. Ap menan kabum gvat potawat mega ae ma warupan at Kurit puiman etop konintu iragen tau amon.

¹⁴ Use amuiwanumune ame nononga uon, taik baware da itanigaet taueni ame yaua, ‘Notista.’ Taik piup topaneni gapan use ma tauen aen.

¹⁵ Taik ame kabum wareni menan use aepen tani umap uon menan wabayan aneton taik wat naune at da ugup aen.

¹⁶⁻¹⁷ Piup topaneni otu koentu da yaua Kauda gungunup anetoni gapan taik otu da bigaren. Menan nu kabum dawa otu kamontua ae ma warupat, kabum nuga baware ame gagap baraeton amba damik kaimake denawa gapan kabum nuga bawarewa ikukuk gamup pan gitnageton bim wan, taik koe tapi tawa menan. Amba kabum bawarewa gerat puiman beripewa, at Libia gapan, wat nasepi tawa menan kabum wanupewa

taik warupini ae wa panamen baraene amba taik kabum mondi wat aen.

¹⁸ Taik tawak ame itanigaet sia tauiwandini menan kabum ae ao taiwandin. Menan inaton woup seni gapan kabum bemta tapen menan puraput eneni ame ereum tambun puimani natanen.

¹⁹ Inaton woup seni amba kabum wan dim dim mega, damigewa den tambun puimani uatamen.

²⁰ Mum ge woup aruga, wam ge buanae den, da ya yavinton. Taik tawak pot po-raet di tauiwandin menan nu imunu puk wan amba gop baware inak wakaumata tawa anuton.

²¹ Taik tawak tauiwandini anetoni gapan wam aruga ame kabum gwanape nagirewa taba da ya nane menan Pol namumup yone anega wadiamon, "Oruma, nop nega wana, e ya anuyan, ame e anupo, nu at Kurit ae ya veapo amba kabum ge puraput koe ya tapo.

²² Go endi diaingina anun, aro tan wanien! Iwa e da ya di borit wai go kabum megenat koe di tata.

²³ Mum watawa God nega ne wa taragasinawa anea mega da ne inanap taue,

²⁴ anega wan, 'Pol, tap ya anu, at Rom nagirewa baware mugawa Sisa namup di yonai! God bagua genan anuni menan wan, kabum gagap tanamo ongingiana nagirewa iragi kabani wanumoin, amba daiton da ya boeta.'

²⁵ Menan, orup ma, aro ta di wanien. Ne anu tumasivin God wadianegeni ame di tata.

²⁶ Go puiman topaneni da gapan taik kabum enu wanep tau ae at naseta."

Kabum koe di tan

²⁷ Wam pura dere mumewa puiman yaua Ediria gagap taik mondi kabum wat nau aiwandini. Mum gagewa gapan kabum kwayupe nagirewa piup konintu tauiwandat anun.

²⁸ Menan kaum om warat anune menan gwat potawat waran damik ginap panan amba puimani antapenan paua yawane ame apante dere (40 mita) puiman bumagewa omewa yawan. Amba sia om warane paua apante daiton aonagaet yawane (30 mita).

²⁹ Kabum puiman gwat bonawan gapan ni to purunagepi tawa menan mu kabum gwat potawat mega degede kabum nimerap pan sinsin enan amba serarat woup sepen menan anun.

³⁰ Ap gapan kabum kwayup taine nagirewa kabum ae ve, tap karaua amot anun. Menan mu kabum otu kamontua wa totnagen puiman gapan ae baraene, amba aopan anega wane, "Kabum gwat potawat mega upi kabum namu bone gapan pan sinsin enat anuivin."

³¹ Go Pol guegue muga anuni menan ita nagire, ge ita yamewa den anega diamon, "Kabum kwayup taine nagirewa kabum ae ve tau amopiwa, e iragi borit wai."

³² Ap menan ita nagirewa kabum otu kamontua damik mega to nugusene puiman wat nau aen.

³³ Veraut en nuguseni, Pol mu taba napen menan anega wadiamon, "Pura dere gwanap ame e ta gope den amat taiwanian amba wam ame iragi gapan taba da ya di nayan.

³⁴ Ap menan taba nane, borit ya wai. E iragi waniai iae, gume da daiton ya wapasimai, God agi wani menan."

³⁵ Nop ame wani ewap, Pol mu namumup, taba buredi ware amba God inap gaun wani, boge me wa paiseni amba ereum me nan.

³⁶ Nani waenapan yawane aro waran daiton daiton taba nan.

³⁷ Kabum gwanape nagirewa iragi 276.

³⁸ Iravi naton umap tan kabum bemta tapen menan taba upi puimani uatamene.

³⁹ Wam ame woup seni, kabum kwayup taine nagirewa, mu piup ginewa da enkoritam baraeni ame gerasewa yawan, go at ame mu oare. Go mu kabum ware nau gerata amo enatat anun.

⁴⁰ Menan kabum gwat potawat mega iravi to nugusen ae veamone puimani geomone. Kabum tari mega namu kaimakaet panane vetan enkokoramen. Taik ware kabum use enturunagepen menan taik warini wanupewa, namu bonewa gapan, sia warupane doren amba taik waren puiman etop turut wa aen.

⁴¹ Go kabum namu bonewa ame gerat puiman beripewa gapan at nasen. Kabum

namu bonewa ame at naseni git wan amba keta one kabum to dudumen.

⁴² Ap menan ita nagirewa yone, gwat noke nagirewa gurep borit wat anun, iwa mu da puiman gagap oe wara amo piup tauue amba tap amopi tawa.

⁴³ Go ita yame apanewa Pol wat inakamet anuni menan watanamon. Me anega wadiamon, “E oe wara aiset anuiana nagirewa, namu bup ta, geaen aisen, puiman etoa tauan.

⁴⁴ Amba e upinewa kabum to dudumeni ame oma semua gagap aisen.” Ap tatoni gapan nu iragi puiman etoa ame yambuni di tauaton.

28

Topaneni Malota tauan

¹ Puiman etoa yambuni tauatoni gapan, piup topaneniwa yaua Malota tauat anuton.

² Piup i nagirewa inanup evenan tane. Ugin erot tauue wandini menan mu nunan oma to tugup iranepen menan waupanen.

³ Pol gerok kaime bongame amba oma yame itapu paneni ame bariwandini gapan mokare seram ame oma amunu wareni menan tauue Pol nanip are at nase wande en.

⁴ Wam ame piup i nagirewa mokare me nanip are wat nase amba tamana wadimat wandeni ame yawane menan, mu gare gare anega wan, “Apan ma waenapan guramon borit wane ominewa tauia. Puiman gapan ya boen go onin ma tauen amba evene toni ominewa tauia.”

⁵ Go Pol nani pat pat tan, mokare to tonagen oma yampal gearen. Amba Pol vek da ya anun.

⁶ Waenapan Pol naniwa tutut wap amba menawaet geare boet anun, go amat nonongataet ta yaviwanumune go vek inap da ya taueni menan ame mu imumu entanen anega wane, “Me god di anuivin.”

⁷ At i nagire bawarewa mugawa yaua Pubilius at mega konintu da wande en. Me aton gapan waupanen menan nu wam yampo pa mega gapan baigane den wanineton.

⁸ Me mamewa vek amun waren amba nikenke den taiwandini menan eragi gagap wande en. Pol me yawapen menan ae

amba naniwa dede wapip se God inap mup wani gapan wat inakamen.

⁹ Ame tani oisewa wa sesenamene menan kaum topaneni ame wanumuine nagirewa, wam wam gapan, vek nagirewa tam onamone amba Pol mup gapan wat inakam mumen.

¹⁰ Ap menan puraput aruga garaet nunan. Menan nu siragam yampo uon tani ap tapen tatoni gapan taba ge puraput dim dim men watoni, kabum gapan se nunan.

At Rom tauaton

¹¹ Siragam yampo uon tani ewap nu puiman ane taut kabum yaua God Natrup, at Aleksandia kabum megawa yawaton. Kabum mame, taik ugin wamewa gapan topaneni at Malota gapan wande en.

¹² Nu dotou anetoni amba at Sirakus tauat ap mepe wam yampo wanineton.

¹³ Sia ikukuk anet at Regiam tauat inaton woup sen. Taik ise ma taueni menan wam derewa ewap pa Puteolai tauaton.

¹⁴ Ap mepe kabum ae veat Iesu anu tumasine nagirewa yawamoton amba mu waupanene anet pura daiton den wanineton amba pusinup anet pa Rom tauaton.

¹⁵ Rom Iesu dugup mega nagirewa oitanu anune menan onamon pa yaua Apias Une Gare Gare Taine Arewa amba pa yaua Daio Paewa Yampo gapan tautananene. Pol yawamoni God inap gaun wan aro sia waren.

Pol pa Rom gapan tauen

¹⁶ Pa Rom tauatoni, Pol megenat pa da iniwandapen menan at Rom bawarewa nagirewa umap wan. Go ita apane daiton pa garip yangut yoniwandin.

¹⁷ Wam yampo ap mepe wandeni amba, Pol Diu bawarewa nagirewa onamop iam iam tapen menan wan. Tauan tobob tane, Pol anega wadiamon, “Tatan gwanin, ne waenapan nugawa inamup, amba gutut nuga omayan baewa nunane ap me inap ne koewa da ya tan, go ne pa Ierusalem gapan waran pananegen amba ian Rom nanimu gwanap bat nimanegene.

¹⁸ Rom nagirewa singui wayawanegene, koewa nega bonigat bonigat da ya yawane menan vetaneget wane.

¹⁹ Go wam ame Diu nagirewa toboran wane menan ne ayop baware aigapewa Sisa inap wanene taneget wan. Go ayop Sisa namup yonat wana ame Diu nagirewa koewa muga wapen menan ya anun.

²⁰ Ap menan nop nega namu e anupen menan enan wan mame tauyan. Nop ame, nu Isurero nagirewa Keriso tauapen menan amat taivin den gop ya anuivin. Taueni oisewa wana menan nanina damik kaimake dena gapan pananegene waingivin."

²¹ Mu gare anega wane, "At Diudia gapan wanumuine nagire oit gega ok gapan da ya sean watu enane yawaton amba dugup nuga nagirewa Diudia daio amone tauane oit gega koewa da den ya wadianene.

²² Go dim da anuianawa ame nu wa anut anuivin iwa at at iravi gapan ge dugup gega Iesu negin mega anuine nagirewa tandayat mumiwanum."

²³ Menan mu wam evi da amba nop mame wawa kakayat tapen menan Pol diane. Amba om enune wamewa gapan, waenapan arugataet, Pol wandeni paewa gapan tauane. Mumaget wadidiam wandin aeni ame mum tauen. God toemu mega oisewa wadidiam wandin. Ame gapan Pol anega wani, "Watageta apane Mosis iup seni ge watageta God no oise waiwanumune ok seane ame Iesu me God om enuni Keriso wadianepen menan seane." Ap anu tumat tapen menan Pol mu entan mumat anu tayaviwandin.

²⁴ Me nop waiwandini gapan upi wat entan mumen, go upinewa ame anu tumat ya tane.

²⁵ Menan muk ingane yaumakamup umap ya wane amba pa ae vepen taiwanumune gapan Pol nop uiwa mame anega diamon, "God Guewa Woup Seniwa wani gapan watageta God noa waiwandini apane Aisaya, e omae baewa diguguramoni tave di wan.

²⁶ God apan Aisaya gamup Diu nagirewa anega diguguramon,
Ian ame inamup ak anega diam,
'Wam wam nop nega anuianawa go ya di anu aviasi.'

Wam wam yaviwaniana go ya di yao avi- aisi.

²⁷ Iwa waenapan mame aigap aigap anui- wanumune menan, imu pose itani wan, den darinamu tobob- oramon,

amba yamamu borasen.

Yamamu gapan yave amba darinamu gapan anu ave, amba potamu gapan anu inanap entan onamop,

wat inakam mumapena tawa.'

²⁸ Ap menan nop mame anun, God inak ewakewa nunini oisewa ian ugupe den anupen menan watu eneni gapan mu oit kakaewa ame anuin!"

²⁹ Pol ap anega wani menan Diu nagirewa notatae baware gare gare wai- wanumuin en, ae ve amon.

³⁰ Pol en dere ap mepe wanden. Pa ini- wandini menan ame garewa taiwandin. Waenapan da da iravi daio inap tauane waupamon.

³¹ Pol epa ta God toemu mega opata gapan wadidiam wandin amba Ayop Iesu Keriso anut mega aroga wadidiam wandin, waenapan da ya watanane.

ROM Pol ok mega Rom nagirewa inamup sen

¹ Ne apan Pol, Iesu Keriso nao mega ayamase tainawa amba God om enunegē watu enamot mega dianegeni apanewa da. Ame God venana wan menan Nop Oit Mega Kakaewa wadidiaivin.

² Nop oit kakaewa mame, watagaet God no oise waiwanumune nagirewa gamumup wa agiat nimanen. Nop tavewa ame mu seane.

³ Nop Oit Kakaewa ame taueni ame God Otua gutut megawa. God Otua apan iragen yaneni paua mega ame watageta apanewa Devit naewa megawa di.

⁴ Amba yamunewa me God Otua kimanisimu pose woup seni apanewa, iwa me boen, Mamewa wan sia inakae yon wanden. Ap gapan Mamewa aro amun mega baware iragen ameme anu awatoni menan Iesu God Otua divin. Me Ayop nuga Iesu Keriso di.

⁵ Me tani gamup God anu aipakam nimanegen amba Iesu menan ne Iesu watu enamot mega apanewa da dianegen. Ap menan ne waenapan at at iravi wa upamopen nop mega anu tumase ayamase tapen menan bat nimanegen.

⁶ Amba e, ian Rom nagirewa, den God waenapan mega entan imaepen menan God enan waiwan.

⁷ Ne ok ma e, pa sewa Rom nagirewa, inayap siangin. God enan anu gurini gapan God waenapan mega entan imaepen menan diaiwan. Mamanu God Ayop nuga Iesu Keriso dere, garaet wat aipakam imaep amba nonup baigan muga enep.

Pol God inap gaun wan

⁸ Namu iragen ame, ne Iesu Keriso nunan tani menan God inap gaun wat anuivin iwa, waenapan at at iravi e Iesu kaimakaet anu tumaseana oisewa anuwanum.

⁹ Ne God nao mega neneni imuna potana wareni gapan, God Otua Nop Oit Kakaewa opata gapan wadidiamuivin. Ne

enan wam wam pot pot mup wainawa ame God yawanegē anuwan.

¹⁰ Mup nega waina ame ne inayap daio onget anuivin. God anuini gapan ne di ongain. God inap mup ap anega waivin.

¹¹ Ne onge yawaet anuingina iwa God garaet wat aipakam nimanen noa da wadidiaepen gapan wa kim imaet anuivin.

¹² Guegue ame mam. Nop ame wadidiaepen gapan nu gare gare ta waritisinait. Iwa anu tumat nega tavewa e yao anui amba gare egawa ne yao anuin.

¹³ Evenan wainawa, namu anuyana go endi nop ma sia di anun. Wam aruga inayap onget anuingina go dim dim watananek wandin. Daio nega iwa ameme, Rom nagirewa upinewa wat entan Iesu anu tumat tapen menan anun. Ame at ugupe gapan, Diu uoni nagirewa ame e umayap, ne God nop oit mega waingina menan anu tumasene mini e inayap venaset anuivin.

¹⁴ God nao mega tat dianegeni menan waenapan iravi ame pa nagirewa, pu nagirewa, anuine nagirewa, bumbawam taine nagirewa iragi wadidiamopen.

¹⁵ Ap menan e den pa sewa Rom gapan wainiana nagirewa Iesu Nop Oit Mega Kakaewa atonu den wadidiaet anuivin.

Iesu oit mega amunu den

¹⁶ Iesu Nop Oit Mega Kakaewa wapentaina, ta umame den ya waivin iwa nop ame gapan God aro amun mega yavivin. Iwa nop mega ame gamup waenapan iragi, namu nu Diu nagire, amba evi e Diu uoni nagirewa den, God anu tumaset gapan inak ewakewa wat aninampen.

¹⁷ Ap gapan God nu waenapan tamanawa dianeni yao anuivin. Nu anu tumat nuga gapan inak ewakewa mame waraton menan anu tumat nuga iragena ame gapan menan nu inak ewakewa ame waraton. Nop mega ok anega seane, Waenapan da da God inap anu tumasine menan, me tamanawa nagirewa diamon, amba mu inak wariwanumain.

God ugu gangan mega koewa taintoni gapan

¹⁸ Waenapan God viripe uoni amba me tandayasene gapan God nop mega tavewa toborine menan, God ugu gangan mega kiman gapan inamup tauwan.

¹⁹ Nu God guegue mega ewanen yawaton anuivin, mu den yaviwanum, iwa God mek di ewamon go mu ae veane menan ugu gangan mega inamup tauwan.

²⁰ Ere mangan gapan God ire yaoyao mega karauawa amba yaibobot aro amun megawa ge imu pose woup am seni yaunewa aroga yavinton. Guegue mega ameme dim dim wan venat mutane gapan yawaton anuivin. Ap menan koerage taine nagire mu God oare wainewa ame ebo aopan da, wabobora bora da uon.

²¹ Mu God anu kakayasene go inap aymat ya taiwanum amba God yaua den ao ya wariwanum. Gare mondi anuiwanum menan imumu mum tauen bumbawam taiwanum.

²² Mu anega wane, "Nu asigip tatonu nagirewa," go uon, mu bumbawam nagineva.

²³ God wam wam pot pot wande aini apanewa ya wa taragase ne go ae vean gare waenapan guewa ugup ugup nanimup kaitane ameme apan guewa o nenip guewa o man guewa o mokare guewa inamup wa taragasiwanum.

²⁴ Ap menan God ae di vemon. Menan mu imumu koewa dansewa gapan waren di ta amuiwanum. Ap gapan inak koewa aninke dena taiwanum amba inak umame dena gare gare taiwanum.

²⁵ God nop oit mega tavewa anune go ae vean amba gare nop eboewa anu tu-masen. Amba mu wan dim dim God taniwa ame tambune wa taragasiwanum go wan venat mutane apanewa ya wa taragasiwanum. Go nu God inap usenagaet wa atonasinampen. Ame umap.

²⁶ Iwa mu ap taiwanumune menan God ae di vemoni gapan mu umam inagewa tat anu taiwanumune. Piup guegue mega ame waen apan men anupi umap di, go waen muk dere ingane wainan gogo mini taine koerage.

²⁷ Ap mini sia apan waen men anupi umap di, go apan muk dere gare gare anu gwagwaramene amba ingane wainan

gogo mini taine ame koerage. Apan dere dere ap taine go mu umam da ya anuiwanum menan koewa ap taine garewa muga muk wapimu wa koeam wanum.

²⁸ God guegue mega piupa dim dim tani gapan yawane go mu ya anuiwanum menan me ae vemon amba muk koewa anune gapan taiwanum, ame negin gegerawa ya tata mega taiwanum.

²⁹ Koewa ugup ugup potamup bararaeni manega. Agaga taiwanum. Waenapan upi mun ya anuiwanum go anu koeam mumiwanum. Upi ugu gangan mutane guramone borit wan. Engirit wangirit tane waiwanum. Evene wai aopan imu pose naiwanum upi anu baitam mumiwanum. Nuaroro waiwanum.

³⁰ Yanao waiwanum. God anu koeamianum. Gine namu enkatamene waiwanum. Muk apan apan tane waiwanum, koewa aigap sia tage bat taiwanum. Ine mame nomu ya wariwanum.

³¹ Nop tavewa anu waramasiwanum. Dim dim tapen men wa agiat mumane go ya taiwanum. Upi munan ya anu guriwanum munan bagua ya anuiwanum.

³² God anega wani, "Waenapan koewa ugup ugup ameme umap taiwanumampina garewa bop." Me wani mu anun go sia taiwanum. Mugenat koewa taine ame koerage go koerage iragena ame waenapan uruga den taiwanumampina atonamu anuiwanum.

2

God wanene tanepi guegue mam

¹ Oru ma, e waenapan upi enu yawamoyan waiana ame aopan di waiwanin, iwa e ap wanene tamo enu yawamoyan waiana go guegue muga den e di taiwanin menan ek ingane wa koeragam wanin. Menan e da da ap tanewa ame ebo, e inayap wabobora bora da uon.

² Nu iravi asiginup, orup da koewa tapiwa ame garewa God wanene ta itan waneta, ame umap di iwa God wanene tat mega tamana iragen.

³ Go e waenapan upi koewa muga munan enu yawamoyan waiana go ek den

taiana menan e tap aisepen arok da uon, God wanene tae garewa di eneta.

⁴ God bagu sisi baware inayap anuiwan, koewa ega garewa menan menawaet ya eniwan amba e kakaewa ega tanapen menan amat taiwan. Go gare e God kakaewa mega ame wa koeamiwanin go? Imuya entanepen menan enan bagu sisi anuiwan. E ame anuiwanin go uon?

⁵ Go e imuya potaya iragi kaimake wan amba gware den wanumam, koewa ega ae ya viana menan wanene ega itanewa diriga aita se doriwanin amba wanene wamewa gapan God ugu gangan mega arogameta, waenapan mu inamup amba e inayap den. Wam ame gapan God wanene tamanagaet tamota.

⁶ Wam ame gapan, nu daiton daiton garewa nuga nuneta. Nu kakaewa o koewa taitoni omewa gapan gapan garewa di nuneta.

⁷ Waenapan kakaewa pot poraet taine gapan kiman oya oya megawa, viripewa den inak yaibobot warat anune menan God garewa inak yaibobot muneta.

⁸ Go waenapan upi agaga taine amba koerage tapen menan negin tamanawa ae veane menan God garewa ugu gangan mega baware muneta.

⁹ Waenapan da da, Diu nagire amba Diu uoni nagire den, koewa tainanta menan bagu sisi anu tanait, inkae ankae wait.

¹⁰ Go waenapan da da, Diu nagire amba Diu uoni nagire den, kakaewa tainanta, God nonup megawa ge virip megawa amba oya oya mega den nuneta.

¹¹ God wanene ap anega tata iwa me yamap nu iravi gine daiton di, me kakaeven ya tata.

¹² Diu uoni nagirewa, apan Mosis iup namua seni mu inamup ya tauen. Mu koewa taine menan God wanene tamota, wanene ame Mosis iup mega namua gapan da uon iwa iup namua ame mu inamup ya tauen. Go Diu nagirewa koewa taine gapan God Mosis iup mega gamup wanene tamota, iwa iup mu inamup tauen.

¹³ Amba sia Mosis iup mega namua Diu inamup di tauen go waenapan da da iup anune go ya taine God waenapan ame

kakaewa ya diamuiwan, go da da anuine tainewa mugenat kakae diamuiwan.

¹⁴ Diu uoni nagirewa Mosis iup seni mu inamup ya tauen go iup ame tavewa mu muk imup di anune taiwanum menan muk iup muga di taiwanunum gosi Mosis iup seni inamup ya tauen.

¹⁵ Guegue muga kakae taine gapan mu muk ingane ae anuine God iup mega potamup wandini gapan taiwanum. Imumu ap den anuiwanum iwa wam da koerage tapi imumu ingane koerage tat wata. Wam da kakae tapi imumu ingane kakaewa tat wata.

¹⁶ Ame menan Iesu Keriso Oit Mega Kakaewa wadidiaingina ame wani gapan God ap anega tata. Iesu Keriso nunan tani gapan God anut nuga karauawa kakaewa o koeragewa ame wanene taneta.

Diu nagirewa God nop mega namua muneni go inak ya waran

¹⁷ E Diu nagirewa apan apan tayan anega waiwanin, “Nu Diu nagire di nu ian ugupewa uon. God nu evenanua iup mega tumap waninivin.

¹⁸ God nu dim da tat anuini nu asiginup amba iup mega nuneni gapan kakaewa koewa yan seapen neginewa nu asigip taton.

¹⁹ Nu imu borat mutane nagirewa negin kakaewa ewamuitoniwa. Nu mama wanumuine nagirewa ganat munitoniwa.

²⁰ Bumbam tane waine nagire wa tamanam mumivin, nop ya anuine nagire orup otu mini sia wadidiamuivin. Iup nuga gapan anut ge nop tavewa iragi wanum amun.” E apan apan ap anega tayan waiwanin.

²¹ E negin kakaewa waenapan wadidia-muijanawa go ek ingane ae wadidia waniampo, ame kakae. Up ya tat diamuiwanin go e up den taiwanin.

²² E anega waiwanin, “Wainan gogo ya tane,” ap anega waiwanin go e den sia taiwanin. Waenapan guewa nanimup kaitane inap wa taragasine ame e nia sisi waiwan go guewa ame pa mega tune gwanap aisean up taiwanin.

²³ E God iup mega kwayup taiwanin wa atonasiwanin go iup ame paina yamasean menan God yaua ae bariwanin.

²⁴ Nop mega ok anega seane, E Diu nagirewa koerage taiana menan, Diu uoni nagirewa God yaua wa koer- agamiwanum.

²⁵ E God menan etuya tum tayana ame kakae go tavewa mega God iup mega ayamase tane gapan venaseta. Go God iup mega topaisenewa, ame gapan tavewa uon tata, menan etuya tum den ya tapo, iwa ame gapan den tavewa uon.

²⁶ Guegue mam, Diu uoni apan da, me etua tum ya tan go God iup mega yambuni ayamase tapiwa ame God yamap me etua tum tani apanewa mini wandeta.

²⁷ Ap gapan Diu uoni nagirewa Diu nagirewa wa koeragam mumain, iwa e Diu nagirewa etuya tum tayan amba Mosis God iup mega seni ame inayap wandia go e iup ame topaisiwanin. Diu uoni nagirewa mu etumu tum ya tane go God iup mega ayamase taiwanum, ap menan mu Diu nagirewa wa koeragam mumain.

²⁸ Menan apan da etua megenat tum tani go imu pose ya entaneni menan me Diu apane iragena da uon di, me etua mondi tum tan, tavewa uon.

²⁹ Diu iragen apanewa ame orup da da imu pose den entanen. Menan imu pose gapan etua tum tani paua mega mini venasen iwa imu pose entanen. Ame Guewa Woup Seni nao megawa go waenapan gamumup uon. Iwa naninup tum tata gapan ya venaseta. Iup seni gapan den ya venaseta. Menan apan da imu pose entaneni menan me Diu iragen apanewa di amba waenapan uon go me God inap di wa atonasiwanda.

3

God Diu nagirewa namu diamon go mu ae vean

¹ God Diu nagire amba Diu uoni nagirewa munan anuiwan ap menan Diu nagirewa mu kakae muga da den go uon? Iup mega kwayup tapen men etumu tunepi guegue ame tavewa den go uon?

² Guegue ame tavewa di den menan Diu nagire kakaewa muga wandia. Kakaewa

ame mam, God oit mega ian Diu nagirewa inamup namu anu watu enen.

³ Go mu upi God nop mega ya waran anu tumasene. Ap koerage tane menan God gare wa agiat mumeni ameme tavewa venaseta go uon?

⁴ Ame venaseta, God di tata iwa nop mega ugup ya entaneta. Waenapan iravi ebo wain go God ebo da ya wata. Wataget Devit God menan ok anega seni, Nop gega iravi tamana wawa waenapan iravi anu umap wain, ap gapan enu yawage wapi wamewa gapan, orup da nop gega ya yamaseta.

⁵ Koerage taitoni gapan God kakaewa mega arogamen menan iwa dimen nu sia wanene taniwan? Koewa nuga menan wanene tanepi me koerage tat diat go? Ae, ap anega ya diat. Ame mondi nagirewa guegue ne anu waivin.

⁶ God inap koewa uon. Koevet tapo anen- nen amba piup nagire koewa nuga men wanene tanepo?

⁷ Waenapan aopan anega dianegepiwa, “Ne ebo waingina gapan God kakaewa mega yawaton menan God yaua ao warivin. Ne koerage ya tapo kakaewa mega ya yawapo. Ap menan God iwa dimen ne apan koerage dianegiwan?”

⁸ Mu aopan anega wane menan ne aigap aopan sia manega wain, “Ane koewa tapen ap gapan kakaewa tautanait.” Nop ameme ebo megenat go waenapan upi ne nop ap wana men wa koeragam nimane- gen. God evi amba mu diguguramopi ame kakae.

God yamap apanmek kakae da ya wan- dia

⁹ Anenen? God yamap nu Diu nagirewa kakae amba Diu uoni nagirewa koerage, ap anega waivin go? Ae, ne ap anega ya waivin. Ne namu wadiaena sia waivin Diu amba Diu uoni nagirewa iragi koewa aroewa gauarap waninivin.

¹⁰ God nop mega ok anega seane, Waenapan daiton kakaewa da uon, iravi koerage.

¹¹ Apan da daiton God menan ya anu aviwan. amba apan da daiton God yoa ya taiwan.

¹² Waenapan iravi God tandayasen ae ve amon,
negin koewa gapan amuiwanum.

Apan da daiton kakaewa da ya taiwan,
daiton mini da uon di.

¹³ Nop muga ebo aopan gapan aninke den,
ame waenapan puakewa muga aninke
mini,
nomup tauen aewan.

Merimua gan upi aopan wa ewam
wanum.

Mokare seram iapa mega mini nomup
tauen aewan.

¹⁴ Nop mugawa sisi den amba e wayame
den waiwanum.

¹⁵ Upi menawaet siget muniwamun,
amba upi guramuine borit waiwanum.

¹⁶ Ambagan amuinewa, koewa ge bagu sisi
ewamup yonen iwan.

¹⁷⁻¹⁸ Baigan neginewa mu oare.

Amba mu God viripewa ya taiwanum.

God nop mega ok anega sean.

¹⁹ Endi nu asiginup di, ame Mosis God
oisewa seni tavewa mega anuine nagirewa
oit ame ayamase tapen menan sen.
Iwa oit ame gapan waenapan iravi koewa
muga menan wabobora bora da uon ap
me gapan God wanene mega waenapan
iragi inamup no aroga di wandia.

²⁰ Go orup da iup anu warepi menan
God kakaewa ya dieta go iup ame taueni
iwa mega nu koewa nuga wat matakamep
yao anupen.

God anu tumasitoni gapan kakae dianowan

²¹ Go endi God negin ansena gapan
kakaewa dianeni guegue ame ewaniwan.
Mosis ge God nop mega watagaet wai-
wanumune nagirewa den tavewa ame evi
taupei oisewa wane go negin ame Mo-
sis iup namua seni anuton taitoni gapan
da uon. Negin ame Mosis ge God nop
mega watagaet waiwanumune nagirewa
den guegue mega evi taupei oisewa wane.

²² Endi negin tamanawa ame anuton,
ameme Iesu Keriso nunan tan anu tu-
masitoni menan God kakaewa dianowan.
Me yamap waenapan iravi gine daiton di,
menan waenapan iravi Iesu anu tumasep
kakae diamopen menan anuiwan.

²³ Nu iragi koerage taintoni menan God
kakaewa mega tat dianeni nu ya taivin.

²⁴ Go Iesu Keriso koewa nuga gapan wat
vetaneni menan God mek atonanu anuni
gapan kakaewa garaet dianowan.

²⁵ God koewa nuga anu ae veapen
menan Iesu watu enen bop tan deniwa tau
visen. Nu anu tumasetawa menan God
koewa nuga anun ae veta. Guegue mega
kakaewa mame tani gapan to ewaniwan.
Watageta, God waenapan koewa muga
yawamoni go ya batnagen iwa mek imu
pose ae bigaren wande en.

²⁶ Go endi koewa nuga batnagini iwa
nu anu tumasintoni nagirewa kakae di-
anepen anuiwan amba ap gamup guegue
mega kakaewa Iesu gamup ewanepen
menan taiwan.

²⁷ God ap nunan tani menan nu apan
apan ta wait go? Apan apan ta wata umap
uon iwa iup anu taton menan koewa
nuga anu ae ya ven, di warden go inap
anu tumasitoni menan anun ae viwan.

²⁸ Menan nop daveva anuintoni
manega, waenapan Mosis iup namua
seni anu taiwanumampina kakae ya
diamuiwan go Iesu anu tumasepi menan
kakae diamota.

²⁹ God Diu nagire mugenat God mugawa
go? Ae, Diu mugenat uon waenapan iragi
God mugawa.

³⁰ God me daiton di. Diu nagire inap anu
tumasepi kakae diamota amba Diu uoni
nagirewa inap anu tumasepi kakae den
diamota.

³¹ God anu tumasitoni menan Mosis iup
seni ae veat waivin go? Ae, uon di. Anu
tumasitoni gapan iup namua nop tavewa
anuton waivin.

4

Apan Eibaraam God anu tumasen

¹ Apan Eibaraam, nu omayan baewa
ibariwa, me asik mega tani dim da?

² Me dim dim kakaewa tani menan God
kakae diapo mek apan ta wapo go
me God yamap apan apan ap ya ta wan.

³ God nop mega anega seane,
Eibaraam God anu tumaseni menan God
me apan kakaewa dien.

⁴ Nop ame guegue mam. Apan da nao
da tapi garewa mega warepi ame garewa
mega di, garaet uon.

⁵ God koewa taine nagirewa koewa muga anun ae vini apanewa. Menan waenapan da da, mu dim dim nao da kakaewa tapi gapan God koewa muga wat mutapen menan ya anupiwa go gare God inap anu tumasepiwa ap anu tumat gapan God mu kakae diamota.

⁶ Watageta apan Devit, nop ap menan wan. Devit wani tavewa mam, orup da da me kakaewa taini gapan uon, go anu tumat tani gapan God kakae dien. Ap menan orup ame aton baware anuiniwa.

⁷ Devit anega wani,

Waenapan da da koewa muga God anu ae ve,

imu oaraseni menan aton anuiwanum.

⁸ Aton anuiwanum iwa koewa muga ya batnak mumiwan.

⁹ Devit aton ame menan wani nu Diu nagire etunu tum tatonin inanup nugawa megenat go? Ae uon, etumu tum ya tane nagire den. Iwa nu den God nop mega gapan anega waivin, "Apan Eibaraam God anu tumaseni menan God kakae iragen dien."

¹⁰ Wam ansena kakae iragen dien? Eibaraam God namu anu tumaseni gapan God kakae iragen dien, ap ewap Eibaraam etua tum tan.

¹¹ Menan Eibaraam God inap namu anu tumasen, me anu tumaseni menan God Eibaraam apan kakae iragen dien. Ap ewap me etua tum tan, etua tum tani iwa mega ame God anu tumaseni paua mega tan. Eibaraam ap tani menan me anu tumat nuga i apanewa entanen. Diu uoni nagirewa etumu tum ya tane go God anu tumasene menan me kakae diamon. Amba mu iravi Eibaraam omae baewa.

¹² Ap umap Eibaraam Diu nagire den omae bae mugawa. Diu nagirewa da da etumu tum tanewa amba den Eibaraam God anu tumaseni mini anu tumat taiwanumampina ame mu Eibaraam omae baewa iragena di.

God anu tumasitoni men nunat wa agiat nimaneni warivin

¹³ Watageta, God Eibaraam, nu omayan baewa mega den, anega wa agiat mumen, "Ne piup iragi enain," ap anega wan. Eibaraam Mosis iup namua seni anu wareni menan ya wa agiat mumen go

me God anu tumaseni gapan kakae dien menan wa agiat mumen.

¹⁴ Da da Mosis iup mega namua megenat anun warane nagirewa God kakae diamopo ame gapan God anu tumat taine nagirewa mu anu tumat muga tavewa uon iwa iup ayamase tane megenat gapan mu inak warane amba agi mega den pokaet.

¹⁵ Mosis iup seni gapan koewa nuga menan God ugu gangan mega yawaton anuivin. Go iup da mu inamup ya taueni menan waenapan iup da paina ya yamatain.

¹⁶ Ap menan God wa agiat megawa ame nu agi mega anu tumat tatonin menan garaet nuniwan. Da da iup ayamase taine nagirewa mu inamup menan ya tauen. Go da da Eibaraam God anu tumaseni mini taine nagirewa inamup tauen iwa mu Eibaraam omae baewa.

¹⁷ God Eibaraam menan wani ok anega sean,
Ne anega diagain, waenapan aruga omae baewa ame ge.

God namu Eibaraam wa agiaseni amba Eibaraam God agi mega anu tumaseni. God wapi borit wane nagirewa inak muse sia yon wanumoin. Dim dim da ya wandini me wani gapan venase tau aewan. God nuga aro amun mega ap anega.

¹⁸ Watagaet da, God Eibaraam anega wa agiasen, "Ge naewa gega evi aruga tata." Eibaraam orup baraeopen menan anuiwandin. Waenewa, Sera, aeta toguren menan bagup ya tan go Eibaraam orup menan gop ya anun go di anu nau iwandin. Ap anuiwandini menan Eibaraam waenapan aruga omae baewa muga entanen.

¹⁹ Wam ame gapan Eibaraam en mega apane nani yamunaet (100) umap aeta di, orup barae barae ya umap. Waenewa, Sera den aeta ton, orup wara wara wamewa uon tan. Dere aeta guramon go orup baraeopen menan God inap anu tumat fane.

²⁰ Orup da barat wa agiaseni Eibaraam gego da ya anun. Anu tumat mega eparae den gapan God wa atonasiwandin.

²¹ God aro amun mega aritawa menan Eibaraam wa agiaseni nopewa kaimakaet di anu tumasen.

22 Me God ap anega anu tumaseni menan God Eibaraam apan kakae iragena dien.

23 Wataget ok anega seane,
God apan kakae iragen dien.

Ap seane Eibaraam menan megenat ya seane.

24 Go nunan den ok ame sean. Ayop nuga Iesu bop tan God wan inakae sia yon wandeni ameme nu anu tumaseta gapan nu den kakaewa nagirewa dianeta.

25 Iesu koewa nuga menan tone boen amba God nu kakaewa nagirewa di-anepen menan inakae sia yon warden.

5

Iesu menan God inap baigan taivin

1 God anu tumasetoni menan me nu kakae dianen menan Ayop nuga Iesu Keriso nunan tani gamup nu God den baigan taivin.

2 Menan endi Keriso naune aen God garaet wat aipakam nimaneni gapan tumap waninivin. Nu gop ya anuivin go aton aigap anuivin iwa nu wam da amba God oya oya mega nu den warait.

3 ugu vegaek bagu sisi ugup ugup anu tanata den aton anuivin. Iwa ugu vegaek ame gapan nu wat ayamet anu tumat nuga to kimeta.

4 Ame wat ayameta gapan God nu inanup aton anuta ap gapan anu dao nuga kai wareta.

5 Anu dao mame gapan nu tap gop da ya anuivin iwa Guewa Woup Seniwa gamup God baigan megawa potanup wagemen no dotouen.

6 Wataget amba, nu koewa tat God tandayasinton menan mek anuni wamewa gapan Keriso tauue nu koewa nagirewa nunan boen.

7 Guegue da mam. Apan kakaewa menan garewa orup da bop tapen tapiwa ame kaimake den. Amba sia evenanu kakaewa menan garewa nu da bop tapen tata ame den umap uon.

8 Go nu koewa taivintoni go gare, God Keriso watu enen nunan bop tan, iwa God nunan anu gurini menan.

9 Keriso nunan boeni gapan deniwa tau viseni menan God yamap nu kakae waninan. Go ap megenat uon go da sia God ugu

gangan mega ya yawapen menan Keriso namunu boren.

10 Wataget God anavi mega waineton go Otua nunan boeni gapan God evenan tanen. Evenan taneni menan endi aigap sia Iesu ao yon wandini gapan nu den inak ewakewa warivin.

11 Go inak megenat ya nunen, Ayop nuga Iesu Keriso menan God inap aton anuivin iwa me endi evenan tanen.

Bop Adam gapan tauen go inak Iesu gamup tauwan

12 Adam koewa tani gapan koewa piup ma tauen. Koewa ame bop den ware tauen. Waenapan eviwa uruga koewa den taintoni menan Adam bop ere me tani ame nu uruga inanup tauen.

13 Waenapan erewa koewa tanau onam wanumune amba apan Mosis God iup mega sen. Menan namu iup ya seni wamewa gapan waenapan koewa muga God ya batnagen, iwa iup evi amba tauen.

14 Adam wam mega onin e Mosis wam mega taueni gapan bop aroewa den wandeni gan waenapan borit waiwanumun. Waenapan eviwa Adam koewa tani mini ya tane go mu den mondi borit waiwanumun.

15-16 Apan namu iragen Adam amba evi taueni apane ame Iesu. Adam koewa tani garewa ugup, amba God Iesu gamup garaet nuneni garewa ugup sia. Go Iesu gamup God garaet nunen. Menan Adam koewa tani garewa waenapan aruga borit waiwanum. Go God garaet nuneni apan daiton ame Iesu Keriso. Me gamup God garaet aigap iragen nuneni gapan nu waenapan aruga inak warivin. Adam me orup daiton, amba koewa daiton tani menan waenapan aruga God wanene gapan tauue borit wain iwa mu koewa diamon. Nu aruga koewa nuga arugataet taivinton go God Iesu gamup garaet nuneni gapan nu kakaewa nagirewa dianen.

17 Apan daiton Adam koewa tani garewa bop piup iragi ta ewanen. Me apan daiton megenat go garewa mega waenapan iravi warivin. Go apan dawa, Iesu Keriso tani, garewa aigap iragen. Iwa Iesu, apan daiton megenat, nunan bop tani menan God nu kakaewa nagirewa dianen, amba

garaet aigap sia ame nu Iesu aro amun mega den warat waninait.

¹⁸ Ap menan, apan daiton koewa tani menan God waenapan iravi koerage diamon. Ap umap apan dawa kakae tani menan God waenapan iravi kakae dianen amba inak nuniwandalat anun.

¹⁹ Apan daiton, Adam, God noa ya anu tani menan waenapan aruga koewa taiwanum. Ap umap apan dawa, Iesu, God noa anu tani menan God waenapan aruga kakae dianiwan.

²⁰ Koewa nuga aruga yao anupen menan Mosis iup namua sen. Koewa nuga baware iragen go God garaet wat aipakam aigap sia nuneni gapan koewa nuga wat musen.

²¹ Wataget waenapan koewa taiwanumune gapan borit wan go endi God nunan garaet tani gapan nu inak kakaewa ta aninait. Ayop nuga Iesu Keriso nunan tani menan inak yaibobot wanin aninain.

6

Keriso gamup koewa aro amun mega inanup uon tan

¹ Ap watoni menan nu aigap anenen wait? Nu inanup God garaet mega aigap sia baware tapen menan nu koewa aigap aigap tainait go?

² Ae, uon iragen. Koewa aroewa inanupe wat musen uon tan menan ap anega ya tait.

³ E asigiap, nu Keriso gamup dup iatoni gapan Iesu Keriso den intum taton. Amba sia anu tumat dupewa ame gapan nu me bop mega den intum taton.

⁴ Guegue ame mam, Dup iatoni gapan Iesu boen urata tune nu den urata tunen. Ap umap sia, Mamanu God amun oya oya bawarewa mega gapan Keriso inakae sia yon wandeni, nu den inak nitaton, ame gapan inak ewake waraton waninan.

⁵ Menan nu Iesu den daiton intum ta bop tatoni mini, nu me inakae sia yon wandeni mini nu den inak nitat sia yon wanineton.

⁶ Nu mame di anuivin. Wataget koewa aroewa inanup baware, menan nu imunu koerage namua ame uon tapen menan Keriso den korosi gapan togurane boen,

menan endi koewa aroewa inap ayamat ya taivin.

⁷ Guegue ame apan da boepi mini, boepi wamewa gapan koewa aroewa me inap den uon tata.

⁸ Nu Keriso den intum ta borit watoni menan evi amba me den inat waninait, ame nu anu tumasivin.

⁹ Menan nu asiginup Keriso boen God wani inakae yon wandeni amba sia ya boeta. Bop amunewa yamup sia ya wandeta.

¹⁰ Guegue ame apan boepi mini, Iesu boeni wamewa gapan koewa amunewa ap gapan den boen amba endi me sia inakae yon wandeni God den intum tan wandiwan.

¹¹ Ap umap e manega anupen, e Keriso den intum ta borit wayana menan koewa amunewa inayap den uon tan amba endi e God den waniwanin iwa Iesu gamup e me inap aisean.

¹² Etuya imuya dim dim koewa tat anuine, e imuya ya warep tanda anu iwa korosi gapan koewa aroewa gase boen.

¹³ Menan etuya imuya semua da den koewa tat anupiwa tanda wan kwayup tan. Gare God anuni ap taiwanian. E borit wane inak sia warane nagire mini etuya imuya iragi God nao mega kakaewa taiwanian.

¹⁴ Mosis iup seni gapan ya waniaisi God nunan garaet tani gapan waniaisi menan koewa inayap aro tapen tapi tanda anun.

Koewa ae vean kakaevet taiwanian

¹⁵ Endi anenen wait? Mosis iup namua seni gapan ya waninait iwa nu God garaet megawa gapan inivin, menan nu koewa tainait go? Ae, uon di.

¹⁶ E anuiwanin apan da anega wapi, “Onaen, wapena tan.” Ap wapi men tanewa me ayop egawa, e ago megawa. Ap umap e koewa ago megawa mini tanewa e garewa borit wai go God nop mega anu tane garewa ame kakaewa nagirewa diaeta.

¹⁷ God inap gaun wapen! Iwa wataget koewa inayap aro taiwandin anu taiwanian go endi nop tavewa wadidiaene gapan anuyan atonu den taiwanin.

¹⁸ God tani gapan koewa aroewa vetaeni amba endi God nao mega kakaewa di taiwanian.

¹⁹ Ne endi piup gueguewa gapan wadiaivin iwa kiman gueguewa e oare ya anu kakayatai. Wataget eyao taine mini taiwanian umam noa den taiwanian guegue kakaewa oare go endi imuya woup sepen menan ek etuya kwayup tan guegue kakaewa ta aisiwanian.

²⁰ Koewa nanam imaeni gapan tayana menan guegue kakaewa e oare ya taiwanian.

²¹ Koewa ame tayana menan endi umam anuiwanin iwa garewa mega bop di.

²² Endi God wani menan koewa gapan vetaen amba God menan nao taiwanian. Menan endi e God menan waniwanian amba maup mega ame inak yaibobot.

²³ Koewa taitoni garewa ame bop di go God yan garaet mega ame inak yaibobot iwa ayop nuga Iesu Keriso den wainiton menan.

7

Mosis iup mega aroewa Iesu boeni gapan uon tan

¹ Waenapan negawa, e iup gueguewa asigiap. Ame apan da kasiga wandini gapan iup menan taiwadata. Go me bop tapi gapan iup ame menan da sia ya tata, bop gapan iup aroewa uon di tan.

² Guegue da mam. Waen memewa inaka wandepi iup aroewa wandini gapan memewa ae ya veta. Go memewa boepi iup ame ya wataneta.

³ Ap menan memewa inaka wandepi, go waen ame apan dawa den inepi wainapan anega digurain, "Ge wainan gogo taingi." Go memewa boepi ap anega ya diain. Apan da ugup sia naisepi iup ya wataneta ame wainan gogo da uon.

⁴ Waenapan negawa, ne guegue gat wana e ap umap. Mosis iup seni ame namua bawarewa egawa, go Keriso boeni e den me intum tayan borit wayana menan iup ame ya watanaiwan. Amba endi e Keriso megawa, me inaka ao yon wardeni mini e inak warayan, God anuni nao kakaevet ta aisiwaniampen menan.

⁵ Wataget etunu imunu koewa ugup ugup tat anutoni iwa Mosis iup mega baraeni gapan nanam nimanen. Menan nu dim dim da taton ame garewa bop megenat inanup tauen.

⁶ Go endi God iup ame gapan vetanen iwa nu Iesu den intum tat borit waton menan iup aroewa nu inanup uon tan. Ap menan nu iup namua ok nanimu gapan seane ya taivin go inak ewakewa Guewa nuneni gapan taivin.

Mosis iup mega gamup nu koewa nuga to ewanen

⁷ Mosis iup mega menan anenen wait? Nop ame koerage go? Ae, koerage uon. Iup ya wandepo koewa nega ya anupo. Iup anega wani, "Evenaga puraput mega ya wawa baguga ya kandaep." Ap ya wapo koewa ap me ne ya anupo.

⁸ Iup anega watananegeni go koewa taue namunap yonen evenana puraput mega di warat anun. Iup ya wandepo koewa waenapan inamup aro ya tapo.

⁹ Wataget ne Mosis iup mega ya anuna gapan ne inak waran wanigen. Go iup anu kakayasena wamewa gapan koewa nega sia yon wande aro tani ne God yamap bonigasen.

¹⁰ Mosis iup mega inak nenapen wan go ne inak ya waran go God yamap bop tan.

¹¹ Iup ame koewa ya tapen dianegeni gapan koewa taue namunap yone aopan ewanegen menan ne God yamap bonigasen.

¹² Ap menan God dianeni noa amba Mosis iup namua seni den, dere dere kakae di, koerage da uon.

¹³ Iup ame kakae go iwa dimen ap gapan ne bop warivin, menan kakaewa gamup bop taueni go? Ae, uon di. Koewa nega namunap yonen iup kakaewa watananegeni go ne koewa di taingina menan ne God yamap bonigasen. Koewa nuga koerage di nu ap anu kakayasepen menan iup wa ewanen. Wa ewaneni gapan nu endi koewa nuga omewa baware iragen di anuton.

Imunup tat mega yaunewa dere,

piup megawa amba kiman megawa

¹⁴ Nu anuivin God Guewa wadieni gapan Mosis iup namua sen. Go ne apan piup gapan yanana menan wam da bonigatain menan koewa aroewa ne inanap baware di.

¹⁵ Ne guegue nega anu waramasivin. Tat anuna ya taivin ya tat anuna taivin.

¹⁶ Ne ya tat anuina tapena guegue ame iup namua Mosis seni iwa mega ne den umap waivin.

¹⁷ Ap menan ya tat anuna tapena guegue koewa ame ne inak nega ewakewa gapan da uon go koewa potanap wandini taiwan.

¹⁸ Imuna potana gapan kakaewa da ya wandia. Kakaewa tat anuivin go tapen taingina aro ne inanap uon.

¹⁹ Ne kakaewa tat anuna ya taivin koeragewa ya tat anuna di taivin.

²⁰ Ap menan ya tat anuna tapena guegue koerage ame ne inak nega ewakewa gapan da uon go koewa potanap wandini taiwan.

²¹ Tat yaunewa da potanap wandini anuivin, ne kakaewa tat anuivin go koewa inanap yoniwan.

²² Ne bumagan makewa gapan God iup mega atonua baware anuivin.

²³ Go ne etuna gapan tat yaunewa da ugup taiwandin anuivin. Menan bumagan makewa ge etuna dere anan warianum. Go koewa tat yaunewa ne potanap warden nao warini gapan ne koewa anun taivin.

²⁴ Akae, ne bagu sisi anuivin. Etuna bop neginewa wat naunegen aeni menan da wat inakam nimanegeta?

²⁵ Ayop nuga Iesu Keriso wat inakam nimanegeta. Nenan tani gapan God inap gaun waivin.

Gat wana guegue mam. Bumagan makewa gapan God iup mega kwayup taivin go etuna gapan koewa yaunewa taivin.

8

God Guewa potanup wandini menan inak warivin

¹ Nu Iesu Keriso den waninanta God ya wa koeam nimaneta.

² Iwa Iesu Keriso den waninanta God Guewa waini gapan inak ewakewa warivinait ap gapan God nu bop ge koewa aroewa gapan vetanen.

³ Imunu ge etunu aro da uon, amba Mosis iup seni wa tamanam nimanet anun go nop ame umap ya tan menan God yone nunan tan. Koewa nuga enu yave wapen menan Otua iragenawa watu enen. Me apan kakaewa go nu umanup apan entanen amba koewa nuga garewa wareni uon di tan.

⁴ God ame tani iwa mega Mosis iup namua seni ame om gapan gapan tamana di tainampen menan tan. Nu etunua koewa aroewa gapan tainampen umap uon go Guewa Woup Seni aroewa gapan iup dim da wani ame tainampen.

⁵ Waenapan da da etumu megenat menan anu tapi ap gapan etumu naumo amoin, amba waenapan da da God Guewa megenat menan anu tapi, God Guewa naumo aeta.

⁶ Menan etumu naumo amopiwa ame tavewa bop taueta go Guewa naumo aepiwa ame tavewa inak ge nonup taueta.

⁷ Ap menan waenapan da da etumu megenat menan anu tapiwa God anavi megawa. Iwa God iup mega ya anune taiwanum. Amba sia etumu aroewa gapan iup mega anu tapen menan umap uon.

⁸ Waenapan etumu megenat menan anu tapiwa God atonamu ya anuta.

⁹ E etuya megenat menan pot pot ya taiwanin. Gare e God Guewa potayap wandini menan, pot pot taiwanin. Waenapan da da Keriso Guewa potamup ya wandepi mu Keriso mega uon.

¹⁰ Koewa taiana menan etuya boeta go Keriso e potayap wandini menan God Guewa e inak egawa di amba God kakaewa nagirewa diaiwan menan imuya inak warian.

¹¹ Iesu boen amba God wani gapan sia inakae yon warden. God Guewa ap umap sia e potayap wandini menan etuya boeta go God aroewa gapan e sia inak itai.

¹² Ap menan, evenan wainawa, God nunan tani garewa di tat anuivin go etunu megenat menan ya tainait.

¹³ Iwa etuya megenat menan tanewa e borit wai. Go God Guewa aro mega gapan etuya koewa mega ae toguranewa, ap gapan e inak warai.

¹⁴ God Guewa da da nauyae aiwandapina e God otu waiwa di.

¹⁵ Ame gapan God Guewa mega eneni menan e ago nagire mini uon go God otu wai entan imaen, menan tap ya anui. E God otu waiwa tayana menan endi God Guewa aroewa gapan God inap anega wai, "O maman, mamanawa!"

¹⁶ God Guewa nu guanu den intum tani gapan nu God otu waiwa tamana di dianwanum.

¹⁷ Nu otu waiwa menan God waenapan mega garaet munat wani den nuneta. Amba sia dim da Keriso wanat wani nu den warait. Keriso ugu vegaek bagu sisi anu tanini ap umap nu anu tanata Iesu oya oya mega nu den warait.

God at mega kakaewa gapan nu den waninait

¹⁸ Ne manega anuivin nu endi ugu vegaek bagu sisi anu tanitoni kamontu, go God kakae guragut mega ugup ugup evi ewanepi ame baware iragen.

¹⁹ God wan dim dim iragi wan venat mutane evi nu God otu waiwa wat arogam nimanepi wamewa menan amunugaet amat taiwanum.

²⁰ God wan dim dim iragi wan venat mutane ame puak mutaben diamon. Mu ya puak mutat anun go God mek anuni gapan puak musiwanum. Go wam eviwa ya puak musepi wamewa menan amat taiwanum.

²¹ Wam ame gapan sia ya di puak mutain go God wat vetamoni gapan nu God otu waiwa oya oya nuga den intum ta wanumoin.

²² Nu anuivin wataget God wan dim dim iravi wan venat mutane onin e endi den waen orup vegewa anuine mini mu vek ame den anune, anu sisimene inkae ankae waiwanum.

²³ Wan dim dim ame mugenat bagu sisi ya wariwanum go nu God Guewa namu waritoni nagirewa den imunu gapan anu sisimeton inkae ankae waivin. Me otu waiwa dianeni tavewa yawapen men

amase taivin. Wam ame gapan imunu etunu kakae ewakewa entan nimaneta.

²⁴ God wat inakam nimanepen tani tavewa ya yawaton go anu dao nuga gapan gego da ya anuton. Waenapan dim dim men anuine yavepiwa ame anu dao gapan uon iwa mu gase yawan.

²⁵ Go anu dao gapan dim dim da ya yavtoni amase tainanta ame yaentuk mantuk amat taivinait.

²⁶ Ap mini nu imunu aro uon menan God Guewa wat agoat nimaniwan. God inap mup anenen wawa yaunewa nu oare menan God Guewa potanup wandini nunan God inap mup waiwan. Nop nuga anu kakayat kakayat mini ya waiwan go me bumagap iragen karaua bagu sisi nuga menan waiwandini nu ya anuivin.

²⁷ God imunu yaven anuini apanewa menan Guewa potanup wandini anuni den anuwan. Iwa God dim da menan anuini gapan Guewa waenapan mega nunan mup waiwan.

²⁸ Nu God men anu gurintoni mek anuni gapan gangan nimaneni nagirewa, dim dim kakaewa koewa iravi inanup taupei ap gapan wat aipakam nimaniwan.

²⁹ Wataget di God waenapan mega namu anu nimaneni gapan nu Otua Iesu umap entan nimanepen menan ganganat nimanen. God nu anu tumasintoni nagirewa Iesu umap tanen go me Otua Iesu namu yonet anun.

³⁰ Namu iragen nu ganganat nimaneni, evi amba nunan wan. Nunan wani amba nu kakaewa nagirewa dianen. Kakaewa nagirewa dianeni amba oya oya mega den nunen.

Iesu tani menan God nunan anuwan

³¹ Namu watoni mini tavewa mega anenen wait? God tantananu di yonepi da mananeta? Ae, da uon di.

³² God Otua men goandage ya anun inanup garaet di watu en nunen. Ap nuneni menan dim dim kakae guragut iravi den garaet nuniwadata.

³³ Amba sia God waenapan mega om enumoni menan da diguguramota? Ae, da uon di iwa God nu kakaewa nagirewa dianen.

³⁴ Da enu yawane wata? Uon, iwa Iesu Keriso nunan boen sia inakae yon wande

God mainewa nutup gapan wandia. Ap mepe God inap nunan yaumakap yonen mup waiwan.

³⁵ Orup ansena da Keriso baigan mega gapan nau nugut nimaneta? Ae, uon di. Itan wamewa o bagu sisi wamewa o Iesu men waenapan anu koeragam nimanepi wamewa o enup wamewa o kayakayawan ta waninetoni wamewa o anan wamewa o bop wamewa ameme inanup taupei Keriso baigan nunan ya anuiwadata go? Ae uon, baigan nunan anuiwadata.

³⁶ Menan nu God inap manega wait, ame ok namu seane oitanu anega wan, Genan nu wam wam pot pot bop mananepen taiwan, waenapan man enune gurine mini enu guranet anuiwanum.

Ok ap anega sean.

³⁷ Itan ugup ugup ameme inanup taupei Keriso gamup iragi garao mumivin.

³⁸⁻³⁹ Ne mame di anuivin. Nu Ayop nugua Iesu Keriso nunan tani menan God nunan baigan anuiwandin dim dim da ya nau nugut nimanet. Bop o inak o anea o airampu o aro kimaniwa da o dim dim wam endiwa eviwa den o dim dim kimaniwa o piupawa ameme iravi God Iesu Keriso ayop nugawa gamup baigan nuneni da ya nau nugut nimaneta.

9

God Diu nagirewa anu om enumon

¹⁻² Bagu sisi nega baware wam wam bumagana tuk wapen taiwan ya bigariwan. Ne Keriso megawa, tave di waivin ebo ya waivin. Nek imuna nega den tave di waiwan, God Guewa Woup Seniwa imuna kwayup taini menan ne aopan ya waivin.

³ Bagu sisi nega iwa mega ame Diu nagirewa, nu denip daitonawa, go mu Keriso tandayasine menan, munan baita da ya anuivin. Mu God wanene mega ya tautanapen menan anuivin, garewa ne apan koerage dianegepo amba ap menan ne Keriso den intum ya tapo ame ne aton di anupo.

⁴ God mu om enumon otu waiwa diamon, amba me oya oya mega to ewamon, kakae guragut mega munat wa agiat munen. Nop mega namua Mosis iup seni den

munen. God inap wa taragasepen guegue wa ewamon.

⁵ Watageta God anu tumat ta kakayasene nagirewa, mu Diu nagirewa omae baewa. Keriso den, Diu denip daitonawa entanen amba nu inak nunapen menan piup gapan tauen. Ap menan God yaua ao warat, me waenapan iravi Ayop mugawa, kaewa kaewa yaibobot wande aiwandata, ame umap!

⁶ God Diu nagire waenapan mega tapen menan wa agiat mumeni agi ameme uon ya tat waivin iwa denimu gapan mu Diu nagirewa di go upi Diu iragena da uon iwa God agi megawa ya anu tumasen.

⁷ Ap umap sia Diu nagirewa upi apan Eibaraam naewa iragena da uon. Iwa God Eibaraam anega wadien, “Otuga eviwa Aisik gamup naewa ame gapan batnagin-gain, go otua namu yaneni, Isimero, gamup ame uon.” God anega wan.

⁸ Nop ame gueguewa mam, Eibaraam otu waiwa mek anuni gapan seni, God otu waiwa ya diamon. Go Eibaraam otu waiwa da da God wa agiaseni gamup seni God otu waiwa diamon.

⁹ God Eibaraam orup wanat wa agiaseni manega wan, “En daiton uon tap amba sia ongain ap wamewa gapan waenaga Sera orup apan baraeta.” Anega wan.

¹⁰ Guegue da sia mam. Eibaraam otua ame nu omayan baewa Aisik, me wae-newa Rebeka, dere inane amba waen bagup tan orup apan dere naturup sen.

¹¹⁻¹² Orup dere di go God mek anuni gapan orup daiton namu om enuni noa ya topakisepen menan inewa anega wadien, “Tasewa yone gwaniwa agoe tata, menan me gauarap wandeta.” God anega wani wamewa orup dere ame, mu inamu potap wanumune, da ya yanen, da kakaewa o koewa da ya tan. Menan God orup daiton ame wam eviwa menan namu om enun. Orup ame dim dim mek tapi menan om ya enun, go God mek anuni gapan om enun.

¹³ Nop tase gwani menan ok anega sean, Ne Diekap menan anu guran go me tasewa, Iso, ne anu koeamen.

¹⁴ God ap anega wani menan nu anenen wait? Me Iso anu koeamet wani menan God koerage diait? Ae, koerage uon.

¹⁵ Iwa me Mosis anega wadien,
Ne waenapan munan baguna anupena di
anuin,
munan bagu sisi anupena di anuin.

¹⁶ Ap menan nuk anuton taitoni gapan ya
venasiwan go God bagu sisi inanup anuin
gapan venasiwan.

¹⁷ Watagaet God, Idip ayopewa, Pero dien
ok anega sean,
Ne iwa dim men at mame ayope bat gim-
agen?
Ge gamugap waenapan ne aro nega
yawain,
at gapan at at iragi ne epara nega yao
anuin,
God anega Pero dien.

¹⁸ Ap menan God mek anuni gapan wae-
napan upi bagu sisi inamup anuiwan upi
nop mega ya anupen men me wani gapan
mu imumu gware wan.

*God inanup bagu sisi ge ugu gangan
anuiwan*

¹⁹ God mek anun taini menan e da da
anega wadianegai, "Iwa dimen sia enu
yawanen waiwan? God mek anuni di tata,
da wataneta?"

²⁰ Wane ne gare anega wadiain, "E aro
da di go, anen amba God inap nipec
waiwanin?" Unup taine nagirewa unup
muga yone anega ya diamota, "Iwa dimen
manega tanegean, ne tanda?"

²¹ Unup taini apanewa motok nanip
wandepi gapan semu wadume barip
gapan megenat danamepen unupewa
tap, semu dawa pot poraet danamepen
unupewa tap, mek anut mega di taiwan,
iwa motok megawa di.

²² God guegue unup taine nagirewa ap mini
sia. Koerage taine nagirewa mu koewa
muga menan, God amun aro mega amba
ugu gangan mega, dere ewanepen menan
mu gut koeam mumepi wanene tamopen
anun, go gare me yaentuk mantuk wande
en.

²³ Amba yamunewa ame bagu sisi
nunan anuiwan amba me oya oya mega
baware ewanepen menan anun, nu koer-
age tainton nagirewa go at mega kakaewa
kimaniwa anepen menan wat tamanam
nimanan.

²⁴ Menan nu waenapan megawa, Diu
nagire nugenat uon go Diu uoni nagirewa
nimakamup den, nunan wan tauaton.

²⁵ God Diu uoni nagirewa munan wani
apan Osea ok anega sen,
Namu mu waenapan negawa uon go evi
mu den waenapan nega amba di-
amoin.

Namu munan ya anu gurina nagirewa go
endi munan den anu gurivin.

²⁶ Wataget ok anega seane, E waenapan
negawa uon,
waenapan ap anega waiwanumune,
go endi God wande bobot apanewa otun
wai diamuiwan.

Osea ok ap anega sen.

²⁷ Den apan Aisaya at Isurero nagirewa
munan anega wan,
Mu arugataet puiman gerase umap
wanum am,
go God otu dere megenat wat inakam
mumeta.

²⁸ Iwa Ayop nuga God piup nagirewa
koewa muga garewa,
menawaet kaimake den munapen taiwan.

²⁹ God evi tapi noa Aisaya namu anu anega
wan,
Ayop nuga baware iragena God naewa
nuga upi kwayup ya tanepo,
nu pa Sodom ge Gomora gut koeam mu-
meni mini gut koeam nimanepo.
Aisaya ap anega wan.

*At Isurero nagirewa Iesu oit mega ya
anu tumasen*

³⁰ Endi nu anen wait? Diu uoni na-
girewa God kakae diamopen menan yop
ya ta anun go God inap anu tumasene
menan God mu kakae diamon.

³¹ Go Diu nagirewa, God iup mega mu
inamup taueni menan, iup ame gamup
God kakae diamopen menan yop taiwanu-
mun go inak ame ya tautanane.

³² Iwa dimen ya tautanane? Iwa mu
tat muga kakaewa gapan, God kakaewa
nagirewa diamot anune, go anu tumat
neginewa tandayasen. Ap menan God
agim bawarewa ae baraeni, negina wan-
deni menan sintanamon geamon.

³³ God nop mega gapan agim ame
menan ok manega sean,
Wapena anun, ne pa sewa Ierusalem
gapan,

agim da waenapan sintanamopen men
barain.
Inap taupei sintanamota.
Go orup da me inap anu tumat taiwandap-
inawa,
gare tap gop da ya anuin.

10

¹ Evenan wainawa, ne waenapan nega
Diu nagirewa munan baguna anuivin, mu
inak ewakewa warapen menan God inap
mup waivin.

² Mu God menan amunugaet anune
taine, ame tave di, ne den yawamona
amba ap oisewa aroga waivin go mu God
tavewa mega ya anu awane gapan tai-
wanum.

³ God waenapan kakaewa nagirewa di-
amopi neginewa mu oare, gare mu muk
negin dawa tun amone. Ap menan
God anu tumase kakaewa diamo diamo
neginewa mu tandayasene.

⁴ Negin ame mam, Keriso taueni
wamewa gapan Mosis iup namua seni
uon tan, menan endi da da God inap anu
tumasepi me kakae diamota.

God waenapan iravi wat inakam mumet anun

⁵ Mosis nu iup ayamase tainton gapan
God kakaewa nagirewa dianepen menan
ok anega sen,

Waenapan da da God iup mega ayamase
tapiwa,
ap gapan inak warain.

⁶ Go God waenapan da da God anu tu-
masepi gapan me kakae diat anupi menan
anega wan,

Orup da manega ya wap, "Keriso ta warit
nimanepen menan,
orup da kiman dot ae Keriso wat vit onep."

Ap anega ya wap.

⁷ Den manega ya wap, "Orup da piup
gwanap vise,

borit waine nagire arewa gapan,
Keriso ae ma wat dorep." Ap anega den ya
wa.

⁸ Go ok seane tavewa iragena ame mam,
God nop mega wandap uon, inayap kon-
intu di,
ame noyap imuyap di wandia.

God nop mega ameme, God inap anu
tumasepen menan opata gapan wadidiae-
toni.

⁹ Menan e noya gapan, anega wanewa,
"Iesu me Ayop nugawa," amba e imuya
gapan anu tumat den anega wanewa,
"God wani gapan Iesu Keriso sia inakae
yon wanden," ap gapan God wat inakam
imaeta.

¹⁰ Menan bumaganu makewa gapan God
anu tumasinanta, gare me nu kakaewa
nagirewa dianeta. Amba nonu gapan
anega wata, "Iesu me nu Ayop nugawa di,"
ap gapan nu wat inakam nimaneta.

¹¹ God nop mega ok anega seane,
Waenapan da da me anu tumasepiwa,
me inap tap gop da ya anuin.

¹² Nop mame seane, Diu ge Diu uoni
nagirewa munan seane, iwa waenapan
iravi God yamap daiton di. Amba me
nu Ayop nugawa God daiton di. Da da
God menan mup wapiwa, gare me wat
aipakam baware iragen muneta.

¹³ God nop mega ok anega seane,
Waenapan da da God inap ago menan
mup wapi, God inak ewakewa mumeta.

¹⁴ Waenapan God ya anu tumasene
menan anenen amba ago menan God
inap mup wain? Amba God oit mega
kakaewa den ya anune menan, mu ane-
nen amba anu tumat tain? Amba orup da
opata gapan wadiamopen menan ya wan-
depiwa mu anenen amba God oit mega
kakaewa anuin?

¹⁵ O opata waine nagirewa ya watu
enamopi menan mu anenen amba opata
wain? Amba sia God nop mega ok anega
seane,

Nu atonu den opata waine nagirewa wau-
pamoit,
iwa oit muga kakae iragen wadianepen
tauane.
Ok ap anega sean.

¹⁶ Opata waine nagirewa tauane go orup
upi nop muga ya waran. Watageta apane
Aisaya ap umap sia wan,

O God, waenapan otu dere megenat nop
nuga anu tumat tane,
go upi ya di anu warane.
Ap anega wan.

¹⁷ Ap menan Keriso oisewa orup da opata gapan waini menan orup dawa darinap anun. Keriso oisewa darinap anuni menan me anu tumat mega yane kai waren.

¹⁸ Endi ne singui nega mam. At Isurero nagirewa oit ame darinamu gapan anune go uon? Mu di anuiwanum iwa God nop mega ok anega seane,
Nop muga at at iragi senare tau aen.
Nop muga piup iravi bararaen.

¹⁹ Singui nega da sia mam. At Isurero nagirewa nop ame darinamup tauen, go mu ya anu awan go? Mu di anu awan. Mosis God noa ok anega sen,
E nop nega ya warayan menan,
ian ugape nagirewa nop ame wadiamoin,
amba e anu koeam mumai,
iwa ne mu danam mumana menan.
Ian ugape ame anu waramasine na-
girewa,
go nop nega anune menan e uguya gangan
naeta.

Mosis ap anega sen.

²⁰ Den apan Aisaya God oisewa kaimakaet anega wan,
Nenan yop ya tane nagirewa ne tanane-
gené.

Nenan ya anu wane go inamup venat
nigasen.

²¹ Go Isurero nagirewa munan anega wan,
Ne wam wam pot pot waupamot anuivin,
go nop nega ya anune amba tandayasene
taiwanum.

11

Diu nagire otu dere mugenat God anu tumasen

¹ Endi singui nega da sia. God waenapan mega Diu at Isurero nagirewa ae vemon tandayat mumen go uon? Ae uon. Ne Pol den at Isurero apanewa. Omayan baewa watageta apanewa Eibaraam dugup nega yaua Bendiman.

² Wataget iragen God waenapan mega Diu nagirewa om enumoni onin en, endi den ae ya vemon. Watageta apane Elaidia God inap noyam wani God nop mega gapan seane batnagean go uon? Wam ame gapan Elaidia God inap at Isurero nagirewa anega diguguramon,

³ Ayop negawa, nop gega waiwanumune
nagirewa,

Isurero nagire guramone borit wan.
Man genan guraton iriton i watarewa
aruga mu benagen.

Ne negenat apan gegawa wanik angin,
go mu tonegep bonigaset anune tai-
wanum.

⁴ Elaidia ap wani go God gare wadien,
Gegenat ya wanik agi.

Ne waenapan nega upi 7000 wanum am.
Mu god eboewa da yaua Beiro inap ya wa
taragasiwanum.

Waenapan nega ame kwayup tamuivin.
Ap anega wan.

⁵ Wam endiwa den God mek anuni gapan
waenapan mega otu dere om enumon.

⁶ Dim dim kakaewa tatoni gapan ya om
enuneni go me garaet nunat anuni menan
om enunen. Iwa nu kakaewa taintoni
menan om enunepo ame gapan garaet
mega tavewa uon tapo.

⁷ Menan endi anenen? At Isurero
nagirewa God mu kakae diamopen
neginewa yop tane go ya tautanane.
Go waenapan otu dere mugenat God
om enumo kakaewa nagirewa diamon.
Upinewa iravi imumu kaimake wan God
tandayasen.

⁸ Nop mega gapan ian ame Diu nagirewa
munan ok anega seane,
God wani gapan mu imu pose di tobob-
oram oniwandin.

Watagaet amba onin e endi den mu ya-
mamu den,
go ya yawiwanum, darinamu den go ya
anuiwanum.

⁹ Apan Devit anavi mega munan anega
wan,
God men barip tuguine, tavewa uon
menan,
barip ame inak muga enekum muk ingane
ukum umiwanum,
ame koewa muga garewa ap me gapan
warain.

¹⁰ Yamamu mum tauep imumup ya anu-
pen anuivin.

God itan onemup sep bembenimu sep tap
waben taiwandata.

Devit ap anega diguguramon.

¹¹ Apan ap waiwanumune menan ne sin-
gui sia wain. Diu nagirewa ame gapan

sintanamon geamone sia yon wanumoin go? E, sia yon wanumoin. Go God tandayasine menan God Diu uoni nagirewa munan anu wat inakam mumen. Me ap tani iwa Diu nagirewa mu inamup anu koeam mumapen menan.

¹² Diu nagirewa God tandayase kayakayawar mini tane menan waenapan ugupe puraput nagirewa mini entan mumen. Diu nagirewa God inap anu tumat uoni menan God Diu uoni nagirewa wat aipakam mumen. Ame aton baware go wam evi amba Diu nagirewa God anu tumasep om muga tauepiwa, God wat aipakam mega aigap venaseta!

Ian ugupe nagirewa Diu nagirewa garamu waran

¹³ Endi e Diu uoni nagirewa inayap waivin. Ne Diu apanewa, Iesu ne Diu uoni nagirewa inamup watu enanegen, menan ne umam da uon atonu den Iesu nop mega e inayap wadiaivin.

¹⁴ Ne oit wadidiaepena gapan ne dugup nega Diu nagirewa upi anu koeam imaeipi gapan God anu tumatain go ne oare? Go ne ap anega anuivin.

¹⁵ Diu nagirewa God tandayasene menan God gare ian ugupe nagirewa evenan tamon. Menan wam evi da amba, Diu nagirewa entan tau God evenan sia tapi ame gueguewa borit wane nagirewa sia yon wanumuine mini venaseta!

¹⁶ Guegue da sia mam. Waenapan taba buredi semu megenat da God wanane menan ame buredi iravi God megawa di. Oma visiwa God wanawewa ame oma naniwa iravi den megawa di.

¹⁷ God oma egagawa naniwa paitamo ae se, amba oma puawa naniwa paise tau uap enanasen. Oma puawa naniwa guegue ame e Diu uoni nagirewa. God oma egagawa gapan enat imaini menan wam ame gapan oma egagawa aro ge inak mega gapan waniwanin.

¹⁸ Ap menan oma egagawa naniwa paitamoni mini e waenapan ame ya anu koeam mumane. Anenen menan apan apan taiwanin? E oma visiwa uon e naniwa megenat. Visiwa naniwa aro waniwan naniwa visiwa aro ya waniwan.

¹⁹ E anega waiwanin, “Garewa nu enanat nimanepen menan God oma egagawa naniwa upi paitamon.”

²⁰ Ap waiana tavewa di. Mu God ya anu tumasene menan paitamon go e God inap anu tumasiana menan garewa waniaisi. Go ap menan apan apan ya tane, God tawa anun.

²¹ Iwa God oma egagawa ame naniwa paitamoni, ame oma iragenawa di go God ap tapen menan bagu sisi ya anun, ap menan e oma puawa naniwa pitaepen menan di tata. Menan God tawa anun.

²² God ap taiwandini gapan nunan bagu sisi anuiniwa amba me ugu gangan mega den yao anuit. Me ugu gangan mega Diu ya anu tumasine nagirewa inamup go bagu sisi mega inayap anuiwan, ap menan anu tumat ega me inap ae ya veane, me inayap ugu gangan anu amba e den wa pitaepi tawa menan.

²³ Wam da Diu nagirewa sia entan God anu tumasepiwa God oma naniwa uap sia enanat mumeta iwa God enanat mumapen ame aroe me inap wandia.

²⁴ E ian ugupe nagirewa oma puawa naniwa mini. Naniwa paitamo oma egagawa enanasepi ame kaimake den iwa ame piup guegue mega uon go God megenat mek di tata. Go Diu nagire oma egagawa naniwa mini wataget paitamoni oma ap me gapan sia enanasepiwa ame kaimake uon iwa oma ame ibari iragena di.

God waenapan iragi munan bagu sisi anuiwan

²⁵ Waenapan negawa, nop karauawa da wadiaet anuivin, iwa e anut bawarewa nagire anu apan apan tane tawa menan. At Isurero nagire God tandayasene yaugai ap anega ya wanumoin. Ian ugupe nagirewa God anu tumasepi om muga tauepi gapan Diu nagire God inap sia entane anu tumatain.

²⁶ Ap tapi at Isurero nagire iragi God inak ewakewa muneta. God wani ok anega sean, Inak ewakewa munini apanewa pa sewa Ierusalem gapan taueta. Tauepi watagenta apane Diekap naewa mega koewa taine,

ame iravi wat museta.

²⁷ God sia anega wani,

Koewa muga wat mutapena gapan,
ewakewa wa agiat mumana noa wadi-
amoin.

Ap anega wan.

²⁸ Diu nagirewa Iesu Nop Oit Mega
Kakaewa tandayasene menan mu God
anavi mega tan. Ame e kakaewa ega
menan tane, iwa garewa e me di. Go
God Diu nagire om enumoni menan
watageta Diu nagirewa omae baewa wa
agiat mumeni menan endi Diu nagirewa
God evenan tamon.

²⁹ Evenan tamoni iwa God dim da
watageta om enumoni o wat aipakameni
ame endi ugup ya di tata.

³⁰ Go e ian ugupe nagirewa wataget God
noa ya warayan go endi enan bagu sisi
anuiwan, iwa Diu nagire God tandayasene
menan amba garewa ame e me di.

³¹ Ap umap sia God bagu sisi e enan anuni
menan Diu nagirewa God nop mega ya
wariwanum, go evi amba God bagu sisi
muman sia anuta.

³² God garaet bagu sisi waenapan iravi
nunan anupen menan nop mega tan-
dayasinampen menan imunu toboren.

God inap gaun baware wainampen

³³ God kakae guragut megawa arita ira-
gen di! Anut mega aigap iragen dim
dim iragi anuiwan. Anut megawa nu
umanup uon di amba guegue mega kakae
karauawa da anuitameta?

³⁴ Nop mega gapan ok anega seane,
God anuni da anuiwan? Me anu wara-
masepo,
da miniwa wa ewasepo?

³⁵ Da garewa warapen men, namu wanen?
Ae, uon.

³⁶ Iwa God wani dim dim iravi venat
nitaton. Wani gapan nu iravi waineton
amba endi me meñan waninivin. Yaua
usenagaet ao warivinan. Ame umap.

12

God yamap guegue manega tat

¹ Evenan wainawa, God pot pot bagu sisi
nunan anuini menan, ne wapena anun.
Imunu etunu kabaniwa God inap yan tan,

watageta man guran God yamap iriwanu-
mune mini. Ap tane gapan God imua in-
ayapaet di wareta amba me anuini gapan
nao mega kaimakaet taiwanian. Mame
wa taragat tave iragena God inap di taiwanian.

² Piup guegue mega ya ta aisiwaniane
go gare God wapi gapan imuya entanep
guegue ewakewa ame gapan ta aisiwanian.
Ap tane God anuini e den anui. Ame
anut mega kakaewa ame anuiwaniam-
inawa ame God atonuya anuta.

³ God garaet wat aipakam nimanegeni
gapan wadiaivin. Ek ek ingane bawarewa
da ya anune go gare ayamat di ta aisiwanian.
God anu tumat ega om ega ugup
ugup eneni gapan ek ek ingane ae yawan
anuñ.

⁴ Etunu daiton daiton go semua mega
arugataet wat nat tonat tan amba nao
muga ugup ugup.

⁵ Etunu mini nu waenapan aruga
go Keriso gamup nu etunu daiton tan.
Nu ugup ugup Keriso etua semu semu
megawa ame enat wanat taneni gapan nu
daiton taton.

⁶ God mek anuni garaet ugup ugup da da
nuneni gapan wara ta aninait. God menan
nop oit mega opata gapan waenapan wa-
didiampen garaet nuneni menan nu anu
tumat nuga gapan waenapan God menan
nop oit mega opata gapan wadidiampen.

⁷ Waenapan wat agoat mumat dianeni
wat agoat mumait. Anut ya warine na-
girewa wadidiampen dianeni wadidiampen.

⁸ Tap gego anuine nagire imumu to
aram mumat dianeni to aramat. Dim
dim nuneni yan ta munat dianeni yan
di ta munait. Ayop dianeni ayop nave
kaimakaet tait. Kayakayawan taine na-
gire bagu sisi munan anut dianeni ame
aton den di anuit, aro ugup ugup garaet
nuneni ap gapan taivinait.

Nuk gare gare anu nisinait

⁹ Baigan gare gare nenenga iragen tai-
wanian. Koewa iravi tandayasen ae vean
amba kakaewa iravi anu waran.

¹⁰ E Keriso dugup mega daitona menan
gare gare anu guriwanian. Ayamat gare
gare tane atonu den taiwanian.

¹¹ Imuya wat kakayasepi gapan nao kaimakaet taiwanian, endao wandoa den ya tane. Ayop nuga Iesu wadiaeni ame tane, imuya potaya eparae den taiwanian.

¹² God inap anu dao taiana gapan aton anuiwanian. Itan bagu sisi wamewa taupei yaentuk mantuk di wanien. Wam wam pot pot God inap mup waiwanian.

¹³ Iesu dugup mega nagirewa da da wan dim dim inamup uoni ame wan dim dim ega upi yan se munan. Daio nagire pa ega ega gapan waupamon.

¹⁴ Waenapan ta kokoeragam imaepi gare wat aipakam muman ya anu koeam mumane.

¹⁵ Waenapan aton tapi e den aton tan. Irip wapi e den irip wan.

¹⁶ Iravi kwayup gare gare taiwanian. Apan apan ya ta waiwanian go ek ingane ae wat otutamen ap gapan waenapan iragi ayamase taiwanian. Egenat asigip tat ya anune.

¹⁷ Waenapan ta koeragam imaepi garewa koewa inamup ya tane. Waenapan guegue kakaewa anuine ap me di taiwanian.

¹⁸ Ek manega anun. E waenapan iragi baigane den waniepen menan nonup neginewa yowa taiwanian.

¹⁹ Evenan wainawa, waenapan ta koeragam imaepi garewa koewa inamup ya tane go ae veane garewa God nemoro amba tamop. Me wani ok anega seane, Ne koewa tane garewa munapena apanewa.

Ne Ayop di, anega waivin, koewa muga garewa,
omewa gapan gapan di munain.

²⁰ God wani manega tan. Anavi ega enup aramopi taba munan. Megamu pakat musepi kaum munan. Ap anega wat agoat mumanewa anavi ega potamup umame den oma mini yagimota.

²¹ Koewa da ya garawat imaep. Gare kakaewa tan koewa garao muman.

13

At iravi namu yoyo nagirewa iup baraene gapan waninait

¹ At iravi namu yoyo nagirewa iup muga ayamase taine iwa mu God umap waini

gapan taiwanum. Namu yoyo nagirewa God semoni gapan aro amun wariwanum.

² Menan da da mu nop muga tandayasepiwa ame God iup megawa den tandayasiwanum menan evi amba wanene tamota.

³ Kakaewa taine nagirewa namu yoyo nagirewa iup muga inap tawa da uon, go koewa taine nagirewa mugenat wanene inamup taupei tawa. E namu yoyo tamu ya anupen anunewa menan kakaewa taiwanian amba mu e atonuya anuin.

⁴ Iwa e kakaewa ega menan God at iravi namu yoyo nagirewa munan wani menan God mu ayop mugawa di. Go e koewa tanewa, mu tamu di anun iwa ita gaut muga mondi ya tambuiwanum nop muga amunu den.

God ugu gangan mega koewa nagirewa munapen menan at iravi namu yoyo nagirewa munan wani menan God mu ayop mugawa di.

⁵ Ap menan nop muga di anuiwanian. God ugu gangan mega ya yawapen menan ap megenat ya anu tane go imuva ingane koerage ya anupen menan den nop muga anun.

⁶ Anut ap umap daiton den mu moni ega bongam bongam taiwanumun, God mu diamoni menan, muk anuine gapan uon.

⁷ Ap menan at iravi namu yoyo nagirewa dim dim muga munan. Moni bongamepen men wapi, ame sean. Ayamat men anupi ayamat tan. Yaumu wabawaramet anupi ao wabawaramen.

Evenan wainu inamup gare gare ago tainan

⁸ E waenapan da da garewa muga iravi munitamen, yogup da inayap ya wandep. E garewa daiton megenat tapen wandia, ame gare gare anu gurinampen. Ap tane gapan Mosis iup mega iragi ayamase taiwaniai.

⁹ Mosis ok anega seni,
Wainan gogo ya ta.
Apan da ya to boep.
Dim dim up ya ta.
Evenaga puraput mega yawawa baguga ya kandaep.
Nop ame upi den wani guegue muga daiton mam. Ek enan anu guriana ap

umap pa mainenupe nagire munan den anu guriwanian.

¹⁰ Nu pa mainenupe nagire munan anu gurinanta gapan koewa da mu inamup ya tait. Menan nu waenapan munan anu gurinanta gapan Mosis iup namua seni iragi ayamase taivin.

¹¹ Inak ap me gapan wanien, aup wamewa uon tan, kandae itan. Iwa Iesu Keriso sia tauapen wamewa konintu taiwan, e namu anu tumasiwaniana wamewa gapan otu da wandap wanden go endi konintu taiwan.

¹² Mum uon tapen taiwan woup konintu seapen taiwan. Mum guegue mega ae veait woup ganat mega namunup aroe den warat.

¹³ Nu woup gapan wainitoni nagire mini kakaewa megenat ta aninain. Kaum kaimake dena baware ya napen amba barip tat wainan gogo ise ase ya tapen o koewa umam noa ya ta wapen o anan ge anu koeam ya tapen.

¹⁴ Go gare Ayop nuga Iesu Keriso amun mega waran tumban amu ae yonan. Imuya ge etuya dansewa piup guegue mega tat anuiana ae vean.

14

Gare gare enu yawagen ya ta wane

¹ Waenapan anu tumat muga kwekwerawa inayap taupei waupamon go muk imua ugup ugup anune den notatae ya wane.

² Upi God anu tumasene men imumu aro tan tandaе uon man taba ugup ugup naiwanum. Go upi anu tumat muga kwekwerawa menan taba upi denip ieni da ya nain go taba daragawa megenat naiwanum.

³ Man taba ugup ugup naine nagirewa man virip vine ya anu koeam mumep. Den man virip vine nagirewa ugup ugup naine nagire ya anu koeam mumep iwa God iravi waupamon.

⁴ Mu ayop mugawa da di, ame God, go e mu ayop muga uon, menan iwa dimen e enu yawamoyan waiwanin? Mu umap go umap uon ame ayop muga di wapo. Amba ame gapan tap gop da uon iwa Ayop

muga God kwayup tamuiwandini menan evi amba mu kakaevet di wanumoin.

⁵ Guegue da sia mam. Waenapan upi anune wam da God yamap bawarewa go wam da me yamap bawarewa da uon. Go upi anune wam iragi God yamap gine daiton. Go nu daiton daiton gego gapan ise ase ya tait, go anu kakayaset anut daiton gapan wat nat yonait.

⁶ Waenapan upi Ayop nuga God ayamase tapen menan wam da da inap bawarewa anun. Upi God ayamase tapen menan man taba ugup ugup naiwanum. Iwa taba ame God ta muneni menan God inap gaun wane amba naiwanum. Go waenapan upi God ayamase tapen menan taba upi virip taiwanum. Ya naine menan God inap gaun wane.

⁷ Nuk nugenat ya inivin nuk nugenat ya borit waivin.

⁸ Ininanta God men inivin borit wata God men borit waivin. Ap menan nu ininanta o borit wata nu God megawa di.

⁹ Keriso boeni amba sia inakae yon warden iwa me kabaniwa nagirewa ge borit wane nagirewa Ayop muga watarewa warapen menan.

¹⁰ Menan e da da taba virip taiana, iwa dimen e Iesu men dugup daitona nagirewa enu yawamoyan waiwanin? Amba e taba ugup ugup naiana iwa dimen menan anu koeam mumiwanin? Nu iravi evi amba God namup yonait guegue nuga taitoni gapan gapan wanene taneta.

¹¹ Nop mega ok anega seane, Ne ayop apanewa kaimakaet tamana di waivin? Mu iragi ayamat tanegepen menan namunap omanimup enuin. Iravi imumup gapan ne God di aroga di anegain.

¹² God ame wani menan nu wam da amba nu dim dim da ugup ugup inak nuga gapan taitoni oisewa iravi God inap wadiait, da ya waboborait.

Taitoni yawanene gapan negin tamana amop

¹³ Menan wataget nu gare gare enu yawagen ta watoni sia ya ta wapen. Go gare nu evenan wainu pusimup upat gegera ya amopen menan kwayup tamopen.

¹⁴ Ne Ayop Iesu den intum taan menan asigip tan, ame taba da koerage uon go waenapan koerage anune menan mu imumu gapan taba ame koerage anuiwanum.

¹⁵ E taba da nayana menan orup da taba ame virip vine yawae bagu sisi anupi menan e ebo taiwanin iwa me menan ya anuiwanin. Ap menan e taba nane gapan orup da ya to koeragamene, iwa Keriso me menan den boen.

¹⁶ Taba ame koerage uon, go e guegue ega waenapan yamamup koerage diaepi tawa menan yambuni wanien, taba ame ya nane.

¹⁷ God toemu mega nu inanup taueni iwa mega bawarewa ame taba go kaum napen menan uon go Guewa Woup Seniwa aton ge nonup ge guegue kakaewa nunapen menan. God toemu mega ibariwa ap me.

¹⁸ Ame Keriso nao mega kakaevet tanewa, God atonaya anuiwadata amba waenapan den guegue ega yawane menan aton anuiwanumain.

¹⁹ Ap menan nu guegue ge tat nuga iravi gare gare wat kaimagamet nonup tau aepen menan tayavinain.

²⁰ Taba naitoni go virip veatoni gapan God potanup tat anuini ya ta koeragamait. Taba iravi di napen go waenapan upi nu taba natoni yawane menan negin gege ra amopiwa ame koerage.

²¹ Negin kakaewa mam. Nu man o kaum kaimake dena yamamup ya napen guegue ugup ugup yamamup ya tapen anu tumasine nagirewa sintanamopi tawa.

²² Man taba ugup ugup naiana guegue ugup ugup taiana menan ae anune wae napan ya wadiamone, egenat God den anuiwanian. Waenapan da da ugup ugup tane go muk ingane kakae wapi mu aton aigap anuin, iwa koewa sisiwa inamup uon.

²³ Go taba da gego den naiwanumampina ap gapan God wa koeragam mumiwan iwa anu tumat gapan ya taiwanum. Dim da God ya anu tumaset gapan tata ame inanup koerage.

Waenapan atonamu anun go ek atonuya ya anune

¹ Nu Iesu inap aroe den anu tumasitoni nagirewa aro umap uoni nagire kawanem muga den warapen. Nu aton nugawa menan ya anupeñ

² go gare Iesu dugup mega nagirewa mu kakaewa muga menan tapen. Ame gapan mu anu tumat muga, God inap wabawaramain.

³ Iwa Keriso mek atonu ya anun. Ame God Iesu oisewa wani ok anega sean, Waenapan nipec diagene nipec ame one-nap baraen.

Ap anega sean.

⁴ God nop mega wataget ok seane nu wadidiane pen menan sean. God nop mega ago mega gapan nu yaentuk mantuk waninait amba imunu den wat kaimagameta ap gapan nu anu dao nuga baware tata.

⁵ Yaentuk mantuk amba imuya wat kaimagamet ibariwa ame God aro eneni gapan tauen, amba God ago enep Iesu Keriso guegue tani mini e den imuya daiton tap gare gare bibigat itan wanienepen menan mup waivin.

⁶ Imuya daiton ame gapan God ame Ayop nuga Iesu Keriso Mamewa den ao wariwanai.

Ian ugupe nagirewa anu tumasene

⁷ God yaua ao warapen menan Keriso waupaeni mini e gare gare wa waup iswanian.

⁸ Wataget iragen God omayan baewa wa agiat mumeni menan nop mega tavewa ewamopen menan Keriso watu enen Diu nagirewa ta warit mumen.

⁹ Ap tani gapan God ta warit mega Diu uoni nagirewa inamup taueni menan ian ugupe nagirewa den God munan bagu sisi anuni menan God wa atonasiwanum. Nop mega ok anega sean, Ne Diu apanewa da, ian ugupe nagire nimakamup,

wa atonat gimagivin. Yauga ao warapen menan wak waivin.

¹⁰ Sia God nop mega ok anega seane, E Diu uoni nagirewa, God waenapan mega den,

God inap aton di anun.

¹¹ Sia anega seane,

Ian ugupe nagirewa iragi Ayop nuga God wa atonasen.

Waenapan iragi God wa atonasen.
Ok anega sean.

¹² Amba apan Aisaya den anega sen,
Devit mamewa Diesi naewa da taueta.
Taupei ian ugupe nagirewa ayop muga tata.

Mu ayop muga ame inap anu dave, tumap wanumoin.

¹³ God nuga anu dao mega gapan e imuya potaya aton ge nonup no dotouep amba anu tumat ega gamup, Guewa Woup Seni aroewa gapan, anu dao ega kai warep waniwanian.

Pol ok mame seni iwa

¹⁴ Evenan wainawa, ne enan manega anuivin. Guegue kakaevet taiwanian dim dim iravi anu kakayat wanian gare gare wawa isiwanian.

¹⁵ Go ok nega ma gapan nop ugup ugup e sia anu awapen menan. Ne epa ta sean iwa God nenan anuni menan nao mame nenen.

¹⁶ Nao nega ame Iesu Keriso menan Diu uoni nagirewa wat agoat imaivin. God Nop Oit Mega Kakaewa Diu uoni nagirewa wadiamopena gapan mu imumu potamu yan ta Guewa Woup Seni aroewa gapan pirisi apanewa mini ne God inap wanapen taivin.

¹⁷ Ne Iesu Keriso den intum tana menan ne dim da God wadianegeni gapan gapan taingina ame God yamap umap di anuivin.

¹⁸ Nek tana oisewa ya wain go Keriso aro neneni gapan taingina epa tap oisewa ame aroga wadiamoin. Ame Diu uon ian ugupe nagirewa God nop mega anu warapen menan wan taingin.

¹⁹ Nop mega anu tapen menan yo paua kimaniwa ugup ugup taingina amba God Guewa Woup Seniwa amunewa gapan wadiamuingin. Ap menan ne pa Ierusalem gapan namu at at iragi Keriso Oit Mega Kakaewa iravi wadiamuin ena amba at nonongawa Ilirikum den tauan wadiamon.

²⁰ Ne men anuna mam. Keriso Oit Mega Kakaewa, at at ugup ugup God No Oise Kakaewa ya anune nagirewa inamup ange wadiamot anun. At upi Iesu

oisewa namu anune arewa ya angain iwa ibarip aigap sia wadiamopena tawa.

²¹ God nop mega ok anega seane,
God oit mega ya anune nagire anuin.
Ya anune nagire anupi gapan anu awain.

Pol pa Rom aet anun

²² Inayap wam aruga daio onget anuna go at ugup ugup wadiamuingina gapan wam wakauman.

²³⁻²⁴ Go endi nao nega at at ame gapan uon tan. En aruga yawaet anuingina menan endi inayap onget anuivin. At Sipein angepena yaumakape pa sewa Rom nagire den yawaet anuivin. Wam otu da inayap atonu den daio waineta amba watu enanegene serarat ange at Sipein tauap.

²⁵ Go namu God waenapan mega pa Ierusalem gapan moni garaet munapen men angewan.

²⁶ Iesu dugup mega nagire at Masedonia ge at Guris gapanawa, muk anune gapan God waenapan mega kayakayawan taine pa Ierusalem nagirewa wat agoat mume moni munat anun.

²⁷ Muk anune gapan moni upi garaet munat anun. Iesu Diu nagirewa inamup namu venasen, ap menan Diu nagire gamup Diu uoni nagirewa God wat aipakam mega warane. Menan gare endi Diu uoni nagirewa moni bongamen Diu nagire wa agoat mumepiwa ame tamana di.

²⁸ Yan muga ame bongam nenane pa Ierusalem nagire munap amba at Sipein angain. Pa yaumakap e Rom nagirewa inayap daio wanigain amba asepa at Sipein angain.

²⁹ Inayap tauapena wamewa gapan ne asiginap Keriso wat aipakam mega baware e inayap taueta.

³⁰ Waenapan negawa, Ayop nuga Iesu Keriso nunan tani den God Guewa nunan anuini menan wapena anun. Nek nenan God inap mup waingina e den kaimakaet nenan mup waiwanian.

³¹ At Diudia angepena ase mepe Iesu ya anu tumasine nagire ya tonegepen menan God inap mup wan. God waenapan mega pa Ierusalem gapan wat agoat mumapena

mu aton anupen ame menan e den mup waiwanian.

³² Ap ewap God anupi gapan ne atonu den inayap onge tautanaepen, imunu gare gare vturep amba use sia angain.

³³ God nonup nuga ibariwa inayap wande. Ame umap.

16

Pol gaun wadiamon

¹ Iesu dugup mega pa Senkiria wat ago waene dikon muga yaua, Pibi waen ame kakae di, inayap tauepi waupapen men wadiaivin.

² Me Iesu megawa menan inayap tauepi God waenapan mega taine mini me wau papen anuivin. Me waenapan aruga ne den ta warit nimanen menan dim dim inayap mup wapi ta warisen.

³ Iesu Keriso menan tananegene nao taitoni apan Akwila waene Pirisela dere gaun inamup waian.

⁴ Mu bop tawa ya anun amba wat agoat nimanegene menan, negenat uon Iesu Diu uoni dugup mega iravi inamup gaun anui wanum.

⁵ Iesu dugup megawa pa muga gwanap iamene wanumuine nagirewa den inamup gaun waian.

Den evenana apan Epaenetas inap gaun waian. Me at Eisia gapan namu iragen Iesu inap anu tumasen.

⁶ Waen Meri enan nao kaimakaet tani waene inap gaun waivin.

⁷ Apan Andironaekas ge apan Diunias inamup gaun waian. Mu namu Iesu anu tumasene amba ne evi anu tumasen. Nu yampo Diu nagirewa, gwat nokap tanamo wanigena. Iesu watu enamot mega nagirewa yaumakamup apan dere ameme bawarewa di.

⁸ Den apan Ampiliatas inap gaun waian. Me den Iesu anu tumaseni menan evenan nega kakaewa.

⁹ Nao daitonawa Keriso menan apan Obanas inap gaun waian evenana apan Sitekis den.

¹⁰ Keriso menan nao umapaet taini apanewa Apelis gaun inap waian. Apan Aristobulas pa mega nagirewa den inamup gaun waivin.

¹¹ Apan Erodion nu dere Diu apanewa inap gaun waian. Apan Narasisas pa mega gapan den wanumuine nagirewa upi Iesu anu tumasene ame mu inamup gaun waian.

¹² Ayop nuga Iesu nao mega taine waen dere ame Taraipina ge Taraiposa gaun inamup waian. Evenana waen Posis, Ayop nuga Iesu menan nao baware taini wae newa inap gaun waivin.

¹³ Ayop nuga Iesu dugup mega nimakamup apan bawarewa Rupas gaun inap den. Me inewa den ne inan dian inap gaun waivin.

¹⁴ Apan upi Asinkiritas ge Piligon ge Omes ge Patorobas ge Omes Iesu dugup mega tanamo wanumuine den gaun inamup waivin.

¹⁵ Apan Pilologas ge waen Diulia ge apan Nareas domarewa den ge apan Olimpas God waenapan mega iragi tau tanamone wanumuine nagirewa den gaun inamup waivin.

¹⁶ E Iesu inap dugup mega daitona taina menan gaun ua gare gare ton. Keriso dugup megawa iragi gaun inayap wai wanum.

Pol nop uiwa wadiamon

¹⁷ Evenan wainawa, wadidiaepena anun. Waenapan da da nop muga gapan gego anu bambamase imuya dere tapi munan tamu agun anun. Namu nop tavewa wadidiaingina anu tumasean go mu tauan ugup wane menan ae vemon.

¹⁸ Waenapan ap miniwa Ayop nuga Keriso nao mega ya taiwanum muk kakaewa muga menan taiwanum. Nop monamon muga aopan aopan wa wae napan kakaewa i wababayen mumapan menan taiwanunum.

¹⁹ E Ayop nuga Iesu Keriso nop mega anuyan taiana nagirewa waenapan yawaene anune menan ne aton anuivin. Go guegue kakaewa e anu awapen menan guegue koeragewa ae veapen menan anuivin.

²⁰ Ap taiana gapan God nonup nuga ibariwa iman konintu Seitan ware pusia gauarap bare i am gottenageta.

Ayop nuga Iesu garaet wat aipakam imaep.

²¹ Nao tanan taina apane Timoti gaun inayap waiwan. Apan Lusias ge Dieson ge Sosipata, ne mu den Diu nagirewa, gaun muga inayap waiwanum.

²² Den ne apan Totias Pol menan ok mame sina apanewa nu Keriso nunan tani menan gaun inayap waivin.

²³ Ne Pol apan Gaias pa mega tauan dere initoni apanewa gaun inayap waiwan. Iesu dugup megawa nagire apan ame pa mega gwanap iam iam taiwanum. Pa sewa baware moni kwayup taini apanewa Erastas ge dugup nuga apan Kwatas gaun inayap waiwanum.

²⁴ Ayop nuga Iesu Keriso e iravi garaet wat aipakam imaep. Ame umap.

Pol God wa atonasen

²⁵ Endi God yaua ao warat. Nop Oit Mega Kakaewa ame Iesu Keriso oisewa. Nop oit ame wataget karaua warden oniwandin eni amba aroga tauen. Oit ame opata gapan wadidiaingina menan e anu tumaseana ap gapan God wat agoat imaiwandapina gapan kaimakaet ta aisiwanian.

²⁶ Nop karauawa ameme God nop mega wataget waiwanumune nagirewa ok seane gapan wat arogamen. Amba God yaibobot apanewa kaimakaet wani gapan me anu tumase ayamase tapen menan waenapan at at iravi wadidiamoni taiwanum.

²⁷ Me megenat God di, me megenat dim dim iravi anuitamiwan. Iesu Keriso nunan tani menan wam wam God yaua ao warinain. Ame umap.

1 KORIN

Pol ok mega namua Korin nagirewa inamup sen

1-2 Ne Pol, ok mame God waenapan mega pa sewa Korin gapan waniana nagirewa inayap sivin. God om enunegeni gapan Iesu Keriso oisewa mega wadiamuinawa, amba nu tatanu, dugup nuga daitonawa apan Sosenis den. Nu gaun inayap waivin.

Nu iragi, God waenapan megawa amba me navewa taitoni nagirewa iwa me nunan wani gapan nu Iesu den tobobutan amba ap gapan imunu potanu woup siwan. Waenapan iravi sewa ega daiton daiton gapan, Ayop Iesu Keriso wa taragasiana menan me Ayop nugawa amba e den Ayop egawa.

3 Ap menan Mamanu God amba Ayop nuga Iesu Keriso wat aipakam mega garaetawa amba baigan ge nonup mega inayap wande ep.

Pol God inap gaun waiwandin

4 Ne enan God inap pot pot gaun waivin, iwa Iesu Keriso gamup me wat aipakam garaetawa eneni menan.

5 Amba Keriso gamup nop dima amba Guewa anut megawa iravi inayap kai ware arita tan.

6 Menan, endi e asigip tayan ame Iesu nop oit megawa nu wadiaetoni ame tavewa di, kaimakaet wat nat aisiwanian.

7 Ap menan e Iesu Keriso sia tauapen menan amase taiwaniana gapan wat aipakam mega da ya wakaumiwanin.

8 Iesu me aro epa en aiwandapina wam verisiwa, Ayop Iesu sia tauapei wamewa gapan anu tumat ega ae ya veayana menan koewa da inayap ya yaveta.

9 God, Iesu Keriso den tobobutan menan, enan wani apanewa imutuan anuiwanian.

Iesu dugup megawa toga uaren taiwanum

10 Tatan gwanin, ne darinae enuen taiangin, Ayop nuga Iesu Keriso amun mega

gapan, e iragi gare gare ase ma wan enat tan umap wan ame yonan toga uaren ya taiwanian. Dim dim tapen menan anut daiton gapan taiwanian.

11 Ne ap waingina iwa apan Koloe dugup mega nagirewa upi tauan, e notatae waiwaniana ame oisewa wadianegene anuna menan.

12 Ne waingina gueguewa mam, e nop ugup ugup anega waiwanin, "Nu Pol megawa," upi "Nu apan Apolos megawa," upi "Nu apan Pita megawa," upi "Nu Keriso megawa."

13 Ame umap uon. Nu seu endum dum ya tapen iwa Keriso etua daiton megenat! Amba den, ne Pol, enan korosi gapan ya bonigasen amba ne yauna gapan e dup ya iayan!

14 Tave di, ne God inap gaun waivin, iwa ne e dup da ya iean go apan Kurispas ge Gaias mugenat dup iamona.

15 Menan e nimakayap orup da anega ya wata, "Pol yaua gapan dup ian."

16 O da sia anuiangin, da apan Stepanas pa mega nagirewa den dup iamona go ne orup da amba den dup ian go uon ne oare.

17 Ne Keriso waenapan dup iamopen menan ya watu enanegen go oise kakaewa mega wadidiamopen menan watu enanegen. Go Keriso nop oit megawa ame piup waenapan nop dima muga den to biro ya taingapen, ap wara taingapenawa Keriso korosi gapan bop tani epa mega ni imokaeta.

Keriso me God aro amun ge nop dima megawa

18 Ap menan, piup ma Iesu ya anu tumasine nagirewa, Keriso korosi gapan boeni oisewa anuine ame bumbawam noa mini anuiwanum, menan inak wakaumiwanum. Go nu, inak ewakewa waritonan nagirewa inanup, oisewa ame God aro amun megawa.

19 God nop mega ok anega seane,
Anut nagirewa nop dima mugawa wa koreragamepen,
uon di tata.

Amba ne God, wapena gapan,
dim da anut nagirewa anupen tainewa,
ame wat musep amba mu ya anuin.

²⁰ Ap menan, dima kakaewa anuine nagirewa, amba Mosis iup wadidiamuinie nagirewa amba nop ni enowa yao geonagene nagirewa, mu iravi aro amun muga da uon, nop muga pokaet. God tavewa ame gaseget to ewanen iwa piup dima megawa God yamap bumbawam nopenwa di.

²¹ Ap menan waenapan da da dima muga aroewa gapan God ya anu awain iwa God mek dima mega gapan negin ame toboren. Go garewa, piup nagirewa nu opata nuga bumbawam noa diane gamup waenapan da da anu tumasepiwa, God mek anuini gapan wat inakam mumiwanda.

²² Tave di, Diu nagirewa anega waiwanum, "Kiman paua da ta yawata amba nop gega anu tumatait." Amba ian Gurik nagirewa anega waiwanum, "Nop dima gega baware da wa ewanewa ame nop gega anu tumatait."

²³ Go nu Keriso korosi gapan boeni oisewa aroga wadiamuivin menan Diu nagirewa anega dianene, "Ame koerage," mu ya anut anun. Amba ian Gurik nagirewa anega diane, "Ame bumbawam noa."

²⁴ Go nu Diu ge Diu uoni nagirewa, God om enuneni menan nu asigip taton, ame bumbawam noa uon. Nop oit ame Keriso, God amun megawa ge mek dima megawa di.

²⁵ Menan God nop mega bumbawam noa diane go nop ame dima aigap iragen, amba waenapan dima muga gauarap. Amba sia, God aro mega uon diane go God aro mega aigap iragen, waenapan aro muga gauarap.

²⁶ Ap menan tatan gwanin, ek ae anun, e anenen wainean amba God venaya wan. E nimakayap, amba waenapan yamamup, dima kakaewa anuini orup da aruga uon amba aro wareni o dugup kakaewa gapan yaneni orup da aruga uon.

²⁷ Go God nu bumbawam dianene nagirewa om enunen iwa piup dima waine nagirewa gare umam waramopen menan. Amba God nu aro uoni dianene nagirewa om enunen iwa aro bawarewa nagirewa gare umam waramopen menan.

²⁸ Ame menan dim dim iravi piup nagirewa tavewa uoni o mondigawa diane God om tamon amba ap gamup wanana ge waenapan yau taneniwa me wa otutam mumen.

²⁹ Ap tani menan orup da God yamap wa oyok oyok ya ta taiwadata.

³⁰ Go God ap tani menan e Keriso potap wainiasi amba Keriso nu dima nugawa tan venasen. Keriso gamup nu God yamap wat tamanam nimanen menan imunu potanu woup siwan. Ap gapan nu God waenapan megawa entanenen amba koewa imunu wariwandini me vesen.

³¹ Ap menan God nop mega ok anega seane, Waenapan da da oyok oyok ta taiwanda anupiwa, me Ayop yaua ao ware oyok oyok taiwan dan.

2

Keriso oma korosi gapan boeni oisewa

¹ Ae kaiwan, tatan gwanin, ne namu inaya tauanawa, ne God karau mega opataewa aton aton mini o piup dima muga atonua ya wan tan taingin.

² Menan e yaumakayap waingena anut ugup ugup da imuna ya waren go Iesu Keriso me bop mega korosi gapan tani megenat anu waingin.

³ Ap menan inayap tauanawa, ne nutuna ae bigaren amba tata den ge dararame den tauan.

⁴ Amba den piup waenapan nop dansewa o dima muga gapan wadiamot ge opata nega ya waingin. Uon, go namuyap God Guewa aroewa wa arogamepen menan taingin.

⁵ Ap gapan, e anut tumat ega ame God aro amun mega gapan di wande ep go waenapan nop dima muga gapan ya wan dep.

God dima megawa

⁶ Ap umap sia, nu nop dima nuga Iesu menan kaimakaet anune taine nagirewa wadiamuin, go nop dima ame piup ma gapan ya tauen o piup ayamase nagirewa inamup ya tauen, iwa mu epara muga ae bigariwan.

⁷ Go nop dima nugawa ame God karaua megawa, waenapan ya anupen menan ukum umen wändeniwa. Go wataget iragen piup ya venaseni wamewa gapan, nu yaunu evi amba ao warapen menan God nop dima ame nunat anun.

⁸ Piup ma ayopewa nop dima ame oare. Mu anupo kiman Ayopewa korosi gapan ya togurapo.

⁹ Go nunan God nop mega ok anega seane,
God dim da kakaewa, God menan anu gurine nagirewa,
munat anuni ame orup da yamewa gapan ya yaven,
darinewa gapan ase da ya anun amba orup da kakaewa ame,
i guine gapan ya anun.

¹⁰ Go God nop dima kakaewa mega karaua wändeniwa ame God Guewa gamup wa ewanen. Guewa wa ewaneni iwa me dim dim iravi God karaauawawa mega den yaviwan.

¹¹ Nu guewa nuga, potanup wändeniwa menan guewa nuga megenat nu imunu asigip tan, ap umap sia, God Guewa megenat God imua asigip tan.

¹² Nu piup guegue muga ya waraton go God mek Guewa nuneni menan, me wat aipakam mega anu kakayasivin.

¹³ Ap me menan nu nop nuga iravi God Guewa wadianeni gapan nu waenapan wadiamuivin ame piup waenapan nop dima muga mini uon. Ame gapan nu God Guewa warane nagirewa God gueguewa wadiamuivin.

¹⁴ Ap menan God Guewa potap wändini otua Guewa wat aipakam mega anu kakayasiwan go God Guewa potap ya wändini otua ap iravi ame bumbawam anuiwan.

¹⁵ God Guewa potamup wändini nagirewa guegue kakaewa koewa om warianum. Go gare waenapan upinewa God Guewa potamup wändini nagirewa ya wanene tamoin.

¹⁶ God nop mega wataget ok anega seane,
Orup ansena God imua mega anuiniwa asigip tan?
Ae, waenapan da uon.

Go nu Keriso imua, God Guewa gapan, anu kakayasivin.

3

God nao mega nagirewa

¹ Tatan gwanin, go ne namu nop aritawa wadiaepen menan inayap tauan go e piup guegue anuine nagire mini amba God Guewa potayap ya wandini mini taiwanian. Menan Iesu inap e anut tumat ega kai ya waren, amawa omewa gapan di wandia. Ap menan ne nop anu tumat uoni nagirewa inamup waingina mini inayap waivin.

² Iwa e amawa am naine mini, menan am di eningin, taba iragenawa ena ena umap uon. Endi den e ya asik tayan,

³ iwa endi e yaugai piup ma inak megawa gapan di waniasi. Ame gapan e gare gare anu koeam amba noyam notatae taiwanin. Endi e ap taiwanianawa menan ame piup inak mega gapan di waniasi. God Guewa kakaewa megawa e inayap da uon.

⁴ Menan e upi anega waiwanin, "Nu apan Pol megawa," amba upi anega waiwanin, "Nu apan Apolos megawa." E nop map anega waiana piup ma waenapan taine mini taiwanin.

⁵ Go apan Apolos me da? Ne apan Pol, ne da? Nu bawarewa nagire uon go God ago megawa, amba nu gamunup e Iesu anu tumasean. Ayop Iesu nu daiton daiton nao nuga nuneni gapan taitoniwa.

⁶ Guegue nuga mam, ne makewa naewa veran amba apan Apolos kaum iap gemiwandin, go God aro mega gapan yane kai waren.

⁷ Ap menan verini apanewa ge kaum iap gemini apanewa mu bawarewa uon. Yanen kai wareni ap ibariwa God menan me bawarewa.

⁸ Menan verini apanewa ge kaum iap gemini apanewa om muga gine daiton. Amba God garewa muga evi amba omewa gapan muneta.

⁹ Ap menan ne ge Apolos nao daitonawa nagirewa, amba nu God nao mega taivin. Amba e God piup megawa potayap makewa naewa verivin amba kaum iap gemivin.

Amba den e God pa megawa.

¹⁰ Menan God aro neneni gapan ne pa danewa megenat antapenan. Pa tut asik tane nagire mini danewa ame antapenan. Ne ibariwa tun amba orup dawa aigap sia tuiwan. Amba waenapan da da pa tu dorapen menan ae anu gure pa tupen tapi amba tup.

¹¹ Ae anupen, amba aigap tupen iwa God Iesu Keriso ware pa mega danewa veren. Iesu megenat menan waenapan da pa danewa ugupewa da den ya verain.

¹² Dan ibariwa aigap tu ge tu dorapen menan waenapan upi kakae tuiwanum upi koerage tuiwanum. Kakae tuine nagirewa gwat gwayayam yananagaet, amba pomponu gwayayame den amba gwat kakae guragut ugup ugup gapan tuiwanum. Koerage tuine nagirewa oma ge vivirao gapan tuiwanum.

¹³ Go Keriso wam mega taupei nao nuga daiton daiton ire yaoyao mega aroga yawait iwa wanene gapan aroga matakameta. Wam ame, wanene meravewa taupei gapan nu pa tu kakayasetoni go uon ame omaya ireyao wareyao tata.

¹⁴ Wam ame, nu God pa ibariwa danewa, ame Keriso, aigap gwat kakaewa gapan tutoniwa ame wanene meravewa ya yagireta menan nu garewa warait.

¹⁵ Go vivirao gapan tutoniwa, wam ame gapan wanenen meravewa yagireta ap menan nao taintoni tavewa iravi ame wakaumait. Iravi yagimota, go daiton megenat ame God inak mega ewakewa nuneni ame ya wakaumait.

¹⁶ Ek ingane ae anun, e God pa megawa amba God Guewa potayap wandiwan.

¹⁷ Ap gapan orup da God pa megawa wa koeragamepiwa, gare God yone orup ame wa koeragameta, iwa God pa mega viripewa den amba me pa mega e me di, ame pa nanimup tuine mini da uon.

¹⁸ E ek ya anu bambamasene. E da da piup waenapan nop dima muga gapan anu kakayaseana menan anega anuiwanin, "Ne nop dima nega aigap," ame ebo. Namu piup waenapan nop dima muga tandayasewa amba evi God nop dima mega gapan anu kakayatai.

¹⁹ Iwa piup waenapan nop dima muga God yamap ame bumbawam mini. Ap menan God nop mega ok anega seane, Piup dima aigap warane taine nagirewa, ebo aopan muga gapan, God wanane tamuiwan, ame God ia mega gapan enamuini mini.

²⁰ Amba God da sia wan ok anega sean, Nop dima waine nagirewa anuine nopewa, God imumua yave asigip tani, anuine nopewa ame tavewa uon.

²¹ Ap menan waenapan dim da kakaewa taine menan ya wa namurat mumane, iwa wan dim dim iragi egawa.

²² Menan, ne Pol ge apan Apolos ge apan Pita nu iragi egawa. Amba piup mame, inak go bop wandeniwa, amba wam endiwa eviwa iravi egawa.

²³ Amba e Keriso megawa, amba Keriso God megawa.

4

Watu enamot ame Keriso nao mega nagirewa

¹ Menan, nu Keriso nao mega nagirewa anu nimaniwanian, ame nu God nop dima mega karaua wandeniwa aroga waenapan wadidiamuintoni nagirewa.

² E asigiap, nao nagirewa tat muga aritawa ame bawarewa mugawa dim da anuini di tapen. Menan Iesu anuini gapan nu taintoni.

³ Ap menan God anuini gapan tainawa menan, e iravi o waenapan upi iup paewa gapan enu yawanegen wanewa, ame ne inanap dim da uon. Amba ne kakae o koerage nek ingane ya yavivin.

⁴ Ne ian guine kakaewa wandia go ne anega ya wain, "Ne koerage uon." Iwa Ayop nuga God me megenat ne kakae o koerage wata.

⁵ Menan Ayop wamewa tamanawa ya tauia menan wanene namu ya tane. Ayop tauapen nauase di taiwanian. Wam ame gapan dim dim sisip ukum umamon wanumuine ganat wat arogameta, amba imunu karaua anuitoni den wat arogameta. Ap me gapan nu daiton daiton inak kakaewa taitoni nagirewa God wa atonat nimaneta.

⁶ Tatan gwanin, nop ugup ugup mame waingina ame ne ge Apolos dere guegue nugawa. Ap waingina iwa guegue nuga gapan e nop mame anu awapen menan, nop ame “God nop oit mega anenen seane paina ya yamatai.” Ap me gapan e apan dawa wa namurasen amba dawa ae ya veane.

⁷ E upi anega waiwanin, “Nu aigap, mu gauarap.” Go dim dim iravi God eneni gapan e tambuyan go God ya enat mini apan apan tayan waiwanin.

⁸ Menan e kakae guragut kimaniwa men anuiana gaset iragi di tam kakayasean go? Den e inayap gaset kwan puraput nagire mini entan imaeen go? Nu ayop ya tatoni go e namu ayop tayan go? Tavewa di, e ayop di tapo nu den tautanaep ayop tapo. Go uon!

⁹ Iwa ase yawat mega ne inanapewa ame God watu enamot mega nagirewa evi senen at uiwa gapan. Menan nu, koerage taine borit wapen menan ominamu wane nagirewa mini, anea kimaniwa ge piup waenapan iravi mu yamamup toguguranep borit wapen menan yawaniwanum.

¹⁰ Tave di, nu Keriso anu tumasintoni menan waenapan bumbawam tat dianowanum go e anuiana Keriso gamup e nop dima ega diri gagap dore aigap tauen! Amba nu nutunu bigaren go e nutuya den! Amba nu virinu da ya taiwanum go e viria waenapan taiwanum!

¹¹ Amba endi den, nu enup araniwan amba meganu pakaraiwan. Amba den en wanup nuga bebep babap wane enivin. Amba waenapan guraniwanum den nu pa ina ina da uon, uniunion inivin.

¹² Amba taba nuga menan nao kaimakaet taivin. Ame waenapan wa koeragam nimaninewa nu gare wat aipakam muminton amba inanup wawa koko tainewa nu gare imunu potanu ae bigaren wanininton.

¹³ Amba mu nipec dianinewa nu gare nop bibiga kakaewa megenat diamuinton. Menan wam endiwa gapan nu piup ma et denanu no aninke megawa mini waninivin.

¹⁴ Ok ma seana e umam anupen menan uon go e otun waina mini wa tamanam

imaepen menan sean.

¹⁵ Ame gapan e Iesu inap inat waniet ega wat tamanam tamanam nagirewa aruga inayap den wanumopiwa ame kakae go ne negenat e mamayawa. Iwa erewa gapan ne Iesu Oise Kakaewa wadiaena menan e anu tumat tayan. Menan ne e mamaya tan.

¹⁶ Ap menan ne nanam imaiangin, ne wa taingina umanap wa taiwanian.

¹⁷ Umanap wa taiwaniampen menan apan Timoti enan watu eniangin. Imuna me ne otunawa mini menan da anu guri-nawa amba me Ayop nao mega ayamase taini kakaewa da. Me inak nega Keriso menan ivingina gueguewa sia wadiaeta. Guegue ame gine daiton ne God waenapan mega at at iragi wadiamuivin.

¹⁸ E upi anega anuyan, Pol konintu nu inanup ya taueta. Ap anuyana menan e upi aton tayan apan apan taiwanin.

¹⁹ Go Ayop anu wapi gapan konintu e inayap daio tauain. Ongepena gapan waenapan da da aton tane apan apan tainewa ne ap mepe amba asigip tamoin. Mu mondi nop megenat waiwanum go kiman amunewa warane den taiwanum, ne yao anuin.

²⁰ Iwa God kiman toemuewa nop megenat uon go amun mega iragena den wandia.

²¹ Endi e ansenawa menan anuiwanin? Ne daio tauapena gapan kaimakaet digugurain o gare enan anuina menan bibiga wadidiain?

5

Apan da mamewa waenewa waseaseni noa

¹ Eya tuan wainan gogo taine mini taiana oisewa anuna umam baware waranegen, iwa God tandayasine nagirewa koerage ap ya taiwanum go e taiwanin. Oit ame manega anun, Apan ega da inewa eviwa dere iniwanumun.

² Ap menan iwa dimen e aton aton taiwanin? Go gare, e anu sisimepen, amba apan ap koewa tani nimakayap ya wandep wa oitane di aep.

³⁻⁴ Ne mapa wandap wanik angin go ne imuna e inayap wandini mini. Ne koerage

tani apanewa gase koerage dian. Menan e iam iam ega gapan ne imuna inayap den wandeta. Ap mepe Ayop nuga Iesu amun mega nu den wandepi gapan

⁵ koerage tani apanewa waran etua ta koeragamepen menan Seitan ase wanane ta koeragamep. Ap gapan Seitan me etua ta koeragameta go Ayop nuga Iesu taupei wamewa gapan me guewa wat inakameta.

⁶ Ek yauya ao ya wariwanian! E asigia, taba buredi baware tapen menan atagin mini otu koentu enianawa go otu kamontua ame gapan buredi iravi tutut wata.

⁷ Atagin mini otu koentu enianawa ame e koewa ega mini ap menan imuya potaya woup sepen menan aipa uat enan. Ap tanewa buredi tutut ya waini mini kakaewa gapan waniai iwa Iesu wat entan imaeni menan e waenapan kakaewa di. Gueguewa gine daiton ame Paina Yamaseni Barip nuga gaset bongam bongam tane iwa Iesu Keriso waran nunan togurane, man sip otua mini.

⁸ Menan Paina Yamaseni Baripewa atonewa tainampen nu koewa nuga ae veat amba buredi tutut ya waini mini imunu nenenga ge tamanawa gapan ta waninait.

⁹ Ok nega namu inayap seana wainan gogo taine nagirewa ya evenan tapen menan diaen.

¹⁰ Ne wainan gogo nagirewa guegue wana ame God ya anuine nagirewa uon. Mu agaga taiwanum, iup paina yamasiwanum, amba guewa nanip kaitane inap wa taragasiwanum go munan ya wan. Munan wapo e piup nagirewa arugataet tandayat mumapo amba mu sia ya tau-tanamopen menan piup ae ve dot aisepo.

¹¹ Go wainan gogo taine nagirewa gueguewa wana tavewa ame waenapan da da Keriso menan dugup daiton taiana nagirewa go inak koerage den taiwanum, agaga taiwanum, guewa nanip kaitane inap wa taragasiwanum amba evene wai inap yanao waiwanum, kaum kaimake dena nane bumbawam taiwanum iup paina yamasiwanum. Ap taine nagirewa evenan ya tamone, amba taba napen menan den ya tanam waniene.

¹²⁻¹³ Ap menan ne Iesu ya anu tumasine nagirewa wanene ya tamoin iwa God wanene tamota. Go nu anu tumat daitonawa nagirewa e wanene tamon iwa God nop mega anega seane,

Waenapan nimakayap wanumone inak koewa tainewa, ame pakit ise semon.

6

Keriso anu tumasine nagirewa

gare gare wanene taiwanum

¹ E, Iesu anu tumasiana, nagirewa iwa dimen da da notatae wariwaniana gapan Iesu tandayasine nagirewa wanene pa muga gapan bagu sisi ega inamup tamanamepen menan aisean? E gare Iesu dugup mega nagirewa inanup wat tamanamepo ame kakae iragen.

² Iwa, e asigia, nu God waenapan megawa menan wam eviwa piup wan dim dim mega yavintoniwa ge ya yavintoniwa iravi wanene tamoit. Menan e piup wanene taiwanampen nagirewa, go bagu sisi otu koewa e nimakayap ya wat tamanamiwanin. Ame anenen?

³ E asigia nu wam eviwa God anea mega den wanene tamoit. Menan endi nu inak nuga arogawa mame, aigap sia wanene tainampen.

⁴ Menan e notatae gare gare wa tanewa gapan e orup upi wanene ya asik taine nagirewa gamumup wat tamanamai go? Ame uon di.

⁵ Umam waraep! Ne anuivin nimakayap dima apanewa da bagu sisi ega wat tamanamepen menan wandia. Me notatae bagu sisi ega wat tamanameta.

⁶ Menan iwa dimen, Iesu dugup mega gwanap tatai gwani den gare gare noyam notatae muga wat tamanamepen menan God ya anu tumasine nagirewa inamup amuiwanum?

⁷ Gare gare wanene tapen aisiwaniana gapan dim dim kakaewa ega wakaumiwanin. Iwa notatae gapan apan da wa koeam imaepiwa o dim dim ega up tapiwa gare inap dim dim da ya tane, ame Iesu guegue mega kakaewa.

⁸ Go e da ap anega ya taiwanin. E Keriso anu tumasiana nagirewa, go e umamawan gare gare wa kokoeragamean taiwanin amba gare gare up den taiwanin!

⁹ E gase asigip tayan, koerage taine nagirewa God toemu mega ya yon borain. Tavewa ma anu kakayesen. Iwa wainan gogo taine nagire o guewa nanip kaitane inap wa taragasine nagire o gwep gorogot nau guguramuine nagire o apan muk dere inine o waen muk dere inine nagire ame koerage menan waenapan mame iravi God toemu mega ya yon borain. Ame umap uon di.

¹⁰ Up taine o agaga taine o kaum kaimake dena nane bumbawam taine o evene wai yanao diamuine o iup paina yamasine nagirewa iragi God toemu mega ya yon borain.

¹¹ Wataget e upi inak ega map anega waniean. Go Iesu Keriso yaua gapan amba God Guewa aroewa gapan koewa ega wat museni menan endi imuya potaya woup sen amba God e tamana taiana nagirewa diaen.

Imunu wapinu God oya oya mega menan danamepen

¹² E upi anega waiwanin, “Nuk dim dim tat anutawa di tait.” Ame tave di, go dim dim upi ame kakae uon, wa koeragam nimaneta. Ne Pol den anega wapena, “Nek dim dim tat anupena di tain,” go ne dim da ap tapena ame pananegepi tawa menan ne ya di tain.

¹³ Amba upi anega wapi, “God nin gwanan baraeni ame taba napen menan baraen. Amba taba ame nin gwanan menan.” Go God ame dere dere di wa kokoeameta. Ap mini sia God nu etunu baraeni ame waen ge apan uniunion wainan gogo ise ta ase ta tainampen uon go Ayop navewa tainampen menan. Ayop nuga Iesu nu etunu kwayupe tan inak wanini apanewa.

¹⁴ God me amun mega gapan wani menan Ayop nuga bop gapan sia yon warden, menan me den sia wap nu den bop gapan sia yon waninait.

¹⁵ Ap menan, e asigip tayan, e etuya ame Keriso mek etua semua upinewa. Menan

e Keriso etua den daiton tayan. Ap menan nu Keriso etua, waen negin gagape den wainan gogo ise ta ase ta tapen menan tobob tatawa ame umap go uon? Ame umap uon, koevet di!

¹⁶ E ap asigiap go uon, apan da waen negin gagape den tobob tapiwa ap gapan mu wapimu dere daiton tan. Iwa God nop mega ok anega seane, Waen da apan den tobob tapiwa, mu daiton tain.

¹⁷ Go Iesu den intum tani otua, me guewa Iesu guewa den daiton tobob tan.

¹⁸ Ap menan inak koewa wainan gogo tap ae vean. Iwa inak koewa wainan gogo tanewa ame e etuya ae di wa koeragam wanin, amba koe koewa upine ap mini da uon. Menan waen ge apan uniunion ise ta ase ta ya tane.

¹⁹ E gase anu kakayaseana, e ugu wapia ame God Guewa Woup Seniwa pa megawa, God eneni gapan potayap wandinwa. Ap menan etuya ek enan uon,

²⁰ iwa e God une taen. Menan etuya God oya oya mega menan danamen.

7

Naine mutat nopewa

¹ Umap, endi ok nenan enuyana ame noa seyao wareyao tain. Ame kakaewa apan waen da ya naisep.

² Go waenapan aruga uniunion wainan gogo ise ta ase ta taiwanumune menan apan daiton daiton muk waen muga muga di tambupen, amba waen daiton daiton muk apan muga muga tambupen, iwa wainan gogo tapi tawa.

³ Ap gapan, waen apan mega menan anu wapiwa, etua waenewa menan ise di wanapen, ap mini sia waen mega etua memewa use di wanapen.

⁴ Menan waen epiwa mek megenat uon go memewa megawa di. Ap umap sia memewa epiwa mek megenat uon go wae-newa megawa di.

⁵ Ap gapan etuya gare gare yan tapen menan goandage ya tane. Go wam koni otu da God inap mup wapen menan e dere wawa itan, umap wan gapan wa tomagen mondi wanien. Go wam ame uon tapi sia

tobot tan. Ap tane ame kakae iwa Seitan pusi warup taep, inak ega kwekwera tapi tawa.

⁶ Ma ne dandamunagaet ya waivin go mondi anupen menan waivin.

⁷ Go ne anuingina ame waenapan iravi ne umanap, waen da ya naitana mini, wanumopen. Go God yan mega gine ugup ugup daiton daiton nunen.

⁸ Amba endiwa mam, waenapan ya naimoyana amba kwapura ge umat nagirewa inamup manega waiangin. Ne umanap, ya naine itan mondi waniene, ame kakae di.

⁹ Go waen o apan naine mutapen menan imuya potaya yagiriwandapinawa ame naine mutapen di. Iwa potaya yariwan-dapinawa ame koerage.

¹⁰ Naimoyana nagirewa anega diaivin. Nop mame nega uon go Ayop mek wadi-aneni nopewa. Ame waen da memewa tandayase ae ya vep.

¹¹ Go me ap tapiwa apan da ya naisep, goroa di wandep, o memewa namua sia naisep. Amba den, apan da yone waenewa tandayase ae ya vep.

¹² Amba sia nop mam, nek anun waian God ya wan. Apan da Keriso anu tumasen go waenewa ya anu tumasen. Waenewa inat wandet mega atonu den, apan mega dere wanumot anupiwa, apan ame waenewa tandayase ae ya vep.

¹³ Ap umap sia, waen da Keriso anu tumasen go memewa ya anu tumasen. Memewa waenewa den wandet anupiwa, waen ame apan tandayase ae ya vep.

¹⁴ Iwa apan Iesu ya anu tumasen go waenewa anu tumaseni menan memewa den God megawa di. Ap mini sia waen da Iesu ya anu tumasen go memewa anu tumaseni menan waenewa den God megawa di. Inak mame tavewa uon wandepoa, orup otu mugawa God yamap koerage tandayasine nagire umap wanumopo. Ap menan orup otu muga den God megawa di.

¹⁵ Go Iesu inap ya anu tumasini da, waenewa o memewa da anu tumasiniwa, ae veat anupi, ae di vep. Ap ae vepiwa, Iesu anu tumasiniwa ame naine mutat gapan da ya panep wandeta, go vesep

aeta. Menan arak makan gapan ya ini-nampen iwa God nonup gapan ininampen menan dianiwan.

¹⁶ Go nu oare, Iesu anu tumasini wae-newa da memewa Iesu ya anu tumasiniwa nonup gapan wanumopiwa, me imua wat entanep Iesu anu tumat tata go? Amba ap mini sia Iesu anu tumasini apanewa da waenewa Iesu ya anu tumasiniwa nonup gapan wanumopiwa, me imua wat entanep Iesu anu tumat tata go?

God yan mega eneni gapan ta wanien

¹⁷ Ap me di, ne pot poraet nop dima mame Iesu dugup mega daiton daiton gapan wadidiaivin. Nop dima ame God om enuneni gapan gapan di wanin ani-nait. Entan wantan ya tapen.

¹⁸ Gueguewa mame, God paua tapen menan, etua tum tani apanewa da, Iesu gamup God om enuni menan paua ame ase mutapen ya anup. Ap umap sia epiwa tum ya tani apane da Iesu gamup God om enuni menan Diu nagirewa gutut muga gapan etua tum tapen menan ya anup.

¹⁹ Apan etua tum tani o tum ya tani ame bawarewa uon go God noa anu tapi ame bawarewa di.

²⁰ Ap menan e iragi daiton gaset anenen wainean amba God enan venaya wani gapan gapan di wanien.

²¹ E nao mondiga kaimakaet taiwanian amba God enan venaya wani, ame umap di, go bawarewa ega wat vetaet anupiwa, arok ame waran nao kaimakaet ame ae vean tau aisen.

²² Menan e nao mondiga kaimakaet tai-wanianawa gapan e ega uon go bawarewa ega megawa. Go Iesu anu tumat taiana menan Iesu wat vetaen, endi e orup dawa megawa da uon, Iesu vetaeni megawa gapan wanien. Gare orup da da anu tumat tane gapan Iesu wat vetamoni menan endi mu Keriso menan nao kaimakaet mondiga tainewa.

²³ Ame God e gaseget Iesu gamup garewa baware gapan une taeni menan e piup waenapan dawa megawa uon amba nao muga kaimakaet mondiga ya tai-wanian.

²⁴ Ap menan dim dim taiwaniana God enan wan anu tumaseana, ap gapan God den ta aisiwanian.

Ya naine mutane, amba kwapura nagire den nop mugawa

²⁵ Endi ya naine mutane nagirewa wapena anun. Keriso nop mam ya wadi-anegeni gapan sivin go me wat aipakam nimanegeni menan anu tumat nimanegen. Menan nek anuna mame wadiaepen taivin.

²⁶ Endi koewa ugup ugup arita taiwandi wamewa menan orup da waen o apan ya naiseniwa ap gapan di wande aiwandapina, ame kakae di.

²⁷ Menan ge waen naitaana, ame kakae, menan tandayase ae ya vea. Go ge waen da ya naitaana, ame den kakae, go waen gega menan yop ya ta.

²⁸ Go ge waen naitawa, ge koewa da inagap uon, amba waenoro ini denawa apan naisepiwa, ame koewa da inap uon. Go anun, naine mutane nagirewa itan ugup ugup wariwanum, itan ame wat vetaepen menan nop mame waivin.

²⁹ Tatan gwanin, endi men wainginawa mam, ame Iesu tauepi wamewa gaset konintu tan. Menan wam ame tauepiwa e naimoyana go uoniwa ame dim da uon, iwa ap gapan tavewa uon.

³⁰ Amba irip waiana go top waiana o puraput tambuiana go kayakayawan tianawa ame dim da uon, iwa ap gapan tavewa uon.

³¹ Waenapan da da piup kakae guragut mega gapan aton tainewa go uoniwa ame dim da uon, iwa piup wan dim dim endiwa megawa konintu wat museta.

³² Menan e imuya gop ya yagiep taiwaniat anuivin. Apan da waen ya naiseni menan imu pose iravi Iesu inap wandeta amba pot pot me inap anun tainiwa, ame Iesu imua wabibigamepen menan taiwan.

³³ Go waen naiseni apanewa piup wan dim dim mega menan nao tainiwa, waenewa imua wabibigamepen menan taiwan,

³⁴ amba me i guine dere taiwan, iwa daiton Iesu inap dawa waenewa inap. Apan ya naiseni waen o waenoro ini dena Ayop imua wat bibigamepen

tainiwa menan me etua ge guewa gapan Ayop inap viriwa tat anun taiwan. Go waen meme denawa wan dim dim piup megawa menan taiwan, memewa imua wat bibigamepen menan.

³⁵ Ne nop ma waingina, e kakaewa ega menan waivin, omewa gapan ya enain, go negin tamanawa gapan inan wanien amba imuya Ayop inap warep.

³⁶ Nop dawa mam, waenoro tamaru ganganat mumane go waenoro menan tamaru ame daramua wan imua ugup ugup anuiwandini, menan serarat naisepen anun. Ap menan menawaet naine musep. Iwa ap tapiwa, ame koewa da uon.

³⁷ Go tamaru ame waen ya naitapen menan anu kakayaseni, amba i guine, imua posewa tamana bibigare wardeni gapan me waenoro ame ya naisepen anun. Ap menan waenoro ame ya naisep. Iwa ap tapiwa kakae iragen.

³⁸ Ap menan tamaru waenoro naisepiwa ame koerage uon go ya naisepiwa ame kakae iragen.

³⁹ Waen memewa wandepiwa, dere di wanumop. Go me memewa boepiwa, me mek anupi gapan apan da sia naisepen menan arok wandia. Go Iesu anu tu-masini apanewa da naisep.

⁴⁰ Go potana God Guewa wandini menan manega anuivin, waen ame kwapura wandepiwa me aton aigap tautaneta.

8

Guewa nanip kaitane taba munine noa

¹ Endi guewa nanip kaitane taba mu-nine noa wain. Nu iravi anut mame gapan baware waraton. Anut bawarewa waratoni menan nin eno aigap waninait, go baigan di tu dorapen.

² Go tavewa ame, waenapan da da muk asik baware tat anune, ame dim dim da ya anu anu miniwa wane taiwanum.

³ Go da da God menan anu guriniwa, God orup ame asigip tan wandia.

⁴ Ame gapan endi guewa nanip kaitane inap taba munine menan noa wapen taivin. Nu asiginup, ame guewa nanip

kaitane tavewa uon. God tavewa daiton megenat wandini den anuivin.

⁵ Piup gapan god ugup ugup aruga wanumam. Ame waenapan god o ayop nugam diamuiwanum go iravi god o ayop da uon.

⁶ Go nu nunan God tave iragenawa daiton di, nu Mamanua, ap me megenat. Me wan dim dim iravi tan venat nitaton amba me gamup nu wanin anivin. Amba Iesu megenat nu Ayop nugawa. God Iesu wandini gapan wan dim dim iragi wan venat nitaton amba Iesu gamup nu wanin anivin.

⁷ Ap nu anuton go Iesu dugup mega nagirewa upi asigip ya di taiamun. Mu anu tumat muga namua gapan manega anuiwanum, guewa nanip kaitane inap munine tabaewa napiwa, ame koerage, iwa imumu potamu bigip tata. Iwa mu imua muga kwekwera, namu en nononga anu tumat eboewa gapan wa taragasiwanumune menan.

⁸ Tavewa namu wana ap sia di, nu taba natawa go ya natawa ame dim da da uon, iwa taba gapan nu God ya anu kakayatait.

⁹ E imuya ega kwekwera uoni menan ek anut ega gapan tanewa, ae di anu guran amba tan. Iwa ek nat anuiana gapan nanewa, imumu kwekwerawa God anu tumasine nagirewa yawaepi anu tumat muga koe di tata.

¹⁰ Iwa e taba ame naiana orup da imua kwekwerawa yawaepi gapan manega anuta, guewa nanip kaitane inap munine tabaewa ame koerage uon.

¹¹ Ap anuni gapan, taba ame wat napiwa me imua koe tata iwa imua kin ya wan. Iesu orup ame menan boeni go e anut ega gapan tamana ya taiana menan orup ame wa koeragamean, anu tumat mega koe di tan.

¹² Ap gapan, e inak koewa map anegawa, tatae gwani inap tanewa, mu anu tumat muga kwekwera wandini ae toguranewa, ame e koewa ega Keriso inap di taiwanin.

¹³ Ap me menan ne manega anuivin. Ne man napena gapan Iesu anu tumasine nagirewa wa koeragam mumapena, ame koevet, menan man taba da sia ya nain, wa koeragam mumapena tawa.

9

Pol water enamot nagirewa upinewa mini

¹ Ne dim dim da ya sinanegiwani. Ne Iesu water enamot mega apane da iwa ne nek Iesu yawan amba aro neneni gapan oit mega wadidiaingina menan e anu tumasean.

² Waenapan upi anega dianegiwani, "Ge Iesu water enamot mega da uon." Go e asigiap ne Iesu water enamot mega apanewa di iwa ne gamunap e Iesu anu tumasean waniaisi. E ne dan negawa.

³ Ne Iesu water enamot mega guegue taingina menan waenapan enu yawanek wapi ne gare manega wadiamoin.

⁴⁻⁵ Ne ge Banabas, nu den Iesu oisewa wadiamuintoniwa menan garewa nugam ame taba kaum mondi nait. Amba Iesu water enamot mega upinewa, ame Iesu gwani waiwa ge apan Pita, mu Iesu anu tumasine waene wai upamone den ap amuinewa, ap mini den tatawa, anenen?

⁶ E umap uon wanewa, ame tamana uon. Amba sia, iwa dimen nu nugenat nao taton gapan garewa yop taton inivin?

⁷ Ita nagirewa den nao taine menan garewa wariwanum, mondi da uon. Amba nao da vereni tavewa ieni naiwan, ameme garewa megawa. Amba sia man kao kwayup taine nagirewa man amewa magosene naiwanum, ame mu garewa mugawa.

⁸ Nop ma wadiaena amun nega gapan ya waivin go nop ma gueguewa Mosis iup mega namua seni gapan wandia.

⁹ Ok anega sen,

Man tap ega nao enan tapi, taba garewa den di muniwanian.

Guegue ame gapan God man menan anu wan go?

¹⁰ Ae, uon. Nunan wan. Gueguewa da sia wain. Dip gapan bunaene verine nagirewa amba daupam tane bongamine nagirewa den, evi maup tauepi yan se tambupen menan anuiwanumun.

¹¹ Ap menan, e imuya gapan Guewa naewa verintoni menan piup wan dim dim egawa gapan garewa nugam tambutawa, ame tamana, iwa nu den

Iesu watu enamot mega, navewa taintoni nagirewa.

¹² Ap mini waenapan upine inayap garewa muga tambupen menan e ya tandayat mumiwanin, go nu mu tambut om muga aiganup den tambupen, iwa Iesu navewa taintoni menan.

Go nu garewa nuga tambupen menan ya taton go gare enup itan bagu sisi ugup ugup anuton iwa waenapan toboboramot Keriso Oit Mega Kakaewa ya anupi tawa.

¹³ E iravi asigip tayan, ame God Paewa Ierusalem gapan nao taine nagirewa pa ap gapan garewa muga taba wariwanum amba God menan man guran irane nagirewa irane semu upi naiwanum, ame mu garewa mugawa.

¹⁴ Negin ap umap sia, Keriso nop dandamunagaet anega wan, "Oit Nega Kakaewa waine nagirewa, nao ap taine gapan garewa ware inat wanumot muga gapan iniwanumain."

¹⁵ Go Iesu garewa nega e inayap warapen aroewa neneni ya danamivin, amba garewa nega warapen menan ok ma ya sivin. Iwa ap tapena Iesu menan garewa nega wakaumena atonewa uon tata, ame tawa namu bonigaset anuivin.

¹⁶ Go Iesu No Oise Kakaewa wadiamuina menan ne ya wa namuratain iwa God dianegeni menan taivin. Menan Iesu No Oise Kakaewa di wadiamuingain, iwa bagu sisi baware anupena tawa!

¹⁷ Nek om tana gapan nao tapena, ame gapan garewa warain. Go ne nop wadiidae diae ame nek om tana gapan ya taivin go God om tanegeni menan taivin.

¹⁸ Menan garewa ansena warain? Garewa nega mam, Keriso Oit Mega Kakaewa wadiamuina atonewa ap me megenat di, go piup wan dim dim mega gapan ne garewa nega warapen menan ya anuivin. Piup wan dim dim mega gapan garewa nega menan mup wapena aroewa Iesu neneni wandia, go mup ame ya wain.

¹⁹ Ne orup da menan nao kaimakaet ya taina apanewa, go waenapan ago munapen menan anun taivin iwa waenapan upi arugataet wa upamopen, Keriso anu tumasepen menan.

²⁰ Ian Diu inamup, ne Diu umamup taingain iwa ap tapena gapan Diu nagirewa arugataet upamoin. Amba Mosis iup mega gauarap wanumuine nagirewa, ame ne ap mini da uon, go upamopen menan Mosis iup mega mu mini ayamase taingain.

²¹ Ap umap sia, upamopen menan, Diu uoni, iup gauarap ya wanumuine nagirewa umamup waingain. Mosis iup mega uoni mini taingain, go God iupewa Iesu gamup ae ya veain, ame ayamase taingain, iwa ne Iesu iupewa gauarap wanik angin.

²² Iesu inap imua muga kwekwera-awa nagirewa nimakamup waingepena, mu wa upamopen menan, ne imuna, mu umamup kwekwera taingain. Ap menan, waenapan guegue muga ugup ugup umamup tainawa, iwa waenapan upi Iesu inak ewakewa munapen menan.

²³ Ne mame ugup ugup taina iwa God Nop Oit Mega Kakaewa menan, amba ap gapan wat aipakam nimanegeta.

²⁴ E asigip, waenapan namu da tauat anupi menan kae gapan serarat amopiwa, orup daiton megenat namu iragen tauepi garewa wareta. Ap umap e daiton daiton namu iragen taua, garewa warapen menan serarat aisen, God garewa mega waran.

²⁵ Orup da da kae ame gapan serarat amopen nagirewa, mu epimu bemagepen menan kaimakaet pot poraet gueguewa tayaviwanum. Mu ap taiwanumune iwa serarat amo namu taua amba kae paua mega ben tapen anuiwanumun. Go ame piup megawa, evi uon tata, go nu yaibobot payuewa menan tayavivin, ame usengaet wande aiwadata.

²⁶ Ap menan ne serarat tamana angivin, uniunion uon. Gueguewa dawa ne apan nanipe kae gapan anan taini apanewa mini, ame ne anan nanipe uniunion ya taivin, tamana om gapan enun toivin.

²⁷ Menan ne etuna wat kaimagamepen menan ayamat nek taivin iwa waenapan aruga wadiamona gapan anu tumat tane go ne nek ayamat ya tapena ame inak nega wakaumain.

10

Guewa nanip kaitane menan ya anupen

¹ Tatan gwanin, nu isimuran wainu anenen tane sia anupen menan waivin. Nu omayan baewa iravi apan Mosis ewap amone God irikup aigamup baraen den amuiwanumun. Amba puiman ame God tani menan kaum tom tam wa ise ma wendeni gapan mu kaum yaumakap kakaevet asepagan amon.

² Ap gapan God irikup amba puiman gapan anu tumat dupewa iamon iwa mu Mosis ewap amone menan.

³ Amba at kaimewa gapan mu God kiman tabaewa muneni ap daiton megenat mu iravi naiwanumun.

⁴ Amba sia kiman kaumewa daiton ame muneni naiwanumun. Kaum ame bonawan gapan taueni naiwanumun. Gwat bonawan gueguewa ame Keriso di. Me mu den tanam aiwandin.

⁵ Go mu God imua ae ya wabibigamene iwa koewa taiwanumune menan, God guramon borit wane amba wapimu at kaimewa gapan erere goyago amon puak mutan.

⁶ God ap taniwa iwa mu inak koe koe ugup ugup tat anune menan. Nu ap umap sia ya tapen men guegue ap ta ewanen.

⁷ Koewa muga ame, upi guewa nanip kaitane inap wa taragase menan ap umap e ya tane. God nop mega gapan ian ame oitamu ok anega sean,

Waenapan taba kaum napen ae wanumon nane,

amba guewa nanip kaitane ame inap tarep warapeñ menan yonan.

⁸ Koewa muga dawa ame, waen ge apan wainan gogo uniunion ise ta ase ta tane. Ap tane menan, God wam daiton gapan arugataet 23,000 toguguramon borit wane. Menan wainan gogo ya tainampen.

⁹ Koewa muga da sia ame, mu upi God irewa yawapen menan ebo tayawane. God gare mokare anane denawa, arugataet watu enamon aramon borit wan. Menan irewa yawapen menan ebo aopan gapan ya tayavinampen.

¹⁰ Koewa muga dawa ame mu upi God inap gwen gurut wane. God gare anea da, yaua waenapan guramuini aneaewa,

inamup watu enen guramon borit wane. Menan gwen gurut ya wainampen.

¹¹ Koewa muga wanene mega ugup ugup inamup tauwanumune iwa nu to ewanepen menan. Nu eviwa nagirewa mu umamup ya tapen menan nu omayan bae gutut mugawa ae seane. Iwa nu wam verisiwa tauapen taini wamewa gapan wanin anivin.

¹² Menan ek ae anuyana ame e kaimakaet yoniana nagirewa, menan ek ae anu kakayasen, iwa konintu onana geaene tawa.

¹³ Ap gapan pusi warup da inayap tauepiwa, ame waenapan upinewa inamup den tauwan. Go pusi warup da ya garao imaepon menan God wat agoat imaiwan. Menan me aro enepi gapan pusi warup ame ae amun at bibigawa gapan tau aisen.

Guewa nanip kaitane taba munine ya napen noa

¹⁴ Ap menan, tatan gwanin, guewa nanip kaitane inap ya di wa taragase menan.

¹⁵ E iae guine tamanawa asik taiana nagirewa menan nop mame wadiaivin. Ne ebo da wapena ek anu tayawan.

¹⁶ Ayop Iesu baripewa gapan kaum wain sipewa nu God wat aipakamepen menan mup waintoniwa. Sip ame gapan naintoniwa gueguewa ame Keriso boeni deniwa yan sen nuneni, menan kaum wain gapan nu tavewa ame warivin. Amba taba buredi paise paise taitoni gueguewa ame Keriso boeni wapiwa yan sen nuneni, menan buredi gapan nu tavewa ame warivin.

¹⁷ Buredi magamene daiton gapan naintoni menan nu iravi aruga go etunu daiton tan.

¹⁸ Wataget Isurero nagirewa tane ame ase anun. Mu upi God wa taragasepen menan man guran irane, go upinewa mondi tauan taba ame nane, mu anut tumat den daiton, mu den ap mepe God nuga wa taragasiwanum.

¹⁹⁻²⁰ Ya anu tumat taine nagirewa guewa nanip kaitane inap man taba yan wanapen menan tainewa ame den gine daiton. Go anun, guewa nanip kaitane o tabaewa ame aro da uon. Go mu den

intum ya tai iwa mu man taba airampu inap yan tane waniwanum, God inap da uon. Menan airampu den gare gare evenan ya taiwanian.

²¹ E Ayop sip mega gapan naiana menan airampu sipe gwanap sia ya nai. Amba Ayop taba mega watarewa gapan naiana menan airampu taba mega watarewa gapan sia ya nai.

²² Ap tata, nu god eboewa wa taraseton menan, Ayop nuga anu koeam anuta. Amba den nu aro uoni nagirewa go nu apan apan ta Ayop inap aro epara aigap mini tainait.

God viriwa pot poraet tainampen

²³ E upi anega waiwanin, "Nu wan dim dim tat anuintoni di tainampen," go ne manega wadidiaivin, wan dim dim tat anuintoni upi koerage. Amba e anega waiwanin, "Dim dim anuintoni tainanta orup da ya watananeta," go ne manega wadidiaivin, dim dim tat anuintoni upi wat agoat nimaniwanum upi ta koeragam nimaniwanum.

²⁴ Menan gueguewa kakaewa ame, e kakaewa ega menan yowa ya taiwanian. Go waenapan upinewa kakaewa muga yopewa den taiwanian.

²⁵ Amba man tap ugup ugup antaba une taine arewa gapan une tane. Man ame nat anuiana gapan singui tangui ma mini ya wa, man taba mam guewa nanip kaitane yan munine go? Nu nata imunu potanu bigip tata go?

²⁶ Go ap anega ya anu, iwa God nop mega gapan ok anega seane, Piup mame ge dim dim piup gagape den iravi Ayop megawa.

²⁷ Anu tumat ya taine nagirewa upi antaba den tanam napen menan enan wapi e di aisen, ame nana tabaewa namuyap sepi e di nan, taba menan singui tangui da ya wa, mu imumu koerage tapi tawa.

²⁸ Go orup da anega wadiaepi, "Taba mame guewa nanip kaitane munane tabaewa," ap anega wadiaepi orup ame kakaewa mega menan ya nane, mek ingane imua anu koeamepi tawa.

²⁹ E imuya wa koeamepi tawa uon go orup ame imua wa koeamepi tawa

menan. Go orup da anega wapiwa, "Ne imuna dim da uon, menan ne taba ame nain. Dimen orup da ugup anuini menan watananeget anuingi?

³⁰ Taba menan God inap gaun wap amba napena, ame gapan orup da wa koeragam nimanegeli iwa da uon."

³¹ Ne orup ame gare anega wadiain, "taba da nawa o kaum da nawa o dim dim da taingawa, iravi God oya oya mega menan taigan."

³² Menan dim dim da tane, Diu o Diu uoni o Iesu dugup mega nagirewa, wa kokoeam mumapen menan ya taiwanian.

³³ Ne taina umap taiwanian. Iwa tayao wareyao tan negin ugup ugup gapan waenapen imumu wabibigamepen taivin. Ne nek kakaewa nega menan ya taivin, go mu kakaewa muga menan taivin. Iwa mu aruga Iesu inak mega ewakewa warapen menan taivin.

11

¹ Ap menan ne Keriso guegue mega mini tan ewap angen taina umanap taiwanian.

Waen nagirewa God wa taragasepi noa

² Endi mame, ne wa atonat imaiinv iwa e pot pot anu nimanegiana menan amba dim dim wadiaena wara taiwaniana menan.

³ Go nop ewakewa mame e anu kakaysepen. Keriso namu bone megawa ame God, amba apan da da iravi namu bone mugawa ame Keriso. Amba waen da da namu bone mugawa ame meme waiwa.

⁴ Menan apan da wanup o payu iap baraepi amba waenapan yamamup God inap mup wapi o God nop mega anu wapi, ap gapan me Keriso yaua wa koeameta. Iwa Keriso me namu bonewa.

⁵ Gare, waen da wanup o payu iap ya baraepi amba waenapan yamamup God inap mup wapi o God nop mega anu wapi, ap gapan me memewa yaua wa koeameta. Iwa memewa me namu bonewa. Waen ame i gume iragi wat ae seapen om ap daiton tan.

⁶ Waen iamup wanup gapan ukum ya umepiwa, menawaet iamup gume iravi wat ae seapen. Nu gutut nuga gapan, waen i gume uoni ame umam baware

anuta. Menan umam ame ya anupen menan wanup gapan i gume pan borep.

⁷ Go apan da, God inap mup wapi gapan, iwa okom ya pan borep. Iwa ere ibariwa gapan God apan mek umap tan, menan endi, apan gamup God irewa yavivin. Amba God erekwa gapan waen tan iwa waen gamup apan irewa yawapen menan.

⁸ Iwa apan waen gamup ya venasen go waen apán gamup venasén.

⁹ Amba God wani apan waen menan ya ta baraen go waen apan menan ta baraen.

¹⁰ Ap menan, anea iravi ewamopen menan, waen wanup gapan iwa ukum umep, ame gapan memewa amun mega gauarap wandini paua tata.

¹¹ Nop ame tave di, go nop aigap sia mame, nu Iesu dugup mega gapan, apan ge waen ago gare gare ta wanininampen. Apan mek mini uon amba waen mek mini uón.

¹² Iwa waen erekwa gapan apan gamup venasen, gare endi apan waen gamup yaniwanum. Amba iravi God wani gapan venasiwan.

¹³ Ek ae seyao wareyao tan, waen iwa okom ya umeni, God inap mup wapi, guegue ame kakae go koerage?

¹⁴ Tavewa ame aroga, nu piup guegue mega gapan yawaton anuivin, ame apan i gume nonongawa nagirewa, muk ingane anu koeamiwanum.

¹⁵ Go waen i gume nonongawa ame kakae iragen iwa i gume nononga ame God iamum open menan munen.

¹⁶ Waenapan upi nop mame toga uaren tat anupiwa, ame tavewa uon, iwa nop mame wana God waenapan mega at at iravi ap anega di taiwanum, guegue dawa da uon.

Keriso barip mega kwayupewa

¹⁷ God wa taragasepen menan iam iam ega gapan ebo taiwanin. Koewa aigap wariwanin go kakaewa menan ya taiwanin. Menan ne ya wa atonat imaivin.

¹⁸ Koewa daitonawa ame. To iam ega gapan engirit wangirit taiana gapan yau-makayap seu endumean. Nop ame anuna, semu tavewa anuivin.

¹⁹ Ne asiginap, iam iam ega gapan imuya ugup ugup wanumam, amba

noyam notatae den taiana, ame umap, iwa ap gamup da da God nop mega tavewa wainewa God wa ewaeta.

²⁰ Amba koewa ega dawa, iam iam ega gapan e Ayop nuga Keriso barip mega tabaewa naiwanin go tavewa ya anu kakayasiwanin.

²¹ E taba mame naiwaniana, e daiton daiton orup munan amatamu ya ta amba taba namu naiwanian. Menan waenapan evi tauane enup aramone wanumon. Amba sia, upi kaum kaimake dena nan bumbawam taiwanumun.

²² E taba o kaum nana paewa ega ega den. Iwa dimen map anega taiwanin? Iesu waenapan mega anu koeam mumat anuiwanin go? Kayawan taine nagirewa taba uon mondi onamone umam munapen anuiwanin go? Ne anenen diain? Ne endi wa atonat imayain go? Ae, uon megenat!

²³ Ayop wadianegeni gapan wadiena ame, Ayop nuga Iesu togurapen omine wan warane mumewa, me taba buredi ware

²⁴ God inap gaun wan, wa paise anega wadiamon, “Mame etunawa enan barian. Taba mame naiwanian gapan ne anu nimanegiwanian.”

²⁵ Ap gine daiton sia, taba nane ewap, Iesu sip ware anega wan, “Ma ne deninawa, God wa agiat imaini ewakewa. Kaum mame wam da da gapan nane anu nimanegiwanian.”

²⁶ Menan taba ge kaum Iesu barip mega gapan naianawa, gueguewa ame gapan Iesu nunan bop tani oisewa ase waenapan wa ewamuiwaniana, ame aeni wam uiwa gapan me sia taueta.

²⁷ Ap menan waenapan da da Iesu buredi o kaum wain mega, guegue mega ya anu kakayase amba napiwa, mu Iesu etua ge deniwa wa koeamiwanum.

²⁸ Wapena anun, ap menan ek daiton daiton guegue anu kakayasen buredi ge kaum, sip gapanawa, amba napen.

²⁹ Iwa e buredi ge kaum sip gapanawa, ame Keriso etua gueguewa, ya anu kakayase mondi nanewa, ek ingane itan warai. God wanene taeta.

³⁰ Iwa ap taiwaniana menan aruga nutuya uon tan, vek wariwanin amba den upi borit wayan.

³¹ Go nuk daiton daiton gueguewa anu kakayaset amba nata God wanene ya taneta.

³² God nu endi wanene taniniwa iwa wam uiwa gapan nu koewa taine ngirewa intum ya tat, ame gapan wanene bawarewa tanepi tawa menan.

³³ Tatan gwanin, ap menan Ayop Keriso barip mega napen menan to iam tauane, orup upinewa amatamu tan, tauep amba iravi daiton nan.

³⁴ Amba e da da enup aguguraepi ame namu e pa ega gapan taba nan amba on-aen to iamen. Ap tanewa God wanene ya taeta. Nop upinewa wadidiaepen menan amba inayap ongain.

12

God Guewa dim dim yan garaet nunini noa

¹ Tatan gwanin, e God Guewa yan aiman mega gueguewa anu kakayasepen menan ne anuivin.

² Namu iragena ma anu, wataget e ya anu tumat tayana gapan, waenapan ebo aohan wane gapan guewa nanip kaitane wa taragasean. Guewa nanip kaitane nop ya waini ame ewap asean.

³ Go endi anun, orup da God Guewa ewap aepiwa me “Iesu me Ayop,” pot poraet waiwadata, go “Iesu me koerage,” ya diata iwa God Guewa Woup Seniwa naun ainiwa menan. Om ame gapan gapan megenat waiwadata.

⁴ Endi God yan garaet mega ugup ugup aruga wanumam amba iravi ame God Guewa me daiton nuniwan.

⁵ Amba Ayop Iesu menan nao tat mega ugup ugup aruga wanumam amba iravi Ayop me daiton di, nao ugup ugup ame inap taivin.

⁶ Amba God menan tainanta, aro ugup ugup nuneni gapan taivin, amba God ap daiton di wadianeni gapan aro ugup ugup ame danamivin.

⁷ Ap gapan, God Guewa waenapan kakaewa muga menan yan garaet ugup ugup nunen.

⁸ God Guewa yan garaet mega ame nop dima wawa nunini amba dawa anut baware nunini. Garaet dere ame God Guewa daiton gapan tauan.

⁹ Amba God Guewa yan garaet God aigap anu tumat tapen menan aroewa nunini amba dawa vek wat inakam mumapen aroewa nuniniwa.

¹⁰ Amba sia, Guewa aro nunini gapan nu upi yo ge kiman paua ugup ugup taivin. Upi God aro nunini gapan dim da evi tauapen namu waivin. Nu upi, God Guewa aro nunini gapan, yan ibariwa ame God Guewa go airampu anu kakayasivin. Amba upinewa, God Guewa aro nunini gapan, merinu to bayanen ian uguge noa waivin. Amba God Guewa aro nunini gapan, nu upi merimu tobayanan nop ame anutoni gapan tavewa wa arogamivin.

¹¹ Go God Guewa, ap gine daiton di, yan garaeta mame iravi nuniniwa. Mek anuni gapan nu daiton daiton aro ugup ugup nuniwan.

Wapinu daiton go semunu aruga noa

¹² Keriso etua ame daitonagaet di, go semua mega arugataet wat nat tonat tan. Amba nu Keriso etua mega di.

¹³ Menan nu upi Diu nagirewa amba upi Diu uon, ian uguge nagirewa. Amba nu upi nao kaimakaet garewa uoni taiton amba upi nao nuk anuton taitoni nagirewa. Go nu iravi God Guewa amun mega gapan dup iaton etunu daiton tan. Nu iravi kaum naitoni ap guegue mini God Guewa daiton potanup wandiwan.

¹⁴ Ap gapan sia, etunu semua gine daiton megenat uon go semu ugup ugup aruga tobot tan.

¹⁵ Menan pusiwa da anega wapo, “Ne naniwa uoni menan orup ma etua semua mega uon.” Anega wapo pusiwa mek ise tom ya wa aeta. Iwa pusiwa ame orup ame etua semua mega wandia.

¹⁶ Amba sia darinewa da anega wapo, “Ne yamewa uoni menan orup ma etua semua mega uon.” Anega wapo darinewa mek ise tom ya wa aeta. Iwa darinewa ame orup ame etua semua mega wandia.

¹⁷ Iwa nu etunu semua iravi yamanu arugataet entan wanumopo anenen

gapan nop da darinanup anuit? O etunu iravi darinanu arugataet entan wanumopo anenen gapan tutua da ginanup anuit?

¹⁸ Go God mek anut kakaewa gapan etunu semua daiton daiton enat wanatan.

¹⁹ Menan etunu semua gine daiton megenat wandepiwa, ame etunu da uon, ya venaseta.

²⁰ Go nu waninan wapinu daiton go semunu aruga.

²¹ Ap menan yamewa yone naniwa anega ya diamota, "Ago nena nena inagap uoni menan genan ya anuivin!" Den i pokinewa yone pusiwa anega ya diamota, "Ago nena nena inagap uoni menan genan ya anuivin."

²² Tavewa mam, ugun wapi semua upi aroe uoni mini wanumam go iwa muga den.

²³ Amba ugun wapi semua upi anu baitamitoniwa menan nu kwayup aigap tamuivin amba semua upi umam menan karaua tat anuintoniwa menan nu kwayup yaentuk tamuivin.

²⁴ Go ugun wapi semua upi kakae anuiton menan munan ya anuivin iwa muk umap di wanumam. Go God ugun wapi iravi tambu tobottan. Ap gapan ugun wapi semua upinewa anu baitameniwa ame kwayupewa tamopen, menan semua iravi ame kakae diamon.

²⁵ God ap seni menan, etunu gapan endum wandum uon. Semunu ugup ugup kwayup gare gare anu guriwanumun.

²⁶ Gueguewa da mam, ugun wapi daiton vek anu wat ire taiwandapinawa, upinewa iragi wat ire taiwanumain. Amba ap umap sia, semua ansena da kakae diatawa, ugup wapi upinewa iragi aton anuin.

²⁷ E iravi Keriso etua. Etua mega semua daiton daiton e me di.

²⁸ Ap menan God waenapan mega nimakanup paupewa ugup ugup se nunen. Namu iragen ame, upi Iesu watu enamot mega nagirewa dianen. Amba derewa, upi God nop mega anuton waitoni nagirewa dianen. Amba yampoa, upi waenapan wadidiamitonu nagirewa dianen. Upi yo kimam paua ugup ugup taitoni

nagirewa dianen amba upi vek warane wat inakam mumitonu nagirewa dianen o waenapan wat agoat mumitonu nagirewa dianen o upi namu yo yo taitoni nagirewa dianen o upi merinu to bayanen ian ugupe noa waitoni nagirewa dianen. God nao mega ameme ap tapen dianen. Go nao ugup ugup nunini gapan gapan taivin.

²⁹ Go nu iravi watu enamot mega nao muga ya taivin o nu iravi God nop mega anune waine nagirewa nao muga ya taivin. Den nu iravi God nop mega waenapan wadidiamuine nagirewa nao muga ya taivin amba den nu iragi kimam yo paua ugup ugup taine nagirewa nao muga ya taivin.

³⁰ Amba nu iravi vek warane wat inakam mumine nagirewa nao muga ya taivin o merimu to bayanene ian ugupe noa waine nagirewa o ugupe merimu to bayanen nop ame tavewa anune waine nagirewa nao muga ya taivin.

³¹ God Guewa guegue mega ame yan garaet nunini ame upi aritawa upi arita iragenawa uon. Ap menan arita iragenawa enapen menan me inap mup anu guriwanian.

13

Baigan

¹ Baigan ame arita iragen. Iwa ne waenapan ge anea nop muga ugup ugup gapan wan tapena, go ne inanap baigan uon wandepiwa, ame ne mondi non yatataen amba agamit kirangagine kirarat waini mini taivin.

² Amba ne inak namunup onini yao waingapena amba God karaua mega asigip tapena gapan anut bawarewa anupena amba God inap anu davinawa menan tunup mame diapen me yon wande asira aeta, go wan dim dim arita mame gapan, ne baigan da inanap uon wandepiwa. Ne mondi pokanaet wanigen taivin.

³ Ame ne wan dim dim yon boranawa ame purapuse uoni nagirewa ase ma munapena, amba ne God menan ugun wapi yan garaet tapen to omaya iranegepen menan tapena, go baigan da inanap uon

wandepiwa, ne dim dim da kakaewa ya tautanain.

⁴ Baigan gapan ne ginan yamaet ge anu aipakam mumain amba baigan gapan ya enu yawamoin o ya anu koeam mumain amba inamup ne bawarewa ya tain apan apan ya ta wain.

⁵ Baigan gapan dadagie den ya tain. Amba gudumane den ya anuin amba waenapan koewa muga namu tane sia ya batnagain.

⁶ Baigan gapan ne koewa gapan aton ya tain go tavewa gapan aton tain.

⁷ Baigan gapan waenapan itan muga ne den warain amba ago munapen menan dan enumoin. Gop munan ya anuin wam evi mu umap di tat anuin itan bagu sisi wamewa taupei ae ya vemoin.

⁸ Baigan me verisiwa da uon. Nop evi tauapen namu waintoni go nop ame uon tata. Amba ian ugup ugup merinu to bayanen gapan nop muga waintoni ame wam eviwa ap sia ya tait. Nu anut dim da warat asigip taton, ame wam eviwa gapan iravi imunu oaraeta.

⁹ Iwa anut ugup ugup anuintoni ame semu semu otu da anuinton, iravi ya anu kakayaseton.

¹⁰ Go wam eviwa, anu kakayasini apanewa taupei gapan wan dim dim mame iragi uon tata iwa anut nuga mame semu semu otu da megenat. Menan anut kakae iragenawa megenat wande aiwadata, uon ya tata.

¹¹ Gueguewa ame map anega, ne orup otu waingena gapan nop nega amba imuna potana den orup otu mini. Go endi ne apan inanegeni gapan orup otu guegue muga ae vean.

¹² Nu endi gio koewa birom barom tan yavitoni umap. Go wam eviwa Keriso aroga ase den gare gare yayao nitait. Menan ne endi semu semu megenat anuivin. Go wam eviwa God endi anuitam nimanegini mini ne den iragi anuitamain.

¹³ Go wam endiwa, inak nuga agoewa yampoa wanumam ame, anu tumat God inapewa, anu dao amba baigan. Yampoa ame gapan aigap iragenawa ame baigan.

14

God Guewa yan garaet mega

¹ Menan baigan gapan taiwanian, waenapan munan anu guriwanian. Amba Guewa yan garaet enapen menan mup gapan anu guriwanian. Yan garaet bawarewa ame God Guewa wadieni gapan noa anu wapen.

² Iwa waenapan da da merimu to bayanen ian ugupe noa wapi, mu God inap waiwanum. Mu God Guewa nop gunguna wadiamoni gapan waiwanum. Menan ap mepe wanumuine nagirewa ya di anu kakayasiwanum iwa mu nop muga gapan uon.

³ Go God nop mega Guewa wadiamoni gapan anune waine, ap gapan waenapan ame tavewa anuiwanum, amba nop ame inamup dadak muniwan ge arogam muniwan amba wabibigam mumiwan.

⁴ Menan da da merimu to bayanene ian ugupe noa waine ame mugenat aton taiwanum. Go da da God noa anune waine gapan, waenapan iravi ago muniwanum amba God guegue mega aigap aigap anu aviwanum.

⁵ Ap menan ne anuinginawa e iragi meria to bayanen ian ugupe noa waiwaniat anuivin. Go inak aigap iragenawa ame God Guewa wadieni gapan God nop mega waiwaniampen anuivin. Iwa God nop mega anuyan waiana nagirewa waenapan ago muniwanin, iwa mu tavewa anuiwanum. Go merimu to bayanen ian ugupe nop muga waine nagirewa, ap mepe orup dawa waenapan tavewa anupen menan nop ame entan ya tapiwa, ame waenapan inamup ago da uon, iwa tavewa ya anuiwanum.

⁶ Gueguewa da mam, ne daio inayap tauapena merina to bayanep ian ugupe noa wapena wam ega wakaumain. Go ne nop nuga gapan e inayap God karau mega wat arogamepena, o God anut mega wadiaepena, o opata kakaewa wapena, ame kakae iragen iwa ap gapan God tavewa mega anui.

⁷ Ap umap sia, viriko o sinao mu potamup inak uon, go wat muga tamanewa gapan ununke ya wapiwa,

wak kakaewa ewanewa da ya anui, unuk megenat uniunion anui.

⁸ Amba sia pum upunini apanewa, ita anan gapan pum aroga ya upunepiwa, ita nagirewa waramatain, anan menan ya ta kakayatain.

⁹ Ap menan e ap umap sia, meria to bayanen ian ugupe noa wane gapan wae-napan anenen anu awain? Nop ega mondi gwoup megenat tau aeta iwa ununkewa den go tavewa uon.

¹⁰ Piup gapan nop ugup ugup wai-wanum go nop muga tavewa den wainewa, mondi ununkewa megenat uon.

¹¹ Go orup da anenen inanap wapi ne tavewa mega ya di anu kakayasepenawa ame gapan orup ame waramatain, amba me inanap ian ugupe apanewa da anu ni-manegeta amba ne me inap den ap anega sia anuin.

¹² Menan e God Guewa yan garaet ugup ugup aritavet warat anuyan taiwanin, ame Iesu dugup mega, tavewa aigap aigap anu awapen, eparae den kai warapen menan yan garaet ameme aigap yop ta danamai.

¹³ Menan nu merinu to bayanet ian ugupe noa wata, ame kakae, go ian ugupe noa ame watoni tavewa wa arogamepen menan, God Guewa yan garaet ame nunapen menan God inap mup wat.

¹⁴ Guegewa mam, ne merina to-bayanep ian ugupe noa gapan God inap mup wapena, ap gapan ne guana megenat mup wata go imuna gapan tavewa da ya anuin.

¹⁵ Ap menan kakaewa ambe, anenen tain? Manega tain, wam da God inap mup wapena, ne merin tobayanep guana gapan mup wain amba wam da imuna tavewa anuini gapan mup wain. Ap mini sia, wam da God inap wak wapena, guana gapan wain amba wam da imuna anuini gapan wain.

¹⁶ Go anun, guaya gapan God inap gaun wanewa ame kakae go Iesu anu tumasine nagirewa daio taue wanumopo anenen amba nop ega anupi amba "Ame umap" wapo?

¹⁷ Amba sia, guaya gapan, God inap mup ame kakaewa da wapo, ame kakae

go Iesu anu tumasine nagirewa daio taue wanumopo, ame gapan mup ame ya anu awain amba aro da ya warain.

¹⁸ Ne God inap gaun waivin iwa ne merina tobayanen gapan ian ugupe noa arita iragen God inap wainawa, e da ne umanap uon.

¹⁹ Go God dugup mega gapan iamiton, ne nop nani yamunaet imunap anuina, ap megenat wat anuivin, iwa waenapan nop tavewa ame wadiamopen menan. Go ne merina tobayanen gapan ian ugupe noa arugataet (10,000) ap gapan ya wat anuivin, iwa waenapan nop tavewa da ya anuin, ame kakae uon.

²⁰ Gwanin wainawa, tat ega gapan, orup otu guegue koeragewa mu oare, ap umamup wanien. Go mu i guine ge anut muga arita uon, menan e anut ega gapan, ap umap ya waniene go waenapan bawarewa asik taine nagirewa mini wanien.

²¹ Wataget God nop mega ok anega sean, Ne ian ugupe nagirewa gamumup ne wae-napan nega wadiamoin, mu nop muga gapan diamoin.

Ian ugupe nagirewa nop muga gapan wadiamoin, go ame gapan den nop nega ya warain. God ap anega wan.

²² God nuneni gapan merinu to bayanet ian ugupe noa waintoni ame Iesu ya anu tumasine nagirewa munan paua ame venasiwan, God aro mega yawapen menan. Go God nop mega Guewa gapan anuton waintoniwa ame munan uon go paua ame anu tumasintoni nagirewa, nunan venasiwan.

²³ Ap menan God waenapan mega toboran iam iam tane uruga merimu to bayanen ian ugupe noa wane amba ian garipewa da o Iesu ya anu tumasine da nimakayap taue nop ame anupi e bumbawam ta wat diain.

²⁴ Go e iravi iamen amba God nop mega Guewa gapan anun wanewa, Iesu ya anu tumasine orup da da nimakayap taue nop ame den anupi gapan

²⁵ mu inak koewa muga ae ingane anupi amba e nop ame wanewa menan God wa taragatain amba aroga anega wain, "Tave di, God e inayap den wandia."

Poupe poupe gapan God wa taragasepen

²⁶ Tatan gwanin, ap menan nop i kaimewa ame e God wa taragasepen menan to iamene gapan waenapan mu kakaewa muga menan tai. Ame, iam iam ega gapan e da da wak da o opata da o God karau mega da o meria tobayanep ian ugupe noa da o nop ame entan mega da ame waenapan mu anu tumat muga wat kaimagamepen menan taiwanian.

²⁷ Menan Guewa yan garaet ega daiton daiton ame danamepen menan gueguewa mame tan, orup da meri tobayanep nop da wapen tapiwa, orup ega dere o yampo mugenat daiton daiton wap. Amba mu anenen wane tavewa ame waenapan upi entan nop nuga gapan tap.

²⁸ Nop ame tavewa entan nop nuga gapan waini otua da ya wandepiwa, meriwa tobayanene waine nagirewa dugup gapan nop ame aroga ya wap go muk ingane God inap wain.

²⁹ Amba sia, e da da God nop mega Guewa gapan anune nop wapen tanewa, orup ega da dere o yampo mugenat daiton daiton wap. God nop mega da wadiamop amba waenapan upine nop ame se yaviwanumain.

³⁰ Go orup da God noa waiwandapinawa gapan orup dawa God inap nop da aroga taupei menan yone nop mega wata go namu waiwandini otua nop mega ae veta.

³¹ Ap gapan e daiton daiton poupe poupe gapan nop waiwaniampen, ap tane gapan Iesu dugup mega nagirewa iravi tavewa anuine gapan dadak munapen taiwaniai.

³² God nop mega Guewa gapan anuine nagirewa yan garaet muga kwayup tapen, gueguewa ame daiton nop mega ae ve orup dawa nop wapen menan arok gare gare munapen.

³³ Iwa God me erere goyago apanewa uon go waenapan iravi God tobob mega nonupewa gapan wanumopen anun tainiwa.

At at iravi God waenapan mega iam iam tapi

³⁴ ap mepe waen nop ya wap no uon wanumop. Mosis iup namua seni ap

anega wan menan waen bawarewa ya tain.

³⁵ Menan mu dim dim da yao asik tat anupiwa, ame at pa muga muga gapan amba meme wai ae wayawamop. Iwa iam iam gapan waen yon wande dugup gwanap nop wapi umame den.

³⁶ E iwa dimen apan apan tayan waiwanin? God nop mega ere inayap tauen go? E egenat anuiwanin go? Ae, nu den di.

³⁷ Ap menan waenapan da da anega anupi, Nu God nop mega waitoni nagiresha o Guewa yan aiman mega wat kakayasintoni nagirewa. Anega anupi menan ne ok ma sena den umap wain iwa God nop mega dandamunagaet wani ae anu kakayasepen menan ok ma sivin.

³⁸ Go nop mame, orup da, ya umap wapiwa gare e den me tandayat tai.

³⁹ Ap menan, tatan gwanin, God nop mega anun waiwaniampen menan anuiwanian, go waenapan merimu tobayanep nop ian ugupe noa waine nagirewa ya wa tanamone.

⁴⁰ Ap menan dim dim tapen tane yaentuk mantuk tan amba poupe poupe gapan taiwanian.

15

Keriso boe sia inakae yon wanden

¹ Tatan gwanin, wataget Iesu Nop Oit Kakaewa wadidiens ame anu tumaseana gapan aroe den waniaisi. Nop ame anu awapen menan sia wadiaepen taivin.

² Iesu Nop Oit Mega Kakaewa ame gapan e inak ewakewa warayan, nop ame wat nat kakayesen. Ap ya tanewa e anu tumat ega uon tata amba endi den pokaet.

³ God nop mega baware iragena ame God wadianegeni gapan wadidiaen. Nop mega ame gapan ok anega seane, Keriso koewa nuga menan boen.

⁴ Sia nop mega gapan ok anega seane, Waenapan Keriso etua dagupa baraene, amba wam yampa God wani gapan me inakae sia yon wanden.

⁵ Yon wanden wamewa gapan, apan Pita inap venasen amba watu enamot mega apane aonagaet pusinawan dere inamup venasen.

⁶ Amba mu Iesu yawane ewap, wam koni daiton gapan dugup mega nagire arugataet (500 aigap) inamup venasen mu Iesu yawane. Waenapan ameme, endi, aruga kabani wanumamun, go upi borit wan.

⁷ Amba apan Diemis inap venasen, ap ewape watu enamot mega uruga inamup venäsen.

⁸ Amba uiwa ne inanap venasen, tave di, ne orup kutakewa mini iwa Iesu inap koewa taingina gapan ne Guewa gapan sia yanan.

⁹ Ne God waenapan mega ta koeragam mumana menan ne watu enamot mega da dianek dianek kakae uon. Menan ne Iesu watu enamot mega uiwa.

¹⁰ Ap gapan God wat aipakam garaet mega neneni menan endi kakae di waingian. Garaet neneni ame ne kaume kaume ya tan. Ne nao kaimakaet ame taingina watu enamot upinewa umamup uon go aigap iwa nek epara nega gapan ya taingin, go God garaet wat aipakam nimanegeni gapan taingin.

¹¹ Go mu opata wane gapan anu tumat tayan o ne opata wana gapan anu tumat tayana ame dim da uon, bawarewa ame nu iravi imunu daitonawa Iesu nop oit mega opata gapan wadiaetoni menan e iravi anu tumasean.

Nu borit wata inak nitat sia yon waninait

¹² Nu oit wadiaetoni ame Iesu boe inakae sia yon wandeni, menan iwa dimen e upi borit wane nagirewa sia ya yon wanumot waiwanin?

¹³ Ap anuiana tavewa wandepo ame Iesu den sia ya yon wandepo.

¹⁴ Keriso sia ya yon wandepo, nu Iesu oisewa wadidiamuintoni ame i uoni da wandepo amba e anu tumat ega den tavewa uon, pokaet wandepo.

¹⁵ Amba den, ap wandepo waenapan God oise ebo aopan wadiamuivin iwa Iesu sia yon wandeni oisewa ame ebo wayana menan. Ame ebo aopan iwa borit wane nagirewa God aro mega gapan sia ya yon wanumot wayana menan God aroewa gapan Keriso den sia ya yon wanden.

¹⁶ Iwa borit wane nagirewa sia ya yon wanumopiwa, ibariwa gapan Keriso den sia ya yon wanden.

¹⁷ Keriso sia ya yon wandepo, e anu tumat ega i uoni menan God koewa ega ya anu ae vepo. Ap menan e koewa ega gapan di waniepo.

¹⁸ Amba den Keriso anu tumasine nagirewa borit wane inak ewakewa ya taufanepo.

¹⁹ Menan nu Keriso anu tumat ge anu dao mega inak piup mame gapan megenat ago nunapo iwa wam eviwa gapan nu sia ya yon wanineta ame bagu sisi baware, amba waenapan iravi nu kayakayawan nagirewa dianepo. Amba den nunan bagu sisi aigap anupo, iwa nu nop eboewa gapan nu iravi wakaumeton.

²⁰ Go tavewa iragen mam, Iesu sia yon wandeni menan, me megenat namu iragen ta ewat tani gapan waenapan borit wane nagirewa wam evi da, God aro mega gapan sia yon wanumoin.

²¹ Gueguewa ame, wataget iragen, ibariwa gapan, apan daiton gamup bop ware taueni menan endi nu borit waitoni ap mini apan daiton da sia, yon waninet aroewa ware tauen. Ap gamup inak nitat sia yon waninait.

²² Apan Adam gapan bop taueni menan borit waitoni go gare endi nu Keriso den dugup daiton tatoni menan borit wata sia inak nitait.

²³ Go nu daiton daiton sia yon waninopen wam nuga nuga gapan amase tait. Namu iragen Iesu yon wanden amba me sia taupei wamewa gapan nu iravi inak nitat yon waninait.

²⁴ Wam ame gapan Keriso yone piup aroe bawarewa, airampu koewa o piup nagirewa ugup ugup, gut momak mumepi amba toemu amun mega iragi Mamewa God sia waneta.

²⁵ Iwa Keriso Ayop tani amunewa gapan wande aiwandapina amba Mamewa anavi mega garao mume tambu Otua gauarap sepi amba toemu amun mega iragi Mamewa sia waneta.

²⁶ God anavi mega ui iragenta di, gut momagepi ame bop.

²⁷ Ame God nop mega ok anega seane,

God dim dim iravi tambup Keriso pusiwa gauarap seta.

Iravi gauarap seat wani ame aroga sen, ame iravi di go God Mamewa megenat Otua pusiwa gauarap den ya wandeta iwa me tapi gapan wan dim dim Otua pusiwa gauarap seta.

²⁸ Anavi megawa ge dim dim iravi den God Mamewa Otua pusiwa gauarap sepi gapan Otua Mamewa gauarap wandeta. Amba ap gapan, God Mamewa wan dim dim iravi, Otua ge nu den, bawarewa nuga ta aiganup wande aiwandata.

²⁹ Endi waenapan upi, mu evene wai ame borit wane nagirewa, kakae wanumopen menan, munan dup sia iwanum. Mu anenen tat anuiwanum? Go borit wane sia ya yon wanumopiwa, iwa dimen borit wane nagirewa munan dup iwanum?

³⁰ Nu den pot poraet bop nonokap tauivin, Iesu oisewa kakaewa menan. Go borit wane nagirewa sia ya yon wanumot wane menan iwa dimen nu ap anega taivin?

³¹ Evenan wainawa, ne pot poraet bop nonokap tauivin! Ne enan aton anuingina iwa nu iravi Ayop nuga Iesu den daiton taton, ap menan nop mame wadiaivin.

³² Nu mapa pa sewa Epesas gapan, waenapan upi, mu man puawa anan warine mini, nonu gapan anan waraton. Go borit wane sia ya yon wanumopoa, anan ame mondi taton iwa anu tumat pokaetawa gapan anan waraton. Ap menan nu dim dim tavewa menan anan waraton, ame iwa da uon. Menan borit wane sia ya yon wanumopo piup nagirewa nop mame waine nu den umap wapo. Nop ame, "Endi nu nat aton tait amba imana borit wait."

³³ Menan ek ya anu bambam tane. Iwa, "Koewa nagirewa iman inak kakaewa warane taine nagirewa wa girigam mu-main."

³⁴ Ap menan imuwa wat kakayasep, amba koewa ega ae vean. E wa umam imaepen menan nop ma waivin, e ni makayap upi Iesu asigip ya tayan.

Borit wat amba sia yon wanineta etunua mega anenen?

³⁵ Go e upi singui anega wanewa, "Borit wane nagirewa anenen ta amba sia inak muse yon wanumoin? Etumua ugup anenen venasep amba sia yon wanumoin?"

³⁶ Nop ap anega wane ame bumbam tayan waiwanin! Etumua ugup anenen venasepi guturewa endi piup gueguewa gapan gare wain. Taba makewa piupa veriana, namua puakaepi amba ewakewa sia dume dotoueta.

³⁷ Uit o taba o upinewa makewa veriana ame makewa megenat veriwanin, visiwa ge kaimewa den ya verianawa. Amba makewa ugup ugup dumane aroga dotouwanumune ame gine ugup ugup.

³⁸ Ap menan makewa ugup ugup, God daiton daiton kaimewa duman dotouane yawat muga ugup ugup, mek mini mini munen.

³⁹ Amba ap mini sia piup gapan kabaniwa etua gine daiton uon. Waenapan etumu gine ugup, man tap etumu gine ugup, nenip etumu gine ugup amba meo etumu gine ugup.

⁴⁰ Amba kiman wan dim dim ge piup wan dim dim etumu den. Dation daiton ame gine ugup ugup amba yawat muga ewanamu den ugup ugup.

⁴¹ Menan wam ewanewa ugup, siragam ewanewa den ugup sia, buanae ewanamu den ugup sia. Amba buanae aruga nimakamup ewanamu ugup ugup den wanumam.

⁴² Borit wane nagirewa sia yon wanumopi gueguewa gat wana ap umap sia. Etumua urata tumone ame punun wa amoin. Go inak muse sia yon wanumopi da sia punun panan ya wa amoin go yai-bobot wanumoin.

⁴³ Urata tumone nutu uoni tumone. Go sia yon wanumopi aro ge oya oya den yon wanumoin.

⁴⁴ Piup etua mega urata tumon. Sia yon wanumopi kiman etua mega yon wanumoin. Ame kiman etua megawa menan guewa mega den wandia.

⁴⁵ God nop mega wataget ok anega seane,

God wani gapan apan namu iragenawa, Adam inak gapanewa venasen.

Go endi God sia wani gapan Iesu, ame yaua Adam ui iragenawa, God Guewa ingewa nunini apanewa venasen.

⁴⁶ Piup ma gapan, kiman guewa wan dim dim mega namu ya venasen. Go piup gapan apan namu venasen amba kiman guewa wan dim dim mega evi amba venasen.

⁴⁷ Ap menan, apan namu iragenawa Adam piup gapan venaseni menan me piup apanewa. Evi amba, God wani menan apan Adam uiwa iragenawa, ame Iesu, kiman gapan vise piup tauen.

⁴⁸ Menan piupa waninintoni nagirewa etunua Adam etua, piupa atabobo gapan tani mini. Amba kiman wanumuine nagirewa etumua Iesu Keriso, kimani gapan taueni apanewa, mini.

⁴⁹ Menan endi nu Adam piupa venaseni apanewa gine namu ugu wapi waratoni ap mini wam eviwa nu kimani viseni apanewa Iesu umap sia entanait.

⁵⁰ Evenan wainawa, nop i kaimewa ame, etunua ge deninua kiman toemuewa ya yon boreta. Amba etunu puakaen punun wan aini megawa yaibobot arewa ya yon boreta.

⁵¹⁻⁵² God nop mega karauawa wadiaet anuivin. Ame, pum uiwa upunepi gapan menawaet da ase wat veseta, yaman pem taitoni mini, borit wane namu yon wanumoin sia ya puak mutain. Amba nu kasi-gawa nagirewa etunua ugup entan tata.

⁵³ Ame gapan etunu puakae punun wa aini mame da sia ya puakaeta go inak yaibobot wareta.

⁵⁴ Wam ame, nu etunu puakae punun wa aini entan ya puak nita nita warepi, ap gapan God nop mega mame wataget wani tavewa taueta. Nop ame anega wan, Bop aroewa gaseget to paitan paina ya masen di ae iramen.

⁵⁵ Bop aro amun mega ne garawasen.

Bop aro mega to kuasen. Menan endi bop aroewa uon tan.

Ok ap anega sean.

⁵⁶ Bop koewa nuga gapan aro waren toguraniwan. Amba koewa nuga Mosis iup mega to paisintoni gapan aro wariwan.

⁵⁷ Go God gaune wapen iwa Ayop nuga Iesu Keriso gamup bop aroe garawaseton.

⁵⁸ Menan tatan gwanin, kaimakaet tumban amun yonan. Dim dim da arok wanane taue ya menao imae. Pot pot etuya iragi Ayop nao mega gapan ase taiwanian, iwa Ayop nao mega danam danam ya tanewa garewa den wariwai.

16

Moni bongamen yan tan God waenapan mega munane

¹ Endi moni bongame yan ta God waenapan mega wat agoat mumapen menan wain. Ian at Galesia nagirewa wadiamona tane ap umap tan.

² Wam pura bawarewa gapan gapan moni ega baware o kamontu e nao gapan wariana omewa semua gapan, e daiton daiton siwanian. Moni ame watu dorinian, ame ne tauapena wamewa gapan ne moni sia bongamepen menan sia ya wain, iwa om ineta.

³ Tauapena, e orup da da om enumoyana aro munapen menan ne ok ame se munain. Ap ogewa amba yan aiman ega, moni ame, tambu Ierusalem watu enamoin.

⁴ Wam ame gapan den anget anupena tautananek amoain.

Pol pa tau ge tau aepi noa

⁵ Ne imuna upan sean at Masedonia angepen taivin, menan at ame taua garawat angepena amba daio inayap ongain.

⁶ Anse ne ongepena amena wam kontiu tanae waingain o aunari wamewa den tanae waingain. Amba at da ugup sia angepena wat agoat nimanegai.

⁷ Ne mondi ayogo ya yawaet anuivin go wam nonongantuk amena den tanae waniget anuivin, ame God wapi gapan.

⁸ Endi ne mapa pa Epesas gapan wain-gain, Pentikos barip wamewa uon tapi amba angain.

⁹ Iwa God menan nao kanama mapa wandia, waenapan aruga God nop mega anut anuiwanum ap menan waddidiamot anuivin. Tandayat nimanegine nagire aruga den mapa wanumam, go dim da uon, God nao mega di taingain.

¹⁰ Apan Timoti inayap tauepiwa, e waupan evenan tan iwa ne Keriso menan taina ap mini me den taiwan.

¹¹ Orup da me inap tanda ya wap go wat agoasen watu enane, nonup gapan entane inana tauep. Me Iesu anu tumasine nagirewa upi den tanam inanap tauapen menan nambenamu taivin.

¹² Amba evenanu apan Apolos dadak kaimakaet wanen evenan wainu upi tanam inaya onapen, go me da endi ona ona umap uon, go me wam arok kakae da warepi me oneta.

Pol gaun mega uiwa

¹³ Waniene yama taiwanian, imuya anu dawan gapan kaimakaet amu yonan. Tap ya anune go aroe den waniwanian.

¹⁴ Ap menan dim dim taiwanianpina, imuya waenapan munan anu gurane gapan taiwanian.

¹⁵ E Stepanas, pa mega nagirewa den, asigiap, mu at Guris gapan Iesu oit mega namu anune gapan anu tumasen. Endi mu God waenapan mega wat agoat mumapen men usenagaet taiwanum.

¹⁶ Tatan gwanin, mu umamupe nagineva nop muga anu taiwanian amba mu den intum tan, God ayamase taiwanian.

¹⁷ Apan yampo Stepanas ge Potunatas ge Akaikas inanap tauane menan aton anun. E yaman oare waniana menan e garewa ega mu yampo di.

¹⁸ E imuya vtureni mini, mu tauane gapan imuna vturen. Menan waenapan ta warit muga map anegawa iramu yao wa atonat mumapen iwa mu anu tumat muga kakae di.

¹⁹ God waenapan mega at Eisia nagineva gaun inayap waiwanum. Apan Akwila waenewa Pirisela dere Iesu dugup mega pa muga gapan iamine nagirewa den, iravi Ayop Iesu men daiton tayana gapan, gaun baware inayap waiwanum.

²⁰ Mapa Iesu dugup mega nagirewa iragi gaun kaewa inayap waiwanum. Gare gare gaun tan, nonup gapan ua ton.

²¹ Endi ne Pol ok ma nek naninap sian-gin.

²² Waenapan da da imu pose Ayop nuga Iesu inap ya warepi, God nemoro mega yavep.

Maranata wapen, ame ian Gurik nop muga gapan. Gueguewa ame, Ayop nuga Iesu onak.

²³ Ayop nuga Iesu wat aipakam mega garaetawa inayap wande ep.

²⁴ Enan anu gurina menan anu gurat nega Iesu yaua gapan inayap wande ep.

2 KORIN

Pol ok mega derewa Korin nagirewa inamup sen

¹ God waenapan mega pa sewa Korin gapan gaun inayap waivin, waenapan mega iravi at Guris den. Ne apan Pol, God om enunegen Iesu Keriso watu enamot mega da, amba gwaninu Timoti den. Me den Iesu anu tumasiniwa.

² Mamanu God ge Ayop nuga Iesu Keriso dere garaet wat aipakam imaepong amba nonup baigan muga enep inayap wandep.

God wabibigam nimaniniwa

³ Nu God wa atonasepen. Iwa me Ayop nuga Iesu Keriso Mamewa, amba imua mega ae meareng iragi wabibigam nimaniniwa.

⁴ Me nunan ap taini gapan nu bagu sisi waritoni wamewa God wabigam tobigam taniwan. Ap umap waenapan itan bagu sisi warepiwa, nu yonat God wabibigam nimaneni aroewa gapan waenapan imua wabigam tobigam tamuinampen.

⁵ Keriso nunan itan bobon bagu sisi da wat yapeni menan yamunewa nu inat wainet nuga gapan tauen wat yapiwin. Nu itan bobon wat yapintoni menan God Mamewa, Iesu gamup, wabibigam nimanini den tautanivin.

⁶ Ap umap, God wat inakam imaepong menan nu e enan itan bobon wat yapiwin. Iwa God, nu gamunup, wabibigam imaepong menan. Nu umanup e den God menan itan bobon wat yapiwanin ap menan God e wabibigam imaiwan.

⁷ Me wabibigam imaepta, iwa me nu wabibigam nimaniniwa amba e God menan itan bobon nu umanup wat yapiwanin menan.

⁸ Gwanin wainawa, at Eisia gapan, nu itan bobon doak ame wat yapatoni ame e di anu kakayasean. Nu itan doak ame natan wandini ao wat nagat nagat umanup uon, nu ina waine waine anut nuga baita tan.

⁹ Imunu anega anuton, nu borit wapen menan nop gase panane. Go inak mame

inanup venaseniwa iwa mega ame nuk aro nuga gapan ya anu tumat waninepen, go God borit wane nagirewa sia yon wanumot wani apanewa, aroewa anu tumat waninepen.

¹⁰ Menan, tavewa di, nu bop nonokap tauatoni go God wat inakam nimanen amba pot poraet wat inakam nimaniwanda. Ap menan imunua God inapaet di wandep anu davinampen.

¹¹ E God inap nunan mup taiana menan God wat aipakam nimaniwan. Ap menan waenapan arugataet God inap gaun wain iwa God, e mup ega gamup, wat aipakam nimaniwan.

Pol enok bambin mega entan tan

¹² Nu nuk ian guine kakaewa gapan taintoni menan wa namurasivin. Iwa piup gapan amba e inayap den imunu potanu woup sen eboewa da uoni gapan wa tainton. Amba tat nuga ame, God garaet nuneni aroewa gapan tainton, piup nagirewa dima muga gapan da uon.

¹³⁻¹⁴ Ne ok mame e yao batnak anu anu omewa gapan di sivin, kaimake den da uon. Menan e nop nega iravi anu kakayasepen menan anuivin. Ok mame gapan nu inanup asigip ta kakayatai, go endi semua megenat asigip tai, Iesu taupei wamewa gapan amba asigip taitamai. Ap wamewa nu endi e wa namurat imaintoni mini e nu wa namurat nimaniwaniai.

¹⁵⁻¹⁶ Ap menan e nu wa namurat nimanepen menan namu e inayap daio ongep amba at Masedonia anget anun amba sia ewagai entan ongepena e inayap daio derewa sia onget anun. Iwa ne inayap daio derewa ongepena gapan e God wat aipakam mega derewa warapen menan anun. Ap ewap e ago tanegen watu enanegene at Diudia angep.

¹⁷ Ap tat anuna, go daio derewa ya venasen, ap menan e anega anuiwaniana, ‘Pol me nop ae ao waini apanewa.’ Ne ap ya taina, nek kakaewa warapen menan den ya tainawa.

¹⁸ God nop tavewa waini apanewa mini ap umap nop nuga inayap ae ao ya wainton.

¹⁹ Go ne, Sailas ge Timoti den, nop tavewa wadidiaeton. Nop tavewa ame

Iesu Keriso, God Otua, oit megawa. Amba Iesu me God tavewa megawa iwa dim da da iragi God anuini Iesu om gapan gapan taitamen, ae ao da uon.

²⁰ Menan, God wan dim dim nunat wa agiat nimaneni animpo da wan, Iesu agi ame iravi taitamepen menan anega wan, 'Ame umap,' amba taitamen, gego da uon. Iwa ap me menan nu Iesu gamup mup nuga gapan anega waintoni, 'Ame umap.' Ame God oya oya mega menan anega waintoni.

²¹ Ap umap sia, gego da uon, endi God me taini gapan e, amba nu, iravi Iesu den intum taton i gapan kaimakaet yonivin. Amba God ganganat nimaneni gapan, nu Keriso megawa entan nimanen amba nu me wa watu enamot megawa dianen.

²² Ap aigap sia, nu megawa di anupen menan God paua mega yatup pananen. Amba dim dim iravi nunan tat anuini di taueta ame anu awapen menan Guewa Woup Seniwa potanup baraen.

²³ Endi ne God yamapaet yonanina menan nop wapen taivin, ne ebo wapena me wanane tanegeta. Nop ame, ne ewagai e inayap daio derewa gapan sia ya ongena iwa bagu sisi aigap enapena tawa menan ne Korin sia ya tauan.

²⁴ Nu e anu tumat nimanepen menan ya diaivin. Go nu asiginup e anu dawayan gapan tumban amuyan yonianawa. Menan e aton ega menan nu e tanae nao tait.

2

¹ Ap menan ne imuna kaimakaet anega anuna, e inayap daio sia ya ongain iwa kaimakaet diaepena bagu sisi anune tawa.

² Ne onge bagu sisi enapena, ame gapan orup ansena da aton neneta? Ame orup da uon, iwa egenataet aton nenianawa.

³ Amba e ne aton nena nena nagirewa gare bagu sisi nenane tawa menan inayap ya ongen. Iwa ne asiginap aton nega e den warat anuiwanin. Go garewa ame ne ok nega daitonawa ame kaimakaet seana.

⁴ Ok ame seanawa, ne imuna potana sisi kakaru wan enan anu gurana, yaman doge den singin. Ok ame seana bagu sisi

enapen ya sean, go enan anenen anu gurinawa ame e anu yawapen menan sean.

Orup da koewa tapi anu ae ve

⁵ Apan ega da koewa tani menan bagu sisi eneni ame ek inayap di tan, inanap dim da uon. Nop mame gapan e bagu sisi aigap sia enapen menan ya anuivin.

⁶ Ap menan e wae wae nemoro ega apan ame inap tayana ganawan, umap tan.

⁷ Menan endi koewa mega anu ae veane, me imua bibigarep, iwa aigap sia tanewa bagu sisi baware anu posewa dum seta, amba anu tumat ae veta.

⁸ Ap menan ne nanam imaiangin, baigan ega me inap anuiana, warupan baraene me yavep.

⁹ Ok nega daitona seana iwa mega ame iraya yawapen menan tayao wareyao tan. E dim dim ok ame gapan wadiaena iragi anu tayan go uon anupen menan ap anega tan.

¹⁰ E da da koewa muga anu ae veane ne den anu ae veain. E kakaewa ega menan, Keriso anuini gapan, orup koewa mega ame anu ae vean.

¹¹ Seitan paina yaman nimanen aiganup ya dotou aepen menan, koewa mega anu ae veana, iwa Seitan imua mega upen sini nu asik taton.

Pol darine ya bigaren

¹² Ne pa Toroas, Keriso Oit Mega Kakaewa opata gapan wadidiamopen tauana gapan Ayop Iesu nao mega tapen menan tonan ase watap nenen.

¹³ Go ne imuna potana da ae ya en wait wanden, iwa ne nao daitonawa gwanina Taitas ap mepe da ya yawan. Ap menan gaun inamup wan ae vemon at Masedonia angen.

Keriso gamup koewa garawasivin

¹⁴ Go God inap gaun baware waivin! Iwa God nu Keriso den tobob taneni menan, endi Keriso nu naune aen koewa garawasivin. Amba anut kanamawa Keriso inap wandeniwa ame nu gamunup at at iravi senare tau aepen menan God wa agoat nimanowan. Ame kaum tutu dena tutua at senare tau aini mini anut kanama ame tau ainiwa.

¹⁵ Iwa nu God inap tutu dena omaewa iu irinewa ame umap. Menan God inak

ewakewa munine nagirewa amba inak wakaumine nagire den, nu tutunua gapan Keriso anu awain.

¹⁶ Inak wakaumine nagire inamup tutunua ame bop aninkewa mini anune, amba ap gapan borit waiwanum go God inak ewakewa warine nagire tutunua ame dansewa den anune, amba ap gapan inak wariwanum.

Go orup da God nao mega mame taitamepen menan, ame umap uon.

¹⁷ Endi nu, waenapan upi taine mini nu God oit mega une tat garewa aigap warapen ya taivin, go nu God watu enaneni sep nagirewa menan, tavewa gapan, God yamap, Keriso aroewa gapan, waenapan wadidiamuivin.

3

God nōp ewakewa nunen waitoni na-girewa

¹ Ne ap wana menan nu nuk ingane yaunu ao wat bawaramepen anuiwanin, go ap da uon. Waenapan upi ere inayap tauanewa gapan kakaewa muga wadiepen ogewa wat tauane. Upi at ugup amone mu kakaewa muga ogewa e seayana wat amone, at ame nagirewa mu waupamopen menan. Go nu kakaewa nuga ase wadidiamot ogewa e inayap mup ya waivin.

² Iwa kakaewa nuga ase wadidiamot ogewa ame e me di. Ap menan e nu ogewa nugawa amba ogewa ame imunu potanu gapan Guewa Woup Seniwa ok seni wandia, waenapan batnak anu awapen menan.

³ Nu asiginup, ok ame Iesu nu gamunup se watu enen. Amba kagugum gapan ya sen go God me yaibobot wanden ainiwa Guewa Woup Seniwa megawa gapan ok ame sen. E nu kakaewa nuga ogewa ame gwat gapan ya sen go imunu potanu gapan sen.

⁴ Nu nōp ma, God yamap Iesu gamup waivin, ap menan gego da uon, gop ya anuivin, iwa God dim da wani imutuan anu di tata.

⁵ Amba nu waintoni nao mame nuk tainampen men ya waton taivin, go nao mame God anu nimaneni, aro amun nuneni gapan waraton taivin.

⁶ God aro ame nuneni gapan nu, endi, agi mega ewakewa waenapan wadiamopen menan ayamase taintoni nagirewa. Agi ewakewa ame apan iup mega o God Mosis waneni iup megawa da uon go God Guewa agi megawa di. Ap menan God Mosis waneni iupewa ge apan iup megawa wanene gapan bop nuniwan go God Guewa garaet gapan inak nuniwan.

⁷ Amba God iup mega namua gwat semua gapan Mosis kaise seni, ap gapan God oya oya megawa ganasewa den tauen. Ganasewa ame Mosis gine namup enun. Mosis gine namup ganasewa ame auraiwandini, evi uon an tapen tan. Auraiwandini go ap Isurero nagirewa yangut ut ut ya yaviwanumun iwa God oya oya mega amunua yamamu en sisi yaven. Wataget iup namua, koewa nuga garewa bop oisewa ame, God oya oya mega ganasewa den taueni menan,

⁸ endi, God Guewa agi ewakewa nuneni ame God oya oya mega aigap iragen den tauen.

⁹ Iup namua God oya oya den taueni go nu koewa nuga garewa bop nuniwan. Ap menan endi agi ewakewa mame inak nunini menan God oya oya megawa aigap iragen den taueni iwa God yamap wat tamanam nimaniniwa.

¹⁰ Tavewa di, endi agi ewakewa ganasewa aigap iragen den taueni menan iup namua ganat mega enu oaramen.

¹¹ Menan iup namua ganat mega auraen uon an tan, ap menan oya oya mega otu kamontu, go agi ewakewa ganat mega yaibobot wande aiwadata ap menan oya oya mega aigap iragen.

¹² Anu dao nuga inak ewakewa menan, nu eparae den God No Oise Kakaewa wadidiamuivin.

¹³ Nu apan Mosis tani mini ya taivin. Me wanup da ware gine namu use toboren, iwa oya oya ganasewa ame auraen uon an tapen taiwandini waenapan ya yawapen menan ap anega tan.

¹⁴ Go Mosis wataget paua ap tani ap mini endi den Isurero nagirewa imumu muk tobokane wandia menan God iup mega namua batnagine tavewa ya anuiwanumun. Mosis gine namu wanup da ware

use toboren ap umap imumu muk ingane toborane wanumam. Iesu megenat wa pakit aipa uarenepi gapan mu anu awain.

¹⁵ Tave di, endi den Mosis iup seni iam iam muga gapan batnaginiwa, mu imu pose wanup ame ton ae ukum umiwan.

¹⁶ Go Ayop nuga inap entanepi imumu watapeta.

¹⁷ Ayop nuga ame God Guewa di. Amba God Guewa wat vetaniniwa.

¹⁸ Ap menan, nu iravi ginan namun ya toboratoni menan, Ayop oya oya megawa, ganat bawarewa ame, nu potanup wandini gapan waenapan wa ewamuivin. Gare Ayop Guewa nu inak nuga wat entan nimaniwan me guegue mega umap tat, amba oya oya ganasewa ame aigap aigap usenagaet warivinain.

4

Nu God kakae guragut unup gwanapewa

¹ God bagu sisi inanup anuni menan nao mega nuneni wara tainton, ap menan gop ya yaginiwan amba nao ame ae ya veait.

² Nu inak koewa umamu denawa karaua da ya tainton amba ebo aopan gapan den uon. Amba den God nop mega nuk anuintoni gapan entan wantan ya tainton. Go nu yonaton, God yamap, God nop mega tavewa namuga kain kain ase diamuivin, amba den nu guegue kakaewa nuga waenapan ase ta ewamuivin. Iwa mu imu pose gapan asigimup tanepen menan.

³ Go God No Oise Kakaewa wadidiamuintoniwa go orup upi ya anuiwanum iwa mega ame mu God inak mega wakau mane nagirewa menan imu pose ukum umen wandia.

⁴ Imu pose ukum umen wandini iwa piup ma ayopewa, Seitan, mu imumu toboren, Iesu ya anu tumasepen menan. Mu Iesu yavepiwa, God den yawain, iwa Iesu God umap tan. Menan God No Oise Kakaewa ganasewa, ame Keriso oya oya megawa, mu ya yao anu awapen men Seitan imumu toboren.

⁵ Menan oit kakaewa ame nuk nunan ya yonaton wadidiamuivin, go nu Iesu Keriso Ayop nuga ta waiwandini ap oise wadidiamuivin. Amba nu e nao nagire egawa, Iesu menan taitoniwa.

⁶ Iwa God mek anega wan, "Sisip arewa ganat tau aep." Endi God daiton ap sia wan, ganat mega potanup ta barae ganase wainiwa. God ap tani menan ganasewa ame gapan God oya oya mega Keriso gamup taueni yao anu awai.

⁷ Kakae guragut mame God inap waraton, potanup wandia. Go potanup unup motok gapan tane gwanewa mini. Ap gapan nu ma anu kakayatait, ame aro amun iragenawa iravi God inap tauen, ame megawa di, go nu inanup ya tauen.

⁸ Menan, itan ugup ugup yavivin go ame ae ya am natanen. Wam da da anu waramasivin go ae ya veat anuivin.

⁹ Waenapan aruga ta koeragam nimaniwanum go God ae ya venen. Sigel nunane, den guranene geaneton go borit ya waton.

¹⁰⁻¹¹ Menan wam wam pot pot, Iesu bop mega yauyasewa warat etunup baraet amba yoninton. Ap menan nu pot pot Iesu menan bop nonokap tauinton, ap taintoni gapan waenapan Iesu inak megawa nu ugung wapinup gapan yawiwanum.

¹² Ap menan, e inak yaibobot warapen menan nu bop nonokap tauinton.

¹³ Apan da wataget di God nop mega semua manega ok sen,

Ne God inap anu tumasena menan me nop mega waivin.
Guegewa ap umap sia, nu den God anu tumasintoni menan God no oise waivin.

¹⁴ Iwa nu asiginup, ame Ayop Iesu boeni God sia wat inakamen ao yon warden. God Iesu wat inakameni, ap mini nu borit watawa den wat inakam nimaneta, amba nu iragi tambune aep God namup yonait.

¹⁵ Wan dim dim aru mame iravi, e kakaewa ega menan, ap gapan waenapan arugataet mek arugataet God wat aipakam mega garaetawa menan God aigap wa taragasiwanumain.

God anu tumasintoni gapan inivin

¹⁶ Nop ma tavewa venasepen menan nu gop ya yaginiwan amba God nao mega ae veapen menan tanda ya anuit. Iwa nu epinu nutu boiwan go nu imunu potanu pot poraet aigap aigap God wat aipakamian.

¹⁷ Endi wam koni mame nu itan bagusisi wat anivin, go ap ago tanini gapan God kakae guragut megawa aigap iragenawa tautanait, ame inanup yaibobot wande aiwadata. Itan bagu sisi ame otu koe amba wam koni otu da megenat inanup wandeta go God kakae guragut megawa ame baware iragen amba wam wam yai-bobot inanup wande aiwadata.

¹⁸ Wan dim dim yavintoniwa wam da uon tata go ya yavintoniwa yaibobot wanumoin. Ap menan nu anu tumat nuga ya yavintoniwa inap barivin.

5

¹ Menan, endi nu asik tatoni ame pi-upa mapa waninitoni gapan nu etunua pa namdat miniwa gapan initonowi. Pa namdat purukaepi ame garewa God pa nuga kimani tu nuneta. Pa ame waenapan tune mini uon go yaibobot wande aiwadata.

² Menan endi etunua pa namdat miniwa gapan inintoni menan wawa sisi taivin iwa pa nuga kimaniwa serarat warapen menan anuivin.

³ Tave di, nu etunu ewakewa nunepi gapan nu gan gorogot mini wat enait, ame gapan nu nin aroga mini ya waninait iwa nu guanu etunu ewakewa den wat enait.

⁴ Menan endi etunua pa namdat miniwa itan nataniwandini menan nu wawa sisi taivin, iwa mega ame etunua pa namdat miniwa serarat ae vepen menan uon go iwa aigapewa ame etunu kakaewa warat anuivin. Ap warata gapan inak yaibobot bop am tatnageta.

⁵ Mame iravi God namu ta ewanen amba evi venasepen menan paua mega Guewa Woup Seniwa watu en nunen.

⁶ Ap tani menan nu wam wam epara di taivin iwa nu asiginup, nu etunua, ame pa nuga mini, gapan inivin ap menan nu Ayop pa mega, aupa kimaniwa, gapan den ya inivin.

⁷ Go nu inat waninet nuga anu tumat gapan inivin ame yamanu ase yavitoni gapan uon.

⁸ Menan nu kin kin tat, iwa evi amba etunua piup mega ae veat anet Ayop tanat, pa megawa gapan den waninet anuivin.

⁹ Menan nu etunua gapan mapa waninait o aupa kiman gapan waninait, ame nu epara tat God imua bibigarepen menan tainait.

¹⁰ Iwa nu iragi wanene tanepen menan Keriso namup yonait. Pipa wanineton anenen taitoni ame garewa mega kakaewa o koewa warait.

Keriso gamup God evenan di taivin

¹¹ Ap menan Ayop viriwa anuitoni menan nu waenapan iravi entan me inap tauapen menan wadiamuivin. Nu imunu iravi God anuitameni gapan e den nu imunu anupen menan anuivin.

¹² Ap watoni gapan nu nuk kakaewa nuga inayap ao ya warivin go e wadidiaet amba nu atonunu anupen menan. Ap gapan, e gare, apan apan taine nagirewa waddidiamone mu etumua kakaewa menan ya tapen go imumu potamu kakaewa menan tapen, nop ame mu anu kakayasepen menan.

¹³ Nu bumbawam tainantawa ame God menan tainait. O ianu tamana wandepiwa ame e kakaewa ega menan wandeta.

¹⁴ Keriso nunan anu gurini gapan kwayup taniwan. Menan nu endi mame di anuivin, ameme daiton nunan iravi boeni menan, me gamup, nu inak nuga namua gapan den borit waton.

¹⁵ Keriso, nunan boeni amba nunan sia yon warden, ap garewa menan nu iravi nuk nuk anutoni ya tainait go me dim da anuini megenat gapan di tainampen.

¹⁶ Ap menan, endi wam koni mame use aeniwa gapan waenapan piup guegue muga gapan sia ya enu yawamoit. Namua nu Keriso etua piup guegue mega gapan enu yawam waton go endi ap sia ya enu yawam wait.

¹⁷ Ap menan waenapan da da imumu entan tane Keriso den tobob tane gapan mu imumu ewakewa gase di tauen, namua uon tan.

¹⁸ Ameme iravi God anun venasen. God Keriso gamup baigan ware nimakanup baraen. Nu me anavi megawa go ap tani gapan me evene wai entan nimanen. Ap tani amba nao nuga nunen, ame nu

waenapan iravi, me baigan noa gapan, entan mumet God mu evene wai diamopen menan.

¹⁹ Baigan noa ame, God, Keriso gamup, waenapan iravi, me evene wai wanumopen menan entan mumiwan. Amba Keriso taueni gapan, God waenapan koewa muga den ya anu batnagiwan. Endi baigan noa ame nunen, nop ap gapan waenapan iravi ansenawa gapan entan ta God evene wai wanumopen menan negin ame anu kakayatain.

²⁰ Ap menan Keriso baigan mega noa wainampen men watu enanen, ap me menan God nu gamunup enan ven waiwan. Keriso menan nanam imaivin, God den baigan nonup ta wanien, ap gapan me evene waiwa entan imaeta!

²¹ Keriso me koewa da ya tan, go nunan God Keriso wat entanen amba koewa apanewa mini tan, ap gapan nu Keriso gamup tamana tanen.

6

God menan ugu vegaek bagu sisi anu tanait

¹ Nu God nao mega taitoni gapan, anega nanam imaivin, God garaet mega eneni mondi aipa ya uarenapen go e danamepen di.

² Iwa God anega wani anun,
“Ne imuna warini wamewa gapan mup
ega anun.

Wat inakam imaena wamewa gapan ne ta
warit imaen.”

Ap anega wan. Menan ne wapena anun, wam endiwa mam God imua wareni wamewa, amba inak kakae guragut ewakewa om ineni wamewa endi mame.

³ Inak ame warapen menan nu orup da da negin muga tobob wabot ya tainton, ap gapan Keriso nao mega taintoni orup da ebo tat da ya di dianeta.

⁴ Go gare, nu God ago mega nagirewa menan, imunu bibiga gapan itan bobon wam wam di wat onaninton. Itan bobon ame bagu sisi kaimakaet, itan ugup ugup wam wam yavinton.

⁵ Waenapan gut kokoeam nimanen, gwat nokap seanan, arara babara wan tane gapan siget waraton. Nao tainton gapan

mum da da aup ya ininton amba wam wam da da enup aranen.

⁶ Nu God nao mega nagire gueguewa gapan waenapan ase ewamuinton. Gueguewa ame, Guewa Woup Seniwa gapan, nu imunu woup seni gapan koewa ya tainton, God nop mega anu kakayasinton, imunu ae wabibigamet tainton, waenapan munan bagu sisi anuinton,

⁷ anu gurat nuga tavewa gapan tainton, amba tavewa megenat wadidiamuinton ame God aroewa gapan tainton. Nu inat waninet tat nuga tamanawa ame nu ita gaut vesi nuga iragenawa di, ame naninu nutup ge senip megawa.

⁸ Iwa wam da virinu taiwanum, wam da anu baitam nimaniwanum, wam da nu kakae dianiwanum, wam da koevet dianiwanum. Nu wam da ebo aopan nagirewa dianiwanum go nu pot poraet tavewa megenat waitoni di.

⁹ Waenapan upi nu nao nuga ya asigimup tane go God me asigip tan. Borit wapen tat wan go yawan, nu waninan. Ta koeragam nimanen go ya borit waton.

¹⁰ Nu bagu sisi anuintoni gapan aton tainton. Nu kayakayawan taton go waenapan aruga anu tumat gapan puraput nagire umap entan mumaton. Nu pokanuet di go wan dim dim iragi umanup taiwandin.

¹¹ Ae, tatan gwanin, Korin nagirewa! Nu imunu potanu enan ase watapeton. Nop nuga aroga wadiaeton, karaua da uon.

¹² Menan nu potanu enan ya toboraton go enan di anu gurivin. Go e gare nunan ya anu guriwanin.

¹³ Ne otun waina umap wadiaivin. Potaya nunan di watapan!

Ya anu tumasine nagire den ya waninet

¹⁴ God ya anu tumasine nagire den ya waniene. Anenen amba koewa taini ge kakaewa taini at daiton wanumoin? Anenen amba ganat ge mum at daiton wanumoin?

¹⁵ Keriso ge Seitan anut muga daiton da uon. God anu tumasine nagire amba ya anu tumasine nagirewa mu anut muga ugup ugup, daiton da uon.

¹⁶ Amba den sia, God pa mega gapan guewa nanip kaitane god ugup ugup den ya wanumoin. Iwa nu God wandini pa megawa di. Me anega wani,

Ne waenapan den iningain amba yau makamup ap ingain.

Ne God mugawa amba gare mu ne waenapan negawa venat mutain.

¹⁷ Ap menan tandayat nimanegene na girewa ae vemo,

aise at da ugup wanien.

Amber koewa muga da ya warane, ap tane gapan ne gare waup imayain.

¹⁸ Ne e Mamaya di waingain, amba e ne orup tasin negawa di wanien. Aro amun iragena Ayopewa ap anega waiwan.

7

¹ Evenan waina kakaewa, wa agi ame God inap waratoni gapan, menan koewa da epinu ge guanua ae wat bigim ni manepi ae veat nu nuk tata kakayat tat. Nu inat wainet nuga gapan woup am ae se kakayasep, iwa nu God viriwa taivin.

Pol aton taiwandiniwa

² Imuya potaya iragi nunan ase watan pan. Nu inayap koewa da ya taton, da ya wa koeam imaeton, nu da ebo ya nanam imaeton.

³ Enu yawaepen menan ne ame ya waivin iwa wataget wana endi sia waivin nu enan anu gurintoni menan kasiga wanineta go borit wata nu enan di anu gurinait.

⁴ Ame, God men aigap taiana menan ne di anu imaivin, amba den e kakaewa ega waenapan yamamup waingina. Itan bagu sisi baware inanup tauowan go gop tap da uon, ne aton aigap da di waringin.

⁵ Ap gapan, nu Masedonia tauatoni nu wagat da ya waineton. Go inan mainen iragi keam kuyam yon koeamen, etunua gapan arak maken warinton go imunu potanu tap gop anuinton.

⁶ Go itan ugup ugup warine nagirewa God wa kim muminiwa menan Titus watu eneni gapan nu den wa kim nimanen.

⁷ Me taueni megenat gapan ya wabigam tobigam tanen, go e oit ega den wadianeni menan aton aigap anuton. Oit anutoni

ame, me imua wa kimeana gapan e koewa ega menan bagu sisi anuiana amba ne nan anu gurianawa menan yawanegepen anuiana oisewa wadianen, amba ne inak nega dan enut anuiana menan ne aton da di anuivin.

⁸ Ok daitonawa inayap seana menan e bagu sisi anuyan. Watu enana wamewa gapan ne kaiwan wan go endi umap di waivin. Ok daitonawa nega batnageana gapan anu sisimean go ame wam otu da megenat.

⁹ Anu sisimeana menan ne aton ya anuivin go God yamap anu koewa ega ae veayana men aton anuivin. Imuya gapan anu sisimeana gamup God inak ega wat tamanamen. Menan nu ok ame gapan e ya wa koeam imaeton, amba e dim da da ya wakaumean.

¹⁰ Iwa anu sisim egawa ame God anu imaeni gapan anu sisimean. God ame anuini inak ega wat entanen, wat in akam imaeopen menan tan. Ap menan kaiwan baiwan da ya wai. Go piup anu sisim megawa waenapan inamup tauiniwa, ame kakaewa da ya venaseta go naune aep bop nonokap tauait.

¹¹ Menan God anu imaeni gapan anu sisimeana menan guegue kakaewa ugup ugup venasen. E inak ega anu tamanamepen menan gari gangan amba tap seke take tayan, imuya potaya amun doren. Menan e tamana di tayan. Ap menan endi e koewa da ya tayana oisewa kaimakaet waiwanin.

¹² Ne ok daitonawa ame inayap seana iwa mega ame koevet tani apanewa menan uon o bagu sisi anuni apanewa menan ya sean. Go God namup yonan ek ase anun, e kwayupanu kakaewa anenen taiwanian, ap menan ok ame sean.

¹³ Iwa ap menan nu epinu wa kim nim anen.

Ap megenat uon go apan Taitas aton mega yawatoni gapan aton aigap den sia anuton. Me aton taiwan iwa tanae wande guegue ega yaveni imua veturen.

¹⁴ Ne namua Taitas inap enan wa namurasingina amba me ase yawaeni gapan me nop nega umap wan. E asiglap, nu dim dim wadiaetoni ame iravi tavewa

gapan, menan ap umap atonuya watoni den tavewa tayan me yawaen.

¹⁵ Menan me imu pose aigap sia inayap wariwan, iwa me inayap taueni gapan e ta nini den waupayan amba nop mega anu tayana menan Taitas imua inayap ya borasen.

¹⁶ Ap menan ne daramuna waia, iwa gego da uon, di anu dao imaivin.

8

Keriso mega nagirewa ago tamo tamo

¹ Amba tatan gwanin, God yan mega garaet ian Masedonia anu tumat nagirewa muneni, e di yao asik tapen menan anuivin.

² Ame, mu itan bagu sisi aritavet inamup tauen, mu iragi kayawan tane, go mu potamup aton aigap iragen bararaeni menan mu yan tan munane.

³ Ne yawamona, mu daiton daiton muk puraput muga omewa gapan gapan yan tan munane, upi aigap sia munane.

⁴ Amba sia, Masedonia nagirewa, mu at Diudia, God nao mega taine nagirewa wat agoat mumapen menan nanam nimanen, kaimakaet anega dianene, "Atonanu anu nu den yan se munat," ap anega waiwanumun.

⁵ Go nu tat anutoni gapan ya tane, go aigap tane, iwa mu inak muga yan sean namu God wanane amba evi nu nunane, God anuini gapan.

⁶ Apan Taitas erewa gapan e inayap yan ega muna muna bongamepen menan nao erewa to bunen. Ap menan nao kakae mame taitamepen menan nu Taitas namanaseton.

⁷ E endi dim dim gapan iragi umap taen, ame anu tumat gapan, opata wapen gapan, i guine anut kanamawa gapan, wat agoat mumapen gapan amba nunan anu gurat gapan. Go endi yan asenagaet muniwaniampen menan den taiwanian.

Iesu guegue nunan taiwandin

⁸ Ne waingina e ase di munapen menan kaimakaet ya waivin, go ne mondi baigan ega ire yawapen menan waivin, waenapan upinewa ago tamo tamo om inaen go?

⁹ Ayop nuga Iesu Keriso garaet wat aipakam nimaneni e anuyan. Ameme

kiman kakae guragut mega wareni apanewa go enan kayawan tan. Me piup ma taueni gapan kayawan tani iwa e puraput nagire umap waniepen menan tan.

¹⁰ Ne endi e anenen ta ta mega wa ewayain. Ame bodu wata ewanup aeniwa, e namu iragen puraput yan se munapen anuyan, ap megenat uon go imuya nao waren gapan taiwanian.

¹¹ Ap menan, endi nao ega erewa to bunayana ame taitamen. Anenen tat anuyana ap gapan munan tane, om inep.

¹² Iwa munat anunewa God e puraput ega omewa gapan munane ap gapan kakaewa ega batnagiwan go uoni ega gapan ya batnagiwan.

¹³⁻¹⁴ Ne imuna wandiniwa, ame waenapan itan muga e ya warat anu imaivin. Go inak kakaewa tapen menan anuivin, ame ae ao ya wandepen menan. Inak kakaewa ame endiwa puraput inayap aruga yon koeameni menan wat irane nagirewa ago munai. Ap tanewa, wam evi da e inayap wat iranewa mu ago gare ma enain. Ame gapan ae ao uon go mu inamup ge e inayap gine om om taueta.

¹⁵ God nop mega ok anega seane, Taba baware bongamene nagire bondan ya baraen.
Amba otu dere bongamene enup ya aramon.

Apan Taitas watu enane

¹⁶ Ne God inap gaun waiangin, iwa Taitas imu pose gapan ne enan anu guringina mini, me enan anu guriwandin.

¹⁷ Menan nu Taitas e inayap, pa Korin, aepen diatoni go aigap mek enan onet anu guren.

¹⁸ Nu apan da den watu enat oneta, God dugup mega at at iragi wanumuine, apan ame atonua wainewa, iwa me ago tan waenapan God Nop Oit Mega Kakaewa wadidiamuiniwa.

¹⁹ Amba aigap sia, Iesu dugup mega nagirewa, at at iravi gapan, nu den tautanan ap anepen menan apan mame om enune. Ame gapan, Iesu yaua ao warait iwa yan garaet nuga gapan waenapan wat agoat mumapen menan anu taintoni menan.

²⁰ Nu mame kara karaua taivin, waenapan diguguranepi tawa. Ap menan puraput aruga mame yaemantu yan se munait, iwa orup da puraput upi nuk nunan wat natat anu nimanepi tawa.

²¹ Menan God yamap megenat uon go waenapan den yamamup tamana di tainampen.

²² Amba apan da sia mu den watu enamuivin. Apan yampa mame negin ugup ugup gapan kakaevet taiwandini yavinton, menan me ago en ge en di taiwandat anuiwan, iwa enan imua ae wat kakayesen.

²³ Apan Taitas, ne me penan yamunewa, me e wat agoat imaepon navewa daitona den taintoniwa. Amba apan dere upinewa ame, at ma Iesu dugup mega nagirewa, watu enamuiwanum, ap gapan Iesu yaua ao wariwanum.

²⁴ Ap menan, baigan ega ase ta ewamone, yave anup. Mu Iesu dugup muga nagirewa den anuin. Ap gapan wa namurat imaepon oitaya wadiamotoni mu den tavewa ame anu awain.

9

Kuristian nu gare gare ago tainampen

¹ God waenapan mega at Diudia gapan puraput munapen noa gaseget anuyana menan aigap sia ya wadiain.

² E ago tat anuiana, ne asiginap, ap menan atonu den oitaya Masedonia nagirewa anega wadiamuingina, "At Guris anu tumat nagirewa bodu wata puraput bongam bongam ta munapen menan umap da tane." Oitaya ame anune gapan mu iragi ni gwane ao tan puraput muga den yan tat anune.

³ Menan anu tumasine apan yampa mame, inayap watu enamuiangin. Ap gapan atonu den oitaya diamona ame nonuaet pokaet ya wandeta go ne wanta tavewa tauapen menan namu puraput ega bongamen, amatamu tan.

⁴ Go e bongam bongam da ya tan amba wanienewa, amba Masedonia nagirewa tautananek yawaepen menan inayap onamopiwa, umam wa guguraneta iwa kakaewa ega menan kaimakaet yonatoni menan. E den umam wa guguraeta.

⁵ Ap menan apan yampa mame namunap onamoin, puraput munapen menan agi wayana ame namu bongam siwanian amba ne tauain. Ap tatawa, waenapan ek imuyap gapan anu seayana anuin.

Atonu den munine nagirewa God imua waren

⁶ Nop ma anun, 'Orup da antaba naewa otu dere verepiwa, maup tauep matakamepi otu dere matakameta, amba orup da me taba naewa arugataet verepiwa, maup tauep matakamepi, me tavewa arugataet matakameta.'

⁷ Ap menan, e da da ek imuya potaya warepi gapan yan tan munan, goandage den ya munane. Nu nanam imaepon menan ya munane. Iwa atonu den munini otua God menan anu guriwan.

⁸ Ap tanewa menan, God aigap aigap sia wat aipakam imaiwadata. E dim dim iragi waenapan ago munapen menan e anuiana ame gauarap, go me aigap enep amueta.

⁹ Nop mega ok anega sean,
God me yan taini apanewa. Kayakayawan taine nagirewa,
wan dim dim kakaewa ugup ugup mek anuini gapan muniwan.

Me kakaewa mega wande aiwadata.

¹⁰ God antaba naewa verine nagirewa munini amba taba nuga den nunini apanewa. Menan waenapan ago aigap munapen menan e puraput ega aigap aigap wat bawarameta. Ap gapan yan aigap se munai.

¹¹ Baware yan se munane gapan kakae guragut ugup ugup inayap taueta. Amba sia, yan ega arita ame nu tambu munatawa mu God inap gaun wain.

¹² Menan e ago ega mame tane, God waenapan mega kwayupe megenat ya taiwanin go aigap sia waenapan iravi God inap gaun muga no arasen gemiwadata.

¹³ Iwa puraput munane gapan waenapan iraya yawain amba God wa atonasiwanumain. Iwa Keriso No Oise Kakaewa anuyan ayamase taiana menan amba den puraput ega bawarewa yan se at Diudia nagirewa munat anuiana menan.

¹⁴ Amba mu enan mup waiwanumain iwa God garaet wat aipakam mega kandae imaini menan.

¹⁵ Menan God yan aritavet nuneni da ya batnak itam itam mini. Yan aritavet ame God garaet wat aipakam mega Iesu gamup nuneni. Ap menan God inap gaunewa wapen.

10

Pol nao mega tantanewa taiwandini

¹ Apan upi nenan anega wane, "Me nu den wandini nop ayamat bibiga taiwan. Go mawanup at da wandepi ok mega kaimakaet inanup enuiwan." Ap anega wane, go ne Pol Keriso wabibigam mega ge en baigan megawa gapan

² yaema manega wadidiaivin. Go waenapan upi ne evenan waina den piup guegue mega gapan tainat, waiwanum. Ap menan ne kaimakaet diamot anuivin. Go ne tauapena e kaimakaet diaepena tawa menan yambuni wanien amba imuna wat bibigamen.

³ Tave di, nu piup ma gapan inintoniwa, go piup ita anan guegue mega gapan ya taivin, ame uon di.

⁴ Go ita gaut nuga aroe den iwa God ita gaut mega aroe amunu dena tambuton gapan anan taivin, piup ita gaut mega mini da uon. Ap gapan anavi pa mega eparaewa wat momak ae veait. Anavi pa mega ame wadiamot eboewa,

⁵ amba apan apan taine nop mugawa. Dim dim iravi mame God inap tauapen neginewa tobolini menan nu wat momagait. Amba anut ugup ugup iravi tambut Keriso ayamase tapen menan wat entan mumait.

⁶ Waenapan da da Keriso nop mega ayamase ya tapiwa nu wae wae nemoro munapen menan waninait, go namu iragen e nop mega iravi di taitamen.

⁷ E wan dim dim aroga irewa ase yaviana gapan enu yawayan waiwanin. Menan e upi anuiana e egenat Iesu wae-napan megawa. Go sia anun, iwa nu den Keriso megawa.

⁸ God amun mega nuneni menan ne aton aton otu da aigap taivin go uon ne oare, go ap menan umam ya anuivin.

Iwa God amun mega ame nuneni e wat kaimagamepen menan nuneni, e wa koeragam imaepen menan uon.

⁹ E ok nega yawan tana anupen menan ok ya sean.

¹⁰ E upi anega dianegai, "Pol ok megawa kaimakaet itani den go inanup tauepi aroe uon amba den nop mega amunu uon."

¹¹ Ap waine nagire ma anu avep, nu ok inayap sitoni gapan anenen amun yaviana amba inayap tauatawa wadideta nop nuga amunewa ame gine daiton yawai.

¹² Endi waenapan upi muk atonamu waine amba mu muk om tane gapan muk ingane enu yawane waiwanum. Ame pokaet! Mu i guine uon! Go mu anune mu bawarewa nu bawarewa uon, menan nu anenen amba mu om muga inait? Ame umap uon.

¹³ Go nu, atonanu arita da ya wait, go God paua nunan tani omewa gapan atonanu wait. Ame God nao mega nuneni amba me nao mega nimakayap taitoni oisewa megenat atonanu wait.

¹⁴ Ap menan, nu Keriso Oise Kakaewa wat inayap onantoni gapan God paua nunan tani ya yamaseton iwa e God paua nunan tani gwanapaet di waniasi.

¹⁵ Ap menan God nao taine upinewa mu atonamu ya wait iwa mu paua nuga garipe taine menan. Go gare e anu tumat ega kai ware amba e gamuyap nu God nao mega aigap tainampen anuivin go ap me den God nunan paua tani gwanap tait.

¹⁶ Ap gapan nu at egawa amba utupagan wanumuine nagirewa Keriso Oise Kakaewa den wadidiamoit, iwa ap mepe orup da Keriso No Oise Kakaewa opata gapan da ya wadidiamon.

¹⁷ God nop mega ok anega seane, Orup da wa namurase taiwandat anupiwa, me Ayop dim da tani wa namurasiwandalan.

¹⁸ Ok ap anega seane iwa orup mek om tan ingane umap wan taini apanewa menan God atonua ya waiwan, go God om tan umap wani apanewa menan atonua anun waiwan.

11

Iesu tave uon waine nagire noa

¹ Ne inak otu da ta bambamasepena, ap ya anu go imuya bibiga gapan anu nimanegen. Kaiwan nenan anun.

² Ame God goandagaya wani ne ap umap sia goandagaya waivin. Iwa e aruga go ne orana daitonawa, waenoro kakaewa ini denawa, tamaru naitapen menan ne agi wana mini. Tamaru ame Keriso me di.

³ Ap menan tap anuivin iwa imuya Keriso inap wariwan. Go Seitan, namu iragen, mokare gwanap taue inanu Ivi ebo aopan gapan wabambamaseni ap umap e inayap taue, e anu gurat egawa Iesu inap, wabambam imaepi tawa menan anuivin.

⁴ Ap tawa taivin iwa apan upi inayap tauane, nu Iesu wa ewaetoni ae ve mu Iesu oise da ugupe eboewa wadidiaene, go e nop muga ameme menawaet warapen taiwanin. Ap gapan God Guewa ge Nop Oit Mega Kakaewa wadiatoni ae veayan guewa ge nop oit da ugupewa wadiaene e imuya anu warapen menan anuiwanin.

⁵ Muk anega wane, “Nu Iesu watu enamot mega aigapewa,” go ne Pol gauaramup uon.

⁶ Anse, ne nop nega dansewa mega arita da uon, go anut baware di waran. Mame gaseget di e asigiap, iravi namu aroga di wa ewaetoni.

⁷ Ne erewa gapan God Nop Oit Mega Kakaewa wadidiaina ame garewa moni inayap warapen menan ya tan, go e bawarewa tapen amba nek yauna wat otutamepen menan tan. E anuianawa inak koewa da tan go? Ae, ne umap di tan.

⁸ Amba den, e ago enapen menan Iesu dugup mega upinewa inamup garewa nega warana gapan ago enana. Ame mondi up mini da tan, e ago enapen menan.

⁹ Amba e den tanae waingena, wan dim dim anuinginawa menan inayap mup da ya wan go Masedonia nagirewa tauan wat agoat nimanegen. Ap tana iwa itan enapena tawa. Wataget, endi amba usenagaet den, dim dim inanap umap uoni ap mupe inayap da ya wain, menan itan da ya enain.

¹⁰ Menan, tavewa di, Keriso nop mega tavewa potanap wandini gapan, orup Gurik da, at ma gapan, wa namurasena nopewa mame ya amboreta.

¹¹ Iwa di menan ne tumayap ya inivin? Iwa ne enan ya anu gurina menan go? Ae, God me asigip, ne enan anu gurina di.

¹² Ne endi inayap moni da ya warana, iman map anega di tanau angingain. Iwa Iesu men ebo waine nagirewa anega atonamu ya wapen menan, “Pol, evene wai den guegue ap taine gapan nu den taivin.” Iwa mu inayap moni wariwanum.

¹³ Menan mu Iesu watu enamot mega da uon, nao ame eboewa warane taiwanum. Muk wat entanene, Iesu watu enamot mega mini tat wane taiwanum.

¹⁴ Mame gapan nu seke ya tapen, iwa Seitan den wat entanen, ganat anea mega mini tainiwa.

¹⁵ Ap menan, mu Iesu menan ebo taine nagirewa, ame Seitan ago megawa, go God ago mega kakaewa taine nagirewa umamup taiwanum. Go mame taine menan wam uiwa gapan God nemoro tamota.

Pol Iesu men ugu vegaek mega anupi wa namurasen

¹⁶ Ne namu wadiena, aigap sia di wadiain, da ne bumbam apanewa ya dianegep. Go ap anega dianegenewa, umap di, ek egenat. Ap anune gapan ne otu da aton aton taingain, Iesu menan ebo taine nagirewa umamup di taingain.

¹⁷ God anuni gapan ya taivin go wa namurat nega bumbawam apane mini waivin.

¹⁸ Iwa tavewa uon go waenapan aruga piup guegue mega men aton aton tane waiwanum menan ne den waivin.

¹⁹ Amba den, e ek anega anuiwanin, “Nu dima waitoni nagirewa.” Go bumbawam noa waine nagirewa nop oit muga menawaet wariwanin. Ame anenen?

²⁰ Mu e nao muga tapen menan kaimakaet diaiwanum, ebo aopan gapan kakaewa ega up taiwanum. Mu apan apan taiwanum amba wa koeragam imaiwanum. Iravi ap taiwanum go mu koewa muga e inayap, e ya watanamuiwanin.

²¹ Umame den manega waivin nu bibigawa nagirewa menan koerage ap anega inayap ya taton.

Ne nop ma bumbam noa mini wapena amba, ame orup da me wa namurat mega menan kin kin wapiwa, ne mini kin kin yona wa namurat ta wain.

²² Menan mu, Iburu nagirewa wapiwa, ne den Iburu apanewa. Mu Isurero nagirewa wapiwa, ne mini den di. Mu Eibaraam isimurewa wapiwa, ne mini Eibaraam isimurewa di.

²³ Den anega wapiwa, "Nu Keriso nao mega nagire megawa." Go mu garao munivin iwa ne aigap taingina, nop mame bumbawam noa mini sia di waivin. Keriso menan ne wam arugataet gvat noke angen. Amba gaura bim bim tonek wanumune gapan siget arugataet waringin. Den bop no nokap koni konintu tauingin.

²⁴ Wam koni nani yamunaet, Diu nagirewa gaut muga gapan apane dere gauarap daiton (39) aranegen.

²⁵ Wam koni yampoo gapan Rom nagirewa gaut bunum gapan tonegen, amba wam daiton gwara tonegen. Wam koni yampo gapan ne kabum gapan angingina, kabum dum dam wan puiman umanegepen tan, wam ap gapan ne wam daiton, mum daiton puiman kainto to naunek iwandin.

²⁶ At at ugup ugup angingina gapan kaum ningoe naunek ae ae, up nagirewa tonek tonek kavianap ingin, amba dugup nega Diu o Diu uoni nagirewa tonek tonek kavianap garawasingin, amba den pa, pu, puiman amba Iesu dugup mega pokaet waine nagirewa, ma iravi tamu taingin.

²⁷ Ap gapan, ne nao kaimakaet taingina ugun wapi, ae torot waiwandin, den ne aup in in kakayat da ya taingin, amba den, enup at naunek iwandin, megana ae pakaraiwandin, taba nana kakayat ya taingin, den ugun wapin aroga gapan irot ponka ae waranek iwandin.

²⁸ Inak aru mame gapan, itan nega aigap sia ame Iesu dugup mega nagirewa menan itan natanegiwan.

²⁹ Ame gapan, orup da me nutua ae bigarepi, ne den nutuna ae bigareta, amba

orup me koewa tapiwa, ne potana yagiriwandata.

³⁰ Ne namun warawat ta wapenawa, ame wan dim dim nutu uon waina yawapen menan namun warawase ta waingain.

³¹ Ne ebo ya waivin, ame God nuga, Iesu Mamewa, me asigip, me yaua ao warinampen!

³² Pa Damaskas gapan waingena, ayop muga apane yaua Aretas, waranegepen menan tonana gopat tapen menan ita nagirewa diamon.

³³ Go apan ame waranegepi tawa menan, evenan waina kaenat da potap wat enanegen pa didia, taik tonanewa, damik gapan antaben nimanegene, vitan tap angen.

12

Pol bet ine yaven

¹ Ap gapan, ne nek wa namurat sia di ta waingain, go ame gapan dim kakaewa da ya tautanain. Go bet inan yawana Ayop yo ewanegeni gapan noa endi wain.

² Ne Iesu anu tumasini apane da asigip tan, me bodu aonagaet pusinawan degede (14) ewanup aeni gapan, God wat nau dot ae kimani aigap iragenawa gapan baraen. Tavewa dot aen o bet ine yaven, ne oare go God anuiwan.

³ Wat nau dot aeni at yaua Paradaisi tauen apan ap me ne asiginap. Go tavewa dot aen o bet ine gapan yaven, ne oare, God megenat asigip tan.

⁴ Me dot aeni, wan dim dim ni enoa mega iragi ap mepe anuni go piup nop nuga gapan wa wa umap uon, iwa kakae guragut mega aigap iragen.

⁵ Menan kimani aeni apan ap miniwa ne wa namurasingain, go nek ingane kakaewa nega menan ya wa namurase taingain, go ne nutun ae bigareni menan megenat wa namurase taingain.

⁶ Go nek ingane kakaewa nega wa namurat taingapena ame ne bumbam ya ta amba wain, iwa ne nop tave tavewa gapan wa ge se angain. Go nek ingane ya wa namuratain iwa waenapan wa ge tat nega yawane ap omewa gapan wa atonat

nimanegipi ame umap, go aigap sia ne tanda.

⁷ God kakae guragut mega kimani yawana menan, imuna baware iragen ya yon wandepen menan Seitan sep mega ganongae vege anuine mini wapinap tauen. Apan apan baware iragen ya tapen menan vek ame ae antapen nimanegipen men taiwan.

⁸ Ap menan, wam da da gapan, koni yampo megenat, itan mame inanap taueni wat pakit aipa uarepen menan Ayop inap mup wan.

⁹ Go me anega gare wadianegen, "Garaet wat aipakam nega genana ame umagap di, ap menan dim da da menan yop ya ta. Ge nutuga uoni gapan aro nega wat bawaramivin." Keriso me aro mega ap anega neniniwa menan ne nutuna uoni gapan wa namurat taingain.

¹⁰ Amba sia, Keriso menan ne aroe uon waingepena ame umap. Nipep dianege ta koeragam nimanegipi, wam koewa wat iringapenawa, vek bagu sisi ame anu sisim nimanegipi, itan ugup ugup arita mame iravi inanap dim dim da uon iwa Keriso menan. Iwa ne nutun ae bigareniwa, wam ameme gapan ne aroyan den di waingain. Ame Iesu aro neniniwa menan.

Pol pa Korin nagire munan anun

¹¹ Ne nop waingina bumbam noa mini waingin, go ame e dianegeana menan di ta waingin. Go gare e ne yauna ao warapo, go e ap ya tayan. Apan upi aopan anega wane, "Nu Iesu watu enamot mega aigapewa." Ne bawarewa uon go den ne gauaramup uon.

¹² Ap gapan, ne e den tanae waingnawa, ne yaentuk mantuk waingen amba kimani yo paua ugup ugup nimakayap taingina e yawayan. Ap menan, ne Iesu watu enamot mega da, wa ewamopen menan paua tana.

¹³ Amba dim dim iravi Iesu dugup mega ugup ugup gapan inamup taingina, e inayap den tan. Go daiton megenat wakauman, e inayap garewa ago nenapen menan mup ya wan. Menan koewa nega anu ae vean!

¹⁴ Amba endiwa mame, daio nega yampoa inayap ongepen menan taivin. Tauapena itan da ya enain iwa e enan ongain, go dim ega nenapen menan ya ongain. Iwa orup otua ine mame kwayupamu ya ta dorep, go gare ine mame yone, orup muga munan kwayupamu ta dorep.

¹⁵ Menan e mamaya mini wan dim dim nega iragi ise enain, nek ingane den ise enapena den di. Ap tapena menan gare anu gurat ega ne inanap ae viseta go?

¹⁶ Ame umap go ne itan ya enana ame tavewa di umap waiwanin. Go orup da anega wata, "Pol ebo ewaen wabaige baige taet anu imaiwan."

¹⁷ Ame ansena da ap anega tan? Ne sep nagirewa da da inayap namu watu enamona gapan ebo ewaet anuyan go? Uon ne ap anega ya tan.

¹⁸ Ne apan Taitas enan onepen menan dian amba dugup nuga apane dawa den watu enamona. Taitas inayap taueni gapan da ae waboboraen go? Ae, uon. Taitas dere imunu daiton guegue nuga den gine daiton.

Koewa muga tane anu ae veat wan

¹⁹ Wataget namua gapan oneni endiwa den e anuiana nop ma iravi watoni ame nu nuk tantan nuga wapen menan tatoni go? Ap da uon, go nu God watu enaneni menan, tavewa gapan, God yamap, Keriso aroewa gapan, waenapan wadidiamuivin. Kaiwan evenan wainawa, wan dim dim iragi mame taintoniwa ame e ago enapen menan tainton.

²⁰ Ne ame inayap onge onge epina unsit wariwan, iwa onge ame yawaepena ne wainiet anu imaina gapan ya waniene tawa, amba ne wainget anu nimanegiana gapan ya yawanegene tawa. Ne tap anuivin iwa inayap ongepena gapan, e upi digut maken, enu yawagen, ugu gangan, gau agaga, ita anan, nop ani aninke denawa, nop simumut, wa namurat amba pinparat, taiana yawain go?

²¹ Inayap sia tauapena God negawa yamayap wat otutam nimanegipi tawa anuivin. Amba den e aruga koewa ega namua vetavet ya wa koewa ae ya veayana menan enan, irip turup wapena tawa.

Koewa ega ame, waen ge apan wainan gogo ise ta ase ta taiwaniana menan irip wain go?

13

Pol, nop mega uiwa gapan tantan noa wan

¹ God nop mega gapan anega sean, Apan da evene enu yave wat anupi, koewa tani yao anune nagire dere o yampo den yone wap.

Ap umap sia, ne den wam koni yampa aigap sia daio e inayap ongepen taivin.

² Ne daio nega derewa inayap tauana gapan, orup upi koewa tane go koewa muga ae ya veane menan tagigire diamon. Endi ne wandap wanik angina gapan, ne nop mame menan tagigit aigap sia anega diaivin, ne evi tauapena gapan koewa taiana nagirewa e agun anun kaimakaet diain.

³ Keriso amun neneni gapan waingina tavewa ame e yawai, iwa Keriso ne gamu-nape e inayap tapi me aro mega aigap iragen nimakayap venaseta. Keriso nutu uon ya wandia.

⁴ Ame tave di, Keriso nutu uoni gapan oma korosi gagap to endawane, go God amun mega gapan endi inakaen kabani wandia. Ap mini nu Keriso nave taintoni nagirewa den nutunu uon go God amun nuneni gapan enan nao taivinait.

⁵ Ek ingane geanguan tan ae yawan, e gaset Iesu anu tumaseana, om ap di waniasi go? Ap menan ek tayao wareyao tan. Ap gapan Iesu e nimakayap amba potayap wandini anuiwanin go uon? Uon wanewa, ame anu tumat ega gase wakaumeaan.

⁶ Go nu ap ya wakaumeton menan iman yao matakam nimanai.

⁷ E inak koewa ya tapen menan nu God inap mup waivin. Nu mup ap tintoni iwa mega ame nu Iesu watu enamot nagirewa wa ewamopen menan uon go e negin tamana aisepen menan. E negin tamana ya aisenewa gapan ne tauapena go kaimakaet da ya diaepena, menan upi anega wapiwa, "Pol evene wai den mu Iesu watu enamot mega da uon, iwa mu kwekwera," ap wapiwa, ame dim da uon,

iwa inak bawarewa ame e ek inak ega wat tamanamepen.

⁸ Menan gueguewa ame e asigiap, nu God No Oise Kakaewa tobob wabot tapen menan umanup uon go senare tau aepen menan taivin.

⁹ Ap menan nu nutun ae bigarepi wamewa, e aroe den wainiene menan atonaya wait. Go e aigap aigap tamana taiwaniampen menan mupewa God inap waivin.

¹⁰ Iwa ap me menan ne ok ma mawayap siangin, ame menan ne amena tauapenawa amun nega waran taina gapan kaimakaet ya diain. Amun ame inak ega kakaewa ao tu dorapen menan Ayop neneni, e inak ega ae antapenapen menan uon.

Gaun uiwa wan

¹¹ Kaewa kaewa, tatan gwanin, gaun inayap waiangin, aton tan. Wainien nao ega kakaewa ta oitamepen menan taiwanian, anenen tat diaena nopewa di waran taiwanian, imuya potaya daiton tap nonup gapan wanien. Amba God baigan megawa ge nonup megawa inayap wande aiwanda.

¹² Gaun gare gare taiwanian. God wae-napan mega mapa iragi gaun inayap waiwanum.

¹³⁻¹⁴ Ayop Iesu Keriso garaet wat aipakam imaep. God enan anu gurep. Guewa Woup Seniwa e iravi inayap tobore wande aiwandan.

GALESIA Pol ok mega Galesia nagirewa inamup sen

¹ Ma ne Pol, Iesu watu enamot mega apanewa da. Ne Iesu watu enamot apanewa mega tapen menan waenapan o apan da om ya enuneg e watu enane-gene, go Iesu Keriso amba Mamanua God, me wan Iesu bop gapan ao yon wandeni apanewa ame om enuneg e watu enane-gen ongen.

² Amba ok ma gapan tatan gwanin mapa den tanamon waingina ame gaun nuga God dugup mega ian Galesia nagirewa inamup waivin.

³ Amba God Mamanua ge Ayop nuga Iesu Keriso wat aipakam muga garaetawa ge nonup muga inayap wande ep.

⁴ Endi Iesu Keriso me koewa nuga menan boeniwa, ame wam ma endiwa piup ma koewa mega potap initoniwa gapan wat vetanen. Ame Mamanua God enok bambin mega iniwandini gapan di tan.

⁵ Ap menan, God inap oya oya mega ame yaibobot usenagaet di wande aiwadata, Ame umap.

Nop Oit Kakaewa ame daiton megenat di

⁶ Ap gapan God wat aipakam mega garaetawa Keriso gamup wa upae venaya wan, waenapan mega entan imaan. Go endi e menawaet da wat entanean nop oit ugupewa da anu tumat taisian nona kap waia, ame God Nop Oit Mega Kakaewa gapanawa da uon.

⁷ Ne tavewa di wadiaivin, God Nop Oit Mega Kakaewa ugupewa da uon, go waenapan upi wababayen imaiwanum. Mu Keriso no oise kakaewa wat yamu entanene ugupewa da gapan wadiaet wane taiwanum.

⁸ Gosi nu God Nop Oit Mega Kakaewa namu wadiaeton anuyana ap gapan, endi nu go anea kimaniwa nop oit da ugupewa sia wadiaetawa, ame God yaibobot wanene mega inanup taueta.

⁹ Amba den nop oit mame watagaet anuyana menan, aigap sia di wadiaivin. Ap gapan e Iesu nop oit mega gaset anu umap wayana, gosi orup da taue nop oit ugupewa da sia wadiaepiwa, me yaibobot wanene mega gapan taueta.

¹⁰ Endi ne wan taingina waenapan atonuna ya wapen men taivin. Gosi ne waenapan atonuna anupen men wa taingapenawa, ame ne Keriso nao mega taina apanewa uon. Go ne God atonuna anupen menan wan taivin.

Pol aro amun God inap waren

¹¹ Tatan gwanin nop ma wapena ae di anun. Ne Iesu Keriso Nop Oit Mega Kakaewa wadidiaingina mame, waenapan muk iamup anun wane nopewa uon.

¹² Ne nop oit mame wadidiaingina waenapan da inamup ya waran o da ase ma ya wadianegene. Go mame Iesu Keriso mek tamana wat arogam nenen.

¹³ Iwa, ne watagaet inak nega namua gapan ian Diu anu tumat ge guegue muga taingina e oitana anuyan, ame ne yonan pot poraet God dugup mega nagire amboboramon, guramon wa koeamepen men taingin, munan bagu sisi da ya anun.

¹⁴ Nu Diu anu tumat God menan taitoni ame gapan, ne bawarewa tan namu yoyo taingina aigap da taingin, gwep nega daitona da om ya inamon. Ap taingina iwa omayan bae gutut muga wadianene ap ewap anepen men kaimakaet taingina orup da ne umanap ya taiwandin.

¹⁵ Go ne ya yanana gapan, God inak nega namunap oniwandini anu wa watus warden, nao mega taingapen men om enuneg e garaet mega gapan wat aipakam nimanege nenan wan.

¹⁶ Amba God otua nop oit mega ian Diu uoni nagirewa wadidia muingapen men otua Iesu inanap wat arogamen. Den God nenen wani gapan ne angen, amba ago nene wat tamanam nimanegepen menan waenapan inamup da ya angen.

¹⁷ Amba den Iesu watu enamot mega namu diamone nagirewa pa Ierusalem gapan wanumone ame wat tamanam nimanegepen, men da ya dot angen go ne ap mepe boge at Arebia angen amba ewap entanen Damaskas sia tauan.

¹⁸ Amba bodu yampo uon tani ewap ne Ierusalem angen, Pita dere nop wa enat tapen menan pura dere ap mepe tanan waingen.

¹⁹ Amba ap mepe Ayop nuga Iesu gwaniwa Diemis megenat tautanan, go Iesu watu enamot mega upinewa ya tautanamon.

²⁰ Endi ok ma enan singina mam, eboewa da uon ma tavewa di, God me asigip tan.

²¹ Ap ewap pa Ierusalem ae vean at Siria ge Silisia arige gapan di angen.

²² Wam ame gapan, Keriso dugup mega nagirewa at Diudia gapanawa asigip da ya tanegene.

²³ Go mu oitana megenat anun anega wane, "Apan ma namu Keriso anu tumasitoni men amboboran guranet wa taiwandin. Endi yonen Keriso oisewa watagaet togojamet wa taiwandini sia wadidiamuwan."

²⁴ Endi Iesu anu tumasine nagire mame, ne wan taingina gapan mu God wa atonasiwanum.

2

Iesu watu enamot mega Pol den dugup daiton tane

¹ Ap mepe bodu aonagaet pusinawan degede uon tani ewap, ne apan Banabas dere pa Ierusalem sia dot anetoni ame Taitas den tanat dot aneton.

² Ame angena iwa God to ewanegeni gapan di angen. Ap mepe God anu tumasine nagire namu tautanamon. Ap mepe Diu Iesu anu tumasine airasewa nagirewa mugenat Iesu Nop Oit Mega Kakaewa ian Diu uoni nagire wadidiamona ap me guegue mega karaua wadidiamon. Iwa ne nao nega namua taingina ge endiwa mame taingina ame tave uon ya wapen men anu taingin.

³ Amba apan Taitas ap mepe den tanan waingenawa, me Gurik apanewa diawa go mu God dugup mega entanepen men paua etua tum tapen men da ya wan tane.

⁴ Go wam ame gapan, upi Taitas etua tum tapen men anun wane. Apan upi ameme Iesu anu tumasine nagirewa mini tan karaua tauan tananen iniwanumun.

Mu yangut nagire mini tauan Keriso koewa nuga gapan wat vetanen wanin anintoni ame wap iup namua gapan pananep ayamat muga kaimakaet mondi tainampen menan anun taiwanumun.

⁵ Go wam koni ap gapan nu anu tumat eboewa taine ame ewamup da ya anet anuton. Iwa Iesu Nop Oit Mega Kakaewa tavewa iragenawa e enan di wande aiwandapen men anu tainton.

⁶ Amba den mu aritawa yaumu tanini nagire di go ne ap menan ya anuivin. Iwa God tat ge wat nuga gapan iranu ya yaviwan go imunu gapan, ap gapan ne Keriso nop oit mega wana mu gine ugup da sia use intum ya tane, go umap wane.

⁷ Go ian aritawa nagire mame yawane-gene, ne God nao nenen waran taingin di yawane. Ame God Nop Oit Mega Kakaewa ian Diu uoni nagire wadidia muingapen menan nenen, ame God gaset Pita nao mega wanen ware taiwandiniwa ne ap mini di nenen.

⁸ God Pita aro amun waneni ame Iesu watu ene wani, nao mega ian Diu nagirewa munan taiwandapen wanen. Den ap umap sia God nao nenen ame, Iesu watu enanegeni nao mega ian Diu uoni nagire munan taingapen nenen.

⁹ Amba apan Pita, Diemis ge Dion mu dugup airasewa dawamone yonane nagirewa, ame oitana anune God garaet mega gapan nao nenen oisewa anun. Menan Banabas dere nunan wane tauat gaun tamoton umap wane, ap mepe mu Diu nagirewa inamu amot wane amba nu ian Diu uoni nagirewa inamu anet dianene.

¹⁰ Amba nao nuga ap tainanta gapan, men di anu awa taina taina ame ian purapuse uon kayakayawan taine ame nopewa dianene, nop ap miniwa ne da tat anuina navewa da.

Pol apan Pita diguren

¹¹ Amba apan Pita one pa Antiok taueniwa, ne yonan namuga tai tai ase diguran, iwa me inak eboewa da aroga iragen tani menan.

¹² Ame Pita ta bambamat mega tani manega. Namu me yone Diu uoni Iesu

anu tumasine nagirewa tanam taba nai-wandin, amba Diemis yone ian Diu apan upi watu enamona Pita menan amon inewa tauanewa gapan, Pita ian ugupewa tanam taba naiwandini tap ta waret ae vemon. Pita me tamu anuni iwa ian Diu nagire Iesu dugup mega entan mumapen menan etumu tum di tapen waine menan.

¹³ Pita ap anega da wa da ta taiwan-dini menan Diu Iesu anu tumasine upi me yawan guegue mega ewap amone. Ap tane gapan apan Banabas guegue muga yawamoni gapan inak mega negin gegerawa gapan aen.

¹⁴ Ap gapan ne yawamona mu Iesu Nop Oit Mega Kakaewa tave iragena guegue mini ya waran taiwanumune, menan iragi yaumakamup Pita waran diguran anega wan, "Pita ge Diu apanewa diawa go ge Diu nagire inat wanumot guegue muga mini ya tan taingi, ge taiana ian ugupewa guegue muga mini taingi. Go endi ge di-men ian ugupewa mame nanam muman ian Diu nagire ewap amopen taingi?"

¹⁵ Endi nu yanatoni ian ugupewa ya yanaton, mu iup ya warane menan mu koewa taine nagirewa diamoton. Go yana-toni Diu iragen di yanaton wainian.

¹⁶ Gosi endi nu asigip taton iwaenapan da apan Mosis iup mega seni ewap amuine gapan God kakaewa ya diamui-wan go Iesu Keriso anu tumasine menan God kakae iragen diamuiwan. Endi ap menan nu den Iesu Keriso inap anu tu-masitoni menan nu God kakae iragen dianeta. Iwa nu Mosis iup mega wani ewap ya anivin, ap gapan waenapan da da Mosis iup mega ewap amopiwa God mu kakaewa nagirewa ya diamota.

¹⁷ Menan nu Diu Keriso menan tauatoni, God inap inak kakaewa gapan waninet waton taitoni nagirewa. Go aroga iragen wandiniwa ame nu ian ugupe nagirewa tanam wanin antoni menan mu umamup koewa taitoni nagirewa tanamoton wanin anit. Menan nu den koewa taintoni na-girewa go? Nu Iesu den intum taton ian koewa mame Keriso gamup taiwan go? Ae uon di.

¹⁸ Go endi ne iup namua gaset ae veana sia wat nagase taingapena ame nek ebo

tan, iup ame topaisivin.

¹⁹ Iwa iup namua ap inanup wandeni gapan tonegen bop tan, amba iup inanap gaset ae boeni gapan, endi mame ne God menanaet di in angingain.

²⁰ Ap gapan ne Keriso den korosi gapan tonegene bonigasen, endi ma ne nek ya inivin go Keriso me potanap iniwan. Ne etuna gapan di in angivin go ne God otua anu tumasina gapan me imua nenan anu gureni menan me mek bop mega gapan inak nenen.

²¹ Ne nop ma waingina gapan, God garaet wat aipakam nimaneni ame enu tandayaset ya anuivin. Go waenapan da Mosis iup namua seni mame ayamase tainampo ap gapan God kakaewa dianepo amba Keriso boeni i uon wandepo.

3

Iup kwayup tait go Iesu anu tumatait

¹ Ae ian Galesia, e bumbawam taiana nagirewa, e tapuna da waraen, Iesu Keriso korosia tone boeni oisewa aroga di wadi-aene anuyana go e bumbawam sia tayan waiwanin.

² Ne singui da mapa wapena garewa wadianegen, e God Guewa Woup Seni warayana ame iup namua Mosis seni ame kwayup tayana gapan o Keriso oisewa anu tumaseana gapan warayan?

³ E inak ega ibariwa God Guewa warayana gamup Keriso anu tumasean, endi inak ega tavewa tautanapen ek aro ega gapan din tat wayan taiwanin? E bumbawan ae vean.

⁴ Ame e wat irayan gotutuguyan taiwaniana ame mondi taiwaniat anuiwanin? Ne ap anuingina e mondi ya taiwanin.

⁵ Endi God Guewa enen yaumakayap nao waren, yo paua taini iwa e Mo-sis iup mega anu tumaseana menan go gare Keriso nop oit mega anu tumasiana menan?

⁶ Amba Eibaraam guegue mega God nop oit mega seane manega wan, "Eibaraam God inap anu tumat taiwandin, amba God Eibaraam imua yaveni umap wan, ap menan God Eibaraam kakae dien."

⁷ Ma ae di anu kakayesen, God anu tumasine nagirewa ame Eibaraam naewa megawa.

⁸ God Nop Oit Mega Kakaewa wata-gaet seane anega wan, "Ian Diu uoni nagirewa anu dao muga God inap taine menan God iman kakae diamota." Nop Oit Kakaewa mame Eibaraam namu wadie anega wan, "Piup da da wande aeniwa God wat aipakam mega iman ge gamugap wariwanumain."

⁹ Ap menan Eibaraam God anu tu-maseni mini e iragi ap mini God anu tumat tanewa, wat aipakam Eibaraam wareni mini warai.

¹⁰ Amba waenapan da da iup namua ewap amo inak muga tamana tapen men tapiwa, mu God sintapun mega toguanain. Iwa God nop mega ok anega seane, "Orup da da iup namua gapan seane wandini ame ayamase iragi ya taiwandapinawa ame God sintapun mega tautanain."

¹¹ Ap menan endi nop ma aroga waivin, "Orup da iup namua ayamase taiwandapinawa, inak mega God den tamana ya tata." Iwa God nop mega gapan anega wan, Orup da da inak muga God den tamana ininewa,

ame God anu tumasene gapan iniwanum.

¹² Endi iup namua ayamase taine mame, anu tumat nuga God inap taitoni ap menan den ya waivin, go God nop mega gapan anega waiwan,

Orup da iup namua mame ware taiwan-dapinawa,

me inat wendet mega iup ame gapan di wande aiwanda.

¹³ Ap gapan iup namua ame gamup koewa warat gamunup barintoni ame Keriso wat vetanen, ap menan nu koewa nuga intanewa me waren, mame menan God nop mega ok anega seane,

Orup da oma onep togurep boepiwa God orup ame koerage dieta.

¹⁴ Endi Keriso wat vetaneni ame God wat aipakam mega Eibaraam wanapen men wa agiaseni ame Iesu Keriso gamup ian Diu uoni nagirewa inamup tauen. God wa agiat nimaneni ame Iesu Keriso anu tumasetawa gapan nu God Guewa warait.

Iup nopewa ge God wa agiat nimaneni nopewa

¹⁵ Tatan gwanin guegue da waenapan inak muga gapan wam wam taine wapena anun. Orup da dere agi tauka da gaset ni-makamup kaimakaet wan umap wanewa, agi muga ap waenapan da ya wa tomagain o nop senuna da ginap use intum sia ya tain.

¹⁶ Endi, God agi mega Eibaraam amba naewa mega da inanup wa agiat nimanen. God agi anega ya wan, naewa naewa gegawa, me wapi waenapan arugataet menan wata, go me anega wan, naewa gegawa, ame wani orup daiton menan wan. Orup ame Keriso menan wan.

¹⁷ Ne endi menan di waingina mam, God Eibaraam wa agiaseni agi ame di wat nat wandepen men agi wan. Evi amba en arugataet (430) taua aeni ewap God Mosis iup namua waneni gapan agi mega ame entan da sia ya tan. Me gaset Eibaraam wa agiaseni sia ya wat museta.

¹⁸ Go endi God yan mega garaetawa Eibaraam waneniwa ame Mosis iup mega gapan uon. Go God yan garaetawa Eibaraam waneni iwa wa agiaseni menan di wanen, yan ame iup gapan ya tauen.

¹⁹ Endi iup mame iwa mega dim da? Ame waenapan koewa muga ire yaoyao tapen men munen. Iup mame inamup di wande aiwandin e gaset apan Eibaraam naewa mega da men agi die waniwa ame tauen. Iup mame God ware anea munen, anea waran Mosis wanane amba Mosis ware yaumakape ta waenapan wadidiumiwandin.

²⁰ Iup inanup taueni yaumakape yoneni apanewa, yone wadianen. Go God agi mega wapen menanmek yone Eibaraam wadien, iwa God daiton me megenat di.

Mosis iup mega iwa

²¹ Endi Mosis iup mega mame, God agi mega wani enu tandayasen waiwan? Ae uon megenat di! Iwa iup ame inak nuni-wandapen men tavewa di wandepoa, ame waenapan iragi iup ame anu wara tainata gapan God inak tamanawa nunapo.

²² Go God nop oit mega anega wan, "Piup ma iragi koewa panamon wanu-mon, ap menan God yan garaet megawa

ame yaibobot inagewa, Eibaraam wa agiaseni ame waenapan da da Iesu Keriso anu tumasepiwa muneta.”

²³ Watagaet Keriso ya taueni nu anu dao nuga da uon, nu Mosis iup mega panane, ninoka enanen, iup ame gauarap waineton, amba anu dao nuga Iesu inap tata ame oniwandin eni aroga tauen.

²⁴ Amba nop yamunewa, iup ame wat tamanam nimane, naune aen Keriso inewa tauaton. Anu dao nuga ap tainanta gapan God kakae dianeta.

²⁵ Endi imunu anu dao men di taintoni ame Iesu Keriso ma gaset tauen, ap gapan nu iup ame pananeni da sia ya wat tamanam nimaneta.

Nu God otu waiwa

²⁶ Ap menan endi imuya anu dao ega Iesu Keriso inap taiana menan e iragi God otu waiwa wainisi.

²⁷ Iwa e iragi Keriso gamup dup iayana nagirewa, ap tayana e gan gorogot ewakewa enine umap Keriso inak mega ewakewa wat enayan.

²⁸ Ap menan ian Diu nagirewa o Gurik nagire wandepiwa o ayamat mondi kaimakaet taiana nagirewa o e anut ega gapan gapan iniana nagirewa o waen go apan da waingewa e iragi gine ugup da ya wainisi, e waniet ega iragi Iesu Keriso den daiton di wainisi.

²⁹ Endi Keriso ega di wandepiwa, ame e apan Eibaraam naewa mega di wainiasi. Iwa God agi mega Eibaraam inap waniwa, ame iman e yon borai.

4

¹ Ame ne nop manega waivin, apan da ae boepi yon tau kwan puraput mega ame otu wai kai ware arita tapi amba yon borain, go orup otu di wanumopi ame mu ayamat mondi kaimakaet taine nagire mini di wanumoin.

² Mu orup otu di wanumopi ame, gaset kwayupamu tapen men om enumone nagirewa, ayamat muga di taiwanumain, amba otu wai kwayup muga gauarap di wanumoin. Amba mamamu en muga om enu muneni ame taupei amba ae vemoi.

³ Endi nu watagaet orup otu ap umamup waineton, nu piup ma aro amun mega

gauarap waineton amba nop mega anu wara ta aninton. Amba nu kai waratoni gapan endi guanu God anuni gapan om enun.

⁴ Go wam tamanawa God om enuni taueniwa ame God otua watu enen waen potap nunan yanen. Amba Diu nagire iup muga gauarap den di iwandin.

⁵ God ame tani iwa nu Diu nagirewa iup muga gauarap waineton ame vetanep, nu me otu wai iragenta di entan nimanepen menan tan.

⁶ Endi e God otu wai iragenta di. Iwa ap menan God otua Guewa watu enen potayap wandia. E God otu waiwa tayana menan endi God Guewa aroewa gapan God inap anega wai, “O maman, manawa!”

⁷ Ap menan e ayamat mondi kaimakaet taine nagirewa umamup taiwaniana wamewa ame gaset uon tan, go God otu waiwa di wainisi. Amba God kakae guragut mega enat wa agiat imaeni di eneta. Iwa e me otu waiwa den di.

Pol ian Galitia nagire munan anun

⁸ E watagaet God ya yao asik tayana wamewa gapan, e god eboewa inap anu tumase munan ayamat kaimakaet taiwanian.

⁹ Go endi e God tave iragenta gaset yawa asik tayan, go gare, God den yawae asik tan. Gosi iwa dimen e ewagai sia entane aisean piup ma airampu aro amun nutu bigareniwa ge nop mega eparae uoni ame ewap sia aisiwanin?

¹⁰ E yaugai wam aritawa i dena wamewa, siragam gapan, maup bodu gapan o en daiton daiton gapan, wam mame wa taragasine iupewa ewap aisiwanin.

¹¹ E ap taiana menan ne tap gop inayap anuiangin. Ne nao kaimakaet enan taina ame mondi inayap danamingin anuin.

¹² Ap menan tatan gwanin, ne inayap kaimakaet waiangin. E ne iup namua gapan waingena ame waret ae veana ap umap tan. Iwa ne watagaet e umayap den di taingin. Amba ne namu inayap nop wana gapan e inanap koewa da ya tayan.

¹³ Amba e asiglap di ne namu amena inayap tauana ame vek gamunap wanden

amba tauan, iwa ap gapan ne Keriso Nop Oit Mega Kakaewa ere wadidiaingin.

¹⁴ Gosi enkana ankana nega gut bambam imaeni menan e da ya tandayat nimanegean, o da ya wa oinegean go God anea mega mini da o gare Iesu Keriso mek di ttauat anu waupanegean.

¹⁵ Endi aton ap tayana ambagan? Ne nop ma tave di wadiaiangin e wam ame nenan anu gura aton tayana gapan e yamaya makewa den upa nenet wayan.

¹⁶ Endi nop tavewa wadiaingina gapan, ne anavi ega entan nimanegeta go?

¹⁷ Waenapan nop eboewa waine nagire mame, enan kaimakaet taine iwa imuya potaya inamup warepen menan taiwanum. Go ame kakaewa ega menan ya taiwanum. Mu anune taine ame e ne inanap wa tomak imaep, e imuya munanaet di anupen men taiwanum.

¹⁸ Imuya ega kaimake tane ame kakae di go inak kakaewa menanaet tan. Amba ne den tanae waingepena ame gapan megenat kakaevet ya taiwanian go usenagaet di ta aisiwanian.

¹⁹ Ae kaiwan, otun wainawa, waen orup yanapen tain, vek anuine mini, ne enan ap anega sia anuivin. Amba aisiwanian, Keriso potayap di yan kakayasepi ame ne umap tanegeta.

²⁰ Ne di anuingina ne endi wam mame gapan, inayap waingep, megana aoma waraitap, yaemantu wa wabibigam taepo. Iwa enan ne anu bambam ge gego den anuivin.

Waen Eiga ge Sera guegue mugawa

²¹ Wane anup e upi iup namua gauarap aisiwaniat anuiana, Mosis iup mega anen wani e asigip tayan go?

²² Iwa watagaet Mosis iup mega manega wan, Eibaraam otu waiwa dere yanane, ame dawa waen ayamat mondi kaimakaet ta waniwandini yaua Eiga gapan baraen amba dawa mek waene iragena Sera ayamat kaimakaet ya taini ame gapan baraen.

²³ Eibaraam otua waen Eiga gapan baraeni ame orup yanine guegue mega gapan yanen, go otua mek waenewa Sera gapan baraeni ame God Eibaraam orup ame men wa agiaseni gapan di yanen.

²⁴ Endi waen dere mame gutut muga gueguewa gwagup mini ewaniwandini ame, iwa den. Ame waen dere mame gamumup God agi mega gapan waenapan iup dere muneni miniwa. Agi namua ame God tunup Sinai gapan waenapan iup mega muneniwa. Ame guegue waen Eiga. Me orup mega semuini ayamat mondi kaimakaet tainewa.

²⁵ Endi waen Eiga guegue megawa ame tavewa tunup Sinai at Arebia gapanawa ame men yonen. Amba wam ma endiwa gapan pa Ierusalem piupawa menan den yoniwan. Iwa endi ian Diu nagirewa mu iup namua ap ewap amuine menan, mu ayamat mondi kaimakaet taine otu tasinewa.

²⁶ Go Ierusalem aupa kimaniwa ame guegue mega waen Sera mini, me ayamat kaimakaet ya tainiwa, ame nu inanua.

²⁷ Iwa mame menan watagaet God nop mega ok anega seane,
Ae, waen otu uoniwa ge orup ya seana
menan daramuk wap,
ge orup yanine vegewa ya anuana menan
wak wa aton ta,
go arugataet senu agingai amba waen
meme dena,
me orup mega aruga da uon.

²⁸ Tatan gwanin, Eibaraam otua Aisik God agi mega gan yaneni umap endi e God agi mega gapan yana yana otu tasinewa.

²⁹ Wam ame gapan Eiga otua Isimero orup yanine guegue mega gapan baraeni ame yone Sera otua Aisik, God Guewa Pose Woup Seni aro mega gapan baraeni ame tandayaseni, menan nu endi iup namua ayamase taine nagire ap anega den tandayat nimanwanum.

³⁰ Go God nop oit mega gapan anen wan? Ame anega wan, "Waen ayamat mondi kaimakaet taiwandini ame otu dere wa oimo amop, iwa waen ayamat mondi kaimakaet taiwandini ame otua, mamewa wan dim dim mega da ya yon boreta. Waene iragena ame ayamat kaimakaet ya taini otua megenat iragi yon boreta."

³¹ Ap menan gwanin wainawa, nu waen ayamat kaimakaet taiwandini Eiga ame otu waiwa uon, go endi nu Eibaraam

waenewa iragena Sera ame otu tasinewa di wanin anit.

5

¹ Keriso taueni ame nu iup namua gapan vetanep, nu iup ame gauarap da sia ya wainepen menan tauen. Ap menan tumban amu kaimakaet yonan amba ek ingane itan waran aigayap ya barane. Amba iup ame ewap aisen amba ayamase kaimakaet da sia ya taiwanian.

² Ma ne Pol nop nega waingina di anu kakayesen! Ek ingane etuya tum tanewa, God den tamana waniepen men paua tat wan taiwaniampinawa, ame Keriso guegue mega inayap tave uon di.

³ Ne den anega sia wadiain, e da da God menan paua tan etuya tum tanewa, ame Mosis iup mega anenen waniwa, iragi ayamase ta kakayasiwanian.

⁴ Iwa e da da iup mame kwayupe tayan gapan inak ega God den tamana waniet anuyan taianawa, ame wa enat ega Keriso inape tom wata. E God wat aipakam mega garaetawa ame da ya warai.

⁵ Go nu da da Keriso inap anu tumasitoni, nu God Guewa wadianini gapan yaemantu inaton anu dao nuga God inak mega tamanawa tautanapen men imutuan di anuivin.

⁶ Iwa nu anu tumat nuga Iesu Keriso inapaet di barinantawa, ame etunu God men paua ta tum tatawa o ya tatawa ame God inap gine daiton di. Go inak aritawa ame Keriso anu tumaset gapan baigan gare gare tainampen.

⁷ E inak ega namua tamana kakaewa warapen menan serarat kakaevet aisiwanian, go negina da watanaen, inak ega union wa koeamean amba nop tave iragena ewap aisiwaniana ame ae veayan?

⁸ Imuya potaya ap anega entan wantan taene nop tave iragena wakaumayana ame, God om enueni enan wani, apanewa me ya tan.

⁹ Go e ae yao anun, ame taba buredi tutut wapen men taine onaewa atagin mini otu koentu da aigap wagemine tutut wan arita taini umap, orup da daiton yau-makayap wanden nop eboewa wadidiaen den ase wat anaiwan.

¹⁰ Go enan kaimakaet God inap di anuivin, me sia wat entan imaep amba orup da nop oit ugupewa wadiaepi ya anu tumasene. Go ne wadiaepena megenat anuiwanian. Orup ansena da e wababayan imaen anu bambamat eniniwa, iman God wanene mega tau-taneta.

¹¹ Kaiwan tatan gwaninawa, endi ne nop nega gapan e God menan etuya tum di tat diaingapoa, ame ian Diu nagire ne ya ta kokoeragam nimanegepo. Go ne inak ewakewa Keriso korosi gapan nuneni ame menanaet di wadidiaingina menan ne yaugai di enu toguranegene waiwanum.

¹² Ne anuingina ian mame imuya ega wa koeamene anu bambamat arita eninewa, muk ingane wapimu tum ta burumu up-epi ame kakae.

¹³ Amba gwanin wainawa, e God enan wan amba iup namua gapan vetaen. Ame tani e imuya koewa anuina sia nanam imaep ebo aopan wan ewap sia ya aisiwanian, go evenae wai den gare gare baigan gapan ta warit taiwanian.

¹⁴ Iwa iup iragi namua gapanawa ame davewa mega daiton megenat tauen. Ame anega waiwan, “Ek enan anu guriana ap umap tonan no ega daitona nagire munan den ae anu guriwanian.”

¹⁵ Ap menan ae yao anu kakayesen, e gare gare toga uaren tan, ita anan age-tao wagetao taiwaniampinawa, e iman ek ingane gare gare inak ega di wa koeam kakayatai.

God Guewa aro mega gapan ininampen

¹⁶ Ap menan ne anega diaivin, God Guewa aroewa gapan wanie in aisiwanian. Amba God Guewa namu yoyo taepi gapan, imuya ega koewa tat anuiana ame aroewa uon di tata.

¹⁷ Iwa e imuya koewa tat anuiana ame God Guewa ya tat anuiwan. Amba God Guewa anut mega tat anu imaini ame imuya ya tat anuiwan. Ap menan imuya ega gapan koewa tat anuiana ame God Guewa den toga uaren yaugai di taiwanum. Ap taine menan e kakaewa tat anuiana da ya di tai.

¹⁸ Go e God Guewa Pose Woup Seni inak ega namu yoyo tapiwa, e iup namua gapan ya waniai.

¹⁹ Amba waenapan muk imumu gapan koewa tat anune di tainewa ame tavewa mam, wainan gogo ise ta ase ta tainewa, ge anut koewa anuine gapan umam noa tainewa amba imumu yagirin wainan gogo tat anuinewa.

²⁰ Amba upinewa ame oma nanip kaitane god muga wane i poe inap tainewa, kayao banao tainewa, wa koeam tainewa, noyam notatae wainewa, anu koeam tainewa, ugu gan gan tane gau agaga tainewa amba endum wandum tane ise wanum ase wanum tainewa.

²¹ Den kaum kaimake dena nainewa, evenamu ona muga yavine gwane kandainiwa, sinao tarep ge da da aton i uoni tane inak koevet tainewa amba ap miniwa upi den. Ne tagigit enan namu kaimakaet wana mini endi den sia waiangin. Ame inak map anega taine nagirewa mu God toemu mega ya yon borain.

²² Go God Guewa Woup Seni nao mega tavewa ini ame baigan, aton, nonup, ae bigat nitat yaemantu waninet, yan aiman ge kakaevet tat, anu tumat nuga gapan kaimakaet yoninampen.

²³ Den gine yamaet waninet, nuk ingane ae wat tamanamet kwayup tainampen. Ap anega tainanta gapan iup da ya toboren.

²⁴ Waenapan Iesu Keriso dugup mega iragenta tainewa, ame mu imumu koewa bararaen wandiniwa ge inak koewa yagimuin tat anune tainewa, ame gaset Iesu Keriso asenagaet wanane korosi gapan toguren boen.

²⁵ Endi nu God Guewa Pose Woup Seni aroewa gamup inak ewakewa waratoni menan God Guewa waini gapan tainampen.

²⁶ Ap menan nu apan apan ta enu yawa-gen gare gare tat gau gundumane den ya ta wainampen. Amba evenan wainu ona muga menan imunu ya kandaep.

¹ Gwanin wainawa, inat waniet ega daitona otua da inak koewa tapiwa, ame e da da God Guewa gapan yanayana nagineva, aisen orup ame ine tauan yae-mantu wawa bibigam tan, ago wanane me inak mega kakae sia tap. Go e ek den ae yao anu kakayesen amba tan, iwa e da den pusi warup inayap tauep koewa tane tawa.

² Inak ega itanewa gare gare ase ma tam bemagen, ap anega tanewa, e Keriso iup mega tavewa gapanaet di taiwanin.

³ Go orup da mek ingane aritawa yau taneni otua wan, evene wai itanewa den ya wariniwa, ame mondi ebo di waiwan. Me mek uon di, mondi wan taiwan.

⁴ Menan orup daiton daiton inak muga guegue muk ingane tayao wareyao ta iramu muk ae yave gapan yaumu ingane ao amba warep. Den inak muga orup dawa inak mega den om ya inapen taiwanuman.

⁵ Iwa e orup daiton daiton itan muga muk panop di top.

⁶ Amba orup da wadidiat mega inap God nop mega yao anu kakayesenwa ame kwan puraput, antaba ge moni miniwa yan se wadiat mega wanep.

⁷ Waenapan da ebo ya wa upaep. Amba e God wawa koko ta ebo ya ewatai. Iwa e dim da veriana tavewa maup tauini daupam ap gapan di tai.

⁸ Waenapan aton anupen menan imumu koewa gapan inak koewa tat anuine ame di tainewa, ame mu naewa koewa inak muga gapan verine ame tavewa bop tautanain. Go inak muga naewa kakaewa God Guewa aton anupen men verinewa, ame God Guewa gamup inak yaibobot tautanain.

⁹ Menan nu inak kakaewa taitoni ame endave wandave den ya tainampen. Nu inak mame wat natat ae ya vetawa, wam da maup inin geraget wamewa tauepi, nu yaibobot inagewa matakamait.

¹⁰ Ap menan wam nuga arok wandin gapan waenapan ago tamot inamup kakaevet di tainampen. Go Iesu daiton anu tumasitoni nagirewa, ame aigap yao anu muminampen.

¹¹ Yawan, ok kanama ma anenen da nek naninap siangin!

¹² Waenapan upi muk kakaewa muga menan, e nanam imaep etuya God menan tum tapen taiwanum. Ap taine mu Diu nagire atonumu anupen men taiwanum. Mu Iesu Keriso korosi mega no oise kakaewa wadidiaepi ame Diu nagire amboboram guramopi tantanewa taiwanum.

¹³ Waenapan etumu God men tum tanewa, mu muk den iup ayamase ya taiwanum. Go mu imumup e etuya tum taepi gapan yaumu ao ware atonuya wapen taiwanum iwa mu anut muga anune gapan e tayan.

¹⁴ Ne anuingina wan dim dim ap anegawa, men nek yauna ao ya warain. Ne Ayop nuga Iesu Keriso korosi mega menan megenat me yaua ao waringain. Iwa Iesu korosi mega gamup ne piup ma koewa mega gaset tandayasen ise uarenan amba inanap da sia ya wandia.

¹⁵ Nu God menan etunu tum tatawa o ya tatawa ame gine ugup da uon. Go nop aigap iragenawa, ame nu God waenapan mega ewakewa sia entanenep.

¹⁶ God nonup ge bagu sisi mega, nop ma anuyan ewap aisiana nagirewa iragi inayap wande ep. Amba God waenapan mega iragenta munan den.

¹⁷ Ap menan nop nega uiwa, vek ugu vegaek da sia ya nenane, iwa ne Keriso nao mega taina menan etun non, e omat guin mega den wandia.

¹⁸ Tatan gwanin, Ayop nuga Iesu Keriso wat aipakam mega garaetawa potayap wande ep. Ame umap.

EPESAS Pol ok mega Epesas nagirewa inamup sen

¹ Ma ne apan Pol God anut mega inanap anuiwandini gapan Iesu Keriso watu en-amop mega apanewa da tan. Amba God nao mega nagirewa at Epesas gapan wainean anu dao ega Iesu Keriso inap taiana menan gaun inayap waivin.

² Den Mamanua God ge Ayop nuga Iesu Keriso baigan nonup ge wat aipakam muga garaetawa inayap wande ep.

Iesu taueni gapan wat aipakam waraton

³ Amba Ayop nuga Iesu Keriso, me Mamewa amba God megawa, inap wa atonasepen. Iwa Keriso den intum tatoni menan God kimani aupa wandini guegue mega gapan God wat aipakam kakaewa da da iragi nunen.

⁴ Ap gapan Iesu Keriso gamup God namu nu God yamap kakaevet iragen waninet koewa da ya ta parisepen menan om enunen wanineton, amba piup ma evi tan venasen.

⁵ Iwa ere gapan God mek anuni gapan nunan anu gureni menan, Iesu Keriso gamup mek otu waiwa antanimanepen men anu tanen. Ame anut nega anuiwandiniwa ge imua mega dansewa wandini gapan tanen.

⁶ Ap menan God wa atonasepen, iwa wat aipakam mega gogotaewa garaet nunen. God otua Iesu Keriso men anu gureni gamup wat aipakam garaetawa ame mondi yan garaet ta ma nunen.

⁷ Iwa Iesu nunan boeni gapan deniwa wat vetane koewa nuga ise wat musen, God garaet mega ap menan aigap iragen da nunen.

⁸ Amba God ap me nuneni iragi gine ambore yan garaet ma ta nunen. Iwa God me dima ge anu tamanam kakayasini inap no dotouen wandini apanewa.

⁹ Ap menan endi God me iwa tavewa mega karaua wandini anu yao asik tapen menan tan, mame me enok bambin mega

anuiwandini gapan gaset Keriso gamup taitamen.

¹⁰ Ame God enok bambin mega tavewa tautanapen menan wamewa taupei manega tata. Ame wan dim dim kimi-niwa ge piupawa iman daiton tobob ase tapi Keriso namu yoyo Ayopewa tata, ame di God tavewa mega karaua wandini.

Toborata Keriso ayop nuga tata

¹¹ Amba nu Keriso den dugup daiton tatoni menan God ganganat nimane waenapan mega dianen, iwa ere mangan iragen God mek anuni menan. Amba den me tain wan dim dim iragi anuini gapan ge iwa tavewa gapan venasen umap tainiwa.

¹² Endi nu Iesu anu tumasintoni Diu nagirewa, namu imunu nuga Keriso inap anu dao ta anintoni nagirewa. God nu om enunen menan nu God kakae guragut oya oya mega den wa atonasepen.

¹³ Ame nu tatoni e ap umap sia tayan. Ame e nop tave iragena wadidiaene anuyana gapan God waenapan mega entan imaen. Ame Keriso Nop Oit Mega Kakaewa anuyana gapan inak ega ewakewa enen Keriso inap anu tumat tayan. Endi Keriso gamup God wa agiat imaeni ame Guewa Woup Seni gamuyap yatup pane ganganat imaen.

¹⁴ God Guewa Woup Seni nunep warata ame paua nuga yon boropen men God waenapan mega wa agiat mumeni ta ai-wandan, ame evi amba wam uiwa gapan God waenapan mega kakae diamopi ap gapan koewa muga gapan di wat vetam kakayat mumeta. Menan God kakae guragut mega oya oya den wa atonasepen.

Pol mup megawa

¹⁵ E imuya anu dao Ayop Iesu inap taiana amba baigan ega God waenapan mega uruga inamup taiana oisewa anun.

¹⁶ Ap menan ne God inap gaun enan waina da ae ya vivin. Pot pot mup nega gapan enan den di anu imaivin.

¹⁷ Den Ayop nuga Iesu Keriso God megawa oya oyae den wandiniwa ame Guewa enepi gapan anut dima wa ewaep God yao asigip ta kakayatai.

¹⁸ Ap gapan e imuya potaya ase wat ganatamepen, anu dao ega amba e God

enan wani tavewa mega yao asigip tapen. Ame gapan God ik maup mega wandini ge kakae guragut mega ame yon borapen menan God waenapan megawa wa agiat mumen, ap men ne mup enan den di taivin.

¹⁹ Amba nu God anu tumasintoni nagirewa, amun mega kanama ame nuneni nao potanup warini ame gapan nu yao asigip tait. God amun mega kanama ame nao wariniwa umap, aro epara mega ap anega den sia wandia.

²⁰ Aro amun kanama ame gapan me ware Keriso boeni wan inakae yon warden, ware aupa toemu kimaniwa mainewa nutup gapan baraen wandia.

²¹ Ap menan kiman gapan wagup warane nagirewa, aro amun warane wanumuinewa, ayop vivitape nagirewa, amba wan dim dim piup ma gapanawa amba wam evi tauepiwa, ame endi Mamewa God me otua Keriso ware baraen ian mame iragi namu yoyo muga taiwan.

²² Ap menan wan dim dim mame iragi God tambu Keriso amun mega gauarap sen, Iesu dugup mega nagirewa menan ge wan dim dim iragi Keriso namu yoyo taiwadata.

²³ Iwa waenapan ame Keriso etua, menan mu iragi Keriso megawa amba Keriso gamup wan dim dim iragi gine ugup ugup taitamen.

2

Nu Keriso gamup inak waraton

¹ Wataget e inak ega gapan God tandayase koewa taiwaniana menan inak ega guaya gapana ae boen boniga wainean.

² Wam ame iniwaniana gapan, e piup ma inak mega koewa ewap aisiwaniana gapan, Seitan me airampu koewa kimani yonane oe warine ayop mugawa, me amun mega gapan ewamup iwanian. Endi me waenapan God noa tandayasine nagire inamup nao wariwan.

³ Amba wataget nu iragi, mu umamup ap anega den inat waninet piup ma guegue mega koewa wapinu gapan imunu dansewa gapan tat anuiwandini ame tainton. Ap gapan nu God ugu gangan mega tautanapen menan taton, iwa nu

guegue nuga waenapan ame koewa taiwanumune umamup den tainton.

⁴ Go God bagu sisi nunan bumaga tantan anun! Nu God tandaysetoni menan, nu inak nuga guanu gapan ae boen. Go me imua waren nunan anu gure kakayaseni gapan Keriso gamup God inak ewakewa den nunen. Ap menan God yan mega garaetawa gapan nu inak waraton wanin anit.

⁵ Amba God wan Iesu Keriso bop gapan ao yon wardeni nu den yon wanineton, amba aupa kiman gapan wagat aigap wardenpen watarewa wanene nu den nunen.

⁶ God mame tani gapan wam namunup oniwandini ame wat aipakam mega garaetawa me kakae guragut mega yan ta managaet nunepi ame Iesu Keriso gamup waenapan iravi nu den to ewanen.

⁷ Go ne endi wainginawa ame e ek inak ewakewa ya warayan go God yan mega garaetawa eneni gapan inak warayan, iwa anu tumat ega taiana ap menan God yan mega ame eneniwa.

⁸ Mame e ek dim da da tayana gapan warat wan menan orup da oyok oyok ya ta waiwandan.

⁹ Mame nu iravi God mek anen anuni gapan tanen. Amba nu Iesu den intum taton menan nu nao kakae guragut tainampen men God tanen. Ame gaseget nu inat waninet kakaewa tainampen menan God anun di wandia.

Nu Keriso den daiton taton

¹⁰ Mame nu iravi God mek anen anuni gapan tanen. Amba nu Iesu den intum taton menan nu nao kakae guragut tainampen men God tanen. Ame gaseget nu inat waninet kakaewa tainampen menan God anun di wandia.

¹¹ Nop mame watagaet taiwaniana ap me ase sia anun. Wam ame gapan e Keriso den daiton ya tayan. E ayogo tauayan wainisiana nagirewa, amba den e God om enumoni at Isurero nagirewa uon, amba agi mega ewakewa munapen me God waenapan mega wa agiat mumeni, ame enan uon. Ap gapan e anu dao ega da uon amba piup ma gapan God da den ya wandet anuiwanian.

¹² Amba e watagaet God ae vea ek mini wainean, go endiwa mam, Iesu Keriso

gamup me boeni deniwa gapan wa upaen God inap konintu tauayan.

¹⁴ Endi Keriso nu nonup nunini i apanewa. Ap gapan me ian Diu nagirewa ge Diu uoni nagirewa wat tobob munen daiton tane, mu wataget anavi wanumone gapan sin tonum mini yaumakamup warden. Go Keriso mek etua yan ta nunan boeni gapan sin tonum ame to baim uarenen.

¹⁵ Ap gapan apan Mosis nop ge iup seni gapan ian dere mame Diu nagirewa ge Diu uoni nagirewa mu ugu ugumup wanumone. Go Keriso iup ame ise wat musen, ame tani iwa ian dere mame me gamup tobob tamon waenapan ewakewa tane gapan baigan nonup tauae aen.

¹⁶ Den Keriso tani iwa mega mame garito gwanato wanumone ise wat musep amba daiton ta upam amop God inewa tauapen men tan. Keriso inak aru mame menan me korosi gapan boen.

¹⁷ Amba Keriso taueni ian Diu God inamup den wandini nagirewa ge God inamup ya wandini ian Diu uoni nagirewa iragi nop oit kakaewa opata gapan baigan nonup nopewa wadidiamopen men tauen.

¹⁸ Endi mame gapan nu ian Diu nagirewa ge Diu uoni nagirewa, iragi Keriso nunan tani gapan God Guewa daiton gamup Mamanu God inewa tauait.

¹⁹ Ap gapan endi e manega da uon ame e Diu uoni nagirewa uon o ian Diu oarewa nagirewa uon o gine ugupe nagirewa uon go e iragi ora tauayan, God waenapan mega iragi tanamoyan di wainisi. Ap menan e iragi God dugup mega nagirewa di tayan.

²⁰ Ap gapan God pa mega ibari iragena Iesu watu enamot mega ge God no oise waiwanumune tune aigap di tuiwanum. Pa ame nu anu tumasintoni nagirewa di. Go pa ame tune sewa danewa Iesu Keriso mek di.

²¹ Amba pa kanama ame iragi Keriso gamup tune enat wanat ta doriwanum. Ap gapan Keriso watuiwandin kai wat doriwandin e Ayop virip mega paewa ire di wanen.

²² Endi mame gapan, e den ian Diu nagire tanamo iragi Keriso den intum tayana

ame God me Guewa Woup Seni gamup God warden pa mega tuiwan, ame nu di.

3

Pol Diu uoni nagirewa wat agoat munen

¹ Ne Pol, Diu uoni nagirewa enan anun Iesu Keriso nop oit mega wadidiangina menan waranegen gwat noke bat nimane-gene wanik angin, menan God inap mup waiwanian.

² Tavewa di, e kakaewa ega menan, God wat aipakam mega garaetawa gapan nao mame nenen oitana anuyan.

³ Iwa God anut mega nunan evi dim da tapi ame karaua wardeni ne yao asigip tapen menan ase wat arogam nenen oisewa gaset ok gapan paina paina mapa sean.

⁴ Endi mame gapan, ne ok seana batnak yao anunewa, ame tavewa di, Keriso oisewa karaua wardeni ne yao anu awana ame e den yao anui.

⁵ Amba watageta iniwanumune nagirewa, nop karaua wardeni mame mu ya anune. Go endi mame God Guewa gamup aroga ase wat arogamen ame imumu woup am seni Iesu watu enamot nagirewa ge God nop oit mega waiwanumune nagirewa munen.

⁶ Nop tavewa karaua wardeni mame, Ame God Nop Oit Mega Kakaewa anuyana gapan Diu uoni nagire ame Diu nagirewa den tobob ta daiton tan amba God wat aipakam mega muneni ame warain. Ap gapan God Iesu Keriso wa agiaseni mu iragi yan se tambuin.

⁷ Amba God aro amun mega waran nao taina ame God yan garaet mega ame nenen gapan taivin. Menan ne yonan nao mega apanewa tan God Nop Oit Mega Kakaewa wadidiamuivin.

⁸ Go mame gapan, God waenapan mega iragi nimakamup, ne mek ui iragena di, go God yan mega garaetawa ne nenen, Ame angep Diu uoni nagirewa Keriso nop oit kakaewa enu yao wapena anu kakayasepen menan umap uon.

⁹ Amba God nao mega nenen ame nop mega tave iragenawa karaua wandini

oisewa waenapan wadidiamopen men nenen. Ame piup kiman ere ta venaseni gapan nop tavewa mek ware karaua baraen. Iwa me wan dim dim iragi tan venaseni apanewa.

¹⁰ Amba iwa megawa, ame God me dugup mega gamup anea aro amun aupa kimaniwa warane wanumunewa iragi endi mame gapan God anut dima mega anuini ame yao anuin.

¹¹ Mame watagaet erewa gapan God anut mega usenagaet wandepen menan anu tani. Mame Ayop nuga Iesu Keriso gamup om gapan gapan taiwan.

¹² Ap gapan anu tumat nuga Iesu Keriso inapaet di tainantawa tap gop da ya anuit, kin kin tauat God namup yonait.

¹³ Ap menan, ne nop ma diaen waingina, iwa ne gwat noke gapan wanik angina enan vek ugu vegaek anu tanivin, ame e kakaewa ega Iesu tautanapen menan vek anu tanivin ap menan imuya ega ae ya gearep iwa mame iravi e kakaewa ega menan.

God Guewa potanup wandini gapan aro warivin

¹⁴ Menan ne ian omanin paitan Mamanua God namup omaninap enun enan mup taina menan.

¹⁵ Me waenapan dugup mega daitonawa nagirewa piupawa kimaniwa iragi me yaua tave iragenawa gapan inak warianum.

¹⁶ Ne Maman God inap mup manega waingina ame God kakae guragut mega bararaeni gamup God Guewa aro amun epara mega enepi gapan imuya wat kimeta.

¹⁷ Amba anu tumat ega Keriso inap taiwanianpinawa me vise imuya gapan ene pone ine wandeta. Den mup taingina ame inak ega ibariwa Keriso inap ge waenapan inamup imuya wariwandapina gapan tanau aisiwanian.

¹⁸ Amba e God nao mega nagirewa iragi tanamoyana ame Keriso me baigan om mega anupen, ame nonongewa megawa, ge ao dot aeni megawa, ge bumagap vit aeni megawa anu tamanamepen menan aroe amunua e warayan.

¹⁹ Amba endi Keriso me baigan mega nunan tani ame anupen menan taiwanin go ya di anuitamai, go baigan mega e asigip tapen menan ne God inap mup den waivin. Ap gapan God me imua gapan wan dim dim iragi inap bararaen wandini endi e ap omewa inayap bararae wandeta.

²⁰ Amba nu dim da me menan mup waitoni ge imunup ase anuitoni tambut mega gauarap, go God aro amun mega inanup bararaepi gapan dim da men wata aigap iragen da ta nun aiwandata.

²¹ Amba God oya oya megawa waenapan megawa inamup ge Iesu Keriso inap wam wam usenagaet wande aiwandan. Ame umap.

4

God Guewa potanup wandini menan nu dugup daiton

¹ Endi ne Ayop Iesu nao mega taingina menan gwat nokap bat nimanegene waingiangin. Ap menan God ere enan wa, kakae guragut mega eneni ap gapan in aisiwanian.

² Ame ek ingane etuya aoma wat otutamen yaemantu bigat ita waniwanian. Amba baigan tan ago gare gare tan, koewa ega den yan siwanian.

³ Imuya potaya gapan ta ta kakayat God Guewa den wa enat taiwanian. Ame gapan nonup potayap di wande aiwandan.

⁴ Keriso den nu etunu daiton amba God Guewa daiton di warivin. Ame gaset God ere enan wani anu dao ega mame daitonagaet di taiwanianpen menan wan.

⁵ Ame Ayop nuga daiton di amba anu tumat nuga daiton me inap taivin. Den me megenat yaua gapan nu dup ivin.

⁶ Amba Mamanu God me daiton di amba nu Ayop nugawa, amba potanup ininiwa amba gamunup nao wariniwa.

⁷ Go nu daiton daiton yan gine ugup ugup Keriso garaet nunen.

⁸ Mame menan watagaet God nop mega anega sean,
Me kimani paina dot aeni,
gwat noke nagirewa aruga den naumo aen.

Amba waenapan me yan kakae guragut den munen.

⁹ Ok ap anega sean. Ok mame seane iwa Keriso me namu kiman gapan piupa visen.

¹⁰ Me daiton iragen piup viseni ameme sia kimani di dot aen. Me kimani paina iragen dot aeni iwa toemu mega piup kiman iravi dotouepen menan.

¹¹ Me waenapan yan aiman munen gapan nao mega taine apanewa yan aiman mega ame muneni upi watu en-amot mega nagirewa, upi God anuni evi venasepi namu waine nagirewa, upi Iesu menan waenapan wa upamuine nagirewa, amba upi waenapan kwayup tamanone God nop oit mega wadidiamuinie nagirewa.

¹² Iesu yan aiman mame muneni iwa mu yone God waenapan mega yambuni wadiamopen, ap gapan mu God menan nao ta, Iesu Keriso dugup mega ao tu dorapen menan.

¹³ Ap gapan nu imunu nuga daiton tap God anu tumaset amba otua Iesu Keriso anu kakayatait amba nop mega gapan anu tumat nuga kai warat Iesu tani guegue mega iragenta gapan tainait.

¹⁴ Ap tata nu orup otu mini sia ya wan-inait, amba imunu nuga gego ae ao da ya anuit. Waenapan nop ebo tave uoni waine nagirewa, nop monamon muga gapan da sia ya wababayian nimanain.

¹⁵ Go nu gare nop tave iragenta gapan baigan gare gare tainait. Amba wan dim dim uruga tainanta gapan Keriso mini entan nimanepen menan kai wara dorinait. Nu Keriso dugup mega nagirewa ame, me etua amba Keriso, nu ian bariwa.

¹⁶ Keriso gamup me namu yoyo mega gapan dugup mega etua daiton entanen. Amba me etua mega semua ugup ugup, nao muga taine gapan gapan tane dugup mega baigan gapan watuinewa. Menan semua daiton daiton nao muga muga gapan tapiwa ame Iesu etua baigan gapan tu dorep wanumoin.

Keriso inak ewakewa nunen

¹⁷ Ap menan ne Ayop yaua aroewa gapan tagigit anega diaiangan, E waenapan God ya anu tumasine nagirewa ame

umamup sia ya iniwanian. Iwa mu anut muga anuine ame tave uon.

¹⁸ Ian ame anut muga sisip gware dena toboren amba mu God inak mega da in-amup ya wandia. Mu sensenui di wanumamum. Iwa mu bumagamu gware wan God tandayasene.

¹⁹ Mu imunu kakaewa uruga wakau-mane menan inak koe koevet taiwanum. Amba anut muga anuine koewa ugup ugup ge gau agaga megenat no dotouen.

²⁰ Go e Keriso nop oit mega anuiana, ame inak ap anegawa tapen menan uon.

²¹ Iwa e Iesu nop oit megawa wadiaene anuiana ame, me nop mega tave iragenta gapan di.

²² Ap menan e inak ega koe koevet namu taiwanian ge imuya ega gapan koewa pot pot di tat anuiwaniana wa totnak ae di baran. Ame taiwaniana ek ingane etuya imuya di wa koeamiwanin.

²³ Amba imuya potaya entan tap anut kakae ewakewa megenat anuiwanian.

²⁴ Den inak ewakewa waran gamuyap baran, inak tavewa tamanawa gapan tai-wanian. Amba imuya potaya woup am sep wanien, iwa God taeni e me umap ap anega waniepen men taen.

²⁵ Ap menan e daiton daiton, inak ega ebo aopan taiana ame ae vean. Amba God waenapan mega inamup nop tavewa megenat waiwanian, iwa nu uruga dugup daitona nagirewa, etunu daiton.

²⁶ Amba ugu gan gan anune gapan ya nanam imaep, koewa ya tane. Ugu gan gan tan yaugai waniene wam utu ae ya gearep.

²⁷ Iwa ugu gan gan tane gapan Seitan am dagime tambuepi tawa.

²⁸ E da da up taiana nagirewa, up da sia ya tane. Menan ek nania gapan nao tan, tavewa wat matakamen amba yan sean, kayakayawan taine nagire ago den mumiwanian.

²⁹ Noya gapan nop koewa arak maken den ya waiwanian. Go dim dim iravi wapen tane nop kakaewa evenae wai bagu sisi muga ame ago munapen menan waiwanian. Ap gapan mu den inak muga kakae tu dorain.

³⁰ Amba inat waniet ega gapan God Guewa Posewa Woup Seniwa bagu sisi da ya wanane. Iwa iman Iesu inak ewakewa ware taupei wamewa gapan, ame God Guewa mame potayap wandepi gamup inak tautanai.

³¹ Ap menan inak koewa iravi tandayasen, nop koevet sisi dena wan, arak maken, ao senao wan, ita anan ame ya taiwanian. Amba evenae wai inamup anu koeragam ya taiwanian. Inak mame uruga ae di vean.

³² Go kakae guragut God inap anu warayana ame gare gare yan sean, amba God Keriso gamup koewa ega anu ae veni umap koewa ega gare gare anu ae viwanian.

5

Mum ge ganat noa

¹ Wan dim dim iragi taiana gapan, God guegue mega gapanaet di taiwanian. Iwa e God otu waiwa bumagewa.

² Amba Keriso nunan boeni inak mega yan ta garaet God waneniwa, ge Keriso mek etua yan kakae iragen sisimare den God waneni, ap umap e baigan inagewa gapan in aisiwanian.

³ Go e yaumakayap, wainan gogo inagewa koewa da ya di wandep. Amba inak koewa danse uoni ge gau gunduman den ya wa taiwanian. Iwa inak map anegawa God waenapan mega inamup tamana uon.

⁴ Den wainan gogo guturewa ge egan wan aio borere i uoni ya wa taiwanian. Go e gare God inap gaun anun wa atonasiwanian.

⁵ Iwa e asigiap di, orup da wainan gogo ge inak koewa danse uon tan gau gunduman tainiwa ame Keriso ge God toemu muga ya unatain. Gau gunduman taine nagirewa guewa nanip kaitane inap wa taragasine nagire ap umap.

⁶ Waenapan da nop tave uoni gapan ya wababayn imaep iwa nop ap miniwa gapan waenapan God tandayasiwanum mu God nemoro mega warane inamup bariwanum.

⁷ Ap menan e mu den wa enat ya taiwanian.

⁸ Iwa e watagaet imuya potaya sisip bararaen wainean, go endi e Ayop Iesu inap ganat gapan wainisi. Ap menan ganat gapan wanumuine nagire umap ina wanie aisiwanian.

⁹ Iwa Keriso ganat mega tavewa ini ame inak kakaewa tamanawa ge nop tave iragenawa.

¹⁰ Ap menan imuya upan sean, inak kakaewa Ayop God aton anuini ap menan anuiwanian.

¹¹ Waenapan sisip inage tave uoni taine ap den ya taiwanian. Go e gare yam ta yawamo wan, inak muga koewa wat arogamen.

¹² Iwa waenapan ame God tandayasine nagire, inak muga koewa karaua taine ame oise wawa umam taiwanum.

¹³ Go God ganat mega waenapan inak muga koewa uruga enu ganatamep aroga taueta.

¹⁴ Iwa God ganat mega ame wan dim dim karaua wanumune enu ganatamin aroga tauinewa. Ap menan God anega wan,

O aup iniana apanewa, ao yon, bop gapan
ao yon wanik,

amba Keriso ganat mega gamugap enup.

¹⁵ Ap menan inak ega anenen iniana ame ek ingane ae di yao anu kakayasen, anut uoni nagire mini ya iniwani go nop dima inayap wandep gapan iniwani.

¹⁶ Inak koewa wamewa mame gapan, wam ega arok yambuni waran inak kakaewa megenat taiwanian.

¹⁷ Ap menan e bumbawam ya taiwanian. Go Ayop God anut mega dim da enan anuini anupen menan taiwanian.

¹⁸ Kaum kaimake dena nan bumbawam ya tane, iwa ame inak ega wa koeameta. Gare God Guewa Pose Woup Seni potayap wande wat tamanam imaiwandan.

¹⁹ Ap gapan anu tumat wagewa wan, wak kakae guragut ok gapan seane den wan amba God wa atonasepen ogewa seane ame wak gapan wan, imuya potaya atonu den God wa atonasiwanian.

²⁰ Dim dim uruga menan Ayop nuga Iesu yaua gapan God Mamanua pot pot di wa atonasen gaun inap waiwanian.

Waene dena meme dena nop mugawa

²¹ Amba Keriso viripewa gapan baigan gare gare ta warit taiwanian.

²² Waen apan naimoyana nagirewa Ayop viripewa tayan nop mega anuiana umap memae waia nop muga anun gapan viripamu taiwanian.

²³ Apan waenewa namu yoyo taini ap umap, Keriso etua ame nu amba Iesu nu ian bariwa. Amba Keriso me dugup nuga wat inakamini i apanewa.

²⁴ Endi nu Keriso dugup mega nagirewa, Keriso inap ayamat taitoni mini, waen memae wai nop muga anun dim dim uruga taiana gapan ayamat munan taiwanian.

²⁵ Amba e apan, waene dena nagirewa, Keriso nunan anu gure inak mega nunan baraeni mini e waenae wai munan ae di anu guran.

²⁶ Keriso nunan boeni iwa nu imumu potamu God menan woup sep waninepen amba kaum ge nop mega gapan biginu tuiwandapen.

²⁷ Amba nu Keriso tambunep, mek dugup mega nagire wainepe menan tan. Ap tani iwa, nu imunu potanu wat ganatamep woup sep, koewa da ya wandepen. Den inak nuga gapan sipe tope, ae ao ge bigip da ya di wandepen.

²⁸ Ap menan, apan, muk munan anu gurine mini waene wai munan di anu gurapen. Apan da waenewa menan anu gurepi ame mek menan den di anu gureta.

²⁹ Orup da mek etua ingane ya di tandayaseta menan taba wanen nan etua watun kwayupe yambuni taiwadata. Keriso me dugup mega nagire kwayup ap anega tainiwa.

³⁰ Iwa nu etunu mame Keriso megawa.

³¹ Mame menan wataget God nop mega ok anega seane,

Apan inewa mamewa ae vemo ae wae-newa dere tobob ta wanumoin.

Amba mu dere etumu daiton tata.

³² Nop ma bumagap iragen ya anu awa awa mini waiangin. Go ame guegue mega Keriso me amba dugup mega nagirewa den etunu daiton di.

³³ Go aigap sia waiangin, e daiton daiton ek ingane enan ae anu guriana mini waenae wai munan anu guran kwayupamu

tamon. Amba waen memae wai viripamu ae di ta kakayasiwanian.

6

Ine mame otu wai nop mugawa

¹ Orup otua, e inae mamae nop muga anun ayamase tamon, iwa mame Ayop God inap inak tamanawa amba e God otu tasinewa.

² Ame God iup mega anega wani, Inaya mamaya viripamu di tan. ap anega wan. Amba iup mame ginap God agi anega wani,

³ E inae mamae viripamu tanewa, e piup gapan inak nononga waniai, amba God wat aipakam imaeta.

⁴ Ine mame, e orup ega wa agagat mu-mane ugumu bumagap iragen ya ganganaep, go gare e Ayop God nop mega wadiamon gapan yambuni wat tamanam mumiwanian.

Ayop ge ago nagire nop mugawa

⁵ E ago mondi kaimakaet taiana nagirewa, aritawa ega piupawa inamup tamu anun, viripamu den tan amba imuya tamanawa gapan nao ta muniwanian. Ap tane gapan Keriso ayamase di taiwanin.

⁶ Aritawa ega nop muga anun ayamat muga taiwaniampina ame yawae imumu aton tap enan anupen menan ya anu taiwanian, go Keriso nao mega nagire mini, imuya potaya gapan God anuini navewa taiwanian.

⁷ Imuya potaya uruga atonu den ayamat taiwanian. Ame tane Ayop God inap di taiwanian go waenapan munan uon.

⁸ Iwa e asigiap di Ayop God iman wae-napan nao anenen kakaevet taine gapan garewa muga muneta. Ame waenapan nao mondi kaimakaet taine ge waenapan mondigawa uruga om gapan gapan di muneta.

⁹ Amba aritawa nagirewa, nao enan mondi kaimakaet taine nagire kwayupamu yambuni tan. Inak muga wa koeamepen menan ya tane, iwa e asigiap di, mu e den Aritawa egawa ame daiton kimani wandia. Me inap waenapan ire yaoyao da ya wandia.

God ves obou megawa

¹⁰ Nop nega uiwa ame, Ayop God gamup epara tan aro amun mega waran.

¹¹ God vesi obou mega uruga gamuyap dorep gapan Seitan pusi warup mega koewa taini ame tumban amun to paitan.

¹² Iwa nu ita anan mame apan guin pakao dena ame inamup ya taivin, go piup ma sisip aro amun mega warane, namu yoyo tainewa ge gwagup koewa Seitan epata megawa piup kiman yaumakap wanumone, nao warinewa, ame inamup taivin.

¹³ Ap menan God vesi obou mega uruga enan, iwa Seitan wam mega taupei e ap gapan tumban amu yonai amba ap tane ewap e kaimakaet sia di yoniwaniai.

¹⁴ Menan e tumban kaimakaet di anu yonan. Nop tave iragena ame berit mega kankamuyap panan, amba inak tamana iragenawa ame toganeya okomua enan.

¹⁵ Amba pusia okomua ame God Nop Oit Mega Baigan Kakaewa enan, tata kakayat tan gan amba wanien.

¹⁶ Ame uruga tane aigap den ame anu tumat vesi mega ao waran yonan. Ap gapan Seitan ita mega waniwa merave den onamopi e uruga to ninigamai.

¹⁷ Iaya okomua ame Keriso gamup inak ewakewa waran tonatan amba God nop megawa ame Guewa kereba mega naniap waran.

¹⁸ Amba Guewa inayap wandepi gapan wam wam uruga God inap mup waiwanian. bagu sisi ega menan den mup inap waiwanian. Ap gapan wam wam uruga nene yamam tan, God waenapan mega iravi munan den mup taiwanian.

¹⁹ Ne nenan den mup waiwanian, ap gapan ne wam wam nona watapingape-nawa, God nop nenepi gapan kaimakaet tumban amu yonap, waenapan Iesu Keriso Oit Mega Kakaewa bumagape wadiamuingan.

²⁰ Endi ap menan Keriso nop oit mega ian ugupe wadiamuingina menan pusin nanin nagana panane wanik angin. God inap mup wane ne Keriso menan nop waina ame kaimakaet di waingan.

Pol gaun mega uiwa

²¹ Apan Taikikas ne gwanina imuna wat kakayaseniwa amba Ayop God menan nao

kaimakaet taini apanewa ame ne oitana ge anenen taina uruga me wadiaeta.

²² Me ap menan ne inayap watu eni-angin ame nu anenen waninitoni uruga me wadiaeta, amba ago ene den wat tamanam imaeta.

²³ Mamanua God amba Ayop nuga Iesu Keriso gapan nonup ge baigan ge anu tumat muga inayap wande ep.

²⁴ God wat aipakam mega garaetawa uruga, Ayop nuga Iesu Keriso menan use-nagaet anu guriana nagirewa ame inayap wande ep.

PILIPAI

Pol ok mega Pilipai nagirewa inamup sen

1 Ma nu Iesu nao mega taitoni nagirewa Pol ge Timoti. Ok ma seaton God waenapan mega ge dugup gwanap nao taiana amba dugup namu yoyo nagirewa iragi at Pilipai gapan waineanawa, Iesu Keriso anu tumasiana menan gaun kaewa nuga inayap waianit.

2 Mamanua God amba Ayop nuga Iesu Keriso baigan nonup muga garaetawa inayap wande ep.

Pol mup megawa

3 Ne enan ase anuina wam wam God nega inap gaun ao wanivin.

4 Amba mup nega gapan iragi enan tainawa, ame pot pot atonu den mup taivin.

5 Iwa wam erewa gapan e ago nenayana menan God Nop Oit Mega Kakaewa wadiangina e anu tumat ta onaene endi ma tauaiana menan gaunaya waivin.

6 Ap menan God nao ibariwa inayap to bunaeni kakaevet di tanau aewan, ne anuingina me yaugai di tanau aiwandan e, amba Iesu taupei wamewa gapan taitmeta.

7 E iragi imuna potana wat kakayesen! Ap anuingapena kakae di iwa God nao mega tapen men garaet wat aipakam nimanegeni nao ame ne inanap taini mini e den enen wat aipakam imaiwan. Endi ne pusin nanin damiga taunegene gvat nokap wanik angina o vetanegene gapan God Nop Oit Mega Kakaewa tave iragena tantan mega taingina, ap gapan nop mega tavewa di ewamon. E ne den ap taitoni menan anu imaivin.

8 Ap menan ne mek ae di yawaet anu guran taina tavewa di, God me asigip tan, iwa ne iragi enan bumaga tatan da anu gurina ame Iesu Keriso me imu posewa enan anu gurini ne ap gapan anu imaivin.

9 Ap menan mup nega enan manega taivin. Imuya potaya God menan anu guriana ame kai ware bararae aiwandapina ap gapan anut iguine gapanawa ge

wat tat megawa gapan God baigan mega imuyap potayap yanepi gapan ta aisiwanian.

10 Amba koewa kakaewa ire yaoyao mega amba yawai, ap gapan kakaewa mega om tan ae ma waran. Ap anega tanewa koewa da ya panaeta, kakaevet di wainiene, Keriso sia tauat wani wamewa amba tauep.

11 Ap taiwaniampinawa inak ega gapan kakae guragut inayap bararae wandeta, ame Iesu Keriso inayap wandeni menan venaseta ap gapan God oya oya mega ge wa atonat mega wabawarameta.

12 Gwanin waina, endi ne inanap anenen da venasiwandiniwa e di yao anu kakayesen. Ap taingina gapan ago neniwandin yonan God Nop Oit Mega Kakaewa wasenam wasenam di angingin.

13 Menan ayop paewa ita nagirewa ne Keriso nao mega taingina menan waranegen gvat nokap bat nimanegene waingena mu iragi asigimup tane.

14 Amba evenan waina upi Ayop anu tumasinewa mu God nop oit mega wapen taiwanumune tap inamup wandeni uon tan iwa ne gvat noke waingena gapan dadak munan mu kin kin yonan waiwanumun.

15 Map anegawa tave di, waenapan upi Keriso oisewa opata gapan waiwanumune iwa mu mariu inanap tan noyame den tan waiwanumun. Go upinewa waenapan ago munat anune menan imumu ae bigat mutan waiwanumun.

16 Mu baigan inamup wandeni gapan waiwanum, iwa ne God nao neneni gapan God Nop Oit Kakaewa tantan mega taingina ame mu asigimup tane.

17 Go noyam waine nagirewa, Keriso Oisewa opata gapan waiwanumunewa muk mugenat anuine mini tan amba upi iwa mega eboewa den waiwanumun. Mu eboewa gapan tan iwa mu anune, ne gvat noke waingena menan mu itan aiganap sia baret wan taiwanumun.

18 Go endi ne ap menan ya anuivin, Ame dim da da uon, ne aton gapan di wanik angin iwa negin mega yaunewa da da gapan iwa mega tamanewa gapan o iwa

mega eboewa gapan waiwanumunewa, ame Keriso oisewa di waiwanumun.

Ap menan ne aton gapan di wat ta angingain.

¹⁹ Iwa ne asiginap e nenan mup taiana gapan amba Iesu Keriso guewa wat agoat nimanegiwandini gapan, panangen wanik angina wat vetanegep tau angain.

²⁰ Endi ne ma anu dao kaimakaet di anuinginawa gapan umam ta Iesu nao mega ae ya antapenain. Go kaimakaet tap wam ma endiwa ge wam wam pot pot inak nega gapan waingepenawa o bop tape-nawa ame Keriso yaua ao di waringain.

²¹ Go arita iragenawa ne inanapewa ame Keriso menan wanik angingain, amba bonigasepenawa garewa aigap inanap taueta.

²² Menan ne endi map anega piupa di wanik angingapenawa ame ne Ayop menan nao di ta angingain, ne endi om ansena da tain bonigatain amba Iesu den wanigain, ame kakae iragen o waingain ne asigip da ya tan.

²³ Ne oare, anu ise ase taivin. Piup ae veap Keriso den wainget anuivin iwa ap me kakae iragen.

²⁴ Go ne enan aigap iragen anuina menan piup ma gapan waingain.

²⁵ Ne mame anu di waingina, ne asiginap ame den iragi tanae waingep ago enap watue gapan e anu tumat ega ao dorep aton tai.

²⁶ Amba ne gwat noke wanik angina ae veap enan sia ongepenawa wam ame gapan e aton nega bararaep nenan Iesu Keriso wa atona tai.

Keriso me guegue nugawa

²⁷ Ap gapan dim dim da inayap venasepiwa, inak ega ek wat tamanamen Keriso Nop Oit Mega Kakaewa viriwa tan. Amba da ne yawaepen menan ongepenawa o da amba angep mondi oitaya anupenawa ame e kaimakaet tumban amun yonan imuya daiton tap gapan entan imaep, anu dao ega Keriso Nop Oit Mega Kakaewa gapan tan waran aisiwanian.

²⁸ Amba waenapan negin ansena da gapan enu yawae wapi tamu ya anune.

Ap tane gapan mu iman God wa koeam mume amba e inak eneta, ap tapi gapan anavi ega irewa ap mepe yawain.

²⁹ God ayamase taiana ame yan mega eneni ame Keriso anu tumasiwaniampen menan megenat uon, go ugu vegaek anu taneni e mini den anu tanapen men enen.

³⁰ Ap gapan ne tanaen waingena, wat ge tat nega gapan tanau angingina di yawanegiwanin, endi ne sia di gututugun ta angivin. Ap gapan endi e ne taina mini gututuguian di ta aisiwanin.

2

Keriso ayamat apanewa den bawarewa apanewa

¹ E inak ega Keriso den intum tayana gapan aro epura wariwanin. Iesu imua enan anu gurini gapan wabibigam imaiwan. E God Guewa den wainiana menan imuya ae wabibigamet den gare gare anu guriwanian.

² E ap taiwaniampina gapan ne daramura wa kakayaseta, iwa imuya daiton nomanagaet anuyan taiana menan, baigan gare gare ase ma taiana menan amba i guine wa enat tayan tavewa gapan taiana menan.

³ Ap gapan dim da tapen men tanewa ek enan anun gui togon tan apan apan ya ta taiwanian. Go etuya aoma wat otutamen evenae wai mun anu kakayasiwanian, ap gapan mu yaumu aigap waran.

⁴ Ek egenat inak ega kakaewa yamge mega megenat ya yao anu taiwanian. Go waenapan kakaewa muga men imuya den warep gapan taiwanian.

Keriso guegue mega taini mini taiwanian

⁵ Amba inak ega gapan tapen ge wapen taiwaniampinawa ame Iesu Keriso guegue mega taiwandini mini taiwanian.

⁶ Keriso me mek imua Mamewa God den daiton, go me Mamewa God amun mega wat nat gine daiton ya wanumot anun.

⁷ Me at mega God den wandeni go mek anuni gapan aro amun mega ae ve aoma vise amba apan mondigawa mini wanden, amba apan iragen mini yane amba nao mega ayamat taine nagire mini taiwandin.

⁸ Amba me apan iragen mini wandeni me etua ae wat otutame amba God aymat ontotu baware ta aiwandin eni boge korosi gapan tone bop tan.

⁹ Ap menan God wat nau dore at paina aigap iragenawa gapan barae yaua ao waren. Iesu yaua aigap iragen baraen amba apan yaua da ya garawaseta.

¹⁰ Menan Iesu yaua ame gapan waenapan kimaniwa, piupawa amba piup gaurapewa iragi i omani se i poe inap taiwanumain.

¹¹ Den waenapan iragi wa taragase anega waiwanumain, "Me Ayop nuga Iesu Keriso di!" Ap wapi gapan oya oya aigap God inap taueta.

Dun mini ganase den waniwanian

¹² Ap menan evenan wainawa, ne wataget tanae den waingenawa, e pot pot God ayamase taiwanian. Go endi ne mawanap e God ayamase kaimakaet aigap sia di taiwanian. Menan imuya potaya God inap viripe den nau ega tanau aise taitamen amba inak ewakewa tautanai.

¹³ Iwa mega God inayap nao ware ago enepi gapan me ayamase anuini gapan taiwaniai.

¹⁴ Menan wan dim dim iragi tapen tanewa arage makene den noyame notatae den ya wa taiwanian.

¹⁵ Ap gapan tanewa koewa da ya enu yawae wain menan imuya potaya woup sep wainiai iwa e God otu waiwa kakaewa. Go e waenapan koewa potap den tanamoyan iniwanin, menan e buanae sisipu ganase waini mini nimakamup wainisi.

¹⁶ Amba e inak munini nopewa wadidi-amuiana ap gapan Keriso sia taupei ne waingep aton aton inayap taingain, iwa nao nega gotutugun taingina ame mondigawa da uon, ap taingina namu tauapen menan serarat angena namu tauan.

¹⁷ Anse ne mapa bonigasepen denip nega tau vise dam wapi yan garaet mini God inap wanain, ame e taiana mini iwa e anu dao ega God inap taiana ame inak ega yan garaet ase God inap di wanayan. Menan God anu tumaseana menan ne garewa bonigasepena bagu sisi ya anuin aton anuina e den aton anun.

¹⁸ Ap umap aton anuiana ne den aton anuin.

Apan Timoti ge apan Epapodaitas

¹⁹ Ayop Iesu umap wapi gapan ne Timoti konintu enan watu enapen oneta. Menan amena taiwaniana oisewa inanap tauue atonu anupen menan wanik angin.

²⁰ Amba orup da Timoti umapewa mapa da uon, amat kwayup tamana tae tae.

²¹ Den waenapan upinewa muk inak muga men yamge mega yawane taiwanum. Amba Iesu Keriso nao mega men da ya anuiwanum.

²² Amba Timoti guegue mega e iragi asigiape tayan, nu Iesu Keriso Nop Oit Mega Kakaewa wadiamuinton gapan me orup da mamewa ago wanini mini me ago tanegen.

²³ Amba ne inanap anenen venasepi yawapena amba Timoti menawaet inayap watu enain.

²⁴ Ne Ayop yaua gapan kin kin di waivin, Ayop nuga ago nenepi gapan ne nek inayap konintu ongain.

²⁵ Amba ne gwanina apan Epapodaitas, ne tananegen nao dere taitoniwa ge Keriso nop oit mega wadiamuinton ame ago menan bambam taingin watu enayan nenan onen, ap menan endi e itan bagu sisi wariana menan ewagai sia watu enapen enan sia oneta.

²⁶ Iwa me vek tan oisewa anuyana menan warden enan gop yagiren one iragi yawaepen men ae di anu guriwan.

²⁷ Tave di, me vek waren bop konintu tapen di tan, go God bagu sisi menan anuni gapan me wandia, me megenat uon go ne bagu sisi anuana aigap sia anupena tawa menan God nenan den anun.

²⁸ Ap menan endi Epapodaitas watu enapen enan oneopen megenat di anuivin, ame tauep ase yawane e aton anui, amba ne enan garin enuini uon tata.

²⁹ Amba me taupei, Ayop yaua gapan atonu den waupan, amba den waenapan upi me umape tauepiwa ap anega virimu den tamuiwanian.

³⁰ Iwa Keriso nao mega taiwandin enan wat agoat nimanegeni bop tapen tan menan waupan.

3

Negin tamana gueguewa mega

¹ Gwanin wainawa Ayop inayap wan-depi imuya potaya aton no dotouep ta aisiwanian. Ne nop mame wataget inayap seana endi sia seapan men tanda ya anuivin. Iwa e sia batnagene nop ame kwayup taeta onana geane tawa.

² Ap menan yamae meret wap waenapan inak koevet eyao mini tainewa ame ae yawamon. Mu anega waboborane, "Apan da da God wat inakam mumat anupi namu epimu paua di tum tap," ap anega wan.

³ Amba nu God nuga iragena antanepen men paua tum tanene nagirewa ame nu, iwa nu God Guewa gamup God wa taragasivin. Ame Iesu intum tatoni menan aton aigap taivin. Amba iup guegue mega gapan ya anu tumat taivin.

⁴ Orup da iup guegue megawa tai-wandin waenapan yawane gapan me apan kakae diaene. Gosi ne Diu iup muga guegue taingina waenapan yawane-gene ame kakae iragen dianegepo iwa iup guegue mega ne aigap taingina menan.

⁵ Ne yanan wam nani yamunaet yamu yampo uon tani amba God dugup mega entanapen menan paua etuna tum tanegene. Ne at Isurero nagire apan muga da dugup nega Bendiman. Den ne Iburu waine nagire apan muga iragena da. Ne apan Mosis iup mega kaimakaet waran angina ap menan ne dugup Parisi na-girewa apanewa tan.

⁶ Ap gapan ugu gangan kamakaet tan Iesu anu tumasine nagirewa guramon wakokoeam mumapen menan taingin, den ne Mosis iup mega waran taingina tamana warat taingat anu nimanegene gapan ne iup iravi taitamingin.

⁷ Ne wataget inak mame taingina kakae anu taingin, go endi inak nega Keriso warana gapan ase anuingina inak namua ame tave uon da taingin.

⁸ Endi inak nega namua taingina ap me megenat uon, go anuingina dim da ugup ugup namua ame iravi tavewa da uon, Ayop nega Iesu Keriso anutoni gapan ame kakae guragut mega anuina ame aigap,

inak namua nega om ame da ya inen. Iwa ame menan anuingina gapan wan dim dim ame koe dian ae veana gapan Keriso warapen men megenat taivin.

⁹ Amba endi ne God inap kakae tan wanik angin iwa ne iup namua kwayupe taingina menan uon. Go iwa ne anu dao nega kaimakaet Keriso inap taingina menan, God anu dao nega ame yaveni gapan tanegen kakae tan wanik angin.

¹⁰ Amba endi ne anuinginawa Keriso yao kakayaset anuivin amba me boe sia yon wandeni amun mega wara taingat anuivin. Den vek ugu vegaek anu wat ire taiwandini ne ap umap tap amba me waenapan munan boeni mini ne ap umap bonigaset anuivin.

¹¹ Menan nek anuinginawa God wae-napan mega borit wane wap ao sia yon wanumopi ne den bop gapan ao yon wani-gain.

Tonan noa tauapen menan nanamu anepen

¹² Ap gapan ne Keriso guegue mega ne ya taitamen amba inak nega gapan kakae iragen ya tan, ne ap menan ya waivin. Go ne iki enun di tanau angingan ep ganganaset nega wat anun taivin. Iwa Iesu gaset tonan no namu taue ganganat nimanegen.

¹³ Gwanin waina, ne tonan no tauapen menan nanamua angivin go ya di tauian-gin. Go ne wam wam da taina ame, inak nega namua imu oarasen ae vean, amba iki enu namunape wandini tautanapen menan usenagaet ta angingain.

¹⁴ Ap menan ne epa enan utu tonan no taua garewa warat anun di taivin, ame yaibobot inage kimaniwa, Iesu Keriso gamup God nenapen menan nenan wani di neneta.

¹⁵ Endi nu God nop mega gapan kai wat doratoni nagirewa ame ne anun taina ap umap den anun taiwanian. Go e upi anut ge tat ega ugup wandepiwa, ame God me wadiaepi gapan iae namu woup am seta.

¹⁶ Go nu endi nop tave iragena gaset namu waratoni ame ewap di ta aninam-pen.

¹⁷ Ap menan gwanin waina, e iragi ne guegue nega Keriso menan ta ewaena ame waran taiwanian. Amba waenapan upi inat wanumot muga tamanawa gapan ininewa, endi nu wadiaentoni ame yawa-mon gapan ta aisiwanian.

¹⁸ Amba ne nop ma wam wam da wadiaina di endi sia irin den wadiaivin ame waenapan arugataet inat wanumot muga gapan Keriso oma korosi gapan nunan boeni tandayasiwanum.

¹⁹ Mu epimu dansewa mega gapan tainewa, umam noa taine menan waen waen apan apan tainewa amba mu piup ma wandini dim mega men imumu wat kakayasen tainewa. Menan wam uiwa taupei gapan mu iragi oma yame arewa amoin.

²⁰ Go endi nu at nugawa aupa kimani wandia, amba nu inak ewakewa nuneni apanewa Ayop Iesu Keriso aupa kimaniwa tauapen menan amasewa taivin.

²¹ Me taupei gapan evi wan dim dim iragi me gauarap semopi aroewa gapan etunu kwekwera puakainiwa me etua kakae iragen ganase denawa ap umap etunu entan tata.

4

Ayop Iesu inap aton anun

¹ Ap menan gwanin waina, ne imuna inayap waren amba den yawaet anu gurivin, iwa e aton nenayana menan ne gare atonuya taivin. Menan evenan wainawa inak ega Ayop gamup ap anega kaimakaet tumban amun yoniwanian.

² Waen Yuodia ge waen Sintiki, wapena anun. Notatae ae yean Keriso menan anut daiton anun wanien.

³ Menan nao daitonawa, itan nega wat bemagianawa, ge waen dere ame wat agoat mum. Iwa mu ago nenine gapan God Nop Oit Mega Kakaewa wadidiamuitoniwa, Apan Kelemen waenapan upi den iragi tanamo aneton. God inak nunini bukaewa gapan yaumu seni nagirewa.

⁴ Ap menan aton inayap bararaep pot poraet Ayop inap taiwanian, den sia diaen anega di waivin, aton di taiwanian.

⁵ Ap gapan inak ega ae wat gwen gwenasene waenapan iragi yawaep iwa Ayop konintu tauapen taiwan.

⁶ Ap menan wan dim dim men gop ya anuiwanian, go dim dim da menan anunewa God inap gaun den mup wan.

⁷ Ap gapan God nonup baigan mega kanama iragen nu da ya anu avitonowi, ame gapan imuya potaya wat enasep Iesu Keriso den daiton tan.

⁸ Amba gwanin wainawa, nop gaset waingina uiwa mega ame, imuya potaya iravi anut kakaewa tam enan. Anut tavewa kakaewa tamanawa wanum am. Posewa woup seni noa wanum am. Dim dim kakaewa yawamopen men den wanum am. Guegue kakae ugup ugup yawane God inap gaun wapen den wanum am. Dim dim atonu anupen men wanum am. Anut kakae ugup ugup ameme darinayap anu aisiwanian.

⁹ Ap menan ne inanap dim da da yawa anu warayanawa, ame iragi waran guegue tayao wareyao gapan taiwanian, ap tane gapan God baigan nonup mega inayap wandeta.

Pol Pilipai nagirewa gaunamu wan

¹⁰ Ne Ayop inap gaun aritawa da waingin, iwa inak nega Ayop den wanik angina gapan, e nenan anuyan. E namu kwayupana ta anuiwanian go aroga ase ta yawa yawa neginewa da uon. Endi kwayup nenan sia di ta aisiwanin,

¹¹ Ap gapan ne waingina wan dim dim da men anuina ame inanap uoniwa ap me menan ya waivin, go ne nek yao anupen taivin ame wan dim dim da uon wandepi ne aton anuivin.

¹² Endi ne wan dim dim menan bambam tapena ame negin ansena gapan ininga ininga yaunewa yao anun amba inivin. Amba wan dim dim inanap maup wande wande negin mega den yao anun amba inivin. Den karauawa guegue mega yao anun, inak aru mame inanap da venasini ame, da taba poututuma napenawa, da enup agut angepenawa, den wan dim dim inanap otu dere go aruga wandepiwa, ne iragi mame gapan, aton megenat.

¹³ Iwa Keriso gamup, me aro nenepi gapan wan dim dim ma iragi taingain.

¹⁴ Go itan natanegen wat bemak nimegeana ame kakae di tayan.

¹⁵ E pa Pilipai nagirewa, anuiwanin ne Iesu Oise Kakaewa ere wadiaena amba pa pa upinewa, at Masedonia gapan, ae ve angena Iesu dugup mega nagire upi ne den yan gare gare ya taton. E egenat ta warit nimanegean.

¹⁶ Amba ne pa sewa Tesalonaeka gapan waingenawa e wam da da gapan ne wan dim dim yan garaet egenat ago nenayan.

¹⁷ Ne nop mame waingina wan dim dim ega mondi ase ma tambupen menan ya waingin, go garewa inak ega kakaewa God enapen menan taingin.

¹⁸ Ap gapan ne enan taingina garewa mega nenayana iragi tambun umanap tan amba upi ensenumen taue aigap den aen. Endi ne menan di anuingina mame, yan ega seayana iragi Epapodaitas tambu taue nenen. Yan ega ame tayana tutua sisimare den man tone irine sisimarewa ame dagine den God menan doren aen amba God sisimarewa ame anuini imua ae bigaren aton anun.

¹⁹ Amba endi e wan dim dim menan bambam taiwaniampina ame Iesu Keriso gamup maup kakae guragut itapue den iman God nega eniwandata.

²⁰ Amba Mamanua ge God nugawa inap oya oya usenagaet wan anivinain. Ame umap.

²¹ Amba Iesu Keriso yaua gapan God waenapan mega inamup gaun nega wadiamon. Den tatan gwanin mapa tanamon wainginawa gaun muga inayap watu eniamun.

²² Den mapa God nao mega taine nagire inayap gaun waiamun, go gaun aigap iragenawa ayop bawarewa apan Sisa pa mega gapan nao taine inine nagirewa inayap waiamun.

²³ Ayop nuga Iesu Keriso wat aipakam mega garaetawa inayap wande ep. Ame umap.

KOLOSI Pol ok mega Kolosi nagirewa inamup sen

¹ Ok ma, ne Pol, God anut mega gapan om enunegen, Iesu Keriso wa ewamot mega apanewa da amba gwaninu Timoti dere sianit.

² Ame tatan gwanin, at Kolosi gapan imuya potaya woup seni ge Keriso inap anu tumat kaimakaet taiana nagirewa inayap sianit.

Amba God Mamanua wat aipakam mega garaetawa ge nonup mega inayap wande ep.

Pol wa atonat ge mup megawa

³ Nu wam wam pot pot Ayop nuga Iesu Keriso Mamewa God inap enan mup waitoni ame gaunaya me inap den waivin.

⁴ Ame iwa e oitaya anutoni ame e Iesu Keriso inap anu tumat tayan amba God waenapan mega uruga munan den anu guriwanin.

⁵ Ame taiana iwa e garewa ega diri gagap kimani enan wandini oisewa gaset Keriso Nop Oit Mega Kakaewa gapan anuyan, ap mepe anu dao di tayan aisiwanin. E anu gurat ge anu tumat ega ap gapan tauwan.

⁶ Keriso Nop Oit Mega Kakaewa anuyana mame, piup ma at at iravi seset wan yanen aen tave iwan. Ame God wat aipakam mega garaetawa oisewa tave iragena ere anuyan, inak ega wat entaneni ap umap inak ap anega entan tamon aewan.

⁷ God Nop Oit Kakaewa mame, nu nao nuga daitonawa imunu wareni apane Epaparas inap anu awa warayan. Me Keriso menan nao kaimakaet taini apane da amba ago nuniwan.

⁸ Me e God Guewa warayan gapan baigan tayan waenapan upinewa munan den anuyana ame oitaya wadianen anuiton.

⁹ Mame menan nu ere oitaya anutoni gapan God inap mup enan taintoni ame ae ya veton. Nu mup manega waivin, ame

God anut mega anuini, ame anu kakayase amba imuya potaya gapan no di dotouep, amba Guewa Pose Woup Seni anut go dima mega e di anu kakayasepen.

¹⁰ Ap gapan e inat waniet ega uruga Ayop gamup inak kakaewa ge me aton wanapen menanaet di ina wanie taiwaniampen. Amba inak kakaewa tanewa aigap aigap sia kakaevet taiwaniai. Ap gapan kai wara dora guegue mega e anu kakayasiwania.

¹¹ Amba mup enan den taitoni ame, God aro amun mega oya oyaen den aigapewa gapan epaen enep, nao mega ae ya veane go imuya potaya aton bararaep, yaemantu wanien, tata kakayat ta aisiwaniampen.

¹² Amba den e God Mamewa inap, aro nuneni menan, gaun pot pot waiwaniampen iwa e God toemu mega ganase dena gapan wan dim dim kakae guragut, God waenapan mega yon borapen wa agiat muneni ame e den unasepen menan epaen ene umap wan.

¹³ Iwa nu sisip epaen mega koewa gauarap wainintoni, God wat vetane tambune. Me Otua imua inap wat kakayaseni ame toemu mega potap enanen.

¹⁴ Ame nu inak nuga koewa menan, God Otua gamup vetane ewagai sia tambunen.

Keriso me aigap iragenawa

¹⁵ Keriso me God karauawa ya yavintoniwa ame wapiwa mega tamanawa di. Keriso me namu iragen di yane wanden amba God piup kiman ge wan dim dim uruga amba tan venat mutan.

¹⁶ Iwa Keriso gamup wan dim dim uruga venat mutan. Ame wan dim dim kimaniwa o piup gapanawa, ya yavintoniwa ge yavintoniwa amba kimaniwa aro amun ugup ugup o piup ugup ugup warane namu yo yo tainewa nagirewa, o gare piup ayopewa amba wagup aigapewa mame warane wanumoine watarewa, ame iravi me gamup venat mutan amba me yaua menan megenat di.

¹⁷ Keriso me namu iragen di wande oniwandin amba wan dim dim uruga ewap venase tau aen. Amba wan dim dim mame uruga me wat nasen wandia.

¹⁸ Amba Keriso me nu namu yoyo nuga amba dugup nuga i apanewa. Me

ibariwa amba bop nagire nimakamup namu inakae yon wandenawa. Ap menan wan dim dim uruga mame Keriso namu yoyo mega gauarap wanumamun.

¹⁹ Iwa God mek anuni menan mek yaunewa mega iragena uruga Keriso potap wandia.

²⁰ Amba God, Keriso gamup wan dim dim uruga sia bongame megawa wapentan. Ame Keriso korosi gapan boen deniwa viseni gamup, wan dim dim uruga piupawa ge kimaniwa inamup nonup mega ware enasen amba me inap bongamene ame megawa di.

²¹ Watagaet e inak koewa taiwaniana gapan God den imuya ega gan anavi taiwanian amba God vea ugup paina wainean.

²² Go endi me Keriso etua boeni gamup sia bongam imae amba me gamup enat imae. Ame tani e God yampim imuya potaya kakae woup am sep di waniepen, amba bigip mandogae da gamuyap ya wandepen den koewa da gapan enu yawagen ya tae wapen.

²³ Ap menan e anu tumat ega Keriso inap di ta aisiwaniampina ame tu dorane kaimakaet di yonep. Amba anu dao ega gaset Iesu Keriso Nop Oit Mega Kakaewa gapan anu warayana ame ae veane tapae asira ya aep. Iesu Nop Oit Mega Kakaewa mame anuyana ame piup ma uruga opata gan wadiamone anune amba ne Pol nop mame ayamat mega taina apanewa.

Pol God waenapan mega wat agoat mu-miwandin

²⁴ Endi ne enan ugu vegaek anun wat ireana menan aton anuivin. Amba Keriso etua gapan dugup mega menan vek ugu vegaek anu taneni ame guegue mega ne etuna gapan Keriso menan di wat it kakayasep, anenen tani ame ne di ta itamet anuivin.

²⁵ Ne Keriso nop oit mega ayamase taina ame God e enan nao mame nene epa neneni gapan ne God nop mega warap uruga wadidiaepen.

²⁶ Ame en arugataet da, waenapan naewa naewa yan onam wanumune gapan, God nop mega mame iwa mega tave iragenawa, ame karaua gungunu

wande en. Go endi God waenapan mega inamup aroga matagaen, tavewa wat arogamiwan.

²⁷ God nop mega mame, tavewa mega gungunua wardeni amba kakae guragut oya oyae den arugataet, God mek anuini gapan e iravi, me waenapan mega, ame e ian Diu uoni nagire nimakamup yao anu kakayasepen menan om enumon. Amba iwa mega tave iragenawa ame, Keriso e potayap wandia. Keriso me gamup God kakae guragut mega, oya oyae den tau-tanai.

²⁸ Ap menan nu anut ge dima nuga gapan Keriso oisewa waraton at at iravi, waenapan uruga kaimakaet, tagigire den aigap aigap sia wadidiamuivin. Iwa nu waenapan wadiamot, God yampi, mu Keriso nop mega tavewa di anu kakayase kai warat menan taivin.

²⁹ Amba endi onin en wam ma tauini gapan, ne Keriso aro amun mega aigap iragen potanap nao warini gapan epa mega uruga Iesu gamup nao kaimakaet tan Keriso oisewa waenapan wadidiamuivin.

2

¹ Ne imunap, ne enan anenen nao tan wat iran wat kaimagamen taina ame menan e di anupen. Amba God waenapan mega pa sewa Leodasia wanumune gapan amba waenapan uruga ya yawangen Iesu ewap amuine nagire munan den ap anega anuivin.

² Ne ap anuingina iwa ame ne yaentuk wawa bibigam tamopen, mu imu potamu daiton tap amba baigan gapan tobob ta wanumopen menan anuivin. Ap gapan God anut mega karauawawa ame Keriso di mu anu kakayasepen menan anuivin.

³ Iwa Keriso inap anut ge dima kakae guragut ugup ugup ame ukum umen wandia.

⁴ Ne mame wadiangina iwa waenapan da wababayen imae nop kaimake den diae gapan imuya potaya ya warupet anuivin.

⁵ Iwa ne tawana nega waran mapa paina ugup di wanik angin go guewa gapan ne amena inayap den di wanik angin. Amba atonuya anut anuingina ame

e tamanagaet guegue ega tamanawa ge anu tumat ega anenen kaimakaet Keriso inap taiana ame yawaet anuivin.

⁶ Ap menan e imuya potaya gapan Iesu Keriso Ayop ega warayana menan Keriso e potayap den di in aisiwanian.

⁷ Ame inak ega Keriso gamup verane yane kakayasep amba me gamup tu doriwanian. Den Keriso nop mega wadiaene anuiana gapan anu tumat ega wat kaimagamene kai warep amba gaun Keriso inapaet waiwanian.

Keriso nunan tani umap di tan

⁸ Waenapan da anut muga eboewa ge nop muga pokaetawa gapan ya wa upae tambuep. Nop ap miniwa men ae yao kakayasen. Ame piup ma eparae mega koewa ge apan muk anut muga gapan seanewa go Keriso me inap uon.

⁹ Iwa, wan dim dim uruga God inapewa ame Keriso apan mini yaneni gapan, me waren potap wandia.

¹⁰ Amba God wan dim dim uruga mame e enen iwa e Keriso megawa, me piup kiman gapan aro amun ugup ugup uruga namu yoyo mugawa.

¹¹ E Keriso inap anu tumaseana ame e Diu nagirewa etumu tum taine umap di tayan. Ame e waenapan nanimu gapan etuya tavewa tum ya tane go Keriso me etua gapan e paua taen. Amba inak koewa gapan waineana ame, me wa pakisen.

¹² Iwa e dup iayana gapan, imuya koewa namua Keriso gamup korup den unugean. Amba God aro amun mega gapan Keriso wan bop gan sia inakae yon warden, ame aroewa gapan anu tumat taiana menan e Keriso den bop gapan ao sia yon wainean.

¹³ E watagaet koewa ega gapan borit wa wainean. Amba Keriso paua mega da wapiap ya taene, ap gapan e koewa ega potap di wainean. Go endi Keriso gamup God inak ewakewa enen. Me nu uruga koewa nuga anu ae ven.

¹⁴ God nu koewa taintoni ogewa seni ame wat musen uon tan. Amba koewa nuga garewa ok sia sen wardeni ame wane Keriso den korosi gapan ton uon tan.

¹⁵ Amba ap tani gapan, aro amun koewa warane namu yoyo taine nagire God epara

muga uruga waseamon. Amba aro amun muga waenapan uruga yamamup Keriso korosi mega gapan to bigame, garao munmen.

¹⁶ Ap menan, e dim dim da naiana ge ya naiana gapan waenapan arok ve munane, wawa koko tae ya enu yawaе waiwanuman o dugup barip mega wamewa da, o wam aritawa wamewa da, o wagat wamewa da men aton ya taiwanampina menan ya enu yawaе waiwanuman.

¹⁷ Iwa iup ge barip aru ame wataget iriwanumune, inak tavewa ame endi Keriso inapewa ame mondi guewa yawan ta wa onam wanumune. Go inak tavewa ame Keriso gamup megenat di wandia.

¹⁸ Amba waenapan da muk inak muga eboewa taine munan ya wababayn imaep. Mu bet ine anea yawamo wapi gapan, anea wa taragat mumat diaepi ame nop muga ya di anune. Ian mame muk etumu ae wat otutamet wa taiwanumain go iae guine muga koewa bararaeni gapan muk oyok ene wa taiwanumain.

¹⁹ Mu Keriso den intum ya tane. Nu Keriso dugup mega nagirewa ame, me etua amba Keriso nu ian bariwa. Me nu guin pakao nuga ai bongamen, wat tamanamen, enat tanin. Me gamup etunu daiton tainiwa. Amba nu epara nuga ge etunu antaba mega kakaewa ame God inap megenat waraton kai warivin.

Iesu den borit waton den yon waineton

²⁰ E Keriso den borit wayana gapan, piup ma guegue mega koewa ge aro amun mega ugup ugup gapan Keriso wat vetaen. Menan, iwa dimen e sia piup ma guegue megawa ge iup mega anen wani ame ewap aisean ayamase taiwanin?

²¹ Iup ame upi anega waiwanum, “Nanniap ya wat natane, o da ya nane, o nanniap ase da ya inatane.”

²² Iup mame waiwandini wan dim dim mega ame danamep uon tata. Iwa mame mondi apan muk nop muga ge anut muga gapan seane wadidiaiwanum. Ame God iup mega uon.

²³ Amba iup ame wadidiaiwanumune yawat mega anut kakaewa di waiwanumun, den wa taragat yaunewa apan muk iamup tane, aopan aopan muk etumu

wat otutamene amba muk ingane etumu togurane wa koeamene taiwanum. Go iup ame gapan muk ingane anut muga koewa tapen menan nanam mumini ame ya wat tamanamiwanum.

3

¹ Amba e gaset Keriso den bop gapan ao sia yon wandeni gamup inak ewakewa warayana menan, wan dim dim aupa kimaniwa ame Keriso God mainewa nutup gapan den wandini ap me munan anuiwanian.

² Imuya wat tamanamen, wan dim dim aupa kimaniwa menanaet anuiwanian go piup ma guegue megawa menan ya anuiwanian.

³ Iwa e inak ega koewa namua Keriso gamup den borit wayana gapan endi e inak ega God inap amba Keriso den wandia.

⁴ Amba iman Keriso e inak ega iragenawa, sia tauepiwa ame e me den oya oya mega gapan tauai.

Guegue nuga namua ge ewakewa

⁵ Ap menan, piup ma guegue mega koewa gapan dim dim da potayap den karaua wandepiwa ame den togurane uon tap. Ame wainan gogo taianawa, inak koe koevet taianawa, imuya yagirin agaga taianawa, ame mek ae di vean. Iwa gau waiana gapan god ega ap me di.

⁶ Waenapan da inak koe koevet ta amba God ayamase ya taiwanumampinawa God nemoro mega inamup taueta.

⁷ E watagaet inak ega gapan inak koe koewa mame den ta aisiwanian.

⁸ Go endi e gamuyap inak upi map anegawa den ae di ve kakayesen. Ame, ugu gangan anuiyanawa, noyam notatae kaimakaet waianawa, evenae wai enu guramo wa koeam mumat anu gurayan taianawa amba noya gapan nop ani aninke den waianawa.

⁹ Ek gare gare ebo aopan ya waiwanian, iwa e tawaya inak ega namua gaseget wa totnak aipa uat enayan.

¹⁰ Amba tawaya ewakewa, inak ewakewa den wara gamuyap barayan. Ame anut ega ewakewa, God men anuiana gapan mek taeni menan me umap entan

imaep amba God guegue mega anu kakayesen.

¹¹ Inak ewakewa ma gapan, ge Diu o Diu uoni da waingewa, ame koewa da uon. Gare God paua mega men etuya tum tanewa go ya tanewa, o watageta isimurae wai yaunewa muga gapan di wainisianawa o pu nagirewa umap wainisi amba nao mondi kaimakaet taianawa ge anut ega ega gapan taiana nagirewa, ame Keriso me uruga nugawa amba me iravi nu potanup wandia.

¹² E God yamap imuya potaya woup am seni nagirewa, enan anu gure om enueni ap menan inak kakaewa gane gorogose enan waenapan munan den bagu sisi anun ta warit tamuiwanian. Amba ek ingane ae wat otutamen, yaemantu bigat itan ginaet yamaet gan wanien.

¹³ Amba ago gare gare tan, anu bambam ega gare gare den vetan, orup da koewa inayap tapiwa gapan koewa mega anu ae viwanian. Iwa Keriso koewa ega anu ae veni menan.

¹⁴ Amba inak mame uruga taiwaniamrina ame aigapewa baigan wat baraen. Iwa inak guegue kakae mame uruga ame baigan waren tobob tain kakae iragen daiton tainiwa.

¹⁵ Den Keriso nonup mega warane imuya potaya wane namu yoyo tap. Iwa e uruga Keriso nonup mega gapan wa upaen etuya daiton tan. Ap menan nonup gan wanien. Amba inak ega gaunewa pot pot Keriso inap waiwanian.

¹⁶ Keriso nop mega waran potayap baraene bararae wande ep. Amba nop mega potayap bararaepi gapan, gare gare kaimakaet wadidiam sia darinewa ao gare gare anut aigape gan taiwanian. Ap gapan imuya potaya aton barayaep amba God nop mega imuya wat kakayasep amba wa atonat wagewa ge guewa gapan waiana wagewa uruga God inap waiwanian.

¹⁷ Amba dim dim uruga, nop ega gapan o tat ega gapan taiwaniampinawa, ame uruga Ayop Iesu yaua gapanaet di taiwanian. Ap gapan Iesu gamup Mamewa God inap gaun waiwanian.

¹⁸ Waen apan naimoyana nagirewa, memae waia nop muga anun gapan viripamu taiwanian. Iwa Ayop waenapan mega ap anega tainampen.

¹⁹ Apan waene waiwa inamup imuya wat kakayasep munan anu guran amba tandaen ya yawamo waiwanian.

²⁰ Amba e orup otua, wan dim dim uruga taiwaniampina gapan, inae mamae nop muga anu waran ayamase taiwanian. Iwa ap anega tanewa Ayop atonuya anui-wandata.

²¹ Amba ine mamewa, orup otu ega inamup imumu ya wat sisimiwanian. Ap tane imumu wat dapanamene, ago ya enain.

²² Amba e nao mondi kaimakaet taina nagirewa, ayop ega piupawa nop muga wapi anu waran ayamase taiwanian. Ame yamamu inayap wandepi ge imumu warupane enan anupen men ya taiwanian. Go imuya potaya ae bigarep, kakaevet tan amba Ayop Iesu virip mega den taiwanian.

²³ Dim dim da tanewa ame, imuya potaya gapan uruga nao kaimakaet taiwanian. Ame Ayop Iesu menan nao tainewa ap mini di taiwanian go apan menan uon.

²⁴ Menan e asigiap di, e iman Ayop Iesu nao mega nagire wan dim dim me inap unaset wani ame garewa ega warai. Iwa e Ayop Keriso menan ayamat taiwanin.

²⁵ Go orup da inak koewa tainiwa, me iman koewa mega ame garewa wareta. Amba koewa taine inamup God me kakaeven ya tainiwa.

4

¹ E bawarewa nagirewa, nao enan mondi kaimakaet taine nagire inamup, inak tamanawa gapan yambuni ago munan. Iwa e asigiap di, ame e bawarewa ega da kimam gapan den wandia.

² Amba inak ega gapan God inap mup pot pot taiwanian. Ame gapan wanien nene yaman tan, imuya potaya gan God inap gaun waiwanian.

³ Amba mup nunan den waiwanian-pina, nu God nop mega waenapan wadiamopen menan God negin watap nunep. Ap gapan nu Keriso nop oit gungunua

mega uruga wadiamot anuivin. Iwa ne endi nop ap waingina menan pusin nanin panan, gwat nokap bat niman negene wanik angin.

⁴ Den nenan God inap mup wane ne Keriso nop oit mega waenapan wadiamopena, ame aroga iragen amba tavewa gapan di wadiamopen anup.

⁵ Iesu ya anu tumasine nagire inamup dim dim da wapen tane ame ae anu guran amba waiwanian. Amba wat ge tat arogawa da enepi, ame ae di danam kakayasen.

⁶ Amba nop ega den tanam wapen tane ame guegue ega kakaewa gapan yae-mantu wadiamone mu anu kakayasep. Ap gapan mu singui tangui da wayawaepi, e garewa tamana di wadiamon.

Apan Tikikas ge Onesimas

⁷ Ne evenana kakaewa apan Tikikas, da men anu gurtoniwa, amena inayap tauepi, ame ne anenen wanik angina oitana wadiaeta. Me Iesu nao mega kaimakaet taini apane da amba nu dere Ayop ayamase taitoni nagirewa.

⁸ Ne me inayap watu eniangina ame iwa, nu inak mapa anenen tautanitonu wadiaep anupen. Amba imuya potaya den wat gitnagepen.

⁹ Tikikas onepi, e dugup ega daitona apanewa, Onesimas den tane oneta. Onesimas me nu evenanu kakaewa da men anu gurtoniwa amba nu den daiton Iesu Keriso kaimakaet anu tumasitoniwa. Mu mapu dim dim uruga venasini ame wadi-aep anui. Me e den pa daitonawa.

¹⁰ Amba apan Aristakas dere gvat nokap wanin antoni apanewa ge apan Banabas ugarewa Mak dere gaun muga inayap watu eniamun. Amba Mak amena inayap tauepi ogewa watagaet sean yawayan, me tauepi di waupan.

¹¹ Apan Diosua yaua dawa Diastas, me den gaun mega inayap watu enia. Diu Iesu anu tumasine nagire, apan yampo mame mugenat nao nega daitonawa nagirewa upine den tanamon God toemu mega navewa taivin. Amba mu ne kwayupana aigap da tane.

¹² Den e at pa ega daitona apante, Eparas, me Iesu Keriso ayamase tainiwa, ame gaun mega inayap watu enia. Me enan mup pot pot kaimakaet God inap taiwan. Ame e God anut mega anuini gapan di waniepen ge me gamup kai waran doran anut mega di anu kakayasepen.

¹³ Ne me menan tamana anega wadi-aiangin, me e enan amba pa Leodasia amba pa Airapolis nagirewa munan nao kaimakaet da wat iren taiwan.

¹⁴ Amba evenanu men anu gurintoni, dom gigit anut aigape wareni apante Luk ge apan Dimas den gaun muga inayap waiamun.

¹⁵ Tatan gwanin, Iesu anu tumasine nagirewa pa Leodasia gapanawa, amba waen Nimpa ge Iesu anu tumasine nagire pa mega gapan iamuine ame gaun ge kaewa nuga den wadiamon.

¹⁶ Ok nega mam, nimakayap batnagep anune, sia wat watu enane Iesu dugup mega nagire pa Leodasia den inamup batnagep anup. Amba e gare ne ok dawa inamup seana den waran batnagen.

¹⁷ Amba apan Akipas nop nega anega wadian, “Ayop God nao geneni ame yao itame di ta itam, go yaumakap ae ya vea.” ap anega wadian.

¹⁸ Ma ne Pol, nek nanina gapan gaun nega siangin. Gwat nokap wanik angina men agun anu nimanegiwanian. Amba God wat aipakam mega garaetawa inayap wande ep.

1 TESALONAEKA

Pol ok mega Tesalonaeka nagirewa inamup sen

¹ Ok ma ne Pol amba apan Sailas ge Timoti tanamon siangin. Ame e Iesu dugup mega pa Tesalonaeka nagirewa God Mamanua ge Ayop nuga Iesu Keriso den tobot taiana, inayap sivin. God garaet wat aipakam imaepl amba nonup mega inayap wande ep.

Pa Tesalonaeka nagire anu tumat muga gaunewa

² Nu wam wam pot pot God inap mup waitoni ame e iravi enan gaun den waivin amba mup enan den taivin.

³ Ame nu Mamanua God yamap mup gapan enan waitoni, ame e anu tumat ega gapan nao kaimakaet taiana amba baigan ega gapan waenapan wat agoat mumiana ge anu dao ega Ayop nuga Iesu Keriso sia entan taupei inap kaimakaet taiana. Amba itan bagu sisi wat ayameana ame guegue ega den anuivin.

⁴ Iwa nu asiginup, tatan gwaninua e God enan anu gure, om enuie mega ganganat imaepl nagirewa.

⁵ Den iwa nu God Nop Oit Mega Kakaewa wat enan onantoni ame mondi nop iragen megenat ya wat onanton go nop ame aroe den amba Guewa Pose Woup Seniwa nop mega tave iragenta gapan imuya potaya wat entanen e anu tumat tayan. Amba nu guegue nuga gapan e yao anu kakayasepen men amena inayap inat taintoni e asigiap di, ame e kakaewa ega menan taton.

⁶ Ap gapan e nu ta ewat nugawa ge Ayop nuga Iesu ta ewat megawa ame di warayan taiwanin. Amba e itan bagu sisi den kaimakaet wat yapa taiwanian go God nop mega Guewa Pose Woup Seni ware eneni, e atonu den God Guewa waupaen warayan.

⁷ Ap menan Iesu anu tumasine nagire at Masedonia ge at Akaia gapanawa ame e guegue ega kakaewa ta ewamoyana gapan warane taiwanum.

⁸ Amba Ayop God nop oit mega e gamuyap senare tau aeni ame at Masedonia ge Akaia mugenat inamup ya tauen go anu tumat ega God inap taiana ame oisewa at at iragi di anune. Ap menan nu nop da aigap sia ya wadiait.

⁹ Iwa at at ma gapan intoni, waenapan muk ma oitaya wadian wanum. Ame e anenen ta waupaneanawa amba anenen ta God menan entane god eboewa naniap kaita anu tumasianiana ame ae vea God tave iragen yaibobot wandini ayamase taiana oisewa wadianiwanum.

¹⁰ Amba God otua Iesu bop gapan wan yon wande God nemoro mega namunup onini gapan vetaneni ame iman kimansi visepi amase taiana oisewa den wadianiwanum.

2

Pol pa Tesalonaeka gapan nao tan

¹ Tatan gwanin e asigiap di, nu namu inayap daio onantoni ame daio nuga mondi inayap ya wakaumaton.

² Den asigiap di nu inayap ya onantoni gapan go at Pilipai gapan wat yapaton amba waenapan dianen wawa koko tanene. Go God nuga ago nuneni gapan nu God Nop Oit Mega Kakaewa ame anavi nagirewa aritavet potamup kaimakaet di wadiaeton.

³ Iwa nu nop ame wadiaeton ame gutut eboewa gapan ya wadiaeton, o gare anu koewa da menan o ebo ewaepen ya taton.

⁴ Go gare nu oit wadiaiton ame iwa nu God Nop Oit Mega Kakaewa wadidi-amuinampen menan diane umap wani gapan waivin. Nu waenapan aton anupen menan ya taivin go God aton anupen menan megenat taivin. Me megenat imunu potanu gapan anen anuitoni me asik tan.

⁵ E asigiap di, ame nu mondi da nop monamon taet, imuya potaya nunan warupapen menan ya taton. Amba ebo ewaet kwan puraput ega agaga tapen men ya taton. Anenen taintoni ame oitanu God wata.

⁶ Nu waenapan da atonanu wapen men ya tainton. Amba e go gare orup da wat atonat nimanepen menan ya anu tainton.

Go nu Keriso wa ewamot mega menan e ago taniwaniampen di go ago ega menan ya waton.

⁷ Nu nimakayap, waen da otu waiwa kwayup tamuini umap, ae bigat nitat yaentuk kwayup taeton.

⁸ Nu enan aigap di anu guratoni menan God Nop Oit Mega Kakaewa megenat ya wadiaeton go inak nuga den yan seat enatoni gapan nu aton nau nagat nimanen. Iwa e nu imunu di wat kakayesen.

⁹ Tatan gwanin nu enan kaimakaet wat irat, mum ge woup nao taintoni ame e asigiap di. Ap taintoni nu e da itan nuga ya warat anuinton. Nu God Nop Oit Mega Kakaewa kaimakaet di wadidainton.

¹⁰ Amba e da da Iesu anu tumaseana nimakayap nu anenen imunu potanu woup sen wainetoni ge tamanagaet inak eboewa da gapan ya enu yawagen tanene, ame e di yawanean amba God den di yawanen.

¹¹ Iwa e asigiap di, nu e orup daiton daiton apan da mek otu waiwa wa tamanam mumini umap wat tamanam imaeton.

¹² Ame yaentuk wawa bibigam taet kwayup taet amba inak ega God anuini gapan iniwaniampen menan, kaimakaet diaeton. Iwa e God toemu mega gapan unuge oya oya mega potap tauapen menan venaya wan.

¹³ Amba nu God inap gaun pot pot waivin iwa e watagaet God nop mega inanup anu warayanawa ame e mondi waenapan nop muga mini ya anu warayan go God nop mega tavewa di anu warayan. Nop mame inap anu tumasiana nagirewa ame nao mega imuya potaya wariwan.

¹⁴ Dugup nugawa, God waenapan mega at Diudia gapan Iesu Keriso menan bagu sisi anu tanane yawamoyana e den gine daiton anu tanayan. Diu nagirewa at muga gapan ta koeragam mumane, ap umap waenapan egawa ta koeragam imaene.

¹⁵ Diu nagirewa ameme watagaet God no oise waiwanumune nagire evi amba Ayop nuga Iesu den guramone borit wan. Ap tane menan, God mu inamup aton da ya anuiwan iwa mu waenapan iravi anu koeam mumiwanum.

¹⁶ Diu uon, ian ugupe nagirewa nu God inak ewake munapen noa ya wadidi-amopen menan Diu nagire watananen, iwa Diu nagirewa anu koeamiwanum. Koewa muga pot pot aigap aigap taiwanumun ene amba koewa muga endi di bararaen. Wataget God yawamo tue den wande en, go endi ugu gangan mega inamup tauen.

Pol pa Tesalonaeka nagirewa sia yawamot anun

¹⁷ Dugup nugawa, nu wam otu da wae-napan wasea nimanene gapan nu ae veaet at da ugup waineton, go imunu inayap wanden. Nu kaimakaet enan anut sia di ya yao nitat anuton.

¹⁸ Inayap entan onanet anuton. Ne Pol wam da da entan ongepen tayawan go Seitan watananek wandin.

¹⁹ Ayop nuga Iesu evi sia tauepi wamewa gapan me namup yonata, nu gop da ya anuit go anu dao den aton aigap iragen anuit amba Iesu garewa nuneta, garewa ame e me di! Iwa kakaewa nuga e me di.

²⁰ Wam ame gapan aton nuga ibari e me di. Amba God yaunu ao warepi ibari e me di.

3

¹ Yawaepen men wam wam bagu sisi anuinton potanu yagiriwandin menan ne evenana da den, mapa pa Atensi gapan wainet waton.

² Amba dugup nuga apanewa Timoti inayap watu enaton. Me nu den Keriso Oit Mega Kakaewa waenapan wadidi-amopen menan God nao mega taitoni apane da. Imuya potaya God men aro tapen amba anu tumat ega Iesu inap wat kaimagamepen menan inayap watu enaton.

³ Iwa waenapan ta koeragam imaepi e Keriso ae veane tawa. E asigiap itan bagu sisi ameme God anuini gapan nu inanup tauwan.

⁴ Wataget e den wainetoni ta koeragam nimanepi noa namu wadiaeton. Amba evi nu dim da wadiaeton tavewa di tauen, ame e asigiap.

⁵ Ne potana enan nin gop yaginegen taingin ame Iesu anu tumat wanin go ae

veayan o anenen? Ap menan apan Timoti inayap watu enan. Ne gop anun Seitan pusia warup yaveni menan Iesu ae veayan go? Ap menan, nu nao nuga enan mondi tainton go?

⁶ Timoti inayap ae sia oneni e Iesu anu tumat wanian imuya waenapan inamup wariwandin oit kakaewa ameme wadianen. E pot pot atonanu anuiwanian nu yawaet anuitoni ap umap yawanet anuiwaniana noa den wadianen.

⁷ Dugup nuga daitonawa, nu pot pot itan yavivin bagu sisi anu tanivin go e Iesu anu tumasiwaniana oisewa Timoti gamup anutoni menan, imunu vturen.

⁸ Ayop Iesu menan kaimakaet ap waniene menan nu bigat nitat waninet.

⁹ Endi ap tayana menan enan God gaun wanait. Enan God yampat aton baware taivin.

¹⁰ Ya yao nitapen men mum wam pot poraet God inap kaimakaet mup waivin. E Iesu kakae di anu tumasean go aigap sia wadiaepena gapan anu tumat ega wabawarampen menan negin kakaewa da yop taivin.

¹¹ Endi mup nega mam, Mamanu God ge Ayop nuga Iesu dere negin nuga tu wa tarase nunepi gapan nu inayap onanet.

¹² Amba mup dawa mame, Ayop nuga wap e gare gare anu guriana amba waenapan munan den anu guriana, anu gurat ega ame kai warep, aigap tauue nu enan anu gurintoni mini om mega tautanep.

¹³ Ap gapan Ayop Iesu Keriso wat agoat imaepi imuya potaya woup sep, kakaevet waniene ene me waenapan mega evi sia tauep. Wam ame gapan e Mamanu God namup yonane kakaevet wandini ap mini waniai.

4

Guegue nuga kakaewa menan God atonanu anup waninet

¹ Dugup nuga daitonawa, nop nuga semu da mam. Inak ega gueguewa God atonuya anupen menan ame gueguewa nu wa ewaetoni e taiwanin go aigap sia taiwanian.

² Ayop Iesu aro amun nuneni gapan nop mega wadidiaetoni anuiwanin.

³ God enan manega anun, imuya potaya woup sep waen ge apan wainan gogo uniunion ise ta ase ta taine mini e ya tane.

⁴ E da da waen naimoyanawa, wae-nae wai virip muga yambuni tan amba kwayup muga taiwanian.

⁵ God tandayasine nagire anu gwag-waramene eyao tuan mini taine ap mini ya taiwanian.

⁶ Ap menan, apan da evene paina ya yamasep waenewa kaum ya waseasep. Wataget kaimakaet wadiaetoni sia waivin. Waenapan koewa ap tapi God nemoro mega yawain.

⁷ God nu waenapan mega tat anu nunan wani ame imunu potanu woup sepen menan nunan wan, amba umam noa tapen menan ya wan.

⁸ Ap menan waenapan da da nop ame anu ae vepi apan noa anune ae ya viwanum go God Guewa Woup Seniwa nuneni apanewa noa anune ae viwanum.

⁹ Iesu anu tumasine nagire upi imuya potaya inamup warapen menan nu ok da sia inayap ya seait iwa namu God wa ewaeni gapan e gare gare anu guriwaniana gapan e asik tayan.

¹⁰ Ame taiwaniana dugup ega nagirewa inamup uon go Iesu dugup mega nagirewa iragi at Masedonia gapan, munan anu guriwanian. Waenapan nugawa, umap di tayan go aigap taiwanian.

¹¹ Wataget manega wadiaeton. Bibiga yambuni wanien, evenae wai inamup bawarewa ya tane amba ek nao naniap tan garewa ega ap gapan wariwanian.

¹² Ap taiwaniamrina Iesu ya anu tumasine nagirewa yawaepi ayamat inayap tain amba kakaewa dawa ame e dim dim men anuiiana e nao kaimakaet taiana gapan di warai menan itan ame waenapan onemup ya baraene.

Ayop Iesu sia taueta

¹³ Dugup nuga daitonawa, e bagu sisi baware, anu dao uoni nagirewa mini, ya anupen menan borit wane nagirewa munan nop tavewa wadiaet anuivin.

¹⁴ Iesu boen sia yon wandeni anu tumasivin. Ap menan Iesu anu tumasitonu nagire borit wata, wam uiwa Iesu sia

tauepi wamewa gapan, God nu Iesu den tam naune kimani aeta, nu ap anega anu tumasivin.

¹⁵ Ayop Iesu wadianeni oisewa wadiain. Me evi sia taupei borit wane nagire namu amba ewamup nu kabaniwa nagire den kiman dot anait.

¹⁶ Wam ame gapan God pum mega anuit amba anea bawarewa mugawa ven wapi anuit ap gapan Ayop nuga me kiman ae ve aoma viseta. Keriso namu anu tu masen borit wane nagirewa inak muse yon wanumoin.

¹⁷ Yon wanumopi God nu kabaniwa nagire den bongam nimane upanep kiman dot anait. Ayop nuga Iesu irikup potap paina tautanait. Nu ap tata, me den yaibobot wanin aninait.

¹⁸ Ap menan, nop mame gapan gare gare imuya veturiwandan.

5

Ayop nuga sia taupei namu anu awat amba amat tainan

¹ Dugup nuga daitonawa, wapena anun. Wam eviwa noa gat wana ame wam ansena maup wamewa o bodu wamewa taupei anuiwanian menan, ok da sia ya seait.

² Iwa e anuiwanin Ayop nuga Iesu sia taupei wamewa ame up apane mumu karaua tauini mini karaua taueta.

³ Waenapan anega wapi, "Dim dim iragi bigare tau aen ita anan da ya yawait," ap anega wapi wamewa gapan gine tutup wam daiton gapan God wat momak mumeta, ame waen orup vege baware anuine umap seke tain. Orup da garawasepen tapi umap uon.

⁴ Dugup nugawa, imumu mumu wan muine nagire umap e ya wanaisi. Menan up apane tauen baguya agurini mini Ayop nuga wamewa taupei baguya ya agureta imuya mum sisip ya umen.

⁵ Nu wam ganat nagirewa, mum sisip nagirewa uon.

⁶ Ap menan aup inine nagirewa mini ya waninait yaman meret wap yambuni di waninait.

⁷ Mum gapan waenapan aup ininewa amba mum gapan waenapan upi kaum

kaimake dena naine amba bumbawam tainewa.

⁸ Go nu ganat nagirewa imunu kwekw-era ya tap go yambuni di waninait. Ita nagire vesi tambuine mini nu God inap anu tumat nuga amba waenapan munan anu gurat nuga tambuit. Nu anu dao nuga inak ewakewa warapen inap ame ita nagirewa payu kaimake dena tonatane mini ianup tonatait.

⁹ Iwa, God ugu gangan mega nu inanup tauapen menan om ya enunen go Iesu Keriso nunan tani gamup inak ewake nunapen menan om enunen.

¹⁰ Me nunan boeni iwa mega ame, me den waninopen menan, me sia taupei wamewa gapan nu kabani o borit wata ame gine daiton me den waninait.

¹¹ Nop ame anutoni menan gare gare wat ago taiwanian imuya gapan wa enat taiwanian, e endi taiana mini di taiwanian.

Nop uiwa

¹² Dugup daitonawa, yambuni anun. Apan upi nimakayap enan yonane nagire inamup ayamat tan. Iesu menan mu negin kakaewa wa ewaiwanum.

¹³ Enan yonane taine menan nop muga pot pot anun yaumu ao waran. Den inamup gare gare baigan nonup taiwanian.

¹⁴ Waenapan nugawa, manega wadiain. Endao wandao taine nagire wane mu nao tap. Tap anuine nagirewa wadiamone imumu wat kaimagamep. Dai momeni nagirewa wat agoat muman. Wae napan inamup yaemantu bibiga wanien.

¹⁵ Waenapan wa ta koeragam imae pi gare koewa inamup ya tane. E pot pot gare gare wat aipakam isiwaniat anun. Waenapan iragi inamup den wat aipakam mumiwaniat anun.

¹⁶ Wam wam pot pot aton anuiwanian.

¹⁷ Wam wam pot pot God inap mup waiwanian.

¹⁸ Dim dim ugup ugup inayap taupei gapan atonu den God inap gaun waiwanian. E Iesu Keriso den waniana menan God e ap tat anuiwan.

¹⁹ Guewa Woup Seniwa potanup anut mega tat anuni ya watanapen.

²⁰ God imua kakaewa gapan nop mega da waenapan munep wapi ya tandayasene.

²¹ Dim dim iragi kakaewa go koeragewa tayao wareyao tan anun. Kakaewa ame ware anu taiwanian.

²² go koewa ugup ugup iravi anu ae vean.

²³ Endi mame di, God nonup nunini ame kakae guragut negin ugup ugup gapan e imuya potaya woup sep amba tawaya ega ame etuya, guaya amba imuya koewa da ya wandepen menan use aiwandan amba Ayop Iesu Keriso sia tauep.

²⁴ God enan wani ae ya veaeta dim dim wani di tata.

²⁵ Dugup nugawa, God inap nunan den mup waiwanian.

²⁶ Iesu dugup mega iravi gaun gare gare taiwanian.

²⁷ Ayop nuga amun neneni gapan wadi-ain ok mame dugup nuga iragi inamup batnagen.

²⁸ Ayop nuga Iesu Keriso garaet wat aipakam imaep.

2 TESALONAEKA

Pol ok mega derewa Tesalonaeka nagirewa inamup sen

¹ Iesu dugup mega pa Tesalonaeka nagirewa, Mamanu God ge Ayop nuga Iesu Keriso anu tumasiana nagirewa e me di. Nu apan Pol ge Sailas ge Timoti gaun inayap waivin.

² Mamanu God ge Ayop nuga Iesu Keriso garaet wat aipakam imaep baigan enep.

Bagu sisi anu tanane go yambuni wanien

³ Dugup nuga daitonawa, wam wam enan God inap gaun waivin. Ap tainanta kakae iwa Iesu namu anu tumaseana endi e aigap sia taiwanin. Namu ek gare gare anu guriana menan endi aigap sia anu guriwanin.

⁴ E taiwaniana menan nu God dugup mega ugup ugup nimakamup wa atonat imaivin, e yauya ao warivin. Iwa e Keriso menan ugu vegaek bagu sisi anu taniwanin anavi ta koeragam imaiwanum go ae ya veayan go aigap sia anu tumat wanin.

God anavi mega wanene tamo itan muneta

⁵ Bagu sisi ame anuyana gapan guegue aroga da wandia ame God namu enan wani gapan koerage ya diaen go kakaewa nagirewa diaen. Me ap wani endi tavewa tauen, me enan wani ame tamana di tan, iwa endi e itan wariana toemu mega gapan tauapen men umap di taiwanin.

⁶ Evi amba den God tamanagaet di tata ame waenapan da da bagu sisi enepi God gare bagu sisi muneta.

⁷ E nu den ta koeragam nimanine menan itan bagu sisi bawarewa waraton go Ayop Iesu anea mega aroe den kimani aoma vise piup tauepi wamewa gapan nu wabibigam nimaneta.

⁸ Go yamunewa me merave den tau God oarewa nagirewa amba

Ayop nuga Iesu Nop Oit Mega Kakaewa ya anu warine nagire den, koewa muga garewa muneta.

⁹ Garewa munepi uon ya tata go usenagaet di ta koeragam mumiwodata amba God oya oya mega den ya wanumoin go at da ugup gapan wanumoin.

¹⁰ Wam mega ame gapan waenapan mega Iesu yaua ao warait iravi anu tumasitoni me wa taragatait. E nu den waniai iwa oit mega wadiaetoni anu tumaseana menan.

¹¹ Ap menan wam wam enan God inap mup waitoni ibariwa ameme. God enan wani ap gapan yambuni waniepen men mup waivin. Amba e dim dim kakaewa God menan tat anuiana anu tumat ega gapan God aro mega gapan e gamuyap taitameta, ame menan mup waivin.

¹² Ap taiwanampina God nugawa Ayop Iesu Keriso dere e wat aipakam imaene gapan Iesu oya oya baware wareta gare e yauya den ao wareta.

2

Koewa Taini Apanewa

¹ Dugup nugawa, Ayop nuga Iesu Keriso sia tauepi me den wainepen menan bongam nimanepi oisewa wadiaepena di anun.

² Iesu wam mega gaseget taueni oisewa e anuyana, nop ame anu waramasene, bagu sisi ya anune. Anse, apan da eviwa noa namu wani gapan o opata da wani gapan o nu ok seatoni ap gapan oit ame ebo wat anune go?

³ Ame waenapan wam ame om mega menan aopan ya wababayam imae. Iwa namu waenapan God wa tandayatain amba iup paina yamasini apanewa mata-gaeta ap ewap Iesu sia taueta. Wam ame ewap, iup paina yamasini apanewa merao arewa aeta.

⁴ Koewa Taini Apanewa ame god da da o waenapan da da wa atonat muminewa amba aigamup bawarewa mek wata. Me God mup paewa Ierusalem gapan gwanap ae wande aopan mek anega wata, “Ne God di,” anega wata.

⁵ Ne den tanae iningina wamewa gapan oit ap me wadiaingina sia anuiwanin go?

⁶ Koewa Taini Apanewa wam mega tauuepi me venaseta go endi dim da wataniniwa e anuiwanin.

⁷⁻⁸ Koerage mega endi karaua ta aewan go Wataniniwa apanewa ame orup da wat nau aeta. Amba Koewa Tainiwa aroga taueta. Ap wamewa gapan me dim da tat anupi di tata. Amba Ayop Iesu taueta amba gaup upunepi gapan boeta. Iesu oya oya mega ganase den kimani visepi ganat ame gapan Koewa Tainiwa wat momageta.

⁹ Koewa Tainiwa Seitan aro mega ware taueta amba yo paua ugup ugup ebo aopan tata go tavewa uon.

¹⁰ Ebo aopan ugup ugup gapan waenapan wababayan mumep merao arewa amooin, iwa mu nop tavewa tandayasine menan inak ya warain.

¹¹ Mu nop tavewa tandayat wane menan God nop eboewa anu warapen aroewa watu enen imumup tauet bararaen. Imumup ap baraeni menan nop eboewa menan anuiwanum.

¹² Waenapan ap anuiwanumampina nagirewa amba waenapan upinewa ame nop tavewa ya anu tumasene nagirewa amba koewa tat atonu den anune nagirewa God wanene mega gapan wa koeragam mumeta.

God inak ewakewa nunat anun

¹³ Dugup nugawa Iesu enan anuiniwa, tamanawa da ame nu wam wam enan God inap gaun waivin. Iwa wataget iragen me ganganat imae Guewa amun mega gapan potaya woup sep nop tavewa anu tumasene gapan inak ewakewa enat wan.

¹⁴ Nu opata gapan God No Oise Kakaewa wadidiaeton menan God ganganat imaen. Me ap tani iwa Ayop nuga Iesu Keriso kakae guragut oya oya mega den e warapen menan tan.

¹⁵ Ap menan, dugup nugawa, kaimakaet wanien ok ge nop wadiaetoni den anu wariwanian.

¹⁶⁻¹⁷ Endi Mamanu God nunan anu wat aipakam nimanini gapan wam wam pot pot imunu anu dao den naonagasiwan nunan taini menan gop ya anuivin. Mamanu God amba Iesu Keriso den imuya wat kaimagamep amba aro enepi gapan wat ge tat kakaewa ta aisiwanian.

3

Poro menan God inap mup wat wan

¹ Dugup nugawa, nop nuga semu da mam. God nop mega ere wadiaetoni menawaet anu tumasean seset wa aeni ap umap nop mega amunugaet sia seset wa aep amba waenapan nop ame viripewa den tapen menan nunan God inap mup waiwanian.

² Koerage wane taine nagirewa nanimu gwanap ya waninepen menan nunan mup wan, iwa waenapan upi God oit mega ya anu tumasene meñan.

³ Ayop nuga wani di tata amba aro enepi gapan Koewa Tainiwa enan wataneta.

⁴ Ayop nuga nu imunu enan wat kaimagameni menan enan gop ya anuivin iwa dim dim diaetoni endi taiwaniana evi amba den taiwaniai.

⁵ God baigan mega ge Keriso wat ayameana mega anu kakayasepen menan wa ewaep.

Waenapan nao di tap

⁶ Waenapan nugawa, Iesu Keriso amun mega gapan mame diaivin. Anu tumasini orup da da endao wandao taiwanumampina nop wadidiamotoni gapan ya wanumune ian ame ae vemon.

⁷ E asigiap di guegue nuga taintoni ap uap taiwanian. Tautanae wainetoni endao wandao da ya tainton.

⁸ Taba ega da mondi ya naton itan ya enapen menan mum wam iragi nao kaimakaet tainton.

⁹ Iesu oisewa wadidiaetoni menan taba ega mondi napo umap di go guegue kakaewa ewaepen amba e ap umap taiwanianampen menan nao kaimakaet tainton.

¹⁰ E den wainetoni gapan nu nop mame diaeton. Waenapan ega da da nao tanda anu ya tapi menan taba ya napen.

¹¹ Nu mame wadiaentoni iwa nimakayap waenapan ega upi nao ya taiwanum go endao wandao taiwanum, wagat mondi wanumune amba waenapan yawamone ise wayao ase wayao taine oisewa ame nu anuton.

¹² Menan endi ne Ayop Iesu Keriso amun mega gapan kaimakaet diamon wadidiamuivin, yaemantu wanien nao ega

yambuni tan taba puraput ega garewa sean.

¹³ Go kaiwan evenan wainawa, e guegue kakaewa taiwaniana menan ae ya veane.

¹⁴ Waenapan da da nop nuga ma ok sitoni ya anu warepi ase yawam anun. Mu umam anupen menan aë vemon.

¹⁵ Mu anavi ega umap ya anu mumane go dugup daitona mini anu muman koewa sia ya tapen menan diamon.

Nop uiwa

¹⁶ Ayop Iesu me mek baigan nuga ibariwa, menan e wam wam dim dim iravi taiwaniampina baigan eniwandan. Ayop nuga e den wandep.

¹⁷ Ne Pol gaun mame uiwa megenat nek nanina gapan ok sivin. Ok nega iravi verisiwa gapan sina iraga yaoyao nega map anega sinawa.

¹⁸ Ayop nuga Iesu Keriso e iragi wat aipakam imaep.

1 TIMOTI

Pol ok mega namua apan

Timoti inap sen

1 Ne apan Pol, ok mame sivin, God wat inakam nimaneni apanewa amba anu dao nuga Iesu Keriso inap tainampen menan nenan wan amba Iesu Keriso watu en-amot mega apanewa da tan.

2 Ok ma ne Timoti inap siangin, ge ne otuna mini iwa ge anu tumat Iesu Keriso inap taiana menan. Amba Mamanua God ge Ayop nuga Iesu Keriso wat aipakam muga garaetawa, bagu sisi muga nunan anuinewa ge baigan nonup muga den in-agap wande ep.

Nop ebo aopan waine tantan megawa

3 Amba watagaet ne at Masedonia angena, ge at Epesas gapan waingepen men diagen wana, menan endi den ap mepe wainge waenapan dandamunagaet diamo wa, waenapan upi nop gutut eboewa waine ame ae vep.

4 Ame diamo wa wam muga wakaumepi tawa gutut tave uoni waine ae vep, amba Diu omae baewa gutut muga anen-ten ta oniwandini ame ogewa den ya se nonongam taiwanuman. Ame tane noyam notatae warupane bariwanum. Ame taine gapan God nao mega anu tumat gapan tata mu ya taiwanuman.

5 Ne nop ma dandamunagaet waingina iwa waenapan inamup baigan wande pen, baigan ame imu pose ganganatait gapan, amba i namu woup sep kakaewa amba ge anu dao tavewa gapan wa taiwanuman.

6 Ap gapan waenapan upi inak kakaewa mame gaset wakauman nop iwa tavewa uoni ewap amon.

7 Amba iup namua Mosis seni ame anu wadidiamot wane taiwanum, go mu ame waine ya anu kakayasene amba wane taiwanum, den mu kin kin wane taiwanum go iwa tavewa mu den oare.

8 Amba God iup mega Mosis seni ame nu den asiginup taton go orup da God iup mega tavewa anu kakayasepi, ame kakae di.

9 Amba God iup mega Mosis waneni nu den asiginup di. Iup ame waenapan kakaewa nagire munan uon, go iup ame topaisine ge tandayasine nagire munan amba God tandaysinewa inak koe koe tainewa ge upi imu pose gware wani munan, amba anu tumat muga uoni nagirewa munan, amba ine mame guramone borit wainewa, waenapan gurane boniga semuinewa iup ame munan den.

10 Den yonane inak koewa wainan gogo ise ta ase ta tainewa, ge apan muk dere gare gare anu gwagwaramene amba ingane wainan gogo mini taine o waen muk dere ap anega tainewa munan, garewa warapen menan waen da go apan da up tane amuinewa amba negin gagape yonane ebo aopan wainewa, amba da da God nop oit mega kakaewa mini entanepen tainewa iragi iup ame munan.

11 Nop tavewa mame God Nop Oit Mega Kakaewa gapan waenapan wadidi-amopen menan God wat aipakam mega ne nenan.

God bagu sisi nunan anuni gaune wapen

12 Ne nop nuga Iesu Keriso inap gaun waivin, iwa anu dao nimanegi om enunegeni gapan nao mega mame ta waningapen menan aro amun mame nenan.

13 Gosi ne watagaet yonan Keriso dugup mega nagirewa inamup wawa koko tan inamup ta koeragam mumingin, amba inak koe koe inamup taingin go God bagu sisi nenan anuiwandin, iwa wam ame gapan ne anu tumat da inanap uoni menan ne ya anun amba taingin.

14 Go Ayop nuga wat aipakam mega garaetawa iragi itapue den aiganap aoma wa damagen, amba wat aipakam ame gapan, anu dao ge baigan, Iesu Keriso inap wandeni den nenan.

15 Amba endi ne nop mame waingina tavewa gapan di waivin, menan e nop mame ae di anu wat kakayasen. Nop tavewa ame, “Iesu Keriso kiman gapan vit one piup ma taueniwa waenapan inak muga koewa taine nagirewa inak munapen menan tauen.” Waenapan upi koerage, go endi ne koerage iragen taingina apanewa da.

¹⁶ Go God bagu sisi nenan anuni iwa waenapan koewa nagire yaumakamup, inak koewa iragena taingina menan Iesu Keriso wawa bibigam mega inanap taiwandin. Wawa bibigam inanap tani guegue da tap gapan waenapan me inap anu tumase yaibobot inagewa gapan wanumopen men tan.

¹⁷ Amba usenagaet wandini Ayopewa God inap, me da ya boeta me guewa irewa den ya yavitoniwa, God daiton me megenat inap ian omanin seat oya oyae den yaua usenagaet ao warinampen.

¹⁸ Otuna Timoti, ge nop ma anut tapen menan kaimakaet diagian, ame God noa waiwanumune nop muga anu warapen menan enok inan yawagen waiwanumun. Ap menan ita gaut gega tambu ian ame ewamup ta age Keriso menan nop kakaewa gapan anan taingapen men diagivin.

¹⁹ Ap menan imunu kakaewa gapan Keriso anu tumat taiana ame wat nat ta ongingan. Kakaewa gega asigip tana gapan. Waenapan upi nop mame tandayasene menan amba Keriso inapewa tandayasene gapan anu tumat muga Keriso inapewa wa koeragamene.

²⁰ Endi yaumakamup apan Aemaneas ge Aleksanda ap anega taiwanume menan ne tambumon Seitan nani gwanap semon, ap tapen gapan nu asigip ta God inap wawa koko da sia ya tapen menan tan.

2

Iesu dugup mega nagire wa taragat mu-gawa

¹ Ne diagen waingina, namu iragen waenapan iravi munan God inap mup taingan, bagu sisi muga menan gaune den inap waingan.

² God viriwa tat wa taragasinampen, menan piup ayopewa, ge ian aritawa munan den God inap mup waingan ame gapan nu inat waninet nuga nonup baigan den yambuni waninet.

³ Map anega taiananta kakae di, ame taton God wat inakam nimaneni apanewa aton wanivin.

⁴ Iwa God anuiwandini waenapan iragi nop tave iragena anu kakayase inak warapen menan anuiwan.

⁵ Ap menan God me daiton di, amba apan yaumakape yone waenapan God den wat enaseni ame apan daiton di, ame apan Iesu Keriso megenat yoniwan.

⁶ Ame waenapan koewa muga garewa Iesu ware boeni gapan waenapan wat vetamon, ame God waenapan mega inak warat anuni menan wam mega onin e omewa empaiseni gapan tamana tauen.

⁷ Iwa ap menan ne om enunegen God nop oit mega wadidiamugapen ge Iesu watu enamot apanewa mega tan. Ne nop ma waingina ebo ya waivin, nop ma tavewa gapan di waivin. Ne God Diu uoni nagirewa wadidiamopen anu tumase nop tavewa anu awapen menan om enunegen.

⁸ Ap menan, ne manega anuivin, iamene mup taine arewa gapan apan iragi nanimu paina ao wadave God inap mup amba wap. Mup wapi gapan ugu gangane ge noyame notatae den ya tapen men ne ap anega waivin.

⁹ Amba ian waen munan manega den waivin. Mu gan gorogot muga enapen tapi yaentuk en en kakayat tap, iamu ben ugup ugup ya benase ta amba gan gorogot garewa bawarewa den ya enep taiwanuman.

¹⁰ Gare mu yone inak muga tat ge wat tamanawa ta gapan anega waiwanuman, nu God wa taragositoni waene waiwa.

¹¹ Amba ian waen iam iam ega gapan wanumo neman guran nani wakaunak ta God nop mega anu avep.

¹² Go mu yone apan paina yamamume nop ya wadidiamot anuivin. Go mu yaentuk neman gure anuiwanuman.

¹³ Iwa God namu apan Adam tani amba waen Ivi evi tan.

¹⁴ Amba Seitan taue namu Adam ya nanamase wan go waen Ivi inap taue nanamase ebo wani gapan koewa tan.

¹⁵ Go waen orup sepi amba anu dao ge baigan muga imu pose woup sep muk ingane kwayup God inap tanau amo wanumampinawa gamup God wat inakam mumeta.

3

¹ Ne nop ma waingina tavewa gapan di waivin, orup da da mu God dugup mega men namu yoyo yoninewa, mu tane nao kakaevet tat anuiwanum.

² Dugup namu yoyo yonapen nagirewa mu inat wanumot mugawa ame mam, mu inak koewa da ya ta parise waenapan ya enu yamam waiwanuman. Mu waen daiton daiton naimopi boge di, mu muk ingane kwayup ae ta kakayasiwanuman mu nop dima inamup wandepi gapan waenapan virip muga den tap, amba daio nagire waupamo pa muga gwanap semoiwanuman ge waenapan nop opata kakaewa gapan wadidiamuiwanuman.

³ Amba mu kaum kaimake dena go anan tapen menan ugu ganganaep ya taiwanuman, go ae bigat muse nonup baigan gapan yaentuk wanumop den moni bototoewa ya taiwanuman men den ya anu guriwanuman.

⁴ Den mu waen orup muga amasewa ta kakayasiwanuman. Gare otu wai mamamu ayamase taiwanuman.

⁵ Go apan da waen orup mega kwayupe yaentuk ya ta kakaya siwandapinawa, me anenen amba God waenapan mega kwayupe tata?

⁶ Amba dugup namu yoyo anu tumat ewake taini apanewa da ya yonep, da yone mek menan apan apan ta taiwandapina gatawan God Seitan wanene tani mini wanene tata. Go anu tumat mega kin wani apanewa da yonapen.

⁷ Ap menan dugup namu yoyo ame waenapan dugup garip wanumune nagirewa me viriwa den tap, ap gapan me da ya digure wap amba me Seitan koewa mega nonokap ya tauep.

Dugup gwanap nao taine airasewa na-girewa

⁸ Ap umap sia dugup kwayup taine nagirewa ame imu pose ganase wap gapan taiwanuman. Amba nop iwa tave uoni den ya waiwanuman. Den yone kaum kaimake dena umini na amba waenapan ona muga up ta puraput nagire entan mumapen ya taiwanuman.

⁹ Amba mu imu pose kakaewa gapan namu Iesu oisewa karaua wanden God evi wat arogameni ame yave ewap ta amop.

¹⁰ Apan ameme namu iramu yawapen menan tayawamon, ap gapan koewa da inamup ya yawamonewa, ame ae vemone dugup gwanap nao muga ware ago di taiwanuman.

¹¹ Ap umap sia waene waiwa nao muga dugup gwanapewa viriwa den taiwanuman. Mu yone evene wai waitamu simmut ya waiwanuman. Go mu kwayupamu ae ta gapan wan dim dim iragi anu tumat gapan taiwanuman.

¹² Amba dugup kwayup taine nagirewa ame mu waen daiton daiton di naimop, den waen orup muga wa tamanam mumapen men kakaevet taiwanuman.

¹³ Endi ian dugup menan kwayup taine nagire mame kakaevet tapiwa menan waenapan mu virimu tain. Ap tapi gapan anu tumat muga Keriso inap kin wata amba anu tumasene oisewa waenapan epara ta wadidiam wanumain.

God nop mega gungunua

¹⁴⁻¹⁵ Otuna, konintu sia onge yawaget anuivin. Go dim dim da watananegepiwa ame gapan ok mame yao anu. Nu God dugup mega nimakamup wanineta gueguewa ame ok ma gapan singina. E asigiap, nu iravi God dugup megawa amba nu nop tavewa mega kwayup taivin amba waenapan da da tave uon waine nu wadiamuivin.

¹⁶ God nop oit mega kakaewa namua karaua wandini evi nu inanup arogameni ame nop ge anut baware iragen di ap menan orup da wat otutamepen menan umap uon. Waenapan Iesu menan anega waiwanum,

Piupa viseni apan umanup yanen, amba anea yamamup God Guewa, me kakae taiwandat apanewa dien. Waenapan oit mega at at iravi wadidiam wanumun.

Piup nagire nop mega anu tumasen, amba God me menan wani gapan me kimani dot aen. Ap anega waiwanum.

4*Nop tave uoni wadidiamuine nagire*

¹ Endi God Guewa nu anega aroga di wadidianiwan, ame wam eviwa waenapan upi God ae veain iwa guewa koewa amba airampu wadidiamopi gapan ewap ta amoin.

² Ame ebo aopan wa ewamuine nagire mu nop eboewa wadiamuine gapan God ae ve mu ewamup amoin. Mu imumu gapan muk ingane watanamon go mu ya anun go ebo sia aigap taiwanumune ap menan garewa muk imumu borat mutan.

³ Mu waenapan naine mutat anupi watanamuine ame ebo di. Amba taba upi virip ta ya nat diamuiwanum go God taba ame napen menan dianen. Waenapan Keriso anu tumasene God nop mega anuiwanumun amba nop ame tavewa anu avepi menan taba da da men God inap gaune wapi di nap, waenapan da ya wafanamop.

⁴ Dim dim iragi God wan venat mutane iravi kakae. Nuneni menan ae ya veait gaun wat amba di nainampen.

⁵ Iragi kakae di iwa God nop mega kakae waiwan. Den gaun watoni menan kakae di iwa God nuneni anuivin.

Keriso dianeni tata nu ago mega kakaewa

⁶ Apan Timoti, ge nop mame dugup nuga nagirewa wadidiamoa ame gapan ge Iesu Keriso ago mega kakaewa diageta. God anu tumasitoni noa guegue ame tavewa anu waraan sia anuingawa gapan imuga kin wata.

⁷ Waenapan gutut upi tave uoni waine God anut mega uon nop ame pokaet menan nop ame ge den ya anu. God anuini gapan gapan di tayavingan.

⁸ Kae ta etuga aro tauapen menan go ame garewa mega otu kamontu, go God guegue mega anu taingawa garewa inagap baware inak ame endiwa eviwa den ewaniwan.

⁹ Nop ame tavewa menan di warat di anu tumaset.

¹⁰ Tave di nu kaimakaet tatoni gapan God anu tumasinton, iwa nu anu dao God yaibobot wandini apanewa inap amba waenapan wat inakam mumini apanewa,

nu den wat inakam nimaneni menan, ame inak baware iragen waraton.

¹¹ Anut ame wadidiamo anu tap.

¹² Ge apan tamaru menan waenapan upine nop gega ya anu baitamep go gare anu tumasine nagire yamamup kakaevet di taingen. Den nop kakaevet waingan amba waenapan munan anu, amba Iesu anu tumat mega imuga potaga woup sep guegue ap me taingen.

¹³ God nop mega waenapan nimakap batnak amba opata wa aigap aigap wadidiamuingan. Ap taingawa gapan ne wam da inagap daio tauain.

¹⁴ Wataget God waenapan mega namu yoyo nagire nanimu wapigap sean amba wat aipakam noa da wane, nop ame imuga wa kim gimagepen menan Guewa Woup Seni garaet geneni ame ae ya ve go aigap aigap danamingan.

¹⁵ Imuga aigap aigap sia wat kaimagame amba God wadiageni aigap aigap sia taingan ap gapan waenapan iravi yawagepi amba kakae di diagep.

¹⁶ Yambuni ina wanigangan amba yambuni wadidiamuingan. Wadiagena ap taingawa ap gapan ge gegenat uon go nop gega anuine nagire den iravi inak ewakewa wariwaniai.

5*Dugup namu yoyo apanewa nao megawa*

¹ Apan tavewa inamup kaimakaet ya wa go mamak waiga mini yaemantu wadiamuingan. Amba apan upinewa tatak gwanik mini wadiamuingan.

² Waen tavewa inak waiga mini wadiamuingan. Amba waen upinewa domarak waiga umap wadiamuingan amba imuga woup sep yambuni wainge.

³ Kwapura nagirewa kwayupamu yaentuk taingen.

⁴ Kwapura upe wai otu tasine den wandepi, orup ame denip daitonawa nagirewa namu kwayup tap amba God dugup mega navewa evi tapen. Ame gapan upe wai ine mame den kwayup tamuine menan mu garewa muga mini tain ap gapan God imu pose ae bigarep atonamu anuta.

⁵ Kwapura da waen tavewa di wandeji amba ago mega den uon wandepi, kwapura ame God inap imutuan anuini menan mum wam God inap wat agoasepen men mup waiwadata.

⁶ Go kwapura da piup atonewa warapen menan muk ingane anuiwanumampina, kwapuraewa ame gase boen iwa inak megä tavewa uon.

⁷ Guegue ap mini mini ae vepen menan waenapan iravi wadiam, iwa waenapan upinewa diguguramopi tawa.

⁸ Waenapan da da denip daitona naginewa gare gare kwayup ya tamopi ame koerage go waen da da muk otu wai kwayup ya tamopi ame koerage iragen. Ap tapi gapan mu gase anu tumat muga God inap ae di veane. God ya anu tumasene nagire koewa gapan wanumam go ian ame koerage iragen gapan wanumam.

⁹ Kwapura waen tavewa en muga apane yampo (60) taupei ap gapan kwayup tamopen men yaumu ok se. Go en muga ap ya tautanepi yaumu ok ya sea. Amba sia mu namu apan daiton daiton naimone amba meme wai borit wane gapan sia ya naimone kwapuraewa mugenat yaumu se. Sia naimone kwapuraewa ame umap uon.

¹⁰ Amba sia kwapura ame waenapan yamamup kakae taine nagirewa. Mutat muga kakaewa ame mam, otu taine kwayup taiwanum, daio nagire pa muga gapan upam wanum. God waenapan mega ago tamuiwanum amba bagusisi nagire ta warit mumiwanum. Nao kakaewa ugup ugup taiwanumun. Kwapura waen tavewa ap anega munan anupen.

¹¹ Waen tamaruewa kwapura tane yaumu ok ya sea iwa mu apan sia naimot anuine menan Keriso nop oit megawa anune ae viwanum.

¹² Namu Keriso inap agi wane go evi ae veane menan koewa umamewa waramota.

¹³ Den mu evi endao wando taiwanumain amba mondi pa pa gapan daio ise wanum ase wanum taiwanumain. Ap megenat uon go den nop isisi goragot waiwanum amba waenapan yawamone

ise wayawam ase wayawam taiwanum. Nop koewa ya waine mini den waiwanum.

¹⁴ Ap menan ne manega anuivin, waen tamaruewa kwapura tane apan sia naimop. Orup sia sep pa muga kwayup waret muga ap gapan waen guegue mega yavepi koerage ya dianain.

¹⁵ Nop ame waivin iwa kwapura nuga upi Iesu ae veane Seitan ewap amuiwanum.

¹⁶ Iesu dugup mega gapan, anu tumasini waen da, me denip daitonawa waen dawa kwapura tani gapan me kwapura ame kwayup taiwandapen. Ap tapi Iesu dugup mega upi itan ya wanain go waenapan ame kwapura upi ago uoni mugenat di wanumuine kwayup tamoin.

Bawarewa nuga ayamat tamot

¹⁷ Endi Iesu dugup mega namu yoyo apane wai nao muga kakaewa tapiwa gapan garewa dere aigap warain iwa mu tat muga ame opata o wadidiamuin gapan kakae iragen taine menan.

¹⁸ Iwa God nop mega anega waiwan, Man tap ega nao enan tapi taba garewa den di watumon.
Nop mega da sia waiwan,
Nao taine nagirewa garewa muga di warep.
Ap anega wan.

¹⁹ Apan daiton yone Iesu dugup mega namu yoyo apane da koewa tat diepi nop mega ya anu. Go apan dere o yampo o aigapewa, koerage diepi nop muga anu.

²⁰ Waenapan gega koewa da tapi menan waenapan yamamup yam ta yawamo wa, ame gapan waenapan iravi koewa tapi tawa anuin.

²¹ God Iesu Keriso anea woup sene nagine den yamamup kaimakaet manega diagivin dim dim iravi wadiagena ta agingan. Ap taingawa upi anu muma upi ae vingawa koeragewa ame yamaga iragi inamup wandep ame gapan kakaeven ya taingan.

²² Apan o waen da God nao mega tat anupi serarat naniga iap ya bare go namu singui wayawa me umap go uon wap anu amba.

Waenapan koewa tapi ge den ya ta go imuga potaga woup sep wainge.

²³ Kaum iragen megenat ya na kaum wain semu da den na. Baguga pot pot tup waini siget beget pot pot wariana menan kaum wain semu da nawa tororot aeta.

²⁴ Waenapan upi koewa aroga taine yawamuivin koewa taine garewa evi amba wanene gapan tautanain. Upi endi karaua taine go nu evi amba yao anuit.

²⁵ Guegue koewa ap mini waenapan upi kakae tapi iragi yawamuivin upi karaua kakae taine ya yawamuivin go wam ame aroga taupei yao anuit.

6

Inamupaet wanumuine nagire noa

¹ Nao kaimakaet mondi taine nagirewa ayop muga inamup ayamat taiwanumain. Waenapan yawamopi gapan mu God yaua ge nop dima nugawa den wawa koko tapi tawa.

² Nao kaimakaet mondi taine nagirewa, mu ayop muga Iesu anu tumasene menan ya anu koeam mumep. Go gare nao muga kaimakaet sia di tap iwa nao taine gapan mu ayop nagirewa wat aipakam mumiwanum iwa mu Iesu dugup mega daiton menan ayop muga anu guriwanum.

Nop tave uoni waine nagirewa nop muga ya anune

Wadiagena waenapan wadidiamo opata gan den wap.

³ Waenapan nop da ugape wapi ame Ayop nuga Iesu Keriso nop mega tavewa amba God guegue mega wa ewaneni ame

⁴ mu anut muga uoni gapan taiwanum amba muk bawarewa anune apan apan taiwanum. Nop ugup ugup men pot pot notatae di wat anuiwanum. Ap waine menan anu koeam gare gare taiwanum amba daiton ya toborane wanumamun, yanao wane garito gwanato taiwanum.

⁵ Iamu bambamaiwandin amba nop tavewa namu anune ae veane notatae pot pot waiwanum.

Anu tumat men anune taine gapan moni baware warat anune taiwanum.

⁶ Go nu God men anu tainanta imunu bigarep ap gapan garewa inanup baware taueta.

⁷ Iwa yanatoni dim da ya warat amba tauaton. Sia borit watawa dim da ya warat amba anait.

⁸ Ap menan taba wanup inanup wanu-mopiwa ame umanup tan.

⁹ Go waenapan puraput men anuiwanu-mampina imumu puraput inap wariwan. Man denkoe warini umap puraput imu pose wariwan bumbawam tane bagu sisi anuiwanum amba evi da amba inak muga wapasimain dim dim men anune den uon tata.

¹⁰ Koewa ugup ugup ibariwa ame waenapan moni men anuinewa. Upi moni men pot pot anu gurine gapan God nop mega ae vean menan bagu sisi aruga imumu potamu tuk tak wan.

Pol Timoti guegue ugup ugup wadien

¹¹ Timoti, ge God apan megawa menan ameme koewa iragi mame ne wana ya ta. Manega tayavingan. Inak tamanawa ta waingan, amba God men anu taingan inap anu tumasingan, waenapan munan anuingan, nao kaimake dena ae ya vea di taingan, amba waenapan munan anuin-gan.

¹² Iesu anu tumasitoni gueguewa ap tayavingan amba garewa gega inak yai-bobot warai. Wataget waenapan aruga ya-mamup ge Iesu di anu tumaset waana yai-bobot inagewa ame warapen men genan wan.

¹³⁻¹⁴ God dim dim iravi inak nuniniwa amba Iesu Keriso wataget apan Pontias Pailat nop garewa anu tumat den kakaewa wadieni, Mame Otu dere ameme yamamup wadiagivin. Nop kaimakaet diaggingina ame anu warawa dim da da ya wakaumai. Nop nega ayamase taingawa waenapan koerage ya diagain ap ta agin-gapena gapan Iesu Keriso taueta.

¹⁵ Om enuni wamewa gapan di taueta. God wat aipakamitonwa me megenat Ayop di. Me Ayop Nagire Ayop mu-gawa me Bawarewa Nagire Bawarewa mugawa.

¹⁶ Megenat yaibobot wandiniwa, ganase den wandiwan, ganat ame aroe den ya-manu ewa enupi ine ya anait. Waenapan da namu ya di yawan amba evi ya di yawain. Namunup yoniwandan amun

mega yaibobot wande aiwandan! Ame umap.

¹⁷ Nop da sia mam. Piup puraput nagire manega diam, "Apan apan ya tane puraput ega tumap ya waniene iwa puraput ame wam da wandiniwa wam da uon. God tumap wanien nu aton anupen men dim dim iravi nuniniwa.

¹⁸ Guegue kakaewa ugup ugup ta aisiwanian puraput ega upi yan tan kayakayawan taine nagire munan.

¹⁹ Ap tane gapan God evi garewa enepi menan diri gagap siwanin, garewa ega ame uon ya tata. Endiwa eviwa den inak kakaewa warai." Puraput nagire ap anega diam.

²⁰ Otuna Timoti, God no oise kakaewa geneni ne wadiagena den kwayupta. Waenapan upi God tandayasene amba nop anut pokaeta waiwanum, notatae gare gare waine bumbam umap waiwanum. Piup nagire nop ame wabawaramene waiwanum go ame ebo, nop ame tavewa uon. Ge nop muga anu ae ve.

²¹ Upi ap anune menan God imu oaraseñe.

God garaet wat aipakam imaep.

2 TIMOTI

Pol ok mega derewa apan Timoti inap sen

1-2 Otuna Timoti genan anuinawa, ok ma ne Pol siangin. God anuni menan ne Keriso Iesu watu enamot mega da. Nu Iesu Keriso den wainiton menan God inak ewake nunat wa agiat nimaneni oisewa waenapan wadidiamopen men watu enanege. Mamanu God Ayop nuga Keriso Iesu dere garaet wat aipakam gimagep bagu sisi genan anu amba baigan muga genep.

Pol Timoti wadidien

3 Ne omayan baewa God diamon taiwanumune mini God dianegeni gapan di taivin amba nek imuna ingane koerage ya dianegiwan. Ne God inap mup waingina pot pot anu gimagep amba genan gaun waivin.

4 Wataget ge irip waana sia anuivin aton nega baware tapen menan mum wam di yawaget anuivin.

5 Ge Iesu anu tumasingian yawagena ap guegue sia di anuivin. Ataga waen Lois namu anu tumasen amba inaga Yunesi den amba ge evi anu tumaseana anuivin. E iravi anut ega kaimakewa ame daiton anuivin.

6 Menan wataget nanina iagap sean God Guewa garaet geneni aro ame kwayup ta imuk ya oaraepen menan sia wadiagivin.

7 Iwa God Guewa nuneni menan tap ya taivin go aro di taivin, waenapan munan anu gurivin amba nuk ingane wat tamanamivin.

8 Guewa nuneni menan Ayop Iesu Oit Mega Kakaewa waben tawa umam ya anu. Ne oit mega wadiamona waranek gwat noke bat nimanegen nenan den umam ya anu. God aro genepi gapan oit mega menan itan bagu sisi waritoni ame upi ge den wat.

9 Me inak nuga wat inakamepen menan nunan wan. Nu kakaewa taitoni menan nunan ya wan go Keriso gamup garaet mega nunapen amba mek anuini venasepen menan ere mangan nunan wan.

10 God ap nunan tani gungunu wanden go wat inakam nimaninia Iesu Keriso taueni gapan nu to ewanen. Ame gapan bop aro mega wat musen amba Oit Mega Kakaewa gamup inak nuneni yaibobot wanin aninanta noa anuivin.

11 God Nop Oit Mega Kakaewa ame menan watu enamot mega da dianegen. Opata waben den wadidiamopen menan bat nimanegen.

12 Ap waingina menan waenapan ta koeragam nimanek wanum go ne umam tap ya anuivin sia di waivin iwa Iesu anu tumat mega gapan waingina. Me aro apanewa menan dim da neneni kwayup taiwandapinawa amba Iesu wam mega taueta.

13 Nop tavewa wadidiagena guegue mu-gawa ewagena ap den anu taingan. Ge Iesu Keriso intum taana gapan anu tumasingan amba waenapan munan anuangan.

14 Guewa Woup Seniwa potanup wadidien aro mega gapan dim da kakaewa ne wadiagena ame yambuni kwayup ta.

15 Otuna, ge anuingi at Eisia nagirewa iravi tandayat nimanegen. Apan muga dere Paigelas ge Omogenes tandayat nimanegen.

16 God apan Onesiporas dugup mega wat aipakam mumep. Apan ame wam aruga wat agoat nimanegen imuna etuna vturen. Ne gwat nokap waingena umamuna ya anun go daio inanap tauiwandin.

17 Pa Rom taueni epura den yona taiwandin amba yawanegen.

18 Ge den anuingi ne pa Epesas gapan waingena me aigap ta warit nimanegen. Ap menan Iesu wam mega tauepi Onesiporas wat aipakamep.

2

Nu Iesu Keriso ita mega nagirewa

1 Otunawa, Iesu Keriso den wainiton menan God garaet wat aipakam gimagepi gapan aro ta wanigingan.

2 Waenapan aruga nimakamup ne opata waingina anuana nop ame anu tumat mu-miana nagirewa wadiam. Mu nop ame anu kakayasepi amba amo waenapan upi den wadidiamop.

³ Nu ita nagire bagu sisi warine mini nu Iesu Keriso oit mega men itan bagu sisi warintoni ame upi den wat.

⁴ Ita apanewa ita nagire guegue muga wat nase tapi ita yamewa inap aton anut anuiwan menan piup mondigawa nagire guegue muga menan ya anuiwan.

⁵ Guegue da sia mam. Apan tamaru kae serarat amopen tapi kae ginewa taupepi ame umap, go nimakap ae vezi ame umap uon iwa garewa ya warain.

⁶ Guegue da sia mam. Piup nave taini apanewa nao kaimakaet tapi tavewa taupepi me maup mega namu matagameta iwa nao kaimakaet tani menan.

⁷ Nop nega waingina guegue anu. Ayop nuga ge dim dim iragi anu awapen menan wa ewageta.

⁸ Iesu Keriso bop gapan sia inakae yon wandeni oisewa anun nauingan, me watageta apane Devit naewa. God No Oise Kakaewa wadidiamuingina, oit ame mega di.

⁹ Nop ame waingina menan ta koeragam nimanegen ugu vegaek bagu sisi anuivin amba aigap sia koerage taini apane umap waran taunegen gwat noke bat nimanegene waingivin. Mu taunegen go God nop mega ya watanain seset wa aeta.

¹⁰ Ne itan bagu sisi ugup ugup yawan di wanigivin iwa God om enumoni nagirewa Iesu Keriso inak mega ewakewa warapen amba me kakae guragut ganasewa den yaibobot wanumopen menan.

¹¹ Nop mame Keriso menan tave di waiwanum,
Nu me den intum ta borit watoni amba me den di waninait.

¹² Me itan bagu sisi anu taneni mini nu den anu tanait,
amba me ayop tapi nu den ayop tait.
Nu waboborata me gare waboboraneta.

¹³ Nu me inap ya anu tumaseta gare me ae ya veneta,
iwa ae venepi me imu pose ugup entaneta ame ya tata.

Timoti nao megawa gueguewa

¹⁴ Endi nop ame waenapan gega sia wadidiam. God yampi anega kaimakaet diam mu nop iragen men notatae ya wap. Ame kakaewa da uon amba da da notatae

wapi anuine nagire mu inak muga den koe tata.

¹⁵ God kakae diagepen men kaimakaet taingan. Nop tavewa mega kakaevet anu waingawa nao kakae taini men umam ya anuini apane mini wanigai.

¹⁶ Waenapan upi God men ya anune amba gare gare nop tave uoni waine, ame den intum ya tamo. Ap waiwanumampina imumu aigap aigap God menan sia ya anu taiwanumain.

¹⁷ Nop ame koerage omat nan seset waini mini. Apan dere nop ap waine yaumua Aemaneas ge Paelitas.

¹⁸ Mu negin kakaewa ae veane nop eboewa anega waiwanum, “Borit wane nagire inak muse gase yon wanumon. Nu borit wata ya inak nitat yon waninait.” Ap wane menan waenapan upi Iesu namu anu tumasene endi nop ap gapan gego bagu sisi anuiwanum.

¹⁹ Go God guegue mega ibariwa gapan yone paua ok anega sean,
Waenapan mega da da iravi me anuiwan amba upi megawa,
upi mega uon.

Sia ok seane,
Waenapan nu God megawa wapi koewa taine ae ve,
God inap imumu entanep.

²⁰ Endi apan da pa mega bawarewa gwanap unup sip yogup gine ugup ugup wanum amun. Upi barip kakaewa menan upi mondigawa menan. Upi gwat kakae gwayayame yananagaet pomponu den gapan kaitane garewa muga baware upi oma kaitan upi motok gan tan.

²¹ Unup kakae koerage ugup ugup wanumuine mini. Waenapan koewa muga ae vezi menan, pa i apane ame God, munan aigap anuni di tap. Waenapan ame God megawa menan kakae ugup ugup tat diamoni di tain.

²² Ap menan waenororo tamaru koewa ugup ugup taine mini ge ya ta go gare kakaewa tapen anuingan. Amba anu tumat gega baigan ge nonup den waninggan. Waenapan da da imumu nenengawa gapan Iesu menan taine intum tamo God wa taragasingan.

²³ Upi nop tave uoni bumbawam noa gare gare wapi ge anu ae ve. Ap wapi arak maken entaneta.

²⁴ Iesu nop mega anune taine nagirewa mu inamup notatae ya wap go baigan tap amba God nop mega kakaewa wadidiamop. Waenapan menawaet ya anupi inamup gari ya yavep.

²⁵ Mu nop gega toborepiwa gare bibigantu wa tamanam mumep. Anse, God munan sia anup imumu entanep nop mega tavewa anu awain go?

²⁶ Mu wataget Seitan imumu waren menan anun taiwanumun. Go endi mu imumu entanepi Seitan gwatae mega gwanap geamone tau amopen anuiwanumun.

3

Wam verisiwa gapan, waenapan God tandayatin

¹ Utunawa, nop mame sia anu. Wam verisiwa taupei gapan itan bagu sisi arita tata.

² Iwa waenapan muk mugenat munan anuin amba moni menan imumu wareta. Upi yaumu ao ware apan apan ta waiwanumain amba anu koeam den gare gare taiwanumain. Digut agut wa tain ine mame noa ya anuin waenapan wat agoat mumepi gaun ya wain. God menan ya anuin.

³ Waenapan munan bagu sisi ya anuin baigan ya tain. Yanao wain amba umam noa tain, anan men ugu gangan anu wa tain. Guegue kakaewa anu koeamain.

⁴ Nomu gapan evenan wain go imumu potamu gapan evenan wain uon. Pigagak ta amuin apan apan ta ugua wabawaramain. Muk anune aton muga anuin go God men ya anuin.

⁵ God men noa gapan tat wain go potamup God menan ya anuine go mutanda. Menan ge waenapan ap miniwa ae vemo.

⁶ Apan muga upi pa pa amone pa gwanap waen imu pose aro uoniwa ebo wabaige baige tamuiwanum. Waen ameme koewa ugup ugup taine menan imu pose aro uon tan ame gapan wam da da koewa anuine gapan taiwanumun.

⁷ Mu nop da da ugup ugup anuiwanum go nop tavewa ya anu aviwanum.

⁸ Wataget di apan dere Dianis ge Diamberes apan Mosis toborane mini apan gat wana nop tavewa toboriwanum. Imumu bambamaiwan noa gapan Iesu anu tumaset waiwanum go imu pose gapan uon.

⁹ Anut muga nononga ya aeta. Mosis anavi mega apan dere Dianis ge Diamberes ebo muga aroga waenapan yawan anune mini apan ame ebo aopan muga den waenapan iravi yave anuin.

Iesu oisewa men yonan aro tan wan

¹⁰ Timoti, ne dim dim taingina yawanek ap gapan taingian. Waenapan wadidi-amuingina guegue den taingin. Ame dim da tat anuingina, Iesu anu tumasen yambuni waingen amba upi munan anu guringin. God dianegeni ae ya vingin guegue mame iravi yawanegi amba ap gapan taingian.

¹¹ Ta koeragam nimanek wanumun ugu vegaek bagu sisi anu taningin. Pa Antiok pa Aikoniam pa Listura gapan inanap tane baware ta koeragam nimanegene oisewa den anuan. Itan ameme yao anuingin go wam wam pot pot God wat inakam nimanek wandin.

¹² Iravi Iesu menan inak kakaewa taiwanumat anupi ame anavi ta koeragam mumain.

¹³ Go ebo taine nagirewa amba tat wane go ya taine nagirewa den namu ebo muga otu kamontu endi aigap aigap baware taiwanum. Waenapan inamup ebo waiwanumun amba gare waenapan upinewa mu inamup ebo aopan waiwanum.

¹⁴ Go ge ap mini da ya ta, iwa nop tavewa anu kakayasean amba anu tumaseana gapan wa ta agingan iwa da da wadidiagene den anuingiana menan.

¹⁵ Ge orup otu waingeana gapan God nop mega namua ok seane anu ongingian amba endi mame sia anuingi, menan God nop mega namua gapan e dima baware waraan, ap gapan endi Iesu Keriso ire yaoyao aroga yawaan menan inap anu tumat taan.

¹⁶ God imua mega kakaewa gapan me nao mega nagirewa wadiamon mu God

nop mega ae seane. God nop mega ame danamet megawa mam, waenapan wadidiamopen o wa tamanam mumapen o wa ewamopen o negin kakaewa wa ewamuinampen menan.

¹⁷ God nao mega kakae ugup ugup taine nagire anu ta kayasepen menan God nop mega ap gapan anu kakayatain.

4

¹⁻² God amba Iesu Keriso, borit wane ge kabaniwa nagire wanene tamopi apanewa, dere yamamup diagivin. Iesu sia tauapen taiwan toemu mega menan den manega diagivin nop mega opata gan wam kakaewa o koewa gapan di wadidiamuingan. Tave go ebo men gego anupi wadiam. Koewa tapi wa tamanam mum. Kakaewa tapen menan diam. Nop gega menawaet ya anupi yambuni sia wadidiamuingan.

³ Iwa wam oniwan, waenapan nop tavewa ya anuin go muk anuine gapan tain. Wam ame mu dim da nop ugup ugup anupen anune megenat gapan wadiamot muga yomu tain.

⁴ Nop tavewa namu anune ae veain gutut tave uoni wat anuiwanumain.

⁵ Go ge wam wam pot pot dim da ta wat anua namu anu kakayat amba wa ta. Itan bagu sisi inagap tauepi di wainge. Iesu oit mega ewakewa opata gapan wadidi-amopen navewa taingan. God diageni di taitam.

⁶ Ne Pol Iesu oit mega menan aigavene tapen taivin bop nega wameva konintu taiwan.

⁷ God men kaimakaet taingin wadi-negeni taitamingin amba inap anu tu-masingina ae ya vingin.

⁸ Ap menan endi nao taingina garewa ameme Iesu dianegeni ap me nenan baraeni wandia. Ayop nuga Iesu wanene tamana tanepi apanewa wam mega tauepi amba neneta. Negenat ya neneta iravi me sia tauepi yawat anuinanta nagirewa den nuneta.

Pol gaun megawa

⁹ Kaimakaet tayao nenan onak.

¹⁰ Iwa apan Dimas piup guegue mega imua waren menan ae venege pa Tesalon-aeka aen. Apan Keresen at Galesia aen. Apan Taitas at Dalomasia aen.

¹¹ Apan Luk megenat tananegen wadia.

Apan Mak wat nau onge ta warit nima-negepi ame kakae.

¹² Apan Tikikas pa Epesas watu enan.

¹³ Mapa ongewa wanup nega gware dena at Toroas gapan waingena apan Kapas inap baraeña den wat onak. Buka nega den tam onak amba ok man etu gapan seane den di wat onak.

¹⁴ Apan Aleksanda guewa ugup ugup kaisini apanewa itan baware nenen. Ap tani gapan God nemoro mega yaveta.

¹⁵ God oisewa waitoni men kaimakaet watananen menan ge agun anu.

¹⁶ Namu enu yawanage wane gapan apan da nenan garinap ya yonen go ne negenat di iravi ae venege amon. Koewa ap tane go God munan bagu sisi anupen menan anuivin.

¹⁷ Mu ae venegen go God mainenap den warden nop mega iragi Diu uon ian ugu-pewa anupen men wat nagat nimanegen ne gamunap wadidiamon. Bop nonokap tauapen tan iwa waenapan toneget anun go God ta warit nimanegen.

¹⁸ Koewa iravi ugup ugup inanap tauepiwa menan God ta warit nima-negeta toemu mega kimaniwa gapan den waingepen menan wat inakam nimanegeta. Yaua wam wam pot pot ao warinain. Ame umap.

¹⁹ Waen Piriska ge apan Akwila ge apan Onesiporas dugup mega gaun nega wadiam.

²⁰ Apan Erastas pa Korin gapan warden. Apan Toropimas pa Mailitas gapan vek waren menan ne ae ve ongen.

²¹ Kaimakaet ta nenan namu onak iwa aunari wameva tauepi tawa. Apan Yubulas ge apan Pudensi ge apan Lainas ge waen Kolodia Iesu dugup mega nagire den gaun inagap waiwanum.

²² Ayop Guewa ge inagap wandep. Amba God garaet wat aipakam mega e inayap wandep.

TAITAS Pol ok mega apan Taitas inap sen

1 Ne apan Pol God nao mega taina apanewa da amba Iesu Keriso watu enamot mega da. Ame God om enumoni nagirewa anu tumat muga gapan wat agoat mumapen amba nop tavewa anu kakayase gapan God nao mega taiwanumampen, men om enunege watu enane-gen.

2 Amba ere mangan gapan God inak yaibobot nunapen menan wa agiat nimani, ame anut ge nop tavewa. Menan, nu anu tumat nuga amba nop tavewa anu kakayase gapan nu anu dao nuga tainampen iwa God ebo ya waini apanewa.

3 Amba God mek anuini wamewa gapan nop mega tavewa waenapan inak munapen menan God, nu wat inakam nuguwa, om enunege wadianegen gapan waenapan wadidiamuivin.

4 Amba ok ma otuna Taitas ge inagap sivin, iwa nu anu tumat nuga daiton. Amba Mamanua God ge Ayop nuga Iesu Keriso wat inakam nimaniniwa ame wat aipakam muga garaetawa ge nonup muga genep.

Apan Taitas at Kurit gapan nao tan

5 Ne at Kurit gapan vegena iwa ne ap mepe nao taingina ya taitamen. Ap menan ge ap mepe wanige waenapan wat tamanam mumapen ge sewa da da gapan Iesu dugup namu yoyo nugut mumapen men diagena ame tapen.

6 Ap gapan dugup namu yoyo ame nugut mumawa, mu inak koewa da ya di tap, go inak kakaewa taiwanuman amba waen daiton daiton naimopi ame boge di wanumop. Den otu waiwa, Iesu anu tumase, ine mame inamup notatae ge dangep ya taiwanuman.

7 Amba God dugup mega namu yoyo yonine nagirewa, mu inak koewa da ya taiwanuman, mu gau gunduman ya waiwanuman, den ugu gan gan menawaet ya taiwanuman amba kaum kaimake dena na ita anan ya taiwanuman. Den moni

menan imumu warep muk kakaewa muga men ya anuiwanuman.

8 Amba daio nagire taupei waupamo pa muga gapan semop. Inak kakaewa tapen men anu guriwanuman. Muk ingane inak muga wat tamaname kwayup tap amba guegue kakaewa God anuini gapan iniwanuman.

9 Amba mu nop tave iragena ame, anu ware kakayasep, ap gapan waenapan wadiamo ago munep amba da da God noa tandayasepi ame wat tamanam mumep.

Nop tave uoni wadidiamuine nagirewa

10 Iwa tandayasine nagirewa aruga wanumamun. Nop muga tave uon waine gapan waenapan ebo aopan wane wababayan mumiwanum. Diu nagirewa upi Diu uoni nagire etumu tum tapen menan diamuiwanum.

11 Ian ame nop ap anega waine nagirewa mek wa ae di vep. Iwa mu nop ya wawa nopewa ebo wadidiamone gapan dugup ugup ugup, bagu sisi muniwanum. Mu ap gapan waenapan moni muga upat mumiwanum.

12 Gosi muk apan muga da at Kurit gapan, inak evi venasepi oisewa waini apanewa, mu inak muga yave anega wan, “Ian Kurit nagire pot poraet ebo waine nagirewa, ge mu man puawa umap ge endao wandao tane taba nokonok taine nagirewa.”

13 Menan apan ame oitamu wani tavewa di, mek kaimakaet yam ta yawamo wa inak eboewa ame ae di vep. Ap ae vepi gapan anu tumat muga Iesu inap wat kaimakamep.

14 Mu diamo wa ian Diu nagire gutut baeborin muga ya anu tumasiwanuman. Amba Iesu nop mega tavewa tandayasine nagire ame iup muga den ya anuiwanuman.

15 Go imumu potamu nenenga wanumuine nagirewa, ame wan dim dim iragi nenenga iragen yawane anuiwanum, gosi imu pose sisip bararaen wandin gapan Iesu ya anu tumasine nagirewa, mu nop tave iragena ya yawane anuiwanum, iwa mu imumu potamu nop eboewa anuine gapan wa koeamene.

¹⁶ Mu God yao asigip tat wane waiwanum go inak muga ebo aopan taine gapan God asigip ya tane. Mu notatae ge dangep nagirewa amba mu inak kakaewa da tata om ya inamon, menan mu koevet di.

2

Iesu nop mega tavewa gapan wadidiamuingan

¹ Go ge Iesu Keriso nop mega tave iragen aame anenen wani gapanaet di wadidiamuingan.

² Ian apan kinewa tonewa taine nagirewa wadiamo, apan tavewa manega wadiamop, mu bumbawam umap ya wa tap yambuni ta wanumop dim dim tat anupi ge wat anupi menawaet ya tap anu gure amba tap. Iesu anu tumasene gapan tamana taiwanuman. Gare gare anu guriwanuman amba Iesu inap anu tumat muga ae ya antapenep.

³ Ap umap waen kinewa tonewa nagirewa, den wadiamo guegue muga tamanawa God anuini gapan iniwanuman. Amba ugu gan gan ta gare gare yanao nuaroro ya waiwanuman. Den kaum kaimake dena ya naiwanuman go gare evene wai upinewa guegue kakaewa ase wadiamop.

⁴ Ame gapan mu waen, apan ewake naimonewa, ae di wadiam kakayat mumep, meme waiwa ge orup mugawa inamup imumu di ware kakayasep.

⁵ Amba muk ingane kwayup ta kakayase, imumu potamu nenengawa gapan pa muga posewa kwayup taiwanuman. Meme wai nop muga anu ware den waenapan inamup inak kakaevet taiwanuman. Ap anega taiwanumampina, waenapan da God nop mega ya wa koeamain.

⁶ Ap umap apan tamari nagirewa, kaimakaet wadiam kakayat mum. Muk ingane inak muga ae kwayup ta anut kakaewa gapan taiwanuman.

⁷ Amba ge, Taitas gek ingane den wan dim dim uruga taingawa gapan, guegue gega kakaewa den ase ta ewamuingan. Ame imuga potaga gapan kaimakaet ae tumban amu yona amba God nop mega

tamanagaet wadidiamuingan, amba kae doak ya dia taingen.

⁸ Amba nop gega tavewa gapanaet di wadidiamuingan. Ame gapan waenapan da nop eboewa gapan ya enu yawage wain. Iwa mu God nop mega tavewa anupi gapan umam waramop, nop koerage da inanup wapen menan umap uon.

⁹ Den nao kaimakaet mondi taine nagire, wadiamo aritawa muga wapi nomu di anup. Amba dim dim tat diamopi di tap. Amba den aritawa muga aton anupen men nop da gare den ya wap.

¹⁰ Amba aritawa muga inamup wan dim dim da up ya tap, go tat muga kakaewa gapan, waenapan atonumu anupen men kaimakaet taiwanuman. Ap taiwanumampina gapan waenapan imumu warupep, God wat inakam nimanini apanewa ame nop mega tavewa anu warain.

¹¹ Iwa God wat aipakam mega garaetawa, ame waenapan uruga inak ewakewa muniniwa ame gaset Iesu Keriso gamup wat arogamen wandia.

¹² Endi God nop mega kaimakaet wadian wandini ame mam, Nu piup ma inak mega koewa tat anuitoni ge inak koe koewa ame ae di veat amba inak nuga ingane kwayup tat wat tamanamet, God anuini gapan ininampen.

¹³ Ap gapan waninet anu dao nuga kakaewa den ame God nuga aigap iragenawa ge Iesu Keriso wat inakam nimaniniwa, ame oya oyae den sia tauepi amase tainampen.

¹⁴ Iwa Iesu Keriso inak mega mek ae baraen, ame nu inak nuga koe koe taitoni biginu topen men tan. Amba sisip epa mega gapan vetane, imunu potanu wat ganatamep, nu me waenapan mega iragen di entan nimanep, inak kakaevet di tainampen menan nunan boen.

¹⁵ Ap menan, ge nop ma di wadidiamuingan. God aro amun mega gapan yona waenapan da koewa tapi yam ta yawamo wa, yaentuk wat tamanam mumingan. Amba nop waingawa gapan waenapan da ya anu baitam gimagep.

3

Inak kakaewa gapan ta aninampen

¹ Ap menan waenapan Iesu anu tumase-newa, sia darine enuen tamo wa, waenapan munan at muga namu yoyo yonane nagirewa ge gauarape mugawa ayamat inamup ta amba Iesu anu tumasine nagirewa inak kakaewa tapen men bongam bongam taiwanuman.

² Den wadiamo, mu waenapan inamup nop koewa da ya diamo waiwanuman. Go yambuni nonup baigan gapan ine wanumo waenapan inamup inak tave iragenawa pot poraet ta ewamuiwanuman.

³ Nu watagaet bumbawam den tainton. Nu God nop mega ya anu warinton, den ebo aopan wa taiton amba wan dim dim ugup ugup etunu potanuwareni gapan anuinton tat aton tainton. Ap gapan inak nuga ap mepe uarenat inak koe koe tainton. Den waenapan wan dim dim muga men ayane gunare wa tainton. Menan waenapan anu koeragam nimaniwanumune nu gare den anu koeragam mu-minton.

⁴ Go God, inak ewakewa nuneni apanewa, ame yan garaetawa ge baigan mega aroga ase wat matakam nunen.

⁵ Iwa me bagu sisi mega nunan anu gureni menan, wat inakam nimanen.

Ame tani iwa, nu inak kakaewa taintoni menan ya nunen go God me wat inakam megawa ame Guewa Woup Seni gamup biginu gure inak ewakewa nuneni gapan sia yanaton.

⁶ Ame wat inakam nimaneni apanewa Iesu Keriso gamup God yone Guewa Woup Seniwa aiganup itanigaet aoma wagemen.

⁷ Ap gapan God kakae dianepen menan, nu anu dao ta anivin iwa yaibobot ingewa nu yon boraton taivin.

⁸ Mame menan ne nop ma wadiangina tavewa di, menan ge ae anu kakayasepen men kaimakaet wadiagivin. Ap gapan waenapan wat tamanam muma, hop mame ae di anup. Amba waenapan gaset God anu tumasene nagirewa inak kakaewa, God men tapen tapiwa, ae anu gure amba taiwanuman. Inak kakae map anega tapi ame tane waenapan ago di muniwanum.

⁹ Ap menan apan Mosis iup mega namua seni aigap notatae, arak maken, digut agut ya wan taiwanian. Amba omae bae guturewa men engirit ya ta waiwanian. Nop ap ta wapi tavewa uon, ame wam muga wakaumane taiwanum, ago da ya muneta.

¹⁰ Amba apan da arak maken wan seu enuiniwa, ame koewa mega ae veapen menan, tagigit mega koni dere wan, ap ewap nop gega ya anupiwa, nop da sia ya dia.

¹¹ Ge asigigap di, waenapan da ap anega ta wapi ame nop tavewa ae veane inak koewa taine gapan muk ingane inak muga wa koeam wanum.

Pol nop mega uiwa

¹² Ne aunari wamewa pa Nikopolis gapan waniget anuivin. Menan apan Atemas o Tikikas inagap watu enapena, ge gare ma onak ap mepe tautananek.

¹³ Amba iup kwayup taini apanewa Senas ge apan Apolos wan dim dim onamo negina danam danam ame ago di mun kakayase amba onamop.

¹⁴ Amena waenapan nuga den wadidi-amuingan, mu inak muga gapan nao kakaevet taiwanuman. Ap tapi gapan mu wam wam inak muga gapan koewa ya tata mega ya taiwanumain. Amba waenapan bagu sisi muga gapan ago muniwanuman.

¹⁵ Endi mapa tananegene wanumamune nagirewa, iragi gaun kaewa inayap waiamun. Amba Iesu anu tumasine nagirewa, nunan anu gurine menan gaun nuga den wadiam. Amba God garaet mega iravi inayap wande ep.

PAELIMON

Pol ok mega apan Paelimon inap sen

1-2 Ne apan Pol Iesu Keriso no oise waingina menan waenapan waranegen gwat nokap bat nimanegene waingena apanewa, amba gwaninu Timoti dere, ok ma nao daiton taitoni apane Pilimon inagap sianit. Amba domaranu Apia ge apan Akipas, Iesu menan umanup kaimakaet waini apanewa, amba den pa gega gapan iam iam taine nagirewa ame uruga inayap sianit.

3 Amba Mamanu God ge Ayop nuga Iesu Keriso nonup ge wat aipakam muga garaetawa inayap wandep.

Pilimon Iesu anu tumasini apanewa

4 Ae kaiwan, gwaninawa, Pilimon, ne wam wam God inap mup waina, gaunaga den inap waivin.

5 Iwa ge anu tumat gega Ayop Iesu inap tan, God waenapan mega munan anu guriana ame oitaga anuina menan.

6 Ne mup genan God inap waina ame ge Iesu anu tumasiana oisewa waenapan upi wadiamoa gapan Iesu Keriso wat aipakam mega kakae guragut inap wariton, ame di anu awai.

7 Evenanawa, ge baigan gega taiana ame gapan ne potana aton bararaiwan amba imuna naunagasean wabigamingi, iwa ap taiana gapan God waenapan mega aton munaan, imumu wat vesingi.

Pol apan Onesimas menan wan

8 Ap menan ne Keriso gamup kaimakaet dim da tapen men diagepena ame di ta.

9 Ne Pol Iesu Keriso nao mega taina apanewa amba endi me menan gwat nokap apan inanegen wanik angin. Iwa imuna inagap warini menan nop yae-mantu diagivin.

10 Ne nop ma diangina ame otuna Onesimas menan waiangin. Me Keriso gamup ne otunawa mini di. Ne gwat noke gapan waingena wamewaa me ne gamunap Iesu anu tumasen.

11 Me watagaet nao inagap taiwandini ame endave den taiwandin go endiwa gende nunan nao di ta kakayaseta.

12 Endi ap menan ne Onesimas ewagai genan sia watu eniangin amba ne imuna potana iragena me di ware oneta.

13 Ne God Nop Oit Mega Kakaewa waingina menan gvat nokap bat nimanegene wanik angina gapan, ne Onesimas watanapen wande uaga ware nao ta aiwandat anun.

14 Go ne dim da da mawagap ya tat anun amba ta warit nimanegeden men ya nanam gimaget anuivin, go gek anuan taiana gapan di ta.

15 Ne anuingina, Onesimas me wam koni otu da tap ae vege mapa oneni ame menan me ewagai sia one inagap di wande aiwandapen menan tan.

16 Me watagaet nao mondi kaimakaet genan taiwandin, go endi me gwaniga iragena mini di, nao genan kakaevet aigap sia taiwandata. Me ne evenana imuna wat kakayasiniwa go ge me menan bumaga tantan anu guringan iwa me apan nu umanup amba den Iesu anu tumasiniwa.

17 Ap menan, Keriso gamup nao gega daitona anu nimanegewa, amba Onesimas inagap taupei waupapen tawa ame ne tauapen waupanegepo mini di waup.

18 Amba me dim koewa da inagap taniwa go gare dim da da upat gimagepiwa ame garewa ma nena ne tap.

19 Ma ne Pol ok ma nek naninap mame sivin, dim da inagap wareniwa ame ne garewa sia di genain. Go ge asigigap, ne wat agoat gimagen Keriso anu tumaseana ame garewa menan den ya wain.

20 Ap menan gwaninawa Pilimon, Ayop yaua gapan waiangin, nop mame waiangina di ta nen. Ap tawa ne imuna Keriso inap sia veturep aton neneta.

21 Amba ne ok ma sean di anuingina ame ne dim da tapen diagina ge di tai amba upi aigap aigap sia di ta agingai.

22 Amba nop da sia mam, Pa gwanewa enugutane ame da mondi wandepiwa ne-nan vea wandep, ne tauapena gapan inapen. Iwa ne anuingina mup ega God inap waiana panip ne iman ewagai inayap sia tauain.

Pol gaun megawa uiwa

²³ Apan Epapas mapa Keriso menan den waran gwat nokap baraene dere wanin antoni ame gaun kaewa mega inagap watu enia.

²⁴ Amba nao daiton taitoni nagirewa, apan Mak, Aristakas, Dimas amba Luk gaun kaewa muga inayap den watu eniamun.

²⁵ Ayop nuga Iesu Keriso yan garaet mega inayap wande aiwandan.

IBURU

Iburu nagirewa inamup ok da manega sen

God Otua Mamewa ewanen

¹ God watagaet negin ugup ugup amba wam ugup ugup gapan isimuran wainua God no oise waiwanumune nagirewa gamumup nop namu inamup wan.

² Go wam verisiwa mame gapan me otua gamup nop dianiwan. Me otua gamup piup kiman tan, me otua om enuni amba wan dim dim iragi yon borapen menan dien.

³ Otua me ganat God oya oya megawa di amba God ire yaoyao mega gine daiton. Me nop mega aroewa gapan wan dim dim iragi wat kaimagamen. Me koewa nuga garewa wat museni amba kiman sia dot ae God Aro Iragena Apanewa mainewa nutup gapan ae wanden.

Anea bawarewa go God Otua baware iragen

⁴ Menan me otua anea aigamupewa wandia, amba me yaua den paina ao waren, anea muga gauarap.

⁵ Ame menan God anea mega menan manega da ya wadiamon, Ge ne otunawa, endi ne mamaga entan nimanezia.

Amba nop ma den anea menan anega ya wan, Ne mamewa tain amba me ne otunawa tata.

⁶ Amba sia, wam ame God urae magi megawa wat enen piup taueni, me anega wan,

God anea mega iragi me wa taragasep.

⁷ Amba anea munan me sia anega wan, Anea mega taik mini entan mumen, amba nao nagire megawa oma meravewa mini entan mumen.

⁸ Go otua inap me anega wan, O, God ge toemu gegawa usenagaet wande aiwadata,

amba waenapan inak tamanawa gapan kwayup tamuingan.

⁹ Ge inak tamanawa menan anu guraan,

amba koewa tandayasianawa, menan ne paina bat gimagen.

Ap menan om enugena gapan aton aigap genan, go ge evenak waiga upinewa ap anega uon.

¹⁰ Otua menan sia anega wan, O Ayop, ge ere mangan, piup danewa mega ta baraeann, amba kiman gwanewa uruga naniga gapan tan.

¹¹ Mu uon an tain, go ge wanik agingai, Mu wanup mini iragi tom tam wain.

¹² Ge mu wanup mini ae paitai, mu wanup mini entan wantan taingai. go ge uap di wanigai, inak gega uon ya tata.

¹³ Endi God anea inamup da map anega ya wan, Nanina nutup gapan ae wanige amba ne anavi gega tambupen, gauaragap wanumoin. God ap anega wan.

¹⁴ Menan anea nao muga dim da? Mu nao muga ame God watu enamop amba da da Keriso anu tumat sepen menan wat agoat muminewa.

2

Neman gura anupen tantanewa

¹ Nu neman gurat yaentuk ae di anupen, ap gapan dim da nu anuitoniwa nu wat natait amba ugupewa da ewap ya anepen.

² Anea nop oit wat tauane amba isimuran wainua munane ame tavewa di ap gapan da da nop ame tandayasene mu garewa muga God nemoro mega warane.

³ Menan nu anenen amba God inak warapen nopewa mondi anuit? Mondi anutawa God nemoro mega nu inanup taueta. God inak warapen nopewa namu Ayop wan, amba da da me no utap anune gapan mu tave di wane.

⁴ Amba aigap sia God den yo ge paua arugataet tani, amba Guewa Woup Seni yan megawa yan se mek anuini omewa gapan muneni, ap gapan me oisewa tave di wan.

⁵ Wam evi amba, piup ewakewa venasepi ame anea mu namu yoyo tapen men ya wan.

⁶ go gare God nop mega ok da amba seane semua anega wan,
Iwa dimen nunan anuingi? nu piup na-girewa,

kakaewa nuga da uon?

Menan dimen kwayup taningi?

⁷ Wam koni otu da gapan nu anea gauaramup senean.

Nu payu oya oyae den amba viripe den tonat nunaan,

⁸ amba wan dim dim iragi kwayup nuga gauarap sean.

Ok anega sean. Tave di God anega wan, "Wan dim dim iragi kwayup nuga gauarap sean," ame wani guegue ame wan dim dim uruga menan wan, go endi ap ya yavintoni iwa wan dim dim iragi nu kwayup nuga gauarap ya wanumam.

⁹ Go endi nu Iesu yavivin, wam koni otu da gapan me anea gauaramup warden, menan God garaet mega gapan Iesu nunan boen. Amba endi payu oya oyae amba viripe den tonasen iwa me ugu vegaek anu wat yape nunan boen.

¹⁰ God wan dim dim iravi wan venat musini apanewa menan God inap aro amun wandia. Aro amun ame inap wardeni menan me Iesu ugu vegaek anu taneni neginewa gapan Iesu kakaevet entanen. Ap gamup God otu tasine aruga naumo oya oya mega gapan onamopen tan. Ap menan mu oya oya mega den waren.

¹¹ Iesu mu imunu bigi gureni menan Keriso mu den Mamamu God daiton. Menan Iesu kin kin anega diamuiwan, "E ne tatan gwanin di."

¹² Iesu God inap anega wan, Kakaewa, ge dim da taingianawa ne gwanin waina wadiamoin.

Mu iam iam muga gapan ne wa atonat gimagain.

¹³ Amba sia Keriso anega wan, Anu dao nega ge inagap barian. Amba den sia anega wan, Ne mame di tauan, God me otu waiwa neneni mame di tanamon waingian.

God nu yaumakanup yoniniwa Iesu

¹⁴ Nu etunu guin pakau dena nagirewa go God otu waiwa dianeni menan Iesu me apan umanup yanen. Me ap tani iwa

bop mega gapan Seitan amun mega to goyamepen tan. Iwa bop aroewa Seitan inap wandia.

¹⁵ Seitan aroewa to goyamepi gapan bop tawa anuine nagirewa wat vetamopen.

¹⁶ Ame tani anea munan ya tan go nu, Eibaraam ani sibabasiwa, nunan tan.

¹⁷ Ame tapen menan me nu umanup yanen, guegue mega nu den daiton, ugup da uon. Ap gapan bagu sisi nuga anu aven amba bagu sisi den nunanaet di taiwan iwa nu Pirisi nuga aritawa aigapewa God menan kakaevet taiwandapen. Nao mega ame tani gapan waenapan koewa muga anun ae viwan.

¹⁸ Iwa me mek den pusi warup ge ugu vegaek anu taneni menan me waenapan da da pusi warup inamup taupei ago muna muna me inap kaimake den uon.

3

Apan Mosis bawarewa go Iesu bawarewa iragen

¹ Dugup daitona potaya woup sen, nu e den God nao mega tapen menan nunan wani nagirewa. Iesu kakaewa mega menan anun, God Iesu Keriso nu inanup watu eneni nu anu tumat nuga Pirisi Aigap Iragenta me di anuinampen.

² God om enuni gapan Iesu nao tat mega God menan i oni botakain taiwandin, watageta apane Mosis me den ap anega God navewa waenapan inamup taiwandin.

³ Go Iesu me nao tat mega viripewa aigap tainampen amba Mosis gauarap. Guegue ame mam, pa tuini apanewa me viripewa aigap go pa mega ame tuni viripewa gauarap.

⁴ Tave di, pa ugup ugup orup da da tune go God wani gapan wan dim dim iravi wan venat mutañe.

⁵ Menan Mosis God nao mega apanewa di. Ame gapan me God navewa i oni botakain taiwandin. Ame God no oise evi wapi namu anu amba waenapan wadiam wandin.

⁶ Go Keriso me God otu iragenta menan i oni botakain God pa mega amase taiwandin. Amba nu God pa mega ame, me otu waiwa di, menan nu kin kin tat amba anu

dao nuga God inapaet, ap tata nu God otu tasine di waninait.

Anu tumat uoni tantanamua

⁷ Menan, Guewa Woup Seni ap mini anega wan,
Endi, God nop mega anunewa,
⁸ imuya potaya gware ya wap,
e isimurae waiawa umamup ya tane, mu
at kaimewa gapan,
God nop mega tandayasene amba God
irewa yawapen tane.
⁹ Ap mepe mu mondi pusina warupan
irana yawapen tane.
En apane dere (40) gapan ne kwayup
tamuingina,
go ap mu ya anun amba tandayat nimane-
gene.
¹⁰ Iwa ap menan mu inamup ne ugu gan-
gan tan
amba munan ne anega wan, mu imumu
potamu pot poraet pua aewan,
amba ne negin nega ya asik taiwanum.
¹¹ Menan ne ugu gangan nega kaimakaet
diamonda mam,
“Mu ne wagat nega potap ya unumoin.”
God ap anega wan.

¹² Gwanin wainawa, yambuni anun, e
imuya potaya anut koewa gapan gego
anun God ae ya ve aisene.

¹³ Go pot poraet gare gare wawa isiwa-
nian, ap gapan koewa ega menan imuya
potaya gware ya wap. Ame pot poraet di
taiwanian iwa wam endi arok mame di
wandini menan.

¹⁴ Erewa gapan nu Iesu anu tumasintoni
mini nu nao nuga daitonawa apanewa
Iesu den anu tumat nuga wat kaimagamet
aninanet wam verisiwa taueta.

¹⁵ God nop mega menan ok anega sean,
Endi, God nop mega anunewa e imuya
potaya gware ya wap,
isimurae waiawa nop mega tandayasene
mini ya tane.

Ap anega wan.

¹⁶ Ian ambe God nop mega anun amba
tandayasene? Ian ame at Idip gapan apan
Mosis naumo aeni nagirewa.

¹⁷ Amba God ian ambe ugu gangan en
apane dere gwanap inamup tan? Ian
ame koewa tane menan at kaimewa gapan
borit wane nagirewa.

¹⁸ Amba God ian ambe inamup agi
kaimakaet anega diamon ‘Mu ne wagat
nega potap ya unumoin?’ Ian ame mu
God nop mega tandayasene nagirewa.

¹⁹ Menan nu anutoni ame God ya anu tu-
masene menan God agi wani arewa gapan
ya unumone.

4

*Pura wagat God waenapan muga mu-
nan*

¹ God nu inanup agi anega wan, nu
wagat mega unugepen di wandia. Menan
nu anu tumat nuga ta kakayaset yambuni
aninait, wagat ame wakauameta tawa.

² Nu ap anega den God Oise Kakaewa
gapan wadianene anuton, isimuran
wainua ap mini den anune go anu tumat
gapan ya anu warane.

³ Endi nu anu tumasintoni menan wagat
ame gapan tauaton, ame God agi wani
gapan.

Agi ame manega wan, “Menan ne ugu
gangan nega gapan,
kaimakaet diamonda mam, ‘Mu ne wagat
nega potap ya unumoin.’ ”

God nop oit mame wan, go erewa gapan
ugup ugup iravi me gase taitamen.

⁴ Watagaet God wam nani yamu derewa
menan nop da wani ogewa da amba seane
semua anega wan,

Wam nani yamu derewa taueni,
God nao mega taitame wagat wanden.

⁵ Amba sia wagat wamewa menan anega
wan,
Mu ne wagat nega potap ya unumoin.

⁶ Watageta nagirewa God Nop Oit Mega
Kakaewa ma namu anune go wagat ya
warane iwa mu ya anu tumat tane, amba
endi arok ame nu inanup tauen menan
wagat ame unugepen wandia.

⁷ Ap menan God wam da sia baraen,
nuneni wamewa ame endi mame di.
Watagaet nop wani uap sia watageta
apane Devit gamup sia wan,
Endi God nop mega anunewa, e imuya
potaya gware ya wap.
ap anega anuton.

⁸ Namu watageta apane Diosua Isurero
nagirewa wagat munepo God wagat
menan eviwa Devit gamup sia ya wapo.

⁹ Menan endi God waenapan mega wagat unugepen di wandia, wagat ame God wam nani yamu dere gapan wagat wandeni mini.

¹⁰ Ap mini sia da da God agi wani wagare ame warepiwa God nao taitame gapan wagat wandeni mini me wagat wandeta.

¹¹ Ap menan nu kaimakaet gututugu ta wagat ame unugepen tainait, ame watageta nagirewa ya anu tumasene mini ya tait, da nu wagat wakaumeta tawa.

¹² God nop mega aro amun mega aigap iragen, kereba wani dena go me nop mega waniwa aigap iragen. Tum gigit warepi gapan waenapan imu pose tamanawa yan seta ame gwin pakao kaime no mek mini mini yan sepi mini. Ame gapan nu imunu potanu bumagap iragena dim da karaua anuitoni iravi enu yave wat arogameta.

¹³ Dim dim iragi ta venaseni God yamp da karaua ya wandia. Amba nu dim da karaua anuton taitoni me yaviwan menan wam evi da nu kakaewa koewa nuga God inap wat arogamait.

Iesu me pirisi baware aigapewa

¹⁴ Ap menan, Iesu God otua, nu Pirisi Aigap Iragna nugawa kiman dot aeni, menan nu anu tumat nuga kin kin warat.

¹⁵ Nu Pirisi Aigap Iragna nugawa mame, nu bagu sisi nuga anu aveni gapan kiman aen. Amba dim dim pusinu warup yawane iragi Iesu ap umap pusiwa warup yawan go me ya gearen amba koewa da me inap uon.

¹⁶ Me ap tani menan nu anu tumat nuga kin kin di warat me ewap ane God inap tauiat ame gapan God garaet mega warait. Ap mepe nu ago nune bagu sisi nuga wabibigameta.

5

¹ Waenapan yaumakamup God pirisi aigape iragenawa om enuni gapan nao wareta. Nao ame waenapan koewa muga wat mutapen menan man gure ire God inap garaet wanapen.

² Pirisi ame, me den nutu uoni menan waenapan bagu sisi muga yaentuk mantuk anuiwandepen menan kaimake uon.

³ Amba den me nutu uoni menan me koewa mega wat mutapen menan man da den gure ire God inap yan tapen wandia, waenapan munan megenat uon.

⁴ Orup da me mek anuini gapan pirisi aigap iragena navewa ya wareta go God om enupi gapan wareta. Ame watageta apanewa Eron inap tani mini.

⁵ Ap umap sia Keriso mek anuini gapan Pirisi aigap iragena navewa ya waren go God om enuni gapan. Menan God me inap anega wan,

Ge ne Otunawa, endi ne entanan ge Mam-agawa.

⁶ Ok mega da ugup sia Iesu menan anega wan,

Ge wande bobot waenapan pirisi mu-gawa.

Watageta apane Melukisedek mini ge tain-gai.

Me pirisi dugup mega gapan waingai.

⁷ Iesu piup ma wandeni gapan, iri den mup God inap waiwandini iwa God ya boep wapi ya boeta. Me imu pose ae bigaren amba God menan anu guriniwa ap menan God me mup mega anuiwandin.

⁸ Iesu God Otua di go ugu vegaek bagu sisi anu taneni gapan Mamewa tamana ayamase tapen menan asik tan, ap gapan me kakaewa mega om inen.

⁹ Me kakaewa mega om ineni menan nu da da God ayamase taintoni nagirewa inak ewakewa me inap warapen wandia iwa me inak ewakewa nunini i apanewa.

¹⁰ God Iesu anega wadien, “Ge waenapan pirisi muga aigap iragena diagivin. Watageta apane Melukisedek mini ge tain-gai.”

Onana ya geanepen tantanewa

¹¹ Wawa aritavet wandia, go wapen menan kaimake den go e yaemantu anu aviwanin.

¹² E wam nononga Iesu anuiwanian menan endi e waenapan upi wadiamopen go God nop mega ere anuiana aigap sia wadidiaepen menan taivin. Taba kaimake dena na na go no unewa kin ya wani menan am megenat naiwanin. Ame umap uon.

¹³ Waenapan am megenat naiwanu-mampina mu orup otu umap menan

kakaewa koewa om wara wara mu inamup umap uon.

¹⁴ Go kai warane nagirewa taba kaimake dena naiwanumun, mu kakaewa koewa om wara wara neginewa asik tane umap tan.

6

¹ Ap menan Keriso nop mega ere anuintoni ame kakae go endi imunu kin wap usenagaet anet. Nop erekwa nu anutoni ame inak nuga namua vetavet tat God inap anu tumat taton.

² Ame dawa anu tumat gapan dup iatoni oisewa amba dawa mup wapen menan waenapan nanimu ianup seane amba sia borit wane nagirewa sia yon wanumopi amba den God evi wanene tanepi wande aiwandapina noa. Ma iravi Keriso nop mega ere anutoniwa.

³ Menan God anuini gapan nu imunu kin wap usenagaet anet.

⁴ Orup da Iesu anu tumat tani amba kiman ganasewa gapan taueni ge Guewa Woup Seniwa yan mega wat naseni go evi Iesu tandayaseni gapan me anenen amba sia entan Iesu inap sia taueta?

⁵ Me God nop mega dansewa ware na anu amba den God amun aroewa yao anun.

⁶ Orup ap miniwa da iragi ware anun. Orup da God Otua tandayasene menan me sia ya entaneta iwa God Otua oma korosi gapan tobamatene ap umap sia pot poraet toowan. Menan waenapan yamap Iesu namu umam anuni mini umam ap sia waniwan.

⁷ Ugin piup da gapan pot pot visini ame naewa verane kai ware tavewa mega na na tauen. Piup ame gamup tavewa iene menan God piup ame kakaewa dien amba wat aipakamen.

⁸ Go gaian ganongae biroto yanepi, piup ame koerage menan God nemoro mega taueta amba merao gapan tuguta.

⁹ Evenan wainua, nu enan kaimakaet anega waintoni go e tat ega kakaewa nu asiginup, inanup gop da uon. God wat aipakam mega e inayap aigap di wandia iwa e inak warayana ame nu asiginup taton.

¹⁰ God amunagaet taini apanewa da uon. Menan e tat ega kakaewa ame God yaua menan anu guriana amba God wae-napan mega ago muniana ame iravi me imu ya oaraiwan. Menan garewa ega evi amba eneta.

¹¹ Nu imunu kaimakaet anuintoni ame e God menan ere tayana ap uap ta aisi-waniampina amba wam verisiwa taueta. Ap tane anu dao ega gapan dim dim da anu guriana gop ya anune tavewa inayap taueta.

¹² Endao wandoa ya tane go God wa agiat mumeni nagirewa ame mu anu tumat kaimakaet Iesu inap yaentuk mantuk amat taiwanumune mini anu tumat ega gapan ta aisiwanian.

God dim dim wa agiat nimaneni ugup sia ya entaneta

¹³ God apan Eibaraam wanat wa agiaseni nop mega tavewa Eibaraam anupen menan mek yaua aigap sia wan iwa apan da me aigapewa da uon.

¹⁴ God Eibaraam anega wa agiasen, “Ne wat aipakam gimagepena gapan naewa gega aruga yane senare aiwadata,” ap anega wan.

¹⁵ Eibaraam yaentuk mantuk amat taiwandini gapan God wanat wa agiaseni di wanen.

¹⁶ Orup da tanop topiwa me ayop mega yaua gapan tanop tota. Ap tapiwa nop noyam muga am gurat iwa ayop yaua gapan tanop toni menan.

¹⁷ God waenapan mega munat wa agiat mumeni mu agi ame wat nasepen menan me mek yaua gapan tanop ton. Tanop toni gapan agi megawa wat kaimagamen. Menan me agi wani gapan entan wantan da ya taueta go om ineta.

¹⁸ God namu wa agiat mumeni amba aigap sia tanop toni menan nop mega ugup ya di entaneta aopan ugup ya di wata.

Menan nu, wat vetaneni nagirewa, anu dao nuga me inap bara bara gop da uon menan tumap di waninivin.

¹⁹ Anu dao ame nu potanup dan megawa menan kin kin tumap waninan. Anu dao nuga ame God Paewa woup seni woup seni gwanewa unugen, ame

tonan noa borasini wanupewa garawasen unugen.

²⁰ Woup seni woup seni gwanewa ame gueguewa ame kiman pae posewa, ame Iesu nunan namu unuk aen. Amba endi me nu pirisi aigap iragena watageta pirisi Melukisedek ap umap nao wande usenagaet taiwandata.

7

Apan Melukisedek God pirisi megawa

¹⁻² Apan Melukisedek pa Seilem ayop mugawa. God Paina Iragenawa pirisi megawa. Me yaua guegue Tamanagaet Taini Ayopewa. Yaua dawa guegue Baigan Ayopewa iwa me pa Seilem ayop mugawa (Seilem gueguewa ame Baigan). Watageta wam da gapan Apan Eibaraam amba ita nagirewa mega den ita anan gapan at ugupe ayop upi guramon borit wan ewagai entan at mega Keinan sia taueni gapan Melukisedek ine taue Eibaraam wat aipakamen. Wat aipakameni Eibaraam gare anavi puraput muga tambuni semu aonagaet wanumone semu daiton yan ta wanen.

³ Apan Melukisedek ine mame nu oare omae baewa den yaumua ok ya sean. Me wam ansena yanen wam ansena boen nu den oare. Me God otua mini yone taiwandini. Menan me Pirisi navewa taini uon ya tata di ta aiwadata.

⁴ Yao anun, apan Melukisedek me apan bawarewa di. Menan nu omayan baewa ian bari nugawa Eibaraam anavi nagire puraput muga tambuni semu aonagaet wanumon semu daiton yan ta bawarewa mega Melukisedek wanen.

⁵ Watageta apne Livai naewa mega pirisi navewa taiwanumampen God om enumon menan warane taiwanum. God iup muneni gapan anega diamon, "Pa nagirewa mu puraput muga semu aonagaet semu daiton yan ta e Livai nagirewa enep." Menan pa nagirewa ap yan ta dugup Livai nagirewa muniwanum. Pa nagirewa mu den Eibaraam naewa go dugup Livai nagirewa semu aonagaet semu daiton yan ta muniwanum.

⁶ Melukisedek apan Livai dugup mega uon go Eibaraam puraput mega aonagaet daiton yan ta wanen. Eibaraam bawarewa God wa agiaseni apanewa go Melukisedek bawarewa aigap menan Eibaraam wat aipakamen.

⁷ Nu asiginup taton igueguewa ame wat aipakameni apanewa me aigap iragen amba inap wani apanewa me gauarap.

⁸ Livai nagirewa ame mu pirisi puraput semu aonagaet semu daiton yan tan warane go mu evi amba borit wain. Go apan Melukisedek puraput semu daiton Eibaraam inap wareni me ya boeta, ame watageta ok ap anega seane.

⁹⁻¹⁰ Eibaraam apan Melukisedek tautaneni gapan apan Livai ya yanen go omae bae Eibaraam potap wanden. Go guegue ame Eibaraam puraput semu daiton Melukisedek wanen ame Eibaraam naewa mega Livai den wanen mini. Iwa Livai ya yanen go ap wamewa gapan Eibaraam potap den wanden.

¹¹ Apan Mosis iup namua seni Isurero nagire inamup taueni gapan apan Livai dugup mega pirisi navewa ere watape taiwanumun. Nao muga ap me kakae iragen taiwanumampo pirisi da ugup sia ya tauapo. Go Iesu taue pirisi nave ap me den taiwandin go me apan Livai, naewa da Eron, dugup mega daitona da uon go me Melukisedek mini taini apanewa.

¹² Pirisi tat muga entan ugup ewakewa tauepi ame guegue God iup nop mega ewakewa den waren sia tauiwan.

¹³⁻¹⁴ Ame Iesu gamup venasen iwa me dugup mega ugup. Nu anuivin Ayop Iesu dugup Diuda apanewa. Amba Diuda dugup nagirewa pirisi dugup muga Livai uon amba God Paewa gwanap nao da ya tane. Apan Mosis pirisi nagire munan ok seni Diuda dugup mega den munan ok ya sen go dugup Livai munan ok sen.

Iesu pirisi kakae iragen

¹⁵ Nop mame endi aroga tauiwan. Iesu pirisi da ugup tauen, dugup Livai gapan uon go me apan Melukisedek mini taiwandini.

¹⁶ Inak mega uon ya tata aro ap gapan me pirisi tan go dugup Livai pirisi nagirewa mame upe guturewa gapan gapan aro wariwanum, ame iup namua gapan.

¹⁷ God Iesu inap wani ok anega sean, Ge wande bobot pirisi apanewa. Watageta apane Melukisedek ta wandeni omewa ge taingai.

Ok ap anega sean.

¹⁸ Mosis iup namua seni aroe uon nutup boen menan ase barae ae ven.

¹⁹ Iup namua waenapan taiwanumune ap gapan dim da kakaewa da taiwanumune God inap om ya inen. Go endi inak kakaewa aigap warait ame iup ewakewa mame Iesu gamup tauen naune God inap senen.

²⁰ Iesu pirisi yaibobot taiwandapen men God yaua mek tanop ton. Apan upi pirisi tane mu inamup God yaua gapan tanop da ya ton munen.

²¹ Go Iesu pirisi tani God mek yaua gapan tanop ton anega dien, Ne Ayop di, agi ma kaimakaet inagap waiangin, evi da entan ya tain.

Ge wande bobot pirisi apanewa.

²² Ap wani gapan iup namua aroe uon go iup ewakewa Iesu gamup taueni ame aroe den menan iup ewakewa gapan nu tumap waninait.

²³ Watagaet pirisi nagire aruga wanumon borit wa amuiwanumune menan nao muga bop gapan amboren.

²⁴ Go Iesu yaibobot wande aini apanewa menan pirisi navewa ta aiwadata.

²⁵ Wande aiwandapina menan endi wam wam pot pot me gamup God ine anitoni nagirewa wat inakam nimanepen aroe den. Iwa Iesu God inap nunan mup waiwandapen menan wande aewan.

²⁶ Menan Iesu nu pirisi nuga aigap iragenawa amba nu bagu sisi nuga wat tamananepen menan umap tata. Me posewa woup seni apanewa. Koewa da ya tan koewa da me inap uon. Nu koewa taitoni nagirewa umanup uon menan Iesu yaua viripe den God ao waren kiman aigap baraen wandia.

²⁷ Pirisi aigap iragen nagirewa mu waenapan koewa muga garewa amba mu

muk koewa muga munan wam wam pot pot man gurane iriwanum. Go Iesu mu umamup uon iwa me koewa da ya tan. Menan nu koewa nuga garewa menan wam daitonagaet nunan boen, wam da sia ya tata iwa God inap garewa tani ame om inen.

²⁸ Mosis iup megawa gapan pirisi aigap iragen om enumoni apan ameme mu den koewa taine nagirewa. Iup ame namua gapan venasen go evi God Iesu menan agi mega wa tanop toni gapan Otua om enun. Ame gapan Iesu wat tamanam kakayesen amba me yaibobot di wande aiwadata.

8

Iup ewakewa iup namua yamasen

¹ Nop nuga ibariwa mame. Pirisi nuga aigap iragenawa inanup wandini ame Iesu. Me paina kiman dot aen God Paina Iragenawa mainewa nutup gapan ae wandaia.

² God Paewa kimaniwa ame woup am seni ge woup am seni arewa di ame gapan Iesu nunan taiwan. God Paewa kimaniwa apan naniwa gapan ya tun go God mek tun.

³ Pirisi aigap iragen iravi God dim dim garaet wanapen man gure irapen menan om enumon. Ap menan Iesu den dim dim garaet da God wanapen.

⁴ Iesu piupa wandepo pirisi nave ya tapo iwa pirisi upi wanumamun Mosis iup mega namua gapan yan garaeta God waniwanum.

⁵ Mu nao piupa taine kiman guegue mega piupa taiwanum. Ame iwa Mosis God pa mega namdat tupen tani God anega wadien, "Gende tunupa wainetoni pa nega tutu guegue ewagena ap gapan di tu." Ap anega wan.

⁶ Go endi God Iesu om enuni gapan Iesu Pirisi Nuga Aigap Iragna nao mega kakaevet di taiwan menan iup namua paina yamasen. Mosis waenapan iup namua muneni umap di go Keriso iup mega nuneni kakae iragen. Iwa Mosis iup mega dim wa agiat mumeni umap di go God ewake wa agiat nimaneni kakae iragen.

⁷ God Mosis waenapan munan iup namua wadieni kakae iragen tapo iup eviwa da ya tauapo.

⁸ Go God waenapan mega koewa tane yaveni menan iup namua om ya inen ap anuni gapan anega wan,
Ne Ayop, wam da oniwan amba ne Isurero
ge Diuda nagirewa,
iup ewakewa munain.

⁹ Iup ame isimurae wai iup namua munana ap umap sia ya munain.
Wam ap gapan ne naninap isimurae wai tam naumo,
at Idip ae vean angen.
Mu iup namua ayamase ya tane menan munan ya anuingina.
Ne Ayop apanewa anega waivin.

¹⁰ Menan ian Isurero nagirewa iup ewakewa munapen taivin,
Iup ame iamup barain amba bumagamup ok seain.
Ne God muga di tain amba mu waenapan nega entan mumain.

¹¹ Ap menan tase gwani,
evene wai den gare gare anega ya wadidi-amoin, God anu awan.

Ap anega ya wapi,
iwa waenapan iravi bawarewa ontotua den anu nimanegain.

¹² Koewa muga munan baguna sisi wap sia ya anu mumain.
God ap anega wan.

¹³ God iup ewakewa nunat wani gapan iup namua nutu bigaren. Bigareni wande aen uon tapen taiwan.

9

God namu wa taragat gueguewa

¹ God iup mega namua waenapan wadi-amon ap gapan pa namdat mega pia tu tu yaunewa amba wa taragasepen gueguewa den wadiamon.

² Pa namdat ame tune gwanap dere enugusene. Namu unugene gwanewa yaua Woup Am Seni Arewa diane. Dun pusi kaime dena amba watat gagap taba buredi God menan seane ap mepe wanumon.

³ Gwanewa dawa use unuk anetawa, tonan mega wanup gware den toboran at ame yaua God Posewa Woup Am Seni Woup Am Seni arewa di.

⁴ Ap mepe wanumone onaewa ame watat gariwa gwayayame yananagaet den iu osewa dagin men watat aigap iran. Da sia maua God nunan wa agiaseni paua mega da. Maua ame gariwa gwayayame yananagaet den. Maua gwanap unup sera gwayayame yananagaet wanden den kiman tabaewa yaua mana unup sera gwanap wanden. Apan Eron gerok mega mek bae den venasen maua gwanap wanden. Mosis God iup aonagaet gwat dere gapan ogewa kaiseni maua potap den wanden.

⁵ Anea dere yaua serubim guegue muga kaisene maua aigap wanumon. Anea dere ame magumu enat tane gungun tau aer. Anea dere ame God wandini paua megawa. Amba gungun arewa ame waenapan bigimuga wat musini arewa.

Wan dim dim ugup ugup mam guegue muga oisewa nononga endi ya wait.

⁶ Pa tun wananan sese kakayat tane gapan pirisi nagirewa wam pot poraet pa pose daitonawa gwanewa gwanap tauan nao muga ugup ugup taiwanumun.

⁷ Go pa pose derewa gwanewa, yaua God Posewa Woup Am Seni Woup Am Seni arewa gapan pirisi aigap iragena megenat gwanap unugen aeniwa. En daiton potap wam daiton gwanap unuk aeniwa. Me unugeni gapan waenapan sipa tapa taine koewa muga God anu ae vepen menan man deniwa ware God wanen. Me mek koewa mega menan den wanen.

⁸ Ugup ugup mame gapan God Guewa Woup Seniwa waddidianiwan. Pa namdat wandeni wamewa gapan ame gwanewa daitonawa unuge wandepi umap di go gwanewa derewa unugepen menan umap uon. Ap menan waenapan God inap tauapen menan umap uon.

⁹ Guegue ame iup namua gapan waenapan God wa taragasepen menan garaet wanen man guran iriwanumun go umap uon iwa God yamap om ya inen, menan mu bigip muga ya wat musen.

¹⁰ Waenapan ap tanewa epimu iupewa kwayup taiwanumun. Taba kaum ugup ugup virip taiwanumun dim dim ugup ugup God yamap bigi wariwanumun.

Ap taiwanumune aiwandan epi God iup mega ewakewa tauapen menan.

Keriso nunan tainiwa uon ya tata

¹¹ Iup ewakewa ame Keriso. Me taueni gapan pirisi nuga aigap iragenawa navewa taiwan menan dim dim kakaewa iup namua wani gapan tavewa venasiwan. God pa mega namua piawa nanimup tune piup purapusewa gapan tun. Go Keriso, pirisi nao warini pa mega ewakewa waenapan nanip ya tun amba piup ma mega uon go kiman gapan.

¹² Keriso God pa mega gwane derewa yaua Posewa Woup Am Seni Woup Am Seni arewa unuk aeni gapan man gout ge man kao otua denip mugawa God wanapen menan ya wat aen. Mek denip mega wat ae yan tan God di wanen. Ap waneni koewa nuga garewa di baraen amba denip mega aroe uon ya tata.

¹³ Diu pirisi mugawa waenapan wapimu bigi warep koewa muga uon tapen paua tapen menan man gout ge man kao denip mugawa o man kao otua irane ataginewa waran waenapan aigamup patnagen.

¹⁴ Go endi Keriso boeni denip mega aroewa aigap iragen di. Iwa Guewa Woup Seniwa yaibobot wandini gapan God menan Keriso me koewa uoni gapan mek etua yan garaet tan. Ame tani gapan nu imunu nenenga tap amba tave uon pokaet taitoniwa ae vepen menan nunan tan. Nunan ap tani menan imunu watap God wandini navewa tainampen.

¹⁵ Ap tani menan God iup mega ewakewa nunan baraeni Keriso yau-makap yoneni gapan iup ame aro ware nao wariwan. Ame gapan God nunan wani nagirewa wa agiat nimaneni menan wat aipakam nimaniwanda amba wande aiwandata, Iesu gamup. Iup namua gapan nu koewa nuga tatoni ame ya vetanen go Keriso bop mega aroewa gapan vetanen.

¹⁶ Apan da tagu mega yan sese ogewa sep amba apan ame boepi ap gapan yan seain. Go kasiga wandepi puraput ame yan ya seain.

¹⁷ Tagu wa seni apane wandepiwa ok mega aro ya wareta go me bop tapi gapan

ok ame aro wareta amba tagu mega yan seain.

¹⁸ Guegue ame menan God iup mega namua denip aroewa gapan iup amunu den anupen menan man gurane denip muga visen.

¹⁹ Denip aroewa gapan iup amunu den anupen menan watageta apane Mosis God iup mega namua iravi waenapan wadi-diamoni amba man kao otua ge man gout denip mugawa kaum den man sip gumewa dendeni oma nani bae den itapu panan kauma puakamene. Puakameni iup namua oge seane amba Isurero na-girewa aigamup patnagen.

²⁰ Mosis ap tani anega wadiamon, "God iup mega e tat diaeni iup ame amunu den. E anun ae ya veapen men paua denip aigayap patnagivin," anega wan.

²¹ Ap umap sia denip ware God pa mega inap wa taragasene purapuse den aigap patnagen.

²² Ap anega tan iwa iup namua anega wani, "Wan dim dim iravi denip gapan bigi warian. Denip ya visepiwa waenapan koewa muga God ya wat museta."

Keriso boeni koewa nuga wat aipa uaren

²³ God pa mega piawa tune amba gwanape puraput megawa iravi ame kiman gueguewa, tavewa iragenawa kiman gapan. Ameme menan God pa mega pia tune puraput mega God yamap kakae tapen men denip gapan bigi wariwanumun. Go tavewa mega kimani kakae tapen men denip kakae iragenawa gapan kakae tata.

²⁴ Keriso God Paewa, waenapan nanimup tune ame Woup Sen arewa gwanap ya unuk aen. Iwa ame guegue megenat go tavewa kiman pae pose gapan unuk aen God yamap endi nunan yoniwan.

²⁵ Diu pirisi muga aigap iragena God pa mega gwanap woup am seni woup ame seni arewa en gapan gapan man denip muga ware unuk ae patnak wandin. Go Keriso aigap aigap ap anega ya taiwandin wam daiton megenat bop tan kiman dot aen.

²⁶ Aigap aigap taiwandapo guegue wataget iragen God wan piup venaseni

amba oniwandin gapan Keriso wam aruga ugu vegaek bagu sisi aigap aigap anu tanapo. Go gare wam verisiwa mame gapan koewa nuga wat mutapen menan tauetmek ingane etua garaet yan tan.

²⁷ Nu piup nagirewa iragi wam da da borit wait amba God wanene taneta.

²⁸ Ap mini wam daiton gapan Keriso nu koewa nuga garewa warapen menan mek etua garaet yan tan. Me iman sia taueta ame tauepiwa nu koewa nuga menan ya taueta go nu menan amat taintoni nagirewa inak ewakewa nunapen menan taueta.

10

Iup namua kwayup tata ya umap

¹ God iup mega namua ame gueguewa megenat, tavewa mega kakae kiman gapan evi tauen. Iup namua gapan taiwanumune ame God yamap kakae tapen menan en gapan gapan man guran iriwanumun go ame gapan imumu kakae ya tan.

² Kakae iragen tapo man sia ya gut irapo. Waenapan ame God wa taragasene koewa muga bigi warep anupo koewa muga umame sia ya anupo.

³ Go iup namua gapan koewa muga garewa en en man guran iriwanumune iwa koewa muga uon ya tani men anu awapen menan.

⁴ Iwa koewa muga man kao ge man gout deniwa viseni gapan daiton da ya wat museta.

⁵ Ap menan Keriso piupa vitapen tani God inap anega wan,

Maman, koewa muga garewa man guran irane puraput genan seane,
ge ap menan ya anuingi go ne etuna ne-naan,

ge yan gega entanepen menan anuingi.

⁶ Mu genan man iriwanumun koewa muga garewa,
taba ugup ugup genan ta siwanumun go ap menan aton ya anuingi.

⁷ Amba ne anega wan, God, ne mam.

Anenen anuana ne di tain,
ame iup namua ogewa oitana ap anega di seane.

⁸ Iesu nop ame namu anega wani, "Wae-napan man ugup ugup genan guriwanumun upi watara iriwanumun upi den taba ugup ugup genan ta siwanumun koewa muga garewa go ge ap menan mup ya waan aton ya anuingi." Iesu ap anega wan. Iup namua wadiamoni gapan taiwanumun.

⁹ Amba sia anega wan, "God, ne mam. Anenen anuana ne di tain." Ap menan guegue namua taiwanumune God wani gapan endi uon tan iwa Iesu arok ame waren.

¹⁰ Iwa God anuiniwa ame Iesu Keriso etua wam daiton yan tan nunan barapen sia ya baraeta. Ap baraeni gapan God yamap potanu woup sen koewa nuga sia ya anuta.

Keriso boeni nu garanu ta kakayesen

¹¹ Pirisi nagirewa yonan wam wam God menan man guran iriwanumune da ugup uon ap uap uap pot poraet di taiwanum. Ap taine gapan waenapan koewa muga da ya wat musen.

¹² Go Keriso koewa nuga garewa wam daiton etua yan garaet tan ap tani aroewa wande aiwadata. Amba God mainewa nutup gapan ae wanden.

¹³ Ap mepe di wandiwandapina God anavi mega tambu pusiwa gauarap seapen men amat taiwan.

¹⁴ Menan wam daiton ame gapan me etua yan garaet kakaevet tan. Ap gapan nu koewa nuga anu ae veni nagirewa me yamap kakae iragen waninan.

¹⁵ God Guewa Woup Seniwa nop ma den wadianiwan. Me namu anega wan,

¹⁶ Menan ian Isurero nagirewa iup ewakewa munapen taivin.
Ne Ayop di, iup ame iamup barain amba bumagamup ok seain.

¹⁷ Wani amba evi sia anega wan,
Koewa muga ugup ugup sia ya anu avingain.

¹⁸ God koewa nuga iravi anu ae veni menan koewa nuga garewa da sia ya tait.

God nunan tani garewa pot pot menan anuinan

¹⁹ Dugup negawa, Iesu nunan boeni menan God pa mega kiman gapan woup

am seni woup am seni arewa anet anuitoni gop da uon di anait.

²⁰ Etua mek yan garaet tani menan God pa mega tonanewa negin ewake inak neginewa ame nunan watapen. Wanup tonan toboreni wandeni ame endi ase watapen ame Keriso mek etua di.

²¹ Pirisi nuga aigap iragena Iesu God pa mega kwayup taiwan. God pa mega ame nu di.

²² Ap menan imunu nenengawa gapan anu tumat nuga kin kin taitoni amba nuk imunu koewa ya anuitoni amba etunu kaum kakaewa gapan bigi wareni God inap anet.

²³ God wa agiat nimaneni di tata gego da uon menan anu dao nuga me inap wat natait.

²⁴ Baigan gare gare tainampen ap gapan ago tat amba gare gare anu gurinampen.

²⁵ Iam iam pot poraet tainampen upi ae vine mini ae ya veapen. Ayop Iesu wam mega tauapen taiwan menan aigap sia gare gare wawa nisinampen.

²⁶ Nu God nop mega tavewa wadianen anutoni go orup da da mek anuini gapan koewa sia aigap aigap taiwandapinawa ame anenen? Koewa mega sia muta muta neginewa da uon.

²⁷ Ap tapiwa garewa mega daiton megenat wandia ame tap anuiwandapina gapan God wam uiwa tandayasine nagire den wanene tamota amba merao amun iragenawa arewa gapan uatameta.

²⁸ Mosis iup namua seni anega waiwan, "Waenapan da da iup ame paina yamasepi upi dere o yampo magua ware wapi menan koeragewa nagire munan bagu sisi ya anuin go guramop borit wain."

²⁹ Koewa ame tane garewa baware go baware iragena mam. Da da God Otua wa koeragamene waiwanum. Amba munan denip viseni denip ewakewa ap gapan God koewa muga wat museni noa wa otu-tamiwanum. Guewa garaet wat aipakam muminiwa nipec diwanum. Ap menan waenapan ameme wanene baware iragenawa warain.

³⁰ Ame nu asiginup God anega wan, Koewa muga garewa ne wanene di tain.

Amba sia me wani nu asiginup ame, Ne Ayop di waenapan nega wanene ta-moin.

³¹ Kaiwan, God inak wandiniwa nani bagup waramopi nagirewa nenan yang-wan baware anuin.

Epara ta wanin aninait

³² Namu waineana aigap sia anu awai. Wam ame gapan God ganat mega imuyap tauen e warayan amba itan bagu sisi aruga inayap tauen go anu tumat ega ae ya veayan.

³³ Wam da da waenapan yamap nipec diaen wawa koko taen amba ta koeragam imaiwanumun. Amba wam upi sia wae-napan upine inap itan ap anega inamup venaseni menan e mu aigavene aisean.

³⁴ Ap gapan den gwat noke wanumone nagirewa munan bagu sisi anuyan. Amba up nagirewa pa ega tauan puraput ega up tane go e aton gapan wanian. Iwa kiman gapan puraput ega kakaewa yai-botot wandiniwa menan anuyan.

³⁵ Ap menan, God inap epa ega ya wakaumai iwa epa ega ame garewa mega baware iragen God enapen wandia.

³⁶ God anuni e tapen amba nunat wa agiat nimaneni e warapen menan yaentuk mantuk amat taiwanian.

³⁷ God wani ok anega sean, Wam otu da amba sia onini apane taueta, use sia ya enu waneta.

³⁸ Waenapan nega ame tamanawa taine nagirewa,

anu tumat nimanegi di wanumoin. Go mu da da ae venege ewagai amopi atonamu ya anuin. God ap anega wan.

³⁹ Go nu borit wa ian ewagai ane ame nagirewa uon go Iesu tumap am dagim yonat inak warat.

11

Anu tumat gueguewa

¹ Anu tumat guegue ame nu dim da anu dao nuga gapan venaset anuitoni ame di taueta anuivin. Menan nu namu ya yavitoniwa evi taupen menan amat taivin gego da uon.

² Watageta nagirewa God anu tumasiwanumune menan God mu atonamu tan.

³ Nu asiginup, ame anu tumat nuga aroewa gapan God nop wan piup kiman iravi venat mutane. Dim dim yavitoniwa gapan ya venat mutan go ya yavitoni gapan wan dim dim iravi venat mutan.

Omayan baewa gutut mugawa

⁴ Anu tumat gapan watageta apane Eiboro man gure ire God inap yan tan menan God imu pose me inap waren go tasewa Kein kutut ge antaba God inap yan tan go God umap ya dien. Eiboro God anu tumasiwandin menan yan mega tani daginewa waren me apan tamanawa dien. Eiboro boen go anu tumat tamanawa tani menan oisewa endi den waenapan anune waiwanumun.

⁵ Anu tumat kakaewa tani menan apan Inok ya boen go God kasiga ware kiman aen. Waenapan etua yop tane go ya yao matagamen iwa God wat aen. Namu Inok anu tumat kakaewa tani menan God imua wareni amba evi God Inok wat aen.

⁶ Nu anu tumat kakaewa God inap ya tata gapan imu pose inanup ya wareta, iwa da da God me wandini apanewa amba me menan yop taine nagirewa garewa munini apanewa anu tumasepiwa, ame God atonamu anuiwanda.

⁷ Ame anu tumat gapan apan Noa kabum baware da kaise tu waene otu wai den kabum ame gwanap inak warane, iwa me namu God evi kaum ningoe watu enepi oisewa anu tumasen. Ap anega tani gapan me ya anu tumasine nagirewa wa koeragam mumen. Me God ap anu tumaseni menan Noa apan tamanawa dien.

Apan Eibaraam otu wai den anu tumasen

⁸ God Eibaraam vene wa piup ewake da wanat wa agiaseni gapan amba Eibaraam anu tumat gapan piup mega namua ae ve amba piup me oarewa are da aen.

⁹ Anu tumat gapan me at ugupe apanewa mini at ame gapan iniwandin. Piup ame ian ugupe piup muga menan pa mega iragenta da ya tun man etua gapan pa namdat tu iniwandin. Otua Aisik amba upewa Diekap den God wa agiat

mumeni nagirewa ap anega at ame gapan iniwanumun.

¹⁰ Iwa Eibaraam pa sewa baware kakaewa da ugup sia God tupen menan amat taiwandin, pa sewa ame ibariwa God mek anuini gapan tuta.

¹¹ Ame anu tumat aroewa gapan Eibaraam waenewa Sera gamup orup da waren. Sera aeta ton amba orup wara wara wamewa uon tan go God orup da wanapen wa agiaseni menan Eibaraam anu tumasen amba Sera bagup tan.

¹² Memewa Eibaraam aeta ton bop maniwan go waenewa bagup tan. Ap gapan apan daiton naewa arugataet yan aiwandin buanae ge puiman gerase ap umap ame ya batnak batnak mini.

¹³ Ame anu tumat God inap taiwanumune gapan waenapan ma iravi borit wan God munat wa agiat mumeni ya waran go paina yawan go evi taupei menan anu tumat gapan gaune wan. Mu anune ame mu at ugupe nagirewa at muga gapan wanumone menan mu ayogo at ame gapan iniwanumun. Nop ame mu aroga waiwanumune.

¹⁴ Anega waiwanumune nagirewa mu at piup muk muga yop taiwanum.

¹⁵ At muga namua ae ve onamone ginase anupo mu ewagai sia amopo.

¹⁶ Go mu piup kakaewa yoa taiwanum piup ame kimani wandia. Anega anune menan God me God muga diane umam ya anun iwa munan pa sewa muga kimani tu kakayesen wandia.

¹⁷ Anu tumat gapan Eibaraam otua yan ta God inap wanapen tan goandage ya anun. God Eibaraam anu tumat mega ire yawapen menan anega dieni, "Otuga Aisik nenan to boep." Ame kaimakewa da di iwa God namu Eibaraam otua gamup naewa aruga wanapen menan wa agiasen go Eibaraam anu tumat ta otua ame yan garaet ta God wanapen tan.

¹⁸ Agi anega wan, "Ge otuga Aisik inap naewa gega yan aiwadata."

¹⁹ Eibaraam anega anun, me otua boepiwa God wapi inakae sia yon wandaeta menan me otua enupen tan go God watanen. Ame gapan Eibaraam dim da anu tumaseni ame gine daiton venasen

iwa Aisik bop gapan sia inak wareni mini venasen.

²⁰ Anu tumat gapan Aisik yon wande otu wai Diekap ge Iso wat aipakam mumapen menan nop eviwa noa wadiam wandin nop ame tavewa di anu tumasen.

²¹ Anu tumat gapan Diekap bop maniwandini wamewa otua Diosep otu waiwa wat aipakam mumen kaipat enu God wa taragases. God ap munan evi tapi Diekap anu tumasen.

²² Anu tumat gapan Diosep bop maniwandini wamewa waenapan mega evi amba at Idip ae ve at da ugup amopi wadiamon. Me boepi kaimewa mu den ware at da ugup ame gapan tupen menan diamon, ap wani gapan me anu tumat mega aroewa wat arogamen.

Apan Mosis gutut megawa

²³ Anu tumat gapan Mosis yaneni gapan ine mame waran karaua baraene siragam yampo uon tan. Mosis yawane me yawayat mega kakae. God orup kwayup tapi mu anu tumasen. At ame ayopewa anega wan, "Diu nagirewa orup apan sepi gurep." Wani go Mosis ine mame nop ame men tap ya anun iwa anu tumat muga God inap da di.

²⁴ Anu tumat gapan Mosis kai wariwandini at ame ayopewa, yaua Pero, orewa kwayup taiwandin. Waen ame Mosis me inan diapen anun go Mosis tanda wan. Mosis tap ya anun iwa me God anu tumasen.

²⁵ Mosis ian Diu nagirewa munan anuni menan at Idip ayop mugawa Pero pa mega gapan ya wandet anun go God waenapan mega ta koeragam mumane tanamo wandet anun. Iwa piup kakaewa mega wara wara me tanda koewa tapi tawa.

²⁶ Me at Idip nagirewa kwan puraput muga aruga yaveni go ae ven iwa me yamap Iesu menan bagu sisi anu tapo ame kakaewa mega aigap go kwan purapurat ugup ugup mame kakaewa otu koe. Go me itan bagu sisi anu tanat wa taiwandin iwa Iesu tauapen wamewa gapan garewa warapen menan amat taiwandini. Me anuni kakaewa ame aigap iragen.

²⁷ Anu tumat gapan Mosis at Idip ae veni piup ame ayopewa gari gangan mega tawa

ya anun, iwa me God ya yavitoniwa me anu tumat mega gapan di yaven.

²⁸ Ame den anu tumat gapan Mosis at Idip wanden barip yaua Paina Yamaseni Baripewa ere tugun. Man sip ame nane deniwa paua tonan no gapan gapan enu iran. Ap tane menan ian Diu nagirewa otumua namu yanane bop aneaewa ya taué guramon.

Waen Reap guturewa

²⁹ Anu tumat aroewa gapan Isurero nagirewa God anu tumasene menan kaum awan baware yaua Puiman Dendeniwa etoa tauan. Tauane kaum tom tam wan yamu yamu yonen menan piup daragawa mini yaumakap tau amon amba yamu dot tauan. Go Idip nagirewa ewamup amopen tane kaum taué umamon borit wan.

³⁰ Anu tumat gapan Diu nagirewa pa sewa Dieriko tauan wam nani yamu dere ikukuk amuiwanumune gapan sin tonum mega baware gwat ikukuk batamene beut mutan geamon.

³¹ Anu tumat gapan waen negin gagape yaua Reap inak waren iwa Isurero gopat nagire apan dere namu onamon pa mega gwanap diguma karaua semon. Evi amba gopat nagire ame sia tau amone amba pa ame sin mega beut mutan geomone gapan Isurero nagire doran sewa Dieriko God tandayasine nagire guramon go Reap ya ton iwa God anu tumase warden.

Waenapan upi God anu tumasene noa

³² Nop ansena aigap sia wadiain? God anu tumasene nagirewa gutut muga iravi wadiaepena wam uon tata. Apan ame yaumua Gidion ge Berek ge Samson ge Diepta ge Devit ge Samuero amba God nop mega waiwanumune nagire upi den gutut muga den wanumam.

³³ Anu tumat aroewa gapan waenapan ameme anavi muga aruga guramon garao muman. Anu tumat gapan man puawa laion anan tauane nomu waborane ya aramon. Mu kakaewa tane menan God wa agiat mumeni tavewa ame tautanan.

³⁴ Anu tumat aroewa gapan mu merao togut togut amon anavi muga tauan guramopen tane karaua tau amon. Nutumu bigaren go anu tumasene gapan mu aro

sia tan. Ita anan wamewa taueni aro tan ian uguge nagire guritamen.

³⁵ Anu tumat gapan waen nagirewa mu dugup muga borit wane nagirewa God wani gapan sia yon wanumon inak waran. Upi anavi nagire tauan aian gut koeragam muman. Go mu upi gwat ninoke gapan anavi muga gut koeragam mumiwanumune go mu bop tawa ya tane amba gwat ninoke tau amopen menan ya anune go borit wapi inak kakaewa warapen menan sia yon wanumot anun.

³⁶ Mu upi nipec diamon gaura guramon. Upi damak kaimake dena gapan panamon gwat noke semon.

³⁷ Waenapan ame upi gwat gan guramon. Upi oma tum mega gapan tunamon borit wan. Upi kereba gam guramone borit wan. Mu kayakayawan taine nagire umap iwa gwep gorogot muga koevet ame man sip ge man gout etua gapan panan amone. Dim dim da inamup uon iragen amba anavi muga gut wa koeragam muman.

³⁸ Waenapan ame pa muga ae vean pua tunupa ise ase yon iwanumun. Man dagupewa gapan den iniwanumun. Waenapan yaumakap yawat muga koerage go God yamap mu kakae iragen iwa anu tumat muga gapan.

³⁹ Ian ameme God anu tumase yon iniwanumune menan God mu atonamu tan go God munat wa agiaseni ya waran, iwa Iesu wam muga gapan ya tauen.

⁴⁰ Iwa God inak kakaewa manega anun, mu namu wa agiat mumeni tavewa mega ya warain go endi nu mu den Keriso gamup imunu daitonawa gapan warait. Ap warata gamup mu nu den inak nuga tamanagaet tata.

12

Keriso guegue nugawa

¹ Waenapan mame mini arugataet irikup mini umanene yawaniwanum. Ap menan etunu itaniwa ugup ugup koewa nuga kaimakaet pananen wandiniwa vetat aipa uatamet inak namunupe negine yawat serarat aninan.

² Ap ta aninanta yamanu uarenat Iesu megenat kem kem yawat iwa anu tumat

nuga ibariwa ge verisiwa ameme di. Oma korosi gapan boepi tap umam da ya anun go aton eviwa yaveni menan anu ae ya ven go korosi gapan di boen. Menan me endi kimani God watat mega mainewa nutup gapan ae wandia.

³ E ae anun koewa taine nagirewa arugataet me nipec diwanumune go me ae ya ven menan e den imuya ya togurane go anu tumat ta aisiwanian.

⁴ E koewa ya tapen menan taiwanin, ame kakae. Go kaimakaet taiana ame Iesu mini bop nonokap da ya tauayan.

⁵ God wataget wat nagat imaeni otu wai diaeni imuya oaraen go? Me anega wan, Otun waina, ne Ayop gegawa yam tatak genapena,

darinaya purut wap anu.
Diguragepena ge imuga ya togurep.

⁶ Iwa mega, ne Ayop gegawa imuga inagap wariwan,
menan yam tatak genivin.

Waenapan da da otun wain entan mumepi,
ame gapan wa tamanam mumain.

Ap anega wan.

⁷ Mamae waia yam tatak enapen menan ugu vegaek bagu sisi anu taniwanin. Bagu sisi ap anune gapan e God otu waiwa entan imaini tavewa venasiwan iwa me wat tamanam imaiwan. Piupa ap gine daiton taiwanum menan orup iravi mamamua yam tat yawamone waiwanum, ya ap tapo ame mu otu wai uon.

⁸ Ap umap sia God me otu wai uruga yam ta yawamon waini apanewa. Menan God e yam ta ya yawae wapiwa ame e negin gagape yanayan otu tasine mini waniepo, iwa e mamaya uon.

⁹ Maman wainu piupa yam tatak nune gapan nu gare viripamu taivin. Menan Mamanua God viripewa aigap sia tainampen iwa me wat tamanam nimanini apanewa amba nu guanu kwayup tainiwa.

¹⁰ Maman wainu muk anune gapan wam otu da yam tatak piup ma gapan nuniwanum. Go God nu me posewa woup seni umap entanepen menan wat aipakam nimanet anuni menan yam tatak nuniwan.

¹¹ Wam ame yam tatak nuneni gapan nu aton ya anuivin. Go ap dianep tamana ta aninantawa wam eviwa baigan tautanait.

Wadianini noa upi

¹² God yam tatak enen negin mega ae ya veapen menan inae mainae ae bigareni aro sia tap amba omania bigareni aro tap.

¹³ Negin tamanawa aisen ap gapan pusia ikombai tayana pogit wapi tawa agun anun gare kakae tap.

¹⁴ Waenapan iragi baigan inamup ta kakayasepen menan tainampen. Potaya woup sepen men di anu kakayasen iwa potanu mum taupepi God ya yawait.

¹⁵ God garaet mega Iesu gamup gariwa ya enapen menan ek ek inak ega kwayup tan. Koewa sisiwa potayap da ya yanep iwa koewa ame yone Iesu dugup mega nagirewa endum imaepi tawa.

¹⁶ Watageta apane Iso koewa imu pose waren God men ya anuni ap umap e daiton daiton ya anune. Wam daiton da, Iso enup areni menan ik amun mega gwaniwa waneni garewa gwaniwa taba tasewa wanen nan.

¹⁷ Apan ame gutut mega anuiwanin. Evi sia mamewa ik amun mega warat anu wani go mamewa gaset gwaniwa wanen. Tasewa tayave koewa mega ae ve entanet anun amba irip den wan go di wakaumen.

¹⁸⁻²⁰ Watagaet di at Isurero nagirewa tunup Sainai tauane merao baware yagit wandin yawan. Wamu di go mum tauen iwa irikup pumpunigaet amba taik den amba pum baware nop wani anune. Ap mepe nop da den tauen ununke mega baware. Nop ame anega watanamon, "Tunup mainep ya inat onaene. Man ega den inasepi gwara guramone borit wap," nop ap anega tauen. Menan mu tap pagagak tan, nop ame sia ya anupen men God inap mup kaimakaet wan iwa iup ame mu ayamasse tapen menan umap uon.

²¹ Mosis den ap yaveni gapan bagua aguren anega wan, "Ne tap den pagagak taivin."

²² Go e tunup Sainai ya tauayan go gare kiman tunupe yaua Saion tauayan, at ameme God yaibobot wandiniwa pa megawa. Pa kimaniwa ame yaua

Ierusalem. Ap mepe, anea ge anea mega arugataet da anenen batnak mumeta umap uon, mu God ap mepe wa atonasiwanum.

²³ Ap mepe den God waenapan mega, mu namu anu tumat tane yaumua kiman gapan ok sene nagirewa, at ame gapan iamen iwa mu at muga di. God nu iravi wanene tanepi apanewa den wandia. Apan upi piup gapan kakaewa taine nagirewa mu guamu God wat tanameni gapan kiman dot amone ap mepe den wanumam.

²⁴ Menan ame e Iesu inap tauayan. Me ao mepe wandia God iup ewakewa nuneni warapen menan Iesu nunan yaumakap yoniwan. Iesu boeni denip mega gapan patnageni menan nu inak kakaevet waraton go Eiboro deniwa ame om ya inen go Iesu taniwa God yamap om inen.

²⁵ God inanup waiwan nop mega anune garia ya yavep. Watageta nagirewa nop baware tunup gapan anune go ya waran gare itan baware munen. Endi kiman gapan inanup waiwan nu ya warata itan baware aigap iragen nuneta.

²⁶ Wataget inamup wani nop mega ununkewa baware gapan piup menao manao tan. Go endi God agi anega waiwandin, "Wam da sia piup megenat uon kiman den ne wat menawa tain."

²⁷ Anega wani, "Wam da sia," guegue ame piup wananan ugup ugup taniwa menawat mumepi gapan iragi uon an tain. Go yaibobot wan dim dim mega me ap tapi gapan uon an ya tain.

²⁸ Menan nu gaun baware God inap wat iwa endi God toemu mega kakae guragut nunen ame iravi yaibobot wan dim dim mega menan uon an ya tain. Ame menan nu viripe den ge oya oyae den God wa taragaset ap gapan me imu pose inanup warep.

²⁹ Iwa God nugawa merao mini tandayasine nagirewa nemoro tamopen menan wandia.

13

¹ Nu keriso dugup mega nagirewa gare gare sia anu gurinampen.

² Ya asik tatoni nagirewa pa nuga daio tauepi waupamopen. Waenapan upi wau-pamone mu anea waupamon go ame anea mu oare.

³ Upi gwat noke wanumuine nagire e den mu bagu sisi muga anuinewa mini intum tamo bagu sisi ame den anupen. Ta koeragam murmane nagire e den mu bagu sisi muga anuinewa mini intum tamo bagu sisi ame den anupen.

⁴ Waenapan naine itat ega viripe yambuni tan. Iwa orup da wainan gogo ise ta ase ta taiwandapinawa, me God wanene mega gapan taueta.

⁵ Iniwaniampina moni men pot pot imuya ya wariwandan. Dim dim da inayap wanumopi ame umap upi men sia ya anune. Iwa God anega wan,

Ne ae ya veain wam wam pot pot inayap di taingain.

⁶ Ame wani menan kin kin manega di wait,

Ayop negawa ta warit nimanegeniwa.

Ne tap ya anuin.

Waenapan inanap dim da da ya tain iwa.

⁷ Namu yoyo nagire egawa, God nop mega waddidaene nagire, guegue muga anu man. Mu God menan anu tumasi-wanumune ene borit wane ap umap e den taiwanian.

⁸ Iesu Keriso wata endi wam eviwa den usenagaet wande aiwadata, ire yaoyao mega entan wantan da ya tata.

⁹ Nop ugup ugup ya anu warane iwa negin gegea aisene tawa. E God garaet mega gapan imuya wat kaimagamen go waenapan upi antaba menan iup aruga seane, ap mini ya tane. Mu iup ame ayamase taine gapan ago da ya warane.

¹⁰ Nop da sia mam. Keriso nunan God inap garaet waneni gapan nu bigip nuga wat museni ame kakaewa mega nu inanup wandia. Go Diu pirisi mugawa God pa mega piupawa gwanap me inap man guran irane taiwanumun, ame gapan mu kakaewa da ya tautanane. Menan mu nu den ya intum tain iwa nu guegue iup ewakewa gapan taivin go mu iup namua gapan taiwanum.

¹¹ Diu pirisi aigap iragena nagirewa, God Paewa gwanap Woup Am Sen Woup Am Sen arewa gapan man deniwa ware

koewa muga God wat mutapen menan tauen. Man gurane tavewa tam amon pa garip iran.

¹² Ap umap Iesu pa garip ae waenapan koewa nuga wat mutapen men nunan boen denip mega visen.

¹³ Iesu guegue ap ewake ta pa garip aeni nu ap umap sia pa garip anet amba me umame den intum tait umam menan anuit.

¹⁴ Piup gapan nu pa nuga yaibobot da ya wandia. Pa nuga evi tauepi menan amat taivin.

¹⁵ Ap menan Iesu mek etua God menan yan tani mini nu den nonu God menan yan tat Iesu me Ayop di gaune den wapen. Ame nu yan garaet nuga God wa atonasi-nampen menan.

¹⁶ Menan baigan tan ago gare gare tai-wanian ame ya ae vean, iwa ap tane gapan God atonuya di anuta iwa me yan ega wa atonasinampen menan.

¹⁷ Bawarewa ega nomu waran ayamat inamup tan iwa guaya kwayup taiwanum. Evi amba mu nao muga kakaewa koewa om mega God inap wa arogamain. E nomu anu warane gapan mu atonu den kwayup taian. Go nomu e ya waranewa mu bagu sisi munai, ap gapan mu gare aton ya enain.

¹⁸ Nu imunu nenenga wandia amba God menan wam wam pot pot kakaevet tainat anuivin ap menan God inap nunan mup waiwanian.

¹⁹ Ne daio inayap konintu sia onget anuivin menan mup kaimakaet iki enu waiwanian.

Wat aipakam mumeni noa

²⁰ Ayop nuga Iesu nu kwayup tanini apanewa ame man sip kwayup taini apanewa mini kwayup taniwan. Me God wani gapan sia yon wanden iwa denip mega gapan vetanen. Denip mega viseni menan iup ewakewa ame aro amun ware nu inanup tauen.

²¹ Ne enan mup waivin ame God aro enepi gapan me dim da anuini gapan gapan ayamase taiwaniampen. Iesu den nu ago nunepi gapan God dim da anupi di tait. Oya oya Iesu Keriso inap wande aiwandan verisiwa uon. Ame umap.

²² Dugup nega daitonawa, ne ma wadiaingina anun waran ok nega enuna nononga uon.

²³ Apan nuga Timoti gwat noke wandeni wat vetan tau aeni oisewa ne anun. Me menawaet mapa tauepiwa ne me dere e inayap daio yawaopen menan onanaet.

²⁴ Bawarewa ega nagire God waenapan mega iravi den gaun nuga wadiam. At Itali nagirewa tauan wanumone den gaun inayap waiwanum.

²⁵ God garaet mega iravi wat aipakam imaep.

DIEMIS Diemis ok megawa

1 Ne apan Diemis, God ge Ayop nuga Iesu Keriso nao muga taina apanewa da. God waenapan mega dugup dugup gapan tauanewa aonagaet pisin yamu dere, punanan wat at at iragi aiseana nagirewa inayap gaun waivin.

Taya wareyao ge anu tumat

2 Tatan gwanin, e nin kurut ugup ugup nataiwandapinawa, menan e imuya potaya aton no dotouiwandan.

3 Iwa nin kurut mame anu tumat ega to kimepen menan to yawaiwan, amba mame gapan inak ega wat ayamen dotouan yambuni waniai.

4 Inak ega wat ayameana gapan wat gwen gwen nasene nononga aep. Boge imuya potaya ae bigarep yambuni kakaevet wanien. Iwa God dim dim enat anuiana di enitameta amba bambam da ya tai.

5 Go orup e da da nop dima inayap umap uon wandepiwa, ame God inap mup di wan, iwa God atonu den waenapan garaet muniniwa. Me ni gwane ao tap atonu den di eneta amba ta waramat ega menan da ya enu yawai wata.

6 Go e God inap mup wanewa, ame anu tumat megenat di tan. Gego den uon, iwa e da gego anunewa, ame puiman namara ton ae ao taini umap.

7-8 Ap anega anunewa e iae guine dere taiwan, ansenawa taiana ire ya yawanin. E imuya dere tap gego anunewa, God dim dim da enat ya anune.

Purapuse dena ge purapuse uoni noa

9 Iesu dugup mega purapuse uoni nagirewa aton tap, iwa mu guamu gapan God tamon puraput nagire entan mumen.

10 Amba Iesu dugup mega purapuse dena nagirewa aton tap iwa God yaumu aoma wat otutamen. Iwa mu, iman rarema tua puawa umap menawaet punun wa amooin.

11 Wam ananagaet dotoue rarema to imokamep tua orot wa geomopi, rarema

ganasewa mega auraeta, ap umap puraput apanewa anut mega gapan taiwan-dapinawa inak mega nimakap uon tata.

Pusi warup ge nanamat

12 Waenapan pusi warup inamup tauwan go mu anu tumat gapan tumban amune kaimakaet di yoniwanum gapan mu aton anup, iwa God men anu gurine nagire inak payuewa gagarene dena munat wa agiat mumeni di muneta.

13 Waenapan da pusi warup inamup tauepiwa, mu anega ya wap, "God pusi warup tanegen," iwa orup da yone God koewa tapen men pusi warup God inap ya tata. Amba God mek den waenapan koewa tapen men pusi warup ya tamuiniwa.

14 Go nu nuk imunua koewa anuintoni gapan pusi warup inanup tauiniwa, ame naune aer koewa nonokap tauivin.

15 Imunu gapan koewa anuintoni mame naunen koewa gapan di anivin, koewa ame aro tan agagainiwa garewa ame bop nuniwan.

16 Ap menan, ae kaiwan tatan gwanin, waenapan ebo aopan ya wababayan imaep.

17 Wan dim dim kakae guragut ge yan aiman garaeta ame Mamanua God ganat kimani tani apanewa inap visiwanum. Amba wam siragam ge buanae mum ge woup gapan entan taine ap umap, God me entan ya tainiwa amba ganat mega wat entanep sisip ya taueta.

18 God mek anuini gapan tanen amba nu inak tana tana ame nop mega tavewa gamup. Me ap tani iwa, wan dim dim tan venat mutane nimakamup, ame nu me orup mega woup namua imua wat kakayaseniwa.

Nop anut gapan ayamat tapen

19 Ae tatan gwanin, nop ma ae di anun. Nop menawaet anupen men taiwanian, amba wapen tanewa, ae anu guran amba wan, den menawaet gari ya ganganaep.

20 Iwa ugu gangan gapan ya wa tamanam imaeta amba inak tamanawa God tat anu imaini ame toboriwan.

21 Ap menan, inak koe koewa anin aninke dena ugup ugup wa ta aiseana ae

vean. Amba ek ingane aoma wat otutamen, God inap imuya warep nop mega e potayap vereni anu kakayasen iwa nop ame gapan e inak warai.

²² Menan God nop mega di anu ta aisiwanian. Go mondi anuiwaniampinawa, ame ek ingane wabayanean ebo taiwanin.

²³ Orup da God nop mega anuiwan, go nop mega ya waren tainiwa, ame guegue mega apan da gine namu mek ingane gio gapan yavini mini.

²⁴ Gine namu gio gapan mek ingane yao kakayasiwandan e amba ae bat aepiwa, ame ewap, me gine namu guegue mega serarat imu oreta.

²⁵ Go orup da pakarae wande God iup mega kakaevet vetanini gapan di taiwandapinawa, amba God nop mega anu guegue den taiwandapinawa, ame God wat aipakam mega wariwandata.

²⁶ Orup da da mu anu tumat gueguewa ewap amot wane tainewa go merimu kwayup ya tapiwa ame mu anu tumat muga pokaet amba muk ingane wabayane ebo aopan waiwanum.

²⁷ Mamanu God anu tumat gueguewa kakaewa anuini ame mam, Inanam ge kwapura nagirewa vek bagu sisi muga ago tamuinanta, ame piup ma koewa mega ya wat ananeta.

2

Kakaeven ya tane

¹ Ae kaiwan, gwanin wainawa, Ayop nuga Iesu Keriso, oya oyae den aigap iragenanu tumat waniampina ame menan kakaeven ya tane.

² Guegue da mam, apan da iam iam ega menan ben ware en wanup kakaewa ganase denawa ene taueni, amba da purapuse uoni apane en wanup esewa ene iam iam ame gapan den tauen.

³ Endi apan en wanup kakaewa eneni ame guegue mega yawanewa menan viriwa tan amba e anega diai, "Ge onak watat kakaewa ma gapan wanik," go apan purapuse uoni anega diai, "Ge atana yon, o onak pia iapa wanik."

⁴ E map anega, ire yaoyao tan, endum dum taiwanianampinawa, ame ek imuya koewa anuiana gapan wanene taiwanin.

⁵ Ae, tatan gwanin, piup ma gapan, God purapuse uoni nagire anu tumat bumagape warapen men om enumon. Mu God men anu gurine, toemu mega yon borat wa agiat mumeni ame yon borain.

⁶ Go e kayakayawan nagirewa wawa koko tamuiwanin. Go endi puraput nagirewa inak ega amboriwanum. Ap taine nagirewa wa okonak imaene wanene tapen amuiwanum.

⁷ Ap anega taine nagirewa, Iesu yaua kakaewa eneni ame inap wa koeamianum.

⁸ God nop mega ok seane iup mega daiton aigap iragenawa anega wan, "Ek enan ae anu guriana mini, tonan no daitonawa ega nagire munan ae anu guriwanian," iup ap waran taiwanianampinawa, e inak kakaewa di taiwanin amba inak tamanawa God toemu mega iupewa gapan di taiwanin.

⁹ Amba endi e orup daiton me yawat mega kakaewa menan menanaet tayan dawa ae vianawa, ame e koewa di taiwanin. Ame taianawa e God iup mega topaisiwanin.

¹⁰ Amba orup da God iup mega iravi ewap aen ayamase tainiwa, go iup mega da daiton topaisiniwa, ame God iup mega iragi di paisiwan.

¹¹ God ap gine daiton sia anega wan, wainan gogo ya taiwanian, den sia anega wan, waenapan da guramone borit ya wap. E wainan gogo ya tayan go orup da tone boepiwa, ap gapan God iup mega iravi di paitai.

¹² Ap menan God iup mega, tat ge wat gapan taiwanian, iwa e iman God waenapan wat vetamuini iupewa gapan wanene taeta.

¹³ E waenapan munan baguya ya anunewa, gare God iman wanene taepi enan bagu sisi ya anuta. Go orup da wanene wamewa tauepiwa me tap ya anu amba God namup yoneta, iwa me waenapan men bagu sisi anuini apanewa.

Anu tumat tave den tat

¹⁴ Gwanin wainawa, apan da anega wapi, "Ne Iesu anu tumasinawa," go anu

tumat mega tavewa den ya taiwandapinawa, God anenen amba kakae dieta, iwa anu tumat ap miniwa me inak ya waneta.

¹⁵⁻¹⁶ Guegue da mam, tatae gwani upi, en wanup ena ena ge taba nana da uon, bambam taiwanum, go e anega diamoi, "Aisen, God wat aipakam imaepl, etuya amunu wap taba yaentuk nan." Ap anega diamonewa ame mondi noya megenat waiwanin, umap uon, kakaewa ame ago den munan amba waiwanian.

¹⁷ Ap umap sia, anu tumat ega God inap anuiana go God nao mega kakaewa anuini ame guegue ase den ya tanewa, anu tumat ega ame pokaet.

¹⁸ Go orup da evenewa anega diepi, "Ge God inap anu tumat megenat taianawa amba ne ayamat megenat tainawa, ap gapan dim da uon." Ap anega wapi ne gare wain, "Anu tumat tavewa uoni tat wat mega anenen amba to ewanai? Ame umap uon. Go ne anu tumat taina ame tat wat nega gapan to ewagain."

¹⁹ Menan e anu tumat ega taiana ame God daiton di. Ap umap di go, airampu God anu tumaset muga ap anega den taiwanum. Mu me tawa kaimamu dararam tainewa.

²⁰ E ebo aopan wayan taiana nagirewa. E wam andi amba anu awai? Apan da noa gapan God anu tumaset waiwan go inak mega gapan den ya tapiwa ame anu tumat mega God inap tainiwa ame tavewa uon.

²¹ Watagaet God nu omayan bae Eibaraam kakae dieni iwa Eibaraam tat mega gapan God nop mega anu ayamase tan. Tani ame otua Aisik ware gwat gwaratan wareni gapan bare, tuma enu God garaet ao wane wa taragaset wa taiwindin.

²² Menan endi e guegue ap yavisi, Eibaraam God anu tumaset ge God men ayamase tat mega dere dere om inen. Ap tani gapan God anu tumat mega wa kimen.

²³ Amba God nop mega ok seane tavewa manega tauen, "Eibaraam God anu tumasen, amba God Eibaraam imu pose nenenga yaveni ap gapan me apan kakae tamanawa dien." Ap menan waenapan Eibaraam evenewa God diane.

²⁴ Menan endi yawayan anuisi ame wae-napan God kakae tamanawa diamuiniwa iwa ame ayamat mega taine gapan, mondi anu tumat megenat taine gapan uon.

²⁵ Guegue dawa mam, waen da yaua Reap, me negin gagape waene da, me ian Diu ita gopare taine nagirewa waupamo pa gwanap semo amba karau ta negin ugupewa da gapan watu enammon amon. Ap tani menan God waen ame kakae tamanawa dien.

²⁶ Ap menan guanu etunu gapan uon wandepiwa ame bop, ap mini nu God anu tumaset go ayamat mega ya tainanta, ap gapan nu anu tumat nuga pokaet.

3

Nonu kwayup tapen

¹ Ae, tatan gwanin, e aruga wadiamot navewa ya tat anune, iwa e asigiat di, nu wadidiamuitoni nagirewa iman God wanene mega itanigaet tanait.

² Nu uruga wabambamat taitoni nagirewa. Go da da ya wabambamasine nagirewa, mu kakae iragen, iwa etumu uruga den kwayup ta kakayasiwanum.

³ Nu damak warat man osi nop kwip enat warupatawa, ame amba aet anuitoni gapan gapan di aewan.

⁴ Guegue da kabum gapan sia yao anut. Kabum me baware iragen, taik aroe den tauen nanamasen ainiwa, go wa tamanamini apanewa, ipewa gapan ware wabayanepl amba aet anuini gapan gapan di aeta.

⁵ Ap menan merinua ap anega sia, wapinu semua mega da go me pot pot apan apan tan otu koewa men wabawaramen tainiwa da. Amba pu ut yagirini guegue di anun. Oma yame buyayam, otu kamontu da gapan di yagireta go pu iragi yagirep kait tau aeta!

⁶ Endi merinu mame oma meraovewa umap. Etunua ma gapan merinu otu mame piup ma koewa mega wat senaminiwa. Merinu nop koewa waini gapan, koewa guguk wan tauen aen etunu uruga ukum umiwan. Koewa mega ame at merao arewa gapan tauen etunu yagiriwan.

⁷ Nu waenapan pu manewa ugup ugup iragi tambut baiganat mumat watumoton, ame man tap kaumawa ge k watatawa uruga amba paina bup wane ine den.

⁸ Go waenapan ap umap merimu da ya wabaiganasep umap tan. Ame pun sisin koewa, amba borit waine iapaewa.

⁹ Amba nu merinua gapan Ayop nuga ge mamanua God wa atonasivin go den sia yonaton, God waenapan me umap ta semoni wa koeam mumivin.

¹⁰ Amba wa atonat ge wa koeam ame nonu daiton gapan tauen aewan, menan gwanin wainawa, ap anega ya tainampen!

¹¹ Kaum urewa bot bot waini yamewa gapan, sisi dena ge danse dena daiton tobob tauain? Ae, umap uon.

¹² Gwanin wainawa, oma baip gapan tavewa mokot ieta? Ae uon. Gare oma karopae, baip makewa ieta? Ae uon, ap menan kaum danse denawa, ame sisi denawa urewa gapan ya taueta. Menan merinua anenen kakaewa ge koewa wata? Ae, umap uon di.

Dima opata kakaewa da kimani tauiwan

¹³ Endi e yaumakayap, dima opata ge nop anu kaonagine nagire upi den? E upi waniene, inak ega kakaewa, ame gine yamaet ge dima opata taiana gapan ta ewanen.

¹⁴ Go e upi anu koeragam ge gunduman ge koewa sisiwa bumagayap anu gura taiwaniampinawa, ame ek ingane ya wa namurat taiwanian. E wa namurat ega ame gapan ebo ewain nop tave iragena ukum umiwan.

¹⁵ Nop dima ap anegawa aupa kimani God inap ya tauiwan, go ame piup ma megawa, ame God Guewa megawa uon, ame koewa apane Seitan mega di.

¹⁶ Ap menan, anu koeam ge gunduman inayap wandepiwa, ame garito gwanato ta wani aisiwaniai.

¹⁷ Go nop dima aupa kimani God inap tauini ame kakae nenenga iragen, amba nu inan mainen ae bigarep, baigane den yambuni wanin aninain. Nop dima ap gapan ago nunep waenapan koewa da tautanepi bagu sisi munan anut, ago munat, guegue tavewa ase ta ewamuinait.

Amba waenapan da ya tandayat mumi-nait amba da wa, da ta den ya tainait.

¹⁸ Kakaeven ya taiwanian, amba waenapan ya wababayan mumiwanian. Waenapan da da mu baigan nave tainewa, ame mu baigan neginewa gapan megenat taiwanumain, ap gapan naewa muga kakaevet yane seset wa aiwadata.

4

Nuk ingane etunu ge guanu God ase wanat

¹ Ita anan, noyam notatae inayap venasini ame amba tauiwan? Ame ek koewa dansewa mega imuyap men anuiiana gapan koewa ugup ugup potayap toga uaren taiwanum.

² Ap menan e wan dim dim men anuiwanin go ya tambuiwanin menan e waenapan guramo boniga semopen taiwanin, dim dim men anuiiana ya di tambuyan, ap menan arak maken, ita anan di warianiai. Dim da men di anuiiana ame ya tambuiana iwa e God inap mup ya waiwanin.

³ E God inap mup waiwanin, go e tavewa ya wariana iwa e mup ega God inap yaunewa tamanawa gapan ya waiwanin, ame ek wara ingane etuya aton mega tapen menan mup waiwanin.

⁴ E imuya God inap ya waren, ya anu tumasean inak koe taiana nagirewa. E anuiwanin, piup ma koewa mega enanasiana ame God anaviasean tandayasiwanin. Ap menan orup da piup ma inak mega enanase taiwandapinawa ame God anavi megawa.

⁵ Gare God nop oit mega tavewa wata-gaet manega seane, go e i uon waiwandat anuiwanin. Nop ame, Nu God men megenat anuinampen, menan Guewa Woup Seni potanup ta baraen.

⁶ Guewa megenat ya nunen, go God wat aipakam garaet mega den nuniwan. Ap menan God nop oit mega gapan anega wan, Waen waen, apan apan tainewa, God tandayat mumiwan, go gine yamaet ine nagirewa God garaet wat aipakam mumiwan.

⁷ Ap menan tawaya uruga God asenagaet di wanana. Amba tumban amu yonan Seitan oirenane ae veae aep.

⁸ Amba imuya God inap konintu di wandepe amba God gare imua konintu inayap di wandeta. Ap gapan imuya bigi waran iwa e koewa taiana nagirewa. Amba e da da piup ma kakaewa mega ge God menan imuya dere taini ame imuya potaya tarasene nenenga tap.

⁹ Koewa taiana menan bagu sisi anun irip turup wan, wat entan tan. Top nop wayan aton taiana ae vean bagu sisi anun irip wan.

¹⁰ Amba etuya aoma wat otutamen, Ayop nuga God namup yonane amba me yauya ao wareta.

Dugup ega nagirewa wanene ya tamone

¹¹ Tatan gwanin enu yawagen gare gare ya ta waiwanian. Ap tanewa evenae waia Iesu daiton anu tumasiana nagire den toga uaren taiwanin. Evenae waia enu yawamoyan waiana ame God iup mega den enu yawayan di waiwanin. E iup ame enu yawan wane tavewa ame God iup mega paina yamasean ayamase ya taiwanin. Amba ek ingane etuya wanene taiwanin.

¹² Amba iup nunini ge wanene tanini ame God daiton megenat di. Me megenat inak nuna nuna ge wa koeam niman niman aroewa inap wandia. Menan e iwa dimen evenae wai wanene tamuiwanin.

Inak namuyap onini ame e oare

¹³ Endi wapena anun, e upi anega waiwanin, "Wam ma endiwa go imanawa nu pa sewa bawarewa upi anait, ap mepe waninet en daiton gwanap nao tat moni bawarewa tautanait."

¹⁴ Go e inak ega iman namuyap venasepi e oare. Amba inak ega wankarak visen piupa konintu wande en amba sia nengarini umap.

¹⁵ Go e gare manega wapo, "Ayop me anut mega anuini di wandeipiwa, ap gapan nu waninet ugup ugup amba tainampen."

¹⁶ Go endi ek ingane inak egawa wa namurasean apan apan tayan waiwanin, gosi wa namurat ega ame iragi ebo megenat.

¹⁷ Ap menan, nu da da inak kakaewa ta ta mega iragi asiginup go ap ya taitoni menan ame nu yonaton inak koewa taivin.

5

Puraput nagire tantanamu wan

¹ Puraput nagirewa, nop ma anun, itan bagu sisi ega namuyap oniwan, menan irip turup waiwanian.

² Kwan puraput ega puak mutane koe taiwanum amba en wanup ega kensere ketnagene naiwanum.

³ Den moni ega semoyan denip enane amba moni ega denip enamoni ame gapan koewa ega iraya yawain, ap gapan denip eneni ame etuya oma yame mini yagit itam imaeta. Menan wam uiwa gapan garewa ega koerage warai.

⁴ Menan yawan, nao ega taine nagirewa garewa muga ya munayan. Ap menan mu irip inayap waiwanum. Amba nao nagire irip turup muga ame God Ayop aigap iragenawa darinap unugen.

⁵ Ap menan, inak ega piup ma gapan wainianawa, ame kwan puraput nagirewa entan imaen aton aigap wainisi. Amba ap taiana e man mone tatakaen tone irine mini wainisi.

⁶ Den inak kakaewa taine nagirewa enu yawam wa garaet guramoyan borit wane go mu gare ya enu tandayat imae wane.

ugu vegaek tanane gapan yaentuk mantuk wanien

⁷ Amba tatan gwanin, yaentuk mantuk waniene Ayop nuga Iesu amba tauep. Endi yao anun, nao i apanewa taba mega piupa verini ame bodu tauep irurugaet yanapen men ugin amase yambuni wandinawa.

⁸ E den ap mini wanien. Ayop nuga Iesu taua taua wamewa konintu taiwandini menan anu dao ega ame gapan taiwanian.

⁹ Gwanin wainawa gare gare engirit ya ta waiwanian. Ap tane God gare wanene taeta, wanene apanewa ma gaset tonan nuga nop tauen.

¹⁰ Tatan gwanin, watagaet Ayop yaua gapan nop waiwanumune nagirewa ame vek ugu vegaek anun taniwanumun go

yaentuk mantuk bigat mutan di wanumon. Ap me guegue muga yao anun gapan yaentuk mantuk wanien.

¹¹ Mu aton tane nu yawaton anuivin, iwa vek ugu vegaek anune gapan anu tumat muga ae ya veane. Endi gueguewa apan Job yaentuk mantuk God menan tani yao anut, me God nao mega tat anu waneni menan garewa kakaewa waren. Iwa God bagu sisi anu gurini ayopewa.

¹² Evenan wainawa, nop ma aigap iragenawa, evenae waia wa agiat mumapen menan nop ega tavewa gapanaet di wan, umap anune umap di wan amba uon anune uon di wan, go piup kiman ge wan dim dim da yaua gapan tanop ya to wane, ap tanewa God wanene taeta.

God inap mup wata aroe den wapen

¹³ E nimakayap orup da itan bagu sisi tautanepiwa ame God inap mup di wap. Amba da da aton anuinewa ame wa atonat wagewa waiwanuman.

¹⁴ Den e da da vek waraepiwa ame God dugup mega amase yonane nagirewa munan wane mu taue mup iayap ta Iesu yaua gapan wat aipakam kaumewa mone denawa iayap gemep.

¹⁵ Amba mup mame, anu tumat kaimakaet God inap ase ta wapiwa, vek otua ame Ayop nuga Iesu wat inakamep kakae tata. Den orup ame inak mega koewa da namu tani ame God ise wat museta.

¹⁶ Ap menan vek ega uon tapen menan koewa ega gare gare vetaet tanewa ame gapan God di wat inakam imaeta. Iwa orup da inak mega tamanawa ame mup mega aroe dena menan tavewa di venaseta.

¹⁷ Endi yawan, watageta apane Elaidia me apan iragen nu umanup di, go me ugin ya tauapen men God inap mup kaimakaet wani gapan en yampo amba dawa semu gwanap ugin da ya tauen.

¹⁸ Amba me God inap mup kaimakaet sia wani gapan God ugin watu enen piupa antaba iragi sia yanane maup taue aen.

¹⁹⁻²⁰ Dugup negawa, waen go apan da negin tamanawa ae ve negin gegerawa aiwandapinawa, ap gapan orup da yone evenewa wat tamanamepiwa, orup ame

evenewa inak mega koewa gapan imu pose ae boeni ame wat inakamen. Amba God orup ame koewa mega namua iragi imua di oarai kakayaseta.

1 PITA

Pita ok mega namua

¹ Ne apan Pita Iesu Keriso watu enamot mega apanewa da. God om enumoni waene apane at pa muga ae vean iragi punanan wat amon piup Pontas, Galesia, Capadosia, Eisia amba Bitinia amonewa ame inap gaun waiangin.

² E watagaet ambagan Mamanua God enok bambin mega gapan ganganat imae ni ame, me viripewa tapen men taen. Ame, me Guewa woup am seni nagirewa entan imae n. Iesu Keriso boeni deniwa gan bigia ton kakae tayan. God kakae guragut garaet megawa ge baigan nonup mega aigap aigap eniwandan.

Keriso boe sia yon wardeni men God wa atonasepen

³ Ap menan, God nugawa ame Ayop nuga Iesu mamewa wa atonasepen. Iwa God bagu sisi baware nunan anuni menan wan otua Iesu Keriso boe inakae yon warden. Ame gapan nu inak ewakewa waraton, anu dao nuga bawarewa ap gapan taton anivin.

⁴ Amba yamanu uarenat God kakae guragut mega unaset dianeni ame unasepen. Ame aupa kimani kwayup nunan tainiwa, ame koe ta punun ya wa aeta.

⁵ Iwa anu tumat ega kaimakaet taiana gapan God aroewa kwayup tae aiwandapina wam uiwa gapan inak ewakewa amat wandini tautanai.

⁶ Nop ame menan endi aton anuiwanin, anse wam koni otu da gapan nin kurut ugup ugup tautanawea, ame bagu sisi eneta.

⁷ E itan ame nataepen tapiwa, iwa e anu tumat ega kaimake den o kekera, ame ire yawapen taiwan. Ame agim gwayayame dena ame omaya tugune ire yawapen taine, ap umap. Agim gwayayame dena ame ire yawapen tuguine ame kakae, garewa mega aigap iragen go anu tumat ega om ame garawasen itan gapan ire yawapen taiwan go ya wa koeragameta. Amba Iesu sia entan taupei wamewa

gapan, yauya ao warep, wa atonat ge God oya oya mega tautanai.

⁸ Ame Iesu Keriso e da da ya yawayan, go menan di anu guriwanin amba wam ma endiwa den da ya yaviwanin go e me di anu tumasiwanin. Ap menan e imu ya potaya aton no dotouen, amba aton ap guegue mega da ya anu awa awa mini, iwa God oya oya mega potayap bararaen.

⁹ Ap menan anu tumat ega kaimakaet taianawa garewa ame guaya ega wat inakam imaiwan.

¹⁰ Ame menan watagaet God no oise waiwanumune nagirewa God inak neginewa yawapen men baimakat warawanum. Mu God garaet wat aipakam mega ame inayap tauapen menan yao nau wa onam wanumun.

¹¹ Iwa Keriso Guewa, mu potamup wardeni menan Keriso ugu vegaek anu taneniwa amba me yaua wat bawaramen wamewa mu namu yawan waiwanumun. Ap menan God no oise waiwanumune nagire, God Guewa wadiam wandini ame yopewa ta tavewa yawapen taiwanumun. Amba anenen venat aiwandapinawa ame yao matagamepen den taiwanumun.

¹² Amba nop tavewa yop taiwanumune God to ewamoni ame muk munan uon ame e enan taiwanumun. Endi mu nop tave iragenta ame oisewa wane e gaset anuyan. Ame God Nop Oit Mega Kakaewa waddidiae nagirewa ame Guewa Woup Seni aroewa aupa kimani God watu enen use ago muneni gapan wadiaene. Ame den inak mame anea den yao awapen menan tainewa.

Imunu woup am sep waninet

¹³ Ap menan imu ya upan sean nene yamam tan ayamat taiwanian amba ek ingane wat tamanamiwanian. God Iesu Keriso watu enepi gapan yan kakae guragut garaet eneta ame ega di, menan anu dao ega ap mepe taiwanian.

¹⁴ Endi menan e God ayamat mega tane me otu waiwa entan imae inat waniet ega watagaet inak koewa gapan wainiana mini sia ya waniene. Iwa wam ame e asigiap, da ya anu kakayasean, ap menan, e inak koe koe, ek anuyana gapan taiwanian.

¹⁵ Ap menan imuya potaya woup am sep amba dim da tat anuyana gapan di taiwanian, iwa God ap tapen menan enan anu wani me imu pose woup am seni apanewa.

¹⁶ Amba God wani ok anega sean, Ne God imuna potana woup am sen wanik angina ap mini, e imuya potaya woup am sep wanien.

¹⁷ E mup God inap taiana e maman diwanin. Me orup da da tat muga no managaet di tapen men i keni tainiwa. Ap menan e piup ma gan wanienewa God viripe tan.

¹⁸ Go e asigiap di, watagaet inat waniet ega i uoni inagewa gapan wainean iwa isimurae wai inamup wat nat tonat onin e inayap tauen. Ap menan Iesu koewa ega taiana garewa waren, ap wareni moni garewa taine mini uon iwa moni aro mega uon tata, go Iesu tani aroewa uon ya tata.

¹⁹ Ame Keriso, me man sip uruavewa tone irine mini korosi gapan tone deniwa nenenga kakae iragenawa gapan vetanen.

²⁰ Keriso me watagaet amba namu God om enun wande en, amba piup kiman evi tan venasen. Go endi ma wam uiwa gapan e inak ega menan me aroga matagaen.

²¹ Endi Keriso gamup e God anu tumasiwanin iwa me wan Keriso bop gapan sia ao yon wanden, amba God me yaua ao waren, ap menan anu dao ge anu tumat ega God inap di wandia.

²² Endi nop tavewa ma ayamase taiana gapan inak ega gaset bigi waren, ap menan endi tatae gwani Keriso dugup mega nagirewa munan anu guran gapan imuya potaya gare gare bumaga tantan anuiwanian.

²³ Iwa, God nop mega inak yaibobot nunini nopewa gapan ewake sia yanayan menan inak ewake ma uon ya tata go usenagaet wande aiwandata.

²⁴⁻²⁵ Mame menan wataget God wani ok anega sean,
Waenapan iragi unawat umap,
amba mu ganat muga pu raremai
kakaewa mega umap.
Unawat wae ineta amba rarema tua orot
wata.

Go ayop nuga God nop mega usenagaet wande aiwandata.
Ok ap anega sean. Mame Iesu nop oit mega kakaewa enan wa onam wanumune ame wadiaivin.

2

Iesu me gwat bonawan

¹ Ap menan inak ega koe koewa aopan ya wa umane, da wa da ta ya tane, anu koeam ya ta wane amba nop koe koe ani aninke den ya waiwanian, ame iragi ise di wat mutan.

² Orup otu ewake yanane am atnasine mini wanien God nop mega kakae guragut wadidiaene am mini at nat wanien. Ap nane gapan kai waran inak tautanai.

³ Iwa God nop mega ok anega seane, Ayop dansewa mega enan anuini ame gaset na anuyan.

⁴ Ap menan, endi Ayop Iesu inap onaen, me gwat yaibobot wandini umap, ame piup ma waene apane tandayasene go me God bumagape mega iragena om enuni di tauen.

⁵ Endi e ap umap sia agim bonawan wande iramini umap wanisi. Ap gapan waniene God Guewa pa mega gamuyap tup. Pa mega ame gapan e ian pirisi imu pose woup am seni nagirewa yan garaet guaya gapan God inap, Iesu Keriso gamup wanen. Watagaet di Diu nagire God men man gure iriwanumun go endi Iesu Keriso nunan tani gapan imuya God inap wanenewa God anupi umap wata.

⁶ Ame God Iesu menan nop wani ok anega seane,
Ne agim kakae iragen da ganganasena waran,
at Ierusalem gapan inak ibariwa baraen, amba waenapan da da pa muga ibariwa agim kakae iragena,
ame aigap tupiwa, mu umam bagu sisi da ya anuin.

⁷ Ap menan, e Iesu anu tumasiana nagirewa e yamayap agim ame kakae iragen. Go ya anu tumasine nagire mu pa agim gan tuine nagirewa mini, munan God ok anega seane,
Pa agim gan tuine nagire agim ame koerage dian aipa uarenane,
go ne sia waran, kakae iragenawa dian,

amba pa nega aigap sia tuivin.

⁸ Den agim ame menan ok anega sia seane, Agim mame waenapan sintanamop onan geamoin.

Ap sintanamuini iwa God nop mega ya anune warine men onana geamuiwanumun, go ame menan God om enumon.

⁹ Go e gaset God mega om enueni di wainisi amba pirisi mega ge waenapan imu pose woup seni megawa amba God ganganat imaeni nagirewa ame e me di wainisi. Ame sisip gapan wainean wa upaen dun ganat mega kakaewa gapan tauayan. Menan God kakae guragut mega tani no oisewa wadidiam wanin.

¹⁰ Watagaet e God waenapan mega ya wanien, go endi e God waenapan mega di wainisi. Amba wam ame gapan, God enan bagu sisi anuini e ya di asik tayan. Go endi e asigip tayan ame bagu sisi enan anu gurini apanewa.

God menan anu in aninampen

¹¹ Kaiwan evenan wainawa, e piup ma gapan ian ugupe mini wainisi. Ap menan ne darinai enuen taiangin iwa inak koe koe ek anuian tayana gapan guaya etuya den toga uaren taiwanum. Ap taiana mek ae di vean.

¹² Ap menan e God tandayasine nagire nimakamup waniene yambuni wanien koerage da tat dia enu yawai wapi, guegue ega kakaewa taiana yao anupi gapan mu den God yao anuin. Amba Iesu sia tauepi wamewa mu oya oyae den God yaua ao warain.

Piup ayopewa viripamu den tapen

¹³ Ayop nuga Iesu aigaven aisiwanian menan piup ma ayope aigapewa nop muga e den anu wariwanian.

¹⁴ Amba gauarape mega nomu den anu wariwanian, iwa God watu enamuin amone waenapan inak koe koe taine wa okonak mumane wae wae nemoro tamuinewa amba kakaewa taine nagire atonamu wainewa.

¹⁵ Iwa God anut mega anuini ame e inak kakaewa taiana nagirewa menan guegue ega gapan nop ya anu kakayasine ame wawa koko inayap taine nagire wat tamanam mumai.

¹⁶ Ap menan e kakae tat anuiana di taiwanin, go inat waniet ega ap gapan aopan aopan tan inak koewa arok ya wanane. Go inat waniet ega kakaewa gapan God nao mega nagire mini ta aisiwanian.

¹⁷ Menan waenapan iragi viripamu tan, tatai gwani God dugup mega daitona nagirewa munan ae anu guran, God men iai oni paitan sean amba piup ayopewa viripamu den tan.

Keriso tani guegue nu den anu tapen

¹⁸ Amba ayamat kaimakaet taiana nagirewa e aritawa ega viripamu taiwanian, ame inak kakaewa taine ge imuya warini nagirewa munan mugenat uon, go tandae den yawaene waine nagirewa inamup den wat nat taiwanian.

¹⁹ Ap menan e nop i uoni gapan vek ugu vegaek anu tanai, go God men anu vek ugu vegaek ame kae doak dianewa God wat aipakam imaeta.

²⁰ Ap gapan e inak koewa taiana menan guraepi vek anu sisime taiwanian pinawa ame ge garewa gega di go e inak kakaewa da tane menan gaut araep vek anu sisime-newa ame God wat aipakam imaeta.

²¹ Endi e map anega vek anu sisime taiwanian pen men God enan wan, iwa Keriso enan vek anu sisimeni ame e me umap ta ewap aisepen men guegue ta ewaen, ap menan pusi uap amu amu aisen.

²² Iwa Keriso me inak koewa da ya tan amba me noa gapan nop koewa eboewa da ya wan.

²³ Amba waenapan Keriso enu yawagen tan waiwanumun go me gare da ya enu yawamo wan. Keriso epi vege anu sisime taiwandin go me gare om am da ya tan. Go me God wanene tamana taini apane tumap wande en.

²⁴ Ap menan Keriso me ugu wapi uruga ware inak nuga koewa menan awan ine korosi doren, menan nu inak koewa taitoni togurat boep. Inak kakaewa gapanaet use wanin aninampen iwa Keriso etu no to sisitnak gene gapan nu inak waraton.

²⁵ Amba watagaet e man sip kwayupe uoni umap punanan wat aisean go endi e sia entane sip kwayupe taini apanewa

inap tauayan. Iwa me guaya kwayupe tainiwa.

3

Waene meme dena noa

¹ Endi gat namu wana umap sia, ian waene meme wai den wa enat taiwanian. Ap gapan meme wai upi God nop mega ya anu tumasepiwa ame waene wai inak kakaewa ta ewamone yawaepi gapan mu imumu entanep, God nop mega anu warain.

² Iwa e imuya potaya ganase wani amba e God menan iai oni paitan siwaniampina gapan iraya yawaepi gan mu Iesu anu tumatain.

³ Etuya bene warayan iae gume benasean, kwasip kurantan, na tau sinayan amba gan gorogot kakaevet taianawa gapan memae wai inak kakaewa ta ewamot ya anune.

⁴ Gare e ben ayap ega ta ewamopen tanewa ame imuya potaya gapan tan, ben ame tanewa wanatai koe ya tata go ame ae meare guaya benewa tunano wande aiwandata. Ap tanewa ame God yamap kakae iragen.

⁵ Amba waen watagetawa, God wa taragasiwanumune nagirewa ame ben muga ap anega. Mu anu dao muga God inapaet tan gapan meme wai den wa enat taiwanumur.

⁶ Waen ap umape, waen Sera tan. Me memewa Eibaraam nop mega ware amba den ayop mega dien. Endi e ap umap ta aisiwaniampinawa amba dim da tawa ya anunewa, ap gapan e Sera ore waiwa di.

⁷ Endi meme waiwa e ap umap sia waenae wai tanam wainepen tanewa, ae anu kakayesen gapan iniwanian, ame mu e epara ega gauarap wanumam. Amba viripamu den taiwanian iwa mu den God garaet wat aipakam mega ame inak egawa, gine daiton gapan wat aipakam imaen. Map anega di taiwanianampinawa gapan mup ega God inap waiana ame dim da da ya toboreta.

Inak kakaewa vege atoewa

⁸ Nop gat wana semu mam, ame imuya potaya daiton tap gare gare anu guran amba denip daitonawa entan imaepl gapan bigat itan wanien.

⁹ Ap gapan inak koewa da ta koeragam imaepl men garewa sia ya tane amba sintapun waraepi garewa den ya tane, go garewa tapen men aton munan, wat aipakam munan. Iwa God wa agiat imaepl tavewa ame wat aipakam mega yon borapen menan diaen.

¹⁰ Ap menan watagaet God wani ok anega seane, Orup da aton gan wandet anupiwa, amba inak kakaewa piup gapan wanumot anupiwa, me meriwa gapan nop koewa ge eboewa da ya waiwandan.

¹¹ Amba inak koe koewa taiana ame ae vean, wat entan ta inak kakaewa taiwanian. Ap gapan baigan nonup neginewa gapan wani aisiwanian.

¹² Ap menan, Ayop God yamewa uarenen, inak kakaewa taine nagire inamup wandaia, amba darine pemagen mup muga waine anuiwan. Go koewa taine nagire inamup gariwa bat muniwan. Ok ap anega sen.

Iesu menan waenapan ta koeragam ni-manain

¹³ Inak kakaewa da tapen men kaimakaet anu gura taiwanianampinawa waenapan da ya enu gurai wain.

¹⁴ Gosi inak kakaewa da tane men enu gurai wapiwa e aton anun amba tap ge gop ya anune, iwa ap gapan God wat aipakam mega warai.

¹⁵ Go iai oni paitan sean imuya potaya gapan Keriso nu Ayop nuga waran amba wa taragasiwanian.

Ame gapan orup da taue anu dao ega Iesu inap taiana me singui wayawaepi e wa tamānam wanapen men agun anun amba wanien.

¹⁶ Ap garewa wapen tanewa iai namu woup sep nenenga iragen gapan amba nop bigigai gapan ase wan, amba e inak ega kakaewa Keriso inap taiana menan

nop koe koe inayap waine nagirewa anupi umam waramota.

¹⁷ Ap menan God anuini ame inak kakaewa taitoni men wat yapat tainanta ame kakae aigap di go koewa taitoni menan wat yapat tainanta ame kakae uon. Ame God imua mega gapan di taivin.

¹⁸ Iwa Keriso waenapan iragi koewa nuga menan wam daiton megenat di boen, me koewa da ya tan go koewa taine nagire tambumo God ine aepen men boen. Waenapan etua gapan tone boen go God Guewa gapan sia wat inakamen.

¹⁹ Wam ap gapan Iesu tau ae borit wane nagire guamu gwat noke gapan wanumone ame opata gan waddidiam wandin.

²⁰ Waenapan guamu mame watagaet apan Noa kabum kaisiwandini wamewa gapan God tandayasene nagirewa, mu God nop mega ya anuiwanumune men God yaentuk yao gwen gwenat mumi-wandin. Amba tawak watu eneni ame waenapan nani yamunaet yamu yampo nagire kabum gwane dotouan kaum gawanip mugenat inak warane.

²¹ Apan Noa ap tani guegue mega endi mame Iesu menan dup ivin, ap taitoni gapan nu inak warivin. Ame mondi etunu bigi warapen men dup ya ivin go imunu nenengawa gapan Iesu Keriso bop ta sia yon wandeni ap gamup inak warapen men dup ivin.

²² Endi menan Iesu gaset kiman dot aen, God mainewa nutup gapan wandia amba anea ge kiman aro amun mega ugup ugup warane wanumuine nagirewa ame iragi me gauarap wanum amun.

4

Inak koewa gapan entan tan

¹ Keriso piup gapan wandeni wamewa, me vek ugu vegaek anu tanen, ap menan e me tani gueguewa mini anu taiwanian, iwa orup da me etua gapan vek anu sisim-wandapinawa me inak koewa da sia ya enanase taiwandata.

² Ap menan e mini kaimakaet tan. Piup gapan wanienewa inak ega etuya gapan ya tane go God anuini gapan taiwanian.

³ E watagaet Iesu ya anu tumasine nagire umamup wanie aton taiwanian,

ame gapan inak koewa wainan gogo taiwanian, kaum kaimake dena naiwanian, anut koewa anuiwanian ge sinao tarep i uoni taiwanian amba oma nanimup kaisine ame wa taragasiwanian.

⁴ Amba endi e Iesu ya anu tumasine nagire sia ya enanat mumiwanian. E inak koewa den ya taiana menan ugu gangane tane diguguraiwanum.

⁵ Go mu iman koewa muga mame oisewa God ase aroga wadiain, iwa me waenapan kabaniwa ge borit wane nagirewa wanene tamopen amase wandia.

⁶ Iwa ap menan Iesu bop tani namu ae borit wane nagire inamup tauve God Nop Oit Mega Kakaewa opata gapan wadidi-amon. Ame gapan God waenapan kabaniwa ge bonigawa wanene gine daiton tamota. Ap ewap mu guamu God den wanumoin.

God yan aiman mega yambuni danamepen

⁷ Endi wan dim dim uon an tapi wamewa di mananiwan, ap menan anu kakayesen nene yamam tane gapan God inap mup den waiwanian.

⁸ Amba guegue aigap iragenawa ame evena wai munan gare gare bumaga tantan anu guriwanian iwa baigan tan gare gare anu guriwaniampinawa inak ega koewa iragi dawap ise museta.

⁹ Amba daio nagire taupei waupamo pa ega gapan semon, gau gundumane den garip ya wa taiwanian.

¹⁰ Menan endi e daiton daiton yan aiman ega God eneni ame waenapan ago munapen men danamiwanian. God nao mega kakaewa taiana nagire yan garaet eneni ame gapan gapan waran di danamiwanian.

¹¹ Ap menan orup da opata waiwandat wa waneni ame God menan di waiwandan, amba waenapan wat agoat mu-mat otua ame God menan di taiwandan. Ap tainanta gapan wa atonat nuga iragi God inapaet, Iesu yaua gamup di tainam-pen. Iwa oya oyae amba aro amun iragi me inap usenagaet wande ainiwa. Ame umap.

Iesu anu tumasitonni menan waenapan ta koeragam nimanain

¹² Evenan wainawa, itan bagu sisi doak ame taupe pusiap upe iraya yawapen tapi ame anu bambam tan anega ya anune, "Inak oarewa da ma amba inanap tauia."

¹³ Go e gare daramuya wap, ame Keriso vek ugu vegaek anu wat yapani ame upinewa di warianin, ap menan Keriso oya oyae den sia taupei wamewa gapan, e imuya aton bararaeta.

¹⁴ Ap gapan waenapan e Keriso ewap aiseana nagirewa menan wawa koko inayap ta wapi e aton anun. Iwa God Guewa oya oya den amba wat aipakam mega inayap wandia.

¹⁵ Go waenapan da guram boniga semonewa, o up tanewa ge waenapan da koewa muga menan den noek wanewa, ap gapan itan bagu sisi wat yapanewa ame koerage.

¹⁶ Go e Iesu dugup mega intum tayan anu tumasiana menan itan wat yapane ame gapan umama ya anune, gare God wa atonasen iwa e Keriso yaua tanop tuiana menan.

¹⁷ God dugup mega nagirewa wanene tata wamewa konintu taiwan. Wanene mega namu nu inanup taueta. Menan God No Oise Kakaewa tandayasine nagirewa inamup wanene ame aigap sia intanigaet warain iwa mu anu tumat den uon.

¹⁸ Ap umap sia God nop mega watagaet ok anega seane,
Orup da inak kakaewa taini,
ame inak tana tana kaimake den menan,
orup da God tandayase inak koe koe
taniwa ame,
me anenen inak wareta?
Ok ap anega sean.

¹⁹ Ap menan e God menan itan wat yapa ta aisiwaniampinawa ame inak ega kakaewa aigap sia di ta aisiwanian. Ame anu dao ega God inapaet wandep iwa me tan venat nitatoni apanewa amba me agi wani gapan gapan kakaevet di taiwanda.

5

Dugup airasewa nagirewa

¹ Endi dugup airasewa nagire ni-makayap wanumuine inamup nop kaimakaet wain. Amba ne mini dugup airasewa da. Ne Keriso vek ugu vegaek doak ame wat yape taiwandini ne den yawan. Amba ne iman God oya oya mega ame venasepiwa upi ne warain.

² Ap menan God waenapan mega kwayup e tamopen diaivin, amba kwayup tamone mu e gauarayap wanumop. Ame waenapan dadak enane gapan ya taiwanian go aton den tat anuiana taiwanian ame God anut mega gapan di. Amba ap me taiana moni menan ya taiwanian ame imuya ago tamot anuyan men di taiwanian.

³ Waenapan naniap bagup di wanumuine nagirewa apan apan ta yam ta ya yawamo wane, go guegue ega kakaewa ta ewamopen.

⁴ Amba waenapan kwayup tamuini aritawa nuga Keriso taupei, e iman kiman kakae guragut mega payuewa warai, payu ame ganasewa ya auraeta.

⁵ Gat namu wana umap sia, e tamaru nagirewa kwayupaya taine nagire ame ayamase tamuiwanian. Amba ek ingane epia ae wat otutamen, evenae wai den gare gare ayamat taiwanian, iwa God nop mega ok anega seane,
God waen waen apan apan taine nagirewa tandayat mumeta,
go kakae guragut mega garaetawa,
gine yamaet ine nagirewa muneta.

⁶ Menan e ginae yamaet God naniwa aroewa gauarap wainiene amba wam ega om enuni wamewa taupei me yauya ao wareta.

⁷ Ap menan vek bagu sisi ega da wandeipi iragi me ase ve wanana, iwa me kwayupaya tainiwa.

⁸ Menan wanien, nene yamam taiwanian, iwa anavi ega koewa Seitan anan manewa laion mini gururut waini waenapan gut napen men nimun nimun iwan.

⁹ Go e Seitan koewa ame ase watanan imuya Keriso anu daviana gapan tumban amun yonan, iwa, e asigiap, evenae wai Iesu anu tumasine nagire piup ma gan ikukuk wanumuine itan ame wat iriana umap sia di wat iriwanum.

¹⁰ Go itan doak ame one wam konintu mini nataeta, amba God yan garaet nunini

apanewa, me iman wat kaimagam imae dan enueta amba me wa upaep Keriso dun mega ganatap waniai. Dun ganat ame usenagaet wande ainiwa.

¹¹ Menan aro amun ameme iravi God megawa di, usenagaet wandiniwa amba verisiwa da uon. Ame umap.

Gaun mega uiwa

¹² Ne asiginap tana gwanina apan Sailas, anu tumat Iesu inap kakaevet taini apanewa da, me ago neneni gapan ok umpatu mame dawap enan sean. Ok mame dadak enapen amba God garaet mega tave iragena wadiaena nopewa enan siangin, ame gapan am dagim yonan.

¹³ Amba at Babilon gapan Iesu anu tumasine nagirewa, ame e umayap God om enumoniwa, amba otuna Mak den gaun kaewa muga inayap waiamun.

¹⁴ Ap menan Iesu anu tumasine nagirewa gapan gaun tapen menan gare gare ua toiwanian. Amba Iesu inayap wandini nagirewa, nonup baigan mega iragi inayap wande ep.

2 PITA

Pita ok mega derewa

¹ Ne Saimon Pita God nao mega ayamase tainawa amba Iesu Keriso watu enamot mega apanewa da, ok ma enan enuiangin. Ame God ge wat inakam nuga Ayopewa Iesu Keriso inak tamanagaet ame anu tu-masitoni gapan kakae guragut mega nu waratoni mini e warayana nagirewa.

² God wat aipakam ge nonup mega garaetawa ame aigap aigap di ene ai-wandan, iwa e Mamanua God amba Iesu Keriso e asigiap di ta kakayaseana menan.

God nunan wa om enunen

³ God aroewa gapan, nu wan dim dim men inak nuga menan anu guritoni ame nuniwan, ap nunini gapan tumap waninet God nao mega ta aninampen, ap menan wan dim dim ma tambutoni iwa nu me asigip taton, Iesu oya oyae den kakae guragut megawa gapan nunan venanu wan.

⁴ Negin ma miniwa gapan wa agiat mega kakaewa ame yan kakae guragut mega aigap iragenawa nunen. Ap nunini gapan piup ma anut mega koewa one ya ta koeam nimaneta. Ame gapan God imua anuini mini nu imunu wat entanep.

⁵ Iwa mame menan ta ta kakayat tan anu tumat ega gapan guegue ega kakaewa tobob tan. Amba ap tane gapan aigap sia anut tobob tan.

⁶ Amba ap tane aigap sia ginap menawaet ya wa tane ae anu guran. Ap tane aigap sia aro tan inak ega Iesu menan wat kaimagamen amba aigap sia imuya ega God inap wat entanep.

⁷ Ap tane aigap sia tatae gwani Keriso yaua gapan baiganamu taiana umap waran tan, amba aigap sia imuya waenapan munan anu guriana waran ginap use intum den tan.

⁸ Ap guegue kakae guragut mame potayap kai ware wat agoat imaepi gapan e Ayop Iesu Keriso anu kakayasiwania gapan tavewa iai.

⁹ Go orup da da guegue mame iravi potayap ya wandepiwa me yangut ya ta

kakayasiwadata, ap gapan me yamewa boraseni mini amba den me koewa mega namua taiwandiniwa gaset bigi wareni imua sia borasen.

¹⁰ Ap menan tatan gwanin, kin kin tan ae yon kakayesen, ap gapan e gaset God om enue venaya di wan, waenapan ewamon, amba e guegue mame iravi di tanewa, e onana da ya geai.

¹¹ Ap tane gapan, e atonuya aigap iragen anu waupaep Ayop nuga Iesu Keriso wat inakam nimaniniwa ame tunano toemu mega posewa unugai.

God nop oit mega tavewa namu yawane nagirewa

¹² Nop mame tavewa e gaseget asigip ta kakayasean, ap gapan kaimakaet di amuyan yoniwanin, go ne ago tae darine enuen di ta angingat anuivin.

¹³ Menan ne anuingina kakaewa, ne pi-upa kasiga wanik angina gapan ago enap darine enuen taet anuivin.

¹⁴ Nop mame waingina iwa bop nega wamewa konintu taiwan, ame Ayop nuga Iesu Keriso aroga wadianegen.

¹⁵ Ap menan ne epara taingan ep, wa ewaep amba bop ta angepenawa, gatawan guegue nega mame gapan anui-waniampen.

¹⁶ Amba Ayop nuga Iesu Keriso aro amun megawa ge sia taupei oisewa wadi-aintoni ame gutut nop monamon anune waine nagirewa mini ya wadiaeton, go Iesu oya oya mega ganasewa baware yamanup yawatoni ame oisewa wadiaivin.

¹⁷ Iwa God otua Iesu yaua ao ware den oya oya mega waneni wamewa nu ap mepe den waineton amba nop da kimani oya oyae den anega tauen, “Ma ne Otun iragenawa, imuna wat kakayesen, me inap ne imuna ae bigaren.”

¹⁸ Nu Iesu den tanat virip tunupewa dot anetoni gapan nop mame taueni nu nuk den anuton.

¹⁹ Nop mame tauen anutoni gapan, nu God nop mega ame watagaet God oise wai-wanumune nagirewa ae seane, tavewa ame ase yamanup yawatton amba e imuya upan sean nop mame menan ae anu kakayesen. Ap gapan sisip arewa dun yagiren wandini mini yagit aisiwanian,

amba woup pogagaewa men enugusin buanae orewa dotouini mini Keriso woup menan bumagayap dotoueta.

²⁰ Aigap iragenawa, e ae anu kakayesen, watagaet God nop mega waiwanumune nagirewa, God nop mega enoga yawan seane go yaunewa mu muk aro muga gapan ya anu warane gapan seane iwa

²¹ God nop mega namumup oniwandini enoga yawan waiwanumune ame muk anuine gapan ya anu waiwanumun. Go God Guewa Woup Seni ame waenapan wadiam oniwandini gapan di yawan waiwanumun.

2

Nop tave uoni waine nagirewa

¹ Watagenta nop tave uoni waiwanumune nagirewa, God waenapan mega yaumakamup wanumone ap mini, nop tave uoni waine nagirewa iman tauue yaumakayap wanumoin. Menan mu iman imuya potaya na kukutanage amba intan ware aigayap barain. Ap gapan Ayop aigap iragenawa Iesu wat inakam muneni ame anu wara wara tandaya tain. Ame gapan mu muk ingane inak mugawa wa koeamain.

² Ame tave di, go waenapan arugataet guegue muga koewa taine ame ewap amo nop ani aninke dena wa, nop tave iragena amu ae umain.

³ Ian ame nop tave uoni waine nagire moni ega tambupen men mondi nop monamon tane waiwanum, ame nop muga tave uon. Watagaet amba endi den God wanene tamopen anuini ame yame meret wan amat di taiwan.

⁴ Gueguewa ame mam. Anea inak koewa taiwanumunewa, God yawamo munan bagu sisi anu inak ya munen, go pan watu enamond urat mum sisip tunun wandini arewa gapan enamond, wanumone amba wanene wamewa amase taiwanum.

⁵ Amba den watagaet iragen, God waenapan munan bagu sisi da ya anun go nin tawak wan tauue, God tandayasianumune nagire umamon. Go God apan Noa inak kakaewa wadiam wandini

apanewa amba waenapan upi nani yamu-naet yamu dere mugenat kwayup tamon, inak warane.

⁶ Amba sewa baware da yaua Sodom ge Gomora inak muga koewa taiwanumune menan, sewa baware ame uta tugun yagit momage vemonaeven. God sewa baware mame inap taniwa guegue mega umap iman waenapan God tandayasine nagire inamup ap sia venaseta.

⁷ Den sewa baware ame gapan God apan Lot megenat inak wanen. Iwa me apan kakaewa go waenapan inak muga koewa taiwanumune ame gapan itan bagu sisi ve wanane bumage tuk wan.

⁸ Amba apan kakaewa Lot, me waenapan mame potamup iniwandini gapan mu inak muga koe koe taiwanumune yave anuiwandini menan me imu pose kakaewa ae toguren.

⁹ Ap menan guegue map anega wande-piwa. God orup da da nao mega taine nagire ame wam koewa da inamup taupei me inak muna muna neginewa me asigip tan. Go wanene wamewa gapan, God waenapan inak koewa taine nagirewa tambumo nemoro di tamo aiwadata.

¹⁰ Wanene ame ibariwa waenapan inak muga gapan koewa tane God aro amun mega wabaitamene tandayasine nagirewa munan taueta. Iwa nop ebo aopan mame waine gapan anea tamu ya anune amba nop koe koe namugai wane oyok enane taiwanum.

¹¹ Go gare, anea, God yamp, ebo wamewa nagirewa ame ya diguguramone waiwanum. Gosi mu aro amun muga aigap, eboewa waine nagirewa ame gaset garao mumane.

¹² Go nop ebo aopan ma mini waine nagirewa, ya anune amba waiwanum. Mu man tap nop ya anune amba taine mini taiwanum. Man tap ame tambu guramopen men yanane, gueguewa ame pu manewa bumage entanine mini, God guramo boniga semota.

¹³ Nop eboewa manega waine nagirewa, waenapan wa koeragam mumine ame garewa muga itan bagu sisi wat ire taiwanumain. Koewa ame taine yamge mega aroga iragen yawane taiwanum. Ap

menan mu nimakayap bigip mandogae ukum umamon wanumam. Mu e yau-makayap umame uon tanaene taba den naiwanin. Go karaua inak koewa sia di taiwanum.

¹⁴ Ap yonane tainewa, yamamu gapan yangut ta wainan gogo tapen menan waen da yavepi mu imumu serarat to perukam mumeta. Amba mu imumu koewa ap anuine ya nengareta, ap gapan waenapan nutu uoni naumo amone inak koewa nonokap enamwanum. Mu imumu goandage inap asik kakaya tan. Ap taine nagirewa God nemoro tamota.

¹⁵ Amba nop eboewa wadidiamuine nagirewa, mame negin tamanawa ae vean apan Beo otua Belam inak mega ewap amon. Belam inak koewa tani gapan koewa taine nagire inamup garewa wara-pen men anu gurini apanewa da.

¹⁶ Go man donki me nop ya wainiwa, go apan umap nop wan, apan Belam koewa mega taiwandini menan yam ta yave wat diguren, apan ame koewa tat anuiwandini boge tue bigaren tap anu ae ven.

¹⁷ Nop tave uoni wadidiamuine nagire kaum urewa totot waini mini amba tawak tauen ikurup upun marimini umap. Ap menan evi amba God wani gapan mu mum sisip gware dena arewa gapan wanumoin.

¹⁸ Ame mondi nomuet tatakaen namu ao tane waiwanum. Ame imumu yagirin koewa tat anuine gapan waenapan wabaige baige tamone, ewake piup in-agewa tandayase Iesu anu tumasine nagirewa, ame sia koewa gapan amopen taiwanum.

¹⁹ Ame mu anut muga gapan yone tai-wanumampen wa agiat momane, go mu muk yonane koewa ayamase taiwanum. Iwa waenapan dim da imumu warin tainewa ame mu namu yoyo mugawa di.

²⁰ Mu piup ma koewa mega taine gapan gaset wat vetamon, iwa mu Ayop nuga Iesu Keriso wat inakam mega mu asigimup tane, go mu entanene inak koewa sia di taiwanum. Koewa ame gaisi ware pan guramopi ame taparit muga namua omewa mini uon, ame itanewa aigap iragen warain.

²¹ Ap menan mu Keriso negin mega tamanawa, namu ya yao anupo ame kakae. Go mu God woup seni nop mega kakaewa muneni mu warane amba evi sia tandayasene, ame koevet.

²² Mame menan, nop dima tavewa namua gapan anega wani, "Eyao merip enepi ae sia nata, amba tuan kakae wan-denai ae sia uri toba tata." Nop eboewa waine nagirewa mu den ap anega di.

3

Iesu tauepi noa

¹ Ae kaiwan, evenan wainawa, ma ne ok nega derewa enan sean watu eniangin. Ok mame siangina dawa namua den ago enapen gapan ae anu kakayasepen men siangin.

² Endi e imuya upan sean watageta imumu woup seni nagirewa God nop oit mega waiwanumune ame e di anupen men anu imaiivin. Amba Ayop nuga Iesu Keriso wat inakam nimaneniwa, nop dandamunagaet watu enamot mega muneni e imutuan di anuiwanian.

³ Nop namu iragen wam endi mame use aeni gapan dim da venasiwandapinawa, ame e di yao anu kakayesen. Waenapan iman wawa koko tae noya toya wa inak muga koe koe tat anuine ame di taiwanumain.

⁴ Ap gapan mu wanumo anega wai-wanumain, "Iesu sia tauat wa agi wani, endi amba, ya tauini? Gosi isimuran wainua borit wa amone go piup kiman ere ta venaseni ame uap di wande aewan."

⁵ Go watagaet God nop mega den dandamunagaet wan kiman ge kaum venasen. Amba kaum gapan piup tan. Ap tani mu imumu to musen.

⁶ Amba piup kiman tan venaseni ewap, kaum mame gapan God wan ningoe tawak taua waenapan umamon.

⁷ Amba God nop dandamunagaet wani gapan, piup kiman ewakewa mame wat nasen oma yame gapan wa koeamepen men amat wandia. Amba waenapan inak koe koe taine nagirewa, wanene tamopen men amat taiwan.

⁸ Amba evenan wainawa, nop daiton mame imuya ya di borasep. Ayop nuga

God inap wam daitonawa me en arugataet (1,000) mini, amba en arugataet mame wam daitonawa mini.

⁹ Endi Ayop God agi mega wani, ame wam wakaumen yaema ya taiwan, wae-napan upi ap anega waiwanum, go Me enan ae em bibigamen wandia, iwa me orup da ya wakaumat anuiwan, go mu iragi inak muga koewa ae ve kakaewa tapen men anu mumiwan.

¹⁰ Ayop wam mega tauapen tapi, up apanewa mini karaua taueta. Ap me tauepi ununkewa da aritavet wata, ap oap wan dim dim piup ge kiman gapanawa, iragi omaya yagit momagep uon an tata.

¹¹ Inak map anegawa gapan, iman wan dim dim iragi omaya yagit momagepiwa, ame e koewa go kakaewa nagire wainiai? Ap menan e imuya potaya woup wam sep wanien, amba God nop mega anu waran taiwanian.

¹² Ap menan, wanien God wam mega tauepi naine nambene tan, nao mega taitamepen men kaimakaet taiwanian. Amba wam ame tauepi kiman gwanaapewa uruga oma kaik yagit momage veret arot wa uon an tata.

¹³ Go God piup kiman ewakewa nunapen men wa agiat nimaneni ame wat natait, amba nu at ewakewa ame amase di taivin. Ame kakaewa nagire mugenat at pa mugawa.

¹⁴ Ae kaiwan, evenan wainawa, wam mame tauapen menan amase kaimakaet taiwanian, ame koewa da ya tane amba koewa da ya ta parisene. Amba God den nonup mega gapan waniepen men taiwanian.

¹⁵ Ap menan yao anun, nu inak ewakewa Iesu Keriso gamup waratoni iwa Ayop nuga ae em bibigamen wandini menan me wanene mega nu inanup ya taueni gapan nu inak ewake waraton. Amba tatanu Pol God nop dima mega waneni gapan ok enan map anega den sen.

¹⁶ Amba Pol ok mega uruga ne sean wadiaingina mini di se waiwandin. Me ok mega uruga semoni gapan, nop upi ame anu awapen men kaimake den, ap me waenapan Keriso nop oit mega den ya wadidiamone nagirewa, mu nop yaunewa

ya anu awane amba anu waramat tane gapan nop eboewa wadidiaen. Amba God nop oit mega upine den ap anega wadidi-aene. Go mu ap tainewa muk ingane God nemoro mega aigamup di bariwanum.

¹⁷ Ap menan, evenan wainawa, e nop oit eboewa mame menan gaset asigiap tayana menan ae amun yon kakayasen, arok da veane waenapan inak muga koewa taine ame da tam naue amo koewa nonokap ya enaep. Amba anu tumat ega Iesu inap kaimakaet taiana ame kwayupe yambuni tan, da veane sep ya wap.

¹⁸ Go wanien Ayop nuga Iesu Keriso wat inakam nimaniniwa, ame wat aipakam mega garaetawa ge yaunewa mega anu kakayasepen men ta aisiwanian. Me inap oya oyae den wande ep amba usenagaet wande aiwandan! Ame umap.

1 DION Dion ok mega namua

Inak nopewa

¹ Ere mangan gapan me di wande oniwandin, ame inak nopewa. Nu oisewa ame anuton nuk den yamanup yawaton, amba naninu den wat anuton.

² Endi nu inak nopewa mame oisewa wadiaivin. Inak nopewa ame aroga tauen yawatoni menan, oisewa tavewa di wadidiaivin. Mamanu God inap inak yai-bobot wande aini ame endi inanup tauen.

³ Nu dim da da yao anutoni oisewa endi mame di wadidiaivin iwa e nu den tobob tat anuivin. Amba nu tobob nuga ame, Mamanu God ge otua Iesu Keriso den taivin.

⁴ Ok mame nu aton nuga no dotoeupen menan sivin.

Ganat gapan in aninampen

⁵ Nop oit mame Iesu inap anutoni ame gapanaet di wadidiaivin. Iwa God me ganat di amba me inap mum sisip da uon.

⁶ Menan nu God den tobob tat, wa wainantawa go den nu sisip potap aniantawa, ame nu nop tave iragena gapan ya inivin.

⁷ God me ganat, ap menan nu ganat gapan waninet wa tainantawa, nu gare gare tobob tainampen amba otua Iesu Keriso deniwa gapan koewa nuga uruga bigi toiwandata.

⁸ Nu inak koewa da ya tainat watawa, ame nuk ingane ebo di waivin, amba nop tavewa potanup da ya wandia.

⁹ Nu koewa nuga God inap vetavet tatawa me anu ae di veta, iwa me agi mega tavewa gapanaet di tainiwa. Amba me inak nuga koewa iragi ise wat museta.

¹⁰ Nu koewa da ya tat watawa, nu God ebo apanewa divin, amba nop mega potanup ya wandia.

2

Iesu ta warit nimaniniwa

¹ Ae kaiwan, otun wainawa, e koewa da ya tapen menan ne ok ma inayap

enuiangin. Go e da koewa tanewa, orup da enan gambenaya yonen Mamanu God inap mup waiwan. Ame Ayop nuga Iesu Keriso pose woup seniwa, iwa me megenat God imua wat bigaminiwa.

² Me koewa nuga garewa di waren, amba nunan megenat uon go piup uruga munan den di waren.

³ Nu God gaset yao anuton, menan me iup mega ayamase tatawa gapan nu me di yao asigatait.

⁴ Apan da anega wapi, “Ne God asignap,” go iup mega ayamase ya tainiwa, apan ame ebo apanewa amba me potap nop tavewa da ya wandia.

⁵ Go orup da God nop mega ayamase tainiwa, God baigan mega tave iragena ame inap di nau bararamen. Mame gapan God nu inanup den wandia go uon ame nu yao asigip tait.

⁶ Ap menan orup ansena da inat wandet mega God den wandet wan wainiwa, ame Iesu guegue mega mini di ta aiwandan.

God iup mega ewakewa

⁷ Ae kaiwan, gwanin wainawa, iup ogewa ma enan siangina ame iup ewakewa da uon, go mame watagaet erewa gapan anuyana ap uap sia di wadiaivin.

⁸ Amba mame gapan e iup ewakewa enan den sia di sivin. Iup mame tave iragenawa Iesu gamupewa ame e gamuyap waenapan yaviwanum, iwa ap gapan ganat iragenawa tauen mum sisip yagit oireniwan.

⁹ Amba orup da dun ganat gapan wandet wan waiwan go tase gwani tandayat mumen tainiwa, ame sisipu di wandia.

¹⁰ Go orup ansena da tase gwani men anu guriniwa me ganat gapan di iniwan, amba taparit da evene wai inamup ya tata.

¹¹ Go orup ansena da tase gwani anu koeam mumiwandapinawa ame, me mum sisip gapan di yonen iwan, me mum sisip ame potap negin amba aini me oare, iwa mum sisip ame negin mega toboriwan.

¹² Ae kaiwan, otun wainawa, ne ok ma inayap siangina iwa God inak ega koewa gaset Iesu Keriso gamup anu ae ven.

¹³ Amba mame waiwa ok ma inayap singina iwa Iesu mame ere ibariwa gapan den wandeni e asigip tayan. Amba den tamaru nagire inayap ok singina, iwa e koewa apanewa Seitan epa mega topaitayan.

¹⁴ Amba orup otu negawa, ok ma inayap singina iwa Maman kimaniwa e asigip tayan. Amba inewa mamewa den ok inayap singina iwa Iesu mame ere ibariwa gapan den wandeni e asigip tayan. Den ok ma waenororo tamaru inayap singina iwa e aro tayan God nop mega potayap wandini gapan, koewa aroewa topaitayan.

Keriso anavi megawa

¹⁵ Piup ma ge wan dim dim megawa menan ya anu guriwanian. Ap menan anu guriwaniampinawa Mamanu God menan imuya ya wariwadata.

¹⁶ Iwa piup ma inak mega koewa gueguewa ame, nu koewa tapen men daramunu wap tainain, den koewa yao anupen men nanamu tainain, amba dim da anu waratoni menan apan apan tainain. Inak map anegawa ame Mamanu God megawa uon go ame iragi piup ma megawa di.

¹⁷ Piup ma ge wan dim dim megawa, ame waenapan imumu wariniwa, iman iragi punun wa aeta, go orup da God anut mega gapan taiwandapinawa, me yaibobot ine wande aiwadata.

¹⁸ Ae kaiwan, otun wainawa, endi ma wam uiwa tauaton, ap menan Keriso anavi mega tauepi wamewa onen mananini oisewa gaset wadiaen anuyan, amba endi Iesu anavi megawa arugataet mame gaset tauane. Ap yawaton anuintoniwa menan wam uiwa mame di tauiwan.

¹⁹ Iesu anavi mega nagirewa, ame nu iam iam nuga daitona nagirewa, go ae venen tau ugup amone menan ian ame nu dugup nuga daitona iragena uon. Amba mu nu dugup nuga daitona wanumopo ame nu den tanane wanumopo, go mu ae venen tau amone menan mu nu dugup nuga daitona nagirewa uon.

²⁰ Go endi e Keriso Pose Woup Seniwa gamup God Guewa Woup Seni yan mega eneni ame gapan nop tavewa anuiwanin.

²¹ E nop tavewa ya anuiana menan ok ma ya sivin go e nop tave iragena gase anuiana menan di sivin. Amba den, e asigiap di ame nop tavewa waine gapan aen eboewa ya venasiniwa.

²² Endi nop eboewa waini apanewa da? Ame God wa watu eneni Iesu me Keriso ame waboborini apanewa. Orup mame Iesu anavi megawa, me ap taini ame Mamanu God otua Iesu dere tandayat mu-men waboboramuiwan.

²³ Orup da Iesu tandayase wabobori-wandapinawa, ame Mamewa God den di tandayasen waboboriwan. Go orup da Iesu megawa wapiwa ame Mamewa God inap megawa den di waiwan.

²⁴ Ap menan ek ingane gean guan tan ae yao anun, dim da erewa gapan wadiaena yao anuiana ame inayap di wandep. Ap me wandepi gapan e God otua Iesu dere tobob muga gapan den wani aisiwanian.

²⁵ Endi mame gapan Keriso wa agiat nimanieni ame inak yaibobot nuniwanda wan.

²⁶ Ne ok inayap sean wadiaingina iwa waenapan da wababayan imae negin eboewa gapan ya naue amopen menan waivin.

²⁷ Go e Keriso gamup God Guewa eneni menan nop tavewa inayap di wandia. Ap menan orup ugupewa da nop mega ya anu warapen taiwanian. Amba God Guewa wan dim dim ma iragi men wadiaepi ame tavewa gapanaet di ebo da uon. Ap menan Keriso den wanien God Guewa wadiaepi gapan ayamase di ta aisiwanian.

²⁸ Endi nop mame tavewa di, otun wainawa, Iesu Keriso den tobob tan in aisiwaniampina Keriso amba sia tauep. Iwa, me sia tauepi wamewa gapan nu tap umam tat karaua da ya waninait, go nu kin kin E asigiap di, inak kakaewa taini apanewa ame Keriso megenat di. Ap gapan orup da inak kakaewa taiwandapina yawanewa ame God otua di.

²⁹ E asigiap di, inak kakaewa taini apanewa ame Keriso megenat di. Ap gapan orup da inak kakaewa taiwandapina yawanewa ame God otua di.

Nu God otu waiwa

¹ Endi yawan, Mamanu God nunan bumagap iragen anu gureni menan nu me otu waiwa dianen. Endi nu me otu wai iragenawa di. Go piup ma gapan mu asigip ya tanene, iwa Iesu mu den oare.

² Ae kaiwan, evenan wainawa, endi nu God otu waiwa di, amba Iesu sia entan taupei wamewa gapan nu dim da entan nimanepi nu oare. Go nu asiginup di, Keriso sia taupei ame yawata gapan nu me umap entan nimaneta. Iwa Keriso irewa wam ame gapan nu yao kakayatait.

³ Ap menan, waenapan da da anu dao muga Keriso inap wandepiwa, ame mu imu pose ganase den nenenga wanumoin. Iwa Keriso me imu pose woup am seni apanewa.

⁴ Waenapan da da inak koewa taine ame God iup mega topaisiwanum, koewa ap taine gapan mu God iup mega tandayasiwanum.

⁵ Go e asigiap di Keriso waenapan koewa nuga wat mutapen menan tauen. Iwa me koewa da daiton inap uon.

⁶ Ap menan, waenapan da da Keriso den tobob ta wanumopi ap gapan mu inak koewa aigap aigap sia ya taiwanumain, go waenapan da da inak koewa di taiwanumampinawa ame mu Keriso ya yawan anu awane menan di taiwanumun.

⁷ Ap gapan, kaiwan otun wainawa, waenapan da wababayan imae negin eboewa gapan ya naue amop. Amba orup da Keriso umap tat anupiwa me inak mega kakaevet taiwandan. Iwa Keriso me pose woup am seni apanewa.

⁸ Amba orup da inak koewa aigap aigap sia taiwandapinawa ame, me Seitan orup megawa. Iwa Seitan erewa gapan koewa di ta nau oniwandin. Ap menan God otua Iesu piup ma taueni tavewa Seitan nao mega koewa ame to goyamepen menan tauen.

⁹ Orup da God otua di wandepiwa, me koewa aigap aigap sia ya taiwandata. Iwa God inak mega ewakewa waneni ame gamup wandia, amba God ame, me mamewa di. Ap gapan me koewa da aigap aigap sia ya taiwandata.

¹⁰ Amba God waenapan megawa ge Seitan waenapan megawa iraga yaoyao

muga aroga iragen di yawata ame guegue muga mam, "Orup da God yamap guegue kakaewa ya tapi ge tase gwani munan den ya anu gurepi ame mu God otu waiwa uon."

Ek gare gare anu guriwanian

¹¹ God nop oit mega kakaewa erewa gapan wani manega anuyan, Ame nuk nunan gare gare anu gurinampen.

¹² Nu apan Kein taiwandini umap ya tainampen, iwa me inak mega koerage iragen, amba me Seitan aigavene ae gwaniwa Eiboro inak kakaewa taiwandini menan toguren boen.

¹³ Ap menan gwanin wainawa, piup ma gapan waenapan tandayat imae waiwanumampinawa, ame anu bambam ya tane.

¹⁴ Nu tatan gwanin Iesu dugup mega daitonawa munan anu gurinantawa, ame bop aroewa gaset garawaset inak gapan tauaton. Go orup da evene waiwa munan ya anu guriwandapinawa, ame bop aroewa gapan di wandia.

¹⁵ Amba orup da tase gwani, Iesu dugup mega daitonawa, anu koeragam mumiwandapinawa, me togut wagut taini apanewa, ame yaibobot image iragenawa da me gamup ya wandia.

¹⁶ Endi nu baigan tave iragenawa yao asik taton ame mam, Iesu Keriso inak mega nunan wakaumen. Ap menan nu den inak nuga evenan wainu munan di wakaumapen.

¹⁷ Go kwan puraput apanewa da, evenewa puraput uoniwa yave ago da ya wanepiwa, God baigan mega orup ame inap anenen amba wandeta?

¹⁸ Ap menan otun wainawa, baigan noa mondi nonuet ya wainampen, go tavewa ase den tat waenapan ta warit mumat amba wainampen.

¹⁹ Ap tainanta gapan nu inak tave iragenawa taitoni nagirewa asigip tait. Amba den God nonup mega inanup wandepi gapan imunu ae bigarep God den waninait.

²⁰ Amba nuk ingane imunu potanu gapan ae anu baitamitoni ame aroe uon iwa God nonup mega inanup di wandia. Iwa nuk ingane anuintoni ame gauarap go

God me anuini ame aigap iragen. Amba me iragi anuitamini apanewa.

²¹ Ap menan evenan wainawa, imunu tamanagaet anuinantawa, nu God inap tap gop da ya anuinain. Go namup kin kin yoninait.

²² Amba dim da men anut God inap mup wainantawa, me di nuniwadata. Iwa me nop mega ayamase ge anut mega anuini gapan taitoni menan me imu pose inanup waren.

²³ God iup mega nuneni ame mam, Nu otua Iesu Keriso anu tumaset yaua gapan baigan gare gare tainampen. Iesu ap anega tainampen menan dianen.

²⁴ Ap gapan waenapan da da God iup mega ayamase taiwanumampina, mu God den tobobot ta wanumoin, amba God waenapan ame den tobobot ta wandeta. Endi God inanup di wandia iwa God Guewa nuneni gapan nu anuivin.

4

Guewa kakaewa ge koewa

¹ Ae kaiwan, evenan wainawa, waenapan guewa eboewa warane nagirewa, arugataet tauan at at ma iragi amone. Ap menan guewa uruga inamup anu tumat ya tamone. Go namu guewa iramu yawanmon amba ansena God mega wandepiwa ame waran anu tumasen.

² Endi map anegawa gapan, God Guewa ire yao asik tai, ame guewa ansena da, Iesu Keriso apan iragen etua ware piup gan di yanat wapiwa ame God megawa di.

³ Go apan ansena da, Iesu Keriso wabobore amba tandayase God otua uon wapiwa, guewa ame God megawa uon, ame Keriso inap anavi taini apanewa. Endi anavi apanewa ame tauepi oisewa anuiana gaset tauen piup ma gan wandia.

⁴ Go otun wainawa, e God naewa megawa menan guagup eboewa mame epaera mega e gaset paina yamasean. Iwa God Guewa mega potayap wandini ame aroewa aigap iragen, amba guewa koewa piup ma megawa ame aroewa uon.

⁵ Endi waenapan Iesu tandayasine nagirewa, mu piup ma megawa di, ap menan piup ma nagire mu nop muga den warane waiwanum. Amba nop muga waine piup

ma waenapan mega darine pemagene anuiwanum.

⁶ Go endi nu God waenapan megawa di, amba God yao asik tane nagirewa mu nop nuga waitoni den anuiwanum. Go waenapan da da nop mega darine pemagene ya anupen tainewa, ame nop waitoni ya anuiwanum. Endi mame anega taine gapan, nu God Guewa kakaewa ge guewa koewa guegue muga iramu ame gapan yao asik tait.

God baigan ibariwa

⁷ Ap menan evenan wainawa, nuk gare gare anu gurinampen, iwa baigan ibariwa God gamup tauiniwa, orup da baigan taini me God otua amba God baigan mega den inap wandia.

⁸ Amba orup da baigan inap ya wande-piwa, me God oare iwa God me baigan i apanewa.

⁹ Ame God baigan mega gapan nunan anu gureni menan manega to ewanen, Me otua daiton iragenawa, Iesu gamup inak warinampen menan watu enen piup ma tauen.

¹⁰ Endi God baigan mega tave iragena mame to ewanen, baigan ame nu God inap namu ase ya taton, go God me nunan ma anu gureni menan, otua Iesu koewa nuga wat mutapen menan inak mega yan ta God wanen.

¹¹ Ap menan evenan wainawa, God ap anega nunan aigap iragen anu gureni menan nu den gare gare anu gurinampen.

¹² Nu daiton da God ya di yawaton, go nu gare gare anu gurinanta ame gapan God inanup wandeta, amba baigan mega potanup no dotoueta.

¹³ God Guewa mega nuneni ap gapan nu asigip taton ame God nu den tananen wandia, amba nu me den tanaton wanin anit.

¹⁴ Den God otua Iesu ame nu wat inakam nugawa, God piup ma gapan watu enen, nu yamanup ase yawatoni oisewa waenapan wadidiamuivin.

¹⁵ Waenapan da anega wapi, "Iesu me God otua di," ap wapi mu God den tobobot tane wanumamun amba God mu den tobobot tan potamup wandia.

¹⁶ Ap menan God baigan mega inanup tani ame gamup nu yawaton anu tumasivin, iwa God me baigan ibariwa. Amba orup da God baigan mega gan inen wandinwa, ame God den inap di wandia.

¹⁷ Endi mame gapan God baigan mega inanup di bararaen wandia. Ap menan God wanene mega wamewa tauepi nu kin kin namup di yonait. Iwa nu inak nuga piup ma gapan Keriso inak mega den om inen.

¹⁸ God baigan mega wandini arewa gapan, tap gop da ya wandia. Iwa God baigan mega kakae iragen ap wandini gapan tap gop ame to oireniniwa. Go tap gop anuinantawa ame God wanene mega gapan tauait. Ap menan orup da tap gop anuiwandapinawa, me God baigan mega kakaewa ame ya tautaneta.

¹⁹ Nu baigan ma taitoni iwa God baigan namu nu inanup ma tan.

²⁰ Orup da da anega wapi, "Ne God menan anu gurinawa." Go den sia yone tase gwani anu koeragam mume tandayat mumiwandapinawa, ame ebo aohan apanewa. Iwa orup da tase gwani ase yawamon baiganamu ya tainiwa, ame anenen amba God ya yaveni baiganewata?

²¹ Ap menan, God nop mega dandamu-nagaet manega wan, orup da God menan anu guriniwa, me tase gwani munan den di anu guriwandan.

5

God otua Iesu anu tumasepen

¹ Orup da da Iesu me Keriso di wapiwa, mu God otu waiwa. Amba orup da Manuna God menan anu gurepiwa ame God otu waiwa munan den di anu guriwan.

² Endi nu God otu waiwa munan anu guratawa. Ame God menan ae anu gurat amba nu iup mega ayamase den di tainampen.

³ Nu God menan anu guritoni ame iup mega ayamase di tainampen amba God iup mega nuneni ame kaimake den uon.

⁴ Kaimake den uoni iwa God otu waiwa Iesu inap anu tumat muga gapan piup ma aroewa paina yamasene.

⁵ Amba orup da Iesu me God otua di anu tumasepiwa, me ap gapan piup ma guegue mega koewa paina yamaseta.

⁶ Iesu Keriso me kimani viseni, paua mega dup iatoni kaumewa amba bop mega denipewa den gamup visen. Me dup iatoni kaumewa megenat gamup ya ware visen, go kaum ge denip dere gamup tambu visen. Ame tavewa di iwa God Guewa nu potanup den anega waiwan, nop mame tavewa di. Amba God Guewa me mek tave iragenawa di.

⁷ Ap menan Iesu siwa naune nopewa waine ame ona yampo waiwanum.

⁸ Ame Guewa, kaum amba denip, nop yampo mame gine daiton om inen.

⁹ Nu piup apane magua waraton waitoni nu anu tumasivin, go God magua waren wainiwa ame aroewa aigap iragen. Menan God otu iragena Iesu magua waren waini nop ame aroewa aigap iragen.

¹⁰ Menan waenapan da da God otua Iesu anu tumasepiwa, mu God magua wareni nop ame bumagamup wande aiwadata. Go orup da da God ya anu tumasine menan mu God ebo wat waiwanum. Iwa God otua Iesu magua waren waini oisewa ya anu tumasiwanum.

¹¹ Amba God otua Iesu oisewa ame manega wan, God yaibobot inagewa nunen, amba inak yaibobot mame otua Iesu Keriso gamup wandia.

¹² Ap menan orup da da Iesu bumagamup warepiwa, mu yaibobot inagewa mame warain. Go orup da da God otua Iesu bumagamup warepiwa, ame yaibobot inagewa ya warain.

Endi nu yaibobot inagewa waraton

¹³ Endi ne wan dim dim ma ogewa sean wadidiaingina ame e da da God otua Iesu gamup anu tumasenewa gapan yaibobot inagewa di warai.

¹⁴ Endi mame gapan nu God namup kin kin yonivin. Amba dim dim menan anuton, me anuini gapan mup inap waitoni, me di nuniwan.

¹⁵ Amba nu asiginup di God mup nuga anuiniwa menan nu mup inap di watawa, me tavewa nuneup di warait.

¹⁶ Orup da tase gwani koewa tap yavepi amba koewa ame, me guewa boe boe omewa gapan uon wandepiwa, God inap mup wap inak wanep. Mame ne waingina ame waenapan koewa taine go guamu bop gapan ya tauine ame munan waivin. Go inak koewa ame guewa boe boe omewa gapan wandepiwa, ame gapan mup ya wapen.

¹⁷ Inak koe koevet taitoni ame iragi koewa di, go koewa upi otu kamontu, amba upi kanamawa iwa guewa boe boe omewa tauen.

¹⁸ Amba nu asiginup di, God otu waiwa koewa usenagaet ya ta nau amuiwanumain. Iwa God otua Iesu kwayup tamuiwandapina gapan apan koewa Seitan ya man inamota.

¹⁹ Ap menan nu asiginup di, nu God otu waiwa di waninan, go apan koewa Seitan me piup ma uruga waren namu yoyo taiwan.

²⁰ Amba den nu asiginup di God otua Iesu taueni anut nuneni ap gamup nu God tave iragena anu awaton. Endi nu God tave iragenawa ge otua Iesu Keriso den tobot taton wanin anit. Ame God tave iragenawa amba inak yaibobot ibariwa.

²¹ Ap menan otun wainawa, kwayup ek inga ingane tan god eboewa upi den ya inat mumiwanian.

2 DION

Dion ok mega derewa

Nop ebo aopan waine ago ya munane

¹ Ne tataya Dion ok ma siangin. Ame God wa watu om enuni, waenewa amba otuk waiga den gaun inayap waiangin. Ne nop tave iragena gapan imuna iragi inayap wariwan, amba orup da da nop tavewa anune asik tainewa den imumu inayap wariwan.

² Iwa nop tave iragena ame potanup wandini gapan imunu inayap wariwan. Nop tavewa ame inanup usenagaet di wande aiwandata.

³ Amba Mamanu God otua Iesu keriso dere wat aipakam muga garaetawa amba bagu sisi ge nonup mugawa inanup wan-dep. Ame nu da da nop tave iragenawa ge baigan nuga gapan initoniwa ame gare gare anu gurinampen.

⁴ Ap gapan ge otuk waiga upi nop tave iragena Mamanu God wara, di tapen dia-neni ame di warane taine oisewa anuna menan aton anuivin.

⁵ Amba endi, God baigan mega oisewa dandamunagaet wadiapen taingina ame nop ewakewa da uon, go nop mame erewa gapan anutoni ame uap sia di. Ap menan waen negawa, nu iravi imunu gare gare anu gurinampen men inayap ok sean waivin.

⁶ Endi baigan tavewa mega ame God iup mega anu ayamase tainampen, ame erewa gapan God kaimakaet dianeniwa, ame nu iravi gare gare bumaga tantan anu gurinampen.

⁷ Waenapan ebo aopan waine nagirewa gaset aruga tauane piup ma gapan wanum amun. Ian ame, Iesu Keriso piupa tau-e apan umap yaneni ame ya anu tumasi-wanum. Ian ame ebo aopan waine na-girewa amba Iesu anavi megawa.

⁸ Ap menan ek ae anu kakayasen, dim dim iragi Iesu menan anuyan nao tai-ana ame da ya wakaumane go kaimakaet di taiwanian, iwa nao kaimakaet taiana garewa mega evi amba iragi gine ambot warai.

⁹ Amba orup da Keriso nop mega wadi-aneni garawaset wan taini ge Keriso nop mega wani gapanaet ya ine aiwandap-inawa, orup ame God inap ya wandia. Go orup da Keriso wani gapan di ine aiwandapinawa, ame God otua Iesu dere den inap wanumam.

¹⁰ Ap menan orup da inayap tau-e Keriso nop mega wadianeni omewa gapan ya waiwandapinawa, orup ame waupan pa ega gwanap ya baraene.

¹¹ Orup da ebo aopan wan taini apanewa mame, wa upepiwa, me apan ame koewa mega den enanasiwanda.

¹² Ne nop aruga wadidiae diae di go ok gapan ya seap wadiaet anuivin. Go amena inayap tauap ginan namun gare gare yayao nitat amba nop wadiaet anuivin. Ap tata aton imunu potanu bararaeta.

¹³ Endi dugup gega daitona God om enuni waenewa amba otu waiwa den gaun inayap waiwanum.

3 DION Dion ok mega yampoa

¹ Apan nega Gaias, genan anu gurinawa, ma ne Iesu dugup mega kwayup tamuina apanewa gaun inagap waivin.

² Evenana, ge kakae waingepen menan ame vek o koewa dim da da inagap ya tauapen men God inap mup waivin. Ne anuingina anu tumat gega God yamap umap di wandia.

³ Iesu dugup mega upi ma tauane God nop mega tavewa anu taingiana oisewa wadianegene menan ne aton baware anun. Ne asiginap ge pot pot tamana taingiana apanewa da.

⁴ Otun tasina God nop mega tavewa ta amuiwanumampina oisewa anupena aton baware iragen anuivin.

Dion apan Gaias yaua ao waren

⁵ Apan negawa, Iesu dugup mega nagirewa daio inagap tauane ge mu oare go waupamoana menan Keriso nao mega kakae taingian.

⁶ Mu mapia sia tauane Iesu dugup mega nagirewa namup ge kwayup gega baigan taiana oisewa wadianen. Mu God nao mega tainewa menan aigap sia wat agoat muma amba mu ap daio amopi God menan aigap sia tain.

⁷ Mu erewa gapan Keriso oisewa wadiiamopen men amone gapan ya anu tumasine nagire ago tamo tamo menan tanda wane da ya waran amone.

⁸ Ap menan nu orup ap miniwa ago tamoit. Ap tata mu nop tavewa wadiiamine nanimu den nu waresivin.

Apan Daiotepis amba apan Demitias

⁹ Ne ok otu da enuna Iesu dugup mega inamup watu enan. Go apan Daiotepis namu yoyo megenat di taiwandat anuni menan nop nega ya anu waren.

¹⁰ Amena tauapena apan ame koewa taini amba mondi ebo nenan waini menan gare gare wawa nitait. Koewa ame megenat ya taiwan upine den. Iesu dugup

mega nagirewa daio inap tauapi ya wau-pamota. Upi waupamot wane watanamui-wan mu den wanumopen tanda wan wa oimuiwan.

¹¹ Apan negawa, koewa ta ewagepi ya taingan go kakaewa ta ewagepi taingan. Waenapan da da kakaewa ta amopi mu God megawa. Go koerage ta amopi na-girewa mu God ya asigip tane.

¹² Waenapan iragi apan Demitias atonua waiwanum. Guegue mega nop tavewa waini gapan yavivin. Nu me menan den waivin, nop nuga ame tavewa di ge asigigap tan.

Gaun uiwa

¹³ Ne nop aruga wadidiae diae di go ok gapan ya seap wadiaet anuivin.

¹⁴ Go amena inayap tauap ginan namun gare gare yayao nitat amba nop wadiaet anuivin.

¹⁵ Nonup inagap wandep. Evenak waiga iravi gaun inagap waiamun. Evenan wainu iravi gaun nuga daiton daiton in-amup wadiamon.

DIUT Apan Diut ok megawa

1 Ne Diemis gwaniwa, apan Diut, amba Iesu Keriso nao mega taina apanewa. Ok ma, God waenapan mega venamu waniwa ge God Mamanua imua inayap wareniwa amba Iesu Keriso kwayup mega gapan wanisianawa ame inayap siangin.

2 God bagu sisi enan anuiwandan amba baigan ge nonup mega inayap no dotoue wandep.

Nop tave uoni wadidiamuine nagirewa

3 Kaiwan, evenan wainawa, ne Iesu Keriso gamup inak waratoni oisewa wadi-aet anuivin. Go endi ok ma singina ame imunap men anuina nopewa, ame dadak enapen e kaimakaet tan, anu tumat ega tantanewa tan, watagaet God waenapan mega imu pose woup seniwa ame tane umamup di ta aisiwanian.

4 Iwa waenapan ebo aopan waine nagire upi gaset karaua nimakayap tauane wanumam. Ian mame menan watagaet God no oise waiwanumune nagirewa mu wanene tautanenepi oisewa den seane. Ebo aopan waine nagirewa mame, God tandayasene garaet mega wat entanene wainan gogo taiwanum, den nu Ayop nuga daiton aigap iragenawa, Iesu Keriso tandayasiwanum.

5 Nop mame e gaset asigip tayan go ne sia imuya wa awapen menan waivin. Ame wataget Ayop God at Idip gapan Isurero nagirewa wat vetamon tau amone. Go ap ewap waenapan Ayop God inap ya anu tumasene menan me wa koeam mumen borit wane.

6 Gutut mame namu anuyana go endi sia di anun, God anea aro muga muneni gapan ya taiwanunum, go mu at muga muneni ae vean muk anune gapan taiwanumune. Ap menan God anea mame iravi tambumo sisip arewa gapan semo yaibobot naganewa gapan panamon wanumone, wanene wamewa evi taupei amase taiwanum. Wam ame gapan God mu wa koeragam mumeta.

7 Ap umap sia, watageta pa sewa Sodom ge Gomora amba sewa mainamupewa upi den guegue muga anun. Pa sewa ame nagirewa inak koewa wainan gogo uniunion taiwanumun amba apan muk dere gare gare anu gwagwaramen amba ingane wainan gogo mini taiwanumun. Ap gapan, mu yaibobot meravewa ame nemoro mega tautanane. Guegue ame nu yao anupen menan venasen. Ame waenapan inak koevet tainewa iman yaibobot meravewa gapan God nemoro mega tautanain.

8 Ap umap sia waenapan mame muk imumup koewa bet inane yawane gapan naumo aen inak koe koe tane, epimu muk wa koeamiwanum. Mu God aro amun mega tandayasene, amba kimani oya oyae dena nagirewa wawa koko inamup den taiwanum.

9 Ame God anea mega bawarewa, yaua Maikero, den ap anega ya tan. Me wataget apan Mosis boeni ame etua warapen menan Seitan den arak maken warane, menan anea Maikero yone Seitan da ya wawa koko tan go anega megenat dien, "Ayop ge diguragep."

10 Go waenapan nop ebo aopan waine nagirewa, mu wan dim dim ya yawane anuine ame den wawa koko tamuiwanum. Man puawa umap muk anune gapan di taiwanum, ap umap tane muk ingane epimu di wa koeamiwanum.

11 Go kaiwan, ian ame iman itan bagu sisi arita iragen di warain. Mu watageta apane Kein tani pusi uap amuiwanum, amba apan Belam mini mu moni warapen men nop tave uoni wadidiam wanum. Den apan Kora God tandayaseni mini taiwanum, ame God amun mega tanda wane menan God wa koeragam mumeta.

12 Ian ame bigip nau guguramon yau-makayap taba den tanamoyan naiwanin. Mu muk ingane inak muga menan anu gurane taiwanum. Mu irikup ugine uoni mini taik naumon yonen iwan amba mu bodu omaewa tave ya ieni amba sia i bunaen uarini ap mini mu bop muga aigap aigap warain.

13 Mu inak muga puiman keta et denanu tam onen etop ma to paunagini mini,

umam da uon, namugai di taiwanum. Amba buanae mini sire tarep warane ise amo ase amo taiwanumun. Amba God at muga sisip uni gware dena, yaibobot wandini arewa ame ve munen wandia.

¹⁴ Apan Adam ani sibabasie yan ge yan onamuin ene koniwa nani yamu dere apan Inok gapan tauen. Amba Inok me ebo aopan waine nagirewa dim da inamup anenen venasepi namu yave nop anega wan, "Yawan, Ayop anea mega arugataet den tanamon oniwan.

¹⁵ Me waenapan uruga wanene tamopen menan taueta amba waenapan inak muga koe koe inap taine ge wawa koko tane amba nop ani aninke dena inap waine ame wat arogame amba wanene tamota."

¹⁶ Waenapan mame pot pot enu yawa-gen tane arak maken, wawa koko, digut agut, gwen gurut wane evene wai nop eboewa muniwanum. Amba apan apan tane nop monamon muga eboewa gapan waenapan wa upamo muk dim da warat anuine di warapen menan taiwanum.

Tagigit ge pusi pan pan

¹⁷ Go, kaiwan evenan wainawa, Ayop nuga Iesu Keriso amba watu enamot mega nagirewa ian mame tagigire namu diaene ame ae di anu kakayasen.

¹⁸ Mu anega wadiaene, "Wam verisiwa taupei gapan waenapan mame God amba me anu tumasine nagirewa inamup den wawa koko ge nipec wa amba inak koewa muk anuine gapan di taiwanumain."

¹⁹ Waenapan mame mu seu enu imaepi nagirewa. Amba imumu piup ma koewa mega wat kakayaseni nagirewa. Mu inamup God Guewa da ya wandia.

²⁰ Go evenan wainawa, e inak ega ibariwa Iesu anu tumasiana gapan anu tu-mat nenengawa wat tu doriwanian. Amba God Guewa Woup Seniwa potayap wandepe aroewa gapan mup waiwanian.

²¹ Ap menan, God enan anu gurini baiganewa gapan waniai, Ayop nuga Iesu Keriso bagu sisi enan anuni gapan inak yaibobot enat anuini ame amase ta aisi-wanian.

²² Amba waenapan upi God men gego anuine munan bagu sisi den anun.

²³ Amba upi oma yamap amuine nagire, ae ma upamon inak munan, amba upinewa bagu sisi munan den anun. Go tap den munan anun, iwa inak koerage taiwanumune menan en wanup muga den koerage, inak muga koewa ame da wat anaepi tawa.

Apan Diut God wa atonasen

²⁴ Amba God aroewa den wandini gapan onana geaepen tanewa, me kwayup taep onana ya geai. Amba tam naue aep oya oya mega atonu den tautanai, amba koewa da inayap ya taueta.

²⁵ Amba God me megenat God di, me Ayop nuga Iesu Keriso gamup inak nuniniwa. Amba oya oya mega aigap iragenawa amba aro amun mega uon ya tata. Watawa, endiwa amba usenagaet yaibobot wande aiwadata. Ame umap.

AROGAMENI Iesu Keriso Dion arogameni noa

¹ Ok ma Iesu Keriso wat arogameni noa. God nop mame Iesu wanen me ago mega nagirewa dim da konintu taupei ewamopen menan. Wam da Keriso anea mega da nao mega apanewa Dion inap watu enen nop mame wat arogamepen wadien.

² Menan God Dion inap me nop mega amba Iesu Keriso oit megawa wat arogameni ame Dion wan dim dim iravi yave anuni oisewa wadianen.

³ Waenapan da da nop oit mame anupi aton anuin iwa evi taupei noa mame namu batnak anupi menan. Anupi nagire den aton anuin amba anu tapi nagirewa den aton anuin iwa wam konintu taiwan.

Dion gaun megawa

⁴ Apan Dion Iesu dugup mega nagirewa nani yamu dere at Eisia wanumone gaun inamup anega watu enen,

God wataget iragen endi den wandiniwa amba evi tauepiwa garaet wat aipakam imaep baigan mega enep. Ayop watarewa namup guewa kakaewa nani yamu dere, ame Guewa Woup Seniwa di, wanumene den gaun inayap waiwanum.

⁵ Iesu Keriso Mamewa oisewa negin tamana wadianeni apanewa gaun inayap waiwan. Me bop nagirewa nimakamup namu inakae sia yon warden. Piup gapan namu yoyo taine nagirewa mu ayop mugawa me di.

Me nunan anu guriwandini gapan me boeni deniwa gapan koewa nuga vetanen.

⁶ Nu Mamewa God nao mega tapen men God pirisi mega nagirewa dianen menan waenapan kwayup tamopen aroewa nunen. Iesu Keriso me oya oya ge aro amun mega usenagaet wande aiwandan, wam wam pot pot yaua ao warinain. Ame umap.

⁷ Ao yawan irikup potap oniwan waenapan at at iravi itaya enune nagirewa den

yawain. Mu Iesu yavepi menan waenapan piup at at iragi bagu sisi anu irip turup wain. E, ap anega di venaseta.

⁸ Ayop nuga God aigap iragenawa anega wan, “Ne wam ibariwa amba wam verisi apanewa.” Me wataget iragen endi den wandiniwa amba evi taupei apanewa. Me Ayop God, aro aigap iragena apanewa.

Dion bet ine Iesu yaven

⁹ Ne Dion e dugup ega daitonawa. Nu Iesu den intum taton gapan God toemu mega gapan entaneneni menan ugu vegaek bagu sisi anu tanivin, Iesu menan kaimake taton yaentuk mantuk wanin anivin. Ne God nop megawa amba Iesu oit megawa, ame God arogameni noa, waenapan opata wadidiamuingina menan upi waranegen puiman topaneniwa at yaua Patmos gapan bat nimanegene iwa ne nop ame sia ya wapen menan.

¹⁰ Pura bawarewa wamewa gapan, God Guewa imuna potana waren. Nop baware da pum ununkewa mini garinap anega anun,

¹¹ “Dim dim yawawa ame iravi ok se amba Iesu dugup mega nagirewa nani yamu dere at ugup ugup wanumene inamup watu en. Waenapan ameme pa muga yaumua Epesas ge Simona ge Pogamam ge Tayataira ge Sadis ge Piladelopia ge Leodasia.” Nop ap anega tauen.

¹² Da inanap wani yawapen men yamu entanen. Dun kaime gwayayame yanangaet den nani yamu dere yoniwanumune yawamon.

¹³ Dun yaumakamup apan da mini yonen yawan. Wanup mega pomponu nononga pusip tauen berit mega gwayayame yanangaet den toganep panen.

¹⁴ Iwa i gume ame pomponugaet irikup umap. Yamewa oma merao yagiriwandini mini.

¹⁵ Pusiwa gwat bangae ganasewa umap amba nop mega tapan baware ununkewa umap.

¹⁶ Naniwa nutup gapan buanae nani yamu dere tamen. Nonokap kereba yamu yamu wani warane ame tauen. Gine namu wam ianupe warini ananewa mini ganase wan.

¹⁷ Apan ameme yawana gapan ne namup seke tan bop mini geanegen. Amba me naniwa nutup aiganap bare anega wadianegen, “Tap ya anu. Ma ne wam ibariwa amba wam verisiwa apanewa.

¹⁸ Ne wanik iram apanewa. Wataget bonigasen go endi yawanek ne wainge angingain sia ya bonigatain. Waenapan borit wapi o ya borit wapi amunewa ne inanap wandia. Borit waine arewa ayopewa ne.

¹⁹ Endi ma yaviana amba dim da evi venasepi yawawa iravi ok se.

²⁰ Nanina nutup gapan buanae nani yamu dere taman amba dun kaime gwayayame den yananagaet nani yamu dere yawaana ame iwa muga gungunua endi wadiagain. Buanae nani yamu dere ameme ne dugup nega nagirewa nani yamu dere kwayupe taine anea mugawa. Dun kaime den nani yamu dere yonane ameme dugup nega nagirewa.”

2

Pa Epesas ok mugawa

¹ Iesu Dion sia wadien, “Ne dugup nega nagirewa pa Epesas gapan anea muga inap ok manega enu, Ma ne nanina nutup gapan buanae nani yamu dere tambuna apanewa. Ne dun kaime gwayayame yananagaet den nani yamu dere yau-makamup yonan angina apanewa. Mame nop negawa.

² E dim taiwaniana anuivin ame kaimakaet taiwanin amba itan tawa ae ya venegean. Ne anuivin e koewa anune taine nagirewa munan ya anuiwanin go tandayat mumiwanin. Apan upi muk anega wane, Nu Iesu watu enamot mega nagirewa. Anega wane go e wayawamoyan amba mu aopan wane anuyan.

³ E yaentuk mantuk yauna menan wat irayan amba ne ya venegean.

⁴ Ame e namu nenan baware anu guri-waniana ame kakae go endi umap uon iwa nenan baware ya anu guriwanin.

⁵ E sia anun, wataget nenan amunugaet anu taiwanian go endi nutu bigaren.

Guegue ame ae vean nenan namu tayawaniana mini sia taiwanian. E imuya entan sia ya tanewa ne onge dun kaime ega wasea ongain.

⁶ Guegue ega kakaewa da sia mam. E at Nikolaeta nagirewa guegue muga ne umanap anu koeam mumiana menan ne atonuya anuivin.

⁷ E da da darinaya den wandepi God Guewa Iesu dugup mega nagirewa inamup wapi anu awan. E da da koewa garao mumane nagirewa God egak mega nimakap inak omaewa wandiniwa tavewa mega napen menan enain.” Iesu ap anega wan.

Pa Simona ok mugawa

⁸ Iesu Dion sia wadien, “Ne dugup nega nagirewa pa Simona gapan anea muga inap ok manega enu, Ne wam ibariwa amba wam verisi apanewa bonigasen go sia inak nigasen, nop nega mame di.

⁹ Ne asiginap, e koewa tanayana amba den e kayakayawan taiwanin go ne yamanap e puraput nagirewa. Waenapan upi nipec diaen amba wawa koko inayap den taiwanumune ne anun. Go mu aopan anega wane, Nu den Diu nagirewa, go mu Seitan waenapan megawa.

¹⁰ Anun. Bagu sisi wamewa inayap konintu taeipi tap gop ya anune. Anu tumat ega ire yawapen menan Seitan e upi tambue gwat nokap seaeta. Wam aonagaet gapan koewa ame inayap wandeta. Ap wamewa gapan bop tanewa go anu tumat ega gapan ne ae ya venege newa garewa yaibobot payuewa oya oyae den enain.

¹¹ E da da darinaya den wandepi God Guewa Iesu dugup mega nagirewa inamup wapi anu awan. E da da koewa garao mumane nagirewa bop koni derewa vegewa ya anui.” Iesu ap anega wan.

Pa Pogamam ok mugawa

¹² Iesu Dion sia wadien, “Ne dugup nega nagirewa pa Pogamam gapan anea muga inap ok manega enu, kereba waniwa yamu yamu warina apanewa nop nega mame.

¹³ E iniana arewa ne asiginap, ame Seitan watat mega wandini arewa gapan di.

E anu tumat ega ne inanap ae ya vean, amba apan Antipas, nenan kakaewa tat waini apanewa, Seitan inini arewa, pa ega gapan tone boeni go e ae ya venegean.

¹⁴ Ame kakae go nop da inayap wadi-aepen taivin. Ame e upi watageta apane Belam nop mega anuyan taiwanin. Belam apan dawa yaua Belek nop wadieni gapan Belek ae at Isurero nagirewa pusimu warup yawapen tan. Me Isurero nagirewa nanam mumeni gapan mu guewa nanip kaitan taba mega napen tane, ame airampu tabaewa. Amba den me barip ame gapan mu waen ge apan uniunion wainan gogo ise ta ase ta tapen menan wadiamon.

¹⁵ Ap umap sia waenapan ega upi at Nikolaeta nagirewa noa wariwanum.

¹⁶ Koewa ega ae vean imuya entanep. Imuya ya entanenewa ne konintu inayap tauain kereba nega nonap taueni gapan mu inamup anan tain.

¹⁷ E da da darinaya den wandepi God Guewa Iesu dugup mega nagirewa inamup wapi anu awan. E da da koewa garao mumane nagirewa taba nega gun-gunua yaua mana enain. Amba agim pomponua yaua ewakewa gamup ok se e daiton daiton enain. Orup da agim ame warepi gapan yaua mega ewakewa ap gapan anuta, go upinewa me yaua ya anuin, megenat anuta.” Iesu ap anega wan.

Pa Tayataira ok mugawa

¹⁸ Iesu Dion sia anega wadien, “Ne dugup nega nagirewa pa Tayataira gapan anea muga inap ok manega enu, Ne God Otua yamana oma yagiriwandini mini amba pusina gwat bangae ganasewa umap. Nop nega mame.

¹⁹ E dim da taiwaniana ne asiginap. E anu gurat egawa, anu tumat ega, God menan nao tat ega, amba yaentuk mantuk waniet egawa, iravi ne anun. Namu kakae di taiana amba endi aigap sia taiwanin, ame kakae iragen.

²⁰ Ame umap di go mame umap uon. Ame waen koewa yaua Diesebero e den wandia go e ya wa oisean. Mek anega wai-wan, Ne God nop mega waina waenewa.

Go me waenapan nega nanam mumeni gapan mu guewa nanip kaitan taba mega nane, ame airampu tabaewa. Amba den waen ge apan uniunion wainan gogo ise ta ase ta tane.

²¹ Ne wataget waen ame anega wadian, ise ase taiana ae ve imuga entan ta, anega wana go me ae ya ven epa sia tat anuiwan.

²² Ap menan ne waen ame vek wanap eragi mega gagap barain ap mepe da da waen ame den wainan gogo tapi nagirewa wanene kaimakaet tamoin, mu bagu sisi baware munain. Ne ap da tat anuivin go mu koewa muga menan vetavet wa amba koewa muga ae vepiwa ap gapan ne wanene nega ya munain.

²³ Da da waen ame ewap amone, mu me otu waiwa di, mu den guramopen borit wain, ap gapan anu tumat nagirewa iravi yawanage asik tain, ame ne waenapan imu pose yawan anuina apanewa. E da da dim da kakaewa o koewa taiwaniana ap gapan gapan garewa enain.

²⁴ Go e upinewa pa Tayataira nagirewaen ame nop mega ya warayan menan Seitan koewa gungunua noa e ya asigip tayan. Menan mame di wadiaivin, itan bagu sisi da aigap sia ya enain.

²⁵ Go dim da kakaewa ega wat nat wanien, ne amatana tane, ne sia tauain.

²⁶ E da da koewa garao mumane amba nao nega taiwaniana ae ya veanewa amba wam verisiwa tauepi gapan amun enapena gapan e piup ayopewa tai.

²⁷ Unup todumine semuroro taini mini e piup nagirewa kepata ega waran kaimakaet namumup yoniwaniai.

²⁸ Mamana amun neneni ap umap amunewa enain. Wam ame gapan buanae orewa den enain.

²⁹ E da da darinaya den wandepi God Guewa Iesu dugup mega nagirewa inamup wapi anu awan.” Iesu ap anega wan.

3

Pa Sadis ok mugawa

¹ Iesu Dion sia wadien, “Ne dugup nega nagirewa pa Sadis gapan anea muga inap ok manega enu, Ne God guewa mega nani

yamu dere den buanae nani yamu dere tambuna apanewa.

E dim dim taiwaniana ne asiginap. Waenapan anega wane, E kabani, go ne anuivin e bonigawa di!

² Ap menan kanda itan ao yon wanien. Aro otu ega wandini go uon tapen taiwan menan wat nagasen. Iwa e dim da God menan taianawa ame God yamap om ya inen.

³ Wataget God nop mega anu warayan menan endi aigap sia anu awan. Ap anu kakayasene gapan koewa ega ae vean imuya entanen. E ya kandae itanewa ne wam da up apane mini e inayap karaua tauain. Ne tauapena wamewa e oare.

⁴ Go pa Sadis nagirewa, e otu agiap da wanup ega bigip da uon, potayap koewa da ya tan menan wanup pomponugaet wat enain, iwa e inak ega God yamap om ineni menan ne den tanai ap angingain.

⁵ E da da koewa garao mumane nagirewa wanup pomponua ap umap ai enain amba yaumu inak bukaewa gapan seni ne ya di wat mutain. Mamana yamap, anea mega den yonana e ne waenapan negawa aroga wadiamoin.

⁶ E da da darinaya den wandepi God Guewa Iesu dugup mega nagirewa inamup wapi anu awan.” Iesu ap anega wan.

Pa Piladelopia ok mugawa

⁷ Iesu Dion sia wadien, “Ne dugup nega nagirewa pa Piladelopia gapan anea muga inap ok manega enu, Imuna potana woup sen nop tavewa waina apanewa. Watageta apan Devit amun mega waran ame tonan tumtumeawa mini. Ne tonan ame watapapena apan da ya toboreta. Ne tonan toborapena apan da ya watapeta. Nop nega mame.

⁸ E dim dim taiwaniana ne asiginap. Anun. Tonan enan watapan wandia wae-napan da ya tobomain. Ne anuivin e aro baware uon go nop nega di wariwanin ae ya venegean.

⁹ Anun. Waenapan upi aopan anega wane, ‘Nu Diu nagirewa,’ go mu Seitan ewap amuine nagirewa. Ne wapena mu inayap tauem namuyap omanimup enuin. Amba ne enan anu gurina mu di anuin.

¹⁰ Ne wadiaena ae ya venegean go aro ta waniwanianawa menan gare ne waenapan piup at at iravi tayawamopen wamewa tauapei gapan kwayup enan tain.

¹¹ Ne konintu tauain. Nenan anuyan taiana uap sia di taiwanian waenapan garewa ega up tapi tawa.

¹² E da da koewa garao mumiana nagirewa ne wapena God nega paewa potap sewa yaumakapewa umap waniai sia ya tau aitai. Ne God nega yaua gamuyap ok seain den God nega pa mega yaua gamuyap ok seain. Pa ame yaua Ierusalem ewakewa God nega kiman gapan viseta. Ne yauna ewakewa den gamuyap ok seain.

¹³ E da da darinaya den wandepi God Guewa Iesu dugup mega nagirewa inamup wapi anu awan.” Iesu ap anega wan.

Pa Leodasia ok mugawa

¹⁴ Iesu Dion sia wadien, “Ne dugup nega nagirewa pa Leodasia gapan anea muga inap ok manega enu, Ne yauna Umap waini apanewa, God nop mega tamana waina ae ya vivin. Me wan dim dim iravi venat mutane ibariwa ne. Nop nega mame.

¹⁵ E dim taiwaniana ne asiginap. E imuya ne inanap amun uon amba irot uon yaumakap waniaisi. Go nenan kaimakaet tapo o tandayat nimanegepo ap mini da anuivin.

¹⁶ Go e yaumakap wanisiana menan e kaum sisi dena mini arupun imaipen tau aitai.

¹⁷ Iwa ek anega waiwanin, Nu dim da men ya anuivin, nu umap di, nu puraput nagire umap. Anega waiwanin go e dai momeni nagirewa, kayakayawan taiwanin nia aroga amba yamaya boraseni menan waenapan yawaene gapan enan bagu sisi baware anuiwanum.

¹⁸ Ap menan wadiaepena anun tan. Gwat gwayayame ganase dena oma meravewa gapan bigip gurinewa garewa baware iragen ame inanap une tan amba puraput dena nagire umap waniai. Nia aroga waenapan yawaepi umam anune tawa menan wanup pomponua den une

tan enan. Muramura osewa yamaya sean yamaya kakae tapi yangut tai.

¹⁹ Waenapan munan anu gurina nagirewa ame ne yam ta yawamon wan wat tamanam mumivin. Ap menan nop nega di anu waran koewa ega ae vean.

²⁰ Anun, ne tonana yonan ken ken toivin. Waenapan da da nop nega anun tonan watapane ne gwanap inamup tauain amba taba nu tobob daiton tat nait.

²¹ E da da koewa garao mumane nagirewa, ne wapena gapan watat nega gagap mainenap ae waniai iwa ne den koewa garao mumana menan Mamana ayop watat mega gagap mainap ae wanik angin.

²² E da da darinaya den wandepi God Guewa Iesu dugup mega nagirewa inamup wapi anu awan.” Iesu ap anega wan.

4

Kimani God wa taragasene gueguewa

¹ Amba ne Dion, bet ine da sia yawana ame kiman tonanewa watapen. Nop namu inanap taueni pum ununkewa umap anega anun, “Ge ae ma kiman onak dim dim evi tauepi ewagain.”

² Nop ame uon tani boge, God Guewa imuna waren amba watat da kiman gapan warden yawan. Watat ame gagap orup da wardeni den yawan.

³ Orup ame agim keri mini ganase wan. Watat aigap airampu nesiwa ame agim bangae koa mini ikukuk eniwandin.

⁴ Watat yaumakap warden amba watat upi apane daiton apan da naniwa degede (24) ikukuk enpanane wanumune. Watat ame daiton daiton gapan kwayup taine nagire apane daiton apan da naniwa degede (24) ae wanumon. Wanup pomponu enan ayop payu gwayayame yananagaet den iamup tonanatan.

⁵ Watat yaumakape gapan yangwan kapisi waren nop ugup ugup kiman waini noa den anun. Watat namup dun kaime den nani yamu dere igit wanumun, dun ameme God Guewa mega nani yamu dere.

⁶ Watat namup use kaum awan gio umap nini yayak waren gwanap ase ma yavivin.

Watat tainamua bayabayapa gapan kasiga mena manao taini da bayabayapa wanumon. Yamamua garip gwanap bararaen.

⁷ Kasigawa dawa namu yawana man laion umap yawan. Kasigawa derewa da sia yawana man kao otua umap yawan. Kasigawa yampa da sia apan umap yawan. Kasigawa degedeawa da sia tukao umap yawan.

⁸ Kasigawa mena manao taini da bayabayapa magumu daiton daiton ameme nani yamu daiton. Yamamua garip gwanap potap iravi bararaen. Mum wam pot pot wak anega waiwanumun, Ayop nuga God, aro megawa aigap iragen, posewa woup sen woup sen woup am seniwa.

Wataget iragen endi den wandiniwa, amba evi tauepi Ayopewa.

⁹ Kasiga mena manao taini da bayabayapa wam da da watat aigap yaibobot wandiniwa inap wak gapan yaua ao waran bawarewa diane gaun wainewa.

¹⁰ Waenapan kwayup taine nagirewa apane daiton apan da naniwa degede (24) watat aigap yaibobot wandiniwa namup nikapu enu wa taragase. Ayop payu muga muga totnagen watat namup ae sean anega wane,

¹¹ Ayop nuga God, Ge kakae iragen menan yauga ao warivin, bawarewa nuga diagivin aro amun oya oya den waringan.

Ge anu waan dim dim iragi venat nitaton inak warivin.

Ap anega wan.

5

Ok viri viri wa panameniwa

¹ Watat aigap wandiniwa naniwa nutup gapan ok da sean viri viri warane ame ware warden, ame ne bet inan yawan. Ok ame yamu yamu sen inamat nani yamu dere batamen.

² Anea amunu dena da yawana amba me nop uma singui anega wan, “Apan kakaewa ansena da inamat nani yamu dere wagegetaveta ok viri viri warane wat veseta?”

³ Go kiman gapan amba piup aigap den yop tan, ok viri viri warane ame wat vese batnage yavepi apante da ya yaven.

⁴ Apan kakae iragena da ok viri viri warane ame wat vese batnage yavepi apante da ya yaveni menan ne irip baware wan.

⁵ Irip waingina waenapan kwayup taine apante da inanap anega wan, "Irip ae ve. Yao. Watageta apante Devit naewa dugup yaua Diuda ayop apanewa da koewa iravi garao mumen. Me ok viri viri warane inamat nani yamu dere wagegetavepen menan me di wat veseta," ap anega wan.

Man sip otua noa

⁶ Amba God man sip mega otua Iesu, kasiga mena manao taini da bayabayapa yaumakap watat mega gapan yonen amba waenapan kwayup taine nagirewa enpanane ne yawan. Man sip otua ameme waenapan tone boeni guine wandia. I donewa nani yamu dere amba nani yamu dere yamewa ne den yawan. Yamewa ameme God guewa mega nani yamu dere watu enamon piup at at iragi amone.

⁷ Man sip otua ae ok viri viri warane ame watat gagap wandiniwa apanewa naniwa nutup gapan wareni ame waseasen.

⁸ Waseaseni kasigawa mena manao taini da bayabayapa amba waenapan kwayup taine nagire apante daiton apan naniwa degede (24) man sip otua namup nikapu enun. Mu daiton daiton, sinao pepetawa mini nanip tambun sip gwayayame yananagaet den nanip tambun. Sip gwanap iu irane daginewa ame God waenapan megawa God inap mup muga wainewa.

⁹ Mu wak ewakewa Iesu inap anega wan,
Ge kakae iragen, menan ok viri viri warane,
inamat batamene di wagegetao.

Iwa waenapan togene bogitaana denip
gega viseni menan,
God at piup waenapan, dugup ge nop ge at
ugu ugupe nagirewa den,
koewa muga garewa wat musen.

¹⁰ Waenapan ameme God pirisi mega na-
girewa diamoan menan,

mu God navewa taine waenapan kwayup taiwanumune,
amba piup ayop tata aroewa munaan.
Mu piup gapan ayop tain.
Wak ap anega waiwanumun.

¹¹ Amba ne Dion yangut sia tana watat yaumakap kasiga mena manao taini da bayabayapa waenapan kwayup taine na-
gire den anea aru arugataet da miniwa batnak mumeta ikukuk enpanamon.

¹² Mu wak uma anega waiwanumun,
Man sip otua waenapan tone boeni me kakae iragen.

Aro amun anut puraput iravi wariwan-
dalen.

Namup yonat viriwa tainampen, yaua ao
warinampen,
amba wa atonasinampen.
Anea ap anega wan.

¹³ Waenapan iravi, man tap amba dim
dim iragi piupawa kimaniwa piup gauara-
pewa, puimaniwa den iravi wak anega
wane ne anun,
Watat gagap wandiniwa man sip otua den.
Wam wam pot pot namup yonat viriwa
tainampen,
yaua ao warinampen amba aro amun
wariwanumampen,
usenagaet wande aiwadata.

¹⁴ Iragi ap wane kasiga mena manao taini
da bayabayapa gare anega wan, "Ame
umap." Wane boge waenapan kwayup
taine nagirewa nikapu enun wa tar-
gasen.

6

Inamat ok batameni noa

¹ Amba man sip otua ok viri viri warane
nanip wareni inamat nani yamu dere
batameni inamat namua wagetaveni, ne
yawan. Wagetaveni kasiga mena manao
taini da bayabayapa da nop kiman waini
umap wan ne anun. Me anega wan,
"Onak."

² Ne yangut tana apan da man osi pom-
ponu da gagap tauen daka nanip waren.
Ayop payue orup da me wanen. Amba
piup yon borini apanewa ame piup yon
borapen menan osi gagap tau aen.

³ Man sip otua inamat derewa wagetaven. Wagetaveni dim kasiga derewa da sia anega wani ne anun, "Onak."

⁴ Wani apan da man osi dendeni da gagap tauen. Osi gagap wandeni apane ame piup baigan mega wat mutapen amba waenapan gare gare gugut mutapen menan aroewa waren. Amba kereba baware iragen da wanen.

⁵ Man sip otua inamat yampoa wagetaveni dim kasigawa yampoa da sia anega wani ne anun, "Onak." Wani apan da osi pumpuni da gagap tauen yawan itan mega paua yaviniwa nanip waren.

⁶ Kasiga mena manao taini da bayabayapa nimakamup nop da tauen ne anega anun, "Ma enup taba mega kakaewa yaua uit, unup sera daiton ame wam daitona garewa megawa. Taba otu koerage yaua Bali unup sera yampo ame gapan wam daitona garewa mega om ineta. Go oma olip ge oma wain da ya ta koeragamene puakaepi tawa." Ap anega wan.

⁷ Man sip otua inamat degedeawa wagetaveni dim kasiga degedeawa da sia nop wani ne anun, "Onak."

⁸ Wani ne yangut tana apan da yaua Bop Apanewa man osi da tutup mega atagin umap gagap tauen. Apan dawa evip yoneni yaua Bop Arewa Apanewa. God piup semu degede waenapan guramopen menan munen. Osi gagap wanumene nagire aro ap warane ame ita anan, enup, vek ato, man puawa aramopi gapan wae-napan guramoin.

⁹ Man sip otua inamat nani yamu-naet wagetaveni waenapan guewa watat gauarap wanumone yawamon. Ian ame wataget piupa God nop mega Iesu oisewa den pot pot waiwanumune menan upi guramon borit wan.

¹⁰ Bop nagirewa ame singui kaimakaet wan, "Ayop nuga iragenawa potaga woup sen tamana wan taiana apanewa. Ge wam animpo mondi wanigai amba piupa wanumuine nagirewa guranene borit wato ni garewa wanene ta munai?"

¹¹ Bop nagirewa ame wanup pomponu nononga daiton daiton mune anega wadiamon, "Wagat otu da sia wanien. Piup

nagirewa guraene borit wayana ap umap God wat ago mega nagire upi mu e den dugup ega daitonawa iravi guramopi borit waine omewa taue umap tapi gapan God koewa nagire ame wanene tamota."

¹² Man sip otua inamat nani yamu daiton wagetaveni ne yangut ta piup menao manao baware tan. Wam wanup pumpuniwa mini pumpuni tan, siragam yame denip mini dendeni tan.

¹³ Baip boa taik bawarewa tauen waren enini umap buanae uruga kimani piupa geamon.

¹⁴ Ok viri viri warane mini kiman wa paname oagaen. Tunup iragi puiman topaneniwa den menao manao tan at da ugup amon.

¹⁵ Wam ame gapan piup ayopewa bawarewa ugup ugup amba ita nagire namu yoyo mugawa, puraput nagirewa, aro nagirewa, wat ago nagirewa, muk anune taine nagirewa iragi dagupa amba gwat benop tunupa karaua wanumon.

¹⁶ Mu anega tunup ge gwat uma anega diamo, "Seran wat umanen. God watat gagap wandiniwa gine namu ya yawat anuivin. Man sip otua ugu gangan mega den ya warat anuivin menan seran karaua umanen.

¹⁷ Iwa Mamewa Otua dere ugu gangan muga wamewa tauen. Da ao yone watanamota? Uon megenat."

7

At Isurero nagirewa 144,000

¹ Amba sia ne bet ine inana manega yawan, anea degede piup ginewa gapan ise use ase ma yonane. Piup, puiman gapan amba oma ugup ugup berip den taik da ya tau aepen men wataniwanum.

² Anea dawa God wandiniwa yatup mega paua ame ware wam dotouini arewa gapan ma oniwandin, ne yawan. Amba anea degedeawa, mu God amun muneni gapan piup puiman wa koeragam mumapen amone, amba anea dawa mu inamup uma

³ anega wan, "God nao mega taine nagire yatup mega paua namu bonap batam mumait amba piup ge puiman amba oma den ta koeragam mumai," ap anega wan.

⁴ Yatup paua batam mumane nagirewa arugataet 144,000 paua muga wadiane-gene ne anun. Mu at Isurero nagirewa dugup aonagaet nani yamu dere daiton daiton gapan yatup paua batam mumane.

⁵ Dugup yaua Diuda gapan paua batamene nagirewa arugataet 12,000.

Dugup yaua Ruben gapan paua batamene nagirewa arugataet 12,000.

Dugup yaua Gat gapan paua batamene nagirewa arugataet 12,000.

⁶ Dugup yaua Asa gapan paua batamene nagirewa arugataet 12,000.

Dugup yaua Naptali gapan paua batamene nagirewa arugataet 12,000.

Dugup yaua Manasa gapan paua batamene nagirewa arugataet 12,000.

⁷ Dugup yaua Simion gapan paua batamene nagirewa arugataet 12,000.

Dugup yaua Livai gapan paua batamene nagirewa arugataet 12,000.

Dugup yaua Isaka gapan paua batamene nagirewa arugataet 12,000.

⁸ Dugup yaua Sebulon gapan paua batamene nagirewa arugataet 12,000.

Dugup yaua Diosep gapan paua batamene nagirewa arugataet 12,000.

Dugup yaua Bendiman gapan paua batamene nagirewa arugataet 12,000.

God yatup mega paua ap anega batam mumane.

God waenapan mega aruga arugataet

⁹ Amba waenapan aruga arugataet da miniwa batnak mumeta bet ine inana gapan ne yawamon. Mu dugup ge nop ge at ugu ugupe nagirewa God watat mega man sip otua dere namumup yonan. Wanup nononga pomponu enan amba kitat baewa nanip tamon, God inap gaun wapen menan.

¹⁰ Nop uma anega wane, "God nugawa watat gagap wandiniwa man sip otua dere inak ewakewa nuninewa," ap anega wan.

¹¹ God watat megawa amba ona kasiga mena manao taini da bayabayapa amba

kwayup taine nagirewa yaumakap wanumune amba anea uruga ikukuk iragi enpanamon. Amba watat ame namup mu iravi nikapu enun God wa taragases.

¹² Mu wane,

Ame umap!

Wam wam pot pot wa taragat, oya oya, nop dima, gaun nuga, ayamat, aro amun ame iragi God wariwandan.

Ame umap!

¹³ Kwayup taine apene da singui anega wayawanegen, "Waenapan wanup nononga pomponu enane mu ian ambe at ansena nagirewa?"

¹⁴ Ne gare wan, "Ayop negawa, ne oare. Ge asigigap di menan ge wa." Me sia anega wan, "Itan bagu sisi piup taueni wamewa gapan mu wanumone. Koewa muga wanup pomponu mini man sip otua deniwa gapan bigi waran endi mame pomponu tan.

¹⁵ Ap menan mu endi God watat mega namup wanum amun. God Paewa gwanap mum wam pot pot wat agoat wanum. Watat gagap wandiniwa apanewa mu tantan muga taini apanewa.

¹⁶ Menan enup da sia ya aramota amba megamu da sia ya pakaraeta, amba wam ananewa da sia ya aramota gaup amun da ya doramota.

¹⁷ Iwa man sip otua watat yaumakap yonini sip kwayup taini mini mu kwayup tamota. Menan me naumo kaum urewa tanam amo napi gapan yaibobot wanumoin. God yamamu dogewa uruga wat museta."

8

Inamat wabatameni nani yamu derewa noa

¹ Man sip otua ok viri viri warane inamat mega nani yamu derewa wagetaveni kiman nagire iravi wam otu da no uon wanumon.

² Wam otu da ame uon tani anea nani yamu dere God namup yonine ne yawan. Apan da pum yan se mu daiton daiton munen.

³ Anea dawa taue watat namup yonen dagin iu irine sipewa gwayayame den yananagaet nanip wariwandin. Apan da

dagin iu irine kaimewa aruga wanen. Waenapan mup muga God inap dagin ame gapan biro baro tan toboren. Dagin ame yan mini God watat mega namup, watat dawa gwayayame den yananagaeta gapan ire God wanen.

⁴ Anea ame God namup yonen nanip sip ware dagin amba waenapan mup muga God inap wainewa ame dere dere den doren.

⁵ Dagin dorin uon tani anea sip ware watat dawa oma yame to sip gwanap ae enen no dotoueni gapan piupa aipa uaren. Aipa uareni yangwan waren kimani ununke baware wan amba piup menao manao tan.

Pum upunane noa

⁶ Amba anea nani yamu dere pum daiton daiton ebune upunepen tan.

⁷ Anea namua pum mega upunen ugin aniat kaimakaet gvat umap meraove denipe den vitan pipa geamon. Piup iragi paua yampo semu daiton nugusene yagit wan. Oma iravi paua yampo semu daiton nugusen yagit wan. Gaian kabaniwa ya giritamen.

⁸ Anea derewa pum mega upunen dim tunup baware da mini yagiriwandini puiman gearen. Geareni puiman iravi paua yampo semu daiton nugusene denip entanen.

⁹ Puiman manewa iragi paua yampo semu daiton nugusen borit wan. Puiman wanagiewa iravi paua yampo semu daiton nugusen wat momak mumen.

¹⁰ Anea yampa pum mega upunen buanae baware da dun ganase mini igit wandin kimani gearen. Kaum tavewa iragi paua yampo semu daiton nugusene buanae gagap gearen. Kaum urewa iravi paua yampo semu daiton nugusene buanae gagap gearen.

¹¹ Buanae ame yaua Sisiwa. Kaum iragi paua yampo semu daiton nugusene sisiwa entanen menan waenapan da da kaum ame nane borit wan iwa kaum ame sisi wan.

¹² Anea degedeawa pum mega upunen wam ge siragam buanae ganat muga muga iravi paua yampo semu daiton nugusene ame pumpuni tan, menan ganat

muga wat otutamen. Ap menan mum ge wam ganat muga pot poraet paua yampo semu daiton nugusene wamewa gapan ganasewa ya wan.

¹³ Amba ne bet inana gapan yawana, nenip tukao kiman yaumakap tau aiwandi ninop baware wani ne anun, "Kaiwan, kaiwan, kaiwan, piup nagirewa munan bagu sisi arita anuivin iwa anea uiwa yampo pum muga muga upunepen taiwanum, koewa bawarewa tauapen taiwan!"

9

Paki taba baewa naitamen

¹ Anea nani yamunaetawa pum mega upunen guewa da buanae mini kimani pia gearen. Apan da urat nononga diriwa uon tonan mega tumtumewa wanen.

² Buanae ame tumtum gapan urat diriwa uoni ame tonanewa watapen boge dagin pumpuni tayagon irine umap urata doren amba wam ganasewa gwoup den enun pumpuni tan.

³ Datin potap paki aruga tau amon pipa wanumon. Paki aro muga kaposi sio aroe muga umap apan da munen.

⁴ Me paki anega wadiamon, "Ut gaian naewa ugup ugup pia yananewa oma den ya na kokoeam mumane. Da da God yatup mega paua namu bonap ya batamene nagirewa mugenat enu kokoeragam mu man," ap anega wan.

⁵ Menan evi amba paki amo in siragam nani yamunaet gwanap waenapan na guguramoin go waenapan ya borit wain. Na guguramopi vegewa kaposi sio inewa enumuine vegewa umap anuin.

⁶ Wam ame gapan waenapan ame borit wat anuine go bop ya tain. Bop mu garao mume tau aen.

⁷ Ne bet ine inan gapan yawana paki ame man osi anan tapen taine mini di yawan. Paki ayop payu gwayayame yananagaet den daiton daiton tonanatan amba gine namu apan mini yawan.

⁸ I gumewa waen i gume nonongewa mini amba no done man puawa laion no done umap yawan.

⁹ Toganemup yarewa gware dena agim pepeta panane mini yawan. Magumu

poe poe tane ununkewa baware osi pimai muga warupene ita anan amuine ununkewa mini anuna.

¹⁰ Verimua den kaposi sio inewa umap enuepi vege anui. Verimu gapan wae-napan da enupiwa, vegewa ame siragam nani yamunaet anuiwadata amba uon tata.

¹¹ Paki ayop mugawa anea koerage da urat nononga ni diriwa uoni kwayup taini apanewa. Anea koerage ame yaua dere. Iburu nop muga gapan waine Abadon. Gurik nop muga gapan waine Apolion. Apolion guegue wat momagini apanewa.

¹² Kaiwan bagu sisi wamewa namua uon tan go dere piup nagire inamup tauapen taiwanum.

Man osi anan taine noa

¹³ Amba anea nani yamu daitonawa pum mega upunen. Watat gwayayame yananagaet den God namup wandeni ginewa degede gapan nop da tauen.

¹⁴ Nop ame anea nani yamu daitonawa pum nanip wareni inap anega tauen, "Anea koerage degede kaum baware yaua Yuperetis gapan tau natamon wanumone vetamon!"

¹⁵ Anea kakaeua ae anea koerage degede ap mepe tau natamon wanumone vetamon. En mame, siragam mame amba wam koni mame menan anea koeragewa amat taiwanumun, vetamoni gapan mu waenapan iravi paua yampo semu daiton nugusen guramopen menan tau amone.

¹⁶ Ita anan man osi gagap amone nagirewa batnak mumane ne anun aruga mek arugataet (200,000,000) anun.

¹⁷ Apan upi man osi gagap ameme bet ine inana gapan manega yawamon. Toganemu tantanewa panane tutup muga dendeni, pumpuni amba yananagaet. Man hosi iamu man laion iwa umap. Osi nomup merao dagin pumpuni yananagaet birot wa aninke den tau aen.

¹⁸ Merao dagin pumpuni yananagaet nomup tau aeni gamup waenapan iragi paua yampo semu daiton nugusen borit wan.

¹⁹ Man osi anan muga ame nomup ge verimu gapan. Verimua mokare umap iwa den, mokare ame iwa gapan waenapan aguguramon.

²⁰ Waenapan upi koewa ugup ugup mame gapan ya borit wan wanumone nagirewa nanimup dim dim da tane anu tumap wanumon go God tumap ya wanumon. Airampu sia wa taragat mumiwanumun. Gwat kakae gwayayame yananagaet pomponu dendeni den amba oma den ap gapan airampu guewa nanimup kaitan inap wa taragat mumiwanumun. Go guewa ameme yangut uon anu awat uon ap uon go mu wa taragat mumiwanumun.

²¹ Waenapan upi nanimup guramo borit wan. Banao nuat up den taiwanumun. Waen ge apan wainan gogo ta up den taiwanumun. Iragi ae ya veat anun di taiwanumun.

10

Anea nop oit wan

¹ Amba anea dawa aro baware de-nawa kimani visiwandini bet inana gapan yawan. Irikup da wanup umap ikukuk panen koa iap tau aen. Gine namu wam ganasewa umap. Pusiwa airaniwa nononga dere merao umap.

² Ok otu da viri viri warane wat vese na-nip waren. Pusiwa nutup puimani amun pusiwa senip piupa amun.

³ Man puawa laion gururut waini umap ve baware wan. Wani gare kimani nop nani yamu dere tauan.

⁴ Nop ame tauane ne ok seapen tana go kiman gapan nop da sia anega tau e watananegen, "Kimani nop nani yamu dere tauane ok ya se karaua wandep."

⁵ Anea puimani piupa amuni apanewa ne yawan naniwa nutup nop wapen men kimani ao waren.

⁶ God wan kiman gwanape den venat mutan sia wan piup gwanape den venat mutan sia wan puiman gwanape den venat mutan. God yaibobot wandini apanewa ameme amun mega gapan anea kaimakaet agi anega wan, "Wam usira entutnagene ame uon tan."

⁷ Anea nani yamu derewa pum mega upunepi God nop mega tavewa di taueta. God nop mega ame gungunua wandeni ame God me ago mega nagirewa ame watageta oit mega waiwanumune nagirewa, ame wadiamoni."

⁸ Nop kiman gapan namu inanap taueni sia tauen, anega wan, “Ge ak anea puimani piupa amuni apanewa ok wat vese nanip wareni waseat.”

⁹ Wani angena ok otu koentu viri viri warane ameme nenapen mup wan. Anea anega wadianegen, “Ok wat na. Nawa nogap danse den onaro mini anu go bagugap visepi gapan sisi den anui.”

¹⁰ Wani ne ok nanip waran nan. Nonap na yawana danse den iwat mini go na kauamena baguna gapan sisi wan.

¹¹ Nana amba orup da wadianegen, “God nop oit mega at at, dugup dugup amba nop ugup ugupe nagirewa, ayop muga den aigap sia wadiamoi.”

11

Siwa naun wane apane dere

¹ Amba bet inana mini sia yawana God om kaipat umap nene anega wan, “Ao yon ak pa sewa Ierusalem gapan, God Paewa gapan watat mega dere om wat. Waenapan animpo pa gwanap God wa taragasine den batnak.

² Pa augewa arok ame om ya wara iwa at ameme God ya anu tumasine nagirewa mugawa. Mu en yampo degede yaumakap menan God pa mega baware Ierusalem anu koeragamain.

³ Wam ame gapan siwa naun oise wane apan nega dere amun enain amba nop nega waenapan sia wadidiamopen menan watu enamoin. Magun wat wanumoin,” God ap anega wadianegen.

⁴ God siwa naun wane apan dere ameme paua karopae dere amba dun kaime dena dere piup iravi ayopewa namup yoniwanum.

⁵ Waenapan da da apan dere ameme gut koeragam mumat anune apan dere merao nomup tau aen anavi muga yagimon. Guramot anune nagirewa merao ap gapan borit wain.

⁶ Apan dere aro muga inamup den, mu God nop mega waine wamewa gapan ugin da ya wapen menan mu wapi gapan kiman toboreta ugin da ya taueta. Sia wapi kaum urewa denip eneta. Sia wapi koewa ugup ugup piup gapan taueta. Muk

anune gapan wapi itan bagu sisi ameme tauwanumain.

⁷ God nop mega wane wamewa uon tani guewa koewa man puawa umap urat nononga diriwa uoni ao no kaimap dotouen amba anan inamup tan garao mumen borit wan.

⁸ Apan dere borit wane wapimu pa pa negin etop wanumon. Pa sewa ap me gapan Ayop muga korosi gapan boen. Maibe gapan pa sewa ame yaua Idip ge Sodom diene, iwa waenapan koeragewa ap mepe wanumone.

⁹ Wam yampo degede yaumakap gapan wapimu wanumoin amba dugup, nop, at ugup ugupe nagirewa yawiwanumain go piup gapan tupen menan tanda wain.

¹⁰ Piup nagirewa apan dere ame borit wane menan aton anun amba sinoa tarep tan, mu yan aiman gare gare tane. Piup nagire aton mugawa iwa apan dere mu wam mugawa uon di tan, mu God nop mega diamo waenapan koewa muga batnagene amba itan den munane menan.

¹¹ Go wam yampo degede yaumakap uon tani God inak gaupewa potamup tauen menan mu sia inak mutan yon wanumoin. Yon wanumoine gapan waenapan da da mu yawamone kaimamu pagagak tain.

¹² Wam ame gapan nop baware da kiman gapan apan dere inamup tauen, “Ae ma dot onaen.” Wapi boge anavi mugawa ao yangut tane gapan apane dere ame irikup potap kiman dot amon.

¹³ Dot amone gapan piup menao manao baware tan. Pa sewa ame iragi paua aonagaet semu daiton nugusen beuren. Beureni gapan waenapan aruga 7000 borit wan. Ya borit wane nagire kaimamu pagagak tan God kiman gapan wandiniwa yaua ao waran.

¹⁴ Kaiwan bagu sisi wame koni derewa ameme uon tan go koni yampa wamewa tauapen taiwan.

Pum nani yamu derewa upunen

¹⁵ Amba anea nani yamu derewa pum mega upuneni nop arugataet kiman gapan anega tauwanumun, “Endi mame piup yon borapen aroewa iravi Ayop nuga

God amba me Keriso megawa, me ayop ta piup kwayup yaibobot taiwandan.”

¹⁶ Ap gapan kwayup taine apane daiton apan da naniwa degede (24) nagirewa, watat muga gagap God mainep wanumuine, yonan God namup nikapu enun wa taragases.

¹⁷ Anega waiwanumun,
Ayop nuga God aro amun iragena
apanewa.
Ge watawa endiwa waingiana.
Amun gega baware waraan piup na-
mumup,
ere endi yoningiana menan,
gaun baware inagap.

¹⁸ Tandayat gimate nagirewa ugu gan-
gan mutain,
iwa ugu gangan gega wamewa inamup
tauen.
Borit wane nagirewa wanene tamopen
taangi.
Ago tagen nop gega waiwanumune na-
gire,
amba waenapan gegawa den taga anune
nagire,
yaumu baware ontotu uruga,
garewa muga kakaewa munapen
wamewa tauen.
Piup wat momagene nagirewa,
garewa wat momak mumawa wamewa
tauen.
Ap anega wan.

¹⁹ Wam ame gapan God pa mega ki-
man gapan watapen amba maua da agi
nunan wani ne yawan. Yawatoni yang-
wan waren kiman wan ununke ugup ugup
anuton piup menao manao tan ugin aniat
gwat umap itani den visen.

12

Waen ge uayo nop mugawa

¹ Amba kiman gapan paua baware bet
ine inana gapan yawan. Waen da wam
ganase den wanup mini taun, siragam
gagap yonen amba ayop payu mega ame
gapan buanae aonagaet pusinawan dere
wanumune iap tonasen.

² Waen bagu den orup yanapen tai-
wandin vegewa baware anuni menan ve
wan.

³ Kiman gapan paua da ugup tauen.
Uayo baware dendeni da i nise nise

nani yamu dere amba ayop payu mega
otu koentu i nise nise daiton daiton to-
nanatan. I done aonagaet yanan.

⁴ Veriwa patnagen buanae iragi paua
yampo semu daiton nugusen pipa gea-
mon. Waen orup yanapen taiwandin
baraepi napen menan uayo taue waen
namup amase yonen.

⁵ Waen orup apan baraen orup ame
kai warepi waenapan iravi kepata mega
warep kaimakaet namumup yoneta. Orup
ewake baraen apan da wasease God watat
mega kimaniwa inap nau aen.

⁶ Wat nau aeni gapan inewa tap pua
aen God waen at mega watu enen, waen
ap mepe wanden, en yampo degede yau-
makap gapan kwayup taiwandin.

Anea yaua Maikero

⁷ Amba kiman gwanap ita anan baware
venasen. Anea Maikero anea evene wai
den arik yamu yonan uayo anea mega
koeragewa den tanamo yamu yonan.

⁸ Anan waran anea kakaewa koewa
garao mumana. Uayo anea mega den ki-
man gapan sia wanum wanum umap uon.

⁹ Anea kakaewa uayo bawarewa waran
aipa uaren. Uayo me watagetmek wataget
amba mokarewa yaua dere Seitan ge
Deboro dian piup nagire iragi aopan
wababayan muminiwa. Anea kakaewa
ame, Seitan anea koeragewa mega den
tambun pipa aipa uasen.

¹⁰ Amba kiman nop da uma anega
tauen anun, “Endi God waenapan inak
ewakewa muniwan amun mega waren
namumup yoniwan. Wa watu eneni mega
Keriso amun mega den wariwan. Iwa anu
tumasine nagirewa wa koeam munini,
apan koeragewa, Seitan ame, aoma pipa
uaren.

¹¹ Keriso dugup mega nagire man sip
otua denip ge oit kakaewa mega gapan
Seitan garawasen. Inak muga menan ya
anun go Iesu menan borit wane.

¹² Ap menan kiman gapan wainiana
nagire aton tan! Go kaiwan, piupa ge
puimani wainiana nagirewa iwa Seitan
ugu gangan mega bawarewa inayap visen.
Me asigip tan ame wam mega uon tapen
taiwan.”

¹³ Uayo, ame Seitan di, kimani aoma viseni gapan waen orup apan baraeni warup oit nau iwandin.

¹⁴ Iwandini go God tukao bawarewa magua dere waen wanen. Uayo waen ame ya togurapen menan bup wa paina ae pua gearen. Ap mepe God en yampo degede yaumakapewa gapan kwayup tan.

¹⁵ Uayo ap yaveni menan no nokap kaum ningoe tau aen waen wat nau aep boopen menan.

¹⁶ Ningoe tau aen go piup waen wat agoasen. Uayo no nokap kaum ningoe tau aeni piup ninoke awasen kaum ap mepe geat aen.

¹⁷ Uayo waen inap ugu gangan naen menan ewagai aen waen naewa mega upinewa ameme God ayamase taine amba den Iesu oit mega wat kakayasene nagirewa inamup anan tan.

¹⁸ Amba uayo ame puiman etop gerata yone amat tan.

13

Guewa koeragewa dere man puawa umap

¹ Amba man kwarayo mini puiman gwanap taueni bet inana gapan yawan. Kwarayo ame i nise nise nani yamu dere amba God yaua wawa koko tane ogeda da, iap daiton daiton gapan ok sen. I donewa aonagaet i donap daiton daiton ayop payuewa otu koe tonanatan.

² Kwarayo ameme yawana anan manewa lepat umap, pusiwa anan manewa bea umap, noa anan manewa laion umap. Uayo yone aro amun mega baware ugup ugup kwarayo wanen.

³ Kwarayo i nise daiton da tositnagen me boet anun go sia inakaen ne yawan. Waenapan at at uruga kwarayo yawane no ginin ganan wan nop mega anun evip amon.

⁴ Uayo amun mega kwarayo waneni menan waenapan uayo wa taragases. Kwarayo den wa taragases anega wane, "Me aigap, da miniwa garawaseta? Ame da uon di!"

⁵ Uayo, ame Seitan, aro wanen kwarayo apan apan ta God inap wawa koko ta waiwandin. Amun wareni gapan en yampo degede yaumakap taiwandin.

⁶ Noa watape God inap wawa koko taiwandin amba God yaua nipec diwandini amba God Paewa ge kimani waenapan wanumuine nagire den inamup wawa koko tamuiwandin.

⁷ Amun wareni gapan kwarayo God waenapan mega inamup ita anan ta garao mumen. At, nop amba dugup ugup ugupe nagirewa aro amun ware namumup yoniwandin.

⁸ Waenapan pia wanumuine nagirewa kwarayo wa taragatain. Wataget iragen piup ya wandeni wamewa gapan Man Sip Otua, Iesu, nunan boeni apanewa ame inak bukaewa gwanap waenapan mega yaumua ok sen. Da da yaumua ap mepe seane, mu kwarayo ya wa taragatain.

⁹ Darinaya den wandepi anun.

¹⁰ Orup da da to warapen anupi, ame God anuini gapan di to wareta. Da da togurat anupi, God anuini gapan toigureta, da ya wakaumeta. Menan God waenapan mega koewa ma inamup tauapen menan kaimakaet tumban amo anu tumat den wanumopo.

Man puawa piup nokap tauen

¹¹ Man puawa da sia wariwa umap piup nokap taueni ne bet inana gapan yawan. Man sip otua i done dere dena mini go nop mega uayo waini mini wan.

¹² Wariwa mame kwarayo den wandeni amba aro amun mega kwarayo gapan ware taiwandin. Wariwa nanam mumeni gapan piup waenapan mega kwarayo wa taragases. Kwarayo namua ame guin tositnagen bop pokewa ta sia inakaen inap wa taragases.

¹³ Wariwa yo paua ugup ugup bawarevet taiwandin. Me wani gapan waenapan yamamup merao kiman gapan pipa visen.

¹⁴ Wariwa paua ugup ugup taiwandini gapan piupa wanumone nagirewa ebo aopan ewamon. Ap taiwanidini gapan, kwarayo den yaviwandini. Wariwa waenapan Kwarayo guewa mega nanimup kaitapen menan nanam mumen.

Kwarayo viripe tapen menan kereba gapan Kwarayo tone bop pokewa ta sia inakaen.

¹⁵ Kwarayo guewa kaitane Wariwa amun sia ware guewa ame gaup upunen nop waiwandin. Waenapan guewa inap ya wa taragasepiwa ame menan Wariwa guewa kaitane ame nop wapi gapan guramop borit wain.

¹⁶ Amba Wariwa waenapan iravi, yau tananeniwa go mondigawa, purapuse denawa go kaya kayawan nagirewa, ago taine o muk anuine taine nagirewa, mu iravi nanam mumeni gapan yatup paua nanimu nutup gapan go namu bonap batamen.

¹⁷ Waenapan da da paua ya batamene puraput gare gare une ya tap. Yatup paua ame kwarayo yaua megawa o yaua ok seni agi megawa.

¹⁸ Nop mame anu awane nagire anu tap. Kwarayo yaua ok seni agi mega batnage anup, ame 666.

14

Wak ewake wan

¹ Amba bet inana gapan yawana ame Man Sip Otua tunup yaua Saion gagap kiman yonen. Tautanan yonane nagirewa 144,000. Ian ame God Man Sip Otua Mamewa dere yaumua namu bonap ok seane.

² Nop da kimani taueni ame tapan ununkewa mini amba kiman waini mini anun. Nop ame sinao pepetawa gurine mini.

³ God watat mega kasiga mena manao taini da bayabayapa amba kwayup tamuine nagire namumup yonan wak ewakewa da wan. Waenapan 144,000 gat watoni Iesu deniwa gamup piup gapan une tamoni nagirewa mu mugenat wak ewakewa ame anupen menan go ian upine ya anuin.

⁴ Apan ameme imu pose daiton God men anuiwanum ugu wapi waen den ya inatan. Man Sip Otua ewap at at amuiwanum. Apan ameme waenapan iravi nimakamup Iesu koewa muga wat musen amba God ge Man Sip Otua dere inamup maup diwatan mini yan tan.

⁵ Mu potamu woup sen koewa ya tan aopan da ya wan.

Anea yampo oit wan

⁶ Amba anea da kiman yaumakap tau aiwandin. At, nop ge dugup ugup ugape nagirewa Iesu Oit Mega Kakaewa yaibobot noa wadidiamopen menan tauen.

⁷ Anea kaimakaet anega wan, "God waenapan wanene tamopen wamewa tauen menan viripe tan, yaua ao waran. Piup kiman puiman amba kaum urewa den wan venat mutane apanewa inap wa taragasesen," ap anega wan.

⁸ Wani amba anea dawa taue anega wan, "Tave di, pa baware Babilon gearen uon tan. Pa ame waen negin gagape mini, ame God menan ya anuiwanum amba kaum kaimake dena, yaua wain, waenapan iragi muneni menan nan mu bumbarawtan. Waen negin gagape ame eyao tuan taine mini tainiwa guegue ame pa Babilon nagirewa God tandayasene amba ugape wa taragasiwanum."

⁹ Anea derewa wani boge anea yampoa taue uma anega wan, "Waenapan da da kwarayo guewa nanimup kaitane den inamup wa taragasepi man yatup paua mega namu bonap o nanimup gapan batamepi

¹⁰ God ugu gangan mega kaum wain umap sip mega gapan damage muneta. Ugu gangan ame ya bigareta. Waenapan ameme Man Sip Otua anea mega den yamamup merao yagimuiwan dagin yananagaet aninke den guramuiwandata ugu vegaek anu taniwanumain.

¹¹ Mum wam pot pot merao dagin ameme doriwandata. Kwarayo guewa nanimup kaitane amba inamup wa taragasene amba yatup ame man yaua paua mega ame wapimup batamene nagirewa mum wam pot pot inamup wagat da uon." Anea ap anega wan.

¹² Menan God waenapan mega koewa ma inamup tauapen menan kaimakaet tumban amu anu tumat den wanumopi ame da da God anu tumat ta ayamase den yambuni wanumoin.

¹³ Amba nop da kimani anega tauen, "Nop nega ma ok se. Endi evi amba

waenapan Ayop nuga God nao mega taine menan borit wapiwa mu aton anuin."

Ap anega wani amba God Guewa gare wan, "E, mu di aton anuin. Nao muga kaimakaet tane menan mu wagat wanumoin amba mu garewa muga ewamup mu den kiman amooin."

Piup maup taupei wamewa

¹⁴ Amba irikup pomponu gagap dim da apan umap ae wandeni bet inane gapan yawan. Ayop payu gwayayame yananagaet den iap tonasen amba maup wamewa taba gurapen menan kao panapan wani dena nanip waren.

¹⁵ Anea da ugup sia God Paewa kiman gwanap tau ae irikup gagap wandeni inap uma anega wan, "Maup wamewa piupa tauen taba mega inin geraget tani matakamepen wamewa tauen. Kao panapan gega wani dena wat onak gut."

¹⁶ Wani boge irikup gagap wandeni apanewa kao mega gan pipa petakae enitamen.

¹⁷ Anea da ugup sia God Paewa kiman gwanap tau ae kao panapan wani dena dia sia wat onen.

¹⁸ Amba anea da ugup sia God watat mega dawa gagap merao kwayup taini apane ame tauen. Anea kao panapan wani dena wareniwa inap kaimakaet anega dien, "Kao gega wat taba gureip piupa bo inane wanumamune ame petakae en."

¹⁹ Wani menan anea pipa petakae enitame ae taba gureip kaum wain magosine arewa gapan aipa uasen. Magosine arewa gapan God anavi mega ugu gangan mega baware yawain.

²⁰ Gureip tavewa pa sewa garip magosen. Magosene kaum wain viseni ningoe tau aeni ame waenapan deniwa. Denip ao doren ianu omewa tauen amba ase ma pesewa om megawa ame paua 200 negina nukap inine omewa, ap umap.

15

Nemoro uiwa

¹ Amba kiman paua mega baware da yawan non kap wan. Anea nani yamu

dere waenapan bagu sisi verisiwa munapen menan tam onamon. Mu bagu sisi ame anupi God ugu gangan mega uon tata.

² Amba kaum awan gio umap merao ganase den biro baro tan ne yawan. Waenapan da da kwarayo amba me guewa nanimup kaitane den amba orup ame yaua ok seni tavewa megawa 666 den garawat mumine nagirewa ap mepe kaum awan etop yonane. God muneni sinao pepetawa mega mini daiton daiton tambun yoniwanumune.

³ God nao mega apanewa Mosis amba Man Sip Otua dere wak muga anega waiwanumun,

Ayop nuga God, ge aro aigap iragena apanewa.

Dim dim taingiana ame ugup ugup iravi kakae iragen.

Waenapan at at iravi gapan, mu ayop muga ge daiton di.

Negin gega iravi tamana tavewa di.

⁴ Ayop nugawa, nu iragi virip gega tat yauga ao warat.

Iwa ge gegenat potaga woup seniwa.

Ge tamana taiana apanewa menan nu iravi guegue,

ap yavintoni menan waenapan at at iragi inagap tauat,

yauga ao warat wa taragat gimagait.

Wak ap anega wan.

⁵ Amba God Paewa tonanewa kimani watapen ame gwanap pa namdat pose woup seni ame bet inan yawan.

⁶ God Paewa gwanap anea nani yamu dere bagu sisi waenapan munapen menan daiton daiton tau amon. Wanup muga pomponu kakae iragen berit muga gwayayame den yananagaet toganemup taun.

⁷ Kasiga mena manao taini da bayabayapa daiton ap da ae anea nani yamu dere unup sera gwayayame den yananagaet daiton daiton munen. Sera ame gwanewa God yaibobot wandiniwa ugu gangan mega kaum mini no dotouen.

⁸ God aro amun mega baware oya oya den, dagin mini pa bararaen menan waenapan da gwanap ya amone. Anea nani

yamu dere bagu sisi muga muga wae-napan munep uon tapi gapan, amba pa gwanap sia anait.

16

God ugu gangan mega unup sera gwanap wanumon

¹ Amba nop baware da God Paewa gapan tau aen, anea nani yamu dere in-amup tauen anega wan, "Aisen, God ugu gangan mega unup sera ega ega gwanape kaum pipa ae damagen."

² Ap wani menan, anea namua ae sera mega kaum pipa ae wa damagen. Wadamageni gapan waenapan iragi kwarayo yatup paua mega batamen guewa nan-imup kaitane inap wa taragasene nagirewa omat mao aninke den namon.

³ Anea derewa sera mega kaum puimani wa damagen boge puiman apan bop tani deniwa umap entanen. Man tap kasigawa puiman gwanape iravi borit wan.

⁴ Anea yampa sera mega kaum bawarewa ge urewa den gagap wa damagen denip entanen.

⁵ Anea kaum kwayup tamuini apanewa God inap wani ne anega anun,

Ge potaga woup sen watawa endiwa wain-giana apanewa, endi waenapan wanene tamuiianawa ame tamana tavewa di.

⁶ Iwa mu waenapan gegawa ge nop gega waiwanumune nagirewa, den guramone denip visen.

Gare kaum denip entaneni munan napi tamana di.

Ame garewa muga wariwanum.

⁷ Ap anega wani nop da God watat mega gan tauen anega anun, "E, Ayop nuga God aro amun iragena apanewa, nop ame tavewa di. Koewa muga garewa munaana tamana tavewa di."

⁸ Amba anea degedeawa unup sera mega kaum wam gagap wa damageni amba God anuni gapan wam amunewa waenapan yagimon irok enamon.

⁹ Waenapan wam amunua baware ame yagimon irok enamoni menan God bagu sisi ap muneni men yaua wa kokoeragamen. Koewa muga ae ya vean God yaua ao ya waran.

¹⁰ Anea nani yamunaetawa sera mega kaum ame kwarayo watarewa gapan wa damagen. Wadamageni gapan kwarayo ame toemu mega mum tauen aro uon tan. Waenapan mega mum taue koewa muga vegewa baware anun inkae ankae waiwanumune.

¹¹ God kimani wandiniwa vek omat muneni menan wawa koko tan go mu koewa muga ae ya vean.

¹² Anea nani yamu daitonawa unup sera kaum mega kaum baware, Yu-peretis gagap wa damageni menan kaum tonaren. Ayop ita muga nagire den wam dotouini arewa gapan yamu asepagan dotouepen menan tonaren.

¹³ Amba guewa koerage yampo man giam gine namu mini uayo ge kwarayo ge God nop mega tave uon waini apanewa no nokamup tau amone.

¹⁴ Guewa ameme Seitan nao mega nagirewa. Yo paua ugup ugup ebo aopan gapan taiwanumun. Ita anan tapen menan guewa koerage yampo at at iragi tau amon ayop nagire iam iam tapen ere tan. Mu God aro apanewa wam mega baware evi amba me tandayasine nagirewa den ita anan tain.

¹⁵⁻¹⁶ Mu at daiton toboran wanumone Iburu nagire at ame nop muga yaua Amagedon dian. Nop ma sia anun. Iesu namu anega wan, "Yawan. Ne up apanewa umap karaua tauain. Nenan yama taine nagirewa aton anuin. Amba gan gorogot muga muga inamup den wandepi menan mu umam ya anuin amba waenapan ni aroga ya yawamoin."

Piup menao manao baware tan

¹⁷ Anea nani yamu derewa unup sera mega kaum gwoup gapan wa damageni nop da God Paewa gwanap watat gapan anega tauen anun, "Tan uon taitamen."

¹⁸ Wani boge yangwan waren kiman wan unuk ugup ugup anuton piup menao manao bawarewa da tan wataget waenapan piup menao manao ap umap da ya yawan.

¹⁹ At at pa iravi geamon. Pa sewa baware yaua Babilon semu yampo yau-makap seu dumon. Pa ame nagirewa koewa muga God imu ya oaraen menan

kaum kaimake denawa naine mini ugu gangan mega aigap aigap anu mumiwandin.

²⁰ Puiman topaneniwa iragi oak musen tunup verot warot wan pon tan.

²¹ Ugin aniat kaimakaet agim mara kibubu itaniwa mini kimani visen. Ugin agim mara kibubu mini kaimakaet itani den ap viseni gapan at piup nagirewa wa koeragam mumen. Ame menan waenapan itan vek bagu sisi koerage iragen mame inamup taueni menan nipec God inap diwanumune.

17

Waen negin gagap iniwa

¹ Amba bet inana umap yawana anea nani yamu dere unup sera muga daiton daiton tambune da taue anega wadianegen, “Ge onak. God waen negin gagape waenewa itan baware wanepi ewagain. Waen, ame pa sewa baware, kaum aruga etop gapan tune.

² Piup ayopewa aruga waen den wainan gogo ta iniwanunum. Piup ayopewa at muga muga waene apane koewa ameme yawan anune gapan kaum kaimake dena nane bumbawam taine mini koewa ame gapan den taiwanum.” Anea ap anega wadianegen.

³ Amba God Guewa imuna potana waren anea naunek aen pua tauaton. Ap mepe waen ame man puawa baware den-den da gagap wandeni yawan. Man i nise nise nani yamu dere i donewa aonagaet amba yaua ugup ugup koevet God inap wawa koko ogewa wapip ok sen.

⁴ Waen wanup mega ayop wanupewa dendeni bunip wat enen ben mega kakae iragen ugup ugup ame gwayayame yananagaet kakaewa amba agim ganase den iravi epiwa ukum umen. Sip gwayayame yananagaet den nanip waren. Waen koerage egan bainama umam noa wan tainiwa kaum sip mega no dotouen.

⁵ Me yaua maibe noa namu bonap anega sen, “Ne pa sewa baware Babilon. Ne waen iravi negin gagape inamua guegue ugup ugup wakaumane taine ibariwa ne.”

⁶ Waenapan kaum kaimake dena nane bumbawam taine mini waen ame God

waenapan megawa Iesu men guramone borit wane nagire den mu denip muga nan i bambamae taiwandin.

Waen maibe mega guegue mam

Ne Dion waen koewa ame bet inan gapan yawana nona kap wan.

⁷ Go anea singui wayawanegen, “Ge iwa dim ben noga kap waia? Waen guegue mega karauawa wadiagain. Man puawa gagap wandiniwa i nise nise nani yamu dere i donewa aonagaet guegue mega karauawa den wadiagain.

⁸ Man ame yawaana watagaet wanden endi ya wandia go evi urat nononga ni diriwa uoni ame dore no kaimap dotoueta amba God togureta. Wataget iragen piup ya wandeni wamewa gapan God waenapan mega yaumua inak bukaewa gwanap sen. Waenapan upi yaumua ya seni piupa wanumuine nagirewa man puawa yavepi no i kap wain iwa man ame watagaet wanden amba uon tan go evi sia taueta.

⁹ Nop ame menan anu awat. Man i nise nise nani yamu dere guegue ame togan nani yamu dere amba waen ame pa sewa ame aigap wandia.

¹⁰ I nise nise nani yamu dere guegue ame ayop apan nani yamu dere. Nani yamunaet namu borit wan amba daiton namu yoyo di taiwan amba ayop dawa ya tauia. Tauepi namu yoyo wam otu da megenat wandeta.

¹¹ Man puawa wata wanden amba uon tan evi God togurepi manewa me apan ayop nani yamu dere evenamu da amba me ayop nani yamu yampooa.

¹² Man i donewa aonagaet yawaana guegue ame ayop upi aonagaet go amun muga ya waran evi amba warain. Evi warepi man puawa den ayope tain go wam otu kamontu menan nononga uon.

¹³ Ayop ameme imumu daiton gapan amun aro muga man puawa wanain.

¹⁴ Ayop ame Man Sip Otua den ita anan tain go Man Sip Otua me Ayop Nagire Ayop mugawa Bawarewa Nagire Bawarewa mugawa. Me waenapan mega munan wan gangan mumen inap anu tumasine nagirewa den ayop nagirewa garao mumain.”

¹⁵ Amba anea sia wadianegen, "Waen ame pa kaum mainep wandeni yawaana kaum ameme waenapan aruga at, nop, dugup ugup ugape nagirewa.

¹⁶ Man i donewa aonagaet yawaana ame ayop nagire mu me den waen negin gagape anu koeamain. Waen guegue pa dim dim mega iravi up tap ni aroga wandaeta. Mu etua na amba upi omaya irain.

¹⁷ Mu God anuni tapen menan iwa God anut mega potamup baraen ap gapan imumu daitona gapan man puawa amun muga wanen. God namu apan ame munan wani tavewa iragi taupei amba amun muga uon tata.

¹⁸ Waen koewa ame yawaana guegue pa baware da. Ayop at at ugup ugup namu yoyo tamuiwan," ap anega wan.

18

¹ Amba anea da ugup amun mega baware kimani visen bet ine inana gapan yawan. Viseni gapan ganat mega piup ganase wan.

² Me kaimakaet anega wan, "Kaiwan, kaiwan, pa baware Babilon gearen uon tan. Pa ame airampu yon boran, guewa koewa ugup ugup pa mugawa, amba Gingiman nenip koewa ugup ugup pa mugawa.

³ Waen, kaum kaimake nani bumbam taini mini inak koe koe wainan gogo taiwandini gapan at at waenapan mugawa ta ewamon menan mu den wainan gogo taiwanumun. Piup ayopewa waen ap den tanan iwanumun koewa wat anamon. Waen ame, me imu pose puraput waren menan ap gapan puraput une gare gare taine nagirewa moni muga baware waran." Anea ap anega wan.

⁴ Amba nop da ugup kimani anega tauen anun,
Waenapan negawa, waen at mega ae vean.

Iwa wain ame koewa mega wat anaepi tawa,
amba sia me garewa itan bagu sisi mega den anune tawa.

⁵ Koewa taiwandini diriga aita dorin e kimani tauen.
God waen ame koewa mega imu ya oaraen me anuiwan.

⁶ Inayap koewa tani garewa e wanapen.

Koewa inayap tani ame garewa mega dere aigap sia entan wanen.

Bagu sisi eneni garewa bagu sisi dere aigap sia me wanen.

⁷ Waen wataget kwan puraput tamiwandin, amba mek yaua wabawaramiwandin om ap umap, bagu sisi me wanen.

Iwa endiwa den anega waiwan,
"Ne waen bawarewa da, ayop muga di. Kwapura ya tan.

Bagu sisi da inanap ya taueta, irip turup da ya wain.

⁸ Anega wani menan garewa ame bagu sisi baware, vek ato, irip, enup iravi wam daiton gapan me inap taueta."

Ayop nuga God waen wanene taini aroewa gapan waen ame etua tugup uon tata.
Ap anega wan.

Pa Babilon men kaiwan wan

⁹ Piup ayopewa mu waen den tanan iwanumun amba ugumu manat mutane menan waen omaya yagireni dagin doren i gapan yawan irip turup wane.

¹⁰ Mu paina nononga yonan iwa waen bagu sisi mega yawan tap tan anega wan, "Kaiwan, kaiwan, waen ame pa sewa aro bawarewa ame Babilon. Wam koni daiton gapan koewa mega garewa tauen," ap anega wan.

¹¹ Puraput une gare gare taine nagire waen ame menan irip turup wan iwa waenapan puraput muga wata une taiwanumune go endi une ya taiwanum.

¹²⁻¹³ Puraput muga une gare gare taiwanumune yaumu mam. Ben kakae yanayanagaet gwayayame den amba agim ganase den ugup ugup. Wanup ugup ugup gware den pepeku buinip pomponu dendeniwa garewa ugup ugup den. Oma tutu den ugup ugup. Dim dim da tavewa guewa gwat gapan oma garewa baware gapan kaitamon. Kereba dobu tum kuna kaimake ugup ugup. Taba ugup ugup den. Baewa ugup ugup dagin tutua den. Kaum kaimake amba oma osewa ugup ugup den. Man tap ugup ugup tuan kao sip osi den. Osi pimai warupini den.

Ago nagire moni men une tanewa. Mu waenapan di go garewa moni menan une taiwanumun. Puraput muga ameme.

¹⁴ Puraput une gare gare taine nagire waen ame inap anega wan, "Dim dim kakaewa menan anuingiana uon tan. Puraput gega kakae guragut ben gega ugup ugup uon tan sia ya warai," ap anega wan.

¹⁵ Puraput une gare gare taine nagire moni muga waen ap gapan tambune paina wandap yonan waen itan bagu sisi ware taiwandini yawan tap tan irip turup baware anega wan,

¹⁶ "Kaiwan, kaiwan, pa sewa bawarewa gase uon tan. Wata wanup kakaewa buinip amba dendeni den wat enen ben kakae guragut yanayanagaet gwayayame den amba agim ganase den ugup ugup panen.

¹⁷ Wam koni daiton gapan iragi wakau-men uon tan."

Wanagi puiman gagap amuine nagire ame wanagi i apanewa, nao taine baware mugawa, amba kwayup taine nagirewa iravi paina wandap yonan.

¹⁸ Pa igit wandeni gapan dagin doreni yawane amba uma anega wane, "Kaiwan, pa baware ap mini da uon di."

¹⁹ Dagugum tun pun waran irip turup anega wane, "Kaiwan, kaiwan, pa sewa baware yagiria. Wanagi iragi puiman gagap aneton moni nuga pa ap gapan tambuintoniwa. Wam koni daiton gapan wat momagen uon tan." Wanagi nagire irip ap anega wan.

²⁰ Pa yagiren uon tani menan kiman nagirewa aton di anun. God waenapan megawa Iesu watu enamot mega God nop mega waiana nagirewa iravi aton di anun. Iwa God enan pa sewa, ame waen koewa megawa, garewa wanen.

Pa Babilon gearen uon tan

²¹ Amba anea aroe dena da gwat baware iragen ware puimani aipa uare anega wan, "Gwat aipa uariangina mini God pa baware Babilon dume benage ae seta amba waenapan sia ya yawain.

²² Sinao toine, io, pum upunine ununkewa pa ame sia ya anuin. Nao ken kirat kiu kao da sia ap mepe ya di tain.

Tamudu parawa kweramine ununkewa sia ya anuin.

²³ Pa ame gapan dun ganasewa sia ya yawain. Naine mutat noa da sia ya anuin wat musen. Pa ame puraput gare gare taine nagire megawa wataget baware iragen go endi uon. Pa ame sintapun mega koerage ap gapan waenapan at at iragi aopan wa ewamon.

²⁴ Pa baware itan bagu sisi wareni iwa mu God nop mega waiwanumune nagirewa waenapan mega den guramon borit wan amba denip muga pa ame gwanap visen. Tave di, waenapan iravi anavi nanimup gapan toguramone borit wane nagirewa denip muga pa ame gwanap visen." Anea ap anega wan.

19

Garao mumeni wagewa

¹ Amba bet ine inana gapan yawana kiman gapan waenapan aruga iragen anega waiwanumune, "Kaewa kaewa, God yaua ao warat, God inap gaun baware. Me wat inakam nimaniniwa menan yaua ao warinain, aro amun mega wande aiwandan.

² Me tamana tavewa gapan wanene tainiwa. Pa sewa Babilon, ame waen negin gagape iniwa wainan gogo amba koewa ugup ugup taiwandini mini menan waenapan wat anamon menan God nemoro me inap tan. Waen ame God nave taine nagirewa guramon borit wane menan wanene ta garewa wanen."

³ Amba anega sia uma den wane, "Kaiwa, kaiwa, God yaua ao warat! God inap gaun baware. Pa baware igiren merao mega usenagaet dot iwandata."

⁴ Waenapan kwayup tamuine apane daiton apan da naniwa degede (24) kasiga mena manao taini da bayabayapa den God watat mega gagap wandiniwa inap omanimup enun anega wa taragasen, "Ame umap. God yaua ao warat! God inap gaun baware."

Man Sip Otua barip megawa

⁵ Amba den, God watat mega gapan nop da taueni anega anun, "God nuga wa atonatait. Me viripe den nao mega taine nagirewa yauya bawarewa go mondigawa iragi God me wa atonasen."

⁶ Ap anega wani, waenapan arugataet tapan arugawa ununkewa mini amba ait waini ununkewa umap ne anega anun, "God ao warat, God inap gaun baware. God aro amun aigap iragenawa apanewa, nu ayop nugawa di!"

⁷ Nu aton anut potanu tarep warep yaua ao warat. Iwa Man Sip Otua Iesu naisepi wamewa tauen, waen mega ben waren wandia.

⁸ God wani gapan waen wanup mega kakae iragena, pomponu wat enen." Wanup kakae iragena pepeku wani ame God waenapan mega mu tat muga kakaewa ame.

⁹ Amba anea inanap anega wan, "Nop ma ok se. Man Sip Otua naimopi baripewa munan wan onamopi nagirewa aton anuin." Wani aigap sia anega wan, "Nop ame tavewa God megawa."

¹⁰ Ap anega wani, ne wa taragasepen menan namup omaninap enuna go me anega wadianegen, "Ae ve, ap ya ta! Nu gende Iesu noa warine nagire amba anu tumasine nagirewa den. Nu iravi Iesu wat arogameni noa anu tumasivin menan God megenat wa taragat ne ya wa taragat nimanegē." Anea, ne manega dienegen. Iesu wat arogameni noa aroewa gapan God no oise waine nagirewa nop ugup ugup waenapan wadidiamuiwanum.

Apan man osi pomponu gagap tauen

¹¹ Amba kiman watapen man osi pomponu ne yawan. Apan man gagap wandeni yaua Ayamat ge Nop Tavewa Apanewa. Koewa kakaewa wanene tamana om warini gapan ita anan taiwan.

¹² Yamewa merao umap doren amba ayop payu mega iape aruga. Yaua da wapip karaua sen, go yaua ame, me megenat anuiwan.

¹³ Wanup umaseni denip enu batamen, me yaua diane God Nop Megawa.

¹⁴ Ita anan kimaniwa nagirewa me evip amon wanup muga gwambenben pomponu wat enane osi muga pomponu ame gagap amon.

¹⁵ Kereba wani den me no nokap tau aer. Kereba ap gapan waenapan at at guramuiwadata. Kepata nanip ware waenapan kaimakaet namup yoniwadata. Apan da taba gureip tavewa magosen kaum wain viseni umap osi gagap taueni apanewa God aroe amunu dena apanewa ugu gangan mega baware koewa da waenapan muneta.

¹⁶ Wanup mega gagap amba agua gapan me yaua ok anega sen. Yaua ame, Baware Nagire Bawarewa mugawa Ayop Nagire Ayop mugawa, ok sen.

¹⁷ Amba anea da wam gagap yoneni yawan. Nenip man tap ugup ugup nainewa kimani yaumakap tau amuiwanumune inamup nop uma wan, "On-aen, mapa God barip mega gapan iamen,

¹⁸ Waenapan etua nan. Ayop nagirewa ita yamewa nagirewa amunu dena nagirewa osi gagap amuinewa osi muga den apan ugup ugup yaumu bawarewa mondigawa muk taine ago taine nagire iravi etumua nan." Anea nenip ap anega diamon.

¹⁹ Kwarayo amba piup ayopewa, mu ita nagirewa den iam iam tauan apan osi gapan wandeni apanewa ita mega nagire den anan inamup tapen tauane, ne yawan.

²⁰ Tauane gapan kwarayo ton waran. God nop mega tave uoni waiwandin yo paua ugup ugup taiwandini apanewa ame den waran. Apan ame waenapan kwarayo yatup mega paua wapimup batamen kwarayo guewa nanimup kaitane inap wa taragasene nagirewa paua ame taiwandini gapan aopan ewamon. Menan kwarayo amba God nop mega tave uoni waiwandini apane dere tambun kaum awan merave dena dagin yananagaet aninke den gwanap aipa uatamen.

²¹ Apan osi gagap wandini apanewa kereba no nokap tau aeni gapan anavi mega ita nagirewa guramon borit wan. Man tap naine nenipewa tauan etumua nane bagumu bim bam wan.

20

Anea da Seitan ware taun

¹ Amba bet inan gapan yawana anea da kiman gapan aoma visen. Urat nononga diriwa uoni tonan mega tumtumewa damik baware den nanip tambun yawan.

² Anea taue wataget mek wataget amba wandiniwa mokarewa yaua dere Deboge Seitan ame ware damaga panen wardeni ame en mega arugataet 1000 wande en.

³ Anea Seitan paneni urata aipa uaren tonan bore gitnagen. Seitan piup nagirewa en 1000 gwanap sia aopan ya wa ewamopen menan urata warden. En mega 1000 uon tapi wam otu konintu da di vesepi me tau aeta.

Iesu en 1000 potap ayop taiwandin

⁴ Amba ayop nagire watat muga gagap ae wanumone yawamon. Mu waenapan wanene tamopen menan aroe waran. Amba waenapan upi mu guamua yawamon, mu God nop mega Iesu oisewa anu tumasine menan anavi muga tambun toguramone borit wane nagirewa. Ian ame kwarayo guewa nanip kaitane inap den ya wa taragasan yatup paua mega namu bonap nanimu gapan den ya batamen. Mu borit wane go inak muse sia yon wanumoin amba en 1000 gwanap Keriso den ayop tain.

⁵ Mu yon wanumoine gapan ame bop namua nagirewa yon wanumon. Go borit wane nagire upi wam ame gapan sia ya yon wanumon. En 1000 uon tapi amba inak muse sia yon wanumoin.

⁶ Bop namua yon wanumone nagirewa aton baware imu pose woup seni nagirewa. Go bop eviwa inamup sia ya manamota aro mega inamup ya taueta. Mu God Keriso dere munan pirisi nave ta iwanumain. En 1000 gwanap Keriso den ayop taiwanumain.

God Seitan aro mega uiwa garawasen

⁷ En 1000 uon tani amba Seitan urata vetan.

⁸ Urata tau aeni waenapan piup ginewa yamu yamu yaua Gok ge Megok nagirewa aopan wa ewamopen aen. God inap anan

tapen menan Seitan venamu wan wae-napan arugataet iragen puiman gerase umap tauane.

⁹ At at ugup ugup pusimup onamon tauan. God waenapan mega at daiton ap mepe toboran go anavi muga tauane God waenapan mega amba pa Ierusalem den ikukuk enpanamon. Anavi muga anan tapen tane go merao kimani vise yagit momak mumen uon tan.

¹⁰ Borit wane amba God Seitan ware, ame borit wane nagirewa ameme aopan wa ewamoni apanewa, kaum awan merave dena dagin yananagaet aninke dena ame gwanap aipa uaren. Merao ap potap kwarayo amba God nop mega tave uoni waiwandini apanewa den wanumon. Ap mepe merao potap mum wam pot pot ugu vegaek anuiwanumain usenagaet wande aiwadata uon ya tata.

God wanene tanepi uiwa

¹¹ Amba ayop watarewa baware pomponu da apan gagap ae wardeni den yawan. Me namup piup kiman sia ya wanumot wan menan mu tap amon sia ya yawan.

¹² Amba borit wane nagirewa yaumua bawarewa mondigawa den God watat mega namup yonane yawamon. Buka mega baime uasen amba buka dawa inak nuneni bukaewa den wataben. Waenapan kakae koerage taiwanumune ok seni gapan wanene tamon.

¹³ Piiman wataben amba puimani borit wane nagirewa God ine amon. Bop ge Bop Arewa wataben waenapan muga God ine amon. Dim dim taiwanumune gapan wanene tamon.

¹⁴ Wam ame gapan Bop ge Bop Arewa aro muga uon tan kaum awan merave dena gwanap aipa uasen. Awan merave dena guegue ame bop derewa.

¹⁵ Waenapan da da inak bukaewa gapan yaumua ya seni nagirewa kaum awan merave dena gwanap aipa uasen.

21

Piup ewakewa kiman ewakewa

¹ Amba piup kiman ewakewa bet ine inana gapan yawan. Piup kiman namua puiman den oak mutan.

² God pa sewa mega woup seniwa ame Ierusalem ewakewa watu enen kimani visiwandin yawan. Waenoror ewakewa naitapen menan ben mega wat wanine mini pa ame tauen.

³ God watat mega gapan nop baware da taueni ne anega anun, "Yawan, God inat wandet mega endi waenapan inamup. Tanamo iniwadata mu waenapan mega tain amba God mu God muga tata menan God memek di den wanumoin.

⁴ Negin namua uon tan. Yamamu doge iravi wat museta. Sia ya borit wain menan orup da boeni menan iripewa ame da sia ya wain. Bagu sisi menan irip sia ya wain amba vek da sia ya anuin." Nop ap anega tauen.

⁵ Amba apan watat gagap wandini apanewa anega wan, "Ne endi wapena dim dim iragi ewakewa venat muse tau amoin." Wani inanap sia anega wan, "Nop ma ok se iwa nop tavewa di, gego da uon."

⁶ Ap wani sia wadianegen, "Iravi umap taitamen. Ne wam ibariwa amba wam verisi apanewa. Yauna dawa Alopa ge Omega. Waenapan da da megamu pakaraepi inak yaibobot kaume urewa garaet muta munain.

⁷ Waenapan da da koewa garao mumepi munan anega tain. Ne God mugawa mu otun wainawa.

⁸ Go ian upi oit nega wawa tawa anuinewa amba inanap ya anu tumasinewa inak koe koe tainewa, evene wai nanip borit wainewa, wainan gogo tainewa, kayao banao tainewa, guewa kaitane inap wa taragasinewa ebo waine nagirewa, mu iravi kaum awan merave dena dagin yananagaet aninke den gwanap wanumoin. Merao arewa ameme bop derewa."

Pa Ierusalem ewakewa

⁹ Amba ame namu anea nani yamu dere unup sera muga daiton daiton tambune, anea da tauen. Unup gwanap ame wae-napan bagu sisi nani yamu dere uiwa muneni kaumewa den. Ne inanap tau anega wan, "Ge onak, waenoror ewakewa Man Sip Otua naitapen taini ne ewagain."

¹⁰ Anega wani God Guewa imuna potana waren anea naunek ae tunup kanama da idewap tauaton. Tauatoni

God pa sewa woup seniwa ame Ierusalem ewakewa watu enen kimani visiwandin yawan.

¹¹ Pa ame God ganat mega ewa waren. Ganat ame gwat kakaewa da garewa mega baware umap ganase wan, pa ame ase ma yavingina nini yayak waren.

¹² Pa didi mega nononga paina tonan mega aonagaet pusinawan dere. Anea aonagaet pusinawan dere tonana daiton daiton yoniwanum. At Isurero nagire dugup muga aonagaet pusinawan dere tonan muga daiton daiton yaumua ok sean.

¹³ Tonan yampo wam dotouini gapan, amba tonan yampo wam gearini gapan amba sia tonan yampo maine yamu amba tonan yampo maine yamu.

¹⁴ Pa didi mega ikukuk enu tau amone ibariwa gwat aonagaet pusinawan dere. Gwat gagap Man Sip Otua watu enamot mega apane wai aonagaet pusinawan dere yaumua ok sean.

¹⁵ Inanap nop wani anea ame om gwayayame yananagaet den ware pa didi tonan mega uruga om paua waren.

¹⁶ Pa sewa ame tuewa megawa yonini paua megawa gine daiton. Om gan pa sewa ame paua wareni nonongewa anse 100,000 wagu umap. Amba pa sewa ame yonini paua mega ap umap sia di.

¹⁷ Anea pa didi mega yonini paua om waren wagu yampo. Anea ame waenapan om warine ona mega gapan om waren.

¹⁸ Didi gwat mega keri tupe den gapan tun. Pa gwat mega gwayayame yananagaet den kakae iragen gapan tun, ame ase ma yavintoni nini yayak waren.

¹⁹⁻²⁰ Pa didi mega ibariwa gwat ame gariwa gapan gwat kakaewa upi aigap sia batamen. Batamene gine ugup ugup tutup ame dendeniwa, kasigawa, tavetawa, yanayanagaetawa, pomponua, pumpuniwa, iravi ganase dena ame aonagaet pusinawan dere ame garewa muga baware.

²¹ Pa tonan mega aonagaet pusinawan dere gwat pomponua kakaewa da yaua pero gapan kaitane. Pa negin megawa gwat gwayayame yananagaet den gwanap ase ma yavingina nini yayak waren.

²² Pa Ierusalem ewakewa gwanap God Mup Paewa da ya yawan iwa Ayop nuga God me aroe amunu dena apanewa amba Man Sip Otua den ap mepe wanumune menan mup paewa ame muk di.

²³ Pa ame wam siragam ganasewa menan sia ya anuin iwa God ganat megawa ewa aigap wandia. Pa dun megawa Man Sip Otua.

²⁴ Ganat ap gapan at at iragi waenapan ap amooin. Piup ayopewa amun kakae guragut muga ap mepe den tauain.

²⁵ Pa tonan watapane boge wam wam aroga wanumoin. Ya toborain iwa mum da sia ya taueta.

²⁶ At at iragi waenapan amun kakae guragut muga den tam pa sewa ame gapan tauain.

²⁷ Guegue koerage da da bigi dena ugup ugup aopan waine den pa ame gwanap ya tauain. Man Sip Otua inak munini bukaewa gwanap yaumua seni nagire megenat pa ame gwanap unugain.

22

Kaum inak kaumewa oma inak omaewa

¹ Amba anea inak yaibobot kaumewa gwayayame den waenapan napi yaibobot wanumopi ewanegen. Kaum i dem taiwandin God Man Sip Otua dere ayop watat muga gwanap kaum ase ma taiwandin.

² Pa sewa me negin megawa yaumakap gapan kaum ame tau aen. Kaum etop etop inak nunini omaewa yanan tavewa muga ugup ugup aonagaet pusinawan dere. Endaiton gapan siragam gwanap gwanap tavewa mugawa iamuiwanum. Oma ame baewa dom gigit mugawa at at iragi waenapan muga ap gapan inak wariwanum.

³ Dim dim God koewa dieni pa sewa ame gapan ya taueta go God Man Sip Otua dere watat muga ap mepe wandeta. Amba ap mepe God nao mega taine nagirewa God Man Sip Otua dere wa taragasiwanumain.

⁴ God gine namu yawain amba God me yaua waenapan namu bonap se wanumop yawain.

⁵ Ayop God nuga ganat muga nunepi gapan mum da sia ya taueta wam ge dun

menan sia ya anuin. Waenapan megawa ayop ta yaibobot wanum amuiwanumain.

Iesu sia taueta

⁶ Anea sia wadianegen, "Nop ame tavewa di gego da uon. Ayop nuga God me Guewa nop oit waiwanumune nagirewa munini apanewa, me anea mega watu eneni gapan dim dim konintu tauepi noa God nao mega taine nagirewa wa ewamon," ap anega wan.

⁷ Amba Iesu anega wan, "Ge anu. Ne konintu tauain. Waenapan dim dim evi tauepi nop buka ma gapan anu tapi aton anuin," ap anega wan.

⁸ Ne Dion nop ame yao anuina apanewa. Yao anuna ewap ne anea wa ewanegeni wa taragasepen menan namup omaninap enun.

⁹ Go me dianege anega wan, "Ae ve, ap ya ta. Ne den Iesu noa warina amba gwanik waigawa ame God no oise waiwanumune nagirewa amba God nop mega ayamase taine nagirewa den menan God megenat wa taragat ne ya wa taragat ni manege." Ap anega wan.

¹⁰ Anea sia anega wan, "Dim dim evi tauepi noa mame goandage ya wa ya tobora iwa nop ame wam mega konintu taiwan.

¹¹ Koewa taine nagire koewa sia di tain amba umam noa taine nagire ap uap sia di tain. Kakae taine nagire kakaewa sia tain amba potamu woup seni nagire uap woup sep di wanumoin." Ap anega wan.

¹² Iesu sia anega wan, "Wapena anun. Ne konintu tauain waenapan garewa muga wat ongain da da kakaewa o koewa taiwanumune garewa muga muga munain.

¹³ Ne wam ibariwa ge wam verisiwa apanewa. Ne Alopa ge Omega ame namua eviwa apanewa." Iesu ap anega wan.

¹⁴ Waenapan potamu woup seni umap wanup muga bigi warepi gapan aton anuin. Inak munini omaewa tavewa nain amba pa sewa ewakewa Ierusalem tonanewa unuk amooin.

¹⁵ Go pa sewa garipewa ame gapan eyao mini taine nagirewa, nuat kayao banao tainewa, wainan gogo tainewa, evene wai nanip borit waine nagire amba guewa

kaitane inap wa taragasinewa, ebo aopan waine taine nagire den pa garip wanumoin.

¹⁶ Iesu Dion sia wadien, “Ne Iesu, oitana mame dugup nega nagire anupen menan anea nega inagap watu enan. Ne apan Devit naewa megawa. Ne buanae orewa ganat nega inayap tauowan.” Iesu ap anega wan.

¹⁷ God Guewa Iesu dugup megawa waenoro naitat ewakewa mini anega Iesu inap wan, “Ge onak.” Nop mame anuine nagire den anega Iesu inap wan, “Ge onak.” Megamu pakaraeni nagirewa onamop. Da da inak yaibobot kaumewa garaet ware nat anupi onamop.

Nop verisiwa

¹⁸ Ne Dion waenapan da da dim evi tauepi noa mame anuiana wadiaepena agun anun. E da da nop mame aigap sia wane God bagu sisi waenapan munepi ok mame gwanap batnagetonu uap sia di inayap taueta.

¹⁹ E da da dim evi tauepi noa ok mame gwanap seana semu da aipa uarene inak nunini omaewa tavewa mapa batnagetonu semu egawa God waseaeta amba pa sewa mega, Ierusalem, gwanap ya wanai.

²⁰ Nop mame tavewa tauepi oisewa waini apane Iesu anega wan, “Tave di, ne konintu tauain,” ap anega wan. Ame umap. Ayop nuga Iesu, ge onak.

²¹ Ayop nuga Iesu waenapan mega uruga garaet wat aipakam imaep.